


Kameethari Ñaantsi: ikenkitha-takoitziri

awinkatharite Jesucristo; Owakerari

aapatziya-wakagaantsi



New Testament in Ashéninka, Ucayali-yurúa (PE:cpb:Ashéninka,  
Ucayali-yurúa)

**Kameethari Ñaantsi: ikenkitha-takoitziri awinkatharite Jesucristo; Owakerari  
aapatziya-wakagaantsi**

**New Testament in Ashéninka, Ucayali-yurúa (PE:cph:Ashéninka, Ucayali-yurúa)**

copyright © 2000 Wycliffe Bible Translators, Inc.

Language: Ashéninka, Ucayali-yurúa

Translation by: Wycliffe Bible Translators, Inc.

Ashéninka, Ucayali-yurúa [cpb], Peru

**Copyright Information**

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ashéninka, Ucayali-yurúa

**© 2000, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 23 Aug 2023 from source files dated 29 Jan 2022

03413587-4161-5845-9f63-68583816dfcd

## Contents

MATEO . . . . .	1
MARCOS . . . . .	52
LUCAS . . . . .	81
JUAN . . . . .	132
RANTAYETAKERI . . . . .	168
ROMA-SATZI . . . . .	215
1 CORINTO-SATZI . . . . .	237
2 CORINTO-SATZI . . . . .	260
GALACIA-SATZIITE . . . . .	274
EFESO-SATZIITE . . . . .	282
FILIPOS-SATZIITE . . . . .	290
COLOSAS-SATZIITE . . . . .	296
1 TESALÓNICA-SATZI . . . . .	301
2 TESALÓNICA-SATZI . . . . .	305
1 TIMOTEO . . . . .	308
2 TIMOTEO . . . . .	314
TITO . . . . .	319
FILEMÓN . . . . .	322
HEBER-THATORI . . . . .	324
SANTIAGO . . . . .	342
1 PEDRO . . . . .	348
2 PEDRO . . . . .	354
1 JUAN . . . . .	358
2 JUAN . . . . .	364
3 JUAN . . . . .	365
JUDAS . . . . .	366
ROÑAAGAITANTZIRI . . . . .	368

## KAMEETHARI ÑAANTSI ROSANKENATAKERI MATEO

### *Icharineyetari Jesucristo (Lc. 3.23-38)*

<sup>1</sup> Jiroka iwairopaini icharineyetari Jesucristo. Tema iriitake icharine David-ni, eejatzi Abraham-ni. <sup>2</sup> Ikanta pairani Abraham-ni, itzimake itomi iitakeri Isaac. Ikanta Isaac tzimanake itomi irirori, iitakeri Jacob. Ikanta Jacob tzimanake itomi irirori, iitakeri Judá. Te apaani ikanta itomi Jacob, osheki itomipaini. <sup>3</sup> Ikanta Judá rowaiyakaakawo Tamar, iitakeri Fares, iriima itsipa iitakeri Zara. Ikanta Fares tzimanake itomi irirori, iitakeri Esrom. Ikanta Esrom tzimanake itomi irirori, iitakeri Aram. <sup>4</sup> Ikanta Aram tzimanake itomi irirori, iitakeri Aminadab. Ikanta Aminadab tzimanake itomi irirori, iitakeri Naasón. Ikanta Naasón tzimanake itomi irirori, iitakeri Salmón. <sup>5</sup> Ikanta Salmón rowaiyakaawo Rahab, iitakeri Booz. Ikanta Booz rowaiyakaawo Rut, iitakeri Obed. Ikanta Obed tzimanake itomi irirori, iitakeri Isaí. <sup>6</sup> Ikanta Isaí tzimanake itomi irirori, iitakeri David. Iri pinkatharitaintsiri. Ikanta pinkathari David rowaiyakaakawo iina Urías, iitakeri Salomón. <sup>7</sup> Ikanta Salomón tzimanake itomi irirori, iitakeri Roboam. Ikanta Roboam tzimanake itomi irirori, iitakeri Abías. Ikanta Abías tzimanake itomi irirori, iitakeri Asa. <sup>8</sup> Ikanta Asa tzimanake itomi irirori, iitakeri Josafat. Ikanta Josafat tzimanake itomi irirori, iitakeri Joram. Ikanta Joram tzimanake itomi irirori, iitakeri Uzías. <sup>9</sup> Ikanta Uzías tzimanake itomi irirori, iitakeri Jotam. Ikanta Jotam tzimanake itomi irirori, iitakeri Acáz. Ikanta Acáz tzimanake itomi irirori, iitakeri Ezequías. <sup>10</sup> Ikanta Ezequías tzimanake itomi irirori, iitakeri Manasés. Ikanta Manasés tzimanake itomi irirori, iitakeri Amón. Ikanta Amón tzimanake itomi irirori, iitakeri Josías. <sup>11</sup> Ikanta Josías tzimanake itomi irirori, iitakeri Jeconías. Irojatzzi itzimantanakari irirentzipaini eejatzi. Aripaite ripokaiyakeni owayeripaini poñagainchari Babilonia-ki, inoshikanakeri maawoini inampiki.

<sup>12</sup> Ikanta ripiyaiyaani inoshikaweetakari Babilonia-ki. Tzimapai itomi Jeconías irirori, iitakeri Salatiel. Ikanta Salatiel tzimanake itomi irirori, iitakeri Zorobabel. <sup>13</sup> Ikanta Zorobabel tzimanake itomi irirori, iitakeri Abiud. Ikanta Abiud tzimanake itomi irirori, iitakeri Eliaquim. Ikanta Eliaquim tzimanake itomi irirori, iitakeri Azor. <sup>14</sup> Ikanta Azor tzimanake itomi irirori, iitakeri Sadoc. Ikanta Sadoc tzimanake itomi irirori, iitakeri Aquim. Ikanta Aquim tzimanake itomi irirori, iitakeri Eliud. <sup>15</sup> Ikanta Eliud tzimanake itomi irirori, iitakeri Eleazar. Ikanta Eleazar tzimanake itomi irirori, iitakeri Matán. Ikanta Matán tzimanake itomi irirori, iitakeri Jacob. <sup>16</sup> Ikanta Jacob tzimanake itomi irirori, iitakeri José. Iriitake oimenthoritakariri María. Jiroka María irootake tomintakariri Jesús, irijatzi iitaitakeri Cristo.

<sup>17</sup> Iriira icharineyetakariri. Retanakawo Abraham-ni irijatzi David-ni, ikaataiyini 14. Ipoñaanaka David-ni irojatzzi inoshikaweetakariri Babilonia-ki, ikaataiyini 14. Ripiyaiyaini inoshikaweetakarira Babilonia-ki, irojatzzi itzimantakariri Cristo, ikaataiyini 14 eejatzi.

### *Itzimantakariri Jesucristo (Lc. 2.1-7)*

<sup>18</sup> Jiroka okanta itzimantakariri pairani Jesucristo. Eenitatsi José iinathori oita María, ikashaakawo iinanyaawo. Temaita iñiuro intsipawaityaawo. Iro kantacha María motzitate, ikantakaakawo Tasorenkantsi. <sup>19</sup> Tema tampatzikashireri rinake José irirori, ikowawetaka rookerome rimananeekiini, te ikowi rowaariperowaitero inke-makoitero itzimashiwaitaka eentsite. <sup>20</sup> Ikanta ikenkithashiryaawaita José tsireniriki, romishimpyaakeri imaninkarite Pawa ikantakeri: “José, icharine David-ni. ¿Oitaka

pikenkithashiryaantari pookero María? Payero, tema Tasorenkantsi kantakaawori omotzitantakari. <sup>21</sup> Arika intzimake eentsi, piiteri JESÚS. Iriira owawisaakotairine isheninkapaini ikaariperoshirewetakaga.” <sup>22</sup> Ari imonkaatakari maawoini rosanke-natakeri pairani Kamantantaneri, ikantake:

<sup>23</sup> Ari owaiyakya tsinane kaari ñeerine shirampari, intzime otomi, Iitaiteri Emanuel, akantziri apaanteki aaka: “Itsipatai Pawa.”

<sup>24</sup> Ikanta ikakitanake José, rimatakero okaatzi inintakaakeriri Pawa, raakero iinantaawo. <sup>25</sup> Te raawimaitawo irojatzitzi itzimantakari eewarite otomi. Iitakeri JESÚS.

## 2

### *Ripokake yowairentzi iñeeri Jesús*

<sup>1</sup> Itzimake Jesús nampitsiki Belén saikatsiri janta Judea-ki. Tema itzimantakari Jesús, ipinkathariwentantzira Herodes. Ari rareetakari nampitsiki Jerusalén yowairentzipaini ikenapaakero rishitowapiintzira ooryaa. <sup>2</sup> Rosampitapaakeri: “¿Tsika risaikika iwinkatharite Judá-ite owakera tzimaintsiri? Janta nonampiki nopoñaakaga, noñaake impokiro niyotantakari tzimake. Iroowa nipokantaiyarini noñaapinkathateri.” <sup>3</sup> Ikanta ikemawake pinkathari Herodes, antawo okantzimoshiretanakari, ari ikantakari maawoini Jerusalén-satzi. <sup>4</sup> Ikaimakaantakeri Herodes maawoini reeware Imperata-sorentsitaarewo, eejatzitzi maawoini yowairentziite, rosampitakeri: “¿Tsikajaantaka intzimeka Cristo?” <sup>5</sup> Ikantaiyanakeni iriroripaini: “Intzime janta nampitsiki Belén saikatsiri Judea-ki, ari okantzi rosankenare Kamantantaneri, ikantake:

<sup>6</sup> Isaiki nampitsi Belén janta Judea-ki, tekaatsi thainkerone.

Ari impoñeeyaari pinkathariperori janta. Iri jewatairine isheninkapaini Israel-iite nashitari naaka.”

<sup>7</sup> Ikanta Herodes, ikaimakaantakeri pokaintsiri iñeeri owakerari tzimaintsiri, rosampitakeri: “¿Tsikapaiteka piñaakeri impokiro piyotantakari tzimake pinkathari?”

<sup>8</sup> Ikamantakeri maawoini. Irojatzitzi ikantantanakariri irirori: “Ariwé, pimatero piyaate Belén-ki, pamine tsika risaiki eentsi. Arika piñaakeri, eejatzitzi pinkenapai jaka, pinkamantanaina. Niyaateeta naaka, noñaapinkathateri.” <sup>9</sup> Irojatzitzi riyaatantanakari. Eejatzitzi iñaanairi impokiro iñaakeri chapinki inampiki. Iñaatziiri rowaatzinkapaaka, iro riyotantapaakawori pankotsi risaikakera eentsi. <sup>10</sup> Ikanta iñaakerira rowaatzinkapaaka impokiro, kimoshire ikantaiyakani. <sup>11</sup> Areetaiyapaakani pankotsiki, iñaapaakeri eentsi eejatzitzi inaanate María. Rotziwerowashitapaakari, iñaapinkathatapaakeri. Roosoryaakotapaakero ramakeniriri, ipapaakeri ooro, ipakeri kasankayetatsiri, ipakeri eejatzitzi kasankaari kepishaatatsiri. Osheki owinawo jirokapaini. \* <sup>12</sup> Ikanta rimagaiyapaakeni, romishimpyaakeri Pawa, ikantziri: “Eero pipiyashitari Herodes. Pinkenanai otsipaki awotsi piyaatantaiyaari pinampiki.”

### *Raperaataitziri eentsipaini*

<sup>13</sup> Ari ripiyaawo yowairentzipaini. Rapiitairo imaninkarite Pawa riñaanatairi José rimishireki, ikantziri: “José, pishiyakayeri eentsi eejatzitzi inaanate nampitsiki Egipto. Ari pisaikeri janta irojatzitzi nonkantantaimiri: ‘Pipiyai.’ Awotsikitake Herodes ritsitokeri eentsi.” <sup>14</sup> Kakitanake José, ikamantanakero María, tsireniriki rishiyaka Egiptoki, raanakeri eentsi. <sup>15</sup> Ari risaikakeri janta, irojatzitzi ikamantakari Herodes. Ari imonkaataka rosankenatakeri pairani Kamantantaneri, ikantake:

Risaikawetaka notomi nampitsiki Egipto, nokaimairi ripiyai eejatzitzi.

\* **2:11** Ikantakoitziri jaka “kasankaari kepishaatatsiri” irojatzitzi iitaitziri “Mirra”.

<sup>16</sup> Ikanta Herodes, yotake ramatawitakeri yowairentzipaini, te ripiyashitaari. Ityaanakari imashirenka. Rotyaantake rowayeritepaini, ikantakeri: “Piyaate Belén-ki, paperaateri eentsipaini. Pithonkeri maawoini, petanakyaari owakera tzimaintsiri irijatzi tzimaintsiri apite rosarentsite.” Tema ikamantakeri chapinki yowairentzi tsikapaite iñaakeri impokiro. <sup>17</sup> Iro ikantantakeri pairani Kamantantaneri jitachari Jeremías, ikantake:

<sup>18</sup> Icheraaperotatzi Ramá-sato iragaiyani.

Osheninkathori Raquel-ni irakotakariri eentsitepaini.

Iro owashiretantakeri rowamayitaitakerowa maawoini eenchaanite. †

<sup>19</sup> Okanta osamanitake, kamai Herodes, irojatzi risaikake José nampitsiki Egipto. Ari riñaanatairi imaninkarite Pawa rimishirekiini, <sup>20</sup> ikantairi: “José, piyaatai pinampiki, paanairi peentsite pintsipataanairi inaanate. Tema kamai kowawetachari ritsitokerime.” <sup>21</sup> Rimatakeri José, piyaawo inampiki Israel. <sup>22</sup> Iro rareeweta José inampiki, ikantaitawairi: “Pinkatharitari Arquelao janta Judea-ki. Ripoyaataari ipaapateni Herodes.” Ari ikenkithashiretanaa José, eero ikenanai janta. Ari rapiitaitairi riñaanaitairi rimishireki, ikantairi: “Paamayaari Arquelao.” Irojatzi ikenantanaari José Galilea-ki. <sup>23</sup> Ikanta riyaatai, risaikapai nampitsiki Nazaret. Irojatzi imonkaatantakeri rosankenatakeri pairani Kamantantaneri, ikantake: Nazaret-satzi iitaiteri.

### 3

#### *Ikamantantakeri Juan omitsitsiyaatantaneri*

*(Mr. 1.1-8; Lc. 3.1-9, 15-17; Jn. 1.19-28)*

<sup>1</sup> Okanta pairani ochempiki saikatsiri Judea-ki, ripokake Juan omitsitsiyaatantaneri, ikamantantzi. <sup>2</sup> Ikantantapaake: “Pipakairo pikaariperoshirewaitake, irootaintsi impinkathariwentantai jaka Inkitesatzi.” <sup>3</sup> Iro riñaanetakari pairani Kamantantaneri jitachari Isaías, ikantake:

Richeraapiintaitake ochempiki, ikantaitzi:

Powameethatainiri Pinkathari tsika inkenapaake.

Poshiyakayero rotampatzikaitziro awotsi.

<sup>4</sup> Iithaaretakeri pairani Juan, rontyagaitziro iwitzi camello, romathakitakeri mashit-simashi. Rañaantari rowayetari maapataki, ririri iyaa pitsi. <sup>5</sup> Osheki pokashitakeriri pairani Juan, Jerusalén-satzi, Judea-satzi, ripokashitakeri eejatzi nampiyetawori antawaaki ñaa Jordán. <sup>6</sup> Thawetakoyetapaaka ikaariperoshirewaitakera, romitsitsiyaayetawakeri ñaaki Jordán.

<sup>7</sup> Ripokawetaiyakani Fariseo-paini, eejatzi Sadoc-iite, ikowi romitsitsiyaatyaame. Iro kantzimaitacha ikisathatawakeri Juan, ikantakeri: “Te pikameethashiretaiyini eeroka, poshiyashitakeri maanke. ¿Poshiyakaatzi eero rowasanketaitzimi? <sup>8</sup> Kyaaryooperorika pipakagairo tsika pikantaweta pairani, pinkameethashiretaiyeni, poshiyaawo pankirentsi kithokitatsiri. <sup>9</sup> Eero pikantashirewaitashita: ‘Naaka icharine Abraham-ni, te okowaperota nipakagairo nokaariperoshirewaitzi.’ Pinkeme nonkante: ‘Eero pishamewaitashita piitakaatzi eeroka ikowaperotanewo Pawa, tema kantacha ratziritakairo jiroka mapi, iroowa poyaataiyaraine incharineyetaiyari Abraham-ni.’ <sup>10</sup> Eerorika poshiyawo pankirentsi kithokitatsiri, richekakagaitakawo shacha owaatoki kaari kithokitatsine, ragaitziro ritagaitero.

† **2:18** Jiroka Raquel iro iinani Jacob, inintaperotanewo inatzi. Irooma Ramá nampitsi ini, saikatsiri iipatsiteki isheninkapaini Israel. Ikenkithatakotatziro Mateo okaatzi rosankenatakeri pairani Kamantantaneri jitachari Jeremías ikenkithatakotziro Raquel eejatzi Ramá-satoite okemaatsitaiyani, tema athataatyaawo Jerusalén-satoite onkemaatsitaiya arika rowamayitaitero eentsitepaini.

<sup>11</sup> Arika ripakaanairo atziri ikaariperoshirewetaka, ari nomitsitsiyaatantakyaari ñaa. Iro kantzimaitacha, awotsikitake matzirori ipinkatharentsitzu, nopinkathatitzari naaka, te onkantya roshiyakaina rimperatanewo nonowikyaantyaanariri i-zapato-te. Iriira oshiyakairone romitsitsiyaatantatyeeayarime Tasorenkantsi, romitsitsiyaatantatyeeayarime eejatzi paampari. \* <sup>12</sup> Tema arika ankowiitero awankire, otekakitziro, irojatzu ataantakyaawori otaaki. Iroowa aye okithoki, otekitakero, owakotakero. Ari inkantaiyaari Awinkatharite eejatzi, rinashiyetaiyaari atziri. Ineshironkayetairi inkaate kemisantairine, iriima kaari pakairone ikaariperoshirewaitzi, ritagairi paampariki kaari tsiwakanetatsine.”

*Romitsitsiyaata Jesús*

*(Mr. 1.9-11; Lc. 3.21-22)*

<sup>13</sup> Ripokake Jesús antawaaki ñaa Jordán, ipoñaakawo Galilea-ki. Ripokashitakeri Juan romitsitsiyaateri. <sup>14</sup> Te ikowaweta Juan romitsitsiyaateri Jesús, ikantawakeri: “¿Oitaka pipokashitantanari naaka nomitsitsiyaatemu? Eeroka omitsitsiyaatenane naaka.” <sup>15</sup> Rakanakeri Jesús: “Nokowaperotatzu pomitsitsiyaatena. Iro inintakaakenari Pawa.” Kowanake Juan, ikantziri: “Aritake nomitsitsiyaatakemi.” <sup>16</sup> Raanakeri, romitsitsiyaatakeri. Iro ritonkaawetanaka Jesús, oshiyanakawo ashitaryaanakityeeayaame inkite, iñagaitawakeri ripokashitakeri Tasorenkantsi ikenapaake inkiteki roshiyapaakari shiro. <sup>17</sup> Ikemaitatzu inkiteki ikantaitanake: “Notomi rinatzu jirika netakokitari, osheki nokimoshirewentakeri.”

## 4

*Inkaariperoshiretakagaiterime Jesús*

*(Mr. 1.12-13; Lc. 4.1-13)*

<sup>1</sup> Ikantakaanakari Jesús Tasorenkantsi, jatanake ochempiki, ari ikowawetakari Kamaari inkaariperotakairime. <sup>2</sup> Osheki kiteesheri risaikawaitake, ritziwentaka, ayimatakeri ritashe. Okaatzu 40 kiteesheri risaikawaitake. <sup>3</sup> Ikanta Kamaari, ripokashitakeri Jesús inkaariperotakairime. Ikantapaakeri: “Imaperotatyaaarika Itomintzimi Pawa, pimpeyero pan jiroka mapi, poyaaawo.” <sup>4</sup> Rakanakeri Jesús, ikantanakeri: “Eenitatzu osankenarentsi kantatsiri: Te apatziro onkowimotai pan oyaawo, iroowa kowaperotacha ankemisantairo maawoini ikantayetairi Pawa.”

<sup>5</sup> Ikanta Kamaari raanakeri nampitsiki tasorentsitsiri, risaikakaakeri jenoki omitzikaaki tasorentsipanko. \* <sup>6</sup> Ikantawetapaakeri: “Imaperotatyaaarika Itomintzimi Pawa, pimitaye isaawikinta. Pinkenkithashiretero rosankenaitakeri pairani okantzi: Rotyaantemiri Pawa imaninkarite kempoyeemine. Iriira thomaawakemine eero pomposantawaitapaaka mapiki.”

<sup>7</sup> Rakanakeri Jesús: “Okantzi eejatzi rosankenaitakeri pairani: Te okameethatzu piñaantashiwaityaari Piwinkatharite Pawa.”

<sup>8</sup> Rapiiwetakari Kamaari raanairi Jesús ochempiki. Raminakaakeri maawoini nampitsi ipinkathariyetzira atziripaini, tema kameetha okantaka owaneenkayetaka. <sup>9</sup> Ikantziri: “Piñaakero okaatzu tzimatsiri. Arika potziwerowashitakena piñaapinkathatena, arira nompakemiro maawoini.” <sup>10</sup> Rakanakeri Jesús, ikantanakeri: “Piyaate intaina. Satanás pini eeroka. Tema rosankenaitake pairani, kantatsiri: Ampinkathateri Awinkatharite, apatziro ankemisanteri irirori.”

\* **3:11** 3.11 Ikantakotziri Juan jaka: “Nopinkathatitzari naaka.” Ikantatzu: “Te onkantya roshiyakaina rimperatanewo nonowikyaantyaanariri i-zapato-te.” Tema pairani iro rantapiintziri apaani imperataarewo rayiniri i-zapato-te imperatariri. Iro roshiyakaawentziri jaka Juan. Tema imaperotatyaaarika rimatziro Jesús rawisantziri irirori, tekaatsi oshiyaarine, te onkantaatsikaitya roshiyakaina naaka rimperatanewo. \* **4:5** Iitaitziri jaka “nampitsi tasorentsitsiri”, irojatzu iitaitziri nampitsi Jerusalén.



11 Ari rintainaryaanake Kamaari. Pokaiyapaakeni imaninkarite Pawa, ramitakotapaakeri Jesús.

*Retanakari rantayetziri Jesús*

(Mr. 1.14-20; Lc. 4.14-15; 5.1-11; 6.17-19)

12 Ikanta Jesús ikemakowentakeri Juan romonkyaaakaantaitakeri. Irojatzri ripiyantanaari irirori Galilea-ki. 13 Te risaikapai Nazaret-ki, ikenanai Capernaum-ki, ari risaikapairi. Inkaarecheraaki isaikira Capernaum, inampiwetawowa icharineyetaari Zabulón eejatzri Neftalí. 14 Ari imonkaatakari ikenkithatakotakeri pairani Kamantan-  
taneri Isaías, ikantake:

15 Isaike inampitsite Zabulón-iite eejatzri Neftalí-ite janta inkaarecheraaki, Intatsikero antawaaki ñaa Jordán,

Saikatsiri Galilea-ki, ipiyotapaawowa atziri kaari asheninkata.

16 Iriira oshiyakawori risaikatyeeeme otsirenikitziira, iñaayetaari ootamentotsi.

Itsimankakowetakari raampare kathatayeri inkenayetaime sarinkaweniki. Iro kantzimaitacha, oshiyaawo iroñaaka risaikaatyeeeme okiteeshetzira.

17 Ari retanakawo Jesús ikamantapaakeri atziripaini, ikantapaakeri: “Pookairo pikaariperoshirewaitake, irootaintsi impinkathariwentantai jaka Inkitesatzi.”

18 Irojatzri ipampithacheraatantanakawori inkaare saikatsiri Galilea-ki, iñaapaakeri Simón, iitaitziri eejatzri Pedro, itsipatari irirentzi iita Andrés, itarajaataiyini. Tema tarajaawairentzi rinaiyini. 19 Ikantapaakeri: “Poyaatena, oshiyaiyaawo iroñaaka iriime atziri nontarajaatakaimi.”

20 Royaatanakeri, rookanakero itarajaamento.

21 Iro rowaaganeentanaka eepichokiini, iñaapaatziri Jacobo, itsipatakari irirentzi Juan, risaikaiyini ipitoki rowamatankawaitzi itarajaamento itsipatakari ipaapate Zebedeo. Romiñaanakeri eejatzri irirori, 22 rookanakeri ipaapate ipitoki, royaatanakeri Jesús.

23 Rithonkakero ranashitawo Jesús Galilea-ki, riyotaantake maawoini nampitsiki eejatzri rapatotapiintaitaga, ikamantantakero Kameethari Ñaantsi kenkithatakotzirori ipinkathariwentantai Pawa. Retsiyatakotakaayetaime mantsiyayetsiri nampitsiki.

24 Ikemakotaitakeri Jesús intaina. Ikemaiyakeni eejatzri Siria-satzi, ramayetapaakeniri maawoini mantsiyayetsiri isheninka, retsiyatakotakaayetaimiri. Ramakeri maawoini imatziri inashiyetachari mantsiyarentsi, kasiwaitatsiri, kamanawaitatsiri, kisopookiwaitatsiri. Ramake eejatzri raagayetziri peyari. Ari rithonkiri retsiyatakotakaayetaime Jesús. 25 Royaataiyakerini osheki Galilea-satzi, Decápolis-satzi, Jerusalén-satzi, Judea-satzi, poñaayetanainchari eejatzri intatsikero antawaaki ñaa Jordán.

## 5

*Ikenkithatzri Jesús tonkaariki tsika ikantakota kimoshiretaatsine*

(Lc. 6.20-23)

1 Ikanta iñaakeri Jesús osheki piyowentakariri, tonkaanake ochempiki, ari risaikapaake. Pokaiyapaakeni riyotaanewopaini, ipiyowentapaakari. 2 Ari riyotaayetakeri, ikantziri:

3 “Kimoshire inkantaiya jentashiretatsiri, iri ñagairone impinkathariwentantai Inkitesatzi.

4 Kimoshire inkantaiya iraneentawaitachari, iri roimoshirenkaitairi.

5 Kimoshire inkantaiya tsinampashireri, iri saikaatsine kameetha kipatsiki inintakagaitakeriri.

6 Kimoshire inkantaiya aminaminatzirori inkameethashirete, ari iñagairo raminaminatziri.

7 Kimoshire inkantaiya neshironkashiretantaneri, ari ineshironkaitairi irirori.

8 Kimoshire inkantaiya kiteshireri, iri ñagairine Pawa.

9 Kimoshire inkantaiya oitsimariirori mashirenkaantsi, iri intomintaiyaari Pawa.



<sup>10</sup> Kimoshire inkantaiya inkaate inkemaatsitakagaityaari ikameethashiretzira, iri ñagairone impinkathariwentantai Inkitesatzi.

<sup>11</sup> Kimoshire pinkantaiya imanintawaitaitemi, inkemaatsitakaitemi, inthaiyawen-taitemi okantakaantzirowa pikemisantaana. <sup>12</sup> Thaamenta pinkantayetanakya, tema Pawa pinayetaimine inkiteki. Pinkenkithashiretakotero jiroka, ari ikantaitakeri pairani etayetakawori Kamantantaneri.”

### *Oshiyawori tziwi*

<sup>13</sup> “Poshiyakawo eerokapaini tziwi. Arika rowaitaitero tziwi oitarika, eero opan-tanaawo inkatyokantaityaawo. Ontzimatye imanintaitero, rookaitakero raatzikawait-aitero.”

### *Oshiyariri ootamentotsi*

<sup>14</sup> “Arika isaike nampitsi tonkaariki, okoñaatzi maawoini arika ootya tsireniriki, te imana nampitsi. Kiteesheetyaakotantaneri pinaiyini eeroka eejatzi, eerokatake yotaayetanaairine maawoini atziri, eero pimanimotziri okaatzi piyoyetanairi. <sup>15</sup> Ari okantari eejatzi, arika oosheri ootamentotsi, te ashitakotziri kantzirinaki. Owakotziri jenoki inkiteesheenkatantanyaari maawoini saikatsiri pankotsiki. <sup>16</sup> Ari pinkan-taiyaari eejatzi eeroka, pisaikayetai kameetha iñaantaimiri pisheninka okameethatzi maawoini pantayetanaairi. Iro riyotantaiyaari irirori impinkathateri Ashitairi Inkite-satzi.”

### *Ikenkithatakotakero Jesús Inintakaantaitanewo*

<sup>17</sup> “Eero pikenkithashiretashita iro nipokantari nipakaakaimiro pikemisantziro In-intakaantaitanewo, te nokowi eejatzi nipakaakaimiro ikenkithatakotakeri pairani Ka-mantantaneri. Iro nipokantakari nimonkaatero okaatzi ikenkithatakoitakeri pairani. <sup>18</sup> Imapero nokantzi: Aritake ithonkaiya paata kipatsi eejatzi inkite, iro kantzi-maitacha eero ithonkimaita Inintakaantaitanewo, irojatzi imonkaatantakyaari maawoini. <sup>19</sup> Eerorika pikemisantziro Inintakaantaitanewo, eerorika piyotaayetairi pisheninka inkemisantayetairo, eerowa pinintagaawo ipinkathariwentantaira Inkite-satzi. Iriima matakeroone inkemisantairo, riyotaantairo eejatzi, iriira iriiperotaatsine inkiteki. <sup>20</sup> ¿Poshiyakaatziima kameethashire ikantayetaka Yotzinkariite eejatzi Fariseo? Tera. Te rimonkaatziro kameethaini inintakaawetariri Pawa. Eerorika pawisayetairi eeroka pinkameethashireyetai, eerowa piñagairo impinkathariwentantai Inkitesatzi.”

### *Ikenkithatakotziro Jesús kisaantsi*

*(Lc. 12.57-59)*

<sup>21</sup> “Piyotaiyironi eeroka ikantaitakeriri pairani etakaanakawori, ikantaitziri: Eero pitsitokantzi. Arika pitsitokantake, ari rowasanketaikemi eeroka.

<sup>22</sup> Iro kantzimaitacha nokantzi naaka: Eero pikishiri pisheninka, rowasanketaitz-imikari. Eero pikantawaitziri eejatzi: ‘Te piyowainetzi eeroka.’ Rowasanketaitzimikari pinkatharentsiki. Te okameethatzi eejatzi pinkisaneentawaiteri pisheninka piitama-sontziwaiteri, patsipetaawokari pitagaiya sarinkaweniki. <sup>23</sup> Tema paapiintzi pipira pitayiniri Pawa, iro kantzimaitacha arika pinkenkithashiretapaakero tzimatsi iki-sawentzimiri pisheninka, <sup>24</sup> ari pookanakeri pipira, piyaatashiteri kisakemiri. Pinkan-tairi: ‘Asheninká, jame aakameethatawakagaiya.’ Arika paakameethatawakagaiya, pipiyai taapokimentotsiki, pitaapainiri Pawa pipira. <sup>25</sup> Arika intzime kishemine, irojatzi raantanakemi pinkatharentsiki, pinthaawakote eeroka awotsiki, pinkantairi: ‘Eero pikisawaita, jame aakameethatawakagaiya.’ Arika rareetakaakemi pinkathar-entsiki, inkantaitakeri rimperatanewo: ‘Paanakeri jirika.’ Ari romonkyagaitemiri. <sup>26</sup> Eerorika pipinatashitari okaatzi pireewetakeri, eero piñagairo romishitowakaan-taimi. Imaperotatya.”

*Ikenkithatakotziro Jesús mayempitaantsi*

<sup>27</sup> Piyotziro eerokapaini ikantaitakeri pairani, ikantaitzi:  
Eero pimayempitzi.

<sup>28</sup> Iro kantacha nokantzi naaka: Piñaamashiretaworika piñiuro tsinane, matakemi, pi-mayempishiretakeri. <sup>29</sup> Jiroka noshiyakaawentemiro: Iroorika pokipero pantanta kaariperori, pipakagairo, poshiyakaantero pinkithoryaatyeerome, pookero. Tema te pikowiro poki atsipetakagaimiro sarinkaweni, iro kameethatatsi pisaikapityaak-itai. <sup>30</sup> Iroorika pakopero pantanta kaariperori, pipakagairo poshiyakagairo pithatinkatyeerome, pookero. Tera pikowiro pako atsipetakagaimiro sarinkaweni, iroowa kameethatatsiri pisaikaponchokitai.

*Ikenkithatakotziro Jesús jokawakagaantsi*

<sup>31</sup> “Ikantaitake eejatzi pairani:  
Arika rookawakaitya, ontzimaty e impaiteri tsika osankenatakota jokawakagaantsi.  
<sup>32</sup> Iro kantzimaitacha nonkante naaka: Kaariperoshireri rini jokashitawori iina. Arika aawetaiya itsipa oime, omayempitzimotakeri etawetari oimentari. Ari ikantari eejatzi agairone, mayempitake irirori. Te okaariperoweta rookerome atziri iina, arika iñeero omayempitzimowaiteri.”

*Ikenkithatakotziri Jesús aakowaitashitaantsi*

<sup>33</sup> “Piyotaiyironi eejatzi ikantaitakeriri pairani etakaantawori:  
Eero pamatawithatantzi.  
Pinkante: ‘Rowasanketaina Nowinkatharite eerorika nantayetziro nokantayetziri.’  
Iroorika pikantakeri ontzimaty e pimonkaatero.  
<sup>34</sup> Iro kantacha nokantzi naaka: Te onkameethate paakowaitashityaari Pawa, pimonkaatantyaawori pikantayetziri. Eero paakowaitashitawo inkite, arira risaikiri Pawa janta. <sup>35</sup> Eero paakowaitashitawo kipatsi, tema irojatzi rashitari Pawa, ari rimakoryaayitzitapiintzi. Eero paakowaitashitawo Jerusalén, ari ipinkathariwentantzi Pinkathariperori. <sup>36</sup> Eero paakowaitashitawo piito, pinkante: ‘Eerorika nimonkaatziro nokantziri, rithatinkitaitenawoota noito.’ Te eeroka materone pishookakairo pipai, picheenkaishitakagairo eejatzi. <sup>37</sup> Eero pamatawithatantzi. Imaperotatyaarika pantero pikantayetziri, ari pinkante: ‘Jee, nimatero.’ Eerorika pantziro, apatziro pinkante: ‘Eero nimatziro.’ Tema te okameethatzi poshekyeero piñaane.”

*Ikenkithatakotziro Jesús ineshironkataitziri kisaneentantatsiri*

*(Lc. 6.27-36)*

<sup>38</sup> “Piyotaiyironi eeroka ikantaitakeri pairani:  
Arika pinkithoriiteri roki itsipa atziri, okameethatzi ripiyakowentaityaari, rikithori-itaitemiro poki eeroka.  
Arika pintzinkeryaakoteri itsipa atziri, okameethatzi ripiyakowentaityaari intzinkeryaakotzitaitemi eejatzi eeroka.  
<sup>39</sup> Iro kantacha nokantzi naaka: Te okameethatzi pipiyatyaari kisaneentzimiri. Arika ripasaitemi kashetawooni, pishinetainiri rimontewootemi ripasatemi. <sup>40</sup> Arika raap-ithaitemiro piithaare, pishineteniri raanakero eejatzi piwewiryakowo. <sup>41</sup> Arika rimperaitemi paanakero owaagawontsi pookero niyanki awotsi, paanakero owaagawontsi pawisakairo tsika ikantaweetakemi pookero. <sup>42</sup> Arika inkantaitemi: ‘Pimpenawo’, okameethatzi pimperi. Arika inkantaitemi eejatzi: ‘Pimpawakenawo, ari noipiyaimiro’, okameethatzi pimperi eero pithañaapithatari.

<sup>43</sup> Piyotaiyironi eeroka ikantaitakeri pairani:  
Pineshironkateri powawiiroki. Iriima ikaatzira kishimiri, pinkisheri irirori.  
<sup>44</sup> Jiroka nokantzi naaka: ‘Petakotyaari kisayetzimiri. Pamanakoyetyaari maawoini ineshironkatantyaariri Pawa irirori. Eero pipiyatari kisaneentzimiri,

paakameethatairi.’<sup>45</sup> Iroowa ikowakagaitakeriri itomintayetaari Ashitairi Inkitesatzi. Iriitake wetsikakeriri ooryaatsiri, oorentakotziriri maawoini atziri: kameethashireri, eejatzi kaariperoshireri. Iri wetsikakerori eejatzi inkani, rowariiniri maawoini atziri: kameethashireri, eejatzi kaariperoshireri.<sup>46</sup> Apatzirorika petakotyaari ikaatzi etakoyetzimiri eeroka, ¿poshiyakaatzi ari ripinataimi Pawa? Eerowa, iroowa rantapiintakeri kaariperoshireri apatotziriri koriki.<sup>47</sup> Apatzirorika petakotari powawiiroki, ¿kaarima aminaashiwaitaantsi? Tema iro rimatapiintakeri itsipasatzi atziri.<sup>48</sup> Kameethashireri pinkantaniya eeroka, poshiyakotaiyaari Ashitairi Pawa, tema imapero ikameethashireperotake irirori.”

## 6

### *Ikenkithatakotziri Jesús pashitantatsiri*

<sup>1</sup> “Pipakagairo powapeyimotari atziripaini pantayetziro pinkameethashiretan-taiyaarime. Eekerorika pantatyeero, tekaatsi ripinataimiri Ashitairi Inkitesatzi.

<sup>2</sup> Arika pimpashiantya, te okameethatzi pinkantante: ‘Nopashitantaka naaka.’ Iroowa rametari owapeyimotanteneri, ikowi irirori impinkathaiterime. Eenitatsirika pinkathatakerine jirika, iro iñaamatsitanyaaawori irirori iñaapinkathaiterime.<sup>3</sup> Arika pamitakoteri ashironkainkari, eero pikamantziri itsipapaini, \*<sup>4</sup> managa onkantya okaatzi pipashitantakari. Riyotake Pawa irirori, iri pinataimine.”

### *Ikenkithatakotziro Jesús amanamanaataantsi*

*(Lc. 11.2-4)*

<sup>5</sup> “Arika pamanamanaatyaari Pawa, te opantawo poshiyakotyaari shamewaitat-siri. Ikatziyapiinta irirori rapatotapiintaitaga, ikatziya eejatzi niyankineki nampitsi, iñaantyaariri isheninka. Ari iñaamatsiwetakawo irirori iñaapinkathaiterime. Imaperotatya.<sup>6</sup> Irooma eeroka, arika pamaña, pashitakotya apanirowni pipankoki pinkowakoteri Ashitairi tsipatakemiri apanirowni. Iri ñiimiri apanirowni, ari ineshironkatakemi, irijatzi pinataimine.

<sup>7</sup> Arika pamaña, te ompantyaawo papiipiintero piñaane okaatzi pikantakeri. Iroowa rametari kaari asheninkata aakapaini. Roshiyakaatzi rapiipiintawetawowa riñaane ari inkemakeri Pawa.<sup>8</sup> Paamaiya poshiyakotarikari eeroka. Tekera pinkowakotanakeriita Ashitzimiri koityiimotzimiri, riyotzitakawo irirori maawoini.<sup>9</sup> Jiroka pinkante pamaña eeroka:

Ashitanarí, nampitawori inkiteki,

Tasorentsi pini eeroka.

<sup>10</sup> Pimpinkathariwentaina naaka.

Pantakainawo jaka kipatsiki okaatzi pinintakaanari eeroka,

Poshiyakagainari inkiteweri, pantakairi irirori maawoini pinintakairiri.

<sup>11</sup> Pimpapiintena koityiimotanari noyaari.

<sup>12</sup> Pimpeyakotakagainawo nokaariperoshirewaitake,

Tema nimatakero naaka, nopeyakotairi owaariperoshiretakenari.

<sup>13</sup> Eero pishinetana iñaantaitena, inkowaite rantakaitenawo kaariperori.

Ari pinkantaitaatyeero pimpinkathariwentantai. Ari pinkantaitaatyeero oshekitzi-motemi pishintsinka, eejatzi powaneenkawo. Ari onkantaitaatyeeyaani.

<sup>14</sup> Arika pimpeyakotairi atziri kishimiri, ari impeyakotaimi eejatzi eeroka Ashitairi Inkitesatzi.<sup>15</sup> Irooma eerorika pipeyakotairi eeroka atziri kishimiri, eerowa ipeyakotz-itaimi Ashitairi irirori.”

### *Ikenkithatakotziro Jesús tziwentaantsi*

\* **6:3** Poshiyakairo te iyote pampate oita antakeri pakopero.

<sup>16</sup> “Arika pitziwentya pinkenkithashiretakoteri Pawa, eero pikamantantayetzi, pinkante: ‘Nitziwentatyaari Pawa.’ Paamaiya poshiyarikari owapeyimotantaneri. Ritziwentapiintaweta irirori, mantsiya ikantayeta ipooki riyotantaityaariri ritziwentatya. Iro iñaamatsitanyaaawori irirori impinkathawentaiteeri. Imaperotatya. <sup>17</sup> Irooma eeroka arika pitziwentyaari Pawa pinkenkithashiretantyaariri, pinkiwawootya, pinkishitya kameetha, <sup>18</sup> eero riyotantaitzimi pitziwentatya. Apatziro riyotemi Ashitairi Inkitesatzi, iri pinataimine.”

*Ikenkithatakotziro Jesús inkitesato ashaagawontsi*

*(Lc. 12.32-34)*

<sup>19</sup> “Te opantawo pashaagantashiwaitya jaka kipatsiki, owana ipathayi, ari ipiyotari koshintzi. <sup>20</sup> Iro kameethatatsi pantayetanaero piñaantaiyaawori pisaikai kameetha inkiteki. Oshiyawaityaawo pashaagantaatyeeyaame inkiteki tsika te ipathaanetapai, te itzimapai eejatzi koshintzi. <sup>21</sup> Tsikarika pashaagantaka, ari pinkenkithashiretapiintero.”

*Ikenkithatakotziri Jesús ootamentotsi*

*(Lc. 11.33-36)*

<sup>22</sup> “Kameetharika onkantya poki, piñaantawo kameethaini, oshiyawo pinkoñeetyaakotaatyeeeme. † <sup>23</sup> Terika opantawo poki, eero piñaantawo kameethaini, oshiyakawo pintsirenikitakotatyeeeme.” ‡

*Ikenkithatakotziro Jesús ashaagantaantsi*

*(Lc. 16.13)*

<sup>24</sup> “Tekaatsi materone rantawaiteniri apite imperatantaneri. Tema apaani inkowap-erote rimonkaateniri rimperatariri, iriima itsipa, inkisaneentanakeri. Ari ikantari eejatzi: Tekaaitsi materone ranteniri Pawa ikowakaantziri irirori, arika inkenkithashiretakotero eejatzi ashaagawontsi roshiyakaantanakero iroorikame imperatyaarine.”

*Ikenkithatakotziro Jesús kantzimoshiretaantsi*

*(Lc. 12.22-31)*

<sup>25</sup> “Pinkeme nonkante: Te opantawo onkantzimoshirewaitemi pinkante: ‘¿Oitaka noyaari, oitaka nireri, oitaka nonkithaatyaaari?’ Eenitatsi otsipa ankenkithashiretapiintairi añaamentoki, iro kowaperotachari, anairo okaatzi owayetapiintari, okaatzi akithaayetapiintari eejatzi. <sup>26</sup> Thame ankenkithashiretakoteri tsimeryaanipaini. Te riyotziro impankite royaari, te riwetsiki ipanko rowaantyaawori iwankire. Iri kantzimaitacha Pawa, ipayetapiintakeri rowanawo. Aaka rimaperotzi retakotai Pawa. <sup>27</sup> Arika onkantzimoshirewaitemi ¿arima pinkantakero powawineentawairo posar-entsite? <sup>28</sup> Thame ankenkithashiretakotero inchatyakipaini, te añiuro antawainete, te ontyagaanta onkithaatyaaari. Temaita okantzimoshirewaitawo, onkante: ‘¿Oitaka nonkithaatyaaari?’ § <sup>29</sup> Owaneenkata kameetha, anairo rowaneenkawo Salomón, pinkathariwetachari pairani. <sup>30</sup> Iri Pawa owaneenkayetzirori. Okantaweta eepi-chokiini añaawetawo owaneenkatapainta, iro osamani, tekaatsi pantyaawone arika onkamateyatanake, tema richekaitakero, ritagaitakero. ¿Eeroma ikempoyaawentzimi eeroka Pawa? Aritake, eero pikisoshiretzi. <sup>31</sup> Ataama okantzimoshirewaitakemi, pikantzi: ‘¿Oitaka noyaari, oitaka nireri, oitaka nonkithaatyaaari?’ <sup>32</sup> Apatziro okantzimoshirewaitari kaari kemisantatsine. Irooma eerokapaini, riyotakoyetziro

† **6:22** Oshiyakaawentachari okitsi kameethatatsiri, apaani pakoriinkari (kaari shampitsitatsi), kemathatairori okaatzi rantakairiri Pawa. Tema risaikanaatzi okiteesheenkatzira. ‡ **6:23** Oshiyakaawentachari eerorika opantawo oki, apaani shampitsi kaari kemathatairone okaatzi rantakairiri Pawa. Tema risaikatzi otsirenikitziro.

§ **6:28** Iro ikantakoitzi jaka “inchatyakipaini” jitachari “lirio”.

Ashitairi Inkitesatzi oitarika koityiimotzimiri. <sup>33</sup> Iro kowaperotacha pithotyaakotairi impinkathariwentaimi, pithotyaakotairi eejatzi rowameethashiretairi, irojatzipiñaantaiyaawori impayetaimiro okaatzi koityiimoyetzimiri.

<sup>34</sup> Arira okanta, eero okantzimoshirewaitzimi oitarika awishimotemine inkaamani. Tema okaatzi awishimoyetzimiri jiroka kiteesheri iroñaaka, irootake pawentaantaariri.”

## 7

### *Ikenkithatakotziro Jesús kishimataantsi*

*(Lc. 6.37-38, 41-42)*

<sup>1</sup> “Te opantawo ankantante: ‘Kaariperoshireri rini nosheninka.’ Arika ankantantake, ari rimataitakai aaka, inkantaitai: ‘Kaariperoshireri pini eeroka.’ <sup>2</sup> Arika ankanakoteri asheninka, ari inkantakotanakai eejatzi aaka. Ontzimatye aamaiya, arika ontzime antzimotantanewo, rimaperoitakari paata ripiyaitai. <sup>3</sup> Oshiyawaitakawo arika ityaakitaima antawo inchapetoki okiki, ¿kantachama amineri itsipa tyaakitachari eepichokiini? <sup>4</sup> ¿Eero okanta ankanteri: ‘Pipoke, nagaimiro tyaakitakemiri?’ Tema ityaakitakemiri eeroka antawo inchapetoki. <sup>5</sup> Poshiyakari owapeyimotantaneri. Petawakyaawo eeroka paawairo inchatotozikaakemiri, paminantanaiyaari kameethapaantaiyaanariri tyaakitakemiri itsipa.

<sup>6</sup> Te ipaitapiintziri otsitzi wathatsi tasorentsitsiri. Te ipaitziri eejatzi chancho poreryaayetatsiri, ari roipatsitakero raatzikawaitero. Tera ipaitziri ikowawetari, osheki inkatsimate, ari ratsikantake.” \*

### *Ikenkithatakotziri Jesús amanaperotariri Pawa*

*(Lc. 11.9-13; 6.31)*

<sup>7</sup> “Pamanakotaiyani, pithotyaakotante eejatzi, ari piñaakero impaitemiro pikowakotantziri. Poshiyakayero arika pareetya pankotsiki, pinkantapaakeri ashitawori: ‘Pashitareenawo.’ Aritake rashitaryaakemiro ipanko. <sup>8</sup> Ari impaitairi kowakotantatsiri. Inkaate thotyaakotairone, ari roñaagaitairi. Arika inkantaiteri: ‘Pashitareero.’ Aritake rimatakero. <sup>9</sup> Arika inkowakotemi pitomi, inkantemi: ‘Papá, pimpena pan.’ ¿Arima pimpakeri mapi? <sup>10</sup> Arika inkantemi: ‘Pimpena shima noya.’ ¿Arima pimpakeri maanke royaari? <sup>11</sup> Petakotari eeroka pitomipaini, kaariperoshireri pinaweta. Iri maperotzirori Ashitairi Inkitesatzi, retakotari irirori maawoini amanayetariri. <sup>12</sup> Arika pinkowe retakoitemi, petawakyaawo eeroka petakotantya. Iro okantakotziri Inintakaantaitanewo, irojatzipiñakantakeri pairani Kamantantaneri.”

### *Ikenkithatakotaitziro awotsimanachaki*

*(Lc. 13.24)*

<sup>13</sup> “Arika pinkowe pinkyaapankotairi Pawa, poshiyakairo pimpampithatairome awotsimanachaki. Eenitatsi otsipa saawokitatsiri, kaari pomeentsitachane inkenantaityaawo. Osheki pimpampithakerori, rashironkaayetaiya sarinkaweniki. <sup>14</sup> Irooma awotsimanachaki, te ishenitzi kenantyaawone, iriira areetaachane Pawaki, inkantaitaateyeero rañagai janta.”

### *Ikenkithatakotziri Jesús thairi*

*(Lc. 6.43-44)*

<sup>15</sup> “Pinkyaaryootaiyeni, ramatawitzimikari oshiyawetariri Kamantantaneri, roshiyakotapaakyaari oweja te ikatsimatantetzi. Iro kantzimaitacha kaariperoshireri

\* **7:6** 7.6 Ikantaitziri jaka: “wathatsi tasorentsitsiri” eejatzi “poreryaayetatsiri”, iro oshiyakaawentacha Kameethari Ñaantsi tasorentsitsiri. Tema riñaane Pawa oshiyari ikaatzi poreryaayetatsiri. Iriima otsitzi eejatzi chancho, iri oshiyakaawentacha ikaatzi kaari kowerone inkemisantero Kameethari Ñaantsi, osheki ikisaneentakeri kamantantzirori. Terika ikowiro inkemisante, te onkameethate impankenaminthawaitaityaari.



rinatzi, roshiyakari owantaneri. <sup>16</sup> Ontzimatye aamagaiyaawo rantayetziri ayotantyaariri ikameethashiretzirika. ¿Añiroma uva onkithokitantyaawo owaato kitochee? Te. ¿Imatziroma higo onkithokitantyaawo iroori? Te imata eejatzi. <sup>17</sup> Inchato saankanatatsiri ishooiki, okithokitzi kameetha. Irooma inchato sampishitaintsiri, te onkithokinete. <sup>18</sup> Inchato saankanatatsiri ishooiki, te iñagaitziro onkaariperote okithoki. Ari okantari eejatzi inchato sampishitaintsiri, eero iñagaitziro onkameethate okithoki. <sup>19</sup> Ritowaitziro inchato kaari kithokitatsine, ragaitziro ritagaitero. <sup>20</sup> Paamagaiyaari yotaayetaimiri. Roshiyakaworika okithokitzi inchato saankanatatsiri ishooiki, panterowa riyotaayetzimiri.”

*Ikenkithatakotziri Jesús yotakoperotanairiri*  
(Lc. 13.25-27)

<sup>21</sup> “Tzimawetacha osheki kantawetanari: ‘Nowinkatharite pini eeroka, nopinkathakitakemi.’ Eeromaita iñagairo impinkathariwentairi Pawa. Apatziro ikaatzi antanairori ikowakaantziri Ashitanari Inkitesatzi. <sup>22</sup> Arika nompinkatharitari paata nompivotairi maawoini atziri. Eenitatsi kantayetaimane: ‘Nowinkatharité, naakotakemi piwairo naaka nokenkithatakoyetzimi. Naakotakemi piwairo nowawisaakotziri raagayetziri peyari. Ari nokantayetziri eejatzi nosheninka: Iro nitasonkawentantariri naakotzirira iwairo Jesús.’ <sup>23</sup> Nonkantzimaitanakyaari naaka: ‘Te niyotemi. Piyaate jantyaatsikaini, imapero pikaariperoshiretake.’ ”

*Ikenkithatakotziri apite owatzikirori ipanko*  
(Lc. 6.46-49)

<sup>24</sup> “Pinkeme, arika pinkenkithashiretero maawoini nokantakemiri, arika pinkemisantakero maawoini, ari okameethatzi. Iro piyotanetyaari. Poshiyaari owatzikirori ipanko shirantaaki. <sup>25</sup> Oparyaaweta antawoite inkani, amaaniwetaka. Otampyaawetaka shintsiini, ookantawetapaakawo pankotsi, te aawiiro. Tema owatzikakitya kameethaini shirantaaki. <sup>26</sup> Ari okantari eejatzi, eerorika pikenkithashiretziro nokantakemiri, eerorika pikemisantanairo, eero piñiuro piyotanetyaawo. Poshiyakotyaari owatzikirori ipanko impanekiiteki. <sup>27</sup> Oparyaapaake inkani, amaanitapaake. Okanta otampyaatapaake, ookantapaakawo pankotsi, tyaanake. Te iñagaitairo.”

<sup>28</sup> Iroowa riyotaayetakeriri Jesús ikaatzi piyowentakariri. Riyokitziwentanakeri. <sup>29</sup> Te imana ishintsinka riyotaantzira, ranairi riyotaantzi Yotzinkariite.

## 8

*Retsiyatakotakagairi Jesús imatane pathaawontsi*  
(Mr. 1.40-45; Lc. 5.12-16)

<sup>1</sup> Ikanta roirinkaawo Jesús ikenkithatakera tonkaariki, royaatairi osheki atziri. <sup>2</sup> Ari ripokashitakeri imatane pathaawontsi, rotziwerowashitapaakari, ikantapaakeri: “Pinkatharí, pikowirika petsiyatakotakagaina, niyotzi tzimatsi pishintsinka petsiyatakotakaantantenari.” <sup>3</sup> Irojatziri rakotashitantanakariri, riterotakeri, ikantziri: “Nokowi, petsiyatakotai.” Etsiyatanake ripathaawaiwetaga. <sup>4</sup> Ikantawetawaari Jesús jirika pathaawetachari: “Eerowa pithawetakotana. Apatziro piyaatashiteri Imperatasorentsitaarewo, pimonkaatantyaawori Inintakaantaitakeri rosankenatakeri Moisés, pimperi pashitakaariri Pawa, riyotantaityaari etsiyatakotaimi.”

*Retsiyatakotakagairi Jesús rimperatanewo reeware owayeripaini*  
(Lc. 7.1-10)

<sup>5</sup> Ikanta rowaaganaa Jesús, areetaiyakani nampitsiki Capernaum. Ari ripokakeri reeware rowayerite Roma-satzi, iñeeri Jesús, <sup>6</sup> ikantapaakeri: “Nowinkatharité, tzimatsi nimperatanewo nopankoki, maperokitaka imantsiyatzi, kisopookitake.”

<sup>7</sup> Rakanakeri, ikantziri: “Aritake niyaatake netsiyatakotakagairi.” <sup>8</sup> Ikantanake irirori: “Osheki nopinkathatakemi, kaariperori nini naaka, niyotzi te ishinetaantsita pinkyaa-pankotena. Apatziro nokowi pinkantakaanteri retsiyatakotai. Ari imatakya pinkanteri.  
\* <sup>9</sup> Tzimatsi imperatanari naaka, tzimatsi eejatzi owayeripaini nimperatari naaka. Arika nonkanteri: ‘Piyaate’, ari riyaatake. Arika nonkanteri itsipa: ‘Pipoke’, ari ripokake. Arika nonkanteri nimperatanewo: ‘Pantero jiroka’, rimatziro rantziro.”  
<sup>10</sup> Riyokitziwentanakeri Jesús ikemakerira ikantake reeware owayeripaini. Ikan-tanakeri oyaataiyirini: “Rimatakeri ikemisantzi jirika, jaka Israel-ki tekaatsi asheninka oshiyaarine. Imaperotatya. <sup>11</sup> Pinkeme, arika impinkathariwentantai Inkitesatzi, ari intzimake osheki kaari asheninkata poñaayetachari otsipaki nampitsi, inintaayetaiya intsipataiyaari Abraham-ni, Isaac-ni eejatzi Jacob-ni. <sup>12</sup> Iro kantzimaitacha eero itz-imaperotai asheninka saikaatsine janta. Iri ikowawetakari impinkathariwentairime maawoini janta, iro kantzimaitacha osheki ripiyathataka, rookairi otsirenikitakera. Ari riraawaitaiyaari, ratsikaikiwaitya inkemaatsitaiya.” <sup>13</sup> Ripithokashitanakari reeware owayeripaini, ikantziri: “Pipiye pipankoki. Pimatakeri pikemisantzi eeroka, iro retsiy-atakotantaiyaari pimperatanewo.” Ari rawisakotanai rimperatanewo janta ipankoki.

*Retsiyatakotakagairo Jesús riyote Pedro*  
(Mr. 1.29-34; Lc. 4.38-41)

<sup>14</sup> Ikanta Jesús jatake ipankoki Pedro. Iñaapaatziro riyote, omaryaaka, imatakeri katsiirentsi. <sup>15</sup> Riterotapaakero eepichokiini, etsiyatakotanake. Piriintanaka, aminayetawakeniri oita ompawakeriri. <sup>16</sup> Okanta otsireniityaanake, ramaitapaakeniri osheki raayiri peyari. Retsiyatakotakaayetairi, ikisathatawakeri iweyarite. Retsiy-atakotakaayetairi eejatzi maawoini mantsiyayetatsiri. <sup>17</sup> Irojatzii monkaatantakari ikenkithatakotakeri pairani Kamantantaneri Isaías, ikantake:  
Iri aanakerori amantsiyare,  
Irijatzi aanakerori okaatzi akemaatsiyetari.

*Oyaaterine Jesús*  
(Lc. 9.57-62)

<sup>18</sup> Ikanta iñaakeri Jesús isheniperotapaake atziri piyowentariri, ikantanakeri riyotaanewo: “Jame amontyagai intatsikero.” <sup>19</sup> Ikantawetawaari Yotzinkari: “Yotaantan-erí, nokowi noyaatanakemi tsikarika pinkenayete eeroka.” <sup>20</sup> Rakanake Jesús, ikantziri: “Apaani otsitziniro, eenitatsi imoo rimaantari, eejatzi tsimeryaanipaini eenitatsi romayero. Iriima jirika Itomi Atziri te otzimi ipanko rimaantapiintyaari irirori.” <sup>21</sup> Ari ikantanake apaani riyotaanewo: “Yotaanarí, nokowawetaka naaka noyaatanakemi, iro kantzimaitacha nokowi noñaanairi nopaapate nonkitatanairi, ari noyaatemiri.”  
<sup>22</sup> Ikantanake Jesús: “Poyaatena. Ikaatzi kamashireyetatsiri, ari inkitatairi irirori kaminkaripaini.”

*Romairiuro Jesús tampyaa*  
(Mr. 4.35-41; Lc. 8.22-25)

<sup>23</sup> Ikanta rotetanaa Jesús pitotsiki, itsipatanaari riyotaanewo. <sup>24</sup> Ikanta ri-montyaakotanaka, maanake Jesús pitotsiki. Iro riweyaakowetaka niyankyeronkaini, omapokakeri riyotaanewo otampyaatapaake antawoite, otetaagapaaka ñaa pitotsiki, otamakaanake inkaare. <sup>25</sup> Riyaatashitanakeri, rowakiryakiteri Jesús, ikantapaakeri: “¡Yotaanarí, apiinkatye! ¡Powawisaakotaina!” <sup>26</sup> Ikantanakeri irirori: “¿Litaka pithaawantari? ¿Tekerama pikemisantaperotziita?” Piriintanaka, romairyaakero tampyaa eejatzi otamakaare inkaare, awisanake, mairyaatanai kameetha.

\* **8:8** Jirika reeware owayeripaini Roma-satzi, kaari Judá-ite, itsipasatzi atziri rini. Tema pairani apaani Judá-ite, te ikyaawankotziri itsipasatzi kaari isheninkata.



<sup>27</sup> Riyokitziwentaitanakeri Jesús, ipinkathatanakeri antawoite, ikantawakaiyani: “¿Tsika iitaka atziritatsiri jirika? Romairiuro tampyaa eejatzi inkaare.”

*Gadara-satzi raayiri peyari*

(Mr. 5.1-20; Lc. 8.26-39)

<sup>28</sup> Areetaiyakani intatsikero, aatakotaiyapaakeni nampitsiki jitachari Gadara. Ari rishiyashitawakari apite atziri raayiri peyari, ipoñaakawo kitataarewoki. Katsimaki ikantakaakari peyari, osheki ithaawantaitakari, te onkameethate inkenaite janta.

<sup>29</sup> Ikantawakeri: “¿Jesús, Itomi Pawa! ¿Irootaintsima powasanketena? ¿Tsikama nokantakemika eeroka?” <sup>30</sup> Ari risaiki janta osheki chanco, roshimotokawaitaiyini.

<sup>31</sup> Riñaawaitanake iweyarite, ikantanake: “Arika powawisaakotairi jirika naaganewo, potyaantena naaka ipiyotakaga chanco.” <sup>32</sup> Rakanakeri Jesús, ikantziri: “Piyaate peyari.” Jatanake peyaripaini chanchoki, raagapaakeri, irojatziri rishiyantaiyanakarini impeetaki, mitagaiyapaakeni maawoini inkaareki, thonkaiyakani ripiinkake. <sup>33</sup> Ikanta iñaakeri saikawentziriri, shiyaiyanakani. Jatake nampitsiki, ikamantapaakeri maawoini atziri okaatzi iñaakeri. <sup>34</sup> Irojatziri riyaatashitaitantanakariri Jesús, ikantaitapaakeri: “Te nokowaiyini pisaikere nonampiki, pamine tsika pinkene.”

## 9

*Retsiyatakotakagairi Jesús kisopookiri*

(Mr. 2.1-12; Lc. 5.17-26)

<sup>1</sup> Ikanta rotetanaawo Jesús pitotsiki, montyaakotaawo inampiki. <sup>2</sup> Ari ramaitakeniri kisopookiri, inatakoitakeri shitashintsiki romaryaantapiintari. Riyoshiretawakeri Jesús atziripaini natakotakeriri, riñaanatawakeri mantsiyari, ikantziri: “Thaamentashire pinkantya notomi, ari netsiyatakotakagaimi, ipeyakoitaimiro pikaariperoshirewetakaga.” <sup>3</sup> Ikanta ikemawake yowairentziite, ikantashiretanake: “Rithainkatziiri Pawa jirika.” <sup>4</sup> Riyotake Jesús tsika ikantashiretzi, rosampitanakeri: “¿Oitaka okaariperotantari pikantashiretzi? <sup>5</sup> ¿Tema okameethatzi nonkante: ‘Ipeyakoitaimiro pikaariperoshireweta?’ ¿Irooma pikowi nonkanteri: ‘Pinkatziye, panashitaiya?’ <sup>6</sup> Iroñaaka piyoteri jirika Itomi Atziri oshekitzimotziri ishintsinka, ipeyakotairi kaariperoshirewetachari.” Ripithokashitanakari mantsiyari, ikantziri: “Pinkatziye, paanairo pomaryaantawetari, piyaatai pipankoki.” <sup>7</sup> Katziyanaka mantsiyawetachari, jatai ipankoki. <sup>8</sup> Iñaakeri maawoini atziri piyotainchari, riyokitziwentanakeri iñaawairira riyatai. Ikantaiyanakani: “Imaperotatziiri Pawa, iri matakeroi oshekitzimotantakariri ishintsinka Jesús.”

*Ragaitanakeri Mateo*

(Mr. 2.13-17; Lc. 5.27-32)

<sup>9</sup> Ikanta rowaaganaka Jesús, irojatziri iñaantapaakariri jitachari Mateo, apatotziriri koriki. Ikantapaakeri: “Poyaatena.” Katziyanaka, royaatanakeri. <sup>10</sup> Raanakeri ipankoki rowakayaari, itsipataanakeri riyotaanewo. Osheki jatanaintsiri apatotziriri koriki, riyataake eejatzi osheki kaariperoshiretatsiri. Ari itsipatakari Jesús rowaiyakani.

<sup>11</sup> Ikanta iñaakeri Fariseo-paini, ikaimakeri riyotaanewo Jesús, rosampitakeri: “¿Iitaka itsipatantariri Jesús apatotziriri koriki, itsipatakari eejatzi kaariperoshireyetatsiri? Te okameethatzi.” <sup>12</sup> Ikemawake Jesús, ikantanake irirori: “Arika imantsiyate atziri ripokashitziiri aawintantzinkari, iriima atziri kaari mantsiyatatsi tekaatsi inkowe irirori. <sup>13</sup> Ontzimatyepinkenkishiretero Inintakaantanewo Pawa, kantatsiri:

Te apa nonkoweri pamayetainari pipira pitagainari.  
Iro nokowaperotairi pineshironkayetairi pisheninka.  
Te apa nipokashiteri kameethashireri nonkaimashiretairi, tema nipokashitatziiri kaariperoshireri nonkaimashiretairi rookairo kaariperori.”

*Ikenkithatakotziro Jesús Tziwentaantsi*  
(Mr. 2.18-22; Lc. 5.33-39)

<sup>14</sup> Ikanta ripokaiyakeni riyotaanewo Juan, rosampitapaakeri Jesús, ikantziri: “¿Litaka kaari ritziwentanta piyotaanewo? Nitziwentapiinta naaka, ari ikantzita riyotaanewo Fariseo-paini.” <sup>15</sup> Rakanakeri Jesús, ikantanakeri: “Arika aate awakagaantsiki, ¿arima owashiretapaakya? Arika paata, ragaitakeri iimentaitari, aripaite ritziwentaitya. <sup>16</sup> Apaani antyashipawo ikithaataitari, arikame rowamatankaitantyaawo osape owakerari, ari isagaaperotanake aminthatanakyaaarika owakerari. <sup>17</sup> Ari okanta eejatzi, te ikameethatzi antyashipari mashitsinaki rowantaityaawo eeryaatatsiri riraitziri. Arika rowantaitakyaawo, ari risanaryaanake, apaatashiwaitakya riraitziri eejatzi mashitsinaki. Iri kameethatatsi owakerari mashitsinaki rowantaityaari, eero apaawaita apitekeroini.”

*Rishinto Jairo eejatzi tsinane terotakerori iithaare Jesús*  
(Mr. 5.21-43; Lc. 8.40-56)

<sup>18</sup> Ikenkithawaiminthatzi Jesús, areetapaaka apaani jewari, rotziwerowapaaka, ikantapaakeri: “Kamake nishinto, iroowa nipokantari piyaate nopankoki piterotero eepichokiini, añagaita.” <sup>19</sup> Jatanake Jesús eejatzi riyotaanewo, royaatanakeri. <sup>20</sup> Okanta apaani mantsiyatatsiri tsinane, osheki osarentsi osokaawaitaka, tzimakotake 12 osarentsi, okenashitapaakeri itaapiiki Jesús, iterotakero opatzikaakiki iithaare. <sup>21</sup> Okantashiretzi: “Arika niterotakero iithaare, ari netsiyatakotai.” <sup>22</sup> Ripithokashitanakawo Jesús, ikantziro: “Thaamenta pinkantaiya nishintó, etsiyatakotakagaimi pikemisantake.” Apathakero etsiyatanake omantsiyarentsite tsinane. <sup>23</sup> Ikanta rareetapaaka Jesús ipankoki jewari, iñaapaatziiri showiwentzirori kamaintsiri, osheki atziri akisheenkataintsiri. <sup>24</sup> Ikantapaakeri Jesús: “Pisheke, te okami piraakotaiyakarini imakoryaatzi.” Thainka rowaitakeri Jesús. <sup>25</sup> Romishitowapaakeri maawoini, kyaapaake Jesús, rotaiyawakotapaakero, piriintanaawo ewankawo. <sup>26</sup> Te imanakotanaka rantakeri Jesús, ikemakoitanakeri maawoini.

*Rokiryaaakagairi Jesús apite mawityaakiri*

<sup>27</sup> Ikanta rowaaganaawo Jesús, royaatanakeri apite mawityaakiri, ikaimi, ikantzi: “¡Icharine David-ni, pineshironkataina!” <sup>28</sup> Areetapaaka pankotsiki, eejatzi mawityaakiri. Ripokashitapaakeri okaakiini, rosampitakeri Jesús, ikantziri: “¿Pawentaaanama eeroka ari imatakya nowawisaakotaimi?” Ikantaiyini irirori: “Ari pimatakero nowinkatharite.” <sup>29</sup> Rakotanake Jesús, riterokitakeri, ikantziri: “Okiryaaakagaimi pawentagaanaga.” <sup>30</sup> Apathakero raminanai kameetha. Ishintsineentawakari, ikantziri: “Te nokowi pinthawetakotena nokiryaaakagaimira.” <sup>31</sup> Ikanta riyataai, ikamantantayetanaake, ithonka ikemakoitanakeri Jesús.

*Riñaawaitakagaitairi kisowaanteri*

<sup>32</sup> Ikanta ramaitapaakeniri Jesús apaani atziri raayiri peyari, kisowaante ikan-taka. <sup>33</sup> Retsiyatakotakaawakeri Jesús jirika atziri, kenkithawaitanai roisowaantewetakari peyari, tema rookapithatakeri iweyarite. Riyokitziwentaitanakeri Jesús, ikantashiretitanake: “Te añaaapiintzi oshiyaarine jirika anampiki Israel-ki.” <sup>34</sup> Ikantaiyini Fariseo-paini irirori: “Ripasawyaatziiri reeware iweyarite retsiyatakotakaantariri raaganewo.”

*Sampainkatake pankirentsi*

<sup>35</sup> Rithonkakero ranashitawo Jesús maawoini nampitsi, riyotaantayetake rapa-totapiintaitaga. Ikenkithatakotapiintakero Kameethari Ñaantsi tsika onkantya impinkathariwentantai. Retsiyatakotakaayetairi maawoini, tekaatsi apaani mantsiyarentsi pomeentsitzimotyaarine. <sup>36</sup> Iñaayetzirira osheki piyowentariri, antawo retakoshiretakari Jesús, ikantake: “Imapero rashironkaayetaka jirika atziripaini. Roshiyakari oweja eerorika itzimi kempoyeerine.”

<sup>37</sup> Eekero ikantanakitziiri riyotaanewo: “Jirikapaini atziri roshiyakawo isampainkatzi pankirentsi, temaita itzimaperotzi atziri owiiterone. <sup>38</sup> Pamanaiyaari Awinkatharite rotyaanteeta osheki jatatsine atziriki, tema yotacha osheki inkaate kemisantaatsine.”

## 10

### *Riyoyaake Jesús 12 Rotyaantaperore* (Mr. 3.13-19; Lc. 6.12-16)

<sup>1</sup> Ikanta riyoyaake Jesús ikaatzi 12 riyotaanewo, ripasawyaakari ritasonkawentantzi. Rimatanakero irirori retsiyatakotakaayetai osheki atziri kantawaitachari imantsiyarentsite, eejatzi ikaatzi raagayetziri peyari. <sup>2</sup> Jirika ikaatzi 12 riyoyaakeri Jesús: Etanakawori Simón, iitakeri Pedro. Eejatzi Andrés, irirentzi Pedro. Eejatzi Jacobo itomi Zebedeo itsipatakari rowawiiroki Juan. <sup>3</sup> Eejatzi Felipe, Bartolomé, Tomás, Mateo apatowetariri koriki, Eejatzi Jacobo itomi Alfeo, Tadeo, <sup>4</sup> eejatzi Simón, iitzitakari Jokaakotantaneri. Eejatzi weyaantaapaakawori Judas Iscariote, iriira pithokashityaarine paata.

### *Rotyaantaitakeri kaatatsiri 12* (Mr. 6.7-13; Lc. 9.1-6)

<sup>5</sup> Ikanta rotyaantakeri Jesús kaatatsiri 12, ikantawakeri: “Eero pikenanake risaikira atziri kaari asheninkata, eero piken eejatzi inampiki Samaria-satzi. <sup>6</sup> Iri petapaintya piyaatashiteri icharineyeteri Israel-ni, oshiyakariri oweja itzipinawaitzi. <sup>7</sup> Tsikarika pinkenayetake pinkamantantayete, pinkante: ‘Irootaintsi impinkathariwentantai Inkitesatzi.’ <sup>8</sup> Petsiyatakotakaayetairi maawoini mantsiyari, powañaayetairi kamayewetachari, petsiyatakotakagairi pathaawaitatsiri, eejatzi raagayetziri peyari. Tema neshironkataarewo pinayetake, te piñiuro inkowakoitemi. Pimatairo eeroka pineshironkatantai eejatzi. <sup>9</sup> Eero paanake piyorikite pithaateki, <sup>10</sup> eero paanake eejatzi pithaate, eero paanake apite piithaare, pizapato-te, pikotziki, tekaatsi apaani paanake. Tema ikantaitzi:  
Ripinaiteri antawaitatsiri.

<sup>11</sup> Arika pareetakya nampitsiki, pamine aakameethateme, iri pintsipatapaakyaari, irojatzi pawisantanakyaari otsipaki nampitsi. <sup>12</sup> Arika pareetakya pankotsiki, piwethatapaakyaari ikaatzi saikatsiri. <sup>13</sup> Arika raakameethatawakemi piwethatapaakari, ari iñeero risaikai kameetha. Irooma eerorika raakameethatawakemi, aminaashitaka piwethawetapaakari. <sup>14</sup> Eerorika raakameethaitzimi, eerorika ikemisantaitzimi eejatzi, pawisapithateri, potekanairo piipatsiyitzite. <sup>15</sup> Tema iri rimaperoitte paata rowasankeeteri jirika, ari anaanakero ikantaitakerira Sodoma-satzi eejatzi Gomorra-satzi. Imaperotatya.”

### *Rowashironkagaitaateemi paata*

<sup>16</sup> “Notyaantzimika iroñaaka. Poshiyawaitakari rotyaantaitziri oweja tsika ipiyotapaa owantaneri. Iro kantacha ontzimatye poshiyakotyaari kokiyantzi maanke. Ontzimatye eejatzi poshiyaari shiro te ikatsimawaitzi. <sup>17</sup> Paamaawentya. Tema raakaantaitaateemi jewariki ripasawaitaitemi pankotsiki rapatotapiintaitaga. <sup>18</sup> Irojatzi ragaitantanakemi risaikira pinkathariperori okantakaantziro pawentaanaga. Ari pinkenkithatakoyetainari, irojatzi inkemantayetaiyaari itsipasatzi

atziri kaari asheninkata. <sup>19</sup> Arika piñaakero raayeetanakemi, eero pikantashirewaitzi: ‘¿Oitaka nonkantapaakeri?’ Tzimatsi yotakaimirone oita pinkanteri. <sup>20</sup> Eero piyotashitawo apaniroini oita pinkanteri, Tasorenkantsi poñaachari Ashitzimiriki, iriira yotakaimirone onkaate pinkantayetapaakeri. <sup>21</sup> Ari iñagaitake aakaanterine irirentzi rowamaakaanterine. Piñe aakaanterine itomi. Piñe tsitokakaanterine ipaapate inkisaneentanakeri. <sup>22</sup> Osheki piñeero inkisaneentaitemi okantakaantziro pikemisantaanaga, iro kanzimaitacha arika pinkamaitanakyaawo pawentina, aritake nowawisaakoshiretami. <sup>23</sup> Arika inkisaneentaitanakemi nampitsiki, pawishe otsipaki nampitsi. Tema tekera pithonkirota pinkenayete maawoiniki nampitsi tsika risaikayetzi Israel-iite, irojatzi ripiyantaiyaari jirika Itomi Atziri. Imaperotatya.

<sup>24</sup> Te iñagaitzi apaani riyotagaitziri ranayeri yotairiri. Te iñagaitzi apaani imperataarewo ranayeri imperatariri impinkathateri. <sup>25</sup> Apatziro añiiri riyotagaitziri roshiyakotari yotairiri pairani. Ari ikantari eejatzi imperataarewo. Tema ikisaneentaitakena naaka iroñaaka, roshiyakagaitakena naakame Beelzebú iwinkatharite peyari. Eeroka rimaperote inkisaneentaitemi pikemisantaanaga.”

*¿Tsika iitaka ampinkathateri?*

*(Lc. 12.2-9)*

<sup>26</sup> “Iro kanzimaitacha eero pipinkashiwaitari jirikapaini. Ontzimatyee onkoñaatakoyetai okaatzi manakowetainchari, ooñaawontairo kaari ikemathaweeta pairani. <sup>27</sup> Apaniroini niyotakaayetaimiro eeroka jirokapaini, te riyotakotziro thainkantaineri irirori, eeroka kenkithatakaayetairine. <sup>28</sup> Eero pipinkashiwaitari kowatsine ritsitokemi, eerowa rimatziro irirori rotyaantemi sarinkaweniki. Iri pimpinkathateri Pawa, tema iri matziro rotyaantemi sarinkaweniki. <sup>29</sup> Pamine, te ripinaperoweta tsimeryaanipaini, iri kantacha Pawa riyotzi arika inkamagaante apaani. \* <sup>30</sup> Riyotzitawo Pawa okaatzi tzimayetatsiri aishi. <sup>31</sup> Piñaakero, raminawentziri Pawa tsimeryaanipaini, eeroka rimaperotzi raminawentzimi. Eerowa pipinkashiwaitari kisaneentzimiri. <sup>32</sup> Arika pinkanteri pisheninka: ‘Nopinkathatairi Jesús’, aritake nonkantairi Ashitanari Inkitesatzi: ‘Papá, ipinkathataana jirika, asheninkataari.’ <sup>33</sup> Irooma pinkanteririka pisheninka: ‘Te nompinkathateri Jesús’, ari nonkantziyaari naaka, nonkantairi Ashitanari: ‘Papá, te ipinkathatana jirika, te asheninkatari.’ ”

*Ikenkithatakota Jesús*

*(Lc. 12.49-53; 14.26-27)*

<sup>34</sup> “Te nokowi ikompitzimotemi oita nipokantakari. Te inta niyotaaayetairi atziri raakameethatawakagaiya. Tema nipokakera, oshiyawaitakawo namatyee mirome owathaamentotsi pantaminthatawakaantyaari.

<sup>35</sup> Tema iro nipokantakari:

Inkisaneentantyaariri atziripaini ipaapatetari,

Onkisaneentantyaawori tsinane onaanatetari,

Onkisaneentantyaawori tsinane ayiro.

<sup>36</sup> Iri pithokashitawakaachane atziripaini inkisaneentawakaiya risaikaiyinira ipankoki. <sup>37</sup> Tema iro kameethawetachari petakoyetaari pipaapate, pinaanate, peentsitepaini eejatzi. Iro kanzimaitacha arika anaanakero okaatzi pinintana pawentaana naaka, tekeraga pithotyiro pawentaana. <sup>38</sup> Ontzimatyee pinkyaaryoowentero nokenkithatakoyetakemiri, onkantawetya inkentakoitemi. Arika pipakaakero, tera pikyaaryoowentziro pawentaawetaana. <sup>39</sup> Tema ikaatzi

\* **10:29** Kantakotachari jaka “te ripinaperoweta tsimeryaanipaini”, tema kantacha ramanantaitantyaari apaani koriki inkaaterika apite tsimeryaani.

etakowaitachari apaniironi rantayetziro iñaamatashiyetari, ari impeyashitaiya. Iriima kamawentenane rantanairo nokowakairiri naaka, ari rawisakoshiretai.”

### *Ripinaitairiri*

*(Mr. 9.41)*

<sup>40</sup> “Tzimatsirika iita aapatziyemine, naakaga raapatziyaka. Ari okantari eejatzi, inkaate aapatziyainane naaka, iri raapatziyaka Ashitanari otyaantakenari jaka. <sup>41</sup> Tzimatsirika yotemine Kamantantaneri pini, irojatzi raapatziyantanakemi, arira ripinaitairi Pawa paata, tsipatakariri Kamantantaneriite. Ari okantari eejatzi, tzimatsirika yotakemine kameethashireri pikantanaawo pikemisantanai, irojatzi raakameethatananakemi, arira ripinaitairi Pawa paata, tsipatakariri kameethashireri. <sup>42</sup> Arika riyoitemi eerokatake niyotaanewo, iro ompoñaantyaari impemi pimere, riyotakerowa Pawa, iri pinaitairine jirika etakotakemiri.”

## 11

### *Rotyaantziri Juan riyotaanewo*

*(Lc. 7.18-35)*

<sup>1</sup> Ikaatakero Jesús riyotaayetakeri 12 riyotaanewo. Owaaganaka inkamantante maawoiniki nampitsi saikatsiri janta.

<sup>2</sup> Ikanta Juan omitsitsiyaatantaneri, romonkyagaitakeri chapinki, ikemakotakeri rantayetakeri Cristo, rotyaantake apite riyotaanewo irirori, <sup>3</sup> rosampiteri Jesús, inkanteri: “¿Eerokatakema iitaitziri, ‘Pokatsine?’ Kaaririka eeroka, ¿Eenitatsima itsipa naamayaari?” <sup>4</sup> Ikanta rareetaiyakani, rosampitapaakeri Jesús. Iro ikantantanakariri irirori: “Arika piyaatai, pinkamantapairi Juan maawoini pikemakeri eeroka, okaatzi piñaayetakeri nantakeri eejatzi. <sup>5</sup> Tema nokiryaaakagairi mawityaakiri, nanashitakaayetaari kisopookiri, netsiyatakotakaayetaari pathaawaiwetachari, nokemakaayetaari witakempitari, nowañaayetaari kaminkari, nokenkithatakoyetairiri Kameethari Ñaantsi ashironkainkaripaini. <sup>6</sup> Irootake inkimoshiretantaiyaari kaari kisoshirewentainane.”

<sup>7</sup> Ikanta ripiyayetanaa riyotaanewo Juan, rosampitanakeri Jesús ikaatzi piyowentakariri, ikenkithatakotziri Juan, ikantzi: “¿Tsika iitaka poshiyakairi piñaakeri chapinki ochempiki? ¿Iriima piñaake apaani oshiyakawori sawoo ompironkatonkitakaari tampyaa okantakaari te ithaamentashireta? <sup>8</sup> ¿Piñaapaakerima rowaneenkataka ikithaataka? Te. Tema ikaatzi owaneenkatachari ikithaata, risaikawankotziri irirori pinkathari. <sup>9</sup> Iro piyaatashitantariri piyotaiyakeni Kamantantaneri rini. Tema rimaperotatziiro irirori rawisanakeri Kamantantaneriite. <sup>10</sup> Tema iriitake rosanke-natakoitakeri pairani, riñaanatziri Pawa Itomi, ikantziri: Notomí, ari notyaantake etyaawone inkamantakotemi, Iri wetsikaantemine tsika pinkenapaake eeroka.

<sup>11</sup> Pinkeme nonkante naaka: Atziripaini ikaatzi tzimayewetainchari pairani, tekaatsi anairone riyotanetakari Juan. Iro kanzimaitacha inkaate impinkathariwentairi Pawa inkiteki, tsinampashiretaatsine janta, ranagairi irirori Juan. Imaperotatyaga.

<sup>12</sup> Tema retanakawo pairani Juan ikenkithatakaayetakemi, eenitatsi osheki atziri ñaamatanakawori kameethaini iñeero tsika ipinkatharitari Inkitesatzi. Antawoite ikowanake iñeero oshiyawaitakawo ishintsitaitzi arika romanataitya. Irojatzi ikantaita iroñaaka. <sup>13</sup> Pairani tekera itzimiita Juan, tzimawetacha Kamantantaneri eejatzi Inintakaantaitanewo. <sup>14</sup> Iriira Juan ikenkithatakoitakeriri pairani, iriitake Elías-tatsiri piyaatsine. <sup>15</sup> Kowirori inkemathatero, inkemisante. <sup>16</sup> Noshiyakaakemiri koshekawarentzi eentsi arika roshiyakaawaitya, <sup>17</sup> ikantawaka: ‘Jame ashowite omampaantyaari.’ Temaita ikowi. Ikantawaka eejatzi: ‘Jame omampaiya owashiretantyaari.’ Te ikowiro eejatzi. <sup>18</sup> Ari pikantaiyakani eeroka. Piñaawetawakari



Juan, ritzitapaakawo rowanawo, te ririro kachori, pikantaiyakerini: ‘Raagatziiri peyari, iro ritziwentantari.’<sup>19</sup> Ripokawetaka Itomi Atziri, te ritzitawo owanawontsi, ririro kachori eejatzi. Pikantaiyakerini: ‘Kaariperori rini jirika, osomiyawarentzi, shinkiyantzi rini eejatzi. Raapatziyari apatotziriri koriki, raapatziyari eejatzi kaariperoshireri.’ Tekaatsi oitya, tema arika iñagaitakero onkaate awisayetaatsine paata, arira riyoitairi imapero riyotanetzi.”

*Ikantamatsitaitziri kisoshireri nampitsikipaini*  
(Lc. 10.13-16)

<sup>20</sup> Ikenkithatakotanakeri Jesús ikaatzi ñaawetakawori ritasonkawentantayetake nampitsikipaini, temaita ripakairo ikaariperoshiretaiyini. Ikantanake:  
<sup>21</sup> “Ikantamatsitaitziri Corazín-satzi, eejatzi Betsaida-satzi. Osheki iñaayewetakena nitasonkawentantayetake, temaita ikemisantaiyini. Iriime ñaakenane Tiro-satzi, Sidón-satzi nitasonkawentantzi, ari rowashiretakotanakyaame ikaariperoshiretake, ripakaanakerome. Inkemisantayetaime maawoini iriroripaini. \*<sup>22</sup> Paata arika raayeetairi kameethashiretaintsiri, eero rimaperoitziri rowasanketaiteri Tiro-satzi, eejatzi Sidón-satzi. Rimaperoitairi rowasanketaiteri Corazín-satzi, eejatzi Betsaida-satzi, tema iñaawetakena nitasonkawentantayetzi, temaita ikemisantzi. <sup>23</sup> Eejatzi inkantayetaiya Capernaum-satzi, ikenkithashiretaiyani irirori riyaayetai inkiteki, iro kantzimaitacha osheki ikisoshiretake, riyaayetai ikenayetzira kaminkari. Iriime ñaakeroneme Sodoma-satzi pairani okaatzi iñaayetakeri Capernaum-satzi, inkemisantayetaime irirori, eero raperaatairime pairani Pawa saikaiyatsinime iroñaaka. <sup>24</sup> Arika raayeetairi paata kameethashireyetaintsiri, iriira rimaperoitai rowasanketaitairi Capernaum-satzi, anaanakero rowasanketakeri pairani Sodoma-satzi.”

*Pipokashitaina naaka, ari piñeero nimakoryaakaayetaimi*  
(Lc. 10.21-22)

<sup>25</sup> Ikanta ramanamanaatanakari Jesús Ashitariri, ikantanakeri: “Papá, eero ka pinkathariwentziriri maawoini inkitesatzi, eejatzi maawoini kipatsisatzi, osheki niwetharyaakemi. Tema eero ka yotakaayetairiri oshiyakariri eentsi tsinampashiretaatsiri, kaari riyoyetzi yowairentziite. <sup>26</sup> Tema iro inimotakemiri.” <sup>27</sup> Ikantanakeri piyowentakariri: “Iri Ashitanari yotakaakenawori maawoini. Apaniroini riyoperotana naaka tema Itomi rowana. Ari nokantari eejatzi naaka apaniroini niyoperotziri. Irojatziri riyoyetairi inkaate niyotakaayetairi naaka. <sup>28</sup> Arika piñeero pimakoshirewaite, arika piñeero oita ñaantsipookitzimotemine, pipokashitaina naaka, pinkamantainawo, aritake piñagairo nimakoryaakaayetaimi. <sup>29</sup> Eero pimanintziro ñaantsipookitzimotemine, naakatake imperatzimiri pantero. Eenitatsi nokowiri niyotaimiri, te niyote naaka nowatsimaashirewaitya, tsinampashireri nini. Ari piñagairo nimakoryaashiretakagaimi. <sup>30</sup> Tema okaatzi nimperatantari naaka, te opomeentsiperota.”

## 12

*Ikenkithatakotziro Jesús kiteesheri rimakoryaantaitari*  
(Mr. 2.23-28; Lc. 6.1-5)

<sup>1</sup> Okanta apaani kiteesheri rimakoryaantaitari, ikenanake Jesús pankirentsimashiki. Tema ritashayaiyatziini riyotaanewo, ikowiitanake okithokiki pankirentsi royaari.  
<sup>2</sup> Iñaakeri Fariseo-paini, iro ikantantakariri Jesús: “Pamineri piyotaanewo. Jiroka kiteesheri rimakoryaantaitari ini, te ishinetaantsita inkowiitaite.” <sup>3</sup> Rakanakeri

\* **11:21** Tema jirikapaini Corazín-satzi eejatzi Betsaida-satzi Judá-ite rinayetzi. Iriima Tiro-satzi, Sidón-satzi itsipasatzi atziri rinayetzi, te isheninkatari Judá-ite.

Jesús ikantziri: “Tema piñaanatakotziri ikantakota David-ni, aantawetariri ritashe it-sipayetakari ikaataiyini. <sup>4</sup> Ikyaake pairani tasorentsipankoki, rowakawo tasorentsitsiri, ipayetakeri eejatzi itsipatakari. Te ishinetaantsiweta, apatziro rowapiintawo Imperatasorentsitaarewo. <sup>5</sup> Rosankenaitake eejatzi pairani Inintakaantaitanewo, okantzi: ‘Eero pantawaitantawo kiteesheri rimakoryaantaitari.’ Iro kantzimaitacha riyaatapiintzi Imperatasorentsitaarewo kiteesheriki rimakoryaantaitari tasorentsipankoki, rantawaitapiintzi. Tekaaitsi kisakotyaawone. <sup>6</sup> Nokantzi naaka, eenitatsi jaka impinkathaperoiteri, iri anairori tasorentsipanko. <sup>7</sup> Iro rosankenatantaitakawori pairani, kantatsiri:

Te apa nonkoweri pamayetaina pipira pitagainari.

Iro nokowaperotairi pineshironkayetairi pisheninka.

Arikame pinkemathatero jiroka, eero pikantzirime jirikapaini, te ikaariperoshiretzi.

<sup>8</sup> Jirika Itomi Atziri ipinkathariperotzi irirori, ranairo kiteesheri rimakoryaantaitari.”

### *Atziri kisoimpekiri*

*(Mr. 3.1-6; Lc. 6.6-11)*

<sup>9</sup> Ikanta rowaaganaawo Jesús, ikyaapai eejatzi rapatotapiintaitaga. <sup>10</sup> Ari ri-saikakeri janta atziri kisoimpekitsiri. Ikanta Fariseo-paini, rosampitakeri Jesús, ikantziri: “¿Kameethatatsima petsiyatakotakagairi kisoimpekiri kiteesheriki rimakoryaantaitari?” Iroowa rosampitantariri ontzimantyaari inkantakoteriri. <sup>11</sup> Rakanakeri irirori, ikantziri: “Te paminaminthatashitari pipira arika rotetya omoonaki kiteesheriki rimakoryaantaitari, petakotari, pagairi. <sup>12</sup> Iriira retakoperoitari atziri, ranairi piratsi. Te owaariperoshiretantzi aneshironkatante kiteesheriki rimakoryaantaitari.” <sup>13</sup> Riñaanatanakeri atziri kisoimpekiri, ikantziri: “Pampiryaawakotai.” Matanaka atziri, akotsitanai, oshiyanaawo otsipa rako. <sup>14</sup> Kisaiyanakani Fariseo-paini. Jataiyakeni, ikenkithawaitaiyini, ikantzi: “¿Jimpe ankanterika Jesús, ampeyakaantyaariri?”

### *Rosankenatakoitzitakari pairani Jesús*

<sup>15</sup> Yotake Jesús ikowaitatzi ritsitokaiteri, iro rowaagantanaari. Royaatanakeri osheki atziri, retsiyatakotakagairi maawoini mantsiyari. <sup>16</sup> Ikantayewetakari: “Eerowa pithawetakotana.” <sup>17</sup> Ari imonkaatari rosankenatakagaitakeriri pairani Kamantantaneri Isaías-ni, ikantzi:

<sup>18</sup> Jirika nimperatanewo, iri niyoyaakeri.

Netakotanewo rini, iri oimoshirenkanari.

Kisokero roweri Tasorenkantsi,

Inkenkithatakagairi kaari asheninkata, inkamantairi irooperotatsiri.

<sup>19</sup> Eero richeraawentawaita irirori,

Eero ikemaitziri ishintsite inkenkithatakotya,

<sup>20</sup> Eero rowatsiperotziro risatairo sonkare sataawetainchari,

Eero roitsiwakiro paampari paampamenkiwetainchari,

Irojatziri rimatantyaawori iñeero irooperotatsiri. \*

<sup>21</sup> Iri royaakoneentairi kaari asheninkata raakotairi iwairo.

### *Kishimatziriri Tasorenkantsi*

*(Mr. 3.20-30; Lc. 11.14-23)*

<sup>22</sup> Ikanta ramaitakeniri Jesús raayiri peyari, ramashookitakaakari, ikisowaante-takaakeri eejatzi. Retsiyatakotakaawakeri, aminanai kameetha, ñaawaitanai eejatzi.

\* **12:20** Oshiyakaawentachari sonkare eejatzi paampamenkiwetainchari, iriitake atziripaini ikaatzi kemisantawetachari eepichokiini, ashironkaashireyetachari, mantsiyashireyetatsiri, jentashireyetatsiri, ari ineshironkayetairi Jesús jirikapaini, eero rishinetziri rashironkaayetaiya aawyaashireri inkantakaayetaiyaari, roshireperotakaayetaiyaari.



<sup>23</sup> Riyokitziitanake maawoini atziri, ikantaiyini: “¿Iriima jirika icharine David-ni oy-aakoneentziri?” <sup>24</sup> Kemaiyakeni Fariseo, ikantaiyanakeni irirori: “Jirika atziri ish-intsitakaatziiri ashitariri peyari Beelzebú, iro rowawisaakotantariri raagayetziri pe-yari.” <sup>25</sup> Iri kantzimaitacha Jesús riyotakotakeri ikenkithashireyeteri, ikantanakeri: “Atziri ipinkathariwentaitziri tsikarikapaini, arika rantaminthatawakaiya, ari iñaakero rookanawentawakaiya. Eejatzi arika rantaminthatawakaiya inampiki atziri, ari iñaakero rookanawentawakaiya inampiki. Arika rantaminthatawakaiya atziri ikaatzi risaikawankotawakaa, ari iñaakero rookanawentawakaiya ipankoki. <sup>26</sup> Ari ikan-tari eejatzi peyari arika rantaminthatawaiyaame. Arika rookanawentawakaanakya, ¿eeroma iñiiro rithonkya? <sup>27</sup> Iriirikame Kamaari Beelzebú shintsitakainane naaka, ¿irijatzima Kamaari shintsitakayiriri piyotaanewo eeroka rowawisaakotantariri raa-gaitziri? Arika okanta pithawetakotatziiri piyotaanewo, ari inkisaneentawentakemiro okaatzi pikantakeri. <sup>28</sup> Iri Tasorenkantsi poñaachari Pawaki shintsitakaanari naaka nowawisaakotantariri raayiri peyari. Irijatzi Pawa omapokakemiri eeroka ipinkathari-wentantzi. <sup>29</sup> Arika inkowaite inkoshiiteri shintsitatsiri kameetha atziri, ontzi-matye retaitawakyaari roosoiteri, eero ikisakowentantawo rashiwetari arika ray-itaiteri. <sup>30</sup> Ikaatzi kaari aapatziyanari naaka, iriitake kisaneentanari. Inkaate kaari amitakotenane rowiitakotena, reewanatakotatyaana. <sup>31</sup> Iro kantzimaitacha nokantzi naaka: Kantacha impeyakotairi Pawa inkaate kaariperoshirewetachari, ee-jatzi inkantairi maawoini ñaawaiwetawori kaariperori ñaantsi. Iriima kishimatakerine Tasorenkantsi, eero ipeyakoitairi. <sup>32</sup> Ari okantari eejatzi: Kantacha impeyakotairi Pawa inkaate kishimawetyaarine Itomi Atziri, iriima kishimatakerine Tasorenkantsi, eero iñagairo impeyakoitairi. <sup>33</sup> Oshiyawaityaawo arika iñagaitero kameethari cho-choki, riyotaitzi kameetha ini owaato tsika opoñaakawo chochoki. Ari okantari eejatzi arika iñagaitero chochoki piyantatsiri, riyotaitzi kaariperori ini owaato tsika opoñaaka iroori. <sup>34</sup> Poshiyakari maanke, kaariperoshireri pikantaiyakani. Tekaatsi pinkenakairo piñaawaitero kameethari, te ompantyaawo pikenkithashireyeteri, iro okaariperotanta-kari piñaawaitetziri. <sup>35</sup> Tema apaani kameethashireri ikenkithashiretawo kameethat-siri, iro okameethatantari rantayetziri. Iriima kaariperoshiretatsiri te ikenkithashire-tapiintawo kameethatatsiri, iro okaariperotantari rantayetziri. <sup>36</sup> Iro nokantantari naaka, ari raminakoitairo paata kaariperori riñaawaitaitziri. <sup>37</sup> Kameetharika okaatzi piñaaneyeteri, ari raakameethaitaimi. Irooma terika okameethatzi, inkantayeetaimi: ‘Kaariperoshireri pinake, osheki pinkemaatsitaiyaawo.’ ”

*Ikowaweta kaariperoshireri ritasonkawentantaite  
(Lc. 11.29-32)*

<sup>38</sup> Ikanta rakaiyanakeni Fariseo itsipatakari Yotzinkariite ikantanakeri: “Yotaan-tanerí, nokowi noñeemi pitasonkawentante.” <sup>39</sup> Rakanake Jesús ikantzi: “Kaariper-oshireri pinaiyini eeroka, pithainkanewo powakeri Pawa, pikowaiyini piñeena nita-sonkawentante. Eeromaita noñaayimiro, apatziro piñeero oshiyaawone awishimotak-eriri pairani Jonás, <sup>40</sup> iniyantakariri oshiyariri antari ñaaweri, tema mawa kiteesheri risaikake imotziki. Ari inkantyaari eejatzi jirika Itomi Atziri inkitawetapaintya mawa kiteesheri. <sup>41</sup> Paata arika raminakoitairo okaatzi rantaitziri, ari riyakowentaimi Nínive-satzi, tema ikemisantairi pairani irirori Jonás ripakaanairo ikaariperoshirewetaiyani. Tema jirika saikimotakemiri iroñaaka ranairi Jonás. <sup>42</sup> Paata arika raminakoitairo okaatzi rantaitziri, ari iyakowentaimi tsinane pinkathawotatsiri pairani nampitsiki Sabá, tema ipokashitakeri iroori pinkathari Salomón, okemisantairi. Jirika saikimo-takemiri iroñaaka ranairi Salomón.”

*Ripiyashitanta peyari  
(Lc. 11.24-26)*

<sup>43</sup> “Oshiyawaitakawo risaikashiretantari peyari apaani atziri, ipankotetakawo rañaamento. Arika rookaweetakyaari, awisakowetaa atziri risaikantakari peyari. Jatawetaawo ikenawaitzi ochempiki, te iñi jimpe risaika. <sup>44</sup> Ikantashiretai peyari: ‘Nipiyaita nopankoki tsika nopoñaanaka ketziroini.’ Piyaawo peyari, iñaapairi atziri kameetha opishitaka rañaamento, owaneenka okantaka. <sup>45</sup> Riyaatashitakeri maperotzirori ipeyaritzi, inkantakeri: ‘Jame aate nopankoki, pintsipatena ampinkatharite.’ Ramake ikaatzi 7. Ari rashironkaaperotyaari jirika atziri, eero roshiyaa rashironkaaweta pairani eepichokiini. Ari pinkantayetaiyaari iroñaaka eerokapaini.”

*Ikenkithatakotziro Jesús inaanate eejatzi irirentzi*  
(Mr. 3.31-35; Lc. 8.19-21)

<sup>46</sup> Eekero ikenkithatakaatziiri Jesús atziri piyowentakariri, ari areetapaaka inaanate otsipatakari irirentzipaini, okatziyapaaka jakakeroki, okaimakaantapaakeri. <sup>47</sup> Ikantaweetakari: “Ari ipoki pinaanate otsipatakari pirentzipaini, okowi oñeemi.” <sup>48</sup> Ari rakanake ikantzi: “¿litaka pikenkithashiryaari iroowa nonaanate, iriira nirentzitari?” <sup>49</sup> Rookotanakeri ikaatzi riyotaayetapiintakeri, ikantzi: “Jirikapaini iriitake noshiyakagairi nirentzi, iro noshiyakagairi eejatzi nonaanate. <sup>50</sup> Tema maawoini antanairori ikowayetziri Ashitairi Inkitesatzi, iriitake nirentzitaari, irootake nitsirotaari, irootake ninirotaari.”

## 13

*Roshiyakaawentziri Jesús pankiwairrentzi*  
(Mr. 4.1-9; Lc. 8.4-8)

<sup>1</sup> Ikanta rishitowanai Jesús pankotsiki, jatanai inkaarecheraaki. Ari risaika-paake. <sup>2</sup> Ipiyowentapaari osheki atziri. Iñaake othataka pitotsi, otetapaaka, saikapaake. Katziyaiyakani atziri inkaarecheraaki. <sup>3</sup> Roshiyakaawentatziiniri okaatzi ikenkithatakairiri, ikantziri: “Tzimatsi pankiwairrentzi jatatsiri impankiwaite. <sup>4</sup> Ikanta rookakitakero iwankire, tzimatsi jokakitapainchari awotsiki, ripoka-paake tsimeryaani, rowapaakawo. <sup>5</sup> Tzimatsi otsipa jokakitapainchari omapipookitzira tekaatsipero kipatsi, ari ishookawetanakari intsipaite. Te otontapathatzi kipatsi, <sup>6</sup> sampishitanake pankirentsi ishintsikitapaakera ooryaa, tema te okyaaperotzi oparitha inthomoiki. <sup>7</sup> Tzimatsi otsipa jokakitapainchari kitocheemashiki, anaanakero kitochee ishookanake, kamanake pankirentsi. <sup>8</sup> Irooma otsipa jokakitapainchari okameethapathatzi kipatsi, saankana ishookanake, kithokitanake maawoini. Tzimanai okithoki apawopaini okaatzi shookapaintsiri. Apaani shekichonchoitanaintsiri okithoki, otsipa shekipiyokineentaintsiri, otsipa eepiyokiini okithokitanake. \* <sup>9</sup> Kowatsiri inkemathatero, rowayempitaya inkemisante.”

*¿Oitaka roshiyakaawentantawori Jesús?*  
(Mr. 4.10-12; Lc. 8.9-10)

<sup>10</sup> Irojatziri rosampitantanakariri riyotaanewo, ikantziri: “¿Oitaka poshiyakaawentziniriri atziripaini?” <sup>11</sup> Rakanake Jesús, ikantzi: “Rishinetaitakemiro eerokapaini piyotairo tsika ikanta ipinkathariwentantai Inkitesatzi, iriima jirikapaini te rishinetaitziniri irirori. <sup>12</sup> Ikaatzi oshekitzimotakeri, ari oshekichonchoitzimotairi. Iriima kaari oshekitzimotzi, eero oshekichonchoitzimotairi. † <sup>13</sup> Iroowa noshiyakaawentantawori jiroka, onkantya raminawetya jirikapaini, eero iñiimaitawo.

\* **13:8** Kantakotachari jaka “okaatzi shookapaintsiri”, aamaaka okaatzi 100 okithoki, otsipa okaatzi 60 okithoki, otsipa okaatzi 30 okithoki. † **13:12** Okaatzi kenkithatakotachari jaka, jiroka okantakota: Eepichokiinirika pikemisantawakero nokantakemiri, eepichokiini piyotairo. Irooma pinkemisantaperotawakerika, osheki piyotawakeri, eekero niyotakaaperotayeemiro.

Arika inkemawetyaawo, eero riyotawakero nokantawetariri. <sup>14</sup> Iri ikenkithatakotake pairani Isaías-ni, ikantake:

Pinkemaiyawetyaani, eeromaita piyotaiyironi.

Paminaiyawetyaani, eeromaita piñagaiyironi.

<sup>15</sup> Tema kisoshire ikantaiyakani jirikapaini.

Witakempitari ikantaiyakani.

Amashookiri ikantaiyakani eejatzi.

Irootake kaari iñaantaiyawoni,

Kaari ikemantaiyani,

Kaari ikenkithashiretantaiyani.

Te ikemisantaiyini, eero nowawisaakotairi.

<sup>16</sup> Irooma eerokapaini kimoshire pikantaiyaani, tema piñagairo, pikemayetairo eejatzi. <sup>17</sup> Iro ikowaiyawetakarini pairani Kamantantaneriite eejatzi kameethashireriite, iñeerome irirori okaatzi piñaayetairi eerokapaini. Ikowawetaiyakani inkemerome pike-maiyakerini eeroka. Te iñeena, te ikemana eejatzi. Imaperotatya.”

*Ikenkithatakotziro Jesús roshiyakaawentziri pankiwairenzi*

*(Mr. 4.13-20; Lc. 8.11-15)*

<sup>18</sup> “Pinkeme nonkamantemiro okaatzi noshiyakaawentakeriri pankiwairenzi.

<sup>19</sup> Tzimatsi kemirori nokenkithatakotziro ipinkathariwentantaira Pawa, temaita riyotakotziro. Ikanta ripokapaake owaariperoshiretantatsiri ripakaakaapaakeri ikemisantawetana. Iri oshiyakawori pankirentsi jokakitapainchari awotsiki.

<sup>20</sup> Eenitatsi thaamentawori niñaane, ikemisantaweta intsipaite. Iri oshiyakawori pankirentsi jokakitapainchari omapipookitzira. <sup>21</sup> Te riyoperotero ñaantsi, te ikisashitawo rowasankewentaitanakeri ikemisantzi, ripakaanakero. Roshiyakawo

pankirentzi sampishitanaintsiri te okyaaperotzi oparitha inthomoiki kipatsiki. <sup>22</sup> Eenitatsi kemawetawori niñaane, iro kantzimaitacha iñaamawaitawo

inthaamentawaitya, osheki eejatzi ikenkithashiretakotziro rowaagawo, irootake ipeyakotantakawori niñaane, te ikemisantzi. Roshiyakawo pankirentsi jokakitapainchari kitocheemashiki, kaari kithokitatsine. <sup>23</sup> Tzimatsi itsipa kemirori

niñaane, ikemisantanakero. Ikyaryoowentanakero. Iri oshiyakawori pankirentsi shookapaintsiri okameethapathatzira kipatsi, shekichonchoitanake okithoki, otsipa shekipiyokineentaintsiri, otsipa eepiyokiini okithokitanake.” †

*Ikenkithatakotziro Jesús pankitzirori trigo*

<sup>24</sup> Roshiyakaawentakeniri eejatzi Jesús, ikantzi: “Jirokaga ikanta ipinkathariwentantai Inkitesatzi, oshiyatyaari apaani atziri pankitakaantzirori kameethakiri trigo.

§ <sup>25</sup> Okanta tsireniriki rimagaiyinira ratziritepaini eejatzi irirori, pokake kisa-neentziriri ramake okithoki trigo-niro, ipankitapaakeniri rowaneki, rowaitakero trigo-pero, piyanaka. <sup>26</sup> Okanta ishooakanake trigo-pero, kithokitanake. Eejatzi okantzitaka

trigo-niro rowaitaitakerori. <sup>27</sup> Ikanta iñaakero ratzirite, riyatashitakeri ashitawori, ikantakeri: ‘Te opantawo okithoki trigo apankitakeri powaneki, ¿itaka owaitantakar

ishooki trigo-niro?’ <sup>28</sup> Ikantanake ashitawori rowane: ‘Kisaneentanari pankitakerori.’ Ikantzi ratzirite: ‘¿Pikowima niyaate nonthokayetairo trigo-niro?’ <sup>29</sup> Rakanake, ikantzi:

‘Eero, aamaashitya pithokakotzirokari trigo-pero. <sup>30</sup> Atake okantawakaata owaityaa-woota ishooke, irojatzi isampatantakyaari trigo-pero. Aripaite nonkantemi: Pithatzi-

keri trigo-niro, pitayero. Powiitero trigo-pero, powayetairo.’ ”

*Roshiyakaawentaitziro okithoki oryaanikitatsiri*

*(Mr. 4.30-32; Lc. 13.18-19)*

† **13:23** Paminero kantakotachari versículo 13.8. § **13:24** Ikantaitziri jaka “trigo”, pankirentsi ini, ritoonkaitziro okithoki, iroowa riwetsikantaitawori pan.

<sup>31</sup> Ikanta rapiitakero Jesús roshiyakaawentziniri, ikantziri: “Jirokaga ikanta eejatzi ipinkathariwentantai Inkitesatzi, roshiyakari pankitzirori oryaanikitatsiri okithoki pankirentsi. \* <sup>32</sup> Oryaani okantaweta okithoki, iro kantzimaitacha arika ishookanake, anairo otsipa pankirentsi, antawo otewayetanake ari imenkoshiyetari tsimeryaaniki itsimankatapishitakera.”

*Roshiyakaawentaitziro kachopathari*  
(Lc. 13.20-21)

<sup>33</sup> Jiroka otsipa roshiyakaawentakeri Jesús, ikantzi: “Jirokaga ikanta ipinkathariwentantai Inkitesatzi, roshiyakawo apaani tsinane naashewaitatsiri. Aake eepichokiini kachopathari, owaitantakawo maawoini oshe. Ari oñaakero onkachopathate.” †

*Oita roshiyakaawentantawori Jesús ikenkithatakoyetakeri*  
(Mr. 4.33-34)

<sup>34</sup> Ari ikantapiinta Jesús roshiyakaawentziro okaatzi riyotaantayetziri. Tekaatsi apaani kaari roshiyakaawente. <sup>35</sup> Ari imonkaatari ikenkithatakotakeri pairani Kaman-tantaneri ikenkithatakotziro ikantakeri Pawa: Noshiyakaawentatyeeniri atziri maawoini nonkamanteriri. Nooñaawontainiri kaari riyotaitzi pairani owakera iwetsikantakari kipatsi irojatzi iroñaaka.

*Rooñaawontziro Jesús oshiyakaawentachari trigo-niro*

<sup>36</sup> Ikanta riyaaatanai Jesús, rookanairi piyowentakariri, jatanake pankotsiki. Ari rosampitakeri riyotaanewo, ikantziri: “Piyotainawo okaatzi poshiyakaawentak-eri. ¿Oitaka oshiyakaawentachari trigo-niro rowaitaitakerori ipankiitziro trigo-pero?” <sup>37</sup> Ikantzi Jesús: “Jirika Itomi Atziri iriitake oshiyakariri ashitawori rowane ipanki-itakerowa trigo-pero. <sup>38</sup> Jiroka owaantsi iro oshiyakaawentzirori kipatsi risaikantaitari. Jiroka trigo-pero iri oshiyakaawentacha ikaatzi ipinkathariwentairi Pawa. Irooma trigo-niro oshiyakaawentziri ikaatzi rashiyetari Kaariperori. <sup>39</sup> Jirika kisa-neentantatsiri pankitakerori trigo-niro iri oshiyakaawentachari Kamaari. Oshiyawori rowiitaitziro okithoki trigo, oshiyakaawenta arika ithonkaiya paata kipatsi. Jirika-paini owiiyetairori okithoki iri oshiyakaawentachari maninkariite. <sup>40</sup> Piñaakero, ipiy-oitakero trigo-niro, ritagaitakero. Iro oshiyakaawentachari arika ithonkaiya paata kipatsi. <sup>41</sup> Jirika Itomi Atziri rotyaantairi maninkariite, impiyotairi kaariperoshiretat-siri, tema te ikowi rowaitaiyaari ikaatzi kemisantayetakeriri. <sup>42</sup> Ritaayeetairi kaariper-oshireri, riraawaitaiya ratsikaikiwaitiya inkemaatsiwaitaiya. <sup>43</sup> Iriima kameethashire-taintsiri, shipakirya inkantaiya roshiyaiyaari ooryaatsiri. Risaikimotairi Ashitairi tsika ipinkathariwentantzi irirori. Powayempitaya.”

*Ikenkithatakotziri Jesús manachari koriki*

<sup>44</sup> Rapiitanakero eejatzi Jesús, ikantzi: “Jiroka otsipa noshiyakaawentemiri. Tzimatsi osheki koriki rimanaitziri owaantsiki. Ikanta apaani atziri iñaakeri, te onkantya raanakeri, eejatzi rimananairi, tekaatsi inkamante, ikantashiretanake irirori: ‘Ontzi-matye namanantero jiroka kipatsi, ompoñaantyaari nashityaari tzimatsiri janta.’ Ipi-mantakero okaatzi tzimimowetariri, ramanantakero kipatsi. Kimoshire ikantaka, tema ramanantakotake osheki koriki. Ari okantari eejatzi ipinkathariwentantai Inkitesatzi.”

*Ikenkithatakotziro Jesús poreryaari pinaperotachari*

<sup>45</sup> Ikantzi eejatzi Jesús: “Jirokaga ikanta ipinkathariwentantai Inkitesatzi, roshiyari apaani atziri kowaintsiri ramanante poreryaari. ‡ <sup>46</sup> Iñaake poreryaari, osheki ikowake

\* **13:31** Iro “ikantakoitziri jaka” okithoki oryaanikitatsiri pankirentsi, jitachari mostaza, shookatsiri inampiki itsipa atziri. † **13:33** Kantakotachari jaka “maawoini oshe” irojatzi iitaitziri mawa inkitapathaitero oshe pasoki. ‡ **13:45** Iro ikantakoitzi jaka poreryaari, ikaatzi poreryaayetatsiri oshiyawetawori mapi iitaitziri “perla”, osheki inintaitziro. Osheki okanta owinawo.

rayeri. Irojatzí ripiyantanaari inampiki, ipimantapaakero okaatzí tzimimotziriri, ramanantakero poreryaari.”

*Ikenkithatakotziro Jesús tarajaamentotsi*

<sup>47</sup> Ikantake eejatzí Jesús: “Jirokaga ikanta ipinkathariwentantai Inkitesatzí, roshiyakari apaani tarajaatatsiri. Raake osheki kantawaitachari shima. <sup>48</sup> Inoshikakotakeri othapyaaki, riyoyaakeri kameethatatsiri. Rookayetakeri ikaatzí kaari kameethatatsi. <sup>49</sup> Ari onkantaiyaari paata arika ithonkaiya kipatsi. Ripokake maninkariite, rinashiyetai yaari kameethashireri, ari inkanteri eejatzí kaariperoshireri. <sup>50</sup> Irojatzí ritaantayetyaari kaariperoshireri, ari riraawaitaiyaari, ratsikaikiwaitaiya inkemaatsitaiya.”

*Ikenkithatakotziro Jesús owakerari owaagawontsi eejatzí antyashipawo*

<sup>51</sup> Ikantzi Jesús: “¿Pikemathatakero okaatzí nokantayetakeri?” Ikantaiyini riyotaanewo: “Nokemathatakero.” <sup>52</sup> Ikantanake eejatzí Jesús: “Noshiyakaawenterí apaani ashitaanitachari, tzimatsiri rowaagawo pinatachari. Raapiintziro antyashipawo rowaagawo, eejatzí owakerari. Ari ikanta ipinkathariwentantai Inkitesatzí, roshiyakari yowairentziite riyotaantairo okaatzí riyotaantaitziri pairani, riyotaantairo eejatzí owakerari.”

*Piyaawo Jesús Nazaret-ki*  
(Mr. 6.1-6; Lc. 4.16-30)

<sup>53</sup> Ikaatakero Jesús roshiyakaawentakero okaatzí ikenkithatakotakeri, ari rowaaganaawo. <sup>54</sup> Ikenanai inampiki. Riyotaantayetapai rapatotapiintaitaga. Riyokitzi-  
iwentawairi ikaatzí kemayetakeriri, ikantaiyini: “¿Iitakama matakaakeriri jirika riyota-  
netantari, ritasonkawentantake eejatzí? <sup>55</sup> ¿Kaarima itomi pimantzirori inchakota-  
paini? ¿Kaarima otomi María? ¿Kaarima irirentzipaini: Jacobo, José, Simón, eejatzí Judas?  
§ <sup>56</sup> ¿Kaarima atsipatari iritsiropaini jaka? ¿Tsika iitaka roshiyakaawaimatsitantari  
ipinkathariwentantzi?” <sup>57</sup> Osheki rithainkaitakeri, ikisaneentaitanakeri. Iro ikan-  
tananakari Jesús: “Rashi rowiro te ipinkathaitziri Kamantantaneri inampiki irirori.”  
<sup>58</sup> Tema osheki rithainkimawaitaitakeri Jesús inampiki, iro kaari ritasonkawentanta.

## 14

*Ikamantakari Juan omitsitsiyaatananeri*  
(Mr. 6.14-29; Lc. 3.19-20; 9.7-9)

<sup>1</sup> Ikanta Herodes jitachari Tetrarca, ikemakotakeri Jesús. <sup>2</sup> Ikantziri rimper-  
atanewo: “Jirika Jesús iriitake Juan omitsitsiyaatananeri. Iri añagaatsi, piñeeri  
otzimi ishintsinka.” <sup>3</sup> Tema iri Herodes aakaantakeriri ketziroini Juan, rooso-  
takaantakeri, romonkyaaakaantakeri. Iro kantakaantzirori Herodías iinantawetari  
irirentzi Felipe. <sup>4</sup> Tema ikaminaawetatyaari Juan jirika Herodes, ikantawetari: “Te  
okameethatzi paapithatantziro.” <sup>5</sup> Ari ikowawetaka ritsitokakaanterime, iro kantzi-  
maitacha osheki pinkathatakakeriri Juan, riyotaiyini Kamantantaneri rini. Ithaawan-  
tanakari Herodes atziripaini, ikantashiretzi: “Arika nitsitokakaanteriki, ari inkisa-  
neentaitakena.” <sup>6</sup> Okanta imonkaataka kiteesheri roimoshirenkawentawo itziman-  
tari Herodes. Ipiyotaiyakani osheki isheninka, roimoshirenkaiyani. Ari ipokapaake  
ishinto Herodías, omampaapaaka. Okameethatzimotanakeri Herodes. <sup>7</sup> Ikantakero:  
“Oitarika pinkowakotenari, ari nompakemiro. Imaperotatya, riyotzi Pawa eero na-  
matawitzimi.” <sup>8</sup> Okantakero onaanate: “Pinkanteri rithatzinkakaanteriki Juan.” Irojatzí  
okantantanakariri: “Nokowi pamakotakenawo iito Juan pasoshetaki.” <sup>9</sup> Ari rowashire-  
tanaka Herodes, te ikowaweta. Iro kantzimaitacha ikemaiyakerini isheninka ikan-  
takerori ketziroini. <sup>10</sup> Irootake rithatzinkakaantantakariri Juan. <sup>11</sup> Ramakoitakero iito,



ipakoitakero aanakeniro onaanate. <sup>12</sup> Irojatzí ripokaiyantapaarini riyotaanewo Juan, ikitatairi. Jataiyanakeni risaikira Jesús, ikamantapaakeri.

*Rowakaari Jesús 5000 shiramparipaini*  
(Mr. 6.30-44; Lc. 9.10-17; Jn. 6.1-14)

<sup>13</sup> Ikanta ikemake Jesús kamake Juan, otetanaka pitotsiki riyaaatero tonkaariiteki. Iro kantzimaitacha ikemakoitakeri tsika riyaaate, shiyaiyanakani ikenaiyanakeni awot-siki, royaataitanakeri. <sup>14</sup> Iro raatakotapaakitziini Jesús, iñaapaatziiri osheki ipiy-otaka atziri. Retakoshiretapaakari, retsiyatakotakaake osheki mantsiyayetatsiri. <sup>15</sup> Okanta otsireniityaanake, ikantzi riyotaanewo Jesús: “Pamine, asaikatzi tonkaariki, tsireniityaanake. Pinkaatero pikenkithatzi, riyaaaita atziri nampitsiki rowapaiya.” <sup>16</sup> Rakanakeri, ikantziri: “¿Litaka ratsipetantyaawori riyaaayetai? Pimperí eeroka rowanawo.” <sup>17</sup> Ikantanake riyotaanewo: “Tekaaitsi nomperiri naaka. Apatziro otzimi 5 pan eejatzi apite shima.” <sup>18</sup> Ikantzi Jesús: “Pamakenari jaka.” <sup>19</sup> Ikantakeri maawoini atziri: “Pisaikaiyeni.” Saikaiyanakeni atziripaini. Raakero pan, eejatzi shima, aminanake jenoki inkiteki, ramananaka, ikantzi: “Niwethareemi Ashitanarí, eerokatake pakenawori jiroka nowanawo.” Itzipetowakero, ipayetakeri riyotaanewo, rowawisaakeniri atziripaini piyotainchari. <sup>20</sup> Maawoini rowaiyakani, kemakitaiyakani. Ipiyotairo tzigagaantapaintsiri, roteyetairo kantziriki, okaatzi 12 yeekitatsiri. <sup>21</sup> Aamaaka ikaatzi 5000 shirampari owainchari. Eenitatsi tsinane eejatzi eentsipaini owainchari.

*Ranashaatantawo Jesús inkaare*  
(Mr. 6.45-52; Jn. 6.15-21)

<sup>22</sup> Ikantairi Jesús riyotaanewo: “Jame petaiyaawo intatsikero.” Ikantakeri eejatzi piyotainchari atziripaini: “Kantacha piyaataiyaini.” <sup>23</sup> Irojatzí ikenantanakari irirori tonkaariki, ramanamanaatari Ashitariri. Okanta otsirenitanake, saikake apaniroini Jesús janta. <sup>24</sup> Weyaakotaiyaani riyotaanewo niyankyaaneki, antawo otamakaare inkaare, oipiyapiyatakotakeri tampyaa. <sup>25</sup> Okanta okiteeshetzimatake, pokai Jesús ranashaatantaawo inkaare. \* <sup>26</sup> Te riyotawairi, thaawaiyanakeni riyotaanewo, ikaimaiyanakeni: “¡Kaakitake shiretsiwé!” <sup>27</sup> Riñaanatapai irirori, ikantziri: “Naaka pokaatsi, tontashire pinkantya eero pithaawawaitzi.” <sup>28</sup> Ari ikantanake Pedro: “Eerokama Nowinkatharité, pimatakainawo nanashaatantyaawo naaka inkaare.” <sup>29</sup> Ikantzi Jesús: “Pipokanakeeta.” Anashitanaka Pedro inkaareki riyaatashitanakeri ikatziyakaga. <sup>30</sup> Ari ikenkithashiretanaka Pedro antawo otamakaare inkaare, thaawanake, irootake ritsitsiyantanakari, ikaimanake: “Pinkatharí paawaina.” <sup>31</sup> Rakothatashitanakeri Jesús, raawairi. Irojatzí ikantantanakariri: “Eepichokiini pikemisantakena. ¿Oitaka pikisoshiretantari?” <sup>32</sup> Ikanta rotetapaa pitotsiki, awisainkatanake tampyaa. <sup>33</sup> Antawoite ipinkathatanakeri riyotaanewo, iantaiyanakerini: “Imaperotatya eerokatake Itomi Pawa.”

*Retsiyatakotakaantake Jesús Genesaret-ki*  
(Mr. 6.53-56)

<sup>34</sup> Ikanta rareetaiyaani intatsikero nampitsiki Genesaret. <sup>35</sup> Iro raatakotapaakitziini Jesús, riyotaitawakeri. Ikamantaitakeri maawoini nampitawori janta, ramayetapaakeri mantsiyayetatsiri. <sup>36</sup> Ikantaitakeri Jesús: “Pishineteri mantsiyari riterotawakero piithaare, retsiyatakotantaiyaari.” Ari okantzimaitaka, ikaatzi terotzitakeriri iithaare, etsiyatakoyetai.

\* **14:25** Kantakotachari jaka: “Okanta okiteeshetzimatake”, irootake oshiyawori rametari rantayetapiintziro owayeripaini raamaawenta tsireniriki, eero ikakiwaitanta apaani owayeri maawoini tsireniriki, ontzimatye intzime 4 owayeri aamaawentachane. Apaani etanakyawone owakera ontsirenitanake, itsipa arika oniyankiityaanake tsireniri, itsipa arika oniyankitake tsireniri, weyaantapaakyaawone iri kiteeshetakotatsine.

## 15

*Owaariperoshiretziriri atziri*  
(Mr. 7.1-23)

<sup>1</sup> Ikanta ripokaiyakeni Fariseo itsipatakari Yotzinkariite. Ipoñaakawo nampitsiki Jerusalén. Ikantapaakeri Jesús: <sup>2</sup> “Judá-ite anaiyini. Iro ametaiyarini akiwaakota tekera oyaata, ari okanta riyotaayetairi pairani acharineete. ¿Oitaka kaari rimatantawo piyotaanewo? Rowapiintaiyani te ikiwiro rako.” <sup>3</sup> Rakanake Jesús, ikantzi: “Irojatzi poshoretawo eerokapaini riyotaayetairi pairani acharineete, te pimatzimaitawo riyotaayetairi Pawa. <sup>4</sup> Jiroka ikantzi Pawa:

Pimpinkathateri ashitzimiri.

Ikantake eejatzi:

Ontzimatyé romposaiteri kishimatziriri ipaapate.

<sup>5</sup> Iro kantzimaitacha pikantashitapiintaiyani eeroka: ‘Kameethatatsi ankanteri apaa-pate: “Nokashaakaakeri Pawa maawoini noorikite, eero okanta noneshironkatemi eeroka.”’ <sup>6</sup> Piyotaantashitakawo rametaitari pairani, te piyotaantziro inintaperotziriri Pawa. Iro kaari retakotantaari asheninkapaini ipaapate. <sup>7</sup> Owapeyimotantaneri pinaiyini. Eeroka ikenkithatakotake pairani Isaías, ikantake:

<sup>8</sup> Ipinkathawaantewaitashitakena atziripaini.

Temaita ikenkithashiretakotana kameetha.

<sup>9</sup> Aminaashita rotziwerowawaita ipinkathawetana,

Riyotaantashiwaitawo rameyetari irirori.”

<sup>10</sup> Ikaimakeri Jesús maawoini piyowentakariri, ikantziri: “Pinkemisantaiyeni, pinkemathatantyaawori nonkenkithatakoteri: <sup>11</sup> Ikaatzi owari te rowaariperoshiretantzi, irooma okaatzi añaawaitziriri, iroowa owaariperoshiretantatsiri.” <sup>12</sup> Irojatzi ripokashitantapaakariri riyotaanewo okaakiini, ikantapaakeri: “Te inimoteri Fariseopaini ikemakemi pikantake.” <sup>13</sup> Ikantanake Jesús: “Ashitanari Inkitesatzi, ari inthokairo okaatzi kaari ipankitzi irirori. <sup>14</sup> Piñaaminthatashityaari, te riyotaiyini irirori, roshiyakari amashookiri. Roshiyakotakari rakathatawakaa mawityaakiri, te riyotzi jimpe inkene, apitekeroini impare omooki.” <sup>15</sup> Ari ikantzi Pedro: “Pooñaawontenawo okaatzi poshiyakaawentakeniriri jirikapaini.” <sup>16</sup> Ikantzi Jesús: “¿Tekerama otzimimotzimiita eeroka piyorenka? <sup>17</sup> ¿Tema piyotzi okaatzi owapiintari okeni asheetoki, irojatzi omishitowantaiyaawori? <sup>18</sup> Irooma añaawaitero kaariperori akenkithashireyetari, iroowa owaariperoshiretantatsiri. <sup>19</sup> Tema ashireki akenkithashiretawo kaariperori, omposawakaantsi, mayempitaantsi, ñaathatakotaantsi, koshitaantsi, thaiyakotaantsi, kishimataantsi. <sup>20</sup> Irootake jiroka owaariperoshiretantatsiri. Irooma eerorika akiwaakota ankowerika oya, te owaariperoshiretantzi iroori.”

*Okemisantzi tsinane Canaán-sato*  
(Mr. 7.24-30)

<sup>21</sup> Ikanta ikenanake Jesús nampitsiki jitachari Tiro irojatzi Sidón-ki. <sup>22</sup> Ari ipokashitakeri apaani tsinane Canaán-sato, kaari Judá-ite iroori. Okantapaakeri: “Nowinkatharité, eeroka icharine pinkathari David-ni. Nokowi pineshironkataina, osheki okemaat-sitakawo nishinto raayiro peyari.” <sup>23</sup> Ari imairetake Jesús, te rakiro. Ikantaiyirini riyotaanewo: “Potyaantairo iyaataita, osheki omerenchaakai.” <sup>24</sup> Ikantanakero Jesús: “Apatziro rotyaantakena Ashitanari noneshironkayetairi nosheninkaite Israel-iite, oshiyakariri oweja ipeyawaitaka.” <sup>25</sup> Ari otziwerowashitanakari Jesús jiroka tsinane, okantanakeri: “Pinkatharí, pineshironkataina naaka.” <sup>26</sup> Ikantanakero irirori: “Paata tsinane. Tema ikantaitake pairani: “Te aapithatziri rowanawo eentsite amperi otsitzi royaawo.’ ” \* <sup>27</sup> Akanakeri iroori, okantziri: “Imapero pikantakeri Pinkatharí.

\* 15:26 Iriira roshiyakaawentaitzi Judá-ite roshiyakari eentsi. Iriima kaari Judá-ite roshiyakari otsitzi.



Iro kantzimaitacha, rowapiintamatsitawo otsitzi rowaryagaitziro owanawontsi otap-inaki.”<sup>28</sup> Rakanairo Jesús, ikantziro: “Tsinané, imapero pikemisantai eeroka. Irootake nimatantyaawori pikowakotakenari.” Apathakero awisakotanai ishinto.

### *Retsiyatakotakaake Jesús osheki atziri*

<sup>29</sup> Ikanta rowaaganaawo Jesús ikenanairo ocheraaki inkaare Galilea. Irojatzitzi ritonkaantanakari otzishiki, ari risaikapaake janta. <sup>30</sup> Ari ripokashitakeri osheki atziri, ramayetake kantawaiyetachari imantsiyare: ethoriwaitatsiri, amashookiri, kisowaanteri, pesaponchokiri, maawoini. Rithonkiri retsiyatakotakaayetziri. <sup>31</sup> Riyokitziwentaianakeri Jesús iñagaitakeri riñaawaitakagairi kisowaanteri, ranashitakaayetaari kisopookiri, ethoriwaitatsiri eejatzitzi, raminakaayetaari mawityaakiri. Ikantaiyini atziripaini: “Imapero ikameethatake Pawa, iriitake pinkathariwentairiri isheninkapaini Israel.”

### *Rowakaari Jesús 4000 shiramparipaini (Mr. 8.1-10)*

<sup>32</sup> Ikanta Jesús ipiyotakeri riyotaanewo, ikantakeri: “Osheki netakotakari atziripaini, tema mawa kiteesheri risaikaiyakeni ikemisantana, tekaatsi rowaiya. Arika riyaatashitaiya eero rowanaa, ari aakeri ritashe awotsiki.” <sup>33</sup> Ikantaiyini riyotaanewo: “Pamine, asaikatzi ochempiki. ¿Tsika ayeka owakayaariri? Osheki ikaataiyini.” <sup>34</sup> Ari rosampitziri Jesús riyotaanewo: “¿Tsika okaatzika pan tzimatsiri?” Ikantzi riyotaanewo: “Tzimatsi okaatzitzi 7, tzimitacha eejatzitzi shiwaireki.” <sup>35</sup> Ari ikantaitanakeri ikaatzitzi piyotainchari: “Pisaikaiyeni.” <sup>36</sup> Raakero pan eejatzitzi shiwaireki, riwetharyaawentakawo. Irojatzitzi itzipetowantakawori pan, ipayetakeri riyotaanewo, rowawisaakeniri piyotainchari atziri. <sup>37</sup> Owaiyakani maawoini, kemaneentaiyakani. Ipiyotairo tzimagaantapaintsiri, yeekitai okaatzitzi 7 kantziri. <sup>38</sup> Amaaka ikaatzitzi 4000 shirampari owainchari. Tzimitacha tsinanepaini eejatzitzi eentsipaini owainchari. <sup>39</sup> Irojatzitzi ikantantanaari Jesús: “Ari owaiyakani, kantacha piyaayetai.” Ari rote-tanaawo Jesús pitotsiki, montyaanaka iipatsiteki Magdala-satzitzi.

## 16

### *Ikowakoitziri Jesús ritasonkawentante (Mr. 8.11-13; Lc. 12.54-56)*

<sup>1</sup> Ikanta ripokaiyakeni Fariseo itsipatakari Sadoc-iite, ikowawetaiyatyaani rikom-pitakayaarime Jesús inantyaari riyakowenterime. Ikantawetapaakari: “Janjaatya pitasonkawentante niyotantyaari imaperotatyaarika opoñaawo pitasorenka inkiteki.” <sup>2</sup> Rakanake Jesús ikantzi: “Arika onkityonkaiyte tsireniiteeni, pikantaiyini eeroka: ‘Osaryaamanaatye onkiteshetamanai.’” <sup>3</sup> Irooma piñaamanairorika menkori onkityonkaiyte inkiteki, pikantzi: ‘Omparyaatye inkani.’ Piñaakero, piyotakowetawo inkite, piyotakotziro ompare inkani. Iro kantzimaitacha te piyotzimaitawo piñaayewetari jaka kipatsiki. <sup>4</sup> Te pikameethashiretaiyini eeroka, thainka powakeri Pawa, iro pikowantaiyarini piñeena nitasonkawentante, eeromaita noñaayimiro. Apatziro piñeero awishimotakeriri pairani Jonás.” Ari ripiyanaawo Jesús.

### *Kachotakairori iwaane Fariseo (Mr. 8.14-21)*

<sup>5</sup> Ikanta rareetaiyakani riyotaanewo Jesús intatsikero, te raanake iwaane, imaisantanakero. <sup>6</sup> Ikantzi Jesús: “Paamaiyaawo kachotakairori iwaane Fariseo eejatzitzi rashi Sadoc-iite.” <sup>7</sup> Ari rosampitawakaanaka riyotaanewo, ikantawakagaiyani: “¿Oitaka ikantantairori jiroka? ¿Irooma ikantantairi te amanake awaane?” <sup>8</sup> Yotake Jesús ikantawakaari riyotaanewo, ikantziri: “Te pikemisantaiyini eeroka, iro pikenkithashirewaitantari, pikantaiyini: ‘Te amake awaane.’” <sup>9</sup> ¿Tema piyotaiyironi?

Chapinki otzimaweta pan okaatzi 5, iro kantzimaitacha nowakaaka 5000 shirampari. Powiitairo tzigagaantapaintsiri. ¿Tsika okaatzika kantziri piyeekitairi? <sup>10</sup> Ari nokantzitakawo kaatatsiri 7 pan, nowakaakari 4000 shirampari. ¿Tsikama okaatzika kantziri piyeekitairi? <sup>11</sup> ¿Oitaka kaari piyotakotantawo eeroka? Te iro niñaawente rowaitari pan. Nokantatziimi: ‘Paamaiyaawo kachotakairori iwaane Fariseo eejatzi rashi Sadoc-iite.’ ” <sup>12</sup> Ari riyotaiyanakeni riyotaanewo, te iro riñaawente Jesús kachotakairori pan, roshiyakaawentatziiro okaatzi riyotaantayetziri Fariseo eejatzi Sadoc-iite.

*Riyotake Pedro: Cristo rini jirika Jesús*

*(Mr. 8.27-30; Lc. 9.18-21)*

<sup>13</sup> Ikanta ikenanake Jesús janta Cesarea-ki, inampitsiteki Filipos. Ari rosampitakeri riyotaanewo, ikantziri: “¿Oitaka ikenkithashiretakoitariri Itomi Atziri?” <sup>14</sup> Rakaiyanakeni, ikantzi: “Eenitatsi atziri kantatsiri, ‘Juan omitsitsiyaatanteneri piriintaachari.’ Ikantzi itsipa, ‘Iri koñaataatsiri Elías.’ Ikantzi itsipa ‘Iri Jeremías-ni.’ Tzimatsi kantayetatsiri eejatzi, itsipa Kamantanteneri rini.” <sup>15</sup> Ikantziri riyotaanewo: “Eeroka. ¿Tsika pikantaiyinika?” <sup>16</sup> Rakanake Simón Pedro, ikantzi: “Eerokatake Cristo, Itomi Pawa Kañaneri.” <sup>17</sup> Ikantzi Jesús: “Imaperotatya okaatzi pikantakeri Simón itomi Jonás, kaari atziri yotakaakemirone jiroka, iri Ashitanari Inkitesatzi yotakaakemirori. <sup>18</sup> Noitaimi Pedro, mapi oshiyakaawentacha piwairo. Tema mapi poshiya, ari niwetsikairo nopanko. Inkaate kemisantaatsine paata, iri oshiyaawone pankotsi. Eero rimatziro sarinkaweniweri impeyakaashitaiyaari. <sup>19</sup> Iri poshiyaiyaari aminirori ashitakowo pankotsi, kantacha rashitareero, kantzitacha eejatzi rashitero, rintsiriitero shintsiini. Iro pankotsi oshiyakaawentacha tsika ipinkathariwentantai Inkitesatzi. Ikaatzi pishinetairi eeroka jaka, iri rishinetaitzi inkiteki. Iriima kaari pishinetai jaka, iri kaari rishineetzi inkiteki.” <sup>20</sup> Ikantanakeri Jesús maawoini riyotaanewo: “Paataga pikamantantzi, pinkante: ‘Iri Cristo jirika Jesús.’ ”

*Ikenkithatakotziro Jesús inkame*

*(Mr. 8.31-9.1; Lc. 9.22-27)*

<sup>21</sup> Ikanta Jesús ikamantakeri riyotaanewo, ikantziri: “Irootaintsi aate nampit-siki Jerusalén, antawoite inkemaatsitakaina Itzinkamipaini, reewaperore Imperata-sorentsitaarewo, reeware Yotzinkariite, ari ritsitokaantaitena. Iro awisawetakya mawa kiteesheri nañagai eejatzi.” <sup>22</sup> Ikanta Pedro, raanakeri Jesús jantyaatsikaini, ikantakeri: “Pinkathari, te inimotena naaka pikantziri, te nokowi awishimotemi jiroka.” <sup>23</sup> Ari ripithokanaka Jesús, rakanake: “Piyaate Satanás. Te poshoretawo eeroka ikowakaanari Pawa, apatziro poshoretawo ikowapiintakeri atziripaini.”

<sup>24</sup> Ikantanakeri Jesús maawoini riyotaanewo: “Tzimatsirika kowatsiri intsipatena, ripakairo ikowashiyetari rantero, onkantawetya inkentakoiterime, intsipatena. <sup>25</sup> Tema ikaatzi etakowaitashitachari apaniroini rantayetziro iñaamatashiyetari, ari impeyashitaiya. Iriima kamawentenane rantayetanairo nokowakayiriri, ari rawisakoshiretai. <sup>26</sup> Aminaashiwaita otzimimotziri maawoini rowaagawopaini tzimatsiri jaka kipatsiki, ari ompeyakaashitaiyaari rañaamento. ¿Kantachama ripinakowentaitya eero iñaantaitawo impeyashitaitya? <sup>27</sup> Ari ripiyai paata jirika Itomi Atziri ramairo rowaneenkawo Ashitariri, intsipataiyyaari maninkariite, iri pinatantapairone okaatzi rantaitakeri. <sup>28</sup> Imaperotatya, eenitatsi pikaatzira jaka, tekera pikamiita ari piñaakeri Itomi Atziri jimpe ikanta ipinkathariwentantzi.”

## 17

*Rishipakiriimotziri Jesús riyotaanewo*

*(Mr. 9.2-13; Lc. 9.28-36)*

<sup>1</sup> Okanta awisake 6 kiteesheri, eejatzi raanairi Jesús: Pedro, Jacobo, eejatzi Juan, irirentzi Jacobo. Ritonkaiyanakeni otzishiki. <sup>2</sup> Ari ipashinitzimotakeri riyotaanewo, rishipakiryaaanake ipooki, roshiyanakari ooryaatsiri, matanaka iithaare kitamaaki okantanaka. <sup>3</sup> Iñaatziiri Moisés-ni, eejatzi Elías ikenkithawaitakairi Jesús. <sup>4</sup> Ikanta Pedro, ikaimakotanakeri Jesús, ikantzi: “Pinkatharí, imapero okameethatzi pamakenaga jaka. Kameetha niwetsikemi mawa pankoshetantsi: apaani pashitya eeroka, apaani rashitya Moisés, rashitya apaani Elías.” <sup>5</sup> Ikenkithawaiminthaitzi, ipamankapaakeri menkori, shipakirya okantapaaka. Ikematzi ñaawaitanaintsiri menkoriki, ikantaitzi: “Notomi rinatzi jirika netakokitakari, osheki nokimoshirewentakeri. Pinkemisantairi.” <sup>6</sup> Ikanta ikemaitakero jiroka ñaantsi, oiyotaiyanakani isaawiki, antawoite ithaawaiyanakeni. <sup>7</sup> Iri kantzimaitacha Jesús ripokashitapairi riyotaanewo, riterotapaakeri, ikantziri: “Pinkatziye, eero pithaawaiyini.” <sup>8</sup> Raminawetaiyanaani, tekaatsi iñaanai, apatziro ikatziyaka Jesús.

<sup>9</sup> Ikanta roirinkaiyaani otzishiki, ikowakotakeri eero ikamantantziro iñaakeri irojatziji paata arika rañagai. Tema jirika Itomi Atziri ari rañagai inkamawetakyaarika. <sup>10</sup> Rosampitanakeri riyotaanewo, ikantziri: “¿Oitaka ikantakotziro Yotzinkariite ikantaiyini: ‘Arika ripokimatake Cristo, iri jewataatsine Elías ripoke?’ ” <sup>11</sup> Rakanake Jesús, ikantzi: “Imaperotatya ikantziri, iri jewatapaintsine Elías ripokake, rowameethashiretantapaake. <sup>12</sup> Pinkeme nonkante naaka: Areewetaka Elías, iro kantzimaitacha te riyotawakeri atziri, osheki rowasankewaitakeri. Ari inkantaiteri eejatzi Itomi Atziri, osheki rowasankeeteri.” <sup>13</sup> Ari riyotaiyanakeni riyotaanewo iri ikenkithatakotzi Juan omitsitsiyaatananeri.

*Rowawisaakotziro Jesús ewankari raayiri peyari*  
(Mr. 9.14-29; Lc. 9.37-43)

<sup>14</sup> Ikanta rareetaiyaani ipiyotaiyanira atziri. Ari ripokashitakeri Jesús apaani atziri. Rotziwerowashitapaakeri, ikantziri: <sup>15</sup> “Pinkatharí, pineshironkainari notomi osheki ikamanawaitake, antawoite ikemaatsiwaitaka, osheki ritaawaitapiintaka, ripi-inkawaitzi ñaaki. <sup>16</sup> Namawetakanari piyotaanewo, rowawisaakotainari. Iro kantzimaitacha te rimatziri.” <sup>17</sup> Ari rakanake Jesús, ikantanake: “Te pikemisantaiyini eeroka, pikenashiwaitaka. ¿Tsikapaitema piyotaiyeni? Pamakenari eentsi.” <sup>18</sup> Ikisathanakeri peyari, jatanake. Ari retsiyatakotairi ewankari. <sup>19</sup> Ikanta riyotaanewo Jesús, rosampitairi apaniroini, ikantairi: “¿Iitaka kaari nimatantari naaka netsiyatakotakairi?” <sup>20</sup> Ikantzi Jesús: “Iro kaari pimatantari te pikemisantaperotzi. Pinkeme nonkante: Onkantawetya pinkemisantaironkate, kantacha pinkantero otzishi: ‘Pishirinke.’ Ari ishirkake. Tema tekaatsi kompitzi motemine arika pinkemisantaperote. Imaperotatya. <sup>21</sup> Iro kantacha pinkowerika petsiyatakotakagairi oshiyakariri jirika ewankari, ontzimatyepamanaperotyaari Pawa, pitziwentyaari.”

*Rapiitairo Jesús ikenkithatakotziro inkame*  
(Mr. 9.30-32; Lc. 9.43-45)

<sup>22</sup> Ikanta risaikaiyini Jesús nampitsiki Galilea, ari ikantakeri riyotaanewo: “Irootantsi ripithokashitaiyaari Itomi Atziri. <sup>23</sup> Ari ritsitokaiteri. Iro awisawetakya mawa kiteesheri, ari rañagai eejatzi.” Antawoite rowashiretaiyanakani riyotaanewo ikemakerira ikantake.

*Ripinaitzirori tasorentsipanko*

<sup>24</sup> Ikanta rareetaiyaani Jesús nampitsiki Capernaum, ari ripokakeri apotakaaantziro koriki ashi tasorentsipanko, rosampitapaakeri Pedro: “¿Ripinatapiintziro yotaimiri tasorentsipanko?” <sup>25</sup> Ikantanake Pedro: “Ripinatapiintziro.” Ikanta ripiyapaawo pankotsiki, iri thaawakotawaincha Jesús rosampitawairi: “¿Iitaka pikenkithashiretari eeroka Simón? ¿Iitaka inintakaantapiintziro itsipasatzi

pinkatharipaini? ¿Iriima inintakaayetzi isheninkaperotari? ¿Iriima inintakaayetzi areetzinkari kaari isheninkaita?”<sup>26</sup> Ari rakanake Pedro, ikantzi: “Iri inintakaitziri areetzinkaripaini.” Ikantzi Jesús: “Ari okanta. Tema te okowa ripinayetairo ikaatzi isheninkayetari.<sup>27</sup> Iro kantzimaitacha te nokowi inkisaneentawaitya apatoyetziriri koriki. Piyaate pakachaate inkaareki. Arika pinoshikake apaani, paminawaanteteri, ari piñeeri koriki. Paanakeniri apatotziriri, pimperi. Iri pipinawentyaari eeroaka eejatzi naaka.”

## 18

### *Tsika itzimi iriiperotatsiri* (Mr. 9.33-37; Lc. 9.46-48)

<sup>1</sup> Ikanta ipiyotaiyakani riyotaanewo Jesús, rosampitakeri, ikantziri: “Arika impinkathariwentantai Inkitesatzi. ¿Tsika itzimika iriiperotatsine intsipatyaari impinkatharite?”<sup>2</sup> Ikanta Jesús ikaimake apaani eentsi, ikatziyakeri niyankineki risaikaiyakenira irirori,<sup>3</sup> ikantzi: “Eerorika pawentanaari Pawa, eerorika poshiyakotanaari jirika eentsi, eerowa piñagairo ipinkathariwentantai Inkitesatzi. Imaperotatya.<sup>4</sup> Tema jirika eentsi te riyotziro ishamewaite. Maawoini inkaate oshiyakotaiyaarine eentsi, iriitake iriiperotaatsine ipinkathariwentantaira Inkitesatzi.<sup>5</sup> Ikaatzi aakotanari nowairo ikemisantaana, raakameethatanairi oshiyakariri jirika eentsi, naakatake raakameethatake.”

### *Arika rantakaantaitero kaariperori* (Mr. 9.42-48; Lc. 17.1-2)

<sup>6</sup> “Tzimatsirika antakaakerine kaariperori oshiyakotariri jirika eentsi rawentaana, onkamintha inthataitenirime mapi ikentsiki, rowiinkaiteri inthomoyaaki inkaare.

<sup>7</sup> Imapero onkoweenkate jaka kipatsiki. Iñagaite osheki antayeterone kaariperori. Iro kantacha ari rowasankeyetaikeri antakaantakerone.<sup>8</sup> Iroorika pako, iroorika piitzi pantantari kaariperori, pipakagairo, poshiyakagairo pithatzinkatyeerome, ompoñaantaiyaari. Tema te okameethatzi otzimawetaga apite pako, apite piitzi, iro ompoñaantaiyaari paata piñagairo pashi powaatyeero pitagaiya.<sup>9</sup> Iroorika poki pantantari kaariperori, pipakagairo, poshiyakagairo pisoryaakitayeeme, ompoñaantaiyaari pawisakopityaakitai. Tema te okameethatzi otzimawetaga apite poki, iro ompoñaantaiyaari paata rookaitaimi opaampatzira sarinkaweni.”

### *Ikenkithatakotaitziri oweja peyachari* (Lc. 15.3-7)

<sup>10</sup> “Paamaawentya pimanintawaitzirika oshiyakotanaariri jirika eentsi. Tema ikempoyaawentakeri maninkariite nampiyetawori Ashitanariki Inkitesatzi.<sup>11</sup> Tema iro ripokantakari Itomi Atziri rowawisaakoshireyetairi ikaatzi peyawetainchari.

<sup>12</sup> Pinkeme noshiyakaawentemiro. Tzimatsi atziri piratariri ikaatzi 100 oweja. Ikanta ipeyagaantaka apaani, ikaatanai 99 oweja. Rookanakeri itsipa, jatake otenkanaamashiki otzishi rithotyakotairi peyainchari.<sup>13</sup> Ikanta iñagairi antawo ikimoshiretanai ragairira peyawetainchari. Antawoite ikimoshiretanai, anaanakero ikimoshirewentziri kaari peyachari kaatatsiri 99.<sup>14</sup> Ari ikantari eejatzi Ashitairi Inkitesatzi, te ikowi impeyagaantawaitya apaani ikaatzi oshiyanaariri jirika eentsi.”

### *Tsika okanta ipeyakotantaitzi*

<sup>15</sup> “Arika piñeeri pisheninka rantakero kaariperori, piyaatashiteri, pinkenkithawaitakairi apaniroini, poñaayeri okaatzi ikenakaashitakeri. Arika inkemisantanakemi, pimatakeri poshiyakagairi iriirikame pirezzipero.<sup>16</sup> Eerorika ikemisantzimi, paanake itsipa kemisantzinkari, eerorika apite kemisantzinkari, iri pintsipatanakyaari pinkaminairi. Irootake pimonkaatantyaawori Inintakaantaitziri pairani, ikantaitzi:

Inkaaterika apaani ñaakotakemirone pantakero kaariperori, tera okameethatzi rowasanketaitemi. Irooma inkaaterika apite, eerorika inkaate mawa ñaakotakemirone pantakero kaariperori, iroowa ompoñaantyaari rowasanketaitemi.

<sup>17</sup> Eerorika ikemisantzi jirika, pinthawetakoteri rapatotapiintaitaga. Eerorika ikemisantashita, eerowa pishinetairi intsipataimi papatotapiintaga, poshiyakagairi kaari pisheninkata, tema roshiyakotakari apatotziriri koriki. <sup>18</sup> Tema ikaatzi pishineyetairi eeroka jaka, irijatzi rishinetaitzi inkiteki. Iriima ikaatzi kaari pishineyetai eeroka jaka, irijatzi kaari rishinetaitzi inkiteki. Imaperotatya. <sup>19</sup> Pinkeme nonkante eejatzi: Arika pinkaate apite, arika oshiyawakaiya pikenkithashiretanewo, iroowa ompoñaantyaari pithotyaakotairi Ashitairi Inkitesatzi, ari rimatakemiro. <sup>20</sup> Tsikarika ipiyota apite, terika mawa atziri, raakotana nowairo ikemisantaana, ari nisaikitari naaka notsipatari.”

<sup>21</sup> Ari ripokapaake Pedro, rosampitapaakeri Jesús, ikantziri: “Pinkathari, arika ontzime rantzimotenari nosheninka, ¿onkaateka rapiitero nompeyakoteri? ¿onkaatema 7?” <sup>22</sup> Rakanakeri Jesús, ikantanakeri: “Te okameethatzi pipiyatantya. Te apatziro pimpeyakoteri onkaate 7, osheki onkaate papiipiinteri.” \*

### *Ikenkithatakota apite ireewetatsiri*

<sup>23</sup> “Jiroka ikanta ipinkathariwentantai Inkitesatzi, roshiyakotari rantziri pinkathari ikowakotziri rimperatanewo ripinatairi rireewetzirira. <sup>24</sup> Ikanta ikowakoyetziri ireewetziriri, ari ripokapaake apaani ireewetatsiri osheki koriki. † <sup>25</sup> Tekaatsi raye ripinakowentaiyaari. Ikantzi pinkathari: ‘Paanakeri jirika atziri, iina, itomipaini, eejatzi okaatzi tzimimotziriri, pimpimanteri. Naantaiyaariri koriki rireewetanari.’ <sup>26</sup> Ikanta ikemawake rimperatanewo, rotziwerowashitanakari pinkathari, ikantanakeri: ‘Eero pipimantana, poyaawentawakya eepichokiini, aritake nipinataimi.’ <sup>27</sup> Ikanta jirika pinkathari ineshironkatanakeri rimperatanewo, ikantzi: ‘Ariwé, te pireewetaana.’ Ipeyakotairi okaatzi rireewetziri. <sup>28</sup> Ikanta riyaatai rimperatanewo, ritonkyotaka irirori ireewetziriri eepichokiini. Rotaiyakentsitawakeri, ikantziri: ‘Pipinatena iroñaaka pireewetanari.’ ‡ <sup>29</sup> Ari rotziwerowashiwetanakari, ikantziri: ‘Poyaawentawakya eepichokiini aritake nipinataimi.’ <sup>30</sup> Te ikowi royaawentya, raanakeri, romonkyakaantakeri, ikantziri: ‘Arika pipinataina pireewetanaga, ari nomishitowakaantaimi.’ <sup>31</sup> Iñaakeri ikaataiyini te inimotanakeri, jatake ikamantakeri pinkathari. <sup>32</sup> Ikanta pinkathari ikaimakaantakeri, ikantziri: ‘Kaariperoshireri pini eeroka. Nopeyakotaimi eeroka pireewetanari pikantakenaga poyaawentawakya. <sup>33</sup> Ari pinkantanteme eeroka, pineshironkantanteme.’ <sup>34</sup> Antawo ikisanaka pinkathari, romonkyakaantakeri, ikantziri: ‘Arika pipinataina eeroka, ari nomishitowakaantaimi.’ <sup>35</sup> Arira inkantaiya paata Ashitanari Inkitesatzi, eerorika pineshironkayetairi pisheninka.”

## 19

### *Riyotaantzi Jesús ikantzi: te okameethatzi pookero piina (Mr. 10.1-12; Lc. 16.18)*

<sup>1</sup> Ikanta rithonkanakero Jesús riyotaantzi Galilea-ki, jatake intatsikero Jordán-ki irojatzi rareetantakeri Judea-ki. <sup>2</sup> Ipiyowentaitawaari. Retsiyatakotakaapai osheki mantsiyari.

\* **18:22** Ikantakoitziri jaka “osheki onkaate papiipiinteri”, arika apiipiintakero ampeyakotante onkaate 7, 7 apiipiintero 70. † **18:24** Kantakotachari jaka “ireewetatsiri osheki koriki” iriitake iitaitziri 10 mil talento. Onkantawetya rantawaite osheki osarentsi, eero ripinakowentaawo. ‡ **18:28** Kantakotachari jaka “ireewetziriri eepichokiini” irijatzi ikantaitziri ikaatzi 100 denario.



<sup>3</sup> Ari ripokashitakeri Fariseo-paini, ikowi rikompitakayaarime Jesús, rosampitapaakeri ikantziri: “¿Shinetaantsitatsima inkowe atziri rookashiwaityaawo iina?” <sup>4</sup> Rakanakeri irirori, ikantanakeri: “¿Tema piñaanatakotziri owakera riwetsikantaitakariri atziri. Tema riwetsikaitake shirampari eejatzi tsinane?” <sup>5</sup> Ikantaitake pairani:

Rontsiparyaari ipaapate mainari raakerika iina,  
Apaani ikantanaawo iwathaki raawakaana.

<sup>6</sup> Iro eero okantanta rookawakaiya atziri itsipatakaakariri Pawa, tema apaani ikantanaawo, eero okanta rookawakagaiya.” <sup>7</sup> Rapiitanakeri Fariseo rosampitziri, ikantziri: “¿litaka rosankenatantari pairani Moisés, ikantake:

Arika rookawakagaiya, ontzimatyepaiteri osankenarentsi rookawakaantyaari?”

<sup>8</sup> Ikantzi Jesús: “Okantakaantziro pipiyathataga, iro rishinetantakemirori Moisés. Iro kantzimaitacha te ari onkantya pairani owakera etantanakari maawoini. <sup>9</sup> Pinkeme nonkante naaka: Ikaatzi jokashiwaitawori iina ragairika otsipa, mayempitakera. Irooma omayempitakerika tsinane, kantacha rookaitero. Tzimatsirika agairone tsinane jokaarewo, mayempitake irirori.”

<sup>10</sup> Ikantaiyanakeni riyotaanewo: “Arika okanta, eerotya ragaitzi iinantaitari.” <sup>11</sup> Ari rakanakeri Jesús, ikantziri: “Iriirika Pawa kowakayemirone, aritake pinkemathatakeri. <sup>12</sup> Tzimatsi kantakaantziro eero raanta iina atziri. Tema tzimatsi atziri amashithakitachari ishiramparitantari owakera itzimapaake, eero okanta raye iina. Eenitatsi itsipa inowikyaanikiitziro eero okanta raye iina. Tzimatsi eejatzi kowatsiri risaikashiwaitya, tema ikantakotatziiri pinkathariwentantatsiri inkiteki. Kowatsiri rimatero nokantakeri, rimatero.”

### *Ritasonkawentziri Jesús eentsipaini*

*(Mr. 10.13-16; Lc. 18.15-17)*

<sup>13</sup> Ikanta ramaitapaakeniri Jesús eentsipaini, ikantaitapaakeri: “Nokowi pamanakotenari neentsite, potzimikapatziitoteri pitasonkawentero.” Ikantzi riyotaanewo Jesús: “Eero poñaashirenkiri Awinkatharite.” <sup>14</sup> Ikantanake Jesús: “Eero pikoshekari, nokowi ramaitenari eentsipaini. Tema ikaatzi oshiyakotanaariri jirikapaini eentsi, iri ñagairone jimpe ipinkathariwentantatsiri inkitesatzi.” <sup>15</sup> Ikanta Jesús rotzimikapatziitoyetakeri eentsipaini, jatanai irirori.

### *Ashaagantachari mainari*

*(Mr. 10.17-31; Lc. 18.15-17)*

<sup>16</sup> Ikanta apaani mainari ripokashitakeri Jesús, rosampitapaakeri, ikantziri: “Kameethari yotaanteri. ¿Oitaka nantairi noñaantaiyaawori kantaitaachane añamentotsi?” <sup>17</sup> Rakanakeri Jesús, ikantziri: “¿Oitaka pikantantanari ‘kameethari?’ Tekaatsi apaani kameethatatsine, apatziro ikantakaawo Pawa ikameethatzi. Pinkowerika piñagairo añamentotsi, pantairo Inintakaantaitanewo.” <sup>18</sup> Ikantzi irirori: “¿Otzimika?” Ikantzi Jesús:

Eero pitsitokantzi.

Eero pimayempitzi.

Eero pikoshitzi.

Eero pithaiyakotanta.

<sup>19</sup> Pimpinkathateri ashitzimiri.

Petakotaiyaari pisheninka poshiyakagairo petakota eeroka.

<sup>20</sup> Rakanake mainari: “Nimatakeri maawoini jirokapaini, irojatzi netanakawo pairani eeniro neentsitzi. ¿Oitaka kowachari iroñaaka?” <sup>21</sup> Ikantanakeri Jesús: “Pikowirika pinkameethashirete, piyaate pipankoki, pimpimantero maawoini tzimimotzimiri, pimpayeteri ashironkainkari, tema inkiteki piñagairo pinintagaiya. Arika pimatakeri, pipoke poyaatena.” <sup>22</sup> Ikanta ikemawake mainari, owashire ikanta ripiyanaka, tema ashaagantzinkari rini.

<sup>23</sup> Ikantanakeri Jesús riyotaanewo: “Antawoite ompomeentsitzimotyaaari ashaagantzinkari impinkathariwentairi Inkitesatzi. Imaperotatya.” <sup>24</sup> Eekero ikantatzi: “Tema te okanta inkye piratsi camello imooki akoshi. Iriira maperotacha ikompitzimotyaaari inkye ashaagantachari tsika ipinkathariwentantai Pawa.” <sup>25</sup> Ikanta ikemaiyakeni riyotaanewo, riyokitziitaiyanakeni, ikantawakaiyani: “¿Iitakama awisakoshiretaatsine?” <sup>26</sup> Ari raminanakeri Jesús, ikantziri: “Eero rimatziro apaniroini atziri, iriima Pawa tekaatsi kompitzimotyaaarine.” <sup>27</sup> Rakanake Pedro, ikantanake: “Jirikapaini nokaataiyakeni nokowi noyaatemi, nookanawentanakawo maawoini tzimimotanari. ¿Oitaka ripinaitainari paata?” <sup>28</sup> Rakanake Jesús, ikantzi: “Arika owakeratai paata kipatsi, ari impinkathariwentantai Itomi Atziri, roshiyakotyaaari ikanta apaani pinkathari risaikantawo owaneenkatachari risaikamento. Ari pinkantaiyaari eejatzi eerokapaini pimpinkathariwentairi maawoini charineyetyaarine Israel-ni, ikaatzi 12 rinashiyeta. Imaperotatya. <sup>29</sup> Tema ikaatzi oyaatakenari, rookanawentanakawo ipanko, irirentzi, iritsiro, ipaapate, iina, reentsite, iipatsite. Aritake iñaayetairo ontzimimotairi osheki, tema iriitake aakoyetaanari nowairo rawenta-gaana. Irijatzi ñaayetairone kantaitaachane añaamentotsi. <sup>30</sup> Tema tzimayetatsi etawori iroñaaka, iri ñagairone rimpoyetai. Tzimayetatsi impoyetatsiri iroñaaka, iri ñagairone retaiyaawo.”

## 20

### *Antawaitatsiri chochokimashiki*

<sup>1</sup> “Jiroka ikanta ipinkathariwentantai Inkitesatzi, roshiyakowaitakari ikanta apaani atziri tzimatsiri ichochokimashite. Riyaatake okiteeshetamanai ramine antawaitatsine iwankiremashiki. <sup>2</sup> Ikanta iñaake kowatsiri rantawaite, ikantakeri: ‘Arika petanakyaawo pantawaite iroñaaka irojatziri ishaawiiteeni, nipinatemi apapentyaki koriki.’ Ikantaiyini antawairentzi: ‘Kameethatake.’ Rotyaantaitakeri pankirentsimashiki. \* <sup>3</sup> Ikanta reenokiityaapaake ooryaa eejatzi ripiyanaawo ashitawori iwankiremashi nampitsiki. Iñaapai itsipa ikatziyaiyani tekaatsi rantawaire. † <sup>4</sup> Ikantapaakeri: ‘Arika piyaate pantawaite nowankiremashiki, ari nipinaperotakemi.’ Riyaataiyakeni rantawaite. <sup>5</sup> Ari ikantakero itampatzikatapaake ooryaa, eejatzi ritainkanakera ooryaa. ‡ <sup>6</sup> Ari ikantakero eejatzi otsireniityaanake, iñaapai atziri risaikaiyini, tekaatsi rantawaire, rosampitapaakeri: ‘¿Tekaatsima pantawaire pisaikashiwaitantari kiteesheriki?’ § <sup>7</sup> Rakaiyanakeni, ikantzi: ‘Tekaatsi antawaitakainane.’ Ikantzi irirori: ‘Piyaate eejatzi eeroka pantawaite nowankiremashiki, ari nipinaperotakemi.’ <sup>8</sup> Okanta otsirenitanake, ashitawori iwankiremashi, ikantakeri oisaikiniriri iyorikite: ‘Pinkaimeri maawoini antawairentzi pipinateri. Iri petawakya pipinateri impoitaintsiri rantawaitake irojatziri pimatantakyaariri ananinkaintsiri rantawaitake.’ <sup>9</sup> Ikanta ripokake impoitaintsiri rantawaitzi, eepichoki rantawaitake, iro kantacha ripinaitakeri apapentyaki koriki. <sup>10</sup> Irojatziri ripokaiyantakani ananinkaintsiri rantawaitake, roshiyakaatzi iri ripinaperoteri. Te, apapentyaki koriki ripinaitakeri eejatzi. <sup>11</sup> Ikanta raawetawakari ripinaitakeriri, ikisanakeri ashitawori rantawaire, <sup>12</sup> ikantanakeri: ‘Jirikapaini impoitapaintsiri rantawaitzi, te rantawaiperotzi, iro kantacha rimonkaatakana pipinatakenari, naaka atsipetaperotakariri ooryaa.’ <sup>13</sup> Ikantzi ashitawori iwankiremashi: ‘Asheninká, nipinatakemi kameethaini, ¿tema nokantzi-takemi amaityaake nipinatemi apapentyaki koriki?’ <sup>14</sup> Jirika piyorikite nipinatziimiri,

\* **20:2** Ikantakoitziri jaka “apapentyaki koriki” irijatzi iitaitziri apaani denario. † **20:3** Kantakotachari jaka “reenokiityaapaake ooryaa” irijatzi ikantaitziri pairani ooryaa 3. ‡ **20:5** Kantakotachari jaka “itampatzikatapaake ooryaa, eejatzi ritainkanakera ooryaa” irijatzi ikantaitziri pairani ooryaa 6, ooryaa 9. § **20:6** Kantakotachari jaka “otsireniityaanake” irojatziri ikantaitziri pairani ooryaa 11.



piyaatai pipankoki. Naaka kowashitaincha nipinatziiri apapentyaki koriki impoita-paintsiri rantawaitzi, <sup>15</sup> ¿Eeroma okanta nipinatante nonintziri naaka? ¿Pisamaneen-takotashitanawo noneshironkatantzi?” <sup>16</sup> Tema eenitatsi etawori iroñaaka, iri ñagairone rimpoyetai. Tzimatsi impoyetatsi iroñaaka, iri ñagairone retaiyaawo.”

*Rapiitairo Jesús ikenkithatakotziro rowamagaiteri*  
(Mr. 10.32-34; Lc. 18.31-34)

<sup>17</sup> Ikanta ritonkaanake Jesús riyaaero Jerusalén-ki, raanakeri 12 riyotaanewo ike-nakaanairi awotsiki, ari ikantakeri: <sup>18</sup> “Aatatziira Jerusalén-ki. Ari raakaanaiteri Itomi Atziri, rayeri reeware Imperatasorentsitaarewo, intsipatakyaari Yotzinkariite, iri yakowenterine ritsitokaiteri. <sup>19</sup> Iro raantanakyaariri atziri kaari asheninkata. Ari ripasawaitaiteri. Irojatzii inkentakotaitantakyaari. Iro awisawetakya mawa kiteesheri, ari rañagai eejatzi.”

*Ikowiri Jacobo eejatzi Juan*  
(Mr. 10.35-45)

<sup>20</sup> Okanta iina Zebedeo ipokashitakeri Jesús, otsipatakari otomipaini: Jacobo eejatzi Juan. Otziwerowashitapaakari, okantapaakeri: “Nokowi pineshironkatena.” <sup>21</sup> Rosampitanakero Jesús, ikantziro: “¿Oitaka pikowakotanari?” Okantanake iroori: “Tema irootaintsi pimpinkatharentsite, nokowi intsipatemi notomi impinkathariwentante, risaikimotemi apaani pakoperoki, itsipa risaika pampateki.” <sup>22</sup> Rakanakero Jesús ikantanakero: “Te piyotziro oita pikowakotanari. Osheki nonkemaatsityaari naaka. ¿Arima pinkisashitakyaawo eeroka pinkemaatsitya osheki? ¿Arima poshiyakena nonkame naaka?” Ikantaiyanakeni: “Aritake nimatakero.” \* <sup>23</sup> Irojatzii ikantantanakari Jesús: “Imapero, irootaintsi awishimotemi onkaate nonkemaatsityaari naaka. Irooma pintsipatenarika ampinkathariwentante pisaika nakoperoki, itsipa nampateki, tera naaka nintakayaawone iita nontsipatyaari, apatzii riyotzi Ashitanari jimpe iita ikashaakaakeri.” † <sup>24</sup> Ikanta ikemaiyakeni itsipa riyotaanewo, ikisaitanakeri Juan eejatzi Jacobo. <sup>25</sup> Irojatzii ipiyotantakari Jesús maawoini riyotaanewo, ikantziro: “Piyotaiyini eeroka jimpe ikanta ipinkatharitzii kaari asheninkata, osheki rimperatanta. Ari roshiyari eejatzi iriiperoyetatsiri ipinkathaitziri irirori. <sup>26</sup> Irooma eerokapaini, arika pinkowe piriiperote, iri poshiyakotya ikanta onampitaarewo. <sup>27</sup> Iroorika pinkowe pee-watakaante, iriira poshiyakotyaari ikanta noshikaarewo. <sup>28</sup> Te iro ripokantyaari Itomi Atziri rimperatantya iro ripokantari roshiyakotyaari onampitaarewo, inkamawentante, iriira pinakowentairine maawoini.”

*Raminakagaitairi apite mawityaakiri*  
(Mr. 10.46-52; Lc. 18.35-43)

<sup>29</sup> Ikanta rawisaiyanakeni Jericó-ki, osheki atziri oyaatanakeriri. <sup>30</sup> Ari risaikake awotsinampiki apite mawityaakiri. Kemake irirori, ikantaitzi: “Ari inkenapaake Jesús jaka awotsiki.” Irootake ikaimantanakari, ikantzi: “¡Pinkatharí, icharine-tari David-ni, pineshironkatana naaka!” <sup>31</sup> Osheki ikisathawetaitanakari. Te imairetzi, eekero ikaimanakitzi shintsiini: “¡Pinkathari, icharinetari David-ni, pineshironkatana naaka!” <sup>32</sup> Katziyapaaka Jesús, ikaimakeri, ikantziro: “¿Iita pikowiri nantzimotemiri?” <sup>33</sup> Ikantaiyini irirori: “Pinkatharí, nokowi naaka naminawaitai kameethaini.” <sup>34</sup> Antawoite ineshironkashiretanakeri Jesús jirika mawityaakitatsiri, riterotzitakeri roki. Aminanai kameetha, royaatanakeri Jesús.

\* **20:22** Jiroka jaka ikantajaantziri Jesús: “¿Arima pimatakero eeroka pirero kepishaari onkaate nireri naaka? ¿Arima poshiyakena nipiinkaate naaka?” † **20:23** Jiroka jaka ikantajaantziri Jesús: “Imapero, aritake pimatakero pirero nireri naaka, aritake pimatakero eejatzi inkitaiteña oshiyakawori romitsitsiyaitakenaga.”

## 21

### *Areetaa Jesús Jerusalén-ki*

(Mr. 11.1-11; Lc. 19.28-40; Jn. 12.12-19)

<sup>1</sup> Jekaatzimatapaake rareetantyaari Jerusalén-ki. Riweyaiyakani Betfagé-ki nampitsi imontetari otzishi Olivo. Ari rotyaantake Jesús apite riyotaanewo, <sup>2</sup> ikantakeri: “Piyaate nampitsiki amontetakari, ari piñaapaake inthatakotya burro ontsipatakyaari iryaani. Pinthataryaakotero, pamakenawo. <sup>3</sup> Tzimatsirika osampitawakemine, pinkanteri eeroka: ‘Ikowatziiro pinkathari. Aritake roipiayimiri.’ ” <sup>4</sup> Ari imonkaatari rosankekantakeri pairani Kamantantaneri, ikantake:

<sup>5</sup> Pinkamantayetairi maawoini Jerusalén-satzi:

Kaakitataike Piwinkatharite ripokashitakemi

Tsinampashire ikantaka, ikyaakaakawo apaani burro

Ewonkeri ini burro, owaiyanewo piratsi ikyaakaitziri tenari.

<sup>6</sup> Ikanta rotyaantakeri apite riyotaanewo, rimatakero okaatzi ikantawakeriri Jesús.

<sup>7</sup> Ramakero burro otsipatakari iryaani. Rowanketaaitakeniri manthakintsi imitzikaaki inkene inkyaakagaityaari. Ikanta Jesús ikyaakaanakari. <sup>8</sup> Ikanta atziripaini piyotainchari janta, romaankashitanakeri imanthaki awotsiki tsika inkenanake. Eenitatsi itsipa chekayetaintsiri inhashi romaankashiteriri eejatzi. <sup>9</sup> Ikaatzi atziri jewayetaintsiri, ikaatzi oyaatakeriri itaapiiki, ikaimaiyini, ikantzi:

¡Thame ampinkathatairi icharinetari David-ni!

¡Tasonkawentaarewo rini, tema Pinkathari aitziri otyaantakeriri!

¡Kaakitataike Awinkatharitepero!

<sup>10</sup> Irojatzii rareetantapaakari Jesús nampitsiki Jerusalén. Ari rosampitawakaanaka nampitawori, ikantaiyini: “¿Litaka jirika?” <sup>11</sup> Eenitatsi atziri kantanaintsiri: “Iriitake Jesús kamantantaneri, iriira poñaachari Nazaret-ki saikatsiri Galilea-ki.”

### *Romishitowiri Jesús yompariyetachari tasorentsipankoki*

(Mr. 11.15-19; Lc. 19.45-48; Jn. 2.13-22)

<sup>12</sup> Ikanta Jesús, kyaapaake isaikira tasorentsipanko. Rookapaakeri pimantayetatsiri eejatzi ikaatzi yompariyetachari. Rotatsinkayetapaakero rowantaitariri koriki, eejatzi ikantakero jimpe rowaitziri shiro. <sup>13</sup> Ikantapaake: “Okantzi osankenarentsi, riñaawaitziri Pawa, ikantzi:

Nopanko ini jiroka, ari ramanapiintaitenari.

Iro kantacha eeroka pamatawitantake jaka pipimantayetzi, poshiyakaakero koshintzipanko.”

<sup>14</sup> Ikanta Jesús, ripokashitapaakeri tasorentsipankoki osheki mawityaakiri, kisopookiri, retsiyatakotakagairi maawoini. <sup>15</sup> Tema osheki okameethatake rantakeri Jesús. Ikanta iñaakeri ewankaripaini rantakeri, ikaimaiyanakeni, ikantzi:

¡Thame ampinkathatairi icharinetari David-ni!

Iri kantzimaitacha reewarepaini Imperatasorentsitaarewo, itsipatakari Yotzinkariite, kisaiyanakani, tema te inimotziri. <sup>16</sup> Ari rosampiitanakeri Jesús, ikantaitziri: “¿Pikemakari ikantaiyirini ewankaripaini?” Ari rakanake Jesús, ikantzi: “Nokemakeri. ¿Tema piñaanatero eeroka osankenarentsi kantatsiri pairani?

Iri ewankaripaini eejatzi eentsipaini thoyetzirori iteni,

Pikantakaakari impinkathayetaimi.”

<sup>17</sup> Ikanta Jesús, piyanaka ikenanairo Betania-ki. Ari rimaapai.

### *Riyakatziro kaari kithokitatsi pankirentsi*

(Mr. 11.12-14, 20-26)

<sup>18</sup> Okanta okiteeshetamanai eejatzi ripiyaawo Jesús nampitsiki. Ari ritasheyaapaake niyankineki awotsi. <sup>19</sup> Iñaapaake awotsinampiki okatziya pankirentsi,

riyaatashitanakero, iñaapaakitziro te otzimi okithoki, iyoshiita oshi. Ikantanakero: “Pashi powaatyeero eero pikithokitai.” Okanta pankirentsi, kamashitanake. \*  
<sup>20</sup> Ikanta iñaakero riyotaanewopaini, riyokitziwentanakero, rosampitaiyakerini: “¿Litaka okamashitantanakari pankirentsi?” <sup>21</sup> Ari rakanake Jesús, ikantziri: “Imapero nonkantemi, imaperotatyaarika pawentaana, eerorika pikisoshirewaitzi, ari pimatakero eeroka, anaanakero jimpe okanta piñaakero pankirentsi. Kantacha pinkante: ‘Ishirinke otzishi, ipiinke inkaareki.’ Kantacha imatya. <sup>22</sup> Onkaate pinkowakotairiri Pawa, arika pawentaaperotanaiyaari, aritake impakemiro.”

### *Ishintsinka Jesús*

*(Mr. 11.27-33; Lc. 20.1-8)*

<sup>23</sup> Ikanta ripiyaawo Jesús tasorentsipankoki, riyotaantapai eejatzi. Ari ripokashita-paakeri reeware Imperatasorentsitaarewo, itsipatakari Itzinkamipaini, rosampita-paakeri: “¿Jimpe itzimajaantzika pinkathari otyaantzimiri pantantawori jiroka?” <sup>24</sup> Ari rakanakeri Jesús, ikantanakeri: “Eejatzi naaka eenitatsi nosampitemiri. Arika pakak-enawo, ari nonkamantakemi iita otyaantakenari. <sup>25</sup> Romitsitsiyaatantake Juan-ni, ¿litaka otyaantakeriri? ¿Pawama? ¿Atzirima?” Ikantawakagaiyanakani: “Arika ankan-takeri Pawa otyaantakeri, ari inkantanakai: ‘¿Oitaka kaari pikemisantantari?’ <sup>26</sup> Arika ankante: ‘Atziri otyaantakeri’, ari inkisanakai atziripaini.” Tema ikantaiyini atziri Kamantantaneri rini Juan-ní. <sup>27</sup> Ikantaiyini: “Te niyotero.” Ari ikantanake eejatzi Jesús: “Ari nokantzita naaka, eero nokamantzimiro iita otyaantakenari.”

### *Ikenkithatakotaitziri apite itomintaitari*

<sup>28</sup> Rosampitantake Jesús, ikantzi: “¿Tsika okantzimotzimika eerokapaini jiroka? Een-itatsi apaani atziri tzimatsiri apite itomi. Okanta apaani kiteesheri ikantakeri itomi: ‘Notomi, piyaate pantawaite pankirentsimashiki.’ <sup>29</sup> Rakanakeri itomi, ikantanakeri: ‘Te nokowi.’ Iro kantacha osamaniityaake, ipiyimoshiryagaari itomi, jatake rantawaite. <sup>30</sup> Riyaatashitakeri itsipa itomi, ikantakeri eejatzi. Ikantanake irirori: ‘Ari nimatakero, Papá.’ Iro kantacha te riyaatzi. <sup>31</sup> ¿Itzimika apite itomi antakerori ikowakeri ipaapate?” Ari rakaiyanakeni, ikantzi: “Iri antakerori retawetakari ketziroini rimperawetakari.” Ikantzi Jesús: “Iriira awisaimine ikaatzi apatotziriri koriki, eejatzi mayempiroyetatsiri, ipinkathariwentairi Pawa. Imaperotatya. <sup>32</sup> Tema ripokake pairani Juan omitsit-siyaatantaneri, ikamantawetakemi jimpe pinkantya pinkameethashiretantaiyaarime, iro kantacha te pikemisantawakeri. Iriima ikaatzi apatotziriri koriki, eejatzi mayem-piroyetatsiri, okemisantawakeri. Piñaawetakari eerokapaini, iro kantacha te pi-pakayiro jimpe pikantaiyani, ompoñaantyaari pinkemisantawakeri.”

### *Kaariperoshireri antawairentzi*

*(Mr. 12.1-12; Lc. 20.9-19)*

<sup>33</sup> “Pinkemero otsipa noshiyakaawentemiri. Tzimatsi pankitzirori chochokimashi, rotantakotakero maawoini othapiki, riwetsikashitakero rowerowa owaa paata, riwetsikake eejatzi pankoshetantsi onkene raminakoitero. Rithotyaakotake atziri aminerone iwankiremashi. Jatake irirori intaina. <sup>34</sup> Okanta okithokitanake chochoki, rotyaantake rimperatanewo ragaate okithoki. <sup>35</sup> Ikanta antawairentzi aminirori pankirentsimashi, iñaawakeri ripokaiyakeni imperataarewo, raawakeri romposawetakari apaani, ritsitokawakeri itsipa, rishemyaantakari mapi itsipa. <sup>36</sup> Rotyaantawetaka itsipa rimperatanewo, osheki ikaataiyakeni. Ari ikantzitaitawakari eejatzi irirori. <sup>37</sup> Ikanta weyaantapaakawori, rotyaantakeri itomi irirori, ikantzi: ‘Ari impinkathaitawakeri notomi naaka.’ <sup>38</sup> Ikanta jirikapaini antawairentzi, iñaawakeri itomi, ikantawakaanaka: ‘Iri ashitaiyaawone paata

\* **21:19** Kantakotachari jaka “pankirentsi”, iro iitaitziri higuera.

jiroka pankirentsimashi. Jame atsitokeri, ayeroota aaka.’<sup>39</sup> Rotaiyawakeri, raanakeri othapiki pankirentsimashi, ritsitokakeri.<sup>40</sup> Arika ripokanake ashitawori iwankiremashi, ¿tsika inkanterika jirikapaini antawairentzi?”<sup>41</sup> Ari rakaiyanakeni, ikantzi: “Ontzimatyete ritsitokaiteri jirikapaini kaariperori, raminai itsipa iriiperori aminairone pankirentsimashi, amapiintainirine okithoki iwankire.”

<sup>42</sup> Ikantanake Jesús: “Tema piñanatero okantziri Osankenarentsiperoro: Imanintawetakawo mapi wetsikirori pankotsi, Iro kantzimaitacha ipiriintaitakero mapi pankotsinampiki, roshiyakaitairo iroorikame tzinkamitsi.

Iri Awinkatharite Pawa owairori onampinaki, Iroowa ayokitziwentantariri.”

<sup>43</sup> “Iro nokantantari: Eero piñagairo eeroka impinkathariwentaimi Pawa, iri impinkathariwentairi itsipasatzi atziri ikaatzi oshiyaawone pankirentsi ikithokitzi ikemisantanai.<sup>44</sup> Jiroka okantakota mapi: Inkaate ontziwatyaawone, ari ritankawaitake. Iriima inkaate anawyagairi, ari ishemyaakeri.”

<sup>45</sup> Ikanta reeware Imperatasorentsitaarewo itsipatakari Fariseo-paini riyotawakero iriira roshiyakaawentake Jesús.<sup>46</sup> Ikwaiyawetanakani raakaanakerime, osheki ithaawakayimaitakari atziripaini. Tema riyoshiretaiyini atziripaini Kamantantaneri rini Jesús.

## 22

### *Roshiyakaawentaitziri aawakaachari*

<sup>1</sup> Ikanta rapiitakero Jesús roshiyakaawentziro riyotaantziri. Ikantzi:<sup>2</sup> “Jiroka ikanta ipinkathariwentantai Inkitesatzi, roshiyakotari pinkathari oimoshirenkiriri itomi raawakaaga.<sup>3</sup> Rotyaantakeri rimperatanewo, inkamanteri inkaate pokat-sine roimoshirenkya. Iri kantacha jirikapaini, te ripokaiyini.<sup>4</sup> Rotyaantake itsipa rimperatanewo, ikantawakeri: ‘Pinkanteri noyaimanewo ripoke roya, nowamaake wathayetatsiri nopira, nokimoshirewentziri notomi raawakaiya.’<sup>5</sup> Eekero ripiy-athataiyatyaani. Jatake rowaneki, itsipa ikenanake ipimantawaitzi.<sup>6</sup> Eenitatsi itsipa owasanketawakeriri imperataarewo, ritsitokakeri.<sup>7</sup> Ikanta ikemake pinkathari, rotyaantake rowayerite, rithonkakeri ritsitokapaakeri tsitokantaintsiri, ritaakero ipanko.<sup>8</sup> Ikantairi itsipa rimperatanewo: ‘Aritake wetsikayetaka owanawontsi oimoshirenkyaari, te opantari noyaimanewo, eero ripoki.<sup>9</sup> Piyaate awotsiki ikenapi-intaitzira, pinkanteri inkaate piñeeri ripokeeta oimoshirenkya.’<sup>10</sup> Ikanta riyataake imperataarewo, ipiyotakeri ikaatzi iñaakeri: kameethatatsiri eejatzi kaariperotatsiri. Piyotaiyakani oimoshirenkayetachari.

<sup>11</sup> Ikanta pinkathari raminakeri ikaatzi pokaintsiri. Iñaatzi osatekainchari apaani te ikithaatapaakawo rowaneenkatashitanyariri aawakaachane.<sup>12</sup> Ikantapaakeri: ‘Asheninká, ¿tsika okantaka pikyaantakari te pikithaawentari notomi?’ Ari imairetake, te raki.<sup>13</sup> Ikantakeri rimperatanewo: ‘Poosowakoteri, poosoyitziteri, pookeri otsirenikitakera, ari riraawaityaari ratsikaikiwaitya inkemaatsitaiya.’<sup>14</sup> Osheki inkaimawetaitya, iro kantzimaitacha apawopaini riyoyaayeetai.”

### *Ikenkithatakotaitziri koriki ripinaiteriri pinkathari* (Mr. 12.13-17; Lc. 20.20-26)

<sup>15</sup> Ikanta ripiyaiyanaani Fariseo-paini. Ikenkithawaitaiyakeni, ikantawakagaiyani: “¿Jimpe ankanterika Jesús akompitakaantyaariri?”<sup>16</sup> Rotyaantanakeri riyotaanewo irirori itsipataanakeri raapatziyanepaini Herodes, ikantapaakeri Jesús: “Yotaantanerí, okaatzi piyotaantziri iroopero ini. Iro ompoñaantyaari riyotakoperoitairi Pawa.

Tekaatsi pinthaawakaiya. <sup>17</sup> Pinkantena eeroka oita pikenkithashiretari: ¿Kameethat-sima apinateri Pinkathari César ikowakaantziri?” <sup>18</sup> Iri kantacha Jesús, riyotawakeri ikenkithashiretari, ikantziri: “Owapeyimotantanerí. ¿Iitaka pikowantari pikompi-takaina? <sup>19</sup> Poñaayenari koriki pipapiintziriri Pinkathari.” Ramaitapaakeniri apaani koriki iitaitziri “denario”. <sup>20</sup> Rosampitanakeri: “¿Iitaka ashitawori iwairo jaka? ¿Iitaka ashitawori roshiyakaawo?” <sup>21</sup> Ikantaiyini: “Rashi César.” Ikantzi Jesús: “Tema iri César ashitariri, pantantyaanari okaatzi ikowakaimiri, pipinateri. Iriima ikaatzi rashitari Pawa, pantantyaanari okaatzi ikowakaimiri Pawa.” <sup>22</sup> Ikanta ikemaiyakeni ikantakeriri Jesús, riyokitziwentanakeri, ripakaanakeri. Jataiyaini.

*Rosampikowentaitziro arika rañagai kamayetatsiri*

*(Mr. 12.18-27; Lc. 20.27-40)*

<sup>23</sup> Ikanta ripokaiyakeni Sadoc-iite iñeeri Jesús. Iriitake Sadoc-iite kantapiintatsiri: “Eero rañagai kamayetatsiri.” Rosampitapaakeri Jesús, <sup>24</sup> ikantapaakeri: “Yotaantanerí, rosankenatake pairani Moisés, okantzi: ‘Arika inkame apaani atziri, eerorika rowaiyakaanakawo iina, shinetaantsitatsi ragairo irirentzi, rowaiyakagaiyaawo. Roshiyakagairi iriime ashityaarine irirentzi kamaintsiri.’ <sup>25</sup> Jame ankantawake: Tzimatsi kaatatsiri 7 irirentzi. Etawori itzimi raake iina, te rowaiyakaawo iina kamake, ragairo itsipa irirentzi. <sup>26</sup> Ari ikantakari eejatzi apitetapaintsiri irirentzi. Poñaapaaka itsipa mawatapaintsiri. Ari ikantakari maawoini ikaatzira 7. <sup>27</sup> Okanta osamanitake kamai eejatzi tsinane. <sup>28</sup> Arikame rañaayetai paata kamayetatsiri, ¿tsika itzimika oimentaperotaiyaari tsinane? Tema maawoini ikaatzira 7 iinantawetakawo.”

<sup>29</sup> Rakanakeri Jesús, ikantziri: “Pikenakaashitakawo eeroka, te piyotakotziro Osankenarentsipero, te piyotakotairo eejatzi ishintsinka Pawa. <sup>30</sup> Arika rañaayetai paata kamayetatsiri, eero itzimayetai aawakagaachane. Roshiyapaiyaari imaninkarite Pawa Inkitesatzi. <sup>31</sup> ¿Tema piñaanatakotziro tsika onkantya arika rañaayetai kamayetatsiri? Tema ikantake Pawa, riñaawaitake:

<sup>32</sup> Naakatake Pawa ipinkathatziri Abraham, Isaac, eejatzi Jacob.

Ari ayotaiyini añaayetatsi irirori, te okanta kaminkari impinkathateri Pawa, apa rimatziro añaayetatsiri.” <sup>33</sup> Ikanta ikemaiyakerini Jesús ikantakeriri, riyokitziwentanakeri, ikantaiyini: “Imapero okameethatzi riyotaantziri.”

*Ikenkithatakotaitziro ikowakaaperotantziri Pawa*

*(Mr. 12.28-34; Lc. 10.25-28)*

<sup>34</sup> Ikanta ipiyotaiyakani Fariseo, tema ikemake kameetha rakakeri Sadoc-iite rosampitakeriri. <sup>35</sup> Ikanta apaani, irijatzi yotakoperowetawori Inintakaantaitanewo, ripokashitakeri Jesús rosampiteri, tema ikowatzi rikompitakayaarime, ikantapaakeri: <sup>36</sup> “Yotaantanerí, ¿otzimika Inintakaantaitanewo anairori otsipa?” <sup>37</sup> Ari rakanake Jesús, ikantziri: “Piwinkatharite rini Pawa, ontzimatye pinintaperotairi, pinintashirenkairi, pinintashiretairi eejatzi. <sup>38</sup> Iroowa etawori Inintakaantaitanewo ikowaperotaitziri. <sup>39</sup> Ari oshiyawo apitetanaintsiri: Ontzimatye petakotaiyaari pisheninka, poshiyakagairi pineshironkatziro eeroka piwatha. <sup>40</sup> Pimonkaatakerorika jiroka kaaintsiri apite, pimatakerowa maawoini rosankenayetakeri Moisés-ni, maawoini eejatzi rosankenayetakeri Kamantantanerí.”

*¿Tsika iitaka charinetariri Cristo?*

*(Mr. 12.35-37; Lc. 20.41-44)*

<sup>41</sup> Rimatanakero irirori Jesús, rosampitakeri Fariseo-paini itsipatakari ipiyotaiyanira. <sup>42</sup> Ikantziri: “¿Iitaka pikenkithashiretakotariri eeroka Cristo? ¿Tsika iitaka charinetariri?” Ikantaiyini Fariseo: “Icharine David-ni rini.” <sup>43</sup> Ikantzi Jesús: “¿Tsika oitaka riñaawaitakaantariri pairani David-ni Tasorenkantsi, roshiyakaakeri Iwinkatharite? Ikantake pairani:



<sup>44</sup> Ikenkithawaitake Pinkathari, ikantawairi nowinkatharite: Pisaikapai nakoperoki ampinkathariwentante, Irojatzí paata nowasanketantakyaariri kisaneentakemiri, Ari pimakoryaayitizantaiyaari.

<sup>45</sup> Rimatzitakawo David-ni ikantake: ‘Nowinkatharite rini.’ ¿Tsika inkene incharinetyaari?” <sup>46</sup> Mairetaiyanakeni te raki. Thaawashire ikantaiyakani, tekaatsi kowanaatsine rosampitanairi.

## 23

### *Ikenkithatakotaitziri Yotzinkariite eejatzí Fariseo-paini* (Mr. 12.38-40; Lc. 11.37-54; 20.45-47)

<sup>1</sup> Ari ikenkithatakaakeri Jesús atziripaini itsipataakeri riyotaanewopaini, ikantziri: <sup>2</sup> “Pamineri Yotzinkariite eejatzí Fariseo-paini, iro ikamaita rowaagakoyetziro okaatzí rosankenayetakeri pairani Moisés-ni. <sup>3</sup> Pinkemisanteri onkaate inkantayetemiri, te okameethatzí poshiyakotyaari okaatzí rantayetziro, tema te rimonkaayetziro irirori. <sup>4</sup> Imapero opomeentsita okaatzí ikowakayimiri pimayetairime. Te iñiimaitawo impomeentsiwentyaawo irirori rimatantyaawori. <sup>5</sup> Rantashiyetawo ikowiri irirori iñaantaityaariri. Osheki rashiminthatari mashitsimonki roteyetzirowa Osankenarentsipero rontarekakotziro ishempaki, eejatzí itamakoki. Osheki rowaneenkakaakiyetziro iithaare rishirikiro manthakintsi. <sup>6</sup> Rashiminthatawo rosatekaiteri niyankineki arika rowaiyani isheninka. Ari ikantari eejatzí arika riyaaate pankotsiki rapatotapiintaitaga. <sup>7</sup> Ikowi impinkathaiteri arika iñagaiteri, riwethaityaari. Ikowi eejatzí inkantaiteri: ‘¡Yotaantanerí!’ <sup>8</sup> Te okameethatzí pimatero eeroka, ero pikowashita inkantaitemi: ‘¡Yotaantanerí!’ Tema maawoini eerokapaini oshiyawaitakawo pirentzitawakagaatya. Apaani ikanta yotaantatsiri, iriitake Cristo, tekaatsi itsipa. <sup>9</sup> Jaka kipatsiki, te okameethatzí pinkantashiwaityaari pisheninka: ‘¡Ashitanerí!’ Tema apaani ikanta Ashitzimiri Inkitesatzi. <sup>10</sup> Te okameethatzí eejatzí inkantaitemi: ‘¡Nowinkatharité!’ Tema apaani ikanta piwinkatharite, iriitakera Cristo. <sup>11</sup> Inkaate kowatsine ririiperote, roshiyakotyaari ikantaga ronampitaitari. <sup>12</sup> Inkaate kowashiwaitachane impinkathaiterime, ari iñaakero intsinampashiretakagaitairi. Iriima tsinampashirewaitatsiri, iri ñagairone impinkathaitairi.

<sup>13</sup> ¡Ikantamatsitaitzimi eeroka Yotzinkari eejatzí Fariseo, owapeyimotantaneri pinatzi! Osheki potzikakeri ipinkathariwentairi Pawa. Ero piñagairo eeroka impinkathariwentaimi, ¿tsika piüteroka piyotaantyaariri itsipa impinkathariwentai irirori? <sup>14</sup> ¡Ikantamatsitaitzimi eerokapaini Yotzinkari eejatzí Fariseo, owapeyimotantaneri pinatzi! Pawentaashitawo kamatsiri oime pashitzitawo opanko, iro posamaninkantawori pamanapiintawetaga ero riyotantaitzimi. Iro kantzimaitacha antawo rowasankeetaimi. <sup>15</sup> ¡Ikantamatsitaitzimi eerokapaini Yotzinkariite eejatzí Fariseo, owapeyimotantaneri pinatzi! Osheki poomerenchaakeri atziripaini kaari asheninkata roshiyakotai aaka a-judá-itetzira, piyotaakeri rowapeyimotante irirori. Roshiyakotantaimiri eeroka ratsipetaiyaawo sarinkaweni.

<sup>16</sup> ¡Ikantamatsitaitzimi eerokapaini, oshiyakotariri mawityaakiri rakathatawaka-gaiyani! Tema raakoitziro owairo tasorentsipanko, ikantaitzi: ‘Rowasanketainaata Tasorentsipankotsiweri eerorika nimonkaatziro nokantziri.’ Pikantapiintaiyakeni eerokapaini: ‘Eerorika rimonkaataitziro, tekaatsi oitya.’ Irooma arika raakoiteri iwairo ooro saikatsiri tasorentsipankoki, pikantapiintake: ‘Ontzimatyé rantaitero ikantaitakeri.’ <sup>17</sup> ¡Masontzishirerí, mawityaakishirerí! ¿Iitaka kowaperotachari, iriima ooro? Kaari, tema iro irooperotatsi tasorentsipanko otasorentsitakairi ooro. <sup>18</sup> Ari okantari eejatzí arika raakoitero owairo taapokimentotsi, ikantaitzi: ‘Rowasanketainaata Ataapiintziniri eerorika nimonkaatziro nokantziri.’ Iro kantacha



pikantapiintaiyakeni eerokapaini: ‘Eerorika rimonkaataitziro, tekaatsi oitya.’ Irooma arika raakoitero iwairo piratsi ritagaitziri taapokimentotsiki, pikantapiintake: ‘Ontzimatye rantaitero ikantaitakeri.’<sup>19</sup> ¡Masontzishirerí, mawityaakishirerí!, ¿litaka kowaperotachari, iriima piratsi? Kaari, tema iro irooperotatsi taapokimentotsi otasorentsitakairi ritagaitziri.<sup>20</sup> Ikaatzi aakotzirori owairo taapokimentotsi, raakotakero owairo maawoini ikaatzi ritagaitziri janta.<sup>21</sup> Ari ikanta eejatzi ikaatzi aakotzirori owairo tasorentsipanko, raakotakero owairo maawoini okaatzi tzimantawori.<sup>22</sup> Ikaatzi aakotzirori owairo inkite, raakotakero owairo maawoini janta risaikinta Pawa, roshiyakaakero iriime Pawa raakotake iwairo.

<sup>23</sup> ¡Ikantamatsitaitzimi Yotzinkariite eejatzi Fariseo, owapeyimotantaneri pinatzi! Pinashitapiintanari pashitakaariri Pawa, pipayetapiintziri inchashaaniki. Temaita pantayetziro irooperotatsiri ikowakaitzimiri: Pinkameethashireyete, pineshironkashiretante, pawentaashiretaiyaari. Irootake irooperotatsiri pantayetairo, eero pipakayimaitawo panteniri otsipa. \* <sup>24</sup> ¡Mawityaakiri, akathatawakaachari! Poshiyakari pankenatariri shikiryaaniki eero rirakotantari, iro kantzimaitacha rirakotakeri antari piratsi. †

<sup>25</sup> ¡Ikantamatsitaitzimi eeroka Yotzinkariite eejatzi Fariseo, owapeyimotantaneri pinatzi! Poshiyakotakawo iramentotsi eejatzi owamentotsi, okiteweta kameetha jakakeroki, irooma inthomoiki kipatsi okantaka. Ari pikantayetaka eeroka kantacha iñagaitemi kameethashireri pini, koshintzimaita pini, pikowapiintakero pinintaawaitya.<sup>26</sup> ¡Mawityaakiri Fariseo! Poshiyakairo poshetatyeerome inthomoiki piraamento eejatzi powamento, ompoñaantyaari onkitetai eejatzi jakakeroki.

<sup>27</sup> ¡Ikantamatsitaitzimi eeroka Yotzinkariite eejatzi Fariseo, owapeyimotantaneri pinatzi! Poshiyakawo okitamaaweta rowantaitariri kaminkari, owaneenka okantaka jakakeroki. Iro kantacha inthomoiki, ari risaikake itonkipooki kaminkari, shityeenkatake.<sup>28</sup> Ari pikantayetakari eeroka, iñayewetakemi atziri pantakero kameethari, iro kantzimaitacha inthomoikinta owapeyimotantaneri pinatzi, kaariperoshiretakemi.

<sup>29</sup> ¡Ikantamatsitaitzimi eeroka Yotzinkariite eejatzi Fariseo, owapeyimotantaneri pinatzi! Oitaka piwetsikapookitantawori ikitayeetakerira Kamantantaneri, powaneenkayetakero eejatzi inkene inkenkithashiretakoitapiintemi, inkantaite: ‘Kameethashireri rinake jirika.’<sup>30</sup> Pikantaiyini eejatzi: ‘Arime nontzimakeme ketziroini naaka eero nowamairime, eero noshiyakotari nocharineni ikaatzi owamaakeriri Kamantantaneri.’<sup>31</sup> Eerokatake thawetakotacha apaniroini, iri poshiyakoyeta eeroka picharineni ikaatzi owamaayetakeriri pairani Kamantantaneri.<sup>32</sup> ¡Janjaatya pithotyeero eeroka kaariperori okaatzi retanakari pairani picharinepaini!<sup>33</sup> ¡Poshiyakawo pisheninkatatyeeayarime maanke! Kaariperoshire pikantaka. ¿Tsika pinkantaiyaaka pishiyapithatantaiyaawori powashironkagaiya sarinkaweniki?<sup>34</sup> Iro notyaantantakemiriri pairani Kamantantaneri, yotaneri, eejatzi etawori Yotzinkari. Eenitatsi apawopaini powamaakaanayetakeri, pikentakotakaanayetakeri itsipa. Eenitatsi itsipa, pipasatakaantawaitakeri rapatotapiintaitaga, osheki powasankeyetakeri maawoiniki nampitsi.<sup>35</sup> Iro piñaantyaawori rowasankewentaitemiri eeroka ikaatzi kamayetaintsiri pairani, retanakawo kameethashireri Abel irojatzí Zacarías itomini Berequíás. Iriira rowamagaitake pairani riyaaaterome taapokimentotsiki ipoñaanakawo tasorentsipankoki.<sup>36</sup> Imapero nokantzimi ari rowasankewentaitakemiri jirikapaini nosheninka.”

*Riraashiretawo Jesús Jerusalén  
(Lc. 13.34-35)*

\* **23:23** Iro ikantaitziri jaka inchashaaniki: menta, eneldo, comino. † **23:24** Kantakotachari jaka “antari piratsi”, iri iitaitzitari “camello”.

<sup>37</sup> “¡Jerusalén-satzí! Osheki pitsitokake Kamantantaneri. Pishemyaayetakeri ikaatzi rotyaantawetakemiri. Tema nokowawetapiintaka noshiyakotyaarime tyaapa rosatetziri iryaani, ari nokowawetaka nonkantairime naaka maawoini ikaatzi notomintaari. Iro kantzimaitacha te pikowaiyini. <sup>38</sup> Jaka pisaikawetaga eero iñagaitai paata iita nampitaiyaawone, kaankiityagai. <sup>39</sup> Tema eero piñaapiintaana jaka, irojatzi paata pinkantantaiyaari: Tasonkawentaari rini, tema Pinkatharentsi aitziri otyaantakeriri.”

## 24

### *Ikenkithatakotziro Jesús intzimpookaitero tasorentsipanko*

*(Mr. 13.1-2; Lc. 21.5-6)*

<sup>1</sup> Ikanta rishitowanairo Jesús ipoñaanaawo tasorentsipankoki, iro riyatai. Ari ikantziri riyotaanewo: “Paminero jimpe okanta riwetsikaitziro tasorentsipanko.” <sup>2</sup> Rakanakeri irirori, ikantanakeri: “Maawoini piñaakeri, eero piñagairo paata jimpe okanta mapi opewiryaaayetaka iroñaaka, iroowa rithonkaitero intzimpookaitero. Imap-erotatya nokantzimiri.”

### *Iñagaiteri paata arika ithonkimataiya*

*(Mr. 13.3-23; Lc. 21.7-24)*

<sup>3</sup> Ikanta ritonkaanake otzishiki Olivo, ari risaikapaake. Rosampitakeri riyotaanewo, ikantziri: “Janjaatya pinkantena, ¿tsikapaiteka imonkaatya pikantakeri? ¿Aripaitema ithonkaiya arika pipiyimatai? ¿tsika onkantyaaka niyotantyaawori?” <sup>4</sup> Rakanake Jesús, ikantanakeri: “Ontzimatyete paamaya ramatawitaitzimikari. <sup>5</sup> Tema osheki kowatsine ramatawitemi paata, raakotapaakena nowairo, inkante: ‘Cristo nini naaka.’ <sup>6</sup> Ari pinkemakoyetakeri omanataantsi, paamaiya ominthaawashiretzimikari. Ontzimatyete awisayete jirokapaini, tekeraata imonkaatyaata ithonkantaiyaari maawoini. <sup>7</sup> Rantaminthatawakaiya maawoini nampitsiki inkaate rotyaantayeteri pinkathariyetatsiri. Iñagaiter mantsiyarentsi, tashetsi, omoyekya kipatsi tsikarikapaini. <sup>8</sup> Iroowa etanakyaaawone inkemaatsitaityaawo jirokapaini.”

<sup>9</sup> Raakaantaitanakemi eeroka, inkoshekawaitaitemi irojatzi rowamaantaitakemiri. Osheki inkisaneentanakemi atziri okantakaantziro paakotairi nowairo pikemisantaana. <sup>10</sup> Ari iñagaitake atsipetashitawori ikemisantaweta, iñagaiter kisaneentawakaachane, iñagaiter aakaantawakaachane. <sup>11</sup> Osheki pokapaintsine roshiyawetapaakyaarime Kamantantaneri, ramatawitapaakeri inkaate kemisantawakerine. <sup>12</sup> Rantaperoitero kaariperori, eero ineshironkatawakaanaa atziri. <sup>13</sup> Iriima kyaaryootaintsine, iriitake awisakoshiretaatsine. <sup>14</sup> Arika ithonkakya inkemakoitairo maawoini kipatsiki Kameethari Ñaantsi kenkithatakotzirori ipinkathariwentantai Pawa, aripaiter imonkaataiya ithonkantaiyaari maawoini.

<sup>15</sup> Ari piñaakeri iitaitziri ‘Pinkaari Thonkaatantaneri’, ikenkithatakotakeri pairani Kamantantaneri Daniel. Risaikapaake otasorentsitzira. (Maawoini ñaanaterone jiroka, okowaperotatya inkemathatairo.) <sup>16</sup> Inkaate nampitaiyaawone paata jaka Judea-ki, ontzimatyete rishiyayetai tonkaariki. <sup>17</sup> Pisaikerika jekokeroini pipankoki, irojatzi pishiyantanakyaari, eero pikyaapanaantzi paapanaante oitarika. <sup>18</sup> Powanekerika pisaiki, pishiyanake tsika pikanta, eero paapanaantziro piithaare. <sup>19</sup> ¡Inkantamatsitaitero paata onkaate motziyetatsine, onkaate eejatzi tzimayetatsine eentsite eeni ithotsi! <sup>20</sup> Pamañaari Pawa, onkantyaama arika pishiyayetake, eero pitonkyotantawo kyaa-wontsi, eero pishiyanta eejatzi kiteesheriki rimakoryaantaitari. <sup>21</sup> Tema antawo iñagaitero rashironkaitya paata. Pairani owakera riwetsikaitakeri kipatsi, iro-jatzi iroñaaka, te iñagaitziro oshiyaawone jiroka ashironkagaantsi. Eero apiita

iñagaitairo oshiyaawone. <sup>22</sup> Eerome ishintsitaitzi romairyagaaitero jiroka ashironkagaantsi, tekaatsime awisakotaatsine. Ikamintha itzimayetzi riyoyaitakeri, awentaayetaariri Pawa, iro romairyaantaitakawori intsipaiteeni jiroka ashironkagaantsi. <sup>23</sup> Arika pinkeme inkantaitemi: ‘Jirika Cristo’, itsipa kantatsine: ‘Jirinta Cristo’, eero pikemisantziri. <sup>24</sup> Ripokayetapaake oshiyakotyaarine Cristo, oshiyakotyaarine Kamantantaneri. Ari ritasonkawentantapaake, inkowawetya ramatawiteri riyoyaaayetakeri Pawa. <sup>25</sup> Nokamantzitakemirowa. <sup>26</sup> Ari inkantaitakemi: ‘Areetaka janta ochempiki.’ Eero piyaatashitziri. Inkantaite eejatzi: ‘Ari risaiki inthomoiki pankotsiki.’ Eero pikemisantziri. <sup>27</sup> Tema arika ripiyai Itomi Atziri, roshiyapaiyaawo okanta ookathawontsi. Etanakyaawo imorekanake rshitowapiintzira ooryaatsiri, irojatzitsika ikyaapiintzi. <sup>28</sup> Tsikarika risaiki shitziwari, ari ipiyowentari amempori.” \*

### *Ripiyantaiyaari Itomi Atziri*

(Mr. 13.24-37; Lc. 21.25-36; 17.25-36; 12.41-48)

<sup>29</sup> “Arika onkaatapaake paata rashironkaita antawo, ari ritsiwakake ooryaa, eero roorenta kashiri eejatzi. Rithopiryaayete impokiro, maawoini ikaatzi oorentachari inkiteki rithonkya ripookayete. <sup>30</sup> Aripaite inkoñaatapai Itomi Atziri inkiteki. Antawo inthaawayetanake atziri jaka kipatsiki. Tema iñagaitawairo rowaneenkawo eejatzi ishintsinka, inkenantapaiyaawo menkori. <sup>31</sup> Rityootapaake shintsiini maninkariite, impiyotapairi ikaatzi riyoyaakeri nampitawori maawoini tsikarika jaka kipatsiki, irojatziji jimpe owatzitapaawo.

<sup>32</sup> Oshiyawo piñaapiintziro eereshiyetai pankirentsi, piyotzi irootaatsi osarentsitzi-matai. † <sup>33</sup> Iro piyoteri eerokapaini, arika piñaayetakero nokantayetakemiri, jekaatzimataana. <sup>34</sup> Imaperotatya nonkante, eero ipeyayetzitaawo jirika asheninkapaini, irojatziiñaantayetakyaawori nokamantayetakemiri. <sup>35</sup> Ari ithonkaiya inkite eejatzi kipatsi, irooma okaatzi niñaaneyetakari imaperotatya iroori.

<sup>36</sup> Iro kantacha tekaatsi yotatsine tsikapaite, iri owatsipero inkiteweri te riyotzi. Tema apatziro ikantakaawo Ashitanari riyotziro irirori. <sup>37</sup> Ari oshiyawo okanta pairani eeniro rañaaweta Noé, ari onkantaiyaari eejatzi arika ripiyai Itomi Atziri. <sup>38</sup> Tema pairani tekera areetaata onkawo, inimowaitziri atziri, rowawaitaiyani, rirawaitaiyini, itsipatari aayetatsiri iina. Irojatziirotetantanakari Noé pitotsiki. <sup>39</sup> Tekaaitsi inkenkithashirete, irojatziiomapokantakariki onkawo, ari raperaataiyakani maawoini. Ari onkantaiyaari eejatzi arika ripiyai Itomi Atziri. <sup>40</sup> Risaike apite antawaitatsiri rowaneki, ragaitanai apaani inkiteki. Iriima itsipa rookaitanairi. <sup>41</sup> Isaike apite tsinane itoonkawaite, ragaitanai apaani inkiteki. Irooma otsipatsinane rookaitanairo. <sup>42</sup> Paamaawentaiya eeroka, tema te piyotzi tsikapaite ripiyai Piwinkatharite. <sup>43</sup> Pinkenkithashiretakoteri apaani atziri, arikame riyote ripokatye koshintzi tsireniriki, ari raamaakyaame, eero ikoshaagantaitzirime ipankoki. <sup>44</sup> Ari onkantyaari, ontzimatyepaamaawentaiya eejatzi eeroka. Tema tekaatsi yotatsine tsikapaite ripiyai Itomi Atziri.

<sup>45</sup> Poshiyakotyaari kameethashireri noshikaarewo, kenkithashiretachari kameetha. Rookanakeri ipankoki imperatariri, ikantanakeri: ‘Paminenari ikaatzi saikatsiri pankotsiki.’ <sup>46</sup> Kimoshire inkantaiya jirika noshikaarewo, arika ripiyai imperatariri, tema iñaapairi rimonkaatakero ikantanakeriri. <sup>47</sup> Ari rishinetaakeniri inkempoyagainiri maawoini okaatzi rashitari. <sup>48</sup> Iriima kaariperoshireri noshikaarewo, ikantzi: ‘Eero ripiyita imperatanari.’ <sup>49</sup> Arira rowasankewaitakeri itsipa noshikaarewo. Jatake intsipayetyaari shinkiyantzi. <sup>50</sup> Inimowaitziri jirika

\* **24:28** Ikanta añaaapiintziri amempori rewotaiyani, ayotzi eenitatsi kamatsiri. Ari okantari eejatzi arika añaaayetakero okaatzi ikenkithatakoyetakeri Jesús, ayotzi irootaintsi ripiyimatai. † **24:32** Ikantakoitziri jaka “pankirentsi” higuera ini.

noshikaarewo, romapokashitaiyaari rareetaiya imperatariri. <sup>51</sup> Rimaperoiteri rowasanketapairi, rookapaakeri tsika ikashaakagaitakeri owapeyimotantaneri. Ari riraawaitya, ratsikaikiwaitya inkemaatsitaiya.”

## 25

### *Ikenkithatakotaitziro 10 mainawo*

<sup>1</sup> “Jiroka ikanta ipinkathariwentantai Inkitesatzi, roshiyatyaawo 10 mainawo jatatsiri tsireniriki itonkyotyaari aawakaachane. Aayetanake ootapiintaiyarini. <sup>2</sup> Eenitatsi okaatzi 5 mainawo kyoshiretatsiri, eenitatsi eejatzi okaatzi 5 mainawo kaari kyoshiretatsiri. <sup>3</sup> Jirokapaini 5 mainawo kaari kyoshiretatsiri aawetanakari ootapiintari, iro kantacha eepichoki aanake iyaa. <sup>4</sup> Irooma otsipa kyoshiretaintsiri, aayetanake iroori ootapiintari, aanake eejatzi osheki iyaa. <sup>5</sup> Te ripokita aawakaachane, ayimatapaakero owochokine, magariyanakeni. <sup>6</sup> Okanta niyankiite tsireniri, okematzi ikaimaitzi, ikantaitzi: ‘jKaakitake aawakaachane, pitonkyotawakyaari!’ <sup>7</sup> Kakitaiyanakeni mainawo, iyeekiyetanairi iyaa ootapiintari. <sup>8</sup> Mainawopaini kaari kyoshiretatsiri, okantawetanakawo kyoshiretaintsiri: ‘Pimpena iyaa pootapiintari, irootaintsi ritsiwake nashi naaka.’ <sup>9</sup> Ari okantanake: ‘Te ikimaatzi nashi naaka, piyaate pamanantapainte eeroka.’ <sup>10</sup> Iyaaminthaitapaintzi amanantzi, areetapaaka aawakaachane. Jirokapaini okaatzi aamaawentainchari, itonkyotawakari, raanakero tsika roimoshirenkaiteri. Rashitaitanakero otantotsi. <sup>11</sup> Okanta ipiyawetapaaka jatatsiri amanantzi, okaimakaimawetapaaka, okantapaake: ‘jPashitareenawo naaka!’ <sup>12</sup> Okematzi rakaitanakero, ikantaitziro: ‘Te niyotzimi. Imaperotatya.’ <sup>13</sup> Ontzimatyepaamaawentayetaiya eeroka. Tema te piyotzi tsikapaite ripiyai Itomi Atziri.”

### *Ikenkithatakotaitziri koriki* (Lc. 19.11-27)

<sup>14</sup> “Jiroka ikanta ipinkathariwentantai Inkitesatzi, roshiyakotatyaari apaani atziri kowatsiri riyate intaina, ipiyotakeri rimperatanewo, ipanakeri inkempoyeeniri okaatzi rashitari. <sup>15</sup> Ipanakeri apawopaini rimperatanewo iyorikite. Jirika kenkithashiretachari kameetha, impanakeri ikaatzi 5 koriki, itsipa yoneentatsiri impanakeri ikaatzi apite, iriima itsipa weyaantapaakawori impanakeri apaani. Jatake intaina. <sup>16</sup> Ikanta jirika ipaitakeri 5 koriki, rantawaitakaakeri, roshekyaaakeri ragai ikaatzi 5. <sup>17</sup> Ari ikantakaripaitakeri apite, roshekyaaakeri irirori, ragai ikaatzi apite. <sup>18</sup> Iriima itsipa ipaitakeri apaani, raanakeri iyorikite, ikitatakeri kipatsiki. <sup>19</sup> Okanta osamanitake piyaawo ashitariri koriki, ikaimakaantapairi rimperatanewo riyote oita rantantakaripaitakeri. <sup>20</sup> Ari ripokapaake ipaitakeri 5 koriki, roñaagapairi itsipa 5 koriki roshekyaaakeri, ikantapaakeri: ‘Pinkathari, 5 koriki pipakena pairani, jirika itsipa 5 noshekyagairi.’ <sup>21</sup> Ikantzi Pinkathari: ‘Ariwé nimperatanewo, kameethashireri pini. Eepichokiini koriki pikempoyaakena, ari pinkempoyagai itsipa osheki. Pipoke, pintsipataina pinintagaiya.’ <sup>22</sup> Areetapaaka ipaitakeri apite koriki, ikantapaakeri: ‘Pinkathari, apite koriki pipakena, jirika itsipa apite noshekyagairi.’ <sup>23</sup> Ikantzi pinkathari: ‘Ariwé nimperatanewo, kameethashireri pini. Eepichokiini koriki pikempoyaakena, ari pinkempoyagai osheki itsipa. Pipoke, pintsipatena pinintagaiya.’ <sup>24</sup> Areetapaaka ipaitakeri apaani koriki, ikantapaakeri: ‘Pinkathari, niyotzi naaka mashireyantzi pini, pashi powiro pantawaitakaantziri piyorikite, piñaantyaawori poshekyeeru. <sup>25</sup> Iroowa nothaawantakaripiyorikite, nokitatakeri kipatsiki. Jirika iroñaaka namaimiri.’ <sup>26</sup> Rakanakeri ikantziri: ‘Kaariperoshireri pini, perantzi pini. Piyowetaka ari nonkisakemi eerorika poshekyaanari noorikite, <sup>27</sup> piñaawetaka eero pimatziro eeroka, pamineme iita antawaitakaimirine, ari ishenitaime iroñaaka, iri pimpawainarime nipiyaawowa.’ <sup>28</sup> Ikantanakeri ikaatzi saikaintsiri: ‘Paapithateri koriki, pimpairi itsipa oshekyaaakeriri 10 koriki.’ <sup>29</sup> Ikaatzi otzimimotziri, ari

ontzimimotairi osheki. Iriima kaari otzimimotzi, eekero riyaatatye iñagairo eero otzimimotairi. <sup>30</sup> Paanakeri jirika kaariperoshireri, pookeri otsirenikitziira. Ari riraawaityaari, ratsikaikiwaitiya inkemaatsiwaitaiya.”

### *Ikenkithatakotaitziro yakowentaantsi*

<sup>31</sup> “Arika ripiyai Itomi Atziri pinkatha rowaitairi. Intsipataiyaari maninkariite, roshiyakotaiyaari ikanta pinkathari risaikantawo owaneenkatachari risaikamento. <sup>32</sup> Impiyotairi maawoini atziri tsikarika risaikai irirori. Rinashiyetaiyaari roisaikayetairi. Roshiyakotaiyaari atziri yoshiitziriri ipira te ikowakayiri intentaiya. <sup>33</sup> Roisaikairi ikowaperotziri rakoperoki, iriima imanintayetziri rampateki roisaikairi. \* <sup>34</sup> Kenkithawaitake Pinkathari, riñaanateri rinashitakari rakoperoki, inkanteri: ‘Pipoke maawoini, osheki inkimoshiretakagaimi Ashitanari, pinampitaiyaawo tsika ipinkathariwentantzi irirori, arira riwetsikaantakemi pairani owakera riwetsikantakawori kipatsi. <sup>35</sup> Tema piñaana pairani aawetana nitashe, iro kantacha pipakena nowanawo. Piñaana ayimatana nomere, pipakena nirakeri. Piñaakena nareeta pinampiki, pineshironkatakana pipankoki. <sup>36</sup> Piñaana nisagaakowaitzi, pipakena nokithaataru. Piñaana nomantsiyatake, pamitakotakena netsiyatakotantaari. Romonkyakaantaitakana, pipokashitakana piñaana.’ <sup>37</sup> Ikantaiyini kameethashireri: ‘Pinkathari. ¿Tsikapaite noñiimika pitasheneentzi, nopantzimiri powanawo? ¿Tsika noñiimika pimereneentzi, nopantzimiri pimere? <sup>38</sup> ¿Tsikapaite noñiimika, naakameethatantzimiri nopankoki? ¿Tsikapaite noñiimika pisagaakowaitzi, nopantzimiri piithaare? <sup>39</sup> ¿Tsikapaite noñiimika pimantsiyatzi, romonkyagaitzimi, niyaatashitantzimiri noñiimi.’ <sup>40</sup> Ari rakanake Pinkathari, ikantzi: ‘Tema pineshironkatakari ikaatzi awentaayetanari noshiyakagairi iyeki, naakatajaantake pineshironkatakake. Imaperotatya.’ <sup>41</sup> Ripithokashitanakari saikaintsiri rampateki, ikantziri: ‘Kaariperorí, piyaate eeroka pinkemaatsiwaitaiya paampariki kaari tsiwakanetatsine, ikashaakaitakeriri Kamaari intsipataiyaari maawoini imaninkarite irirori. <sup>42</sup> Piñaawetakana nitasheneentzi, te pipana nowanawo. Owamaimatakana nomere, te pipana nire. <sup>43</sup> Piñaawetana nareeta pinampiki, te pineshironkatana pipankoki. Piñaawetana nisagaakowaitzi, te pipana nonkithaatyari. Piñaawetana nomantsiyatzi, romonkyakaantaitana, te pareetana.’ <sup>44</sup> Rakanake kaariperoshireri, ikantzi: ‘Nowinkatharite, ¿tsikapaiteka noñaawetzimi pitasheneentzi, pimereneentzi, pareetanta, pisagaakowaitzi, pimantsiyatzi, romonkyagaitzimi, temaita noneshironkayetzimi.’ <sup>45</sup> Ikantanake Pinkathari: ‘Te pineshironkayetantai, inkantawetakya iryaani rine, naakatake pantzimotake. Imaperotatya.’ <sup>46</sup> Iroowa ratsipetantaityaawori kantaitaachane ashironkagaantsi. Iriima inkaate kameethashiretaintsiri, inkantaitaatyeeero rañaayetai.”

## 26

### *Ikamantawakaita raakaanteri Jesús*

(Mr. 14.1-2; Lc. 22.1-2; Jn. 11.45-53)

<sup>1</sup> Ikanta rithonkanakero Jesús okaatzi ikenkithawaitakotakeri, ikantanakeri riyotaanewo: <sup>2</sup> “Piyotaiyini eeroka yotapaaka apite kiteesheri roimoshirenkaityaawo Anonkoryagaantsi. Ari raakaanteriteri Itomi Atziri inkentakoiteri.”

<sup>3</sup> Ikanta reeware Imperatasorentsitaarewo itsipatakari Yotzinkariite, eejatzi Itzinkamipaini, ipiyotaiyakani ipankoki Caifás reewaperore Imperatasorentsitaarewo.

<sup>4</sup> Ari ikamantawakaiyakani, ikantaiyini: “Jame amatawiteri Jesús ayeri

\* **25:33** Iri ikantakoitzi jaka oweja, iri piratsi ikowaperoitakeri roisaikaiteeri akoperotsiki. Iriima cabra, iri piratsi imanintaitakeri roisaikaiteeri ampatentsiki.



atsitokakaanteri. <sup>5</sup> Iro kantacha eero akoshekari kiteesheriki roimoshirenkantaitari, ikisawentzirikari atziripaini.”

*Risaitantaitari Jesús kasankari*  
(Mr. 14.3-9; Jn. 12.1-8)

<sup>6</sup> Ikanta ikenanai Jesús Betania-ki, ipankoki Simón pathaawaiwetachari. <sup>7</sup> Ari areetapaaka tsinane amakotake kasankari, kameetha okantaka onaki riwetsikaitziro mapi jítachari “alabastro”, osheki owinawo. Isaitantapaakari iitoki Jesús risaikakera rowaiyani. <sup>8</sup> Ikisaiyanakani riyotaanewo iñaakerowa, ikantaiyini: “¿Oitaka apaawaitantawori? <sup>9</sup> Arikame ompimantya, ragaiteme osheki koriki impaiterime ashironkainkari.” <sup>10</sup> Riyotakotakeri Jesús, ikantziri: “¿Oitaka pikisantawori jiroka tsinane? Kameetha okanta noñaakero naaka antakeri. <sup>11</sup> Rashi rowaaty-eero ashironkainkari pintsipatyaari, irooma naaka eero pintsipataana. <sup>12</sup> Tema jiwatake isaitantanawo kasankari imotaawentatyaanawo paata arika inkitaitakena. <sup>13</sup> Arika inkamantantaitero paata Kameethari Ñaantsi, inkenkithatakoitero jiroka tsinane, roshiretakoitantyaawori antakeri. Imaperotatya.”

*Ikenkithashiryaa Judas raakaanteri Jesús*  
(Mr. 14.10-11; Lc. 22.3-6)

<sup>14</sup> Ikanta Judas Iscariote kaawetachari <sup>12</sup> riyotaanewo Jesús, riyatashitakeri reeware Imperatasorentsitaarewo. <sup>15</sup> Ikantapaakeri: “¿Litaka pimpenari arika namakemiri?” Roñaagaitanakeri ikaatzi 30 ipewiryaaaka koriki. <sup>16</sup> Aripaite raminaminatanakero Judas tsikapaita raakaanteri.

*Weyaantawori rowakaanaari riyotaanewo*  
(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Areetapaaka etawori kiteesheri rowantapiintaitawori tashirentsiponka, pokaiyapaakeni riyotaanewo Jesús, rosampitziri: “¿Tsika onkotsitakaanteka oyaari kiteesheriki Anonkoryagaantsiki?” <sup>18</sup> Ari rakanakeri: “Piyaate nampitsiki. Ari pitonkyotyaari apaani atziri, pinkanteri: ‘Ikantzi yotaanari: “Monkaatapaaka, nokowi niyaate pipankoki noimoshirenkero kiteesheri Anonkoryagaantsi, nontsipatyaari niyotaaanewopaini.” ’ ” <sup>19</sup> Rimatakero riyotaanewo okaatzi ikantakeriri Jesús. Ronkotsitakaantake royaari kiteesheriki Anonkoryagaantsiki.

<sup>20</sup> Ari otsireniityaanake areetapaaka Jesús, saikapaake rowaiyaanira itsipatapaakari riyotaanewo ikaataiyini 12. <sup>21</sup> Ikanta rowaiyani, ikantanake Jesús: “Pinkeme nonkante, pikaataiyinira eeroka jaka, eenitatsi apaani pithokashitenane. Imaperotatya.” <sup>22</sup> Owashire ikantaiyanakani. Apaani paini rosampitanakeri: “¿Naakama, Pinkathari?” <sup>23</sup> Rakanakeri, ikantziri: “Akaatakera owaiyani, iri pithokashitenane. <sup>24</sup> Imaperotatya impeya jirika Itomi Atziri, iroowa rosankenatakoitakeriri pairani. ¡Ikantamatsitaitziri pithokashitenane! ¡Litaka itzimaatsikaitantakari jirika!” <sup>25</sup> Ari riñaawaitanake Judas pithokashitantachane, ikantzi: “¿Naaka yotaanari?” Ikantzi Jesús: “Irootake pikantakeri.”

<sup>26</sup> Eeniro rowaiyani raakero Jesús pan, riwetharyaawentakawo, itzipetowakero, ipayetakeri riyotaanewo, ikantziri: “Jiroka, poyaawo, nowatha ini.” <sup>27</sup> Raakotakero riraitziri, riwetharyaawentakawo, ipakotakeri riyotaanewo, ikantziri: “Piraiyeroni maawoini, <sup>28</sup> niraa inatzi jiroka, iro ooñaawontaperotairone aapatziyawakaantaiyaari, iro shitowaatsine rariperotantaitaiyaariri kaariperoshireri. <sup>29</sup> Pinkeme nonkante, eero niritawo jiroka irojatziri paata impinkathariwentantaira Ashitanari, ari apiitairo eejatzi.”

*Ikenkithatakotakero Jesús rookanawentante Pedro*  
(Mr. 14.26-31; Lc. 22.31-34; Jn. 13.36-38)

<sup>30</sup> Ikanta rithonkanakero romampaakotari Pawa, jataiyanakeni tonkaariki otzishiki Olivo. <sup>31</sup> Ikantanakeri Jesús riyotaanewo: “Irootaintsi pookanawentaiyenani tsirenirikika. Rosankenaitake pairani kantatsiri:

Nitsitokeri kempoyiiriri oweja, ari rithonkya ripookanake ipira.

<sup>32</sup> Iro kantacha arika nañagai, Galilea-ki piñaapaina.” <sup>33</sup> Ari rakanake Pedro, ikantzi: “Aritaikema rookanawentakemi itsipapaini, ero nimatziro naaka.” <sup>34</sup> Ikantzi Jesús: “Pinkeme nonkantemi, iroñaaka tsirenirikika tekera riñaakeeta tyaapa, mawa papi-itero pinkante: ‘Te niyotziri Jesús.’ Imaperotatya.” <sup>35</sup> Ikantanake Pedro: “Eero nookanawentzimi, aritake ankaate ankame.” Ari ikantaiyanakeni eejatzi maawoini riyotaanewo.

*Ramana Jesús Getsemaní-ki*  
(Mr. 14.32-42; Lc. 22.39-46)

<sup>36</sup> Ikanta Jesús itsipatakari riyotaanewo, areetaiyakani Getsemaní-ki, ikantapaakeri: “Ari pisaikawake jaka, niyaatawakeeta naaka jantyaatsikaini namaña.” <sup>37</sup> Raanakeri Pedro itsipataanakeri apite itomi Zebedeo. Ari riraakoshiretapaaka Jesús. <sup>38</sup> Ikantzi: “Owamaimatatyana nowashirenka. Ari pisaikawakeeta eeroka jaka, jame ankakite.” <sup>39</sup> Jataneentanake jantyaatsikaini irirori. Otziwerowapaaka, amanapaaka. Ikantzi: “Ashitanarí, pikowirika eeroka, pontsiparyaakowentena onkaate nonkemaatsityaari. Iro kantacha ero pimatanawo nokowawetari naaka, iro pimate okaatzi pikowakaa-nari eeroka.” <sup>40</sup> Irojatzzi ripiyashitantapaari riyotaanewo, iñaapaatziiri rimagaiyini. Ikantapaakeri Pedro: “¿Tema pikisashitawo piwochokine, pintsipatena ankakite?” <sup>41</sup> Pinkakite, pamaña, otzimikari piyenakaashitanewo. Osheki naaweta pikowawetari panterome kameethatatsiri, iro kantacha te pikisashiwaineta.” <sup>42</sup> Eejatzi ripiyanaa Jesús, amanapaa, ikantzi: “Ashitanarí, tekaatsirika nonkenakairo naaka ero noke-maatsiwaitanta, panterowa okaatzi pikowakeri eeroka.” <sup>43</sup> Ikanta ripiyapaa, eejatzi iñaapairi rimagaiyini, tema antawo okantaka iwochokine. <sup>44</sup> Ripiyapithatanaari, mawa ripiyaka ramana. Irojatzzi rapiitapai ikantakeri inkaaganki. <sup>45</sup> Irojatzzi ripiyashitanta-paari riyotaanewo, ikantapaakeri: “¿Irojatzzima pimagaiyini? Monkaatapaakaga raan-taityaariri Itomi Atziri, ragaiteri kaariperoshireriki atziri. <sup>46</sup> Pimpiriinte, jame aatai. Okaakitziimatapaake pithokashitenane.”

*Ragaitanakeri Jesús*  
(Mr. 14.43-50; Lc. 22.47-53; Jn. 18.2-11)

<sup>47</sup> Ikenkithawaiminthaitzi Jesús, areetapaaka Judas itsipawetapiintari. Osheki atziri itsipatapaakari, ramayetake rowathaamento, ripasamento. Rotyaantanewo rini reewaperore Imperatasorentsitaarewo, eejatzi rashi Itzinkami. <sup>48</sup> Ikantzitakari ket-ziroini ramanewo Judas pithokashitantaneri: “Tsikarika itzimi nonthowootapaakeri, iriitake, potaiyeri.” <sup>49</sup> Ikanta rareetapaaka Judas, ripokashitapaakeri okaakiini Jesús, ikantapaakeri: “Yotaanarí.” Ithowootapaakeri riwethatapaakari. <sup>50</sup> Rosampitanakeri Jesús, ikantziri: “Asheninká, ¿Itaka pipokashitziri?” Rotaiyaitapaakeri Jesús. <sup>51</sup> Ikanta apaani tsipatariri okaakiini Jesús, inowikyaanakero rosataamento, rithatzinkitakeri ikempita inoshikanewo reeware Imperatasorentsitaarewo. <sup>52</sup> Ari ikantanake Jesús: “Powero posataamento, ripiyaitzimikari. Tema ikaatzi thatzinkantatsiri, rithatzinkaitziri irirori. <sup>53</sup> Piyotzi eeroka, kantacha namañaari Ashitanari, ari rotyaan-takeme osheki maninkariite kisawentenane. \* <sup>54</sup> Iroowa imonkaatantaiyaari okaatzi rosankenatakoitakenari pairani.” <sup>55</sup> Ripithokashitanakari Jesús ikaatzi pokashitakeriri, ikantziri: “¿Naakama koshintzi pamashitantanari powathaamento, pipasamento?”

\* **26:53** Ikantaitziri jaka “osheki maninkariite”, 12 legión ikaatzi. Ikantakoitziri eejatzi jaka “legión” iriira Roma-satzi shekiperotatsiri rowayerite, arika inkaate 3000 aamaaka 6000 owayeri. Iriitake iitaitziri legión.

¿Tema piñaapiintawetana niyotaantzi tasorentsipankoki, kaari paantana? <sup>56</sup> Arira imonkaatari okaatzi rosankenayetakeri pairani Kamantantaneri.” Ari rishiyayetanaka riyotaanewo, rookanawentaitanakeri Jesús apaniroini.

*Ipiyowentaitari Jesús*

(Mr. 14.53-65; Lc. 22.54, 63-71; Jn. 18.12-14, 19-24)

<sup>57</sup> Ikanta ragaitanakeri Jesús ipankoki Caifás, reewaperore Imperatasorentsitaarewo, ari ipiyotaiyakani maawoini Yotzinkariite itsipatakari Itzinkamipaini. <sup>58</sup> Noshikacha neetsikeroini Pedro royaatakowentakeri Jesús, irojatzii rareetantapaakari ipankoki reewaperore Imperatasorentsitaarewo. Kyaapaake pankotsiki itsipayetapaakari kempoyaantaneri, ikowi Pedro inkemakowentereri tsika inkantaiteri Jesús. <sup>59</sup> Ikanta reewarepaini Imperatasorentsitaarewo itsipatakari ikaatzi piyotainchari, raminawetaiyakani iita thaiyakotyaarine Jesús ompoñaantyaari ritsitokakaanteri. <sup>60</sup> Te iñiimaita, ripokayewetaka osheki kowatsiri inthaiyakotyaarime. Irojatzii ikatziyantananakari apite thaiyakotanakariri, <sup>61</sup> ikantanake: “Nokemiri naaka chapinki ikenkithawaitzi ikantzi: ‘Ari nontzimpookakero tasorentsipanko, iro awisawetakya mawa kiteesheri, nithonkairo niwetsikairo.’ ” <sup>62</sup> Ari ikatziyanaka reewaperore Imperatasorentsitaarewo, ikantanakeri Jesús: “¿Litaka kaari pakanta? ¿Tema pikemiri okaatzi ikantakotakemiri?” <sup>63</sup> Irojatzii imairetake, te raki. Ari ishintsineentanakeri, ikantziri: “Paakoteri iwairo Kañaaneri Pawa, niyotantyaari imaperorika onkaate pinkantenari. ¿Eerokama Cristo, Itomi Pawa?” <sup>64</sup> Rakanake Jesús, ikantzi: “Irootake pikantakeri. Iroñaaka piñeeri Itomi Atziri risaikimotairi rakoperoki Pawa impinkatharitari. Piñeeri ripiyai inkenapai menkoriki.” <sup>65</sup> Ikanta ikemawake jewaperori, itzisagaanakero iithaare ikisanaka, ikantanake: “Piñaakero, raakowaitashitakeri Pawa. Te ankowe itsipa kantakoterine. Pikemaiyakeni eeroka rithainkakeri Pawa. <sup>66</sup> ¿Tsika pikantaiyinika eeroka?” Rakaiyanakeni, ikantaiyini: “¡Tzimataike iyenakaashitanewo! ¡Ontzimatyee inkame!” <sup>67</sup> Irojatzii reewawootaitantanakariri. Itsipa kaposawootakeri. Itsipa pasawootakeriri. <sup>68</sup> Rosampitzimaitari ikantziri: “Cristo, ¿tema Kamantantaneri pini, janjaatya pinkantena iita pasawaitzimiri?”

*Ikantzi Pedro: Te niyotziri naaka Jesús*

(Mr. 14.66-72; Lc. 22.55-62; Jn. 18.15-18, 25-27)

<sup>69</sup> Ari risaikake Pedro jakakeroki, irojatzii oñaantapaakari rimperaitari, okantapaakeri: “¿Tema eeroka itsipata pairani Jesús Galilea-satzi?” <sup>70</sup> Osheki ñaakeriri Pedro roipiyanakero, ikantanake: “Te, te niyotziri iita pikantanari.” <sup>71</sup> Shitowaneentanake Pedro jakakeroki. Oñaapairi otsipa rimperataitari, okantapaakeri itsipayetakari: “Iri-jatzira jirika itsipatariri pairani Jesús Nazaret-satzi.” <sup>72</sup> Rapiitanakero Pedro roipiyero, ikantanake: “Apatziro riyotzi Pawa, te niyotziri naaka jirika atziri pikantanari.” <sup>73</sup> Tekera osamaniteeta, rapiitakeri ikaatzi itsipatakari ikantziri: “Eerokaga itsipatapiintari Jesús, Galilea-satzi pini, ariwaitakemi ikantziro riñaawaitzi.” <sup>74</sup> Ikantanakeri: “Té, te niyotziri jirika atziri pikantanari. Riyotzi Pawa nothaiyarika, rowasanketainana.” Ari riñaanake tyaapa. <sup>75</sup> Ikenkithashiretanairo Pedro ikantakeriri Jesús: “Tekera riñeeta tyaapa, mawa poipiyero, pinkante: ‘Te niyotziri Jesús.’ ” Shitowanake Pedro, antawoite riraawaitanaka.

## 27

*Ragaitanakeri Jesús Pilato-ki*

(Mr. 15.1; Lc. 23.1-2; Jn. 18.28-32)

<sup>1</sup> Okanta okiteeshetamanai, piyotaiyakani reewarepaini Imperatasorentsitaarewo itsipayetakari Itzinkamipaini, ikamantawakaiyakani ritsitokeri Jesús. <sup>2</sup> Irojatzii roosoitantanakari Jesús, ragaitanakeri risaikira Poncio Pilato, jewariperi rini jirika.

### *Ikamantakari Judas*

<sup>3</sup> Ikanta Judas pithokashitantaneri, riyotanake rowamaakaantashitakari Jesús. Anta-woite ikenkithashiretanaka, jatake roipiyainiri iyorikite reeware Imperatasorentsitaarewo, eejatzi Itzinkamipaini, <sup>4</sup> ikantapairi: “Jirika piyorikite. Te okameethatzi okaatzi nantakeri. Tekaatsi rante Jesús naakaantashitakari.” Ikantaiyanakeni irirori: “Iitaanitya eeroka.” <sup>5</sup> Romanatanakeri koriki janta tasorentsipankoki, rishiyaperotanakitya ripiyanaka, irojatzi rishirikantapaaka. <sup>6</sup> Ikanta reeware Imperatasorentsitaarewo, ragairi koriki, ikantaiyini: “Te ishinetaantsite ankempoyagairi koriki, tema iriitake apinatakeriri ritsitokantaityaariri.” <sup>7</sup> Ari rosampitawakaiyani: “¿Tsika ankanterika jirika koriki?” Ikantaiyini: “Jame amanantantyaari tsirepathari kipatsi, tsika inkitaiteri arika inkamayete kaari asheninkata.” <sup>8</sup> Irojatzi iroñaaka iitaitziro jiroka kipatsi: “Iraantsipatha”. <sup>9</sup> Irojatzi imonkaantakari rosankenatakeri pairani Kaman-tantaneri Jeremías, ikantake:  
Ragaitakeri 30 ipewirya koriki,  
Ikwaiyakerini icharinepaini Israel ripinaiteri,  
<sup>10</sup> Iri ramanantaitantakawori tsirepathari kipatsi,  
Iro ikowakaakenari Pinkathari namanantero.

### *Pilato rosampitziri Jesús*

*(Mr. 15.2-5; Lc. 23.3-5; Jn. 18.33-38)*

<sup>11</sup> Areetaka Jesús risaikira reewaperori, rosampitawakeri, ikantziri: “¿Eeroka iwinkatharite Judá-ite?” Rakanake Jesús, ikantzi: “Irootake pikantakeri.” <sup>12</sup> Ikanta reeware Imperatasorentsitaarewo itsipayetakari Itzinkamipaini, osheki ithaiyakowetapaakari Jesús. Te rakimaita irirori. <sup>13</sup> Irojatzi ikantantari Pilato: “¿Tema pikemi okaatzi ikantakoitzimiri?” <sup>14</sup> Irojatzi imairetake, te raki. Riyokitziwentanakeri Pilato jirika Jesús.

### *Riyakowentaitziri Jesús*

*(Mr. 15.6-20; Lc. 23.13-25; Jn. 18.38-19.16)*

<sup>15</sup> Tzimatsi rametapiintari reewaperori: Maawoini osarentsi arika roimoshirenkya Judá-ite, romishitowakaantzi apaani isheninka raakaantaitziri intzimerika inkoweri. <sup>16</sup> Eenitatsi itsipa Judá-ite raakaantaitziri iita Barrabás, ikemakoitanewo rini jirika rantakero koweenkatatsiri. <sup>17</sup> Ikanta ipiyotaiyakani atziripaini, rosampitantake Pilato, ikantziri: “¿Iitaka pikowiri nomishitowakaanteri? ¿Iri Barrabás? ¿Iriima pikowiri Jesús iitaitziri Cristo?” <sup>18</sup> Riyotake Pilato ikisaneentashitaitari Jesús, iroowa raakaantaitantari. <sup>19</sup> Tema inkaaganki, okantakaantakeri iina, okantake: “Eero pikoshekawaitari eeroka kameethashireri. Osheki romishimpyaakena tsireniriki ominthaawashiryaaakena.” <sup>20</sup> Iri kantacha reeware Imperatasorentsitaarewo itsipatakari Itzinkamipaini, rowatsimaakeri atziripaini, ikantaiyini: “Iri kameethatatsi romishitowaiteri Barrabás, iriima Jesús ritsitokaiteri.” <sup>21</sup> Irojatzi rapiitantanakawori reewaperore rosampitantzi: “¿Iitaka pikowiri nomishitowakaantairi?” Ikantaiyini maawoini: “¡Barrabás!” <sup>22</sup> Ikantzi Pilato: “¿Tsika nonkanterika Jesús iitaitziri Cristo?” Rakaiyini atziri: “¡Pinkentakotakaanteri!” <sup>23</sup> Ikantzi reewaperore: “¿Eenitatsima kaariperori rantakeri?” Eeke ishintsitatzi ikaimaiyini atziripaini, ikantzi: “¡Pinkentakotakaanteri!”

<sup>24</sup> Ari riyotanake Pilato raminaashiwaita rosampitantzi, tema osheki iyatsimashirenka atziripaini. Ikaimakaantake ñaa, iñagaitakeri maawoini ikiwaakotanaka, ikantanake: “Te naaka kowatsine nitsitokakaanteri jirika kameethashireri. Pikowirika eerokapaini, piyotaiyeroni.” <sup>25</sup> Ikantaiyanakeni atziripaini: “Nokowaiyini, naaka rookoite oitarika awisaintsine eejatzi inkaate nocharinepaini.” <sup>26</sup> Irojatzi romishitowakaantantaitaariri Barrabás. Iriima Jesús ripasatakaantaitanakeri, riyakowentaitakeri inkentakoiteri.

<sup>27</sup> Ikanta owayeripaini, ikyaakaanakeri Jesús ipankoki Pilato iitaitziro “Pretorio”. Ari ipiyowentakari maawoini owayeri. <sup>28</sup> Raatonkoryagaitakeri Jesús, ikithaataitakeri kithaarentsi anashirikimawotatsiri oshiyawori ikithaatapiintari pinkathari. <sup>29</sup> Ramanthaitantaitakari kitocheetapo iitoki, rotaiyakagaitakeri rakoperoki sawookaaki. Irojatzzi rotziwerowashitaitantanakari Jesús rithainkimawaitaitziri, ikantaiyini: “¡Paakameethatawakeri iwinkatharite Judá-ite!” \* <sup>30</sup> Osheki reewawoowaitakeri, romposayinawaitantari sawookaaki. <sup>31</sup> Ikanta reshitakero ishironawentawaitari. Raatonkoryagairi ikithaatakeriri inkaaganki, ikithaatairi iithaare, raanakeri inkentakoteri.

*Ikentakoitziri Jesús irojatzzi ikamantakari*  
(Mr. 15.21-41; Lc. 23.26-49; Jn. 19.17-30)

<sup>32</sup> Ikanta riyaataiyanakeni, ritonkyotakari Simón poñaachari Cirene, ishintsineentaitanakeri inatanakero inkentakotantaityaariri Jesús. <sup>33</sup> Irojatzzi rareetantakariki tonkaariki oita Gólgota (akantziro aaka: Atziriitoni.) <sup>34</sup> Ari ipakowetaitakari Jesús imere rowaitaitakero yepitentsi, ikanta ithowetawakawo eepichoki, te ririro. † <sup>35</sup> Irojatzzi ikentakotantaitakari. Ikanta owayeripaini raakero ikithaayetari Jesús, rowawisaawakaakawo, roshiyakaakero iñaaryaaita riyotantyaari iita ayerone. Ari imonkaatakari ikenkithatakotakeri pairani Kamantantaneri, ikantake:

Iñaaryaawentaitakawo noithaare,  
Rowawisaawakaayetakawo.

<sup>36</sup> Ari risaikawentaiyirini, ikempoyiiri. <sup>37</sup> Irojatzzi rosankenaitantakariki kantakaan-takerori ikentakoitantakariri, okantzi: JIRIKA JESÚS, IRIITAKE IWINKATHARITE JUDÁ-ITE. Rontarekakoitakeniri jeñokiini ipatziitoki. <sup>38</sup> Ari itsipatagaitakeri ikentakoitziri apite koshintzi, ikatziyakotaka apaani rakoperoki, itsipa rampateki. <sup>39</sup> Rithainkimayetakeri ikaatzi awisayetatsiri janta, rotekayinata, ‡ <sup>40</sup> ikantaitziri: “Eeroka tzimpookirori tasorentsipanko, iro awisake mawa kiteesheri piwetsikairo eejatzi. Eerokame Itomi Pawa ¿Oitaka kaari payiitanta ikentakoitakemira? Powawisaakotya.” <sup>41</sup> Irojatzzi ikantakeri eejatzi reeware Imperatasorentsitaarewo itsipayetakari Yotzinkariite, Fariseo-paini, eejatzi Itzinkampaini, ikantaiyini: <sup>42</sup> “Rowawisaakotziri itsipa, ¿kaari rimatantawo rowawisaakotya irirori iriime iwinkatharite Israel-iite? Ari rowawisaakotakyaame ikentakoitakerira, aritake ankemisantakerime. <sup>43</sup> Rawentaawetakari Pawa, janjaatya añeeri imaperorika retakotari ari rowawisaakotairi. Tema ikantapiintzi: ‘Naaka Itomi Pawa.’ ” <sup>44</sup> Rimatzitakawo koshintzipaini itsipatakari ikentakota, rithainkawaitakeri.

<sup>45</sup> Ikanta itampatzikatapaake ooryaatsiri, omapokashitapaaka otsirenikitanaake, irojatzzi ishaawiiteeni ithaperotanakaga ooryaa. § <sup>46</sup> Ari ikaimanake Jesús shintsiini, ikantanake: “¡Elí! ¡Elí! ¿Lama sabactani?” (Iro ikantaitziri apaanteki aaka: “¡Pawá! ¡Pawá! ¿Iitaka pookanawentantanari?”) <sup>47</sup> Ikanta saikawentakeriri, ikemawetawakari ikaimanake, ikantaiyini: “Pinkemeri, ikaimatziiri Elías.” <sup>48</sup> Irojatzzi rishiyantapaintari apaani, romitsitsiyaatapaintzi manthakintsi kepishaariki, rankowitakeniri sawoopankeki, rowaankakotakeniri ratsimiyaatawakeme. <sup>49</sup> Ikantaiyini itsipa: “Añaawakeriita ari ripokake Elías rowayiitairi.” <sup>50</sup> Irojatzzi rapiitantanakawo ikaimanai shintsiini, peyanaka.

\* **27:29** Iro rametapiintari pinkathari ramanthaitawo poreryaayetatsiri, rotaiyapiintziro eejatzi rakoperoki kot-sirotonki. † **27:34** Iro roitaitziriri atziri eero ikemaatsiwaitanta arika rowasanketaiteri. ‡ **27:39** Iro rametaiyarini Judá-ite rotekayinata arika rithainkashiretante. Iro oshiyawori ametaiyarini aakapaini, arika ookoteri atziri athainkashiretziri: “¡Piñaakero! ¡Pikemakero!” § **27:45** Iro ikantaitziri pairani: riweyaanaka ooryaa 6, ari omapokapaakari otsirenikitanaake irojatzzi riweyaanaka ooryaa 9.



<sup>51</sup> Okanta tasorentsipankoki, saganake niyanki tontamawotatsiri ithatashiitzirori, apimankite okantanaka, opoñaanaka jenoki areetaka isaawiki. Antawoite omoyekanaka tankayetanake mapi. <sup>52</sup> Rithonka ripookakotanake kaminkari, osheki añañaatsiri kameethashireri kamawetainchari. <sup>53</sup> Tema rañagaira Jesús, osheki añaaayetaatsiri rishitowanairo omooki riyaayetai nampitsiki tasorentsitatsiri, roñaagayetantaawo. <sup>54</sup> Ikanta reeware owayeripaini itsipayetakari itsipa ikaatzi ikatziyawentakari Jesús, iñaakero omoyekanaka, iñaakero okaatzi awisayetaintsiri, antawoite ithaawanake, ikantanake: “¿Imaperowetyaama Itomintari Pawa jirika?”

<sup>55</sup> Eenitatsi janta tsinanepaini aminakotakeriri, irootake poñagainchari Galilea-ki oyaatziri Jesús, osheki amitakoyetakeri. <sup>56</sup> Jiroka okaataiyini: María Magdala-sato, María inaanate Jacobo eejatzi José, ari isaikake eejatzi inaanate itomipaini Zebedeo.

### *Ikitaitakeri Jesús*

*(Mr. 15.42-47; Lc. 23.50-56; Jn. 19.38-42)*

<sup>57</sup> Okanta otsireniityaanake, ari ripokakeri apaani ashaagantzinkari poñagainchari Arimatea, iita José. Irijatzi riyotaapiintakeri Jesús. <sup>58</sup> Riyaatashitakeri Pilato, ikantapaakeri: “Pishinetenari nonkitatairi Jesús.” Ikanta Pilato ikantakaantake raanairi inkitatairi. <sup>59</sup> Ikanta José iponatantakeri Jesús kiteri manthakintsi. <sup>60</sup> Romonkyaakotakeri owakeranatzira imoontashiitziri kaminkaripaini shirantaaki, roipinaakaantake antawoite mapi, rashitakotantakeri. Piyanaka José. <sup>61</sup> Okanta María Magdala-sato, eejatzi otsipa María, isaikawentakari tsika ikitaitakeri.

### *Kempoyiiriri tsika ikitaitakeri*

<sup>62</sup> Okanta awisanake riwetsikawentaitawo kiteesheri rimakoryaantaitari, ari riyaatake reeware Imperatasorentsitaarewo itsipatakari Fariseo-paini janta ipankoki Pilato, <sup>63</sup> ikantapaakeri: “Pinkatharí, chapinki eeni rañaaweta amatawitantzinkari, nokemiri ikantzi: ‘Arika nonkamawetakya, iro mawatapaintsi kiteesheri, aritake nañagai.’ <sup>64</sup> Nokowi potyaante kempoyeerine irojatzi imonkaatantakyaari mawa kiteesheri. Aamaashitya ari riyaatake tsireniriki riyotaanewopaini, ragaateri. Inkantzimaitya: ‘¡Añagai Jesús!’ Arika rimatakeri, ari owatsiperotya ramatawitante.” <sup>65</sup> Ikantanake Pilato: “Jirika owayeripaini, paanakeri, pinkanteri inkempoyeerini tsikarika okanta pikowiri eeroka.” <sup>66</sup> Ari riyaataiyanakeni, rontsirekakoyetakeri omooki. Ari risaikawentaiyakerini.

## 28

### *Rañaaantari Jesús*

*(Mr. 16.1-8; Lc. 24.1-12; Jn. 20.1-10)*

<sup>1</sup> Okanta awisanake kiteesheri rimakoryaantaitari, ari okiteeshetamanai etapiintawori kiteesheri. Ari iyaatamanai María Magdala-sato otsipatanakawo otsipa María aminairo jimpe ikitaitakeri Jesús. <sup>2</sup> Ari omoyekanakari shintsiini kipatsi, tema rayiitapaakitzi inkiteweri maninkariite rotainkapaakero mapi rashitantawetakawori omoo, risaikantapaakawo. <sup>3</sup> Shipakirya ikantapaaka roshiyapaakawo ookathawontsi. Kitamaaniki okantaka iithaare oshiyawaitakawo okitamaatzi jiriniki. <sup>4</sup> Ikanta owayeripaini aminiriri, iñaawakeri, antawo ithaawaiyanakeni, oshiyawaitanakawo inkamanakityeeme. <sup>5</sup> Ikanta maninkariite, ikantanakero tsinanepaini: “Eero pithaawaiyini eeroka. Niyotake iri pipokashitzi Jesús ikentakoweetakari. <sup>6</sup> Te añiiri jaka, añagai. Tema ari ikantzitaka pairani. Pipoke, paminero tsika rowawetakari Awinkatharite. <sup>7</sup> Pipiyanake, pinkamantayetairi riyotaanewopaini, pinkanteri: ‘Añagai Jesús, piyaatai Galilea-ki, ari piñaayetairiri.’ Tema nokamantakemi.” <sup>8</sup> Okanta ipiyaiyanakani iyokitzi okantaiyanakani. Iro kantacha antawoite okimoshiretanake, ishiyashitanakari riyotaanewo onkamantayetairi. Ishiyaminthaita iyaate onkamantante, <sup>9</sup> ari roñaagaawo

Jesús, riwethatawakawo. Iyaatashitanakeri okaakiini, otziwerowashitapaakari, awith-akiyitzitapaakari. <sup>10</sup> Irojatzzi ikantantanakawo Jesús: “Eero pithaawi, piyaate pinkamantayetairi nirentziyetaari, riyaaita Galilea-ki, ari iñaapaina.”

*Ikantayetziri owayeri*

<sup>11</sup> Okanta ipiyaiyanakani tsinane onkamantante, jatanake eejatzi owayeripaini nampitsiki, ikamantapaakari reeware Imperatasorentsitaarewo okaatzi awisaintsiri. <sup>12</sup> Ari ipiyotaiyanakani Itzinkamipaini, ikenkithawaitaiyanakeni. Ikaimakeri owayeri, ikantziri: “Jirika osheki nipinatemiri, <sup>13</sup> pinkantayeteri atziripaini: ‘Niyankiiteki tsireniri, nimaanake. Aamaaka ari ripokaiyakeni riyotaanewo, raanairi.’ <sup>14</sup> Arika inke-make reeware, naakaga kankowentemine eero rowasanketantzimi.” <sup>15</sup> Rimatakero owayeripaini, raakeri ripinaitakeriri, rantakero okaatzi ikantaitakeriri. Iroowa rantetakari maawoini Judá-ite jiroka, irojatzzi iroñaaka.

*Rotyaantziri Jesús riyotaanewo*

*(Mr. 16.14-18; Lc. 24.36-49; Jn. 20.19-23)*

<sup>16</sup> Ikanta 11 riyotaanewo Jesús, jataiyakeni Galilea-ki isaikira otzishi ikantakeri pairani Jesús ari iñagairi. <sup>17</sup> Ikanta iñaawairi, rotziwerowashitawaari. Iro kantacha tzimayetatsi kisoshirewentawairiri. <sup>18</sup> Ikanta ikempiyapaari Jesús, ikantapairi: “Impinkathaperoitaina inkiteki eejatzi kipatsiki. <sup>19</sup> Iro nonkantantemiri: Piyaate maawoiniki nampitsi, pinkemisantakaayetairi atziripaini, pithotyagairo maawoini. Arika inkemisantayetai, pomitsitsiyaayetairi, paakotairi iwairo Ashitairi, Itomi, eejatzi Tasorenkantsi. <sup>20</sup> Piyotaayetairi atziripaini rimayetairo okaatzi nokamantayetakemiri. Ari nontsipatapiintaimi naaka, kisokero nowemi irojatzzi paata ithonkantaiyaari kipatsi.” Ari onkantaitaatyeeyani.

## KAMEETHARI ÑAANTSI ROSANKENATAKERI MARCOS

*Ikamantantakeri Juan omitsitsiyaatantneri*  
(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Jiroka okanta opoñaantari Kameethari Ñaantsi kenkithatakotziriri Itomi Pawa, jitchari Jesucristo. <sup>2</sup> Pairani eenitatsi Kamantantneri iita Isaías. Rosankenatakotakeri Pawa ikamantziri Itomi, ikantziri:

Notomí, ari notyaantake etyaawone kenkithatakotemine,  
Iri wetsikaantemine.

<sup>3</sup> Richeraapaake ochempiki, inkantapaake:  
Powameethatainiri Awinkatharite tsika inkenapaake,  
Poshiyakaantero rotampatzikaitziro awotsi.

<sup>4</sup> Ari okantaka, monkaataka ikenkithaitakeri. Ikenkithatake pairani Juan ochempiki, ikenkithatakotakeri omitsitsiyaataantsi, ikantapaake: “Pomitsitsiyaawentaiyaari Awinkatharite, pookairo kaariperori, ari rariperotaimi pikaariperowetakaga.”

<sup>5</sup> Osheki pokashitakeriri Juan, Judea-satzi eejatzi Jerusalén-satzi. Ithawetakotapaakero iyaariperoshirensa, irojatzi romitsitsiyaatantawakariri ñaaki Jordán. <sup>6</sup> Ikithaatari Juan rontyagaitziro iwitzi camello. Romathakitari mashitsimashi. Rowayetari maapataki, ririri iyaa pitsi. <sup>7</sup> Jiroka ikantake Juan ikenkithatzi: “Kaakitake maperotzirori ipinkatharentsitzi, nopinkathatziro naaka. Te onkantaatsikaitya roshiyakaina rimperatanewo noiyotashitanyariri no-zapato-reeri. <sup>8</sup> Iri omitsitsiyaatantairine Tasorenkantsi. Irooma naaka nomitsitsiyaatantashimatsitawo ñaa.”

*Romitsitsiyaata Jesús*  
(Mt. 3.13-17; Lc. 3.21-22)

<sup>9</sup> Ikanta ripokake Jesús ipoñaakawo nampitsiki Nazaret saikatsiri Galilea. Romitsitsiyaatawakeri Juan antawaaki ñaa Jordán. <sup>10</sup> Iro ritonkaantanaiyaarime Jesús, oshiyanakawo ashitaryaanakityeeyaame inkite, iñaawakeri rishaawiinkashitapaakeri Tasorenkantsi ikenapaake jenoki roshiyapaakari shiro. <sup>11</sup> Ikemaitatzi jenoki ikantaitanake: “Osheki nokimoshirewentakemi Notomí, eerokaga netakokitane.”

*Inkaariperotakagaiterime Jesús*  
(Mt. 4.1-11; Lc. 4.1-13)

<sup>12</sup> Ikantakaanakari Jesús Tasorenkantsi, jatanake ochempiki. <sup>13</sup> Ari ikowawetaka Satanás inkaariperotakairime. Tema osheki kiteesheri risaikake itzimira atsikantneri, okaatzi 40 kiteesheri. Irojatzi ripokantapaakari maninkariite ramitakotapaakeri.

*Retanakari Jesús rantayetziri*  
(Mt. 4.12-17; Lc. 4.14-15)

<sup>14</sup> Ikanta ikenanake Jesús Galilea-ki inkamantantero Kameethari Ñaantsi kenkithatakotziriri Pawa tsika ikanta ipinkathariwentantzi. Arira romonkyagaitakeri Juan irirori. <sup>15</sup> Ikantapaake Jesús, ikamantantzi: “Monkaatapaakaga iñagaitanyariri Pawa impinkathariwentante, pinkemisantairo Kameethari Ñaantsi. Pookairo pikaariperowaitzi.”

*Raantaitanakariri tarajaatzinkari ikaatzi 4*  
(Mt. 4.18-22; Lc. 5.1-11)

<sup>16</sup> Okanta otsipa kiteesheri ikenanake Jesús inkaarecheraaki Galilea, iñaapaatziiri jitchari Simón itsipatakari irirentzi Andrés itarajaataiyini. Tema tarajaawairentzi rini.

<sup>17</sup> Ikantapaakeri: “Poyaatena, oshiyaiyaawo iriime atziripaini nontarajaatakagaimiri.”

<sup>18</sup> Royaatanakeri, rookanakero itarajaamento. <sup>19</sup> Iro ranashineentanaka, iñaapaatziiri itomipaini Zebedeo jitachari Jacobo itsipatakari irirentzi Juan, risaiki ipitoki rowamatankawaitzi itarajaamento. <sup>20</sup> Raanakeri eejatzi. Eeniro risaikanake ipaapate itsipatanaari ratzirite.

*Atziri raayiri peyari*  
(Lc. 4.31-37)

<sup>21</sup> Ari rareetaiyakani Jesús nampitsiki Capernaum. Okanta kiteesheri rimakoryaan-taitari, riyotaantapaake ipiyotaitapiintaga. <sup>22</sup> Te imana ishintsinka riyotaantzira, ranaanakeri Yotzinkaripaini, antawoite riyokitziwentaitanakeri. <sup>23</sup> Ari risaikake atziri raayiri peyari, kaimanake irirori, <sup>24</sup> ikantzi: “Jesús, Nazaret-satzi, niyotzimi naaka, eerokatake itasorentsita Pawa. Iro pipokantari jaka pithonkaiyenani.” <sup>25</sup> Ikantanakeri Jesús: “¡Pisantzikote peyari! ¡Piyaatai!” <sup>26</sup> Ikaimanake antawoite atziri, rompetatakaawaitanakeri iweyarite, rookanakeri. <sup>27</sup> Ikantawakaanaka atziripaini: “Pamineri jirika, rowawisaakotziri raayiri peyari.” Riyokitziwentaperoitakeri. <sup>28</sup> Intsipate ikemakoitanakeri Jesús Galilea-ki.

*Retsiyatakotakagairo Jesús riyote Pedro*  
(Mt. 8.14-15; Lc. 4.38-39)

<sup>29</sup> Ikanta rishitowanai Jesús ipiyotaitapiintaga, itsipatanakeri Juan eejatzi Jacobo, ikenaiyanakeni ipankoki Simón, risaikira eejatzi Andrés irirentzi Simón. <sup>30</sup> Iro rareeta-paakityaani, ikantaitawakeri: “Okatsiiwaitatzi riyote Simón.” <sup>31</sup> Ripithokashitanakawo, rotaiyawakotakero, roisaiakakero. Etsiyatanake oyatsiirentsita. Piriintanaka aminanake oita ompawakeriri.

*Retsiyatakotakagairi Jesús mantsiyari*  
(Mt. 8.16-17; Lc. 4.40-41)

<sup>32</sup> Okanta otsireniityaanake, ramaitapaakeniri Jesús osheki mantsiyari, ramaitapaakeniri eejatzi raaganewo peyari. <sup>33</sup> Ipiyotaiwentapaakari pankotsiki. <sup>34</sup> Retsiyatakotakaayetairi maawoini. Te rishinetanairi riñaawaitanai peyari, retsiyatakotakagairira ikaatzi raagayetziri. Tema riyotzi peyari tsika iita Jesús.

*Riyotaantzi Jesús maawoini Galilea-ki*  
(Lc. 4.42-44)

<sup>35</sup> Okanta okiteeshetzimatake, ananinkanake Jesús ramana ochempiki. <sup>36</sup> Ikanta Simón itsipatakari ikaatzi royaataiyirini, rithotyaakotairi. <sup>37</sup> Ikanta iñaapairi, ikantapairi: “Yotaanarí, rithotyaakoitatziimira.” <sup>38</sup> Rakanake irirori ikantzi: “Jame aate, te iro nipokantyaari nisaíke jaka, ontzimatyé niyotaante otsipaki nampitsi.” <sup>39</sup> Ari okantaka, rithonkakero Jesús ranashitawo Galilea, riyotaantake maawoiniki nampitsi ipiyotaitapiintaga, retsiyatakotakaake osheki raaganewo peyari.

*Retsiyatakotakagairi imatane pathaawontsi*  
(Mt. 8.1-4; Lc. 5.12-16)

<sup>40</sup> Ikanta ripokake imatane pathaawontsi, rotziwerowashitapaakari Jesús, ikantapaakeri: “Pikowirika petsiyatakotakagaina, niyotzi tzimatsi pishintsinka petsiyatakotakaantantenari.” <sup>41</sup> Raminanakeri Jesús, retakoshiryaanakari. Riterotantakarirako, ikantanakeri: “¡Nokowi, petsiyatakotai!” <sup>42</sup> Etsiyatakotanake ripathaawaiweta. <sup>43</sup> Ikantawetawaari riyataaira inampiki, <sup>44</sup> ikantziri: “Eero pithawetakotana. Tampatzika powanairo piyaatashiteri Imperatasorentsitaari, pimonkaatairo Inintakaan-takeri pairani Moisés-ni, paanake pinkitewathatantaiyaari, iro riyotantaityaari etsiyatakotaimi.” <sup>45</sup> Ikanta pathaawaiwetachari, ithawetanake nampitsiki tsika ikanta retsiyatakotantaari. Iroowa kaari risaikantanaa Jesús nampitsiki. Jatake ochempiki, ari risaiki. Ari riyatashitziri osheki atziri.

## 2

### *Retsiyatakotakagairi Jesús kisopookiri* (Mt. 9.1-8; Lc. 5.17-26)

<sup>1</sup> Awisake otsipa kiteesheri, eejatzi ripiyaawo Jesús nampitsiki Capernaum. Ike-maiyawaini atziri, ikantaitzi: “Areetaawo Jesús.” <sup>2</sup> Ipiyowentaitawaari, te rimonkaat-apaakawo pankotsi. Riyotaayetapairi maawoini. <sup>3</sup> Eenitatsi atziri ikaatzi <sup>4</sup> pokashitakeriri Jesús inatakotakeri kisopookiri. <sup>4</sup> Te onkantya iñeeri, rotzikaakeri osheki atziri piyotainchari. Rateetashitakeri jenoki pankotsiki, imoontashitakeri ikatziyakaga Jesús, rowayitakotakeri mantsiyari. <sup>5</sup> Ikanta Jesús, riyotakotawakeri rawentaatyaari, riñaanatawakeri mantsiyari, ikantziri: “Notomí, rariperoitaimi pikaariperowetakaga.” <sup>6</sup> Kemaiyawakeni Yotzinkaripaini, ikantashiretanake irirori: <sup>7</sup> “Rithainkakeri Pawa jirika. Tema tekaatsi peyakotanterone kaariperori, apatziro ikantakaawo Pawa ipeyakotantziro.” <sup>8</sup> Riyotake Jesús ikenkithashiryaari, irojatzit rosampitantanakari, ikantziri: “¿Litaka pikenkithashiryaantawori jiroka? <sup>9</sup> ¿Tema inimotemi nonkantereri kisopookiri: ‘Rariperoitaimi pikaariperowetakaga?’ ¿Iro pikowi nonkantereri: ‘Pinkatziye, paanairo pomaryaamento, piyaatai?’ <sup>10</sup> Iroñaaka piñeeri Itomi Atziri osheki ishintsinka, rariperotairi kaariperoshireri.” Ripithokashitanakari kisopookiri, ikantanakeri: <sup>11</sup> “¡Pinkatziye! Paanairo pomaryaamento. Piyaatai.” <sup>12</sup> Katziyanaka mantsiyari, raanairo romaryaantari, shitowanake. Maawoini atziri iñaawairi. Riyokitziwwentanakeri iñaakerira. Ikimoshirewentanakeri Pawa, ikantzi: “Imapero okameethatzi jiroka. Te añaapiintziro oshiyaawone.”

### *Raantanakariri Jesús jitachari Leví* (Mt. 9.9-13; Lc. 5.27-32)

<sup>13</sup> Ikanta rapiitapairo Jesús riyotaapairi atziri inkaarecheraaki. Ari ipiyowentaitawaari eejatzi. <sup>14</sup> Ikanta rithonkanakero riyotaantzi, awisanake. Irojatzit iñaantapaakariri itomi Alfeo jitachari Leví, risaiki rapatotziri koriki. Ikantapaakeri: “¡Poyaatenal!” Katziyanaka, royaatanakeri. \* <sup>15</sup> Ikanta Leví raanakeri Jesús rowakayaari ipankoki. Ari riyaatzitanakari riyotaanewo, itsipatapaakari apatotziriri koriki, itsipatapaakari eejatzi kaariperoshireri. Osheki piyotainchari rowaiyani. <sup>16</sup> Ikanta Fariseo-paini itsipatakari Yotzinkaripaini, rosampitakeri riyotaanewo Jesús, ikantziri: “¿Litaka itsipatantariri iyotaimiri kaariperoshireri, itsipatakari eejatzi apatotziriri koriki?” <sup>17</sup> Ari rakanake Jesús, ikantanake: “Arika imantsiyate atziri ripokashitziri aawintantzinkari, iriima kaari mantsiyatatsine tekaatsi inkowe irirori. Tera iri nipokashite kameethashireri, tema nipokashitatziiri kaariperoshireri nonkaimashireyetairi.”

### *Ikenkithatakotziro Jesús tziwentaantsi* (Mt. 9.14-17; Lc. 5.33-39)

<sup>18</sup> Tzimatsi pokashitakeriri Jesús, rosampitapaakeri ikantziri: “Ritziwentapiinta riyotaanewo Juan, ari ikantaiyani riyotaanewo Fariseo-paini. ¿Litaka kaari ritziwentanta piyotaanewo eeroka?” <sup>19</sup> Rakanakeri Jesús, ikantziri: “Arika intsipataityaari aawakainkari, ¿Arima rowashiretaitakya? Eero rowashiretaita, kimoshire inkantya rowawaitya. <sup>20</sup> Irooma paata, arika ragaitakeri iimentaitari, aripaite ritziwentaitya. <sup>21</sup> Arikame rowamatankaitantyaawo owakerasaperi antyashipawo kithaarentsi, ari isagaaperotanake amithatanakyaarika owakerasaperi. <sup>22</sup> Iro kameethatatsi apiyaatantyaawo eeryaari riraitziri owakerari mashitsinaki. Irooma apiyaatantashitakyaaworika antyashipari mashitsinaki, ari itankakotanake, apitepaini eewanawaitashitakya.”

\* **2:14** Jirika Leví iriitake jitachari eejatzi Mateo.



*Ikenkithatakotziro Jesús kiteesheri rimakoryaantaitari*  
(Mt. 12.1-8; Lc. 6.1-5)

<sup>23</sup> Okanta kiteesheri rimakoryaantaitari, ikenanake Jesús pankirentsimashiki. Ari rowiikitanake riyotaanewo okithoki pankirentsi. <sup>24</sup> Te inimoteri Fariseo-paini, rosampitakeri Jesús, ikantziri: “¿Litaka rowiikitantawori pankirentsi piyotaanewo? ¿Tema riyotzi te ishinetaantsite kiteesheriki rimakoryaantaitari?” <sup>25</sup> Rakanake Jesús ikantzi: “¿Tema piñaanatakotziro ikantakota David itsipatari ikaataiyinira aantawetakariri ritashe? <sup>26</sup> Ikyaake tasorentsipankoki reewaritzira Abiatar, rowakawo owana-wontsi tasorentsitsiri, ipakeri itsipayetakari. Te ishinetaantsiweta, inta rowapi-intawo Imperatasorentsitanewo.” <sup>27</sup> Eekero ikantatzi Jesús: “Iriira atziri kantakaawori riwetsikantaitakawori kiteesheri rimakoryaantaitari. Kaarira kiteesheri rimakoryaantaitari kantakayaawone riwetsikantaitariri atziri. <sup>28</sup> Jirika Itomi Atziri ipinkathariperotzi irirori, ranairo jiroka kiteesheri.”

### 3

*Atziri kisoimpekiri*  
(Mt. 12.9-14; Lc. 6.6-11)

<sup>1</sup> Ikanta ikyaapai Jesús ipiyotaitapiintaga. Ari risaikake atziri kisoimpekiri. <sup>2</sup> Ikowaitatzi ñagaiteri retsiyatakotakagaiteri mantsiyari kiteesheriki rimakoryaantaitari. Aamaako rowaitakeri inkantakoitantaariri. <sup>3</sup> Ikanta Jesús ikaimakeri mantsiyari, ikantziri: “Pipokeeta, posatekya niyanki.” <sup>4</sup> Rosampitakeri piyotainchari, ikantziri: “¿Oitaka shinetaantsitsiri anteri kiteesheriki rimakoryaantaitari? ¿Tema onkantya aneshironkatante, irooma kameethatatsi owamaante? ¿Tema onkantya antero kameethari, irooma kameethatatsi ankaariperowaite?” Tekaatzi akatsine. <sup>5</sup> Raminakeri Jesús piyowentakariri, owatsimaashiretanakeri ñaakerira te ineshironkatante, ikantanakeri mantsiyari: “¡Pampiryaawakotai!” Matanaka, akotsitanai kameetha atziri. <sup>6</sup> Ikanta Fariseo-paini, jatanake ikenkithawaitakairi akiriri Herodes raminakero tsika inkantero ritsitokakaantantaariri Jesús.

*Ipiyotaita inkaarecheraaki*

<sup>7</sup> Ikanta rishitowanake Jesús, ikenanai inkaarecheraaki itsipatanari riyotaanewo. Kisokero rowanakeri Galilea-satzi, Judea-satzi, <sup>8</sup> Jerusalén-satzi, Idumea-satzi, mawoini nampitawori intatsikeronta antawaaki ñaa Jordán. Ikemakotakeri eejatzi Tiro-satzi, Sidón-satzi, ikantaitzi: “Osheki ritasonkawentantake Jesús, roñaagantake osheki kaari ñagaitapiintzi.” Pokaiyanakeni ramineri. <sup>9</sup> Iro ikantantanakariri Jesús riyotaanewo rithotyaaakoteniri pitotsi, eero ranawyaantaitari. <sup>10</sup> Rimatakero Jesús, retsiyatakotakaantake. Otatsinkawirinikyaatanaka mantsiyari ikowi riterotantyaari rako. <sup>11</sup> Ripokayetzi raaganewo peyari, rotziwerowashitari Jesús, antawoite ikaimi, ikantzi: “¡Eeroka Itomi Pawa, niyotzimi naaka!” <sup>12</sup> Eero riyotzitantaitari Jesús, ishintsineentanakeri.

*Rotyaantaperore Jesús ikaatzi 12*  
(Mt. 10.1-4; Lc. 6.12-16)

<sup>13</sup> Ikanta ritonkaanake Jesús ochempiki. Ari ikaimakaanakeri wetsikimotariri. Jataiyakeni ikaatzi ikaimakaanakeri. <sup>14</sup> Ari riyoyaake intsipatapiintyaari ikaatzi 12, iriira rotyaantakeri inkenkithatakaante. <sup>15</sup> Ripasawyaakeri retsiyatakotakaayetairi mantsiyari, eejatzi raagayetziri peyari. <sup>16</sup> Jirika ikaatzi riyoyaakeri: Simón, itakeri Pedro. <sup>17</sup> Eejatzi Jacobo itomi Zebedeo itsipataakeri Juan, irijatzi rowawiiroki Jacobo. Iitakeri “Boanerges”, (akantziri apaanteki aaka: “Otomi ookathawontsi”). <sup>18</sup> Eejatzi Andrés, Felipe, Bartolomé, Mateo, Tomás, Jacobo itomi Alfeo, Tadeo, eejatzi Simón jitachari “Jokaakotantaneri”, <sup>19</sup> eejatzi Judas Iscariote, iri pithokashityaarine paata.

*Kishimatziriri Tasorenkantsi*  
(Mt. 12.22-32; Lc. 11.14-23)

<sup>20</sup> Ikanta rareetawo Jesús pankotsiki. Ari ipiyowentawaari osheki atziri, te inkantaiya riyatapainte rowaiya Jesús. <sup>21</sup> Tzimatsi kantatsiri: “Shinkiwentaka Jesús.” Iro ripokantawetakari isheninkathori, raanairime. <sup>22</sup> Areetapaaka Yotzinkaripaini ipoñaakawo Jerusalén-ki, ikantapaake irirori: “Jirika atziri ripasawyaatziiri ashitariri peyari jitachari ‘Beelzebú’, iro retsiyatakotakaantariri raaganewo peyari.” <sup>23</sup> Ikanta ikemake Jesús, rapatotakeri, roshiyakaawentatziiniri, ikantziri: “¿Tzimatsima peyari kaminaawakaachari eero raagantanta? <sup>24</sup> Arika romanatawakaiya inampiki atziri, ari rookanawentawakaakya. <sup>25</sup> Arika romanatawakaiya ipankoki atziri, ari iñaakero rookanawentawakaakya. <sup>26</sup> Ari ikantari eejatzi peyari arikame romanatawakaiya, ari rookanawentawakaakya, eero iñaaperota, ari rithonkyaari. <sup>27</sup> Atziri ñaaperotachari kameetha, tekaatsi kanterine inkyaashiteri rayiteri oitarika tzimatsiri ipankoki. Irooma arika roosotaitakeri, atake rimataitakeri.

<sup>28</sup> Pinkeme nonkante: Ari rariperotairi Pawa kaariperotatsiri, onkantawetakya inkishimawaiteri. <sup>29</sup> Iriima kishimatziriri Tasorenkantsi, rashi rowatyeero, eero rariperotairi.” <sup>30</sup> Iro ikantantakari Jesús, tema ikantaitatziiri: “Kamaari rini.”

*Iriiro Jesús otsipatakari irirentzipaini*  
(Mt. 12.46-50; Lc. 8.19-21)

<sup>31</sup> Areetapaaka iriuro Jesús otsipatakari irirentzipaini, okaimakaantapaakeri, okatziyapaaka jakakeroki. <sup>32</sup> Ikantawetakari ikaatzi piyowentakariiri: “Ari ipoki piniro otsipatakari pirentzipaini, okowi oñeemi.” <sup>33</sup> Ikantanake Jesús: “¿Litaka pikenkithashiryaari iroowa nonaanate, iriira nirentzitari?” <sup>34</sup> Raminanakeri piyotainchari, ikantzi: “Jirikapaini, iri noshiyakagairi yeeyepaini, irojatzi noshiyakagairi naana. <sup>35</sup> Ikaatzi antanairori ikowiri Pawa, iriira nirentzitari, iro nitsiroitari, irojatzi niniroitari eejatzi.”

## 4

*Ikenkithatakotziri Jesús pankiwairrentzi*  
(Mt. 13.1-23; Lc. 8.4-15)

<sup>1</sup> Ikanta ripiyanaa Jesús inkaarecheraaki, riyotaantapai. Ipiyowentaitawaari. Oetanaka pitotsiki, risaikakotake niyankyeeronkaini, katziyaiyakani atziri ocheraaki ikemisantziri. <sup>2</sup> Okaatzi riyotaayetziriri, roshiyakaawentatziiniri, ikantzi: <sup>3</sup> “Jatake pankiwairrentzi, impankiwaite. <sup>4</sup> Ikanta rookakitakero iwankire, tzimatsi jokakitapainchari awotsiki. Ari rayiitaiyapaakeni owawori. <sup>5</sup> Tzimatsi otsipa jokakitapainchari omapipookitzi. Intsipate ishooakawetanaka. Tekaaatsiperowa kipatsi, <sup>6</sup> sampishitanake pankirentsi ooryaanakera. Tema te onkyaaperote oparitha inthomoiki. <sup>7</sup> Tzimatsi otsipa jokakitapainchari kitocheemashiki, anaanakero iroori ishooakanake. Te okithokitzi. <sup>8</sup> Tzimatsi otsipa jokakitapainchari okameethapathatzira kipatsi, saankana ishooakanake, kithokitanake maawoini. Tzimayetai okithoki apaanipaini okaatzi shookeyetanaintsiri. Apaani shooapaintsiri, eepiyokiini okithokitanake, otsipa shekipiyokitanaintsiri, otsipa shekichonchoitanaintsiri okithoki.” \* <sup>9</sup> Eekero ikan-tanakitzi Jesús: “Kowatsiri inkemathatero, rowayempitatya inkemisante.”

<sup>10</sup> Ari riyataiyanaini maawoini atziri, apa risaikanaí Jesús itsipatanaari oyaatapi-intziriri, eejatzi riyotaanewo ikaatzi 12. Ari rosampitakeri Jesús, ikantziri: “¿Tsika okantakotaka okaatzi poshiyakaawentakari inkaaganki?” <sup>11</sup> Rakanakeri Jesús, ikantzi: “Iroñaaka nonkamantemiro kaari piyotakoweta, ari piyotairo jimpe ikanta Pawa

\* 4:8 Kantakotachari jaka “eepiyokiini okithokitanake, otsipa shekipiyokitanaintsiri, otsipa shekichonchoitanaintsiri okithoki”, aamaakawo okaatzi 30 okithoki, otsipa okaatzi 60 okithoki, otsipa okaatzi 100 okithoki.

ipinkathariwentantzi. Iriima itsipapaini, eero nokamantzitari, apa noshiyakaawenteni, <sup>12</sup> eero riyotakotantawo ikemawetari. Onkantawetya inkemisante, eero ikemathatziro, eero rowakerashiretai irirori, tema eero rariperoitairi.” <sup>13</sup> Ikanta Jesús rosampitakeri, ikantziri: “¿Tema piyotawakero noshiyakaawentakeri? Arika napi-itakemiro noshiyakaawentemiro, ¿tsika onkantyaaka piyotantyaawori? <sup>14</sup> Jirika atziri jokakitakerori iwankire, iri roshiyakaawentaitzi kenkithatakotzirori riñaane Pawa. <sup>15</sup> Eenitatsi kemawetawori ñaantsi, ripokapaake Satanás, imaisantakaapaakeri. Iri oshiyakaawentakeri jokakitapainchari awotsiki. <sup>16</sup> Eenitatsi kemawetawori ñaantsi, intsi-paite ikemisantaweta. Roshiyakotakawo jokakitapainchari omapipookitzira, intsi-paite ishookawetanaka. <sup>17</sup> Tera riyoperotatyeeero ñaantsi, te inkisashityaawo rowasanke-taitziri ikemisantawetawowa ñaantsi, rowashaantanakero. Roshiyakawo pankirentsi sampishitanaintsiri, te onkyaaperote oparitha inthomoiki kipatsiki. <sup>18</sup> Eenitatsi itsipa kemawetawori ñaantsi, oshiyakaawentakeri jokakitapainchari kitocheemashiki. <sup>19</sup> Okantakaantziro ramatawiwaita apaniroini, ikenkithashiryakotawo rashaagantya, iro ikowaperotake ontzimimotairi maawoini. Awisanakero ñaantsi ikemawetakari, roshiyakawo pankirentsi kaari kithokitatsine. <sup>20</sup> Eenitatsi kemawakerori ñaantsi, oshiyakaawentakeri jokakitapainchari okameethapathatziro kipatsi. Ikemisantanai, roshiyakawo apaani shookapaintsiri, tzimanaintsiri eepiyokiini okithoki, otsipa shekipiyokineentanaintsiri, otsipa shekichonchoitanaintsiri okithoki.” †

*Onkoñaatakoyetai manakowetainchari*  
(Lc. 8.16-18)

<sup>21</sup> Ari ikantanake eejatzi: “Ankowerika oorentakotya, ¿arima ashitakotakeri oorentamento? ¿Owakotzirima otapinaki? Tera. Akowatzi onkoñaate maawoini onkene aminawaite. <sup>22</sup> Ari onkantaiya eejatzi, onkoñaatakoyetai manakowetainchari, ooñaawontairo kaari ikemathaitzi pairani. <sup>23</sup> Kowirori ikemathatairo, inkemisante.” <sup>24</sup> Ikantanakeri eejatzi: “Paamagaiyaawo okaatzi pikemakeri. Otzimikari pantzimotantane, rimaperoitaimikari paata eeroka. ‡ <sup>25</sup> Ikaatzi oshekitzimotziri oitarika, eekerowa oshekitzimotzyeeri. Iriima kaari oshekitzimotzi oitarika, eekerowa riyaatatye eero oshekitzimotziri.” §

*Roshiyakaawentziri Jesús rishooki pankirentsi*

<sup>26</sup> Ikantanake eejatzi Jesús: “Arika impinkathariwentantai Pawa, roshiyari pankiwairrentzi, <sup>27</sup> rimayi tsireniriki, inkakitamanai. Te riyote tsika okanta rishookantari iwankire. <sup>28</sup> Apaniroini rishooki, riyothowatanake oryaani oshi, ripowainkaryaanake, patanake. <sup>29</sup> Arika risampatake, monkaataka rowiitaiteri.”

*Roshiyakaawentaitziro okithokyaaniki incható*  
(Mt. 13.31-32; Lc. 13.18-19)

<sup>30</sup> Ikantanake eejatzi Jesús: “¿Iitaka oshiyari ipinkathariwentantai Pawa? ¿Iitaka noshiyakaawentemiri? <sup>31</sup> Oshiyatyaawo arika ampankitero okithokyaaniki pankirentsi. Onkantawetya oryaaniinitzi, \* <sup>32</sup> arika ampankitakero, ishookanake, anaanakero otsipa pankirentsi, antawotewatanake, ari imenkoshityaari tsimeryaani itsimankatapishitzira.”

*¿Iitaka roshiyakaawentantawori Jesús ikenkithatziro?*  
(Mt. 13.34-35)

† 4:20 Paminero kantakotachari versículo 4.8. ‡ 4:24 Okaatzi kenkithatakotachari jaka, jiroka okantakota: Eepichokiinirika pinkemisantawakena, eepichokiini piyotairo. Irooma pinkemisantawakerika osheki, oshekira piyotawake, eekero niyotakaaperotatyemiro. § 4:25 Jiroka okantakotziri okaatzi ikenkithakotziri jaka: Ikaatzi yotawakerone niyotaakeriri, eekero niyotaaperotatyeeeri. Iriima kaari kemisantawakerone niyotaawetariri, rimaperotaiya eero riyotairo. \* 4:31 Iro ikantakoitzi jaka “okithokyaaniki pankirentsi”, jitachari mostaza, shookatsiri inampiki itsipa atziri.

<sup>33</sup> Rashi rowapiintziro Jesús roshiyakaawentziniri atziri okaatzi riyotairiri. Eepichokiinirika inkemathatawakero atziri, eepichokiini riyotairi. Inkemathaterorika, osheki riyotairi. <sup>34</sup> Ikaatzi ikenkithatakairi Jesús roshiyakaawentatziiniri, te rooñaawontziniri. Iriima riyotaanewo, ikemathatakairi irirori.

*Romairiuro Jesús tampyaa*

(Mt. 8.23-27; Lc. 8.22-25)

<sup>35</sup> Okanta otsireniityaanake, ikantanairi riyotaanewo: “Jame amontyagai intatsikeronta.” <sup>36</sup> Irojatzri riyaatantanaari maawoini piyowentariri. Risaikitaka ketziroini irirori pitotsiki, montyaakotaiyanaani. Tzimatsi oyaatanakeriri ikenakotanake otsipaki pitotsi. <sup>37</sup> Ari omapokakeri antawo tampyaa, otamakaanake antawoite, okitaaganakero pitotsi, irootaintsi ritsitsiyakoteme. <sup>38</sup> Ikaakaitanakeri rimayira opataki pitotsi, rotziitotaka, ikantaitziri: “Yotaanarí ¡Atsitsiyakotatyé!” <sup>39</sup> Piriintanaka Jesús, riñaanatanakero tampyaa, ikantziri: “¡Ataama pitampyaatake!” Ikantzitanakawo inkaare: “¡Pimairyaaate!” Awisanake otampyaatzi, mairyaaatanai inkaare. <sup>40</sup> Ikantziri riyotaanewo: “¿Litaka pithaawantari? ¿Tema pawentaari Pawa?” <sup>41</sup> Osheki ipinkathatanakeri, ikantawakagaiyani ithaawankakiini: “¿Tsikama iitaka jirika romairyaaatantawori tampyaa, romairyaaatzitawo eejatzi inkaare?”

## 5

*Gadara-satzi raayiri peyari*

(Mt. 8.28-34; Lc. 8.26-39)

<sup>1</sup> Rareetaka Jesús intatsikero inkaare, inampiki Gadara-satzi. <sup>2</sup> Iro raatakotapaakitziini, rishiyashitawakari raayiri peyari ipoñaakawo kitataarewoki, <sup>3</sup> ari risaikawaitzi irirori. Te raawyaitziri roosotantaitari kotsirotha. <sup>4</sup> Itzimpeshiro roosotantaitari iitziki eejatzi rakoki. Tekaatsi otsinampairine. <sup>5</sup> Rashi rowiro kiteesheriki eejatzi tsireniriki, ikenayetzi ochempiki, kitataarewoki, ikaimawaitzi, itowaitakeri mapisheta. <sup>6</sup> Ikanta iñaawakeri ripokake Jesús, rishiyashitawakari, rotziwerowashitawakari. <sup>7</sup> Antawoite ikaimapaake, ikantzi: “¡Jesús, Itomi Pawapero, te nokowi powashironkaina! ¿Tsikama pinkantenaka?” <sup>8</sup> Tema rotyaantapaakitziiri Jesús, ikantapaakeri: “¡Peyari, piyaate!” <sup>9</sup> Ari rosampitanakeri: “¿Tsika piitaka?” Ari rakanake peyari, ikantzi: “Noita ‘Shekiyantzi’, osheki nokantaiyani.” \* <sup>10</sup> Eekero ikantanakitzi peyari: “Te nokowi potyaantena otsipaki nampitsi.” <sup>11</sup> Ari ipiyotaka tyonkaarikiini osheki chancho roshimotokawaitaiyini. <sup>12</sup> Ikantaiyini peyari: “Potyaantena chanchoki.” <sup>13</sup> Ikantanakeri Jesús: “Pimatero piyaate.” Shiyanaka chancho impeetaki, mitapaake inkaareki, thonkaka ripiinkake. Ikaatzi 2000 chancho.

<sup>14</sup> Thaawaiyanakeni kempoyiiriri chancho, shiyanaka, thawetapaake nampitsiki, ikamantanakeri maawoini saikatsiri rowaneki. Pokanake maawoini raminero awisaintsiri. <sup>15</sup> Riyaatashitaitanakeri Jesús, iñagaitapaatziiri raaganewo peyari. Risaikake, ikithaataawo, kameetha ikantanaa. Ithaawantapaakari iñagaitapaakerira. <sup>16</sup> Ikaatzi ñaakeriri inkaaganki ikamantawakeri pokayetaintsiri, ikantziri: “Pamineri jirika, iriira Jesús etsiyatakotakagairiri. Rowiinkake osheki chancho.” <sup>17</sup> Ikantaitanakeri Jesús: “Piyaatai, te nokowi pisaikimotena.” <sup>18</sup> Irojatzri rotetantanaari Jesús pitotsiki. Ikantawetawaari retsiyatakotakaanewo: “Nokowi paanaina naaka.” <sup>19</sup> Rakanake Jesús, ikantziri: “Eero nayimi, piyaatai pisheninkaki. Pinkamantapairi pinkanteri: ‘Ineshironkataana Pinkathari, retsiyatakotakagaana.’ ” <sup>20</sup> Ikanta raagawetari peyari, jatai inampiki jitachari Decápolis, ikamantapairi maawoini atziri, ikantapairi: “Retsiyatakotakagaana Jesús.” Riyokitziwentaitakeri ikemaitzirira ikamantantzi.

\* 5:9 Kantakotachari jaka “Shekiyantzi”, irijatzira iitaitziri “Legión”. Piñaanatero isaawiki tsika rooñaawontaitziro osankenata janta: Mt. 26.53.

*Rishinto Jairo eejatzi tsinane terotziteriri iithaare Jesús*  
(Mt. 9.18-26; Lc. 8.40-56)

<sup>21</sup> Ikanta ripiyaawo Jesús ipoñagaawo intatsikero. Ipiyowentawaari osheki atziri inkaarecheraaki. <sup>22</sup> Ari rareetapaaka jitachari Jairo jewatatsiri ipiyotaitapiintaga. Iñaapaakerira Jesús, rotziwerowashitapaakari, <sup>23</sup> ikantapaakeri: “Onkamatye nishintyo. Nokowi piyaate piterotantaiyaawo pako, etsiyatakotaita.” <sup>24</sup> Irojatziri riyaatantanaka Jesús, ari royaatanakeri osheki atziri, ranawiimatanakeri.

<sup>25</sup> Okanta tsinane osokaawaitachari, tzimakotake 12 osarentsi omantsiyawaitake, <sup>26</sup> osheki raawintaweetakawo, ithonkakeri owaagawo ipinawentawo. Aminaashiwaitaka, eekero iyaatatzi omantsiyatzi. <sup>27</sup> Okemake iroori ikenkithatakoitziri Jesús, ikantaitzi: “Etsiyatakotakaantaneri rinatzi Jesús.” Osatekantanakari atziri okenashitanakeri itaapiiki, iterotziteriri iithaare. <sup>28</sup> Okantashiretanake iroori: “Arika niterotziteriri iithaare, ari netsiyatakotai.” <sup>29</sup> Apathakerotanaka etsiyatakotanake osokaawaitaga. <sup>30</sup> Riyotzitanaka Jesús eenitatsi etsiyatakotakaantanakeri ishintsinka, rosampitanakeri oyaayetakeriri, ikantziri: “¿Litaka terotziteriri noithaare?” <sup>31</sup> Rakanakeri riyotaanewo, ikantziri: “¿Tema piñiiri ranawiimatakemira atziri? Eekero pikantaitzi: ‘¿Litaka terotziteriri noithaare?’ ” <sup>32</sup> Eekero raminanakitzi Jesús, iñaantyaariri terotziteriri iithaare. <sup>33</sup> Okanta tsinaneka othaawantanakari Jesús, ompetawaitanaka. Tema iro retsiyatakotakaake. Iyaatashitanakeri, otziwerowashitapaakari, othawetakotapaaka. <sup>34</sup> Ikantanakero irirori: “Nishintó, etsiyatakotakagaimi pawentaane, kimoshire pinkantanaiya piyaatai, tema etsiyatakotaimi.”

<sup>35</sup> Tekera inkaateroota Jesús riñaanatziro, ritonkyotawakari poñagainchari ipankoki Jairo. Ikantapaakeri: “Kamakera pishinto. Eero poñaashirenkiri iyotaantaneri” <sup>36</sup> Ikanta ikemawakera Jesús ikantaitapaakeri, ikantanakeri Jairo: “Eero powashireta, pinkimoshirewentena naaka.” <sup>37</sup> Tekaatzi inkowe oyaaterine. Apatziro raanakeri Pedro, Jacobo, Juan irirentzi Jacobo. <sup>38</sup> Ikanta riyataake, areetaka ipankoki Jairo. Iñaapaakitziiri rakisheenkatake atziri riraakoiyawoni kaminkawo. <sup>39</sup> Kyaapaake Jesús, ikantapaakeri: “¿Litaka piraantaiyarini? Te okami, imakoryaatzi.” <sup>40</sup> Thainkashire rowaitakeri Jesús. Romishitowapaakeri maawoini. Apatziro risaikanake ashitawori, eejatzi riyotaanewo. Ikyashitanakero romaryagaitakerowa eentsi. <sup>41</sup> Rotaiyawakotapaakero, riñaanataapaakero, ikantziri: “¡Talita cumi!” (akantziri apaanteki aaka: “Eentsi, pimpiriinte.”) † <sup>42</sup> Piriintanaawo eentsi, anashitanaawo. Tema tzimake 12 osarentsite, irootake anashiwaitantanaari. Riyokitziwentanakero ikaatzi ñaakerori. <sup>43</sup> Ikantziri Jesús: “Pimpero owanawo.” Ikantanake eejatzi: “Te nokowi pinkamanteri atziripaini.”

## 6

*Ripiyaawo Jesús Nazaret-ki*  
(Mt. 13.53-58; Lc. 4.16-30)

<sup>1</sup> Ikanta ripiyaawo Jesús inampiki, royaatairi maawoini riyotaanewo. <sup>2</sup> Okanta kiteesheri rimakoryaantaitari, riyotaantake Jesús ipiyotaitapiintaga. Riyokitziwentaitakeri. Ikantaitzi ikemaitzirira: “¿Tsika ipookamatsitawoka riyomatsitantari? ¿Litaka yotaakeriri rantantawori kaari iñaapiintaitzi? <sup>3</sup> ¿Kaarima jirika kisaatapiintzirori in-chakota? ¿Kaarima otomi María? ¿Kaari irirentzipaini Jacobo, José, Judas eejatzi Simón? ¿Kaarima iritsiro tsipatakairi anampiki?” Ari opoñaawo kaari ikemisantantaitari Jesús. \* <sup>4</sup> Ikantanake Jesús: “Rashi rowiro Kamantantaneri ikemisantaitziri otsipaki nampitsi, te ikemisantaitziri inampiki irirori risaikira isheninkapaini.” <sup>5</sup> Iro kaari okantanta rooñaawontero Jesús ishintsinka inampiki. Te ishenitzi mantsiyari retsiyatakotakairi

† 5:41 Iro riñaawaitakeri Jesús, tema Aram-thato riñaanetari.

\* 6:3 Jacobo, iriira iitaitziri eejatzi Santiago.



riterotantyaari rako. <sup>6</sup> Antawo rowashiretakotakari kisoshirewaitatsiri, kaari kowat-sine inkemisante. Iroowa riyaaantanakari riyotaantzi otsipaki nampitsi tzimayetatsiri janta.

*Rotyaantziri riyotaanewo*

*(Mt. 10.5-15; Lc. 9.1-6)*

<sup>7</sup> Ikanta Jesús ipiyotakeri riyotaanewo ikaatzi 12. Ripasawyaakeri ishintsinka, raawyaantyaariri irirori peyari. Rotyaantakeri, intsipatawakaanakya apitepaini. <sup>8</sup> Ikantakeri: “Eerowa paanake pithaate, powanawo, piyorikite, apatziro paanake pikotzi. <sup>9</sup> Eero paanake otsipa piithaare. Apatziro pizapato-tetanakya.” <sup>10</sup> Ikantawakeri eejatzi: “Pareetakyaarika pankotsiki arira pimaapiinte, irojatzi pawisantanakyaari otsipaki nampitsi. <sup>11</sup> Eerorika raapatziyaitawakemi, eerorika ikemisantaitzimi, pawisapithateri. Potekanairo piipatsite piitziki, iro riyotantaityaari te ikemisantaitziri Pawa. Iri rimaperoite rowasanketaiteri paata, anaanakero rowasanketaiteri pairani Sodoma-satzi eejatzi Gomorra-satzi. Imaperotatya.” <sup>12</sup> Ikanta riyaaananake riyotaanewo Jesús ikantakeri atziripaini rookairo ikaariperowaitzi. <sup>13</sup> Retsiyatakotakaake raayiri peyari, retsiyatakotakaake osheki mantsiyari ritziritantari oyeenka pankirentsi.

*Ikamantakari Juan omitsitsiyaatantaneri*

*(Mt. 14.1-12; Lc. 9.7-9)*

<sup>14</sup> Areetakotakari pinkathari Herodes okaatzi rantakeri Jesús. Ikantaitzi: “Añagai Juan omitsitsiyaatantaneri. Piñeeri otzimi ishintsinka.” <sup>15</sup> Tzimatsi itsipa kantaintsiri: “Elías rini.” Ikantaitzi eejatzi: “Aamaaka iri itsipa Kamantantaneri.” <sup>16</sup> Ikemake Herodes ikantaitakeri, ikantanake irirori: “Iri añagaatsiri Juan nithatzinkakaantakeri.” <sup>17</sup> Ipoñaantari ketziroini Herodes romonkyaakaantziri Juan, okantakaantziri Herodías, iinantaawetari Felipe irirentzi Herodes. Iroowa iinantaari irirori Herodes. <sup>18</sup> Tema ikaminaawetatyaaari Juan, ikantziri Herodes: “Te onkameethate payiteri iina pirentzi.” <sup>19</sup> Iro opoñaantari okisaneentziri Herodías, okowake owamaakaanteri. <sup>20</sup> Iro romonkyaantakariri ketziroini Herodes. Iri kantacha Herodes antawoite ipinkathatakeri Juan, riyotzi kameethashire rinatzi, kiteshire ikanta. Te rishinewetari rowamagaiteri. Okaatzi ikaminaawetariri, ikompitzimotakari Herodes. Ari reshiwentawetawo ikemisantziri. <sup>21</sup> Okanta otsipa kiteesheri, roimoshirenkawentawo Herodes itziman-takari pairani. Ripokaiyakeni iwinkatharentsite, ripokake reeware owayeripaini Roma-satzi, ripokake Itzinkamipaini Galilea-satzi. Rowaiyakani. <sup>22</sup> Ari okyaapaake ish-into Herodías rowaiyanira, omampayimotapaakari, okameethatzimotanakeri Herodes omampaane, okameethatzimotanakeri eejatzi itsipatakari rowaiyani. Ikantanakero Herodes: “Ari nompakemi oitarika pinkowakotenari. <sup>23</sup> Eero namatawitzimi, riyotzi Pawa imaperotatya nokantzi. Iroorika pinkoweri nopinkathariwentziri, ari nompakemi niyanki.” <sup>24</sup> Iyaatashitanakero iniro, okantapaakero: “¿Oitaka nonkowakoteriri?” Okantanakero onaanate: “Pinkowakoteri iito Juan omitsitsiyaatantaneri.” <sup>25</sup> Ipiyapaaka mainawo, okantapaakeri: “Nokowi pimpenawo iito Juan, powakenawo pachakashetaki.” <sup>26</sup> Antawoite rowashiretanaka pinkathari. Tema maawoini ikemaitakeri inkaaganki ikantakerowa mainawo, tekaatsi inkenakaanairo, ontzimatye impero okowakeri. <sup>27</sup> Rotyaantake owayeri ramakeniri iito Juan. <sup>28</sup> Jatanake owayeri romonkyagaitakerira Juan, rithatzinkapaakeri, ramakotakero iito pachakashetakiki. Ipakoitapaakero mainawo, aanakeniro iniro. <sup>29</sup> Ikanta ikemaiyakeni riyotaanewo Juan-ni, pokaiyakeni, ikitatairi.

*Rowakaari Jesús 5000 shirampari*

*(Mt. 14.13-21; Lc. 9.10-17; Jn. 6.1-14)*

<sup>30</sup> Piyaawo rotyaantanewo Jesús, piyotaiyapaani maawoini risaikira, ikamantapairi okaatzi rantayetakeri. <sup>31</sup> Eekero ripokatzi atziri, piyayetacha itsipa. Te onkantaiya

rowaiya Jesús. Iro ikantantariri riyotaanewo: “Jame aate ochempiki, amakoryaawa-keeta eepichokiini.” <sup>32</sup> Otetanaka pitotsiki, jatanake. <sup>33</sup> Iri kantacha, osheki aminakotawakeriri riyataanakera, riyotawakeri. Shiyaiyanakani ikenanake awotsiki, ipoñaanakawo nampitsiki. Iri etakawo rareetaka, piyotaiyapaakani. <sup>34</sup> Ikanta rareeta-paaka Jesús, iñaapaatziiri ipiyotaiyani. Retakotapaakari. Roshiyakari oweja eerorika itzimi kempoyiiriri. Riyotaapairi eejatzi. <sup>35</sup> Ari otsireniityaanake, ripokashitapaakeri riyotaanewo, ikantapaakeri: “Yotaanarí, asaikatziira ochempiki. <sup>36</sup> Pipakairo piy-otaantzi, riyataita atziripaini nampitsiki ramanante royaari.” <sup>37</sup> Ikantanakeri Jesús: “Pimperí eeroka royaari.” Ikantzi riyotaanewo: “¿Pikowatziima niyaate namanantakite nowakayaariri? Osheki owanawontsi, eero rimonkaata koriki nowakaantyaariri maawoini, osheki ipinatyaari.” † <sup>38</sup> Ikantanake Jesús: “¿Tsika okaatzika pan ramakeri atziripaini? Piyaate paminakitero.” Jatanake raminakitziro, ikantzi: “Eenitatsi okaatzika 5 pan, apite shima.” <sup>39</sup> Ikantzi Jesús: “Poisakeri maawoini atziri onatsiryaapankaatakera kishipeenkashi, pinashiyetyaari poisakeri.” <sup>40</sup> Rimatakero. Eenitatsi inashitainchari risaikayetake ikaatzika 100 atziri, eejatzi ikaatzitaka itsipa 50 atziri. Ari ikantakeri roisakakeri maawoini. <sup>41</sup> Ikanta raakotakero Jesús 5 pan itsipataakero apite shima, aminanake jenoki inkiteki, riwetharyaanakari Ashitariri. Itzipetowakero pan, ipakeri riyotaanewo, rowawisaakeniri itsipa atziripaini. Eejatzi ikantakeri shima, rantetakari maawoini. <sup>42</sup> Rowaiyakani maawoini, kemaneentaiyakani. <sup>43</sup> Yeekiyetai kantziriki okaatzika 12 rowagaantakari. <sup>44</sup> Ikaatzika ishekitzi 5000 shiramparipaini owainchari.

*Ranashaatantawo Jesús inkaare*  
(Mt. 14.22-27; Jn. 6.15-21)

<sup>45</sup> Ikantanairi Jesús riyotaanewo: “Petaiyaawo pimontyagai nampitsikinta Betsaida.” Ikantanakeri piyowentakariri: “Piyaataira pipankoki.” <sup>46</sup> Ikanta riyaaayetai maawoini atziri, tonkaanake Jesús ochempiki ramana. <sup>47</sup> Tsirenitanake, riweyaakotaka riyotaanewo niyankyaaki inkaare rimontyaakotaiyaani. Apaniroini risaikanake Jesús ochempiki, <sup>48</sup> raminakotakeri riyotaanewo, shintsiini rikomataiyini oipiyakotakeri tampyaa. Okanta okiteeshetzimatake, riyataashitairi, ranashaatantanaawo inkaare, ikenashitapairi itaapiiki, oshiyakawo rawisanakityeerime. <sup>49</sup> Irojatzika iñaantaitawaari, roshiyakaatziiri iri shiretsi, kaimaiyanakeni, <sup>50</sup> maawoini rominthaawakeri iñaawairira. Ikantapaakeri Jesús: “Naaka pokaatsi, eero pithaawashita, tontashire pinkantya.” <sup>51</sup> Otetapaawo pitotsiki, awisainkatanake tampyaa. Riyokitziiwentanakeri. <sup>52</sup> Tema tekerera riyotakotziroota roshekyaanakawori Jesús pan, okantakaakari ikisoshirewaitzi.

*Retsiyatakotakaantzi Jesús Genesaret-ki*  
(Mt. 14.34-36)

<sup>53</sup> Irojatzika rareetantakari inampiki Genesaret-satzi. <sup>54</sup> Iro raatakotapaakitziini, riyoitawakeri Jesús. <sup>55</sup> Ikamantawakaiyanakani nampitawori janta, ramakotakeri mantsiyari romaryamentoki. Tsikarika risaiki Jesús, ari ramakoitziniri mantsiyari. <sup>56</sup> Ari ikantzitaariri ikenayetziira oryaaniki nampitsi, nampitsi antawo, eejatzi owaantsiki, rowakoitziniri mantsiyari awotsiki, ikantaitziri: “Pishinetya riterotawakero pithaare.” Maawoini terotzitaakeriri iithaare etsiyatakoyetai.

## 7

*Owaariperoshiretziriri atziri*  
(Mt. 15.1-20)

<sup>1</sup> Ikanta ripokaiyakeni Fariseo itsipatakari Yotzinkaripaini, ipoñakawo Jerusalén-ki. Ipiyowentakari Jesús. <sup>2</sup> Ari iñaapaakeri riyotaanewo Jesús te rantero rametapiintari

† 6:37 Kantakotachari jaka “osheki ipinatyaari” irojatzika ikantaitziri inkaaterika 200 denario.

ikiwaakota arika roya. Ikishimatapaakeri. <sup>3</sup> Okaatzi rantapiintziri Fariseo-paini, eerorika ikiwaakota, eero rowaa. Iro rametari pairani icharine: Arika roya ontzimatyeki ikiwaakotawakya, inkitewathatantyaari. <sup>4</sup> Arika rareetaiya ramanantawaitzira, tekerera rowapaiyaata, ikiwaakoperotapaiya. Te apatziro rametawo jiroka, ikiwayetziro eejatzi riramento, rowamento, ronkotsimento, rimaamento, maawoini. <sup>5</sup> Iroowa rosampitantakariri Jesús, ikantziri: “¿Oitaka ipeyakotantakawori piyotaanewo riyotagairi pairani acharine? Noñaapaakeri rowaiyani, te ikiwaakota.” <sup>6</sup> Rakanakeri Jesús, ikantziri: “Owapeyimotantaneri pinaiyini. Eeroka ikenkithatakotake pairani Isaías, rosankenatake, ikantzi:

Ipaanteki ipinkathawaitakena atziripaini.

Temaita inkenkithashiryaaakotaina ishireki.

<sup>7</sup> Raminaashiwaita rotziwerowa ipinkathawetana,

Riyotaantashitawo rameyetari irirori.

<sup>8</sup> Pipeyakotakero eeroka Inintakaantanewo Pawa, pantashitakawo rametari acharineni. Pikiwayetziro powamento, piramento. Osheki okaatzi pantashitakari.”

<sup>9</sup> Ikantanakeri eejatzi: “Iroowa pantaperotakeri pameyetari, pithainkanakero Inintakaantanewo Pawa. <sup>10</sup> Jiroka rosankenare Moisés-ni, ikantzi:

Pimpinkathateri ashitzimiri.

Ikantzi eejatzi:

Ontzimatyeki rowamagaiteri kishimawaitziriri ipaapate.

<sup>11</sup> Iro kantacha pikantapiintzi eeroka: ‘Ankashaakairirika ayorikite Pawa, ontzimatyeki amperi. Onkantawetakya añeeri rashironkaawaitya apaapate.’ <sup>12</sup> Ari pikantakari eeroka, piyotaashitakari atziripaini rithainkantzi, te retakotari ipaapate. <sup>13</sup> Pantashitakawo rameyetari pairani picharine, iroowa pithainkantakawori riñaane Pawa. Ari pikantapiintatya pantziro oshiyawori jiroka.”

<sup>14</sup> Ikaimakeri Jesús maawoini piyotainchari, ikantziri: “Pinkemisantaiyeni maawoini, pinkemathatantyaawori nonkantemiri. <sup>15</sup> Okaatzi rowaitari, te owaariperotziro ashire. Iroowa okaatzi omishitowiri inthomoiki, iroowa owaariperotzirori ashire. <sup>16</sup> Powayempitatyaawo jiroka.” <sup>17</sup> Ikanta riyaataiyaini atziri, kyaapai Jesús pankotsiki. Ari rosampitakeri riyotaanewo, ikantziri: “¿Oitaka poshiyakaawentakeri?” <sup>18</sup> Rakanake Jesús, ikantzi: “¿Tema pikemathatawakero eeroka? ¿Te piyote eeroka te owaariperotero ashire okaatzi rowaitari? <sup>19</sup> Tekaatsi onkantero ashire, apatziro okeniro asheetoki, irojatzi ishitowantaiyaari.” Iroowa riyotaantakeri Jesús, tema te owaariperotantzi okaatzi rowaitari. <sup>20</sup> Ikantanake eejatzi: “Arika antakayeri asheninka kaariperori, iroowa owaariperotzirori ashire. <sup>21</sup> Tema ashireki opoñaawo jiroka: kaariperori kenkithashiryagaantsi, kaari kinataantsi, mayempitaantsi, tsitokaantsi, <sup>22</sup> koshitaantsi, shampitsitaantsi, kaariperoshiretaantsi, amatawitaantsi, mayempikyaataantsi, samakoneentaantsi, kishimataantsi, asagaawentaantsi, tzimaityaashiwaitaantsi. <sup>23</sup> Okaatzi ikenkithashiretapiintari atziri kaariperori inatzi, iroowa rowaariperotantawori ishire. Tema ishireki opoñaawo jirokapaini.”

### *Awentaari Pawa Sirofenicia-sato*

*(Mt. 15.21-28)*

<sup>24</sup> Ikanta ikenanake Jesús nampitsiki jitachari Tiro, irojatzi Sidón-ki. Ari risaikapaake pankotsiki, te ikowaweta inkemakoiteri. Temaita rimanakota. <sup>25</sup> Eenitatsi janta tsinane raayiri peyari ishinto. Okemakotawakeri iroori Jesús, ipokashitakeri, otziwerowashitapaakari. <sup>26</sup> Jiroka tsinane kaari Judá-ite, opoñaawo iroori otsipaki nampitsi oita Sirofenicia. Okantapaakeri: “Jesús, petsiyatakotakagainawo nishintyo, raagatziiro peyari.” <sup>27</sup> Rakanakero irirori: “Paata tsinané. Ikantaitzi pairani: Te raapithaitziri eentsi rowanawo impaiteri otsitzi royaawo, apatziro rowawo eentsi irojatzi inkemantakya.”

\* <sup>28</sup> Akanakeri tsinane, okantziri: “Imaperotatya pinkatharí pikantakeri. Iro kantzi-maitacha ikatziyapiinta irirori otsitzi jantyaatsikaini, rowayetawo rookagaantayetzi eenchaaniki.” <sup>29</sup> Ikantzi Jesús: “Imaperotatya pikantakeri. Piyaatai, ari piñaapairo pishinto etsiyatakotai iroori.” <sup>30</sup> Okanta iyaatai tsinane opankoki, oñaapairo ishinto omaryaa imaamentoki, etsiyatakotai.

### *Retsiyatakotakagairi Jesús witakempitari*

<sup>31</sup> Ari rawisanake Jesús risaikawetapaakaga nampitsiki Tiro, ikenanairo Sidón-ki, Decápolis-ki irojatzí rareetantaawo Galilea-ki. <sup>32</sup> Ramaitakeniri witakempitari, masontziwaanteri rini eejatzi. Ikantaitapaakeri: “Jesús, piterotantawakyaari pako.” <sup>33</sup> Raanakeri Jesús jantyaatsikaini, rosagaantantakari rako ikempitaki, ritziritantakari ishimore ineneki. <sup>34</sup> Aminanake jenoki inkiteki, rowiñeenkatanaka rañaanake Jesús, ikantzi: “¡Efata!” (Akantziri apaanteki aaka: “Piwitaryagaiya.”) <sup>35</sup> Irojatzí iwitaryaantanakari ikempita, te imasontziwaan tetanai eejatzi, wetsikanaawo riñaawaitanai kameetha. <sup>36</sup> Ikantawetakari Jesús: “Eerowa pithawetakotana.” Te ikemisantzimaitari, thawetanake atziripainiki. <sup>37</sup> Riyokitziwentaitanakeri Jesús, ikantaiyini: “¿Oitaka okameethatantari rantziri jirika? Ikemakagairi witakempitari, riñaawaitakagairi eejatzi.”

## 8

### *Rowakaari Jesús atziripaini ikaatzi 4000* (Mt. 15.32-39)

<sup>1</sup> Ikanta ipiyotaiyani osheki atziri, thonkapaaka rowanawo. Ikaimakeri Jesús riyotaanewo ikantziri: <sup>2</sup> “Antawoite netakoshiretakari atziripaini. Itsipatakana okaatzi mawa kiteesheri, thonkapaaka rowanawo. <sup>3</sup> Arika notyaantairi, ari aakeri ritashe awotsiki, tema tzimayetatsi poñagainchari intaina.” <sup>4</sup> Rakanake riyotaanewo, ikantanakeri: “Ochempikira asaiki ¿tsika ayeka owakayaariri?” <sup>5</sup> Rosampitanakeri Jesús, ikantziri: “¿Eenitatsi pan?” Ikantaiyini irirori: “Eenitatsi okaatzi 7.” <sup>6</sup> Ari roisaikakaan-tanakeri Jesús maawoini atziri kipatsiki. Raakero pan okaatzi 7, riwetharyaawentanakawo, itzipetowakero, ipakeri riyotaanewo rowawisaakeniri atziripaini irirori. <sup>7</sup> Tzimitacha eejatzi shiwaireki. Riwetharyaawentakari, ipitakari eejatzi atziripaini. <sup>8</sup> Rowaiyakani maawoini, kemaneentaiyakani. Yeekitai tzimagaantapaintsiri kantziriki okaatzi 7. <sup>9</sup> Maawoini shiramparipaini owainchari ikaataiyini 4000. Rotyaantayetairi inampiki. <sup>10</sup> Ari rotetanaawo Jesús pitotsiki itsipatanaari riyotaanewo, montyaakotanaawo intatsikero nampitsiki oita Dalmanuta.

### *Ikowakotaitziri Jesús ritasonkawentante* (Mt. 16.1-4; Lc. 12.54-56)

<sup>11</sup> Ari ripokaiyapaakeni Fariseo, riñaanaminthatapaakeri Jesús, ikowi iñeeri ritasonkawentante, iro riyotantyaari imaperotatya opoñaawo itasorenka jenoki inkiteki, tema iñaantashiretatyaaari. <sup>12</sup> Rañaashiryaaanake Jesús, ikantziri: “¿Oitaka ikowantari iñeena nitasonkawentante jirikapaini? Eeromaita noñaayiri. Imaperotatyaaga.” <sup>13</sup> Piyanaawo Jesús, montyaakotanaawo.

### *Kachotakairori iwaane Fariseo* (Mt. 16.5-12)

<sup>14</sup> Ari imaisantanakero riyotaanewo ragaantanakyaame pan, apaani ragaantamat-sitanaka. <sup>15</sup> Ikantzi Jesús: “Paamaawentyaawowa kachotakairori iwaane Fariseo eejatzi rashi Herodes.” <sup>16</sup> Ari ikantawakaanaka riyotaanewo: “Kaari amantanaka pan.” <sup>17</sup> Riyotake Jesús okaatzi ikantawakaakari riyotaanewo, ikantziri: “¿Oitaka

\* **7:27** Iriira roshiyakaawentaitzi Judá-ite, oshiyariri eenchaaniki. Iriima kaari Judá-itetatsine iriira oshiyariri otsitzi.

piñaanatawakaawentari: ‘¿Kaari amantaka pan, kaari amantaka pan?’ ¿Tema pikemi? Kisoshire pikantaka. <sup>18</sup> Tzimawetacha poki te piñaante, tzimitawetacha pikempita te pinkeme. ¿Tema poshoretawo noshekyaaantakawori pan? <sup>19</sup> Tema tzimawetacha pan okaatzi 5, nowakaaka isheki atziri ikaatzi 5000. Powiitairo okaatzi tzimagaantapaintsiri. ¿Tsika okaatzika kantziri yeekitaatsiri?” Ikantaiyini: “Okaatzi 12 kantziri.” <sup>20</sup> “Eejatzi nokantakero, kaawetachari 7 pan, rowaiyakani isheki atziri ikaatzi 4000. Powiitairo tzimagaantapaintsiri. ¿Tsika okaatzika kantziri piyeekitairi?” Ikantaiyini: “Okaatzi 7 kantziri.” <sup>21</sup> Ikantanakeri: “¿Tekerama piyotakotziroota?”

### *Rokiryaaakagaitairi mawityaakiri*

<sup>22</sup> Areetaka Jesús nampitsiki Betsaida. Ramaitakeniri mawityaakiri, ikantaitapaakeri: “Piterotantawakyaari pako.” <sup>23</sup> Ikanta Jesús, rotaiyawakotanakeri. Raanakeri othapiki nampitsi. Reewaakitakeri, rosheyookitantakari rako. Rosampitzimaitari, ikantziri: “¿Koñaatanai pamine?” <sup>24</sup> Aminanake, ikantzi: “Aminawetaana, noñaawetaari atziri, te ikoñaaperotzimaita, roshiyashitakawo inchato.” <sup>25</sup> Rapiitanairi riterookitziri, ikantairi: “Pamine iroñaaka.” Okiryaaanake, koñaatanai ramini intaina, iñaanairo mawoini. <sup>26</sup> Rotyaantairi, ikantawairi: “Eero pikenanai nampitsiki, tera nokowi pinthawetakotena.”

### *Yotake Pedro: Jirika Jesús, Cristo rinatzi* (Mt. 16.13-20; Lc. 9.18-21)

<sup>27</sup> Ikanta rawisanake Jesús itsipatanaari riyotaanewo ikenake Cesarea-ki inampipainiki Filipos. Okanta niyanki awotsi rosampitakeri riyotaanewo, ikantziri: “¿Oitaka ikenkithashiretakotanari atziripaini?” <sup>28</sup> Ari rakaiyanakeni riyotaanewo, ikantzi: “Ikantaitatziimi Juan-ni omitsitsiyaatantaneri pinatzi, ikantaitzimi eejatzi Elías pinatzi. Eenitatsi itsipa kantayetzimiri Kamantantanerira piriintaachari.” <sup>29</sup> Ari rosampitanakeri irirori, ikantanakeri: “¿Oitaka pikenkithashiryaaakotanari eeroka?” Ari rakanake Pedro: “¡Eeroka, Cristo pinatzi!” <sup>30</sup> Ikantzi Jesús: “Paataga pithawetakotzitanana.”

### *Ikenkithatakotziro Jesús inkame* (Mt. 16.21-28; Lc. 9.22-27)

<sup>31</sup> Ari retanakawo Jesús ikamantziri riyotaanewo onkaate awishimoterine, tema iri jitainchari Itomi Atziri. Ikantziri: “Osheki rowasanketaitena. Osheki inkisaneentena Itzinkamipaini, eejatzi reewarepaini Imperatasorentsitaarewo, eejatzi Yotzinkari-paini. Rowamaakaantena. Iro onkaatakeme kiteesheri mawa, añagaana.” <sup>32</sup> Ari ikantakeri, te rimaniro. Ikanta Pedro, raanakeri Jesús jantyaatsikaini, ikowaweta inkaminairime. <sup>33</sup> Ripithokapithatanakari, raminanakeri riyotaanewo, ikisathanakeri Pedro, ikantanakeri: “¡Piyaate Satanás! Te poshoretawo eeroka inintakaantziri Pawa, apatziro poshoretawo ikowayetziri atziripaini.” <sup>34</sup> Ikaimanakeri Jesús piyowentakariri, ikaimitanakari eejatzi riyotaanewo, ikantakeri: “Tzimatsirika kowatsine intsipatena, rookero ikowashiwaitari irirori. Onkantawetya inkentakoiteri, intsipatena naaka. <sup>35</sup> Ikaatzi antashiwaitawori iñaamatashitari, ari impeyashitaiya. Irooma ikaatzi kamawentenanane, okantakaantziro ikemisantziro Kameethari Ñaantsi, aritake rawisakoshiretai. <sup>36</sup> Aminaashiwaitaga iñiuro oshekitzimotziri rashaagawo tzimawetachari kipatsiki, arira impeyashitaiyaawo rañaamento. <sup>37</sup> ¿Arima ripinawentaiya eero iñaantaawo impeyashitaiya? <sup>38</sup> Ikaatzi kaaniwentanari inkenkithatakotena kaariperoriki atziri, atake nimatairi naaka paata nonkaaniwentairi arika nipiyai namairo rowaneenkawo Ashitanari nontsipataiyaari maninkaripaini, tema naaka Itomi Atziri.”



## 9

<sup>1</sup> Irojatzí ikantantanakari eejatzí Jesús: “Pikaataiyakenira jaka, tzimatsira apa-wopaini eero ikamita irojatzí iñaantakyaawori ishintsinka Pawa tsika ikanta ipinkathari-wentantzi. Imaperotatya.”

### *Rishipakiriimotziri Jesús riyotaanewo* (Mt. 17.1-13; Lc. 9.28-36)

<sup>2</sup> Okanta awisanake kiteesheri okaatzi 6. Tonkaanake Jesús ochempiki, raanakeri Pedro, Juan, eejatzí Jacobo. Ari rishipakiriimotakeri. <sup>3</sup> Kitamaaniki okantanaka iithaare, tekaatsi oshiyakairi okitamaatanake. <sup>4</sup> Iñaatziiri Elías itsipatapapaakari Moisés, ikenkithawaitakapaakeri Jesús. <sup>5</sup> Riñaawaitashitanaka Pedro, ikantanakeri Jesús: “Yotaanarí, imaperotatya okameethatzi pamaiyakenani jaka. Kameetha niwetsikaiyemini mawa pankoshetantsi: apaani pashi eeroka, apaani rashi Moisés, apaani rashi Elías.” <sup>6</sup> Tema ithaawaiyanakitziini, irootake riñaawaitashitantanakari. <sup>7</sup> Irojatzí ipokantapaaka menkori itsimankakotapaakeri. Ikematzi ikantaitzi: “Notomi rinatzi jirika netakokiperotari, pinkemisanteri.” <sup>8</sup> Raminaperowetanaari, te iñaanairi, apatziro Jesús.

<sup>9</sup> Ikanta roirinkaiyaani ochempiki, ikowakotakeri eero ikamantantziro okaatzi iñaakerira irojatzí paata arika rañagai. Tema jirika Itomi Atziri ari rañagai inkamawetakyaarika. <sup>10</sup> Iro kaari ithawetakotantari, iro kantacha osheki rosampitawakagaiyakani irirori tsika oita ikantakotziri Jesús, arika rañagai inkamawetakyaarika. <sup>11</sup> Irojatzí rosampitantakariri, ikantziri: “¿Oitaka ikantakotziri Yotzinkaripaini iri jewatapaintsine Elías ripoke?” <sup>12</sup> Ari rakanake Jesús, ikantziri: “Imaperotatya, iri jewatapaintsine Elías ripoke, rowameethatantapaake. ¿Tsika okantzika rosankenatakoitakenari pairani? Tema okantatzi: ‘Jirika Itomi Atziri, osheki rithainkawaitaiteri.’” <sup>13</sup> Pinkeme, ari pokake Elías. Osheki ikoshekaitakari, rimonkaatakero okaatzi rosankenatakoitakeriri.”

### *Rowawisaakotziri Jesús eentsi raayiri peyari* (Mt. 17.14-21; Lc. 9.37-43)

<sup>14</sup> Ikanta rareetaawo Jesús rookanakeri riyotaanewo, iñaapaatziiri ipiyowentari osheki atziri itsipatakari Yotzinkariite riñaanamintatzi. <sup>15</sup> Ikanta iñaawairi ripokai Jesús, riyokitziwentawairi, rishiyana riwethatawaiyaari. <sup>16</sup> Rosampitapaakeri Jesús, ikantziri: “¿Litaka piñaanatakotziriri?” <sup>17</sup> Akanake apaani, ikantanake: “Yotaanarí, namatziimiri notomi raayiri peyari, te inkantaiya riñaawaitai. <sup>18</sup> Ripokashitapairirika, osheki romposakaawaitari kipatsiki. Ishimorewaantewaitakairi, ratsikaikiwaita, ikisotakairi. Nokantawetakari piyotaanewo rowawisaakotainari, te rimatziri.” <sup>19</sup> Rakanake Jesús, ikantanake: “Te pinkemisantaiyeni eeroka. ¿Tsika onkaateka piyote? Pamakenari jaka eentsi.” <sup>20</sup> Ramaitapaakeniri. Ikanta peyari iñaawakeri Jesús, antawoite rompetatakanakari eentsi, tyaanake isaawiki, ripinaawaitanaka kipatsiki, ishimorewaantewaitanake. <sup>21</sup> Rosampitanakeri Jesús ipaapate eentsi, ikantziri: “¿Tsikapaiteka retaka peentsite?” Ikantzi: “Rashi rowiro eeniro ikaatziinitzi. <sup>22</sup> Ritaakaawaitari paampariki, ripiinkawaitzi eejatzí ñaaki, ikowí rowamairime. Kantacharika pineshironkatena, pimatero.” <sup>23</sup> Ikantziri Jesús: “¿Oitaka pikantantari ‘Kantacharika...?’ Arika pinkemisantanai, aritake imatakya maawoini.” <sup>24</sup> Irojatzí ikaimantanakari antawoite ipaapate eentsi, ikantanake: “Kemisantawetachana, terika nokemisantaperotzi, pinkemisantakaaperotaina eeroka.” <sup>25</sup> Eekero iñaatzi Jesús ripokaiyapaakeni atziri, ikisathanakeri peyari, ikantanakeri: “Pitainkapithateri eentsi, te nokowí pipiyashiteri eejatzí.” <sup>26</sup> Antawoite ikaimanake peyari. Ikamimatakaanakeri eentsi. Osheki kantanaintsiri: “Kamake eentsi.” <sup>27</sup> Rakathawakotanakeri Jesús, ipiriintakeri. Añaanai. <sup>28</sup> Ikanta ikyaapaake Jesús pankotsiki, ari rosampitakeri riyotaanewo apaniroini,

ikantziri: “¿Litaka kaari nimatantari naaka nowawisaakoteri?” <sup>29</sup> Ikantzi Jesús: “Imaperotatya ishintsitzi jirika peyari, okowatyaaga ankamaityaawo amaña, atziwentya eejatzi.”

*Rapiitairo Jesús ithawetakota inkamimotante*

*(Mt. 17.22-23; Lc. 9.43-45)*

<sup>30</sup> Ikanta rowaaganaawo Jesús, ikenanai Galilea-ki. Te ikowi inkemakoteri atziripaini.

<sup>31</sup> Riyotaayetziri riyotaanewo, ikantziri: “Irootaintsi raakaantaiteri Itomi Atziri, ritsitokaiteri. Awisawetakyaarika mawa kiteesheri, aritake rañagai eejatzi.” <sup>32</sup> Iro kantzimaitacha tera riyotawakero okaatzi ikantawetariri. Tekaatsi kowatsine rosampiteri.

*Tsika itzimi iriiperotatsiri*

*(Mt. 18.1-5; Lc. 9.46-48)*

<sup>33</sup> Areetaiyaani Capernaum-ki. Ikanta risaikaiyapaini pankotsiki, rosampitakeri Jesús, ikantziri: “¿Oitaka pikantawakaari inkaaganki awotsiki?” <sup>34</sup> Ari imairetaiyakeni irirori. Tema ikantawakaawentatyaawo awotsiki tsika itzimi iriiperotatsiri.

<sup>35</sup> Saikanake Jesús, ipiyotakeri riyotaanewo ikaatzi 12, ikantziri: “Arika pinkowe piriiperote, poshiyakotyaari imperataarewo, te ipinkathariwentantzi irirori.” <sup>36</sup> Ramake eentsi risaikaiyakeni, ithomaakeri, ikantzi: <sup>37</sup> “Inkaate aakoterone nowairo ikemisaantaana, arika raakameethatairi oshiyariri jirika eentsi, naakaga raakameethatake. Ari okantari eejatzi, arika raakameethatakena naaka, oshiyakawo iri raakameethatzi otyaantakenari jaka.”

*Aritake akaatziri kaari kisaneentairi*

*(Lc. 9.49-50)*

<sup>38</sup> Ari ikantanake Juan: “Yotaanari, noñaake chapinki atziri aakotzirori piwairo, rowawisaakotziri raayiri peyari. Te añiiri ankaateri jaka, nipakaakaakeri.” <sup>39</sup> Ikantzi Jesús: “Eero pipakaakairime. Tema ikaatzi tasonkawentantatsiri raakotziro nowairo, eero ikishimataana paata. <sup>40</sup> Tema aritake akaatziri kaari kisaneentairi. <sup>41</sup> Arika ineshironkaitemi raakoitero nowairo, inkantaite: ‘Nompakoteri ñaa rashitaari Cristo.’ Iri ripinaitairi paata. Imaperotatya.”

*Eero pantakaantziro kaariperori*

*(Mt. 18.6-9; Lc. 17.1-2)*

<sup>42</sup> “Tzimatsirika antakaakerine kaariperori oshiyakariri jirika eentsi rawentaana, ari rowasanketaikeri. Iro kameethatatsi inthataiteniri mapi ikentsiki, rowiinkaiteri inkaareki. <sup>43</sup> Iroorika pako pantantapiintawori kaariperori, pipakairo pawisakotantaiyaari, oshiyaawo pithatzinkatyeerome pako, piyaaponchokitantaiyaari inkiteki. Te okameethatzi otzimawetaga apite pako iro piñaantaiyaawori paata rookaitaimi sarinkaweniki pashi powaatyeero pitagaiya, <sup>44</sup> janta te ikaamanetapai chowitsi, te itsiwakanetapai paampari eejatzi. <sup>45</sup> Iroorika piitzi pantantapiintawori kaariperori, pipakairo pawisakotantaiyaari, oshiyaawo pithatzinkatyeerome piitzi, piyaaponchokitantaiyaari inkiteki. Te okameethatzi otzimawetaga apite piitzi iro piñaantaiyaawori paata rookaitaimi sarinkaweniki pashi powaatyeero pitagaiya, <sup>46</sup> janta te ikaamanetapai chowitsi, te itsiwakanetapai paampari eejatzi. <sup>47</sup> Iroorika poki pantantapiintawori kaariperori, pipakairo pawisakotantaiyaari, oshiyaawo pinkithoryaatyeerome poki, piyaapityaakitantaiyaari inkiteki. Te okameethatzi otzimawetaga apite poki iro piñaantaiyaawori paata rookaitaimi sarinkaweniki pashi powaatyeero pitagaiya, <sup>48</sup> janta te ikaamanetapai chowitsi, te itsiwakanetapai paampari eejatzi. <sup>49</sup> Tema paampariki iñaantaitantemi maawoini, roshiyakagaitemi katyori. <sup>50</sup> Kameetha iwetsika tziwi okatyotzi, arika rowaitaitero tsikarika oita, eero okameethatai inkatyokantaiyaawo. Ontzimatyeha oshiyaawo eero tziwiperoro, paapatziyawakagaiya, te opantawo pintzimawentawakaya.”

## 10

### *Te okameethatzi pookero piina* (Mt. 19.1-12; Lc. 16.18)

<sup>1</sup> Ikanta rowaaganaawo Jesús riyaaatero Judea-ki, ikenanakero intatsikero Jordán. Ipiyowentawaari osheki atziri. Retapaawo riyotaayetapairi ikantapiintzirowa.

<sup>2</sup> Ari ripokake Fariseo, rosampitapaakeri Jesús ikowi rikompitakayaarime, ikantapaakeri: “¿Shinetaantsitatsima atziri rookero iina?” <sup>3</sup> Rakanake Jesús, ikantanakeri: “¿Oitaka inintakaantziri Moisés-ni?” <sup>4</sup> Ikantaiyini irirori: “Rishinetakaantziro Moisés-ni ookero aina arika impaitairo osankenatakotaga jokawakagaantsi.” <sup>5</sup> Ari rakanake Jesús, ikantanakeri: “Okantakaantziro te pikemisantantzi, iro rishinetantakemirori jiroka. <sup>6</sup> Tema pairani etantanakari riwetsikantzi Pawa, Riwetsikake shirampari eejatzi tsinane.

<sup>7</sup> Iro rontsiparyaantariri atziri ashitariri, ompoñaantyaari raye iina,

<sup>8</sup> Apaani ikantanaa raawakaana.

Te apite atziri rine, apaani ikantanaawo. <sup>9</sup> Iroowa eero okantanta rontsiparyagaiyaawo atziri itsipatakaariri Pawa.”

<sup>10</sup> Ikanta risaikaiyini pankotsiki, rosampitairi riyotaanewo okaatzi ikantakeri, <sup>11</sup> ikantanake Jesús: “Inkaate jokerone iina, arika ragai otsipa tsinane, imayempiwentakero retawetari ketziroini. <sup>12</sup> Ari okanta tsinane arika ookeri oime, agairika itsipa shirampari, mayempitake eejatzi.”

### *Ritasonkawentziri Jesús eentsipaini* (Mt. 19.13-15; Lc. 18.15-17)

<sup>13</sup> Ari ramaitakeniri Jesús eentsipaini, ikowaitzi riterotantyaari rako. Ikanta riyotaanewo Jesús ikisathatakeri amayetziriri eentsi. <sup>14</sup> Te inimotanakeri Jesús iñaakeri, ikantziri: “Pishineteri eentsipaini ripokashitenaata. Eero pithañaana. Maawoini oshiyaiyaarine eentsi, iri ñagairone ipinkathariwentantzi Pawa. <sup>15</sup> Imaperotatya, eerorika ipinkathatzi Pawa roshiyakotyaari eentsipaini, eerowa iñiuro ipinkathariwentantzi.” <sup>16</sup> Ithomaawakeri eentsipaini, rotzimikapatziiotoyetakeri, ritasonkawentayetakeri.

### *Mainari ashaagantachari* (Mt. 19.16-30; Lc. 18.18-30)

<sup>17</sup> Iro rawisantanaaiyaarime Jesús, rishiyashitakeri mainari, rotziwerowashitapaakeri, rosampitapaakeri: “Kameethari Yotaantanerí, ¿oitaka nantairi noñaantaiyaawori añagaantsi kantaitaachane?” <sup>18</sup> Ari rakanakeri Jesús, ikantziri: “¿Oitaka pikantantanari: ‘Kameethari pinatzi?’ Apatziro ikantakaawo Pawa ikameethatzi, tekaatsi itsipa. <sup>19</sup> Piyotakotakeroma Inintakaantaitziri:

Eero pitsitokantzi.

Eero pimayempitzi.

Eero pikoshitzi.

Eero pithaiyakotanta.

Eero pamatawitantzi.

Pimpinkathateri ashitzimiri.”

<sup>20</sup> Rakanake irirori, ikantzi: “Yotaantanerí, nithotyaakero maawoini irojatz ne-tanakawo pairani eeniro nokaatziinitzi.” <sup>21</sup> Raminanakeri Jesús, retakotanakari, ikantziri: “Eenitatsi kowapainchari kaari pantzi. Piyaataate pipankoki, pimpimantero maawoini pashitari, pimpashityaari ashironkainkari. Ari piñagairo pinintagaiya jenoki inkiteki. Pipoke, poyaatena.” <sup>22</sup> Ikanta ikemawake, okantzimoneentanakari. Owashire ikanta ripiyanaka, tema ashaagantzinkari rini.

<sup>23</sup> Ikanta raminanake Jesús omerekiki, ikantziri riyotaanewo: “¡Osheki opomeentsita riyatai ashaagantzinkari ipinkathariwentantzira Pawa!” <sup>24</sup> Riyokitziitanake riyotaanewo ikemakerira ikantakeri. Irojatzí rapiitantanakawo ikantzi: “Notomyaayí ¡Osheki ompomeentsitzimotyaaari awentaawori rashaagawo riyatai tsika ipinkathariwentantzi Pawa! <sup>25</sup> Tema eero imata inkye piratsi camello imooki akoshi, iro owat-siperotachane ompomeentsitya inkye ashaagantzinkari tsika ipinkatharitzi Pawa.” <sup>26</sup> Eekero riyokitziitanakitzi riyotaanewo, ikantashiretanake: “¿Tsikama iityaaka awisakoshiretaatsine?” <sup>27</sup> Raminanakeri Jesús, ikantziri: “Eero rimatziro apaniroini atziri, iri Pawa matakairine. Tema tekaatsi kompitzimotyaaaririne irirori.” <sup>28</sup> Ikantanake Pedro: “Naakaga maawoini nokaataiyakeni, nookanakero okaatzí oshekitzimoyetanari, noyaataiyakemini.” <sup>29</sup> Rakanake Jesús, ikantanakeri: “Imaperotatyá, tzimatsirika kemisantanaairori Kameethari Ñaantsi, kenkithatakotairone eejatzi, iro rookantanakawori inampi, irirentzi, iritsiro, ashitariri, iina, reentsite, rowane, <sup>30</sup> iri ñagairone im-pairi Pawa osheki. Osheki onkaate pankotsi, irirentzi, iritsiro, ashitariri, reentsite, rowane. Onkantawetakya osheki inkisaneentawaitaiteri, iñagairo paata añagaantsi kantaitaachane. <sup>31</sup> Tema tzimayetatsi etawori, iri ñagairone rimpoiyyetai. Tzimayetatsi impoiyyetatsiri, iri ñagairone retaiyaawo.”

*Rapiitairo ithawetakota Jesús rowamagaiteri*

*(Mt. 20.17-19; Lc. 18.31-34)*

<sup>32</sup> Ikanta ritonkagaiyini ipampithatziro awotsi riyataero Jerusalén-ki. Iri jew-atatsi Jesús ranashitaiyani. Iyokitzi ikantayetaka riyotaanewo, thaawashire ikantaiyani royaatziri. Irojatzí rapiitantanakawo Jesús ipiyotziri riyotaanewo ikaatzí 12, inkamanteri onkaate awishimoterine, ikantakeri: <sup>33</sup> “Aatatzí Jerusalén-ki. Ari ragaiteri Itomi Atziri raakaanteri reeware Imperatasorentsitaarewo intsipatakyaari Yotzinkariite, riyakowenterí ritsitokaiteri, ragaitanakeri atziriki kaari asheninkata, <sup>34</sup> ishironawentaityaari, ripasawaitaiteri, reewawaitaiteri, ritsitokaiteri. Iro awisawetakya mawa kiteesheri, ari rañagai eejatzi.”

*Ikowawetari Jacobo eejatzi Juan*

*(Mt. 20.20-28)*

<sup>35</sup> Ikanta Jacobo itsipatakari Juan, itomipaini Zebedeo, rontsitokapaakari okaakiini Jesús, ikantakeri: “Yotaantaneri, nokowi pantainawo namanemiri.” <sup>36</sup> Rosampitanakeri irirori: “¿Oitaka pikowiri nantemiri?” <sup>37</sup> Ikantaiyini: “Tema irootaintsi pimpinkathariwentante, pishinetena nisaikanampitemi pakoperoki nontsipatemi ampinkathariwentante.” <sup>38</sup> Ikantanakeri Jesús: “Te piyotziro oita pamananari. Osheki nonkemaatsityaari naaka. ¿Arima pinkisashitakyaawo eeroka pinkemaatsitya osheki? ¿Arima poshiyakena nonkame naaka?” \* <sup>39</sup> Ikantaiyini irirori: “Aritake nimatakero.” Ikantzi Jesús: “Imapero, irootaintsi pimatero onkaate nonkemaatsityaari, † <sup>40</sup> irooma pisaikanampitena nakoperoki pintsipatena ampinkathariwentante, eero okanta naaka nishinetaimiro, rashi iita ikashaakaitzikari ketziroini.” <sup>41</sup> Ikanta ikemaiyakeni itsipa riyotaanewo, ikisaitanakeri Jacobo eejatzi Juan. <sup>42</sup> Ipiyotanairi eejatzi, ikantziri: “Piyotaiyini eeroka jimpe ikanta pinkathariyetatsiri jaka, rimperatanta. Ari roshiyari eejatzi iriiperotatsiri ipinkathataitzi irirori. <sup>43</sup> Irooma eerokapaini arika pinkowe piriiperote, poshiyakotyaaari ronampiitari. <sup>44</sup> Iroorika pinkoweri peewatakaante, poshiyakotyaaari noshikaarewo. <sup>45</sup> Te iro ripokantyaari Itomi Atziri rimperatantya, iro ripokantari roshiyaari onampirentsi inkamawentante, ripinakowentante.”

\* **10:38** Jiroka jaka ikantajaantziri Jesús: “¿Arima pimatakero eeroka pirero kepishaari onkaate nireri naaka? ¿Arima poshiyakena naaka romitsitsiyaitena?” † **10:39** Jiroka jaka ikantajaantziri Jesús: “Ari poshiyakena eeroka pirero nireri naaka, aritake poshiyakena naaka romitsitsiyaitena. Imapero.”

*Raminakagaitairi Bartimeo*  
(Mt. 20.29-34; Lc. 18.35-43)

<sup>46</sup> Ikanta rareetaka Jesús nampitsiki Jericó. Irojatzí rowaagantanaawo itsipatanaari riyotaanewo eejatzí ikaatzí piyowentakariri. Ikanta awotsinampiki, iñaapaakeri atziri jitachari Bartimeo, itomi Timeo, ikowakotantzi impashitaityaari. <sup>47</sup> Kemake irirori, iri Jesús poñaachari Nazaret, ikaimotawakeri, ikantziri: “¡Jesús, icharinetari David-ni, pineshironkataina!” <sup>48</sup> Ikisathawetanakari ikaataiyinira imairetantyaarime, eekero ikaimanakitzi antawoite: “¡Icharinentari David-ni, pineshironkataina!” <sup>49</sup> Katziyapaaka Jesús, ikantzí: “Pinkaimenari.” Ari ikaimaitakeri ikantaitziri: “Pinkatziye, ikaimatzi-imi, thaamenta pinkantanakya.” <sup>50</sup> Rookanakero iwewiryaaakowo, katziyanaka, rishiyashitanakari Jesús. <sup>51</sup> Rosampitawakeri, ikantziri: “¿Oitaka pikowakotanari? ¿Tsika nonkantemika?” Rakanake irirori, ikantzí: “Yotaantanerí, nokowi naminawaitai kameetha.” <sup>52</sup> Ikantanake Jesús: “Kameetha piyaatai, etsiyatakotakagaimi pawenta-gaanaga.” Apathakerotanaka raminanai kameetha, royaatanakeri Jesús.

## 11

*Areetaawo Jesús Jerusalén-ki*  
(Mt. 21.1-11; Lc. 19.28-40; Jn. 12.12-19)

<sup>1</sup> Irootantsi rareetya Jesús Jerusalén-ki, riweyaaka otsipaki nampitsi jitachari Betfagé eejatzí Betania, otsipakerotawo otzishi Olivo. Rotyaantakeri apite riyotaanewo, <sup>2</sup> ikantakeri: “Piyaate nampitsiki atsipakerotakari. Ari piñaapaake ewonkeri piratsi burro inthatakotya, tekera ikyaakagaitariita. Pishiryaaakoteri, pamakenari. <sup>3</sup> Arika inkantaitawakemi: ‘¿Piiterika pishiryaaakotantariri burro?’ Pinkantanakeri eeroka: ‘Ikowatziiri Pinkathari. Aritake roipiyaimiri paata.’ ” <sup>4</sup> Jataiyakeni, iñaapaakeri ithatakotaka ewonkeri burro pankotsikeroki. Rishiryaaakotapaakeri. <sup>5</sup> Eenitatsi itsipa atziri ñaawakeriri, ikaimotakeri: “¿Piiterika burro pishiryaaakotantariri?” <sup>6</sup> Ikantanakeri irirori okaatzí ikantawakeriri Jesús ketziroini. Rishinetaakeniri. Raanakeri burro. <sup>7</sup> Ramakeniri Jesús. Rowaitakeniri manthakintsi imitzikaaki burro, ikyaakaanakari Jesús. <sup>8</sup> Eenitatsi omaankanaintsiri manthakintsi, itsipa chekanaintsi inchashi romaankashitanakeri owaneenkantantyaari tsika inkenanake. <sup>9</sup> Atziripaini jew-atanaintsiri, ikaatzí oyaatakeriri itaapiiki, ikaimaiyini, ikantzí: ¡Kaakitake awinkatharitewé!

Tasonkawentaarewo rini, tema Pinkathari aitziri otyaantakeriri.

<sup>10</sup> Aakameethatairi poyaatyaarine acharine David-ní.

¡Kaakitake Awinkathariteperotyaari!

<sup>11</sup> Areetapaaka Jesús Jerusalén-ki, kyaapaake tasorentsipankoki, raminayetapaakero maawoini. Tema tsireniityaanake, piyanaka Betania-ki itsipatanaari riyotaanewo ikaatzí 12.

*Riyakatziro Jesús pankirentsi kaari kithokitatsiri*  
(Mt. 21.18-19)

<sup>12</sup> Okanta okiteeshetamanai, piyaawo Jesús ipoñagaawo Betania-ki, tasheyapaake niyanki awotsi. <sup>13</sup> Raminake jantó iñaatziiro pankirentsi, owaneenka okantaka oshi. Riyaatashitanakero raminero tzimatsirika okithoki. Tekaatsimaita, iyoshiita oshi, tema tekeraata okithokipaitetziita. \* <sup>14</sup> Riyakatanakero pankirentsi, ikantzí: “Pashi powairo eero pikithokitai.” Ikemaiyakerini maawoini riyotaanewo.

*Roimishitowiri Jesús yompariyetachari tasorentsipankoki*  
(Mt. 21.12-17; Lc. 19.45-48; Jn. 2.13-22)

\* **11:13** Kantakotachari jaka “pankirentsi”, iro iitaitziri eejatzí “higuera”.



<sup>15</sup> Ikanta rareetaiyapaani Jerusalén-ki. Kyaapaake Jesús tasorentsipankoki, rookapaakeri ikaatzi yompariyetachari. Rotatsinkapaakero rowaitzirira koriki, ari ikantakero tsika rowaitziri shiro. <sup>16</sup> Tekaatsi rishinetanai awisakairone rowaagawo tasorentsipankoki. <sup>17</sup> Riyotaantanake, ikantzi: “Pairani rosankenaitakero, kantatsiri: ‘Nopanko ini jiroka, ari ramanapiintenari poñaayetachari maawoiniki nampitsi.’ Iro kantzimaitacha eerokapaini pamatawitantapiintake jaka pipimantayetzi, poshiyakaakero koshintzipanko.” <sup>18</sup> Ikanta ikemaiyakeni Yotzinkaripaini, itsipatakari reeware Imperatasorentsitaarewo, raminaiyakeroni jimpe inkenakairo ritsitokakaanteri. Iro kantzimaitacha osheki ithaawantakari Jesús, tema tzimatsi osheki atziri iyokitziwientakeriri iñiirira kameetha okanta riyotaantziri. <sup>19</sup> Tema ari tsireniityaanai, piyanaawo Jesús.

*Kamashitanake pankirentsi riyakaitakeri*  
(Mt. 21.19-22)

<sup>20</sup> Ikanta ikenamanai isaikinta pankirentsi, iñaatziiro kamashitanake, kamanake maawoini oparitha. <sup>21</sup> Ikenkithashiryaañairo Pedro riyakatakero chapinki Jesús. Ikantziri: “Yotaanterí, paminero pankirentsi piyakatakari, kamashitanake.” <sup>22</sup> Rakanake Jesús, ikantzi: “Pawentaiyaari eeroka Pawa. <sup>23</sup> Arika pinkowakoteri Pawa roshirinkerome otzishi rookero inkaareki, eerorika pikisoshirewaitzi, iri pawentaanakya, ari rimatakemiro. Imaperotatya. <sup>24</sup> Iro nokantantzimirori jiroka, tema arika pamañaari Pawa pinkowakoteri tsika oita, pawentaanakyaaririka, ari rimatakemiro pikowakotziriri. <sup>25</sup> Arika pamañaari Pawa, pimpeyakotairo kaari inimotzimiri rantzimotaitzimiri eeroka, inantyaari Ashitairi Jenokisatzi impeyakotakagaimiro eeroka okaatzi pikenakaawaitashitakari. <sup>26</sup> Eerorika pipeyakotziro rantzimotaitzimiri eeroka kaari inimotzimi, ari inkantaimi eejatzi Ashitairi Jenokisatzi, eero ipeyakotzitaime eeroka pantakero kaariperori.”

*Ishintsinka Jesús*  
(Mt. 21.23-27; Lc. 20.1-8)

<sup>27</sup> Ikanta rareetaiyapaani Jerusalén-ki, anashiwaitapaa Jesús tasorentsipankoki. Ripokashitapaakeri reeware Imperatasorentsitaarewo, itsipatakari Yotzinkaripaini, ripokake eejatzi Itzinkamipaini. <sup>28</sup> Rosampitapaakeri, ikantziri: “¿Jimpe itzima-jaantzika pinkathari otyaantzimiri pantantawori jiroka?” <sup>29</sup> Ari rakanakeri Jesús, ikantanakeri: “Tzimatsi naaka nosampitemiri, arika pakakena ari nonkamantakemiro iitarika otyaantakenari. <sup>30</sup> Tema romitsitsiyaatantake Juan-ní, ¿litaka otyaantakeriri? ¿Pawama? ¿Atzirima? Pakaiyeni.” <sup>31</sup> Ikantawakaanaka: “Arika ankantakeri Pawa otyaantziri, ari inkantanakai: ‘¿Oitaka kaari pikemisantantari?’ <sup>32</sup> Arika ankante: ‘Atziri otyaantakeri’, ari inkisanakai atziripaini. Tema ikantaiyini atziripaini, Kamantaperotanteri rini Juan-ni.” <sup>33</sup> Ari rakaiyanakeni, ikantaiyini: “Te niyotero.” Ikantzitanaka eejatzi Jesús: “Ari nokantzitari naaka, eero nokamantzimi iita otyaantakenari.”

## 12

*Kaariperoshireri antawairentzi*  
(Mt. 21.33-46; Lc. 20.9-19)

<sup>1</sup> Ari retanaawo Jesús roshiyakaawentziro okaatzi riyotaantayetziri, ikantzi: “Ipankitake atziri chochokimashi, rotantotakotakero, riwetsikake inchatona inkatzikaaterowa paata, riwetsikake iwamakare onkene risaikawentaitero pankirentsimashi. Raminake saikawenterone iwankiremashi, jatake irirori intaina. <sup>2</sup> Okanta irakapaitetake iwankire, rotyaantawetaa rimperatanewo ragaateme okithoki. <sup>3</sup> Ikanta iñaawakeri antawairentzi, raawakeri ripasatawakeri, roippiyairi tekaatsi raana. <sup>4</sup> Rotyaantawetaa eejatzi itsipa rimperatanewo. Romposayinawaitawakeri,

ikaweyawaitawakeri, roipiyairi. <sup>5</sup> Rotyaantake eejatzi itsipa, ritsitokaitakeri. Osheki ikaatzi rotyaantawetakari, eenitatsi ripasawaitakeri, ritsitokayetakeri itsipapaini. <sup>6</sup> Apaani ikantapaaka itomi irirori, retakoperotane, rotyaantakeri, ikantashiretzi: ‘Jirikarika notomi naaka ari impinkathaitakeri.’ <sup>7</sup> Ikanta saikawentzirori pankirentsimashi, ikantawakaiyani: ‘Jirikaga ashitaiyaawone paata pankirentsimashi. Jame owamayeri, ayeroota aaka.’ <sup>8</sup> Raawakeri, ritsitokawakeri. Rookakeri othapiki pankirentsimashi. <sup>9</sup> ¿Litaka ranteri ashitawori pankirentsimashi? ¿Tema ari ripokanake irirori, ritsitokeri saikawentzirori iwankiremashi, raminai itsipa? <sup>10</sup> ¿Tema piñaanatero osankenarentsi? Kantatsiri:

Imanintawetakawo mapi wetsikirori pankotsi.

Iro kantzimaitacha ipiriintaitairo mapi, roshiyakagaitairo iroorikame tzinkamitsi.

<sup>11</sup> Iri Awinkatharite Pawa piriintairori.

Iro ayokitziiwentantariri.”

<sup>12</sup> Ari ikowawetaiyakani raakaanakerime Jesús, riyotanake iri ikenkithatakotake. Te okanta, tema ithaawantakariri atziripaini piyowentakariri. Ripakaanakeri, ripiyapithataari.

*Kameethatatsima ripinaiteri pinkathari*

(Mt. 22.15-22; Lc. 20.20-26)

<sup>13</sup> Rotyaantaitake Fariseo itsipatakariri aapatziyariri Herodes, ikowaweta rikompi-takayaarime Jesús. <sup>14</sup> Ikanta rareetaiyakani, ikantapaakeri: “Yotaantanerí, okaatzi piñaanetari eeroaka irooperori inatzi, te oshiyawo ikowashiwaitari atziri. Apa piy-otaantziro kameethaperoini ikowakaantziri Pawa. ¿Kameethatatsima amperi koriki rap-atotakaantziri Pinkathari César?” <sup>15</sup> Riyotakotakeri Jesús, ikowatzi rikompi-takayaarime osampitakeriri, ikantanakeri: “¿Oitaka piñaanantanari? Pamakenari koriki, nami-nawakeriita.” <sup>16</sup> Ramaitapaakeniri. Ikantzi Jesús: “¿Litaka ashitawori roshiyakaawo jaka? ¿Litaka ashitawori iwairo?” Ikantaiyini irirori: “Rashi César.” <sup>17</sup> Ikantanake Jesús: “Tema iri César ashitawori, panteniri okaatzi ikowakaimiri pipinateri. Irooma okaatzi rashitari Pawa, panteniri okaatzi ikowakaimiri irirori.” Osheki riyokitziiwen-taitanakeri Jesús.

*Rosampikowentaitziro arika rañagai kamayetatsiri*

(Mt. 22.23-33; Lc. 20.27-40)

<sup>18</sup> Ikanta ripokaiyakeni Sadoc-iite iñeeri Jesús. Iri Sadoc-iite kantayetatsiri eero rañagai kamayetatsiri. Rosampitapaakeri: <sup>19</sup> “Yotaantanerí, rosankenatake pairani Moisés-ni, kantatsiri:

Arika inkame atziri, rookanawentawo iina. Eerorika rowaiyakaawo, okameethatzi iinantaiyaawo irirentzi. Arika owaiyaiya tsinane, roshiyakaawo iriime ashityaarine oime kamaintsiri.

<sup>20</sup> Jame ankantawake: Tzimatsi ikaatzi 7 atziri, irirentzi rinaiyini. Etawori itzimi raawetaka iina, tekera osamaniteeta, kamake, te rowaiyakaanakawo iina. <sup>21</sup> Irojatziri raantaawo itsipa irirentzi oyaatapaakeriri itzimi. Eejatzi ikantzitaka irirori, kamake, te rowaiyakaawo. Ipoñaapaaka itsipa, eejatzi ikantzitaawo irirori. <sup>22</sup> Ari ikantaka maawoini irirentzi ikaatzira 7. Tekaatsi apaani owaiyakayaawone. Okantaawo paata tsinane kamai iroori. <sup>23</sup> Arika rañaayetaime paata ikamayewetaka, ¿tsika itzimika oimentaperotaiyaari tsinane? Tema maawoini iinantawetakawo ikaatzira 7.”

<sup>24</sup> Rakanakeri Jesús, ikantziri: “¿Litaka kaari pikemathatantawo osankenarentsi? ¿Litaka kaari piyotakotantawo ishintsinka Pawa? <sup>25</sup> Tema arika rañaayetai paata kamayetatsiri, eero itzimapai aawakainkari. Roshiyapaiyaari maninkariite saikayetatsiri inkiteki. <sup>26</sup> Irooma ikantakota rañaayetai kamayetatsiri, ¿tema piñaanatero rosankenare Moisés-ni tsika ikanta Pawa riñaanatantakariri itagaganki kitocheemaishi? Ikantakeri: Moisés, Naaka Pawa, ipinkathatziri Abraham, Isaac, eejatzi Jacob.

<sup>27</sup> Ari ayotziri, añaaayetatsi irirori, tema te rimatziro kaminkari impinkathateri Pawa, apatziro añaaayetatsiri. ¿Piñaakero? Pikenakaashitakawo eeroka.”

*Ikenkithatakoitziro ikowakaaperotairi Pawa*  
(Mt. 22.34-40)

<sup>28</sup> Ari ripokapaake Yotzinkari, ikemapaakeri riñaanatawaka. Yotapaake kameetha Jesús riyotaakeri Sadoc-iite, rosampitapaakeri irirori: “¿Otzimika kowaperotachari Inintakaantaitanewo?” <sup>29</sup> Rakanake Jesús, ikantzi: “Jiroka kowaperotachari, okantzi: ¡Israel-iite! Jirika Awinkatharite Pawa, apaniro ikanta Ipinkatharitziri irirori.

<sup>30</sup> Pinintaperotairi, pinintashirenkatairi, pinintashiretairi, pinintashintsitairi eejatzi. Iroowa kowaperotachari Inintakaantaitanewo. <sup>31</sup> Ari oshiyawo oyaatapaakerori, okantzi:

Petakotaiyaari pisheninka, poshiyakagairi pinethairo piwatha eeroka.

Tekaatsira otsipa Inintakaantaitanewo anayirori jirokapaini.” <sup>32</sup> Ikantanake Yotzinkari: “Kameethatake Yotaantanerí, imaperotatya pikantakeri: Apaani ikanta Pawa tekaatsi itsipa. <sup>33</sup> Osheki okameethatake anintaperotairi, anintashirenkatairi, anintashiretairi, anintashintsitairi. Ari ankantawakagaiyaari eejatzi aaka, etakotawakagaiya. Iro ikowakaaperotairi Pawa, anairo ritagaitziniriri, maawoini rashitakagaitariri jaka.” <sup>34</sup> Ikanta Jesús, iñaakeri kameetha okanta ikantakeri, ikantanakeri: “Iroowetaincha pimpinkathaterime Pawa, inantyaari impinkathariwentaimi irirori.” Tekaaitsira kowanaatsine rosampitanairi Jesús.

*¿Iitaka charinetariri Cristo?*  
(Mt. 22.41-46; Lc. 20.41-44)

<sup>35</sup> Riyotaantanake Jesús tasorentsipankoki, ikantzi: “¿Oitaka pikenkithashiryaari eeroka, arika pinkemeri Yotzinkaripaini, ikantzi irirori: ‘Jirika Cristo-tatsiri icharine rinatzi David-ni?’ <sup>36</sup> Tema Tasorenkantsi ñaawaitakaakeriri pairani David-ni, ikantake: Riñaawaitake Pinkathari, ikantawairi Nowinkatharite:

Pisaikapai nakoperoki, ampinkathariwentante,

Irojatziri paata nowasanketantaiyaariri kisaneentakemiri, ari pimakoryaayitzitantaiyaari.

<sup>37</sup> Ikantzitaka David-ni irirori: ‘Nowinkatharite rinatzi Cristo.’ ¿Tsika inkene incharinetyaari?” Inimoyetakeri maawoini atziri piyotainchari, ikemirira okaatzi ikantayetziri Jesús.

*Ikenkithatakoitziri Yotzinkaripaini*  
(Mt. 23.1-36; Lc. 11.37-54; 20.45-47)

<sup>38</sup> Ari ikantanake eejatzi Jesús: “Paamaiyaari Yotzinkaripaini. Osheki iñaamatawo rowaneenkanya kameetha, ishametakayero iithaarekoryampyaa. Ikowi impinkathatapiintaiteri riwethaityaari arika iñagaiteri. <sup>39</sup> Arika riyaaate pankotsiki ipiyotaitapiinta, ikowapiintziro rosatekanya niyankineki. Ari ikantari arika rowaiyani isheninka, ikowapiintzi rosatekanya. <sup>40</sup> Rawentaakawo eejatzi kamayetatsiri oime rashitzitawo opanko. Iro rosamaninkantawori ramanayetapiinta eero riyotantaitari. Iro kantzi-maitacha antawowa rowasanketaiteri.”

*Ashironkainkawo tsinane*  
(Lc. 21.1-4)

<sup>41</sup> Ikanta Jesús risaikimotapaakero rowaitapiintzirira koriki, raminaminthatziri oteyetziriri iyorikite. Ripokaiyapaakeni ashaagantzinkari roteperotzi irirori iyorikite.

<sup>42</sup> Pokapaake tsinane kamatsiri oime, ashironkainkawo inatzi, otetapaake iroori apipentyakiteeni koriki, tekaatsi yomaatyaarine ramanantantaityaari. <sup>43</sup> Ikantanakeri Jesús riyotaanewo: “Anaantake jiroka tsinane, anaakeri ikaatzi oteyewetachari osheki.

Imaperotatyaaga. <sup>44</sup> Tema ikaatzi otewetachari osheki, rotetashitakari tzimagaantatsiri iyorikite. Irooma jiroka ashironkainkawo, apintziryaakeri oorikite amanantantyaarime okowayetziri.”

## 13

*Ikenkithatakotziro Jesús ontzimpookya tasorentsipanko*  
(Mt. 24.1-2; Lc. 21.5-6)

<sup>1</sup> Ikanta rishitowanai Jesús tasorentsipankoki, ikantziri riyotaanewo: “Yotaantanerí, paminero mapi riwetsikantaitawori, antawo inayetzi, owaneenkawaitaka pankotsi.”  
<sup>2</sup> Ikantzi Jesús: “Maawoini pankotsi okaatzi piñaakerika, irootaintsi intzimpookaitero, eero iñagaitairo pewiryaayetachari mapi.”

*Iñagaitairi paata*  
(Mt. 24.3-28; Lc. 21.7-24; 17.22-24)

<sup>3</sup> Ikanta ritonkaanake otzishiki Olivo, otsipakerotari tasorentsipanko. Ari risaika-paake Jesús. Ikanta Pedro, Juan, Jacobo eejatzi Andrés, rosampitakeri jantyaatsikaini, ikantziri: <sup>4</sup> “Pinkamantena: ¿Tsikapaiteka imonkaatya pikantakeri? Arika imonkaatzi-matakya, ¿tsika onkantyaaka niyotantyaari?” <sup>5</sup> Ari rakanake Jesús ikantzi: “Paamaya ramatawitaitzimikari. <sup>6</sup> Tema osheki kowatsine ramatawitemi paata, raakotapaakena nowairo, inkante: ‘Cristo ninatzi naaka.’ <sup>7</sup> Ari pinkemakoyetakeri omanarentsi, paamaya ominthaawashiretzimikari, tema ontzimatyé imonkaayetaiya jirokapaini, ithonkimatantaiyaari maawoini paata. <sup>8</sup> Romanatawakaiya rotyaantane pinkathari-paini otsipaki nampitsiki. Iñagaitairo eejatzi osheki omoyekayetya, iñagaitairo ritashe-neentaite. Iroowa retaityaari iñagaitero inkemaatsitaityaawo jirokapaini.

<sup>9</sup> Paamaya. Tema atake raakaantaitakemi jewaripainiki ripasawaitaitemi pankotsiki rapatotapiintaitaga. Ari ragaitakemi risaikira pinkatharentsiperori okantakaantziro pawentaanaga, arira pinkenkithatakotenari janta. <sup>10</sup> Iroowa kowaperotachari inkemakotairo atziripaini Kameethari Ñaantsi maawoiniki nampitsi. <sup>11</sup> Arika ragaitanakemi, eero pikantashiretzi: ‘¿Oitaka nonkanteriri?’ Tema Tasorenkantsi yotakaimirone oitarika pinkanteri, tera eeroka ñaawaitashitachane. <sup>12</sup> Ari iñagaitake aakaanterine irirentzi rowamaakaanterine. Piñeeri aakaanterine itomi. Piñeeri owamaakaanterine ipaapate inkisaneentanakeri. <sup>13</sup> Osheki piñeero inkisaneentaitemi okantakaantziro paakotaanaga nowairo pikemisantaana naaka, iro kantzimaitacha arika pinkamaitanakyaawo pawentina, ari nowawisaakotaimi.

<sup>14</sup> Arika piñaakeri iitaitziri ‘Pinkaari Thonkaatantaneri’ risaikapaaake tsika te ishinetaantsita, inkaatera nampitaiyaawone Judea-ki, ontzimatyé rishiye tonkaariki. Iroowa ikenkithatakotakeri pairani Kamantantaneri Daniel-ni.” (Maawoini ñaanayetairone jiroka, ontzimatyé inkemathatairo.) <sup>15</sup> “Pisaikirika jakakeroki pipanko, ari pimpoñaanakya pishiyanake, eero pikyaapanaantzi paapante tsikarika oita. <sup>16</sup> Powanekirika pisaiki, eero paapanaantziro piithaare. <sup>17</sup> ¡Inkantamatsitaiteero paata motziyetatsiri, tzimayetatsiri eentsite thotatsiri iteni! <sup>18</sup> Pamañari Pawa, arika pishiyayetanaake, onkantya eero itonkyotantzimi kyaawontsi. <sup>19</sup> Tema antawoite rashironkagaitya paata. Pairani owakera riwetsikaitakeri kipatsi, irojatzi iroñaaka, te iñagaitziro oshiyaawone jiroka ashironkagaantsi. Eerowa apiitaawo iñagaitairo oshiyaawone. <sup>20</sup> Eerome ishintsitakeme Awinkatharite romairyaantakawori ashironkagaantsi, tekaatsira awisakotaatsineme. Ikamintha intzimayetai riyoyaayetairi Pawa, awentagaiyaarine, iroowa romairyaantaiyaawori ashironkagaantsi. <sup>21</sup> Arika pinkeme inkantaitemi: ‘Jirika Cristo’, itsipa kantemine: ‘Jirinta Cristo’, eero pikemisantziri. <sup>22</sup> Tema ripokayete oshiyakotyaarine Cristo, oshiyakotyaarine Kamantantaneri. Ari ritasonkawentantake, inkowe ramatawiteri riyoyaayetairi Pawa. <sup>23</sup> Paamaya eeroka, tema nokamantzitakemiro iroñaaka.”

*Ripiyantaiyaari Itomi Atziri**(Mt. 24.29-35, 42-44; Lc. 21.25-36)*

<sup>24</sup> “Paata, arika onkaatapaake rashironkagaita antawo, eero ritamorekaawo ooryaa, eero ritamorekitaawo kashiri, <sup>25</sup> rithopiryaayete impokiro, maawoini oorentayetachari jenoki ripookayetairo. <sup>26</sup> Aripaite ripokai Itomi Atziri inkenantapaiyaawo menkori, iñagaitawairo ishintsinka eejatzi rowaneenkawo. <sup>27</sup> Rotyaanteri maninkaripaini, impiyotairi riyoyaitakeri nampiyetawori kipatsiki, maawoini.

<sup>28</sup> Ari oshiyawo piñaapiintzirowa eereshiyetzi pankirentsi, piyotaantziro irootaintsi osarentsitzimatai. \* <sup>29</sup> Iro piyoteri eerokapaini, arika piñaayetero nokamantakemiri, pokimataanaga. <sup>30</sup> Eero ipeyayetzita jirika asheninkapaini, irojatzzi iñaantakyaawori nokamantakemiri. Imaperotatya. <sup>31</sup> Eero piñaaneentairo inkite eejatzi kipatsi, irooma niñaaneyetakari imaperotaatyeyea iroori.

<sup>32</sup> Apatziro riyotziro Ashitairi imonkaatantaiyaari. Tera riyotziro Itomi eejatzi maninkaripaini saikatsiri inkiteki. <sup>33</sup> Paamaya, aamaawenta pinkantya, pamaña. Tera piyote tsikapaite imonkaatantaiyaari. <sup>34</sup> Oshiyaawo arika riyaate atziri intaina. Rookanakero ipanko, ikantayetanakeri inoshikanewo oitarika ranteniriri. Eejatzi inkantakeri kempoyiirori pankotsi, ikantanakeri: ‘Paamaya.’ <sup>35</sup> Paamaya eeroka, tera piyote tsikapaite ripiyai ashitawori ipanko, tsireniiteeni, niyankiiteki, riñaakerika tyaapa, onkiteshetamanairika, <sup>36</sup> tema arika romapokairo ripiyai, onkantya eero iñaantapaimi pimaye. <sup>37</sup> Okaatzi nokantayetakemiri eeroka, irojatzzira nokantzitariri maawoini: Paamaya.”

**14***Ikamantawakaita raakaanteri Jesús**(Mt. 26.1-5; Lc. 22.1-2; Jn. 11.45-53)*

<sup>1</sup> Yotapaaka apite kiteesheri roimoshirenkantaitawori Anonkoryagaantsi, rowantaitawori eejatzi tashirentsiponkaki. Ari ikamantawakaari reeware Imperatasorentsi-taarewo itsipatakari Yotzinkaripaini, ikantawakagaiyani: “Jame amatawiteri Jesús ay-eri, owamaakaanteri. <sup>2</sup> Iro kantacha eero akoshekari kiteesheriki roimoshirenkaitaga, ikisakowentzirikari atziripaini.”

*Risaitantaitari Jesús kasankari**(Mt. 26.6-13; Jn. 12.1-8)*

<sup>3</sup> Ikanta ikenanai Jesús Betania-ki, ipankoki Simón pathaawaiwetachari. Ari risaikake rowaiyani. Areetapaaka tsinane amakotake kasankari. Iyoshiita owaa inchatayaki jitachari “nardo”, osheki owinawo, kameetha okantaka onaki riwetsikaitziro mapi oita “alabastro”. Isataakotakero othowaki, isaitantakeri ipatziitoki Jesús. <sup>4</sup> Kisanaka ikaatzi ñaakerori, ikantawakaanaka: “¿Oitaka apaatantawori kasankari? <sup>5</sup> Arikame ompimantyaame, ragaiteme osheki koriki inkaate 300 denario, iri ampashityaarime ashironkainkari.” Ikisanakero tsinane. <sup>6</sup> Ari ikantanake Jesús: “Piñaaminthatashityaawo, ¿Oitaka pikisantawori? Kameetha okanta noñaakero antakeri. <sup>7</sup> Pitsipatapiintari ashironkainkari, pinkowerika petakotyaari, ari pimpashitakyaari. Irooma naaka, eero piñaapiintana pintsipatena. <sup>8</sup> Jiroka tsinane antatziro aawiiri iroori, jewatake isaitantanawo kasankari oshiyakaawentatyaana arika inkitaitakena. <sup>9</sup> Arika inkenkithatakoitero paata Kameethari Ñaantsi, inkemakotaitero tsinane, iroowa roshiretantaityaawori antakeri iroori. Imaperotatyaaga.”

\* **13:28** Kantakotachari jaka “pankirentsi”, irojatzzi ikantaitziri “higuera”, iroowa shookatsiri otsipaki nampitsi.



*Ikenkithashirya Judas raakaanteri Jesús*  
(Mt. 26.14-16; Lc. 22.3-6)

<sup>10</sup> Ikanta Judas Iscariote, riyaatashitakeri reeware Imperatasorentsitaarewo impi-manteri Jesús. Iriiwetakaga riyotaanewo kaawetachari 12. <sup>11</sup> Antawo ikimoshire-taiyanakeni jewari, ikashaakaakari imperi koriki paata. Raminake Judas tsikapaite raakaanteri Jesús.

*Riweyaantawo rowakaanaari riyotaanewo*  
(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Areetapaaka etawori kiteesheri rowantaitawori tashirentsiponkaki, rowamaitzi eejatzi rowaitari kiteesheriki Anonkoryagaantsiki. Rosampitakeri riyotaanewo Jesús, ikantziri: “Yotaantanerí, ¿Tsika onkotsitakaanteka aaka?” <sup>13</sup> Ari ikantanakeri apite riyotaanewo: “Piyaate nampitsiki. Ari pitonkyotyaaari atziri raakotziro iñaate chomoki. Poyaatanakeri, <sup>14</sup> tsikarika inkyaapai, pinkanteri ashitawori ipanko: ‘Ikowatzi riyote yotaanari tsikarika rowakayaari riyotaanewo.’ <sup>15</sup> Ari roñaaganakemiro jenoki ipanko, antawo okantaka riwetsikaitakero maawoini onkene rowaitya. Ari ponkotsitakaanteri oyaari.” <sup>16</sup> Jatake riyotaanewo areetaka nampitsiki. Iñaakero okaatzi ikantakeriri, ari ronkotsitakaantakeri royaari.

<sup>17</sup> Okanta otsireniityaanake areetapaaka Jesús, itsipatapaakari riyotaanewo ikaatzi 12. <sup>18</sup> Ikanta rowaiyani, ikantzi Jesús: “Pikaatakera pakiyootana, eenitatsi apaani pithokashitenane. Imaperotatya.” <sup>19</sup> Owashire ikantaiyanakani. Rosampiyetanakeri, ikantziri: “¿Naakama pithokashitemine?” Itsipa rosampitziri: “¿Naakama?” <sup>20</sup> Ikantzi Jesús: “Jirira pikaatakera pakiyootakena. <sup>21</sup> Imaperotatyaaga impeya Itomi Atziri, rosankenatakoitakeri pairani. Ikantaitake: ‘Ikantamatsitziri aakaanterine! Eerome itzimime irirori.’ ”

<sup>22</sup> Eeniro rowaiyani, raakero Jesús pan. Riweharyaawentakawo, itzipetowakero, ipayetakeri riyotaanewo, ikantziri: “Poyaawo, nowatha inatzi.” <sup>23</sup> Raakotanakero riraitziri, riweharyaawentakawo, ipakotakeri riyotaanewo, rirayetakero maawoini. <sup>24</sup> Ikantziri: “Niraa inatzi, iro shitowaatsine rawisakotantaiyaari osheki. Iroowa oñaagantaperoterone aapatziyawakaantaiyaari. <sup>25</sup> Eero niritaawo, irojatziri paata tsika impinkathariwentantai Pawa, ari napiitairo. Imaperotatya.”

*Ikenkithatakotziro Jesús rookanawentante Pedro*  
(Mt. 26.30-35; Lc. 22.31-34; Jn. 13.36-38)

<sup>26</sup> Ikanta romampaakotanakari Pawa, jatanai tonkaariki otzishiki Olivo. <sup>27</sup> Ikantzi Jesús: “Irootaintsi pookanawentaiyenani tsirenirikika. Tema rosankenaitake pairani kantatsiri:

Rowamaiteri kempoyairiri oweja, rithonkya ripookayetanake ipira.

<sup>28</sup> Iro kantacha, arika nañagai, Galilea-ki añaawakagaiya.” <sup>29</sup> Ikantanake Pedro: “Ar-itaikema rookanawentakemi itsipapaini, eero nimatziro naaka.” <sup>30</sup> Ikantzi Jesús: “Iroñaaka tsirenirika, tekera rapiiteroota riñe tyaapa, mawa poiپیيرو, pinkante: ‘Te niyotziri Jesús.’ Imaperotatya.” <sup>31</sup> Eekero ishintsitatzi Pedro, ikantzi: “Eero nookanawentzimi, kemetaka ari ankaate ankame.” Ari ikantaiyakeni eejatzi maawoini.

*Ramana Jesús Getsemaní-ki*  
(Mt. 26.36-46; Lc. 22.39-46)

<sup>32</sup> Ikanta rareetaiyakani Getsemaní-ki, ikantapaakeri riyotaanewo: “Ari pisaikawake jaka, namanamanaatawakyaata.” <sup>33</sup> Itsipatanakari Pedro, Jacobo eejatzi Juan. Antawo riraakoshiretapaaka. <sup>34</sup> Ikantziri: “Owamaimatatyaaana nowashirenka. Ari pi-saikawake eeroka, pinkakempite.” <sup>35</sup> Rowaaganeentanaka irirori. Otziwerowa-paaka kipatsiki, ramanapaaka, onkantyaama eero ikemaatsitantawo awishimoterine.

<sup>36</sup> Ikantzi: “Ashitanarí, tekaatsi kompitzimotemine eeroka. Nokowaweta pontsi-paryaakowentename onkaate nonkemaatsityaari. Iro kantacha eero pimatanao okaatzi nokowawetakari, iroowa pimate pikowakaanari eeroka.” <sup>37</sup> Piyapaawo, iñaapaatziiri rimagaiyini. Ikantapaakeri Pedro: “Simón, ¿litaka pimaantari? ¿Tema pikisashitawo piwochokinka? <sup>38</sup> Pinkakempite, pamaña, otzimikari piyenakaashitanewo. Te pikisashiwaineta, osheki pikowawetari panterime.” <sup>39</sup> Eejatzi ripiyanaa, amanapaa. Irojatzzi rapiitapai ikantakeri inkaaganki. <sup>40</sup> Ikanta ripiyapaa, eejatzi iñaapairi rimagaiyini, tema antawo okantaka iwochokinka. Ikaaniwaitzi riyotaanewo, te riyotzi tsika inkante. <sup>41</sup> Okanta mawatapaintsiri ripiyaka, ikantapaakeri: “¿Irojatzzima pimagaiyini? Monkaatapaakaga ragaitantyaariri Itomi Atziri, ragaiteri janta kaariperoshireriki atziri. <sup>42</sup> Pimpiriinte, thame aatai. Jekaatapaakera pithokashitenane.”

### *Ragaitanakeri Jesús*

*(Mt. 26.47-56; Lc. 22.47-53; Jn. 18.2-11)*

<sup>43</sup> Ikenkithawaiminthaitzi Jesús, areetapaaka Judas itsipawetapiintari. Osheki itsipatapaakari, ramayetake rosataamento, ripasamento. Rotyaantanewo pinkathari-paini piyowentakari Jesús: Reeware Imperatasorentsitaarewo, Yotzinkaripaini, eejatzi Itzinkamipaini. <sup>44</sup> Tema Judas pithokashitantachari, ikantzitakari ketziroini ramanewo: “Tsikarika intzime nonthoootapaakeri, iriitakera, poosoteri, paanakeri.” <sup>45</sup> Ikanta rareetapaaka, rontsitokapaakari okaakiini Jesús, ikantapaakeri: “Yotaantanerí.” Ithoootapaakeri riwethatapaakari. <sup>46</sup> Rotaiyaitapaakeri Jesús, roosotaitapaakeri. <sup>47</sup> Ikanta tsipatakariri okaakiini Jesús, inowikyaanakeri rosataamento, rithatzinkitakeri ikempita inoshikane reeware Imperatasorentsitaarewo. <sup>48</sup> Ikantanake Jesús: “¿Naakama koshintzi, pamashitantanari posataamento, pipasamento? <sup>49</sup> Nashi nowapi-intziro piñaapiintana niyotaantzi tasorentsipankoki ¿Kaarima paantana janta? Arira imonkaatakari rosankenatakoitakenari pairani.” <sup>50</sup> Shiyaiyanakani riyotaanewo, rookanawentanakeri apaniroini.

### *Mainari shiyainchari*

<sup>51</sup> Tzimatsi itsipa mainari oyaatakowentanakeriri Jesús. Ikithaawetaka. Iro kantzi-maitacha rotaiyaweetakari irirori, <sup>52</sup> rookanakeri iithaare rithañaanakaga, raamereki-tashitanaka.

### *Ipiyowentaitari Jesús*

*(Mt. 26.57-68; Lc. 22.54-55, 63-71; Jn. 18.12-14, 19-24)*

<sup>53</sup> Ikanta ragaitanakeri Jesús reewaperoreki Imperatasorentsitaarewo. Ari ipiyotaiyakani maawoini reeware Imperatasorentsitaarewo, itsipatakariri Itzinkamipaini, eejatzi Yotzinkaripaini. <sup>54</sup> Ikanta Pedro noshikaka irirori ripoki neetsikeroini, royaatakowentakari Jesús, irojatzzi rareetantapaaka isaikira ipanko reewaperore Imperatasorentsitaarewo. Ari ikatziyapaaka itsipatapaakari rimperatanepaini, rakitsitaiyani paampariki. <sup>55</sup> Ikanta reewaripaini Imperatasorentsitaarewo itsipatakariri piyotainchari, raminawetaka iita thaiyakotyaarine Jesús onkene rowamaakaanteri. <sup>56</sup> Osheki thaiyakowetapaakari, te oshiyawakaa ikantayewetakari itsipapaini. <sup>57</sup> Katziyanaka apaanipaini, ithaiyakotanakeri Jesús, ikantzi: <sup>58</sup> “Nokemiri chapinki jirika, ikantzi: ‘Ari nontzimpookakeri tasorentsipanko riwetsikanewo atziri, iro awisawetakya mawa kiteesheri niwetsikai otsipa, kaari ratsipeta atziri riwetsikairo.’” <sup>59</sup> Inashiyetaka okaatzi ikantayetakeri itsipa. <sup>60</sup> Katziyanaka reewaperote Imperatasorentsitaarewo, rosampitanakeri Jesús, ikantziri: “¿Oitaka kaari pakanta? ¿Tema pikemi okaatzi ikantakoitzimiri?” <sup>61</sup> Irojatzzi imairetake, te raki. Rapiitakeri rosampitziri, ikantziri: “¿Eeroka Cristo, Itomi Tasorentsi?” <sup>62</sup> Rakanake Jesús, ikantzi: “Naakatake. Irootaintsi piñeeri Itomi Atziri risaikai rakoperoki Pawa impinkatharitari.”

Piñeeri eejatzi ripiyai inkenapai menkoriki.” <sup>63</sup> Ikanta ikemake jewaperori, itzis-agaanakero iithaare ikisanaka, ikantzi: “¿Eenitatsima otsipa ankoweri inthawetakoiteri?” <sup>64</sup> Pikemake maawoini rithainkakeri Pawa. ¿Tsika pikantaiyinika eeroka?” Ikantzi maawoini: “¡Tzimataike iyenakaashitanewo! ¡Ontzimatyete inkame!” <sup>65</sup> Eenitatsi jewawootanakeriri. Tzimatsi itsipa otzimikawootakeriri, ikaposawaitziri, ikantzimaitari: “¿Piyote Kamantantaneri?” Rimatzitakawo rimperatanewo jewaperori, ripasawoowaitakeri.

*Ikantzi Pedro: Te niyotziri Jesús*

*(Mt. 26.69-75; Lc. 22.55-62; Jn. 18.15-18, 25-27)*

<sup>66</sup> Risaikake Pedro irirori jakakeroki, shitowapaake tsinane rimperanawo reewap-erore Imperatasorentsitaarewo. <sup>67</sup> Oñaapaakeri Pedro rakitsita paampariki, okantziri: “¿Tema eeroka itsipataganki Jesús Nazaret-satzi?” <sup>68</sup> Roipiyanakero Pedro, ikan-tanake: “Te, tera niyotziri iita pikantanari.” Shitowanake eepichokiini. Ñaanake tyaapa. <sup>69</sup> Okanta osamaniityaake, oñaapairi eejatzi, okamantakeri ikaatzi akitsitachari, okantziri: “Irijatzira jirika.” <sup>70</sup> Rapiitanakero Pedro roipiyero. Tekera osamaniteeta, rapiitanakero ikaatzi saikaintsiri rosampitziri, ikantziri: “Eerokaga itsipata Jesús, tema Galilea-satzi pinatzi, ariwaitakemi riñaawaitzi.” <sup>71</sup> Ikantzi: “Te niyoteri pikantanari. Riy-otzi Pawa imapero nokantzi, nothaiyarika, rowasanketainaata.” <sup>72</sup> Ari rapiitanakero riñaanake tyaapa, apitera rapiitakero. Ikenkithashiryaana Pedro ikantakeriri Jesús: “Arika apitetanake riñe tyaapa, mawa poipiyero, pinkante: ‘Te niyotziri Jesús.’ ” Iraanaka ikenkithashiryaanakerowa.

## 15

*Ragaitanakeri Jesús Pilato-ki*

*(Mt. 27.1-2, 11-14; Lc. 23.1-5; Jn. 18.28-38)*

<sup>1</sup> Okanta okiteeshetamanai, ipiyotaiyamanaani maawoini pinkatharentsi: reeware Imperatasorentsitaarewo itsipatakari Itzinkampaini, eejatzi Yotzinkaripaini, osheki ikantzimaitakeri Jesús. Roosoitanakeri, ragaitanakeri risaikinta Pilato. <sup>2</sup> Rosampitawakeri Pilato, ikantziri: “¿Eerokama iwinkatharite Judá-ite?” Rakanake Jesús, ikantzi: “Irootake pikantakeri.” <sup>3</sup> Ikanta reeware Imperatasorentsitaarewo, iñaakatsimatanakari, ithaiyakotanakari. <sup>4</sup> Rapiitanakeri Pilato rosampitziri: “¿Tekaatsima pinkanteri eeroka? ¿Tema pikemi okaatzi ikantakoitzimiri?” <sup>5</sup> Te raki Jesús. Riyokitziwentanakeri Pilato jirika Jesús.

*Riyakowentaitziri Jesús*

*(Mt. 27.15-31; Lc. 23.13-25; Jn. 18.38-19.16)*

<sup>6</sup> Eenitatsi rantapiintziri Pilato: Maawoini osarentsiki arika roimoshirenkya Judá-ite, romishitowakaantzi isheninka raakaantaitziri, tsikarika itzimi inkoweri atziripaini. <sup>7</sup> Tzimatsi jitachari Barrabás, raakaantaitziri itsipayetakari ikaataiyinira ritsitokantzi, rantaminthatziri iwinkatharite. <sup>8</sup> Ikanta ripokaiyapaakeni atziri, ikowakotapaakeri Pilato rantero rametapiintari. <sup>9</sup> Rakanake Pilato, ikantzi: “¿Iriima pikowi nomishi-towakaanteri iitaitziri ‘Iwinkatharite Judá-ite?’ ” <sup>10</sup> Riyotake irirori Pilato, iki-sawaitashita reeware Imperatasorentsitaarewo raakaantantakariri Jesús. <sup>11</sup> Iri kantz-imaitacha reeware Imperatasorentsitaarewo, rakakaakeri atziripaini inkante: “Iri kameethatatsi romishitowaiteri Barrabás.” <sup>12</sup> Rapiitanakeri Pilato rosampitziri: “Jirika iitaitziri ‘Iwinkatharite Judá-ite’, ¿Tsikama nonkanterika?” <sup>13</sup> Ikantzi ikaimaiyini atziri: “¡Pinkentakotakaanteri!” <sup>14</sup> Ikantzi Pilato: “¿Eenitatsima kaariperori rantakeri?” Eekero ishintsitatzi ikaimaiyini ikantzi: “¡Pinkentakotakaanteri!” <sup>15</sup> Ikowanake Pilato ranteniri ikowakeri atziripaini, romishitowakaantakeri Barrabás. Ripasatakaantanakeri Jesús, ragaitanakeri inkentakoiteri.

<sup>16</sup> Ikanta owayeripaini ikyaakaanakeri Jesús ipankoki Pilato, iitaitziro “Pretorio”. Ari ipiyotari maawoini owayeri. <sup>17</sup> Ikithaatapaakeri kithaarentsi anashirikimawotatsiri oshiyawori ikithaatapiintari pinkathariyetatsiri. Irojatzí ramanthaitantanakariri kitocheetapo. <sup>18</sup> Iroowa rantantawori jiroka, tema rithainkimawaitatziiri. Ikaimakowaitziri, ikantzi: “¡Jirikatá iwinkatharite Judá-ite!” <sup>19</sup> Romposayinatantanakariri sawoopanke. Reewawootanakeri. Rotziwerowashitzimaitari impinkathaterime. <sup>20</sup> Reshitakeri ishirontaminthatari. Raatonkoryagairi ikithaatakeriri inkaaganki, ikithaatairi iithaare. Raanakeri inkentakoteri.

*Ikentakoitziri Cristo irojatzí ikamantakari*  
(Mt. 27.32-56; Lc. 23.26-49; Jn. 19.17-30)

<sup>21</sup> Ikanta Simón, poñaachari Cirene, ipaapate Alejandro eejatzí Rufo, ritonkyotakari rareeta irirori nampitsiki, ishintsineentaitanakeri inatanakero inkentakotaitantyaariri Jesús. <sup>22</sup> Ragaitanakeri tonkaariki oita “Gólgota”, (akantziri apaanteki aaka: “Atzirriitoni”). <sup>23</sup> Ipakoitapaakeri imere rowaitaitakero kepishaari, te ririmaitawo. \* <sup>24</sup> Ikentakoitakeri. Ikanta owayeripaini rookaitawakaakawo iithaare Jesús, roshiyakaakero iñaaryaataita riyotantyaari iitarika ayerone. <sup>25</sup> Jenokiityaapaake ooryaatsiri, ikentakoitakeri Jesús. † <sup>26</sup> Rosankenaitake opoñaantari ikentakoitantariri, okantzi: IWINKATHARITE JUDÁ-ITE. <sup>27</sup> Ari itsipatagaitakeri ikentakoitziri apite koshintzi, ikatziyakotaka apaani rakoperoki, itsipa rampateki. <sup>28</sup> Ari imonkaatakari osankenatainchari pairani, okantzi:

Itsipatagaitakeri kaariperoshiretatsiri.

<sup>29</sup> Rithainkawaitakeri ikaatzi awisayetatsiri janta, rotekayinata, ikantziri: “Tema eeroka tzimpookirori tasorentsipanko, iro awisake mawa kiteesheri piwetsikairo eejatzí. ‡ <sup>30</sup> ¿Iitaka kaari payiitanta ikentakoitakemira powawisaakotaiya?” <sup>31</sup> Ari ikantakeri eejatzí reeware Imperatasorentsitaarewo itsipatakari Yotzinkaripaini, rowashiyawentari, ikantawakaiyani: “Rowawisaakotzi itsipa, ¿Kaarima rimatantawo rowawisaakotya irirori? <sup>32</sup> ¡Janjaatya, rayiite Cristo-wetachari iitaitziri ‘Iwinkatharite Israel-iite’, ankemisantantyaariri!” Rimatzitakari eejatzí ikaataiyinira ikentakota, rithainkitakari.

<sup>33</sup> Ikanta itampatzikatapaake ooryaatsiri, omapokashitapaaka otsirenikitanake, irojatzí ishaawiiteeni ooryaa. § <sup>34</sup> Ari ikaimanake Jesús shintsiini, ikantanake: “¡Eloi! ¡Eloi! ¿Lama sabactani?” (Iro ikantaitziri apaanteki aaka: “Pawa, Pawa, ¿iitaka pookanawentantakenari?”) <sup>35</sup> Ikanta saikawentakeriri Jesús, ikemawetawakari ikaimanake. Ikantanake: “Pinkemeri, ikaimatziiri Elías.” <sup>36</sup> Rishiyapainta apaani, romitsitsiyaatapaintzi manthakintsi kepishaariki, rankowitakeniri sawoopankeki, rowaankakotakeniri ratsimiyaatero, ikantzi: “Añaawakeriita ari ripokake Elías rowayiitairi.” <sup>37</sup> Rapiitanakero ikaimanake antawoite, te rañeenkatanai. <sup>38</sup> Okanta tasorentsipankoki, sagaanake niyanki tontamawotatsiri ithatashiitziirori, etanakawo jenoki irojatzí isaawiki, apimawote okantanaka. <sup>39</sup> Ikanta reeware owayeripaini katziyawentakariri Jesús, iñaakeri ikaimanake antawoite ikamantanakari, ikantanake irirori: “Imaperowetatyama Ito-mintari Pawa jirika.”

<sup>40</sup> Eenitatsi eejatzí tsinane aminaintsiri jantyaatsikaini. Jiroka okaatzi: María Magdala-sato, Salomé, María inaanate iyaapitsi Jacobo eejatzí José. <sup>41</sup> Jirokapaini

\* **15:23** Jiroka “kepishaari” oita mirra. Iroowa roitaitziriri atziri, riyampawathatantyaari, eero ikemaatsiwaitantawo arika rowasanketaiteri. † **15:25** Kantakotachari jaka “jenokiityaapaake ooryaatsiri” irojatzí ikantaitzitari pairani ooryaa 3. ‡ **15:29** Iroowa rametaiyarini Judá-ite rotekayinata, arika rithainkashiryaante. Iro oshiyawori ametaiyarini aakapaini, arika ookoteri atziri athainkashireteri, ankante: “¡Piñaakero! ¡Pikemakero!” § **15:33** Iroowa ikantaitziri pairani: riweyaanaka ooryaa 6, ari omapokapaakari otsirenikitanake irojatzí ishaawiiteeni ooryaa 9.

tsinane iro tsipatakariri pairani Jesús Galilea-ki, osheki amitakoyetakeri. Otsipatakawo eejatzi otsipa tsinanepaini oyaatapaakeriri Jesús ripokake Jerusalén-ki.

### *Ikitaitakeri Jesús*

*(Mt. 27.57-61; Lc. 23.50-56; Jn. 19.38-42)*

<sup>42</sup> Tsireniityaanake. Iroowa kiteesheri riwetsikantapiintaitari rowaityaari oñaatamanai kiteesheriki rimakoryaantaitari. <sup>43</sup> Ikanta José poñaachari nampitsiki Arimatea, itsipatapiintari ipiyota Itzinkamipaini, irijatzi oyaawentziriri Pawa impinkathariwentantai. Te ithaawi irirori riyaatashitanakeri Pilato, ikantapaakeri: “Pishinetagainari nonkitatairi Jesús.” <sup>44</sup> Tema romapokapaakeri Pilato, te riyotzi kamake Jesús. Ikaimakaantakeri reeware owayeriite, rosampitakeri inaperorika ikamake Jesús. <sup>45</sup> Ikamantaitakeri Pilato, rishinetainiri José raanairi. <sup>46</sup> Ramanantashitakeri kithaarentsi jentamankitatsiri. Ikentakoryaakotairi, iponatairi. Rowakotakeri imoontashiitzirira kaminkaripaini shirantaaki, roipinakaantake mapi, rashitakotantakari. <sup>47</sup> Okanta María Magdala-sato otsipatakawo María inaanate José, aminaiyakeni iroori tsika rowaitakeri.

## 16

### *Rañaantaari Jesús*

*(Mt. 28.1-10; Lc. 24.1-12; Jn. 20.1-10)*

<sup>1</sup> Awisanake kiteesheri rimakoryaantaitari. María Magdala-sato, otsipatakawo ot-sipa María iriniro Jacobo, eejatzi Salomé, amanantake kasankari, iyaate itziritan-taatyaaari Jesús. <sup>2</sup> Okanta okiteeshetamanai tominko, ananinkanake iyaate omooki roowaitakerira Jesús. Shitowimatapaake ooryaatsiri iroowa areetzimatya janta. <sup>3</sup> Okantawakagaiyani: “¿litaka otatsinkerone mapi rashitakotantaitakariri?” <sup>4</sup> Iro aminawetapaaka, oñaatziro otatsinkaka mapi, tema antawo mapi inatzi. <sup>5</sup> Kyaapaake omooki rowaweetakarira. Oñaashitapaakari mainari risaikake akoperoki, kitamaaniki okanta iithaare. Antawoite areetanakawo. <sup>6</sup> Ikantanakero irirori: “Eero pithaawashita. Iriima pipokashiwetari Jesús Nazaret-satzi, ikentakotaitakeri chapinki. Añagai, tekaatsi jaka. Paminero rowaweetakarira. <sup>7</sup> Pipiyanake, pinkamantayetairi riyotaanewo, pinkamantairi eejatzi Pedro ari riyaatai Jesús Galilea-ki, arira piñaayetairi. Ikamantz-itakemi ketziroini.” <sup>8</sup> Ipiyapithatanakawo omoo, ompetawaitanaka. Tekaaitsi itsipa atziri onkamantanake, tema antawo othaawanake.

### *Roñaagaawo María Magdala-sato*

*(Jn. 20.11-18)*

<sup>9</sup> Ari rañagai Jesús owakera okiteeshetamanai tominko, iro retanaa roñaagaawo María Magdala-sato retsiyatakotakagairi pairani raagawetawo peyari kaatatsiri <sup>7</sup>. <sup>10</sup> Irojatzi iyaatashitantanakariri iroori tsipatakariri pairani Jesús, oñaapaatziiri riragaiyani, okamantapaakeri oñagairi iroori. <sup>11</sup> Ikanta ikemawetaiyawakawoni oñagairi Jesús rañagai, te ikemisantaiyironi.

### *Roñaagaari Jesús apite riyotaanewo*

*(Lc. 24.13-35)*

<sup>12</sup> Ikanta Jesús, roñaagaari apite riyotaanewo ranashitaiyani awotsiki, pashiniwootapai eepichokiini. <sup>13</sup> Ari ripiyaiyanakani irirori, ikamantawetapaakari ikaataiyinira. Eejatzi ikantzitaitakari irirori, te ikemisantaitziri.

### *Rotyaantziri Jesús riyotaanewo*

*(Mt. 28.16-20; Lc. 24.36-49; Jn. 20.19-23)*

<sup>14</sup> Rowawaiminthaita riyotaanewo ikaatzi 11, ari roñaagaari Jesús, ikisathata-pairi, iñaakeri kisoshire ikantaiyani, te ikemisantziri ikaatzi ñaayetairiri rañagaira.



<sup>15</sup> Ikantapairi: “Piyaate pithotyero maawoini kipatsi. Pinkenkithatakagairi atziripaini Kameethari Ñaantsi. <sup>16</sup> Inkaate kemisantanaairone, omitsitsiyaataachane, iriira awisakotaatsine. Iriima kaari kemisantanaairone, rowasanketaiteri. <sup>17</sup> Jiroka inkantaiya inkaate kemisantanaatsine: retsiyatakotakaayetairi raagayetziri peyari raakotaina nowairo naaka. Riñaawaiyetairo inashiwaiyetachari ñaantsi. <sup>18</sup> Arika rotaiyawetyaari maanke, arika rirawetyaawo piyantatsiri, tekaatsi onkanteri, eero ikami. Ari onkantakya retsiyatakotakagairi mantsiyaripaini.”

*Owenonkaawo Jesús inkiteki*

*(Lc. 24.50-53)*

<sup>19</sup> Ikaatakero Awinkatharite ikamantayetakeri riyotaanewo, irojatzi rowenonkantaari inkiteki, itsipatapaari Pawa ipinkathariwentantapai. Risaikimotapairi rakoperoki. <sup>20</sup> Riyaataiyanaini riyotaanewo, ikamantantake maawoiniki nampitsi. Awinkatharite matakaayetakeriri, rantakaayetakeri kaari iñaapiintaitzi, iroowa riyotantaityaari imaperotatya okaatzi ikamantantayetziri. Ari onkantaitaatyeyaani.

## KAMEETHARI ÑAANTSI ROSANKENATAKERI LUCAS

### *Riwethaitari Teófilo*

<sup>1</sup> Osheki kowawetaincha rosankenaterome okaatzi awishimoyetakairi. <sup>2</sup> Ikowi rithotyeerome okaatzi riyotaayetakairi ñaayetawakerori ketziroini, iriitajaantakera ñaawakerori, ikamantakairo ñaantsi. <sup>3</sup> ¡Teófilo! Ari nokantakari eejatzi naaka. Tema neet-sikeroini nonoshikawentakawo tsika okanta opoñaantanakari ñaantsi, irootake nosan-ke-natantzimirori eeroka okaatzi awisayetaintsiri. <sup>4</sup> Iro ompoñaantyaari piyotakoperotairo maperotachari okaatzi riyotagaitakemiri.

### *Ikenkithatakoitziro itzimantakari Juan*

<sup>5</sup> Pairani, ipinkatharitantari Herodes janta Judea-ki, ari risaikiri Imperatasorentsitaarewo iita Zacarías, icharine Abías-ní rini. Irooma iina oita Elisabet, isawo Aarón-ni ini eejatzi iroori. <sup>6</sup> Kameethashireri ikantaiyani apitekeroini ipinkathatzi Pawa. Rimonkaatziniri okaatzi ikowakairiri, tekaatsi apaani inkenakaashiwaityaari. <sup>7</sup> Iro kantacha te itzimi rowaiyane, tema maaniro ini Elisabet. Rantarikitashiiyakani. <sup>8</sup> Okanta kiteesheri, ari imonkaatari rantantapiintantawori Zacarías rimperatasorentsitantari. <sup>9</sup> Tema iro rametaiyapiintarini Imperatasorentsitaarewo, roshiyakaakero iñaaryaaita, ari iñagaitakeri iri Zacarías kyaatsine tasorentsipankoki ritayeniri Pawa kasankainkari. <sup>10</sup> Piyotaiyachani atziri jakakeroki ramanaiyani, ritagaitziro kasankainkari. <sup>11</sup> Ari roñaagakari Zacarías imaninkarite Awinkatharite, ikatziyimotapaakari rakoperoki ritayirowa kasankainkari. <sup>12</sup> Antawo ithaawanake, iyokitziitanake iñaawakerira. <sup>13</sup> Irojatziri ñaananatantanakari, ikantziri: “Zacarías, eero pithaawi. Tema ikemaitakero pamananewo. Ari piñaakero piina Elisabet intzimai eentsite, iri piiteri Juan. <sup>14</sup> Arika intzimake pitomi, osheki pinkimoshirewenter, ari inkantyaari eejatzi atziripaini. <sup>15</sup> Tema iriiperori inkantakayaari Pawa. Eero pirakairi shinchaari ishinkitaitari. Tema risaikashiretantatyaari Tasorenkantsi tekeri itzimiita. <sup>16</sup> Ikenkithashiretakairi Israel-iite inkemisantairi Awinkatharite Pawa. <sup>17</sup> Iriitake jewatapaakerine Awinkatharite. Inkantakayaari ishintsinka Elías, ari raapatziyakaayetaiyari ipaapateetari maawoini rowaiyane. Ari rotsimaryaashiretairi katsimashireri, ari onkantya riwetsikashiretantaiyaari inkemisantairi Awinkatharite.” <sup>18</sup> Rakanakeri Zacarías maninkari, ikantziri: “¡Ari! ¿Tsikama onkantya niyotantyaawori jiroka? Antarikitakena naaka, eejatzi okantzitaka noina.” <sup>19</sup> Ikantzi maninkari: “Naakatake Gabriel, poñaachari Pawaki. Rotyaantakena nonkamantemiro Kameethari Ñaantsi. <sup>20</sup> Iro kantzimaitacha, okantakaantziro pithainkawaantetakena, kisowaante pinkantya iroñaaka irojatziri imonkaatantakya okaatzi nokantakemiri.” <sup>21</sup> Saikaiyatsini itsipa jakakeroki royaawentaiyirini Zacarías, ari rosampitawakaanaka: “¿Litaka rosamanitantari Zacarías tasorentsipankoki?” <sup>22</sup> Ikanta rishitowawetapaa Zacarías, te okanta inkenkithawaitapai, rokowaitashitapaaka. Ari riyotaiyanakeni eenitatsi iñaakeri tasorentsipankoki. Rashi rowanakero ikisowaantetanake. <sup>23</sup> Irojatziri imonkaatantaawo kiteesheri rantawaitzi tasorentsipankoki, piyaawo ipankoki. <sup>24</sup> Okanta Elisabet iina Zacarías, motzitake. Antawoite okenkithashiretaka, te ishitowai opankoki ikaatzi 5 kashiri omairentaka, okantashirewaitzi: <sup>25</sup> “Irootake inintakaakenari Pinkathari naaka, ompoñaantyaari eero imanintaitantana.”

### *Ikenkithatakoitziro intzimantyaari Jesús*

<sup>26</sup> Ikanta rawisake 6 kashiri, rotyaantairi Pawa maninkari Gabriel nampitsiki jitachari Nazaret saikatsiri Galilea-ki, <sup>27</sup> iñeero mainawo kaari yoterine shirampari, jitachari María, tema irootake iinantyaari mainari jitachari José, icharine

David-ni. <sup>28</sup> Ikanta ikyaapaake maninkari isaikira María, ikantapaakero: “¡Pinkeme María, itsipashiretakemi eeroka Awinkatharite. Pawisayetakero otsipa tsinane-paini ineshironkaperotaimi Pawa!” <sup>29</sup> Okanta oñaawakeri maninkari, iyokitziitanake, okenkithashiryaakotziro ikantapaakerori riwethatapaakawo. <sup>30</sup> Irojatzí ikantantana-kawori maninkari: “María, eero pithaawi, tema ineshironkatanewo Pawa pinatzi. <sup>31</sup> Ari piñaakero pimotzite, intzime peentsite. Iri piiteri JESÚS. <sup>32</sup> Iriitake materone ririiperote, itaiteri Itomi Jenokisatzi. Tema Pawa Awinkatharite, iriitake pinkathar-itakairine roshiyakagairi pairani icharineni David-ni ipinkatharitakaakeri. <sup>33</sup> Irijatzi pinkathariwentairine ikaatzi icharinetari Jacob-ni, rashi rowaatyeero impinkathari-wentantai irirori.” <sup>34</sup> Akanakeri María, okantziri: “¿Tsikama onkene nomotzite, te noñiiri shirampari?” <sup>35</sup> Rakanakero maninkari, ikantziro: “Iriira kantakayaawone Tasorenkantsi. Tema ritsimankantakemiro ishintsinka Jenokisatzi, oshiyaawome itsi-mankantzi aamparentsi. Irootake itantyaari peentsite Tasorentsi Itomi Pawa. <sup>36</sup> Ari okantaka eejatzi pisheninkathori Elisabet, ikantaweetari maaniro, okantawetaka anta-wokiwetaka iroori, motzital. Ikaatake oyashirite 6. <sup>37</sup> Tekaatsi kompitzi motyaarine Pawa.” <sup>38</sup> Irojatzí okantantanakari María: “Naakatake rimperatanewo Pinkathari, rantenawo okaatzi pikantakenari.” Irojatzí ripiyantanaari maninkari.

### *Iyaatake María areetawo Elisabet*

<sup>39</sup> Okanta otsipa kiteesheri, shintsiini iyaatanake María, jatake tonkaariki Judea-ki isaikira nampitsi, <sup>40</sup> irojatzí areetantakari ipankoki Zacarías, iwethatapaakawo Elisabet. <sup>41</sup> Okanta okemawakero Elisabet iwethatapaakawo María, shewatanaka omotz-itakeri. Tema ikantakaanakityaawo Elisabet Tasorenkantsi, <sup>42</sup> okenkithawaitanake shintsiini iroori, okantanake: “Eerokatake anairori otsipa tsinanepaini ritasonkawen-taitakemi. Ari inkantzityaari eejatzi powaiyane. <sup>43</sup> ¿Litaka pipokashitantanari irinirotyaari Nowinkatharite? <sup>44</sup> Tema nokemawakemi piwethatapaakena, she-watanaka nomotzitakeri naaka, kimoshiretanake. <sup>45</sup> Kimoshire pinkantaiya eejatzi eeroka pikemisantake, tema ari imonkaataiya okaatzi ikowakaakemiri Awinkatharite.”

<sup>46</sup> Irojatzí okantantanakari María:

Antawoite niweshiryaawentaiyaari Nowinkatharite,

<sup>47</sup> Kimoshire nonkantawentyaari Pawa owawisaakoshiretainane.

<sup>48</sup> Tema iñaakero rimperatanewo ashironkaawaitaka,

Aripaite inkantayeetai: Antawoite ritasonkawentaitakero.

<sup>49</sup> Tema antawoite rantzimotakenari matzirori otzimi ishintsinka.  
¡Tasorentsi ini iwairo!

<sup>50</sup> Rashi rowaatyeero ineshironkayetairi inkaate incharineyeetyaari paata,  
Inkaatera pinkathayetairine.

<sup>51</sup> Iroowa ishintsinka rantantayetakarí.

Raperotzitairi ikenkithashirewetari shamewaitatsiri.

<sup>52</sup> Pawa kantakaakawori eero riyaatakaantawo impinkatharite ikaatzi pinkathariwe-tachari.

Iri iñaaperotakaayeta ikaatzi tsinampashirewetachari.

<sup>53</sup> Rashaagantakaayetari ikaatzi tasheneentawetachari,

Iriima ikaatzi ashaagantawetachari raapithatairi oshekitzimowetariri romishitowak-eri.

<sup>54</sup> Ramitakotairi Israel-iite, tema rimperatanewo rinayetake.

Irojatzí ineshironkayetziri,

<sup>55</sup> Tema iro ikantaitakeriri pairani acharineyetakarí,

Retanakari Abraham-ni irijatzi maawoini incharinetaiyaari.

<sup>56</sup> Ari isaikimowaitapaintziro María jiroka Elisabet ikaatzi mawa kashiri, irojatzí ripiyantaawo opankoki iroori.

### *Itzimantakari Juan omitsitsiyaatananeri*

<sup>57</sup> Okanta imonkaataka ontzimaanitanyaaari Elisabet, tzimake otomi. <sup>58</sup> Ari ripokaiyakeni osheninkapaini ikimoshirewentaiyironi, tema riyotaiyakeni antawoite ineshironkatakero Pawa. <sup>59</sup> Maakotake 8 kiteesheri eentsi, ragaitanakeri ritomeshaan-itaiteri, ari ikowaweetaka iitaiterime Zacarías, tema iwairo inatzi ipaapate. <sup>60</sup> Irojatzí okantantanakari inaanate: “Eero iita Zacarías, iitya Juan.” <sup>61</sup> Ari ikantaitanakero: “¿Oitaka? Tema tekaatsi pisheninka jitachane Juan.” <sup>62</sup> Rookowakoitashitanari rosampi-itziiri ashitariri, tsikarika inintziri iiteri itomi. <sup>63</sup> Rookotanakero Zacarías inchakota ramaiteniri, ari rosankenatakero, okantzi: “Iitya Juan.” Iyokitziitanake ikaatzi osampitakeriri. <sup>64</sup> Romapokashitanaawo riñaawaitanai Zacarías. Antawoite ikimoshirewentanakeri Pawa, riwetharyaanakari. <sup>65</sup> Pagaanka ikantaiyanakani isheninkapaini Zacarías. Tema ithonka ikemakoitanakero tonkaariki Judea-ki okaatzi awisaintsiri. <sup>66</sup> Kenkithashireri ikantaiyani ikaatzi kemakotakeriri, ikantaiyini: “¿Tsikama iityaaka paata jirika? Tema kempoyaawenta rowakeri Awinkatharite jirika eentsi.”

### *Ikamantantakeri Zacarías*

<sup>67</sup> Ikanta Zacarías, ashitakariri eentsi, ikantakaanakari Tasorenkantsi, ikenkithawaitanake, ikantzi:  
<sup>68</sup> Kameethari rinatzi Awinkatharite Pawa, Iwawanetari Israel-iite, Ripokake retsinaryaakoyetai.  
<sup>69</sup> Rotyaantakairi matzirori rowawisaakoshiretantzi, Iriitake incharinetyaari David-ni, tema iriitake rimperatane Pawa.  
<sup>70</sup> Iro ikenkithawaitakaakeriri pairani tasorentsitatsiri Kamantantaneri.  
<sup>71</sup> Iri owawisaakotaine itzimawetaga kisaneentayetairi.  
<sup>72</sup> Tema ineshironkatairi ikaatzi acharineyetakari, Eero ipeyakotziro tasorentsitatsiri raapatziyawakaantyaari.  
<sup>73</sup> Irootake jiroka ikashaakagaitakeriri pairani acharineni Abraham, Onkaate rantzimotairi.  
<sup>74</sup> Rontsiparyaakowentai itzimawetaga kisaneentairi, Tekaaitsi anthaawantya ankemisantairi.  
<sup>75</sup> Kiteshire ankantaiya. Kameethashire ankantawentaiyaari maawoini kiteesheriki.  
<sup>76</sup> Irooma eeroka notomi, iitaitemi iyamantanewo Jenokisatzi. Tema eerokatake jewatakeriri Pinkathari, piwetsikaanteri tsika inkenayetanake.  
<sup>77</sup> Eeroka kamantairine asheninkapaini, iro riyotantyaari iriitake owawisaakotantaneri. Iri peyakotakagairine ikaariperoshirewaiwetaka.  
<sup>78</sup> Tema antawoite ineshironkatakai Pawa, Rotyaantakairi poñaachari inkiteki roshiyapaakawo okantaganki owakera onkiteeshetamanai.  
<sup>79</sup> Inkiteesheetyaakotairi saikayetatsiri otsirenikitzi. Inkiteesheetyaakotairi eejatzi itsimankakowetakari raampare yotaantzirori riyaatan-taitari sarinkaweniki. Iri oñaagantairone risaikaitzi kameetha.  
<sup>80</sup> Kameetha ikimotatzí eentsi, ñaaperoshireri ikanta. Ari risaikawaitzi ochempiki, irojatzí imonkaatantakari roñaayaari Israel-iite.

## 2

### *Itzimantakari Jesús*

*(Mt. 1.18-25)*

<sup>1</sup> Ikanta Pinkathari César Augusto, ikantakaanake rosankenatakotya maawoini atziri. <sup>2</sup> Aripaite omapokaka rosankenatakoyeetya reewatakaantantari Cirenio janta

Siria-ki. <sup>3</sup> Maawoini atziri riyaatake rosankenatakotya inampiki tsika ipoñaayeta pairani icharine. <sup>4</sup> Irojatzu ritonkaantanakari José irirori, ipoñaanakawo Nazaret saikatsiri janta Galilea, riyaatero nampitsiki tsika itzimake pairani Pinkathari David, oita Belén saikatsiri janta Judea-ki. Tema jirika José icharine rinatzi David-ni. <sup>5</sup> Ari rosankenatakotyaari irirori intsipatyaawo iinathori María, tsika otzimi ikashaakari rayero. Iro kantzimaitacha motzitate iroori. <sup>6</sup> Ikanta rareetaiyakani Belén-ki, tzimaanitzimatake María. <sup>7</sup> Ari itzimakeri etanakawori otomi. Oponatakeri, omaryaakeri rowamentoki piratsi, tema te oñaapaake tsika imaapaake.

### *Maninkariite eejatzi kempoyiiriri piratsi oweja*

<sup>8</sup> Okanta jantyaatsikaini nampitsi, eenitatsi kakiwentziriri tsireniriki ipira oweja ikempoyiiri. <sup>9</sup> Ari roñaagakari imaninkarite Awinkatharite. Roorentantapaakari rowaneenkawo, antawoite ithaawaiyanakeni. <sup>10</sup> Riñaanatapaakeri, ikantziri: “Eero pithaawashita. Namatziimiro Kameethari Ñaantsi, iro oimoshirenkairine maawoini atziri. <sup>11</sup> Tzimataike owawisaakotantaneri inampiki pairani pinkathari David-ni, iriitake Cristo Awinkatharite. <sup>12</sup> Jiroka piyotantyaariri: Ari piñaakeri imponaiteri eenchaaniki romaryagaitakeri rowamentoki piratsi.” <sup>13</sup> Iñagaitatzi ikoñaatapaake osheki inkiteweri itsipatapaakari maninkari, romampaawentapaakari Pawa, ikantaiyini:

<sup>14</sup> ¡Iro kameethaperotatsi oshekitzimotziri rowaneenkawo Pawa nampitawori ojenokiperotzinta inkite!

¡Risaikayetai kameetha ineshironkatanewopaini jaka kipatsiki!

<sup>15</sup> Ikanta riyaataiyanaini maninkariite inkiteki, ikantawakaanaka kempoyiiriri oweja: “Jame aate Belén-ki, aminakitero oita awisaintsiri. Ari añeero ikamantakaantakairi Awinkatharite.” <sup>16</sup> Shiyaiyanakani, irojatzu iñaantapaakawori María otsipatakari José, omaryaakeri eenchaanikite rowamentoki piratsi. <sup>17</sup> Ikanta iñaapaakeri, ikamantantapaake okaatzi ikantakeriri inkaaganki maninkari. <sup>18</sup> Iyokitziiwenta rowaitawakeri kempoyiiriri oweja ikemaitzirira ikamantantapaake. <sup>19</sup> Irooma María, antawo okenkithashiretakotawo iroori okaatzi ikantaitapaakerori. <sup>20</sup> Irojatzu ripiyaiyantanaarini kempoyiiriri oweja, thaamenta ikanta romampaawentanaari Pawa, tema iñaakero okaatzi ikamantaitakeriri inkaaganki.

### *Ragaitanakeri Jesús tasorentsipankoki*

<sup>21</sup> Maakotapaake 8 kiteesheri eenchaaniki, ragaitanakeri ritomeshaanitaiteri. Irojatzu iitantaitakariri JESÚS, tema ari iitzitakariri ketziroini maninkari tekera omotzitziriita María.

<sup>22</sup> Okanta imonkaatapaaka omairentaiyanira onkitewathatantaiyaari, tema iro Inintakaantakeri Moisés-ni. Ari ragaitanakeri Jesús Jerusalén-ki rashitakaityaari Awinkatharite. <sup>23</sup> Iro imonkaatantyaawori Osankenarentsiperu Inintakaantziri Awinkatharite, kantatsiri:

Iiriirika shirampari omapokanewo tsinane,

Rashitakaityaari Pinkathari, intasorentsire rinatye.

<sup>24</sup> Rimatantyaawori rimonkaatairo Inintakaantanewo Pinkathari, ontzimatyete ritagainiri Pawa:

Apite konthawo, eerorika apite iryaani shiro.

<sup>25</sup> Eenitatsi itsipa atziri janta Jerusalén-ki iita Simeón. Tampatzikashireri rinatzi, pinkathatasorentsitantaneri ikanta, tema iri risaikashiretantakari Tasorenkantsi. Iriitake oyaakoneentawori roimoshirenkaitairi Israel-iite. <sup>26</sup> Riyoshiretakaakeri Simeón Tasorenkantsi, eero ikamita irirori irojatzu iñaantakyaariri Risaipatziitotane Awinkatharite. <sup>27</sup> Ikantakaakari Tasorenkantsi, pokake tasorentsipankoki. Ikanta



ashitariri Jesús, raanakeri tasorentsipankoki rimonkaatantyaawori Inintakaantaitanewo, <sup>28</sup> ithomaawakeri Simeón jirika eenchaaniki, riwetharyaanakari Pawa, ikantzi:

<sup>29</sup> Monkaataka Pinkathari okaatzi pinintakaakenari, Pishinetena iroñaaka nonkame, tema pimperatanewo powana.

<sup>30</sup> Tema noñagairi owawisaakotantaneri,

<sup>31</sup> Iriitake potyaantakeri owawisaakotairine atziripaini,

<sup>32</sup> Iri kiteesheetyaakotairine atziri kaari asheninkata, Iri kankakayaawone impinkathayeetantyaariri Israel-iite.

<sup>33</sup> Iyokitziwenta rowaitanakeri ashitariri, ikemakowentzirira ikenkithatakoitziri Jesús. <sup>34</sup> Ikanta Simeón riwetharyaawentakari eenchaaniki, ikantanakero inaanate: “Jirika, iri kankakayaawone impeyawaitashitantaiyaari osheki asheninka Israel-iite, oshiyawaityaawo rontziwatatyeeyaame, iri kankakayaawone eejatzi rawisakoshiretantaiyaari osheki, oshiyawaityaawome impiriintaatyeeeme rontziwataka. Tema osheki inkantaite: ‘Kaari irooperori ñaantsi riñaaneyetakari.’ <sup>35</sup> Tema jirika eenchaaniki iri oñaaganterone onkaate inkenkithashiretaiyaari. (Iro kanzimaitacha antawoite powashiretanakya eeroka kemewaitaka rowathagaitatyeeemime.)”

<sup>36</sup> Ari isaiki eejatzi tsinane jitachari Ana, kamantantanewo inatzi iroori, rishinto Fanuel icharinetanakari Aser. Antawokitake iroori. Aawetaka oime eeniro omainawoweta, <sup>7</sup> osarentsi otsipawetakari oime. <sup>37</sup> Kinankawo inatzi, tzimake 84 osarentsite. Ari ashi owatziiro isaiki tasorentsipankoki, okamaitawo kiteesheriki eejatzi tsireniriki amana, itziwentakawo eejatzi. <sup>38</sup> Ari ipokapaakeri jiroka tsinane, iwetharyaapaakari Pawa. Okenkithatakotanakeri eenchaaniki, ikemaiyakeni ikaatzi oyaakoneentzirori rookaakowentaiteri Jerusalén-satzi.

### *Ripiyantaari Nazaret-ki*

<sup>39</sup> Rimonkaatakerowa okaatzi Inintakaantayetziri Pinkathari, piyaawo Galilea-ki isaikira inampi Nazaret. <sup>40</sup> Thaamenta ikanta ikimotatzi eenchaaniki, eekero riyaatatzi ishintsitzi, yowaiyantzi rinatzi. Kempoyaawenta rowakeri Pawa.

### *Risaiki Jesús tasorentsipankoki*

<sup>41</sup> Ari ikantapiintatya osarentsiki ashitariri Jesús riyaatzi Jerusalén-ki roimoshirenkiro Anonkoryagaantsi. <sup>42</sup> Tzimake Jesús 12 rosarentsite, jataiyakeni Jerusalén-ki tema iro rametaiyapiintarinini roimoshirenkawaita. <sup>43</sup> Ari ithonkapaaka roimoshirenkaiyani, piyaiyaani ashitariri, irojatzzi risaikanake Jesús Jerusalén-ki, te riyotzimaita ashitariri. <sup>44</sup> Iñaataawetakari jewatanake Jesús itsipayetanaari ikaataiyini. Tzimakotake apaani kiteesheri ranashitaka, ari ikowawetaari, rosampiwetakari isheninkapaini ikaatzi riyaaatziyini. <sup>45</sup> Te iñiiri. Piyanaawo Jerusalén-ki raminapanaantziri. <sup>46</sup> Mawa kiteesheri iñaantaariri risaiki tasorentsipankoki, ikenkithawaitakaayetziri yotakotzirori Inintakaantaitanewo, rosatekaitakeri niyanki, rosampiminhaitziri. <sup>47</sup> Iyokitzi ikantaita iñagaitzirira imapero riyowaitzi, rakayetakero kameetha okaatzi rosampitaitziriri. <sup>48</sup> Ikanta iñaapairi ashitariri, iyokitzi ikantapaaka irirori. Okantapaakeri inaanate: “Notomí, ¿tsika pinkantenaka? Osheki naminaminatakemi notsipatari pipaapate, antawoite pominthaawashiryaakena.” <sup>49</sup> Irojatzzi rakantanakari irirori, ikantanake: “¿Litaka pithotyaakotantanari? ¿Tema piyote okowaperotatya nanteniri ikowakaanari Ashitanari?” <sup>50</sup> Iri kantacha ashitariri te ikemathatziro okaatzi ikantakeri. <sup>51</sup> Raanairi, jataiyaini Nazaret-ki. Rantziro maawoini okaatzi rimperatariri ipaapate. Iro kantacha kenkithashire owakotakeri inaanate.

<sup>52</sup> Eekero ithaamentatya Jesús ikimotatzi, osheki riyorenka. Kempoyaawenta rowiri Pawa. Ari ikantzitariri eejatzi atziripaini neshironka rowiri.

## 3

*Ikamantantziri Juan omitsitsiyaatantaneri*  
(Mt. 3.1-12; Mr. 1.1-8; Jn. 1.19-28)

<sup>1</sup> Ari imonkaataka 15 osarentsi ipinkathariwentantzi Tiberio César. Ari reewatzi irirori Poncio-ki Pilato janta Judea-ki. Iriima Herodes reewatzi irirori Galilea-ki. Iriima Felipe irirentzi Herodes, reewatzi irirori Iturea-ki eejatzi Traconite-ki. Ikanta Lisantias, reewatzi irirori Abilinia-ki. <sup>2</sup> Iriima Anás itsipatakari Caifás reewatziri irirori Imperatasorentsitaarewo. Aripaite riñaanashiretakeri Pawa itomi Zacarías jitachari Juan janta ochempiki. <sup>3</sup> Irojatzi ikenayetantanakari Juan intatsikero Jordán-ki, ikenkithatakotziro omitsitsiyataantsi, ikantzi: “Pomitsitsiyawentaiyaari Awinkatharite, pipakagairo pantayetziro kaariperori, ari impeyakotakagaimiro pikaariperoshirewetakaga.” <sup>4</sup> Tema iro rosankenatakeri pairani Isaías Kamantantaneri, ikantake:

Inkamantantaite paata janta ochempiki, inkantaite:  
Powameethatainiri Pinkathari tsika inkenapaake,  
Poshiyakairo rotampatzikaitziro awotsi.

<sup>5</sup> Onkameeropathayetai otenkanaayetzira,  
Onkarenipathayetai otzishi.

Tampatzika inaatye awotsi tzipiwokiwetachari,  
Mameripatha onkantayetaiya.

<sup>6</sup> Ari iñeero maawoini atziri tsika ikanta Pawa rowawisaakotantzi.

<sup>7</sup> Ikantayetawakeri atziri pokayetaintsiri romitsitsiyaatya: “Te pikameethashiretaiyini eeroka, poshiyashitakeri maanke. ¿Piñaawetaka eero rowasanketaizimi?”

<sup>8</sup> Kyaaryooperorika pipakagairo jimpe pikantaweta pairani, pinkameethashireyetai, poshiyaiyaawo pankirentsi kithokitatsiri. Eero pikantashirewaitashita: ‘Tema naaka icharineni Abraham, te okowaperota nipakagairo nokaariperoshirewaitzi.’ Pinkeme nonkante: Arika inkowerikame Pawa, kantacha ratziritakairome jiroka mapi, iro poyaataiyaarine icharineyetakari Abraham-ni. <sup>9</sup> Pankirentsi kaari kithokitatsi, ritowaitziro ritagaitero. Ari inkantayeetaimi eeroka eerorika pikameethashireyetai.”

<sup>10</sup> Ikanta atziripaini rosampitanakeri, ikantziri: “¿Oitaka nantairi?” <sup>11</sup> Ari rakanakeri, ikantzi: “Eenitatsirika apite piithaare, pimperi apaani kaari otzimimotzi. Tzimatsirika powanawo, ari pinkantero eejatzi.” <sup>12</sup> Irojatzi ripokantapaakari apatoyetziriri koriki ikowi romitsitsiyaatya, ikantapaakeri: “Pinkathari, ¿oitaka nantairi naaka?” <sup>13</sup> Ikantakeri: “Eero panaakairo onkaate pinkowakotanteri.” <sup>14</sup> Ikanta owayeripaini Roma-satzi, rosampitakeri eejatzi, ikantziri: “Naaka, ¿iitaka nantairi?” Rakanakeri, ikantzi: “Eero pasariimatanta, eero pithaiyakotanta ompoñaantyaari paapithateri atziri tsikarika oitya. Pinkinatyaari ikaatzi ripinaitzimiri eeroka.”

<sup>15</sup> Osheki atziri aamaakariri Juan, ikantashiretaiyini: “¿Kaarima jirika Cristo?” <sup>16</sup> Ari ikantanakeri Juan maawoini atziri: “Naaka apatziro nomitsitsiyaatantawo ñaa. Iro kantzimaitacha, awotsikitake maperotzirori ipinkatharentsitzi, nopinkathatziitari naaka. Te onkantaatsikaitya roshiyakaina naaka rimperatanewo no-zapatoryaantyaariri. Iriitake kemetakaantyaawone romitsitsiyaatantatyeeyaarime Tasorenkantsi, romitsitsiyaatantatyeeyaarime eejatzi paampari. <sup>17</sup> Tema arika ankowiitero awankire, otekakitziro, irojatzi ataantakyaawori otaaki. Iro aye okithoki, otekitakero, owakotakero. Ari inkantaiyaari Awinkatharite eejatzi, rinashiyetaiyaari atziri. Ineshironkayetairi inkaate kemisantannairine, iriima kaari pakairone ikaariperoshirewaitzi, ritagairi paampariki kaari tsiwakanetatsine.”

<sup>18</sup> Osheki ikaminaantakeri Juan ikenkithatakairi atziripaini Kameethari Ñaantsi. <sup>19</sup> Rimatakeri eejatzi Herodes pinkatharitatsiri, ikaminaawetakari, raakero Herodías iinantawetari Felipe irirentzi. Tema tzimatsi otsipa kaariperori rantayetakeri.

<sup>20</sup> Iroowa owatsiperotakerori rantakeri Herodes romonkyagaitziri Juan.

*Romitsitsiyaata Jesús*  
(Mt. 3.13-17; Mr. 1.9-11)

<sup>21</sup> Ikanta Juan romitsitsiyaayetzi osheki atziri, ari romitsitsiyaatakari Jesús irirori. Ramanaminthaita Jesús, kemewaitaka ashitaryaanakityeeyaame inkite, <sup>22</sup> iñagaitatzi ripokashitakeri Tasorenkantsi ikenapaake jenoki roshiyapaakari shiro. Ikemaitatzi inkiteki ikantaitanake: “Eerokatake Notomi netakoperotanewo. Osheki noki-moshirewentakemi.”

*Icharineyeteri Jesús*  
(Mt. 1.1-17)

<sup>23</sup> Ikanta Jesús retantanakawori rantayetakeri, ari tzimake 30 rosarentsite. Ikantaitzi iri tomintakariri José. Tomintanakariri José iita Elí, <sup>24</sup> tomintanakariri Elí iita Matat, tomintanakariri Matat iita Leví, tomintanakariri Leví iita Melqui, tomintanakariri Melqui iita Jana, tomintanakariri Jana iita José, <sup>25</sup> tomintanakariri José iita Matatías, tomintanakariri Matatías iita Amós, tomintanakariri Amós iita Nahum, tomintanakariri Nahum iita Esli, tomintanakariri Esli iita Nagai, <sup>26</sup> tomintanakariri Nagai iita Maat, tomintanakariri Maat iita Matatías, tomintanakariri Matatías iita Semei, tomintanakariri Semei iita José, tomintanakariri José iita Judá, <sup>27</sup> tomintanakariri Judá iita Joana, tomintanakariri Joana iita Resa, tomintanakariri Resa iita Zorobabel, tomintanakariri Zorobabel iita Salatiel, tomintanakariri Salatiel iita Neri, <sup>28</sup> tomintanakariri Nateri iita Melqui, tomintanakariri Melqui iita Adi, tomintanakariri Adi iita Cosam, tomintanakariri Cosam iita Elmodam, tomintanakariri Elmodam iita Er, <sup>29</sup> tomintanakariri Er iita Josué, tomintanakariri Josué iita Eliezer, tomintanakariri Eliezer iita Jorim, tomintanakariri Jorim iita Matat, <sup>30</sup> tomintanakariri Matat iita Leví, tomintanakariri Leví iita Simeón, tomintanakariri Simeón iita Judá, tomintanakariri Judá iita José, tomintanakariri José iita Jonán, tomintanakariri Jonán iita Eliaquim, <sup>31</sup> tomintanakariri Eliaquim iita Melea, tomintanakariri Melea iita Mainán, tomintanakariri Mainán iita Matata, tomintanakariri Matata iita Natán, <sup>32</sup> tomintanakariri Natán iita David, tomintanakariri David iita Isaí, tomintanakariri Isaí iita Obed, tomintanakariri Obed iita Booz, tomintanakariri Booz iita Salmón, tomintanakariri Salmón iita Naasón, <sup>33</sup> tomintanakariri Naasón iita Aminadab, tomintanakariri Aminadab iita Aram, tomintanakariri Aram iita Esrom, tomintanakariri Esrom iita Fares, tomintanakariri Fares iita Judá, <sup>34</sup> tomintanakariri Judá iita Jacob, tomintanakariri Jacob iita Isaac, tomintanakariri Isaac iita Abraham, tomintanakariri Abraham iita Taré, tomintanakariri Taré iita Nacor, <sup>35</sup> tomintanakariri Nacor iita Serug, tomintanakariri Serug iita Ragau, tomintanakariri Ragau iita Peleg, tomintanakariri Peleg iita Heber, tomintanakariri Heber iita Sala, <sup>36</sup> tomintanakariri Sala iita Cainán, tomintanakariri Cainán iita Arfaxad, tomintanakariri Arfaxad iita Sem, tomintanakariri Sem iita Noé, tomintanakariri Noé iita Lamec, <sup>37</sup> tomintanakariri Lamec iita Matusalén, tomintanakariri Matusalén iita Enoc, tomintanakariri Enoc iita Jared, tomintanakariri Jared iita Mahalaleel, tomintanakariri Mahalaleel iita Cainán, <sup>38</sup> tomintanakariri Cainán iita Enós, tomintanakariri Enós iita Set, tomintanakariri Set iita Adán, tomintanakariri Adán iriitake Pawa.

## 4

*Inkaariperotakaiterime Jesús*  
(Mt. 4.1-11; Mr. 1.12-13)

<sup>1</sup> Ikanta ripiyaawo Jesús ipoñagaawo Jordán, risaikashiretantakari Tasorenkantsi. Ikantakaanakari Tasorenkantsi, jatake ochempiki. <sup>2</sup> Ari risaikakeri okaatzi 40 kiteesheri, irojatziki ikowantawetakari Kamaari inkaariperotakairime. Tema tekaatzi rowaiyaa janta, ayimatakeri ritashe. <sup>3</sup> Pokake Kamaari, ikantawetapaakari: “Imaperotatyaarika

Itomintzimi Pawa, pimpeyero pan jiroka mapi, poyaawo.” <sup>4</sup> Ari rakanakeri Jesús, ikantanakeri: “Eenitatsi osankenarentsi kantatsiri: Te apatziro okowimotari atziri royaawo pan, iroowa kowaperotachari ankemisantairo maawoini ikantairi Pawa.”

<sup>5</sup> Ikanta Kamaari raanakeri Jesús ochempiki, rampaaretakaapaintari maawoini nampitsi ipinkathariyetzira atziripaini. <sup>6</sup> Ikantziri: “Ari nonkantakaakyaawo impinkathayetaimi maawoini piñaayetakeri, ari nompakemiro eejatzi rowaneenkawo. Tema irootake rashitakaayeetakenari naaka maawoini, ari nimatakero nomperi itzimirika nokowiri. <sup>7</sup> Arika potziwerowashitakena piñaapinkathatena, maawoini ikaatzira piñaakeri, eeroka ashitanaiyaawone.” <sup>8</sup> Ari rakanakeri Jesús, ikantziri: “Eenitatsi osankenarentsi, kantatsiri:

Apatziro ampinkathatairi Awinkatharite Pawa, iri ankemisante apaani.”

<sup>9</sup> Ikanta Kamaari raanakeri nampitsiki Jerusalén, risaikaakeri jenoki omitzikaaki tasorentsipanko, ikantapairi: “Kyaaryooperorika Itomintzimi Pawa, pimitaye isaawikinta kipatsiki. <sup>10</sup> Tema eenitatsi osankenarentsi, kantatsiri:

Rotyaantemiri Pawa imaninkarite aamaakowentemine,

<sup>11</sup> Iri thomaawakemine,

Eero pomposantapaaka mapiki.”

<sup>12</sup> Ari rakanakeri Jesús, ikantziri: “Aritake ikantaitake pairani:

Te okameethatzi piñaantashiwaityaari Piwinkatharite Pawa.”

<sup>13</sup> Ikanta Kamaari te rotsinampaashitari Jesús inkaariperotakairi, rintainaryaapithata-paintziri.

### *Retanakari rantayetziri Jesús*

*(Mt. 4.12-17; Mr. 1.14-15)*

<sup>14</sup> Ikanta ripiyaawo Jesús Galilea-ki, ityaakari ishintsinka Tasorenkantsi. Rithonka ikemakoitanakeri maawoini. <sup>15</sup> Riyotaantayetake maawoini tsika rapatotapiintaita. Thaamenta ikantawentakari maawoini.

### *Ripiyaawo Jesús Nazaret*

*(Mt. 13.53-58; Mr. 6.1-6)*

<sup>16</sup> Ikanta Jesús piyaawo inampiki Nazaret tsika rantaritake. Okanta kiteesheri rimakoryaantaitari, jatake Jesús rapatotapiintaitaga, tema iro rametapiintari irirori. Ari ikatziyanakari riñaanatero osankenarentsi. <sup>17</sup> Ipaitakeri rosankenare Kamantan- taneri Isaías-ni. Ikanta rampinairyaakero osankenarentsi, iñaatziro rosankenaitakero, kantatsiri:

<sup>18</sup> Risaikantana naaka Itasorenka Awinkatharite,

Tema iri saipatziitotakenari ompoñaantyaari nonkenkithatakoteniri ashironkainkari Kameethari Ñaantsi.

Irijatzi otyaantakenari nowawisaakoyetairi okantzimoneentayetari.

Nonkamantairi romonkyakaantaitziri tsika inkantaiya rontsiparyaakowentayeetairi.

Ari naminakaayetairi kaari kowichaatsine,

Nisaikakaashiwaitaiyaari ikaatzi rimperaitari.

<sup>19</sup> Nonkenkithatakoyetairo tsikapaita raakameethatantai Awinkatharite.

<sup>20</sup> Irojatzii rampinaitantanaawori Jesús osankenarentsi, ipanairi kenkithatakantapi- intatsiri, saikanake. Iyokitzi ikantanaka maawoini atziri ikaatzi saikaintsiri rapato- tapiintaitaga. <sup>21</sup> Ari retanakawo ikantanakeri piyotainchari: “Imonkaatzimoyetakemi iroñaaka jiroka osankenarentsi okaatzi pikemakeri.” <sup>22</sup> Iyokitzi iwenta ikantaitanakeri Jesús, tema kameetha okanta ikenkithatakoyetziri. Osheki kenkithatakoyetanakeriri kameethaini. Ikantaitzi eejatzi: “¿Kaarima jirika itomi José?” <sup>23</sup> Irojatzii ikantanta- nakariri: “Aamaaka ari pinkantakena: ‘Janjaatya paawintya eeroka aawintantzinkari.

Tema osheki nokemakowentakemi pantayetakeri Capernaum-ki, janjaatya pantapairo

eejatzi jaka pinampiki.’ ” <sup>24</sup> Eekero ikantanakitzi Jesús: “Imaperotatya nonkan-temiri, ashi rowatziiro Kamantantaneri te ipinkathaitziri inampiki tsika risaikayetzi isheninka. <sup>25</sup> Tema imaperotya jiroka, pairani eeniro risaikawetani Elías, te oparyagai inkani janta Israel-ki okaatzi mawa osarentsi eejatzi 6 kashiri. Antawoite ritasheneentaitake. Osheki kamatsiri oime saikawetachari janta, <sup>26</sup> iro kanzimaitacha, te rotyaantaitziri Elías-ni riyatashitero kamatsiri oime, apatziro rotyaantaitakeri nampitsiki Sarepta saikatsiri Sidón-ki, isaikira tsinane kamatsiri oime kaari isheninkata. <sup>27</sup> Ari oshiyakawo eejatzi eeniro risaikaweta Kamantantaneri Eliseo, tzimawetachaganki Israel-ki osheki mantsiyari pathaawaitatsiri. Iro kanzimaitachari te rotyaantaitziri Eliseo retsiyatakotakagai apaani, apatziro rotyaantaitakeri Naamán kaari isheninkata poñaachari nampitsiki Siria, retsiyatakotakagairi.” <sup>28</sup> Ikanta ikemaiyakeni ikaatzi saikaintsiri rapatotapiintaitaga, antawoite ikisaiyanakani. <sup>29</sup> Ikatziyaiyanakani, ragaitanakeri Jesús iweyaathapitaga nampitsi, ikenakaitanakeri tsika isaiki impeeta rotziriyagaiteime. <sup>30</sup> Iri kantamaitacha Jesús, rishiyapithatanakari rosatekantanakari niyankineki, jatai.

### *Atziri raayiri peyari*

*(Mr. 1.21-28)*

<sup>31</sup> Ikanta Jesús oirinkanaa nampitsiki Capernaum saikatsiri Galilea-ki. Riyotaantayetapai kiteesheriki rimakoryaantaitari. <sup>32</sup> Tema te omaanta ishintsinka riyotaantzira, iyokitziwenta ikantaitziri. <sup>33</sup> Okanta janta tsika rapatotapiintaita, ari risaikakeri atziri raayiri peyari, kaimanake shintsiini irirori, <sup>34</sup> ikantzi: “Piñaaminthatashitena Jesús Nazaret-satzi, niyotzimi naaka eerokatake itasorentsita Pawa. Iro pipokantari jaka pithonkaiyenani.” <sup>35</sup> Ikisathatanakeri Jesús, ikantanakeri: “¡Pimairete peyari, piyaatai! Tyaanake atziri rintainaryaapithatanakeri iweyarite, temaita rowariperowaitanakeri.” <sup>36</sup> Iyokitziwenta ikantawentanakari maawoini, ikantawakaiyanakani: “¿litatyaakama jirika? Rotsinampairi romishiyiri peyari richeraimotzirira.” <sup>37</sup> Ari ithonka ikemakoitanakeri Jesús maawoiniki nampitsi okaatzi saikatsiri janta.

### *Jesús retsiyatakotakagairo riyote Pedro*

*(Mt. 8.14-15; Mr. 1.29-31)*

<sup>38</sup> Ikanta rishitowanake Jesús rapatotapiintaitaga, kyaapaake ipankoki Simón. Okanta riyote Simón, imatakeri antawoite katsiirentsi. Ikantaitawakeri Jesús retsiyatakotakaapairo. <sup>39</sup> Roiyotashitanakawo omaryaakaga, kemewaitaka richeraimotakityeerome katsiirentsi. Etsiyatakotanake osaawakiweta, piriintanaka aminawakeniri oita ompawakeriri.

### *Retsiyatakotakagairi Jesús mantsiyaripaini*

*(Mt. 8.16-17; Mr. 1.31-34)*

<sup>40</sup> Okanta otsireniityaanake, ramaitapaakeniri Jesús osheki atziri kantawaiyetachari imantsiyare. Ikanta iñaawakeri Jesús, apatziro riterotantawakari rako, etsiyatakoyetanai. <sup>41</sup> Osheki romishitowitakeri eejatzi iweyarite, antawoite ikaimayetzi peyari, ikantzi: “¡Itomi Pawa pinatzi!” Iri kanzimaitacha Jesús, ikisathayetakeri peyari, te rishineteri inkenkithawaite, tema riyotake peyari iriitake Cristo.

### *Riyotaantzi Jesús maawoini Galilea-ki*

*(Mr. 1.35-39)*

<sup>42</sup> Okanta okiteeshetamanai, ananinkanake Jesús apaniroini ikenanake ochempiki. Osheki aminaminatairiri tsikarika ikenake. Ikanta iñagaitairi, te rishineetairi riyatai. <sup>43</sup> Irojatzzi ikantantanakari Jesús: “Ontzimatyee inkemaitero eejatzi otsipaki nampitsi Kameethari Ñaantsi kenkithatakotziriri ipinkathariwentantaira Pawa. Tema irootake



nipokantakari naaka jaka.” <sup>44</sup> Eekero riyataakaanakitziiro Jesús ikenkithatanake pankotsikipaini rapatotapiintaitaga saikatsiri Galilea-ki.

## 5

### *Kaari iñagaitapiintzi tarajaawaitaantsi* (Mt. 4.18-22; Mr. 1.16-20)

<sup>1</sup> Okanta kiteesheri, risaiki Jesús inkaarecheraaki Genesaret. Ranawiimatakeri atziri ikaatzi piyowentakariri ikemisantziro riñaane Pawa. <sup>2</sup> Ari iñaake Jesús apite pitotsi aataka othapyaaki. Tekaaitsi otetantyaawone, tema ikiwaiyatziironi itarajaamento. <sup>3</sup> Otetapaaka Jesús pitotsiki. Tema iri ashitawo Simón jiroka pitotsi, ikantakeri rotyaantero eepichokiini niyankyeeronkaini. Ari risaikantanakawo Jesús pitotsi, retanaawo riyotaayetanairi atziri. <sup>4</sup> Ikanta rithonkanakero riyotaantzi, ikantzi: “Simón, paanakero pipito niyankyeeronkaini, ari pintarajaateri.” <sup>5</sup> Ari rakanake Simón, ikantzi: “Ari notarajaaweta tsireniriki, tekaatsi naye. Erokarika kantana, aritake nimatakeri.” <sup>6</sup> Rimatakeri itarajaatzi, raake osheki shima, iro isagaimateme itarajaamento. <sup>7</sup> Ikaimawakotanakeri ikaataiyapiintzinira itarajaatzi ramitakteri. Ikanta riyataashitanakeri, ikenakotanake otsipaki pitotsi, riyeekitantakawo apitekeroini, iroowetainchame ritsitsiyakotaiyenime. <sup>8</sup> Ikanta iñaakero Simón Pedro awisaintsiri, rotziwerowashitanakari Jesús, ikantanakeri: “Pintainaryaapithatena Pinkathari, kaariperoshireri ninatzi naaka.” <sup>9</sup> Tema antawoite ithaawanake Simón iñaakerira osheki raake shima. Ari ikantaiyanakani eejatzi maawoini itsipapaini. <sup>10</sup> Rimatzitanakawo Jacobo eejatzi Juan, itomipaini Zebedeo, tema iri itsipatakari Simón. Iri kantzimaitacha Jesús ikantanakeri Simón: “Eero pithaawashiwaita, oshiyaiyaawo iroñaaka nontarajaatakagaimiri atziripaini.” <sup>11</sup> Ikanta raatakotaiyapaini, rookanawentanakero maawoini, royaataiyanakerini Jesús.

### *Retsiyatakotakagairi Jesús imatziri pathaawontsi* (Mt. 8.1-4; Mr. 1.40-45)

<sup>12</sup> Okanta otsipa kiteesheri rareetaka Jesús nampitsiki, ari ripokakeri imatziri pathaawontsi. Ikanta iñaapaakeri Jesús, rotziwerowashitapaakari, ikantapaakeri: “Pinkathari, pikowirika petsiyatakotakagaina, niyotzi tzimatsi pishintsinka petsiyatakotaantanteneri.” <sup>13</sup> Irojatzit retakotantanakariri Jesús, riterotantakariri rako, ikantziri: “Nokowi, petsiyatakotai.” Etsiyatanake ripathaawaiwetaga. <sup>14</sup> Ari ikantziri: “Te nokowi pinthawetakotena. Apatziro powanakero piyaatashiteri Imperatasorentsitaarewo, pimonkaatero rosankenatakeri Moisés-ni, paanake pinkitewathatantaiyaari, riyotantaiyaari etsiyatakotaimi.” <sup>15</sup> Iro kantzimaitacha ikemakoitanakeri intaina Jesús. Osheki atziri piyowentakariri ikemisantziro. Ikowaiyini retsiyatakotakaayetairi eejatzi mantsiyaripaini. <sup>16</sup> Iri kantacha Jesús risaikawaitapiintzi irirori ochempiki, ari ramana.

### *Retsiyatakotakagairi Jesús kisopookiri* (Mt. 9.1-8; Mr. 2.1-12)

<sup>17</sup> Okanta otsipa kiteesheri riyotaantzi Jesús, ari risaikaiyakeni Fariseo itsipayetakari Yotzinkariite, poñaayetachari nampitsiki Galilea, Judea, eejatzi Jerusalén-ki. Tema ityaakari Jesús ishintsinka Awinkatharite, kantacha retsiyatakotakaayeteri mantsiyari. <sup>18</sup> Irojatzit rareetantaiyapaakarini atziri inatakotakeri shitashintsiki kisopookiri. Ikowawetaiyakani inkyaakaapaakerime pankotsiki, romaryaakoterime risaikakera Jesús. <sup>19</sup> Te okanta inkyaakairi, tema piyochonchoitaka atziri. Rataitakaanakeri jenoki pankotsiki, imoontakero pankotsi, rowayitakotakeri mantsiyari ikatziyajaantakaga Jesús. <sup>20</sup> Ikanta Jesús riyotakotawakeri osheki rawentaakari, riñaanatawakeri mantsiyari, ikantziri: “Asheninká, ipeyakotaitaimiro pikaariperoshirewetaka.” <sup>21</sup> Ikanta

ikemawake Yotzinkariite itsipayetakari Fariseo, ikantashiretaiyanakeni: “Rithainkatzi-iri Pawa jirikawé. Tema tekaatsi materone impeyakotakaantero kaariperori, apatziro ikantakaawo Pawa.”<sup>22</sup> Iri kanzimaitacha Jesús riyoshiretakotakeri, ari rosampitziri: “¿Oitaka pikenkithashiryawaaitantari?”<sup>23</sup> ¿Tema okameethatzi nonkante: ‘Ipeyakotaitaimiro pikaariperoshirewetaka?’ Irooma pikowi nonkanteri: ‘Pinkatziye, piyaatai.’<sup>24</sup> Iroñaaka piyoteri Itomi Atziri oshekitzimotziri ishintsinka, ari impeyakotairi kaariperoshirewetachari.” Ripithokashitanakari mantsiyari, ikantziri: “Pinkatziye, paanairo pishitashi, piyaatai.”<sup>25</sup> Piriintanaka kisopookiri, raanairo ishitashi romaryaanawetari. Iñagaitawairi riyataai ipankoki, kimoshire ikantawentanakari Pawa.<sup>26</sup> Iyokitziwenta ikantanaka maawoini atziripaini, ikimoshirewentanakeri iriroripaini Pawa. Ithaawankakiini ikantaiyini: “Te añaaipiintero oshiyawone jiroka.”

*Raantaitanakariri Leví*  
(Mt. 9.9-13; Mr. 2.13-17)

<sup>27</sup> Ikanta rishitowanai Jesús, iñaapaakeri jitachari Leví risaiki rapatotziriri koriki, ikantapaakeri: “Poyaatena.”<sup>28</sup> Katziyanaka Leví, rookanawentanakero maawoini, royaatanakeri.

<sup>29</sup> Ikanta Leví, raanakeri Jesús roimoshirenkya ipankoki itsipataanakeri riyotaanewo. Ari riyataakeri eejatzi osheki apatotziriri koriki, osheki jatayetaintsiri itsipa. Ari ikaataiyini rowaiyani.<sup>30</sup> Ikanta Fariseo itsipatakari Yotzinkariite, riñaanaminthatakeri riyotaanewo Jesús, ikantziri: “¿Litaka pitsipatantariri powaiyani kaariperoshireri pitsipatakari eejatzi apatotziriri koriki?”<sup>31</sup> Irojatziri rakantanakari Jesús irirori, ikantanakeri: “Arika imantsiyate atziri, ripokashitziri aawintantzinkari, iriima atziri kaari mantsiyatatsi tekaatsi inkowe irirori.”<sup>32</sup> Te inta nipokashiteri naaka nonkaimashiretaiiri kameethashireri, tema nipokashitatziiri kaariperoshireri nonkaimashiretaiiri rookairo kaariperori.”

*Ikenkithatakotziro Jesús ritziwentaita*  
(Mt. 9.14-17; Mr. 2.18-22)

<sup>33</sup> Ikanta rosampiitakeri Jesús, ikantaitziri: “¿Litaka kaari ritziwentanta piyotaanewo? Iriima rashini Juan, rashi eejatzi Fariseo-paini, osheki ritziwentapiintaiyani irirori, ramanaiyani eejatzi. Noñiiri piyotaanewo eeroka, te ritziwentawaita, owawaitacha, irawaitatsi imere.”<sup>34</sup> Rakanake Jesús, ikantzi: “Arika intsipataityaari aawakaachari, ¿arima rowashireneentaitakya?”<sup>35</sup> Arika paata ragaitakeri iimentaitari, aripaite ritziwentaitya.”<sup>\*</sup><sup>36</sup> Ari roshiyakaawentanakeniri Jesús, ikantziri: “Antyashipawo ikithaaitari, arikame rowamatankaitantyaawo osapeki owakerari, ari imaperotanakya isagaaperotanake arika aminthatanakya owakerari. Te irooperotakairo antyashipawo ikithaaitari rowamatankaitantyaawome owakerari.”<sup>37</sup> Te ikameethatzi eejatzi antyashipari mashitsinaki rowantaityaari eeryaatatsiri riraitziri. Arika rowantaitakyaari, ari risanaryaanake, apaawaitashitakya riraitziri, eejatzi inkemetakya mashitsinaki irirori.<sup>38</sup> Iri kameethatatsi owakerari mashitsinaki rowantaityaari eeryaari riraitziri. Ero rapaawaitanta apitekeroini.<sup>39</sup> Ikaatziri ametawori ririro poitatsiri, ero rametaawo rirairo eeryaari. Inkantapiinte: ‘Iro kameethatatsi arero poiri.’ ”

\* **5:35** Iriitake Jesús oshiyakaawentachari jaka. Iriitake kemetakariri raawakaayeta atziri. Kantakotachari eejatzi jaka, arika raayeetakeri iimentaitari, irijatziri kantakotacha arika rowamagaitakeri, osheki rowashirewaitanakya riyotaanewopaini.

## 6

### *Ikenkithatakotziro Jesús kiteesheri rimakoryaantaitari* (Mt. 12.1-8; Mr. 2.23-28)

<sup>1</sup> Okanta kiteesheri rimakoryaantaitari, ikenanake Jesús pankirentsimashiki. Ikanta riyotaanewopaini ikowiitanake okithoki pankirentsi, ramirokakitzimaitawo inkene royaawo. <sup>2</sup> Te inimoteri Fariseo-paini, rosampitakeri ikantziri: “¿Litaka pikowiitantawori? ¿Tema piyote te ishinetaantsita kiteesheriki rimakoryaantaitari?” <sup>3</sup> Rakanake Jesús, ikantanake: “¿Tema piñaanatakoteri eeroka ikantaganki David-ni itsipayetakari ikaataiyini aantawetakari ritashe? <sup>4</sup> Ikyaaake tasorentsipankoki, raakero pan tasorentsitsiri, rowakawo irirori, ipakeri ikaatzi itsipayetakari. Tema te ishinetaantsiweta rowaityaawo, apatziro rowapiintawo Imperatasorentsitaarewo.” <sup>5</sup> Irojatziri ikantantakariri eejatziri: “Jirika Itomi Atziri ipinkathariperotzi irirori, ranayiro jiroka kiteesheri.”

### *Atziri kisoimpekiri* (Mt. 12.9-14; Mr. 3.1-6)

<sup>6</sup> Okanta otsipa kiteesheri rimakoryaantaitari, ikyaaake Jesús rapatotapiintaitaga, riyotaantapai eejatziri. Ari risaikakeri atziri kisoimpekitsiri rakoperoki. <sup>7</sup> Ikanta Yotzinkariite itsipayetakari Fariseo, aamaane rowakeri Jesús iñeeri arika retsiyatakotakagairi mantsiyari kiteesheriki rimakoryaantaitari, ontzimantyaari inkantakoteriri. <sup>8</sup> Iri kantacha Jesús, riyotake irirori oita ikenkithashiretari. Ikaimakeri kisoimpekiri, ikantziri: “Pipoke, posatekya niyanki.” Pokapaake kisoimpekiri, katziyapaaka. <sup>9</sup> Irojatziri ikantantanakariri Jesús: “Tzimatsi nosampitemiri: ¿Litakama shinetaantsitsiri anteri kiteesheriki rimakoryaantaitari? ¿Tema okameethatzi aneshironkatante, irooma kameethatatsi owamaante? ¿Tema okameethatzi etsiyatakotakaante, irooma kameethatatsi ankaariperowaite?” <sup>10</sup> Ikempoyaanakeri piyowentakariri, irojatziri riñaanatantanakariri mantsiyari, ikantziri: “Pampiryaawakotai.” Matanaka, akotsitanai kameetha. <sup>11</sup> Iri kantzimaitacha jirikapaini, antawoite ikisaiyanakani. Ikenkithawaitaiyakeni tsika inkanteri Jesús.

### *Riyoyaake Jesús 12 Rotyaantaperore* (Mt. 10.1-4; Mr. 3.13-19)

<sup>12</sup> Ikanta ritonkaanake ramañaaari Pawa. Ari ikamaitawo maawoini tsireniriki ramana. <sup>13</sup> Okanta okiteeshetamanai, ipiyotakeri maawoini riyotaanewo. Ari riyoyaake ikaatzi 12, iriitake jitakeri Otyaantaperoriite. <sup>14</sup> Jirika ikaatzi riyoyaakeri: Simón, irijatzi iitakeri Pedro. Ipoñaapaaka Andrés irirentzi Simón. Ipoñaapaaka Jacobo itsipataakeri Juan, Felipe, Bartolomé, <sup>15</sup> Mateo, Tomás, Jacobo itomi Alfeo. Ipoñaapaaka Simón iitaitziri Jokaakowentantaneri, <sup>16</sup> ipoñaapaaka Judas irirentzi Jacobo. Ipoñaapaaka eejatziri Judas Iscariote, iri pithokashityaarine paata.

### *Ikenkithatakairi Jesús osheki atziri* (Mt. 4.23-25)

<sup>17</sup> Ikanta roirinkaiyaani Jesús itsipataari riyotaanewo. Ari risaikaiyapaakeni owintenipathatzira. Osheki atziri piyowentapaakariri, Judea-satzi, Jerusalén-satzi, Tiro-satzi eejatziri Sidón-satzi. Ripokaiyakeni jirikapaini inkemero ikenkithatakotziri Jesús, ikowaiyatziini eejatziri retsiyatakotakagairi mantsiyaripaini. <sup>18</sup> Tema ikaatzi raagayetziri peyari, retsiyatakotakaayetairi. <sup>19</sup> Ikowaiyanakeni atziri riterotantawakyaari rako, tema oshekitzimotziri Jesús ishintsinka, retsiyatakotakaayetziri maawoini.

### *Ikenkithatakotaitziri kimoshiretaatsine eejatziri ashironkaachane* (Mt. 5.1-12)

<sup>20</sup> Ikanta raminanakeri Jesús riyotaanewo, ikantziri: “Kimoshire pinkantaiya ashironkainkari, tema eerokatake ñagairone impinkathariwentantai Pawa.

<sup>21</sup> Kimoshire pinkantaiya piñaawetawowa pitasheyaneentawaitzi, tema irootaintsi piñagairo pinkemaneentaiya. Kimoshire pinkantaiya piñaawetawowa piraaneentawaita, tema irootaintsi piñeero pishirontawaitaiya.

<sup>22</sup> Kimoshire pinkantaiya onkantawetakya piñaawetyaawo inkisaneentaitemi, rooki-mawaitaitemi, inkaweyawaitaitemi, imanintawaitaitemi, okantakaantziro poshire-taarira Itomi Atziri. <sup>23</sup> Thaamenta pinkantayetai, pinkimoshireyetai, tema Pawa pinayetaimine inkiteki. Pinkenkithashiryakotero tsika ikantaitakeri pairani etanaka-woori Kamantantaneriite, irojatzzi awishimotemine eejatzzi eeroka iroñaaka.

<sup>24</sup> ¡Inkantamatsitaitairi ashaagantzinkari! Tema iñaawetakawo ketziroini inintaawaitaka.

<sup>25</sup> ¡Inkantamatsitaitairi kemaneentachari! Tema ari iñagairo paata ritasheyaneentai irirori. ¡Inkantamatsitaitairi ñaayetzirori ishirontawaita! Ari iñagairo paata rashironkaawaitaiya, ari riraawaitaiyaari eejatzzi.

<sup>26</sup> ¡Inkantamatsitaitairi rasagaawentaitari! Tema ari ikantaweetakari pairani os-hiyakowetakariri Kamantantaneri.”

*Petakotyaari kisaneentayetzimiri*  
(Mt. 5.38-48; 7.12)

<sup>27</sup> “Iro kantzimaitacha pinkeme nokantzi naaka: Petakotaiyaari ikaatzzi kisa-neentayetzimiri, paakameethayetairi. <sup>28</sup> Eero pipiyatari kishimawaitzimiri. Pa-manakoyetai yaari thaiyakoyetzimiri. <sup>29</sup> Arika ripasaitemi kashetawooni, pishine-taiyaari rimontewootemi ripasatemi. Arika inkowaite ragaitero piithaare posaan-tapiintari, pishinetainiri raanakero pikithaatakari eejatzzi. <sup>30</sup> Arika inkantaitemi: ‘Pimpena’, ontzimatye pimperi. Arika rayitaitemiro pashitari, eero piñaawaitakotziro. <sup>31</sup> Pikowirika retakoitemi, petawakyaawo eeroka petakotantya.

<sup>32</sup> Iriirika petakotya etakoyetzimiri eeroka. ¿Kameetharinima jiroka? Tema te, iroowa rantapiintakeri kaariperoshireri. <sup>33</sup> Iriirika paakameethatake aakameethatzimiri eeroka ¿Kameethatakema jiroka? Tema te, iroowa rantapiintakeri kaariperoshireri.

<sup>34</sup> Arika inkantaitemi: ‘Pimpawakenawo, ari noipiyaimi paata’, irojatzzi pimpan-tanakyaariri tema piyotzi ari rimataimi eeroka paata, ¿Kameethatakema jiroka? Tema te, iroowa rantapiintakeri kaariperoshireri. <sup>35</sup> Petakoyetai yaari kisaneentayetzimiri, eero pipiyatari. Pimpantayete arika inkowakoitemi, eero poyaawenta rimataitaimi eeroka. Antawoite ripinataimi, itomintaimira Jenokisatzzi. Imaperotatya retakoyetari irirori maawoini kaariperoshireripaini. <sup>36</sup> Ikemetai Ashitairi retakotai, ari pinkantyaari eeroka.”

*Ikenkithatakotziro Jesús kishimataantsi*  
(Mt. 7.1-5)

<sup>37</sup> “Eero pikishimatantzi, rimataitaimikari eeroka paata. Eero piyakowentantzi, rimataitaimikari eeroka paata. Arika pimpeyakotakaante, ari rimataitaimi eeroka paata. <sup>38</sup> Pantaneri pinatye, tema ari rimataitaimi eeroka paata, ranaakaitaimiro okaatzzi pipantakeri. Eenitatsirika pantakeri, arira inkantaitaimi paata eeroka.”

<sup>39</sup> Irojatzzi roshiyakaawentantanakanariri Jesús, ikantzi: “¿Kantachama rakathatawakaiya kaari kowichaatsine? ¿Tema ari imparyaake apitekeroini omoonakiki? <sup>40</sup> Te iñagaitzi apaani riyotagaitziri rawisheru yotairiri. Iroowa paata arika riyotaaperoitakeri ari roshiyaiyaari yotairiri pairani. <sup>41</sup> ¿Litaka pikowantari pamineniri itsipa tyaakitziinkari rokiki? Petawaiyaawo eeroka paawairo antawo inchapetoki tyaakitakemiri. <sup>42</sup> Eero okanta pinkanteri pisheninka: ‘Pipoke, nayemiro tyaakitakemiri pokiki.’ Tema tzimatsi pokiki antawo inchapetopi tyaakitakemiri. ¡Owapeyimotantanerí! Petawaiyaawo paawairo eeroka tyaakitakemiri pokiki, onkene pamineniri pisheninka tyaakitainchari eepichokiini rokiki.”

*Ari riyoitziro pankirentsi onkithokitanakerika  
(Mt. 7.15-20)*

<sup>43</sup> “Inchato saankanatatsiri ishooiki, te iñagaitziro onkaariperote okithokiki. Irooma inchato sampiyashitatsiri, te kameetha iñagaitero onkithokite. <sup>44</sup> Tema okaatzi kameethayetatsiri chochoki, tera okameethawaitashita apaniroini, iroowa kantakawori owaato okameethatzi iroori. ¿Añiiroma higo onkithokitantyaawo owaato kitochee? ¿Kantachama uva onkithokitantyaawo kitochee eejatzi? <sup>45</sup> Ari ikantaari kameethashireri ikenkithashiryaapiintawo kameethari, irootake okameethatantari rantayetzi. Iriima kaariperoshireri te ikenkithashiryaapiintawo kameethari, irootake okaariperotantari rantayetzi. Tema okaatzi ikenkithashireyeteri, irootake riñaaneyetakari eejatzi.”

*Ikenkithatakoitziri apite owatzikirori ipanko  
(Mt. 7.24-29)*

<sup>46</sup> “¿Litaka ikantantaitanari: ‘Pinkatharí, pinkatharí?’ Temaita rantaitanawo okaatzi nokantayetzi. <sup>47</sup> Eenitatsi antanairori okaatzi nokantayetzi. Jirika roshiyakari: <sup>48</sup> Roshiyakari atziri wetsikatsiri ipanko, ikiyashitakero itzinkami okisopathatzi, rowatzikakero. Irojatzu ipokantakari antawoite amaani, ookantapaakawo shintsiini pankotsi, te eewokiro. Tema rowatzikaitakitziro kameethaini okisopathatzi. <sup>49</sup> Iriima ikaatzi peyakotzirori nokantayetziriri, kaari antanairone, roshiyakari atziri wetsikawetachari ipanko, temaita ikiyashitziro inthomoiki itzinkami. Okanta ipokake antawoite amaani, ookantapaakawo shintsiini, tyaanake. Te iñagaitairo.”

## 7

*Retsiyatakotakagairi Jesús ronampire reeware owayeripaini  
(Mt. 8.5-13)*

<sup>1</sup> Ari rithonkanakero Jesús ikenkithatakairi atziripaini, jatai nampitsiki Capernaum. <sup>2</sup> Ikanta mantsiyatake retakoperotanewo ronampire reeware owayeripaini Roma-satzi, irootaintsi inkameme. <sup>3</sup> Ari ikemakowentakeri Jesús, rotyaantake Itzinkamipaini Judá-ite, inkaimeri Jesús, retsiyatakotakagainiri ronampire. <sup>4</sup> Ikanta riyaaashitakeri Jesús, ikantapaakeri: “Okowaperota pamitakoteri reeware owayeripaini, <sup>5</sup> tema raakameethatapiintakena, riwetsikaiyakenani pankotsi napatotapiintaga.” <sup>6</sup> Ikanta Jesús, royaatanakeri. Iro rareetantyaarime ipankoki, ritonkyotakari isheninkathori reeware owayeri, iri itsipa rotyaantakeri, ikantapaakeri irirori: “Jesús, ikantakaantzimi jewari, ikantzi: ‘Kaariperori nini naaka, eero pikyaawankotana. \* <sup>7</sup> Irootake kaari niyaatashitanzimi noñeemi naaka. Apatziro nokowiro piñaane pinkantakaantawakeri nonampire, aritake retsiyatakotai. <sup>8</sup> Tema eenitatsi imperatanari naaka, eenitatsi eejatzi owayeri nimperatari naaka. Arika nonkanteri: “Piyaate”, aritake riyaaatake. Arika nonkante otsipa: “Pipoke”, aritake ripokake. Arika nonkanteri nonampire: “Pantero jiroka”, rimatziro rantziro.’ ” <sup>9</sup> Riyokitziitanake Jesús ikemawakerira, ikantanakeri itsipatakari: “Iriitake matakrori jirika ikemisantzi, te itzimi jaka Israel-ki asheninka oshiyaarine jirika. Imaperotatya.” <sup>10</sup> Ikanta ripiyaa pankotsiki rotyaantaitakeri, iñaapaatziiri onampirentsi, etsiyatakotai imantsiyawaiwetaga.

*Rowañagairi Jesús eentsite kinankawo*

<sup>11</sup> Ikanta ikenanake Jesús nampitsiki jitachari Naín, iri itsipayetanaari riyotaanewo. Osheki eejatzi atziripaini. <sup>12</sup> Iro rareetzimatyaa nampitsiki, ritonkyotakotantakariri ragaitziri kaminkari inkitaiteri, apintzi rinatzi otomintari tsinane kinankawo. Osheki

\* **7:6** Jirika reeware owayeri kaari Judá-ite, itsipasatzi atziri rinatzi. Tema pairani Judá-ite, te ikyaawankotziri kaari isheninkata.



atziri oyaatakerori tsinane. <sup>13</sup> Ikanta Jesús iñaawakero tsinane, antawoite retakoshiretanakawo. Ikantziro: “Ataama piraawaitaka.” <sup>14</sup> Ripokapaake okaakiini, ipampitapaakero rowantaitakariri. Katziyaiyapaakani natakotziriri. Ikantzi Jesús: “Ewankari, eeroka niñaanatzi, pimpiriintai.” <sup>15</sup> Piriintanaa kamawetainchari kenkithawaitanai. Rakathatanairi Jesús irojatziri iriniroki. <sup>16</sup> Antawoite ithaawaiyanakeni ikaatziniñaakeriri. Ikimoshirewentanakeri Pawa, ikantaiyanakeni: “Pokataike iriiperori Kamantantaneri.” Ikantaiyanakeni eejatzi: “Pokataike Pawa iri neshironkayetaine aaka.” <sup>17</sup> Ithonka ikemakoitanakero rantakeri Jesús maawoini Judea-ki, eejatzi otsipaki nampitsi okaatzini saikanampiyetzirori.

*Rotyaantakeri Juan riyotaanewo*  
(Mt. 11.2-19)

<sup>18</sup> Ikanta Juan ikemake irirori okaatzini awisaintsiri, ikamantapaakeriri riyotaanewopaini. Ari riyoyaake apite riyotaanewo, <sup>19</sup> rotyaantakeri rosampiteri Jesús, inkanteri: “¿Eerokama iitaitziri ‘Pokatsine?’ Kaaririka eeroka, ¿Tzimatsima itsipanaamaiyaari pokatsine?” <sup>20</sup> Ikanta ripokaiyakeni, iñaapaakeri Jesús, ikantapaakeri: “Rotyaantakena Juan omitsitsiyaatantaneri nosampitemi: ¿Eerokama iitaitziri ‘Pokatsine?’ Kaaririka eeroka, ¿Eenitatsima itsipanaamaiyaari pokatsine?” <sup>21</sup> Eekero retsiyatakotakaayetatziri Jesús kantawaiyetachari mantsiyari, raagayetziri peyari, rokiryakaayetairi mawityaakiri. <sup>22</sup> Irojatziri rakantanakariri pokaintsiri, ikantanakeri: “Arika pipiyana, pinkamantapairi Juan okaatzini piñaakeri eeroka nantakeri, okaatzini pikemakari nokantakeri. Tema nokiryakagairi mawityaakiri, nanashitakaayetaari kisopookiri, nokemakaayetairi matyokempitari, netsiyatakotakaayetairi imatane pathaawontsi, nowañaayetairi kaminkari, nokamantayetairi ashironkainkari Kameethari Ñaantsi. <sup>23</sup> Irootake inkimoshiretantaiyaari kaari kisoshirewentainane.”

<sup>24</sup> Ikanta ripiyaiyanaani rotyaantanewo Juan, rosampitanakeri Jesús ikaatzini piyowentakariri, ikenkithatakotziri Juan, ikantziri: “¿Iitaka pikenkithashiretakotariri piñaakeri chapinki ochempiki? ¿Iriima piñaake oshiyawori sawoo ompironkatonkitakaawo tampyaa okantakaantziro te ithaamentashireta? <sup>25</sup> ¿Piñaakerima rowaneenkataka ikithaataka? Tema maawoini nintaawaitachari, owaneenkatachari ikithaata, risaikawankotziri pinkathari. <sup>26</sup> Iro piyaatashitantakariri piyotaiyakeni Kamantantaneri rinatzi. Rimaperotatziiro irirori ranaakeri Kamantantaneripaini. <sup>27</sup> Iriitake rosankenatakoitakeri pairani, riñaanatzi Pawa itomi, ikantzi:

Notomí, ari notyaantake paata etyaawone inkamantakotemi,  
Iriitake wetsikaantemine tsika pinkenapaake eeroka.

<sup>28</sup> Nokantzi naaka: Atziripaini ikaatzini tzimayewetainchari, tekaatsi Kamantantaneri anairone riyotanetakari Juan. Iri kantacha inkaate impinkathariwentairi Pawa inkiteki, tsinampashiretaatsine janta, ranagairi irirori paata Juan.” <sup>29</sup> Iriima atziripaini itsipatakari apatotziriri koriki, riyotanai tampatzikashireri rinatzi Pawa, romitsitsiyaayetairi Juan. <sup>30</sup> Irima Fariseo-paini itsipatakari Yotzinkariite te rishineta romitsitsiyaateri Juan, ari rapaatzirori rantzimotanteri Pawa.

<sup>31</sup> Irojatziri ikantantanakariri Pinkathari Jesús: “¿Iitaka noshiyakayeri jirikapaini? <sup>32</sup> Noshiyakagairi owashaantawarentzi eentsi arika roshiyakaawaitya ikaatzira reentsitaiyini, ikantawakaiyani: ‘Jame ashowiwaite omampaantyaari.’ Temaita ikowi. Ikantaweta eejatzi: ‘Jametya omampaawaitya owashiretantyaari.’ Temaita ikowi eejatzi. <sup>33</sup> Irootake rantayetakeri jirikapaini. Ñaayewetakariri Juan, ritzitapaakawo irirori owanawontsi, te ririro poiri, iro kantzimaitacha ikantaitakeri: ‘Peyarishireri rini.’ <sup>34</sup> Irojatziri ripokantakariri Itomi Atziri, te ritzitawo irirori owanawontsi, ririro poiri. Ikantaitakeri: ‘Kaariperori rinatzi, owawarentzi rinatzi, shinkiyantzi, raapatziyari apatotziriri koriki, raapatziyari eejatzi kaariperoshireri.’ <sup>35</sup> Tekaaitsi oitzimaitya,

tema yotzinkari ari riyoitairi paata imapero riyotanetzi, arika iñaaperoitairo onkaate awisayetatsine.”

### *Rareetari Jesús Fariseo jitachari Simón*

<sup>36</sup> Ikanta Fariseo raanakeri Jesús rowakayaari. Areetaiyakani ipankoki, saikapaake Jesús rowapiintaitaga. <sup>37</sup> Okanta kaariperoshirero tsinane nampitawori janta, okemakowentakeri Jesús ripokake ipankoki Fariseo rowaiyaani, pokanake iroori amakotanake kasankaari owantawo onaki riwetsikaitziro mapinaki. † <sup>38</sup> Okatziyimotapaakari iitzikeroki Jesús, irayimotapaakari. Ithaatanaka oyaaki okiki ashetzitakeri iitzi, oshetantzimaitari oishi. Othoyitzitanakeri, isaitantanakeri kasankaari. <sup>39</sup> Ikanta jirika Fariseo amakeriri Jesús, iñaakeri, ikantashiretanake: “Rimaperotatyeeyaame jirika inkamantantaneriite, ari riyotakerome tsika okantawaita jiroka tsinane thotayitzitakeriri, kaariperoshirero inatzi.” <sup>40</sup> Ikanta Jesús ikantanakeri Fariseo: “Simón, tzimatsi nokowiri nonkantemiri.” Ari ikantanake: “Janjaatya pinkantenawo yotaantanerí.” <sup>41</sup> Irojatzzi ikantantanakariri: “Tzimatsi Atziri, ipakeri iyorikite apite atziri. Apaani ipake 500 denario, iriima itsipa ipakeri 50 denario. <sup>42</sup> Okanta osamanitake, te rimatairi roipiyairi koriki jirika apite atziri, ipeyakoitairi rireewetanewo apitekeroini. Janjaatya pinkantena, ¿Itzimikama etakoperotantatsine?” <sup>43</sup> Rakanake Simón: “Nokantzi naaka iri etakoperotantatsiri atziri ipeyakoperoitakeri rireewetanewo.” Ari ikantzi Jesús: “Irootake pikantakeri.” <sup>44</sup> Raminanakeri Jesús isaikakera tsinane, ikantziri Simón: “¿Piñaakero antakeri jiroka tsinane? Nokyaawankotakemi eeroka, temaita pipana ñaa nonkiwayitzitapaakyaari. Irooma jiroka tsinane, okiwayitzitantakenawo oyaaki shitowanaintsiri okiki, irojatzzi oshetantantakenawo oishi. <sup>45</sup> Te pinintawootawakena piwethatawakena eeroka, irooma jiroka tsinane osheki onintayitzitakena. <sup>46</sup> Te pisaipatzii totantawori eeroka oyeenka pankirentsi pimpinkathatena, irooma jiroka tsinane, isaitantakenawo kasankaari noitziki. <sup>47</sup> Osheki okaariperoshirewetaka jiroka tsinane, impeyakoitainiro tema osheki onintakena. Iriima ikaatzzi ipeyakoitzi eepichokiini, eepichokiini inintantzi.” <sup>48</sup> Irojatzzi ikantantanakawori tsinane: “Ipeyakoitaimiro pikaariperoshirewetaka.” <sup>49</sup> Ikantaiyanakeni ikaatzzi itsipataiyakarini: “¿Iitatyaakama jirika rimatantyaawori impeyakotakaantero kaariperori?” <sup>50</sup> Eekero ikantanakitziro Jesús jiroka tsinane: “Piyaatai kameetha, iro pawisakoshiretantaari pikemisantanai.”

## 8

### *Tsinane amitakoyetakeriri Jesús*

<sup>1</sup> Ikanta Jesús itsipayetakari 12 riyotaanewo, rithotyakero nampitsi ikenkithatake, ikenkithatakotakeri Pawa tsika ikanta ipinkathariwentantai. <sup>2</sup> Ari itsipatakawo eejatzzi tsinanepaini okaatzzi retsiyatakotakagairi raagawetawo peyari, eejatzzi okaatzzi mantsiyayewetachari. Jiroka okaatzzi oyaatakeriri: María Magdala-sato raagawetari peyari ikaatzzi 7, <sup>3</sup> opoñaapaaka Juana iina Chuza rimperatanewo Herodes, opoñaapaaka Susana. Ari otsipatakawo eejatzzi otsipapaini tsinane okaatzzi papiintziriri koriki Jesús.

### *Roshiyakaawentziri Jesús pankiwairantzi* (Mt. 13.1-15, 18-23; Mr. 4.1-20)

<sup>4</sup> Ikanta ipiyowentapaakari Jesús osheki atziri poñaayetachari otsipaki nampitsi. Roshiyakaawentatziiniri okaatzzi riyotaayetziriri, ikantziri: <sup>5</sup> “Eenitatsi apaani pankiwairantzi jatatsiri impankiwaite. Ikanta rookakitakero iwankire, tzimatsi jokakita-painchari awotsiki, ithonka raatzikakitaitakero, ikanta ripokaiyakeni tsimeryaani, rowapaakawo. <sup>6</sup> Tzimatsi otsipa jokakitapainchari omapipookitzira kipatsi. Okanta

† 7:37 Irootake ikantakoitzi jaka mapinaki, iitaitziri otsipaki nampitsi “alabastro”.

ishookawetanaka pankirentsi, sampiyashitanake, tema te irenkapathata kameethaini kipatsi. <sup>7</sup> Tzimatsi otsipa jokakitapainchari kitocheemashiki. Okanta ishooke-wetanaka, kamanake anaanakero kitocheemashi. <sup>8</sup> Tzimatsi otsipa jokakitapainchari okameethapathatzira kipatsi, saankana okanta ishookepaake, kithokitanake. Apaani-paini shookepaintsiri kameethaini tzimayetai 100 okithoki.” Irojatzzi ikantantanakari Jesús: “Kowirori inkemathatero, rowayempitatty inkemisante.”

<sup>9</sup> Ikanta riyotaanewo Jesús rosampitanakeri oita oshiyakaawentachari okaatzi riyotaantakeri. <sup>10</sup> Rakanakeri Jesús, ikantziri: “Eerokapaini nonkamante kaari piyowetaiyani, ontzimatye piyotairo tsika ikanta Pawa ipinkathariwentantai. Iriima itsipapaini, eero nokamantziri irirori, apatziro noshiyakaawenteniri. Ari raminawetya, eeromaita ikowichaatzi. Ari inkemawetyaawo, eero ikemiro ikantaweetari. <sup>11</sup> Jiroka oshiyakaawentachari: Jiroka okithoki ipankiitakeri, riñaane Pawa oshiyakaawentachari. <sup>12</sup> Okaatzi jokakitapainchari awotsiki, oshiyakaawentziri kemawetawori ñaantsi, ikanta ripokapaake Kamaari imaisantakaapaakeri, te ikemisantanai, eero rawisakoshiretai. <sup>13</sup> Eejatzzi oshiyawo jokakitapainchari omapipookitzira, oshiyakaawentziri kemawetawori ñaantsi intsipaite ikemisantaweta. Temaita riyotakoperotzimaitawo ñaantsi, ripakaanakero ikemisantzi. Te ikisashitawo rantakagaitziri kaariperori, roshiyakawo pankirentsi kaari kyaaperotatsine oparitha inthomoiki kipatsiki. <sup>14</sup> Eejatzzi oshiyawo jokakitapainchari okitocheemashitzira, oshiyakaawentziri kemawetawori ñaantsi. Okantakaantziro okantzimoshirewaitari, ikenkithashiryaaakotawo rashaagantya, iñaamawaitawo inthaamentawaitya. Iro anaanakero ñaantsi ikemawetakari, roshiyakotakawo pankirentsi kaari kithokitatsine. <sup>15</sup> Irooma okithoki jokakitapainchari irenkapathataga kipatsi, oshiyakaawentziri kemanairori ñaantsi, kameethashire ikantanana, roshiyakotanaawo pankirentsi saankana rishookanake, osheki ikithokitanake.”

*Onkoñaatakoyetai manakoyewetainchari*

*(Mr. 4.21-25)*

<sup>16</sup> Ari ikantake eejatzzi: “Ankowerika ootyaari ootamento, ¿arima ashitakotakeri chomooki? ¿Amanakotzirima otapinaki? Tera. Owakotziri jenoki onkene ankoñaatakote maawoini. <sup>17</sup> Ari oshiyawo eejatzzi, ontzimatye onkoñaatakoyetai manakoyewetainchari, ooñaawontairo kaari riyotakoweeta pairani. <sup>18</sup> Paamayaawo okaatzi pikemakeri. Tzimatsirika oshekitzimotziri oitarika, ari iñaakero oshekitzimoperotairi. Iriima kaari oshekitzimotzi, eekero iñaatyeero eero oshekitzimoperotziri.” \*

*Inaanate Jesús eejatzzi irirentzipaini*

*(Mt. 12.46-50; Mr. 3.31-35)*

<sup>19</sup> Okanta ipokashitakeri inaanate Jesús otsipatakari irirentzipaini oñeeri. Temaita okanta oñeeri rotzikaakeri atziri piyochonchoitainchari. <sup>20</sup> Irojatzzi ikantaitantakariri: “Ari ipoki pinaanate otsipatakari pirentzipaini, okowi oñeemi.” <sup>21</sup> Ikantanake irirori: “Ikaatzi kemanairori riñaane Pawa, rantanairo ikowakairiri, iriitake nirentzitari, irootake ninirontari eejatzzi.”

*Romairiuro Jesús tampyaa*

*(Mt. 8.23-27; Mr. 4.35-41)*

<sup>22</sup> Ikanta rotetanaka Jesús pitotsiki itsipatanaari riyotaanewo, ikantanairi: “Jame amontye intatsikeronta.” Jataiyanakeni. <sup>23</sup> Ikanta rimontyaakoianakani, maanake Jesús. Ari omapokapaakariri antawoite tampyaa, antawo otamakaanake inkaare, ote-taagapaaka ñaa pitotsiki, iroowetaingha ritsitsiyakoteme. <sup>24</sup> Ari rowakiryagaitanakeri

\* **8:18** Okaatzi kenkithatakotachari jaka, jiroka okantakota: Eepichokiinirika pinkemisantawakero nokantakemiri, eepichokiini piyotairo. Irooma pinkemisantaperotawakerika, osheki piyotawakeri, eekero niyotakaaperotanakityeemiro.

Jesús, ikantaitziri: “¡Yotaanarí! ¡Atsitsiyakotatyé!” Piriintanaka, riñaanatanakero tampyaa, ikantziro: “¡Ataama pitampyaatake!” Riñaanatanakero eejatzi inkaare, ikantziro: “¡Pimairyate!” Awisanake tampyaa, mairyataanai. <sup>25</sup> Irojatzí ripithokashitantanakariri riyotaanewo, ikantziri: “¿Tsikama okenanakeka pawentaanewo?” Antawoite ipinkathatanakeri, ikantawakaiyani riyotaanewo ithaawankakiini: “¿Iitatyakama jirika romairyantawori tampyaa, romairiuro eejatzi inkaare?”

*Gadara-satzi raayiri peyari*  
(Mt. 8.28-34; Mr. 5.1-20)

<sup>26</sup> Ikanta rimontyaanakawo Jesús intatsikeroki inkaare Galilea, areetaka inampiki Gadara-satzi. <sup>27</sup> Iro raatakotapaakitziini, rishiyashitawakari raayiri peyari. Pairanitate raayiri peyari aatonkoryaamereki ikantaka, te rametaiyaawo risaikai pankotsiki, ari risaikawaitzi kitataarewomashiki. <sup>28</sup> Ikanta iñaaawakeri rareetapaaka Jesús, rishiyashitawakari, rotziwerowashitawakari. Shintsiini ikaimanake, ikantzi: “¡Jesús, Itomi Pawaperotatsiri! ¿Tsikama pinkantenaka? Te nokowi powashironkaina.” <sup>29</sup> (Ikisathatapaakitziiri peyari ripakagairiita atziri. Tema pairanitate risaikashiretantakari. Osheki roosoweetantari kotsirotha, rithatyiro. Rishiyashiyawaita ochempiki ikantakaakari peyari.) <sup>30</sup> Ikanta Jesús rosampitakeri peyari, ikantziri: “¿Tsikama piitaka?” Rakanake peyari, ikantzi: “Noita ‘Shekiyantzi.’ ” Tema osheki nokantaiyani. † <sup>31</sup> Eekero ikantanakitzi peyari: “Te nokowi pithonkaiyenani.” <sup>32</sup> Ari ipiyotaiyani chancho roshimotokawaitaiyini. Ikantaiyini peyari: “Potyaantena janta chanchoki.” Irojatzí ikantantanakariri Jesús: “Piyaate.” <sup>33</sup> Ikanta Shekiyantzi, ikyaantapaakari chancho-paini. Irojatzí rishiyantanakari impeetaki, mitagaiyanakeni inkaareki, rithonka ripiinkake.

<sup>34</sup> Ithaawaiyanakeni kempoyiiriri chancho-paini, shiyaiyanakani ikamantantapaake nampitsiki, ikamantzitanakari eejatzi saikayetatsiri rowaneki. <sup>35</sup> Pokaiyapaakeni atziri ramínero okaatzi awisaintsiri. Irojatzí riyaatashiitantanakariri Jesús. Iñagaitapaatziiri raagawetari peyari risaikake itsipatakari, ikithaataka, kameetha ikantaawo. Antawoite ithaawaiyanakeni. <sup>36</sup> Ikaatzi ñaakerori awisaintsiri ketziroini, ikamantawakeri pokayetaintsiri, ikantzi: “Piñaakeri raagawetari peyari, iriitake Jesús owawisaakotairiri.” <sup>37</sup> Ikanta Gadara-satzipaini roipiyawakeri Jesús, ikantziri: “Piyaatai, te nokowi pisaikimotena.” Iro roipiyantakariri ithaawakaanakityaari antawoite. Ari rotetanaawo Jesús pitotsiki, piyanaawo. <sup>38</sup> Ari ikantawetawaari rowawisaakotairi: “Nokowi noyaatanakemi.” Rakanakeri Jesús, ikantanakeri: <sup>39</sup> “Eero poyaatana, piyaatai pisheninkaki pinkamantapairi, pinkanteri: ‘Rowawisaakotaana Pawa.’ ” Ari ikantakariri atziri, jatai inampiki ikamantantapairo okaatzira rowawisaakotantaariri Jesús.

*Rishinto Jairo eejatzi tsinane terotzitakeriri iithaare Jesús*  
(Mt. 9.18-26; Mr. 5.21-43)

<sup>40</sup> Ikanta ripiyaawo Jesús, thaamenta ipiyowentawaari atziri, iriitakera royaa-neentakeri. <sup>41</sup> Tzimatsi atziri jitachari Jairo, iriitake jewatakaantatsiri rapatotapi-intaitaga. Ari iñapaakeri Jesús, rotziwerowashitapaakari, ikantapaakeri: “Nokowi piyaate nopankoki.” <sup>42</sup> Tema okamimatatzi rapintote rishinto. Tzimake 12 osarentsite. Ikanta royaatziri atziripaini Jesús, ranawiimatanakeri.

<sup>43</sup> Okanta tsinane osokaawaitachari, tzimakotake 12 osarentsi okemaatsiwaitaka, ithonkakero tzimimowetawori opimantziro ipinawetariri aawintantzinkari, temaita etsiyatakotzi. <sup>44</sup> Okenashitapaakeri itaapiiki Jesús, iterotzitakeri opatzikaaki iithaare. Apathakero etsiyatanake osokaawaita. <sup>45</sup> Ari rosampitantanake Jesús, ikantzi:

† 8:30 Kantakotachari jaka “Shekiyantzi”, irijatzira iitaitziri “Legión”. Piñaanatero isaawiki tsika rooñaaawontaitziro osankenata janta: Mt. 26.53.

“¿Litaka terotzitzenawori noithaare?” Tekaatsi thawetakotachane iitarika terotzitzenari. Ikanta Pedro itsipatakari ikaataiyini, ikantzi: “Yotaanarí, tema piñiiri ranawimatakemira atziripaini, eekero pikantatzi: ‘¿Litaka terotzitzenawori noithaare?’ ”<sup>46</sup> Eekero ishintsitanakitzi Jesús ikantzi: “Tzimatsi terotzitzenawori noithaare. Tema nokemawakero noshintsinka eenitatsi etsiyatakotakaakeri.”<sup>47</sup> Okanta iñaakero tsinane te imanakota okaatzi antakeri, antawoite othaawanake, ipokashitapaakeri Jesús, otziwerowashitapaakari, maawoini ikemaitakero othawetakota, ikemaitakero eejatzi tsika okanta etsiyatakotantaari.<sup>48</sup> Ikantanakero Jesús irirori: “Tsinané, iro owawisaakotaimiri pawentaanewo. Kantacha piyaatai, kimoshire pinkantanaiya.”

<sup>49</sup> Tekera ikaatziroota Jesús riñaanatziro tsinane, areetapaaka poñagainchari ipankoki jewatakaantatsiri rapatotapiintaitaga, ikantapaakeri: “Kamake pishinto, ataama poomerenchiiri yotaantaneri.”<sup>50</sup> Ikanta ikemakeri Jesús areetapainchari, ikantanake irirori: “Eero pithaawashiwaita. Pawentina, aritake etsiyatakotai.”<sup>51</sup> Ikanta rareetaiyapaakani pankotsiki, tekaatsi rishinete inkyaapaake, apatziro Pedro, Jacobo, Juan, ashitawori rishinto eejatzi iniro.<sup>52</sup> Osheki irakotaiyaworini kamaintsiri. Ikantapaakeri Jesús: “Eero piragaiyani, te okami eentsi, imakoryaatzi.”<sup>53</sup> Thainkashire rowaweetakari Jesús, tema imapero iñagaitakero okamake eentsi.<sup>54</sup> Ikanta Jesús rotaiyawakotapaakero, riñaanatzimaitawo shintsiini ikantziro: “¡Tsinané, pimpiinte!”<sup>55</sup> Piyashiretapaaka eentsi, piriintanaawo. Ikantanake Jesús: “Pimpero owanawo.”<sup>56</sup> Iyokitzi ikantanaka ashitawori eentsi. Eekero ikantanakitzi Jesús: “Te nokowi pinkamantantero okaatzi piñaakeri.”

## 9

### *Rotyaantaitziri 12 yotaarewo* (Mt. 10.5-15; Mr. 6.7-13)

<sup>1</sup> Ikanta Jesús ipiyotakeri 12 riyotaanewo ripasawyaakeri ishintsinka roitsinampaantyaariri peyari eejatzi mantsiyarentsi.<sup>2</sup> Rotyaantakeri inkamantantero jimpe ikanta Pawa ipinkathariwentantzi, retsiyatakotakaayetairi mantsiyayetatsiri eejatzi.<sup>3</sup> Ikantawakeri: “Eero paanake tsika oitya, eero paanake pikotzi, pithaate, powanawo, piyorikite, eero paanake eejatzi apite piithaare.”<sup>4</sup> Arika pareetakya pankotsiki, ari pimaapiintatye irojatzi pawisantakyaari.<sup>5</sup> Eerorika raakameethaitzimi janta, pawisapithateri, potekanairo piipatsite piitziki, iro riyotantaityaari te ikemisantzi.”<sup>6</sup> Ikanta riyaataiyakeni riyotaanewo, rithotyakero nampitsi ikamantantziro Kameethari Ñaantsi, osheki mantsiyari retsiyatakotakaayetake.

### *Ikamantakeri Juan omitsitsiyaatanteri* (Mt. 14.1-12; Mr. 6.14-29)

<sup>7</sup> Ikanta pinkathari Herodes iitaitziri eejatzi Tetrarca ikemakotakeri Jesús okaatzi rantayetzi, okantzimoshiretanakari, tema eenitatsi kantatsiri: “Añagai Juan omitsitsiyaatanteri.”<sup>8</sup> Itsipa kantatsiri: “Elías rinatzi.” Ikantaitzi eejatzi: “Aamaaka itsiparika Kamantanteri piriintaacha.”<sup>9</sup> Irojatzi ikantantanakari Herodes: “Noshiyakaatzi nihatizinkakaantakeri Juan-ni. ¿Itzimikama nokemakowentziri iroñaaka?” Oshekira ikowake iñeeri Jesús.

### *Rowaiyani 5000 shirampari* (Mt. 14.13-21; Mr. 6.30-34; Jn. 6.1-14)

<sup>10</sup> Ikanta ripiyayetaawo otyaantaarewo, ikamantapairi okaatzi rantayetakeri. Irojatzi ipiyotantawaariri maawoini, raanakeri nampitsiki iitaitziro Betsaida.<sup>11</sup> Iro kantacha yotake atziripaini tsika ikenake, rimpoitairi. Ikanta Jesús iñaawairira raawakeri kameethaini, ikamantakeri impinkathariwentantai Pawa, retsiyatakotakaakeri



mantsiyayetatsiri. <sup>12</sup> Okanta otsireniityaanake, ripokashitapaakeri Jesús 12 riyotaanewo, ikantapaakeri: “Potyaantairi atziripaini, ramine jimpe rimaye, jimpe royaa eejatzi, tema asaikatzi ochempiki.” <sup>13</sup> Rakanake Jesús, ikantanakeri: “Pimpereri eeroka royaari.” Ari ikantaiyini: “Tekaatsi nomperiri, apatziro otzimi 5 pan eejatzi apite shima. ¿Pikowima niyaate namanantakite royaari maawoini atziri?” <sup>14</sup> Tema ikaataiyini 5000 shiramparipaini piyotainchari. Ikanta Jesús ikantakeri riyotaanewo: “Pimpiyoteri inkaate 50 atziri poisaikeyeteri, ari pinkantakeriri maawoini.” <sup>15</sup> Rantakero, roisaikakeri maawoini atziri. <sup>16</sup> Raakero Jesús 5 pan eejatzi apite shima, raminanake inkiteki, riwetharyaawentakawo owanawontsi, itzipetowakero ipakeri riyotaanewo impayeteri maawoini atziri piyotainchari. <sup>17</sup> Rowaiyakani maawoini, kemandeentaiyakani kameetha. Rowiitai 12 kantziri okaatzi tzimagaantapaintsiri.

*Riyotake Pedro: Cristo rinatzi Jesús*

*(Mt. 16.13-20; Mr. 8.27-30)*

<sup>18</sup> Ikanta risaiki Jesús ramanamanaata itsipitari riyotaanewo. Ari rosampitakeri ikantziri: “¿Litaka ikenkithashiretakotanari atziripaini?” <sup>19</sup> Ari rakaiyanakeni, ikantzi: “Ikantayeetzi Juan-ni omitsitsiyaatantneri pinatzi, ikantayeetzi eejatzi Elías-ni pinatzi. Tzimatsi kantatsiri eejatzi: ‘Iri itsipa piriintaacha etawori Kamantantneri.’” <sup>20</sup> Irojatziri ikantantanakari Jesús: “¿Tsikama pikantaiyinika eeroka?” Rakanake Pedro, ikantzi: “Eerokatake Cristo poñaachari Pawaki.”

*Ikenkithatakotziro Jesús inkame*

*(Mt. 16.21-28; Mr. 8.31-9.1)*

<sup>21</sup> Ari ikantanakeri Jesús riyotaanewo: “Eero pithawetakotana.” <sup>22</sup> Eekero ikantanakitzi: “Osheki inkemaatsitakaityaari Itomi Atziri, imapero inkisaneentena Itzinkamipaini, reeware Imperatasorentsitaarewo, eejatzi Yotzinkariite. Ari rowamaakaantakena. Iro awisawetakya mawa kiteesheri, ari nañagai.”

<sup>23</sup> Irojatziri ikantantanakariri maawoini: “Tzimatsirika kowatsiri intsipatena, ripakayero okaatzi ikowashiwaitari rantayeteri, onkantawetakya inkentakotaiterime roshiretanaga, intsipatapiintaina kiteesheriki. <sup>24</sup> Tema ikaatzi etakowaitachari apaniroini rantayetziro iñaamashireyeteri, ari impeyawaitashitaiya. Iriima inkaate kamawentenane okantakaantziro ikemisantana, aritake rawisakoshiretai. <sup>25</sup> Aminaashiwaita otzimimotziri maawoini rowaagawopaini tzimatsiri jaka kipatsiki, ari ompeyakaashitaiyaari rañaamento, apaniroini rithonkaiya. <sup>26</sup> Tema ikaatzi kaaniwentakotanari naaka, kaaniwentakotakerori niñaaneyetakari, ari rimatairi Itomi Atziri inkaaniwentapairi paata arika ripiyai ramairo rowaneenkawo, rashi Ashitariri, rashi eejatzi maninkariite tasorentsitatsiri.” <sup>27</sup> Irojatziri ikantantanakari eejatzi Jesús: “Kyaaryoo, eenitatsi pikaatake jaka, eerowa ikamita ari iñaanairo tsika inkantya Pawa impinkathariwentantai.”

*Rishipakiriimotziri Jesús riyotaanewo*

*(Mt. 17.1-8; Mr. 9.2-8)*

<sup>28</sup> Okanta awisake 8 kiteesheri, tonkaanake Jesús ramaña, ari itsipatanakari Pedro, Jacobo eejatzi Juan. <sup>29</sup> Ikanta ramanaga, ari ipashiniwootanake Jesús, kitamaaniki okantanaka iithaare ishipakiryaaanake. <sup>30</sup> Iñaatzi apite katziyapainchari itsipatapaakeri Jesús, Moisés rinatzi itsipatakari Elías. <sup>31</sup> Ari ikatziyaiyapaakani otapotakari rowaneenkawo, ikenkithatakotziro jimpe inkantya Jesús impeyakaityaari Jerusalén-ki. <sup>32</sup> Ayimatakeri iwochokine Pedro eejatzi ikaatzi itsipatakari. Okanta awishimotanakeri iwochokine, iñaatziro rowaneenkawo Jesús itsipatakari apite koñaatapaintsiri. <sup>33</sup> Iro ripiyimatanaka apite tsipatapaintariri Jesús, riñaawaitanake Pedro, ikantzi: “¡Yotaanari, kameethawaitake asaiké jaka! Ari niwetsikemiri mawa pankoshetantsi pashi eeroka, rashi Moisés, rashi Elías.” Riñaawaitashitanaka Pedro, te riyotzi oita ikantziri.

<sup>34</sup> Ikenkithawaiminthaitzi Pedro, ipamankapaakeri menkori, thaawanake. <sup>35</sup> Ikematzi riñaawaitaitanake menkoriki ikantaitzi: “Notomi netakokitanewo rinatzi jirika, iriitake pinkemisante.” <sup>36</sup> Ari okaatapaake ñaantsi ikenkithawaitaitakeri, iñagaitatzi apaniroini ikatziyanaawo Jesús. Te ikamantantzitawo riyotaanewo jimpe ikanta iñaakeri, rimanane rowakero.

*Retsiyatakotakayiri Jesús eentsi raayiri peyari*  
(Mt. 17.14-21; Mr. 9.14-29)

<sup>37</sup> Okanta okiteeshetamanai, oirinkaiyaani Jesús ipoñagaawo tonkaariki, osheki pokapaintsiri ritonkyotawaiyaari. <sup>38</sup> Ari rosatekaka atziri, ikaimanake shintsiiini ikantzi: “¡Jesús, nokowi paminenari napintzite notomi! <sup>39</sup> Raagatziri peyari, osheki ikaimakaawaitziri, ishimorewaantetakairi ikamanawaitzi, romposakaawaitari, te ripakairi eepichokiini. <sup>40</sup> Nokantawetakari piyotaanewo rowawisaakotainari, te rimatziri.” <sup>41</sup> Rakanake Jesús ikantanake: “Te pikemanetzi eeroka. ¿Tsikama onkaate nisaikimotanaimi noñeero nonkisashitemi? Pamakeri pitomi jaka.” <sup>42</sup> Ikanta ramaitapaakeri eentsi, ishinkiwentakaanakari peyari, tyaanake isaawiki, antawoite rompetawaitanaka. Ikanta Jesús ikisathatakeri peyari, etsiyatakotanai eentsi, raanairi ashitariri. <sup>43</sup> Riyokitziwentanakeri atziri iñaakerowa ishintsinka Pawa.

*Rapiitairo Jesús ithawetakota inkamimotante*  
(Mt. 17.22-23; Mr. 9.30-32)

Irojatziri rapiitantanakawori Jesús ikantziri riyotaanewo: <sup>44</sup> “Powayempitayaawo eeroka jiroka ñaantsi, eero pipeyakotziro. Tema jirika Itomi Atziri ripithokashitaitaty-eeri raakaantaiteri.” <sup>45</sup> Iro kanzimaitacha te ikemathataiyironi okaatzi ikantawetariri, tema rimanapithaitatziiri eero ikemathatantawo. Iro ithaawantaiyarini tekaatsi osampiterine oita ikenkithatakotziri.

*Tsika itzimi iriiperotatsine*  
(Mt. 18.1-5; Mr. 9.33-37)

<sup>46</sup> Ikanta riyotaanewo Jesús ikantawakaawentakawo itzimirika iriiperotatsine. <sup>47</sup> Iri kanzimaitacha Jesús riyoshiretakeri ikenkithashiretari. Raake eentsi, roisaikakeri jimpe risaikaiyini. <sup>48</sup> Riñaawaitanake ikantzi: “Ikaatzi aapatziyariri oshiyariri jirika eentsi okantakaantziro raakotziro nowairo, oshiyawaitakawo naakame raapatziya. Ari oshiyawo eejatzi, arika raapatziyena naaka, oshiyawaitanakawo iri raapatziyaka otyaantakenari jaka. Ikaatzi kaari iriiperowaitatsine jaka, iriitake iriiperotaatsine paata.”

*Ari akaatziri kaari kisaneentairi*  
(Mr. 9.38-40)

<sup>49</sup> Ari ikantanake Juan: “Yotaanarí, noñaake chapinki atziri raakotziro piwairo, retsiyatakotakaakeri raayiri peyari. Te añiiri antsipatyaari jaka, nipakaakaakeri.” <sup>50</sup> Ari ikantanake Jesús: “Eero pipakaakairime, tema ari akaatziri kaari kisaneentairi.”

*Ikisathataitziiri Jacobo eejatzi Juan*

<sup>51</sup> Ari imonkaatzimatapaaka reethonkitantaiyaari Jesús, tontashire ikantanaka riyate Jerusalén-ki. <sup>52</sup> Rotyaantake iita aminaanterine janta Samaria-ki. <sup>53</sup> Iro kanzimaitacha te ikowaiyini Samaria-satzi inkenimoteri, tema riyotaiyini riyaatatye Jerusalén-ki. <sup>54</sup> Ikanta Jacobo itsipatakari Juan, ikantanakeri Jesús: “Pinkathari, jame ankaimakaante paampari inkiteki, oshiyawori rantakeri pairani Elías, rithonkyata ritaiya maawoini.” <sup>55</sup> Ari ripithokashitanakari Jesús, ikisathanakeri, ikantziri: “Te pikameethashiretzi eeroka. <sup>56</sup> Te iro ripokantakari Itomi Atziri jaka impeyashiwaitaiya atziri, ontzimaty rowawisaakoyetairi.” Irojatziri ikenantanakari otsipaki nampitsi.

*Kowawetachari royaaterime Jesús  
(Mt. 8.18-22)*

<sup>57</sup> Ikanta riyaaatanai Jesús, ikantaweetawaari awotsiki: “Pinkatharí, nokowi noy-aatemi tsikarika pinkenayete eeroka.” <sup>58</sup> Rakanakeri Jesús ikantziri: “Tzimatsi imoo ot-sitziniro jimpe rimaapiintzi, eejatzi tsimeryaani eenitatsi imayemento. Iriima jirika It-omi Atziri tekaatsi ipanko rimaantapiintyaari.” <sup>59</sup> Ikantanakeri Jesús itsipa: “Poyaatena eeroka.” Ari ikantzi irirori: “Pinkatharí, nokowawetaka noyaatanakemi, iro kantzi-maitacha nokowi noñaanakeri nonkitateri nopaapate, ari noyaatemiri.” <sup>60</sup> Ikantanakeri Jesús: “Poyaatena, pishineteri ikaatzi kamashireyetsiri inkitatairi irirori kamayetat-siri. Ontzimatyete pinkenkithatakotairo eeroka tsika inkantya Pawa impinkathariwentantai.” <sup>61</sup> Ari ikantanake itsipa: “Pinkatharí, nokowi naaka noyaatemi, iro kantzi-maitacha pishineteri niwethatapanantyaari nosheninka nonampiki.” <sup>62</sup> Rakanake Jesús, ikantziri: “Apatziro potzikanatawo pikiyashitziro piwankire, tekaatsi pami-nayetanai otsipa. Ari roshiyari kaari pakairone rantayetapiintziri, te opantaperotari iñero impinkathariwentairi Pawa.”

## 10

*Rotyaantaitakeri ikaatzi 70*

<sup>1</sup> Ikanta Jesús riyoyaake itsipa ikaatzi 70, apitepaine rotyaantakeri, reewateri nampitsiki inkenanakenta irirori. <sup>2</sup> Ikantayetziri: “Roshiyakawo atziripaini pankirentsi risampainkatzi, iro kantacha te itzimaperotzi iita owiitairine. Pamañaari Pinkathari rotyaanteeta jatatsine atziriki, tema yotacha osheki kemisantayetaatsine. <sup>3</sup> Notyaantaiyatyeemini, noshiyakaimi rotyaantaitziri oweja ipiyotaga owantaneri. <sup>4</sup> Eero paanake pithaate, piyorikite, pizapato-te. Eero piwethatari, eero pikenkithawaitakairi eejatzi inkaate piñaanakeri awotsiki posamanitzikari. <sup>5</sup> Arika pareeyetakya pankotsiki, piwethatapaakyaari saikatsiri. Pinkantapaakeri: ‘Onkamintha pisaikawaite kameetha pipankoki.’ <sup>6</sup> Tzimatsirika aakameethatakemine, aritake iñaakero risaikake kameetha. Irooma eerorika raakameethataitzi, aminaashita piwethatapaakari. <sup>7</sup> Apatziro pimaapiinte pankotsiki tsika pareeta, eero paminaminatzi otsipa pankotsi. Ari poyaari, pirero onkaate impaitemiri. Tema ikaatzi antawaitatsiri ripinaiziri. <sup>8</sup> Arika raakameethataitakemi nampitsiki, poyaawo onkaate impaitemiri janta. <sup>9</sup> Petsiyatakotakaayeteri mantsiyari, pinkanteri: ‘Irootaintsi impinkathariwentantai Pawa.’ <sup>10</sup> Irooma pareewetakya nampitsiki, eerorika raakameethaitzimi, pawisapithateri, pinkantanake: <sup>11</sup> ‘Notekanairo noipatsiyitzi jaka, riyotaitantyaari te pikemisantzi. Ontzimatyete piyotzimaitya romapokakemi Pawa ipinkathariwentantai.’ <sup>12</sup> Tema rimaperoitatyeeri rowasanketaiteri paata, anaanakeri ikantaitakerira Sodoma-satzi. Imaperotatya.”

*Ikantamatsitaitziri kisoshireri nampitsipainiki  
(Mt. 11.20-24)*

<sup>13</sup> “Ikantamatsitaitziri Corazín-satzi, eejatzi Betsaida-satzi. Iñaawetakawo nitasonkawentantake, temaita ikemisantaiyini. Iriime ñaakenaneme Tiro-satzi eejatzi Sidón-satzi, aritake rowashiretakotakyaame ikaariperoshireyetzira. Ari ripakaakerome, inkemisantaima maawoini iriroripaini. \* <sup>14</sup> Arika raayeetairi paata kameethashireri, eero rimaperoitziri rowasanketaiteri Tiro-satzi eejatzi Sidón-satzi. Iriima Corazín-satzi, eejatzi Betsaida-satzi, iriira rimaperoitairi rowasanketaitairi paata. <sup>15</sup> Eejatzi inkantaiya Capernaum-satzi, ikenkithashiretaiyani irirori riyaaayetaime inkiteki, iro kantzimaitacha inkenashitaiya kaminkarimashiki.

\* **10:13** Tema ikaatzi Corazín-satzi eejatzi Betsaida-satzi Judá-ite rinayetzi. Iriima Tiro-satzi eejatzi Sidón-satzi pashinisatzi atziri rinayetzi te isheninkatari Judá-ite.

<sup>16</sup> Eenitatsirika kemisantemine, naaka ikemisantake. Itzimirika manintashiretakemine, naaka imanintashiretake. Itzimirika manintashiretakenari naaka, imanintakeri otyaantakenari jaka.”

### *Ripiyayetaa rotyaantaitakeri kaatatsiri 70*

<sup>17</sup> Kimoshire ripiyaiyaani rotyaantaitakeri kaatatsiri 70, ikantayetapai: “Pinkatharí, naakotairo piwairo, nimatakeri peyari nokantayetziri.” <sup>18</sup> Ikantzi Jesús: “Noñaakeri Satanás rowaryaitakeri inkiteki roshiyawaitanakawo ookathawontsi. <sup>19</sup> Tema naaka pakemirori shintsinkantsi, ari imatakya posatekantyaari maanke eejatzi kitonirropaini. Ari potsinampaakeri peyari kisaneentzimiri, tekaatsimaita awishimotemine. <sup>20</sup> Eero pikimoshirewentashitawo pimatakeri peyari okaatzi pikantakeriri. Iro pinkimoshirewente rosankenaitairo piwairo inkiteki.”

### *Ikimoshiretzi Jesús*

*(Mt. 11.25-27; 13.16-17)*

<sup>21</sup> Irojatzzi ikimoshiretantanakari Jesús, ikantanake: “Ashitanarí, eerokatake pinkathariwentziriri inkiteweri, eejatzi kipatsisatzi, antawoite niwetharyaakemi. Tema eerokatake yotakaayetairiri tsinampashireri kaari riyoyetzi yotaneriite. Ari okantzimaita Ashitanari, irootake inimotakemiri eeroka.” <sup>22</sup> Ikantzi Jesús: “Iriitake Ashitanari pasawyaakenawori maawoini. Apatziro ikanta irirori riyoperotana naaka tema itomi rowana. Ari nokantzitakari naaka apatziro niyoperotziri. Tema inkaate niyotakaayetairi naaka ari riyoyetairi Pawa.”

<sup>23</sup> Ikanta Jesús ipiyotakeri riyotaanewo, raanakeri jantyaatsikaini, ikantakeri: “Kimoshire rinaatye inkaate ñaayetairone okaatzi piñaayetairi eeroka. <sup>24</sup> Tema tziwawetacha osheki Kamantantaneri, eejatzi pinkatharipaini kowawetainchari iñeeroome okaatzi piñaakeri eeroka, temaita okanta iñeero, te ikemayetairo eejatzi.”

### *Aakameethatantaneri Samaria-satzi*

<sup>25</sup> Ari risaikakeri yotaanzirori Inintakaantaitanewo, ikowaweta rikompi-takayaarime Jesús, ikantake irirori: “Yotaanarí, ¿oitaka kowachari noñaantaiyaawori añagaantsi?” <sup>26</sup> Rakanakeri Jesús: “¿Iitaka okantziri Inintakaantaitanewo? ¿Tsika okantaka piyotakotziro eeroka?” <sup>27</sup> Ari rakanai irirori, ikantzi:

“Pinintaperotairi Piwinkatharite Pawa, pinintashirenkatairi, pinintashintsitairi, pinintashiretairi.”

Ari oshiyawo eejatzi:

“Petakotawakaiya maawoini, oshiyakairo anethairo awatha, ari ankantairi asheninka.”

<sup>28</sup> Irojatzzi ikantantanakari Jesús: “Imapero pikantakeri. Pantero jiroka, aritake pawisakoshiretai.”

<sup>29</sup> Iro kantzimaitacha jirika, ikowajaantzi rotzikaawentanakya, rosampitziri Jesús: “¿Iitaka noshiyakairi nosheninka?” <sup>30</sup> Rakanai Jesús, ikantzi: “Tzimatsi asheninka poñaachari Jerusalén-ki ikowi riyatero nampitsiki Jericó. Okanta niyanki awotsi, ritonkyotakari koshintzi, romposawaitawakeri, rookanakeri awotsinampiki, kamimatake. <sup>31</sup> Ari ripokake Imperatasorentsitaarewo, iñaawetapaakeri romaryaaka, rawisapithatanakeri. <sup>32</sup> Ari ikantakari eejatzi isheninka Leví-ite, iñaawetapaakeri romaryaaka, rawisapithatanakeri. <sup>33</sup> Irojatzzi ripokantakari Samaria-satzi, iñaapaakeri romaryaa, ineshironkatapaakeri irirori. <sup>34</sup> Raawintapaakeri ritziritantapaakeri oyeeenka pankirentsi, rotetakaanakari iyawayoteki, raanakeri nampitsiki. Iriitake kempoyaapaakeriri. <sup>35</sup> Okanta otsipa kiteesheri, raake apite denario, ripinakowentanakeri, ikantanake: ‘Pinkempoyeenari jirika, aritake nipinatapaimi arika nipiyake.’ ” <sup>36</sup> Ari ikantzi Jesús: “Mawa ikaatzi nokenkithatakotakeri ñaakeriri romposanewo koshintzi.”

¿Tsika itzimika oshiyakaakeriri isheninka?” <sup>37</sup> Rakanai yotakotzirori Inintakaantaitanewo, ikantzi: “Iriitake matakakeriri ineshironkatakakeri.” Irojatzzi ikantantanaari Jesús: “Piyaatai, iroowa panteri eeroka.”

### *Rareetawo Jesús opankoki Marta eejatzzi María*

<sup>38</sup> Ikanta rawisanake Jesús areetaka otsipaki nampitsi. Ari isaikiri tsinane jitachari Marta, irootake risaikimotapaake opankoki. <sup>39</sup> Jiroka tsinane tzimatsi irento oita María. Irootake tsipatawakariri okaakiini Jesús okemisantziri ikenkithawaitzi. <sup>40</sup> Iro kantzimaitacha Marta osheki okantzimotakawo aminaminawaitzi oita ompawakeriri Jesús. Irootake ipokashitantapaakariri, okantapaakeri: “Pinkatharí, ookanawentakena eentyo. ¿Pinkantenawo amitakotawakena?” <sup>41</sup> Ikantzi Jesús: “Marta, ¿oitaka okantzimoshiretantzimiri onkaate pantayeteri?” <sup>42</sup> Pinkeme nonkantemi: Apaani okanta kowaperotachari, irootake iyoyaakeri María tekaatsi kanterone raapithatairo.”

## 11

### *Ikenkithatakotziro Jesús amanaantsi (Mt. 6.9-15; 7.7-11)*

<sup>1</sup> Ikanta Jesús riyataake ramaña. Ikanta riyotaanewo, ikantakeri: “Pinkatharí, piyotainawo ramanaita, ikemetairo Juan-ni riyotaantziro amanaantsi.” <sup>2</sup> Ari ikantanake Jesús: “Jiroka pinkantero pamanapiintya eeroka:

Ashitanarí, Inkitesatzi,

Tasorentsi pini eeroka.

Pimpinkathariwentaina naaka.

Pantakainawo jaka kipatsiki okaatzi pinintakaanari eeroka.

Poshiyakagainari saikatsiri inkiteki, rantayetziro okaatzi pinintakairiri.

<sup>3</sup> Pimpapiintenawo koityiimotanari nowanawo.

<sup>4</sup> Pimppeyakotakagainawo nokaariperoshirewaitzi,

Tema nimatakero naaka, nopeyakotairi ikaatzi owaariperoshiretanari.

Eero pishinetaana iñaantaitena, inkowaite rantakaitenawo kaariperori.”

<sup>5</sup> Ikantantanake eejatzzi Jesús: “Arika intzime pitsipaminthare, ripokake niyanki-

iteki, inkantemi: ‘Pimpawakena mawa pan, <sup>6</sup> tzimatsi areetainchari nopankoki,

tekaatsi nompawakeriri.’ <sup>7</sup> Ari pinkantawetyaari: ‘Eero poomerenchaana noimaatzi-

iri neentsitepaini, tema nashitanakero nopanko, irootake eero okantanta nom-

pemi.’ <sup>8</sup> Oshiyawaitakawo eero pikowaweta pimperi okantawetaka iriiwetaka pitsi-

paminthare. Iro kantacha eekero ishintsitatzi ikowakotzimi, ari potsiwakanakyaawo

pinkakitanake, pimpawakeri okaatzi ikowiri.” <sup>9</sup> Ikantzi Jesús: “Pinkowakotante,

pithotyaakote eejatzzi, aritake piñaakero impaitemiro pikowiri. Poshiyakairo pa-

reetya pankotsiki, pishintsineentantapaake, pinkanteri: ‘Pashitareenawo. Aritake

rashitaryagaitakemiro.’ <sup>10</sup> Ari impayeetairi kowakowatatsiri. Inkaate aminaminat-

sine roñaagaitziri. Aritake rashitaryagaitainiri inkaate shintsishintsitatsiri inkaime.

<sup>11</sup> Tema arika inkowakotemi pitomi, inkantemi: ‘Papá, pimpena pan.’ ¿Arima pimpakeri

mapi? Arika inkantemi: ‘Pimpena shima noya.’ ¿Arima pimpakeri maanke royaari?

<sup>12</sup> Arika inkantemi: ‘Pimpena iithoki.’ ¿Arima pimpakeri kitoniro? <sup>13</sup> Tema piyotziro

petakotari pitomipaini eeroka, kaariperori pinaweta. Iriitake maperotzirori Ashitairi

saikatsiri inkiteki, retakotari irirori ikaatzi amanapiintariri, risaikashiretakaanari

Tasorenkantsi.”

### *Koshekawakaachari pankotsiki (Mt. 12.22-30; Mr. 3.20-27)*



<sup>14</sup> Ikanta Jesús rowawisaakotakeri kisowaanteri raayiri peyari. Ikanta retsiy-atakotakagairi, kenkithawaitanai kisowaantewetachari. Antawoite riyokitziwentaitanakeri Jesús. <sup>15</sup> Eenitatsi kantayetanaintsiri: “Ripasawyaatziiri ashitariri peyari, iitaitziri ‘Beelzebú’, irootake rimatantawori rowawisaakotziri ikaatzi raagayetziri peyari.” <sup>16</sup> Tzimatsi itsipa kowatsiri iñeero ritasonkawentante Jesús, iro riyotantaityaari imaperotatya opoña itasorenka inkiteki, tema iñaantaitatyaari. <sup>17</sup> Ikanta Jesús riyotake okaatzi ikenkithashiretari atziripaini, ikantanake: “Arika rantaminthatawakaiya atziri ipinkathariwentaitziri nampitsiki, iñiuro rookanawentawakaiya. Arika rantaminthatawakaiya eejatzi atziri risaikawankotawakaiyanira, ari iñaakero rookanawentawakaiya. <sup>18</sup> Ari ikanta eejatzi peyari arika rantaminthatawakayaame, ari rookanawentawakaakya eero iñiuro ishintsite, ari rithonkyaari. ¿Iitaka pikantantanari iri Beelzebú matakaanawori netsiyatakotakaantantari? <sup>19</sup> Iriirikame Kamaari Beelzebú matakainawoneme netsiyatakotakaante, ¿irijatzima Kamaari matakairiri piyotaane eeroka retsiyatakotakaantariri raagayetziri? Arika okanta, pithawetakotatziri piyotaanewo, ari inkisantakemiro okaatzi pikantakeri. <sup>20</sup> Iriitake Pawa kantakaantzirori netsiyatakotakaantariri raayiri peyari, tema romapokakemi Pawa eeroka ipinkathariwentantai. <sup>21</sup> Atziri ñaaperori kameethaini, tekaatsi materine inkyaashiteri ipankoki rayiteri okaatzi rashitari. <sup>22</sup> Irooma ripokashitakeri itsipa atziri maperotzirori ishintsitzi, raapithatakeri rawentaawetari, raapithatakeri rashitari, rantetakyaawo. <sup>23</sup> Tema ikaatzi kaari aapatziyanari naaka, iriitake kisaneentanari. Inkaate kaari amitakotenane rowiitakotena, reewanatakotakena.”

### *Ripiyashitanta peyari*

*(Mt. 12.43-45)*

<sup>24</sup> “Oshiyawaitakawo risaikashiretantaimpe peyari, ipankotetakawo rañaamento atziri. Arika rookaweetakyaari, awisakoweta atziri risaikantari peyari. Jatake inkenawaite ochempiki, eero iñi jimpe risaike. Irojatziri inkantantaiya peyari: ‘Nipiyaita nopankoki nopoñaakaga.’ <sup>25</sup> Piyaawo peyari, iñaapairi atziri kameetha opishitaka rañaamento, owaneenka ikantaka. <sup>26</sup> Ikanta peyari riyaaatashitakeri maperotzirori ipeyaritzi, inkantapaakeri: ‘Jame aate nopankoki, pintsipatena ampinkatharite.’ Ramake inkaate 7. Ari rowashironkaaperotyaari atziri, eero oshiyaawo rashironkaawetaga pairani eepichokiini ikanta.”

### *Maperoterone inkimoshiretai*

<sup>27</sup> Te ikaatziro ikenkithawaitzi Jesús, okaimanake tsinane osatekainchari ipiyotakaga atziri, okantzi: “Thaamenta onkantya tsinane owaiyimiri, antarintakemiri othotaimi.” <sup>28</sup> Irojatziri rakantanakawori Jesús, ikantzi: “Iri thaamentaperotaachane inkaate kemisantairone riñaane Pawa.”

### *Ikowaiyini kaariperoshireri ritasonkawentante Jesús*

*(Mt. 12.38-42)*

<sup>29</sup> Ikanta ipiyotapaaka osheki atziri, ikantanake Jesús: “¿Iitaka ikowantari iñeena kaariperoshireri nitasonkawentante? Eero noñaayimaitari, apatziro iñeero oshiyawori iñaakeri pairani Jonás. <sup>30</sup> Tema ikantakaga pairani Jonás iñagaiyakerini Nínive-satzi, ari inkantaiyaari eejatzi Itomi Atziri iñagairi jirikapaini. <sup>31</sup> Paata arika raminakoitairo okaatzi rantayeetziri, ari iyakowentaimi tsinane pinkatharitatsiri pairani nampitsiki Sabá, tema ipokashitakeri iroori yotzinkari jitachari Salomón, okemisantairi. Jirika saikimotakemiri eeroka, ranairi Salomón. <sup>32</sup> Eejatzi oshiyawo ari riyakowentaimi paata Nínive-satzi, tema ikemisantaiyakerini irirori pairani Jonás, ripakaanakero ramewetari. Jirika saikimotakemiri eeroka jaka, ranairi Jonás.”

### *Ikenkithatakotziri Jesús ootamentotsi*

*(Mt. 6.22-23)*

<sup>33</sup> “Arika ankowe ootyaari ootamento, ¿arima owakotakeri otapinaki? Tera, owakotziri jenoki onkene ankoñaatakote maawoini. <sup>34</sup> Okameethatzirika poki, piñaantawo kameethaini, oshiyawaitakawo pinkoñeetyaakotatyeeeme. Terika okameethatzi poki, eero piñaantawo kameethaini, oshiyawaitakawo pintsirenikitakotatyeeeme. \* <sup>35</sup> Paamaawentya poitsiwakirikari ootamentotsi saikantakemiri. <sup>36</sup> Imaperorika risaikantakemi ootamentotsi, eerorika pantanairo kaariperori, aritake poñaagantairo irooperori kameethari, poshiyanaiyaari ootamentotsi roorentantzi.”

*Ikenkithatakota yotaantzirori Inintakaantaitanewo*

*(Mt. 23.1-36; Mr. 12.38-40; Lc. 20.45-47)*

<sup>37</sup> Ikanta ikaatapaakero ikenkithatake Jesús, ripokashitapaakeri Fariseo riyataakairi ipankoki roya. Ikanta rareetaka Jesús pankotsiki, saikapaake rowapiintaitaga. <sup>38</sup> Osheki ikompitzimotakari Fariseo iñaakerira Jesús te rimonkaatziro rametapiintari, inkiwaakotapaakya rowantyaari. <sup>39</sup> Iri kantzimaitacha Jesús, ikantanake: “Poshiyako-takawo piraamento eejatzi powamento okiteweta kameetha jakakeroki, irooma intho-moikinta, sheretake okantaka. Ari pikantakari eero ka iñaaweetzi kameethashireri pikantaka, tema koshintzi pinatzi kaariperoshireri pikantaka. <sup>40</sup> Masontzi. Tema eenitatsi wetsikakemiri piwathaki koñaayetsiri, ¿kaarima wetsikitakemiri eejatzi intho-moiki pañaamentoki? <sup>41</sup> Okowaperotatya pimpashitantaiyaawo oshekitzimotzimiri inthomoiki pañaamentoki, ompoñaantaiyaari pinkiteshireperotantaiyaari.

<sup>42</sup> ¡Ikantamatsitaitzimi Fariseo! Pipapiintziri Pawa inchashitsityeyaki. Temaita pantziniri ikowiri. Ontzimatyepinkameethashiretai, pinintashiretai eejatzi. Tema iro kowaperowetacha pantayeterome jiroka, eero pipakayimaitawo otsipa. † <sup>43</sup> ¡Ikantamatsitaitzimi Fariseo! Osheki pikowapiintziro posatekya niyankineki rapatotapiintaitaga, ari pikantzitawo eejatzi pikowi pinkatha riwethatapiintaitemi arika iñagaitemi. <sup>44</sup> ¡Ikantamatsitaitzimi Yotzinkariite eejatzi Fariseo, owapeyimotantaneri pinatzi! Poshiyashitakawo te riyoitzi ari ikitaitziri kaminkari, te riyotzimaita atziri raatzikakotatziirira kaminkari.”

<sup>45</sup> Ari rakanake Yotaantzirori Inintakaantaitanewo, ikantanakeri Jesús: “Yotaantan-erí, pikemakaakenawo naakapaini okaatzi pikantakeri.” <sup>46</sup> Rakanake Jesús, ikantzi: “¡Ikantamatsitaitzimi eejatzi eero ka Yotaantzirori Inintakaantaitanewo! ¿Iitaka pike-matenatakaantariri atziripaini? Te pimatzimaitawo eero ka pinkematenatyaawo. <sup>47</sup> ¡Ikantamatsitaitzimi eero ka, oitaka powaneenkachonchoinatakotantariri ikitaitakerira etayetakawori Kamantantaneri! Iriitake rowamaakeri pairani picharinepaini. <sup>48</sup> Pimatakeri eero ka piwetsikashitakeri tsika ikitaitakeri, ari okoñaatziri pakakotatziiri rantakeri picharinepaini. <sup>49</sup> Tema yotane rinake Pawa, ikantake: ‘Ari notyaantake Kamantantaneri intsipatakyaari otyaantaarewo. Apaanipaini ikoshekaitaka, ritsi-tokaitake itsipa.’ <sup>50</sup> Ari onkantya rowasanketantaitemiri eero ka, okantakaantziro powamaayetakeri Kamantantaneri etanakawori pairani. <sup>51</sup> Eero ka atsipetaiyaawone okantakaantziro rowamaakaantaitakeri pairani, retanakawo Abel-ni irojatzzi Zacarías-ki iriitajaantake rowamagaitakeri ripiyawetaawo tasorentsipankoki ritayiniri Pawa. <sup>52</sup> ¡Ikantamatsitaitzimi Yotaantzirori Inintakaantaitanewo! Te pimataatsikaitziro eero ka piyotanete, ari pikantakero eero ka kaari ikemathatantawo itsipapaini.”

<sup>53</sup> Ikanta Jesús rithonkakeri ikantayetakeri. Ari retanakawo Fariseo itsipayeta-paakeri Yotzinkariite, ipiyowentari Jesús ikowi rikompitakayaarime, inkemantyaariri

\* **11:34** Oshiyakaawentziri oki kameethatatsiri iriitake pantaneri, kaari shampitsiwaitatsine. Iri ñagairone inke-mathatairo okaatzi rantakairiri Pawa, tema risaikanaatzi okoñeenkatziira. Oshiyakaawentziri oki kaari kameethatatsi thañaawarentzi, kaari ñagairone inkemathatairo okaatzi rantakairiri Pawa, tema risaikatzi otsirenikitziira. † **11:42** Irootake ikantakoitziro jaka “inchashitsityeyaki”: Menta, ruda, maawoini okaatzi iwankiretetari. Irootake oshiyawori pinitsi.

oitarika inkanteri. <sup>54</sup> Ishintsithawaitakeri, ikowi riñaawaitakairi ñaantsi kaariperori ompoñaantyaari inkamantakoteri.

## 12

### *Kachotakairori iwaane Fariseo*

<sup>1</sup> Ikanta ipiyowentaitapaakari Jesús, piyochonchoi ikantapaaka atziri. Irojatzí ikan-tantanakariri riyotaanewo: “Ontzimatyé paamaawentyaawo kachotakairori iwaane Fariseo, ramatawimentowa inatzi. <sup>2</sup> Tema ontzimatyé onkoñaatakoyetai okaatzi man-akowetainchari, ooñaawontairo kaari ikemathaweeta pairani. <sup>3</sup> Okaatzi pimanakowe-tari, ari onkoñaatakotai. Okaatzi pikenkithawaitziri apaniroidini pipankoki, ari inke-makoitairo inkenkithataitero shintsiini.”

### *¿Itzimikama ampinkathateri?*

(Mt. 10.26-31)

<sup>4</sup> Ikantzi Jesús: “Asheninká, eero pipinkashiwaitari kowatsiri ritsitokemi, tema ari iweyaari raawiiri irirori. <sup>5</sup> Jirikaga pimpinkeri: Iriitake Pawa materone rowamaante, aritake rotyaantakemi sarinkaweniki. Iriitake pimpinkathatairi. <sup>6</sup> Tema te ripinap-eroweta tsimeryaanipaini, riyotzimaita Pawa arika inkamagaante, tekaatsi ramaakite apaani. \* <sup>7</sup> Riyotzitawo Pawa okaatzi tzimayetatsiri aishi. Tema piñaakero ram-inawentziri tsimeryaanipaini, eero rimaperotzi raminawentzimi, eero pipinkan-tashiwaita.”

### *Inkaate kenkithatakotainane atziripainiki*

<sup>8</sup> “Intzimerika kanterine isheninka: ‘Rashitaana Jesús.’ Ari inkantaiya Itomi Atziri inkantairi imaninkarite Pawa: ‘Nashitaari jirika.’ <sup>9</sup> Iriima kantairine isheninka: ‘Te rashitana Jesús.’ Ari inkantaiyaari irirori, inkantairi imaninkarite Pawa: ‘Te nashitaari jirika.’ <sup>10</sup> Itzimirika kishimatakerine Itomi Atziri, ari impeyakotakagaitairi. Iriima kishimatakerine Tasorenkantsi, eero ipeyakotakagaitairi. <sup>11</sup> Arika ragaitemi rapato-tapiintaita risaikira pinkatharentsi, eero okantzimoshirewaitzimi, pinkante: ‘¿Oitaka nonkanteriri?’ <sup>12</sup> Tema Tasorenkantsi yotakaimirone oitarika pinkenkithatakoteri janta.”

### *Ikenkithatakoitziri masontzitatsiri ashaagantzinkari*

<sup>13</sup> Ikanta riñaawaitanake apaani piyowentakariri, ikantzi: “Yotaanari, pinkan-tenari nirentzi impainaata kashetani rookanairi ashitanari.” <sup>14</sup> Ikantzi Jesús: “Asheninká, te naaka aminakoyetzirori tzimawentawakagaantsi nonkantantyaariri pirentzi.” <sup>15</sup> Eekero ikantanakitzi Jesús: “Paamaawentya piñaayetzirowa ashaagawontsi. Te iro añaakaashiretemine.” <sup>16</sup> Ari roshiyakaawentanakeniri, ikantzi: “Tzimatsi ashaa-gantzinkari kithokitaintsiri osheki iwankirepaini rowaneki. <sup>17</sup> Ikenkithashirewaita, ikantzi: ‘¿Tsika nowero shenitaintsiri nowankire?’ <sup>18</sup> Irojatzí ikantashiretantanakari: ‘Jiroka nanteri. Notantoreero nowantapiintawori nowankire. Irojatzí niwetsikan-taiyaari antawo, ari nowero nowankire, eejatzí nashaagawo. <sup>19</sup> Ari inimotena, tema osheki nowakeri. Osheki osarentsi nimakoryaawaite, nowaperowaitya, nirawaite nomere, noimoshirenkawaitya.’ <sup>20</sup> Iro kantzimaitacha, ikantzi Pawa: ‘Masontzí, iroñaaka tsireniriki raashireetaimi, te piyote iita agairone pashitari.’ <sup>21</sup> Ari ikantakotari osheñaawaitashitawori rashaagawo, te rosheñiimaitawo rashitari Pawa.”

### *Ikenkithatakotziro Jesús kantzimoshiretaantsi*

(Mt. 6.25-34)

<sup>22</sup> Ikantanairi riyotaanewo: “Pinkeme nonkante: Te okameethatzí onkantzi-moshirewaitemi, pinkante: ‘¿Oitaka noyaari, oitaka nireri, oitaka nonkithatyaari?’

\* **12:6** Kantakotachari jaka “te ripinaperoweta tsimeryaani”, irootake kantakotachari ramanantantaitya apite koriki inkaate 5 tsimeryaani.

<sup>23</sup> Tema tziimatsi otsipa ankenkithashiretakotapiinteri añaamentoki, iro kowaperotacha anairo okaatzi owapiintari, okaatzi akithaatapiintari. <sup>24</sup> Pinkenkithashiretakoteri tsimeryaani. Te riyotziro impankitero royaari, te riwetsiki ipanko rowantyaa-  
 wori iwankire. Iri kantzimaitacha Pawa, ipapiintziri rowanawo. Aaka rimaperotzi retakotai Pawa. <sup>25</sup> Arika pinkamaityaawo onkantzimoshirewaitemi, ¿arima powawineentawairo posarentsite eepichokiini? <sup>26</sup> Eero pimatziro powawineentero eepichokiini, ¿oitaka okantzimoshirewaitantzimiri? <sup>27</sup> Pinkenkithashiretakotero in-  
 chateya, te añiuro antawainete, te ontyagaanta onkithaatayaari. Iro kantzimaitacha te okantzimoshirewaitawo, onkante: ‘¿Oitaka nonkithaatayaari?’ Tema owaneenkata kameetha, anairi rowaneenkawetaga Salomón pinkathariwetachari pairani. <sup>28</sup> Iriitake Pawa owaneenkatzirori, okantawetaka eepichoki añaawetawo owaneenkatapainta, iro osamanitanake, eero opantanaawo arika onkamateyatanake, tema richekaitziro, rita-  
 gaitakero. Eeroka rimaperote inkempoyaaawentemi Pawa, pipakairo pikisoshirewaitzi. <sup>29</sup> Ataama okantzimoshirewaitakemi eeroka, pikantzi: ‘¿Oitaka noyaari, oitaka nireri?’ <sup>30</sup> Apatziro okantzimoshirewaitari kaari kemisantatsiri. Irooma eeroka, riyotakoyet-  
 zimiro Ashitairi oitarika koityiimotzimiri. <sup>31</sup> Iro kowaperotacha pithotyakotairi im-  
 pinkatharishirewentaimi, arira impaimiro okaatzi koityiimotzimiri.”

*Ikenkithatakotziro Jesús inkitesato owaagawontsi*  
 (Mt. 6.19-21)

<sup>32</sup> “Eeroka oshiyakariri nopira, eero pithaawashitaiyani, tema iriitake Pawa kowaintsiri impinkathariwentaimi. <sup>33</sup> Pimpimantayetero oshekitzimotzimiri, pimpantashitya. Irootake kameethatatsi pantayetairo piñaantaiyaawori pisaikai kameetha inkiteki. Oshiyaiyaawome powaagaantatyeyeeame inkiteki tsika te ipathaanetapai, te itzimapai koshintzi eejatzi. <sup>34</sup> Tema janta tsikarika powaagantapiinta, ari poshoretapiintawo eejatzi.”

*Imperataarewo aamaawentachari*

<sup>35</sup> “Pawinakanakyaawo piithaare. Pootayeteri pootamento. <sup>36</sup> Poshiyakotyaari imperataarewo oyaawentziriri rareetaiya iwinkatharite roimoshirenka, onkene rantawainiri intsiipate arika rimperatapaiyaari. <sup>37</sup> Kimoshirera inkantaiya imperataarewo iñaapairi iwinkatharite aamaawenta ikantaka. Imapero nonkante, aritake roisaikapairi imperataarewo rowapiintaitaga royiitapainiri rowanawo. <sup>38</sup> Kimoshire inkantya, iñagaitapairi aamaawenta ikanta, okantawetaka te riyotzi tsikapate rareetya, niyankiite aamaaka onkiteshetzimatake. <sup>39</sup> Pinkemero jiroka. Arikame riyote ashitaanitachari ripokatye koshiterine, ari raamaakyaame, eero ikoshaagantaitzirime. <sup>40</sup> Irootake piyoteri eerokapaini, ontzimatyete paamaawentya. Tema te piyotzi tsikapate ripiyai Itomi Atziri.”

*Kaariperori imperataarewo*  
 (Mt. 24.45-51)

<sup>41</sup> Ari ikantanake Pedro: “Pinkathari. ¿Arima nokaatziri maawoini atziri poshiyakaawentantakenari?” <sup>42</sup> Ikantzi Jesús: “Poshiyakotyaari kameethashireri imperataarewo kenkithashiretachari kameetha. Rookanakeri ipankoki imperatariri, ikantanakeri: ‘Paminenari maawoini saikatsiri pankotsiki.’ <sup>43</sup> Kimoshire inkantya jirika imperataarewo, arika ripiyai iwinkatharite iñaapairi rimonkaatakero ikantanakeriri. <sup>44</sup> Aritake rishinetakeniri inkempoyeeniri okaatzi rashitari. <sup>45</sup> Irooma inkantashiretakeme imperataarewo: ‘Eero ripiyita nowinkatharite.’ Irojatzi ripasawaitantakyaari ikaatzi rimperaitari eejatzi inkantakero tsinane rimperaitari. Jatake rowaperowaitya, ishinkiwaitya. <sup>46</sup> Inimowaitziri jirika imperataarewo, romapokashitaiyaari rareetaiya imperatariri. Rimaperoitairi rowasanketapairi, rookapairi tsika ikashaakagaitakeri kisoshireri. <sup>47</sup> Tema jirika

imperataarewo riyowetakawo okaatzi inintakaawetariri iwinkatharite, temaita raamaiyaari ripiyai. Irootake ripasaperoitanyaariri. <sup>48</sup> Iriima kaari yotakoterone inintakairiri, eero ripasaperoitairi. Tema ikaatzi rishinetaitakeri ontzimimoperotairi, iriitake rawentaaperoityaari osheki. Intzimerika osheki rawentaaperoitari, osheki inkowakoitairi irirori.”

*Ikenkithatakota Jesús*

*(Mt. 10.34-36)*

<sup>49</sup> “Iro nipokantari nowasanketeri kaariperoshireri, oshiyawaitakawo iroome paampari namakeme kipatsiki. Osheki nokowakitake etataityaawo iroñaaka rowasanketaite, ithonkaiyaame kaariperori. <sup>50</sup> Iro kantacha ontzimatyete netanakyaawo naaka nonke maatsitanakya, irojatzzi nimonkaatantakyaawori. <sup>51</sup> Piñaamatsitake iro nipokantari iñeero atziri risaika kameetha. Tema nipokake, namatziro kisawakagaantsi. <sup>52</sup> Iroñaaka iñagaitero inkisawakaiya atziri risaikawankotawakaaga, apite atziri kisherine itsipa atziri kaatatsiri mawa. <sup>53</sup> Mainari ripithokashityaari ipaapate, ripiyatzityaari eejatzzi ipaapate inkisaneenteri itomi. Ipithokashityaawo tsinane onaanate, ipiyatzityaawo eejatzzi onaanate. Ipithokashityaawo tsinane ayiro, ipiyatzityaawo eejatzzi ewatairo.”

*¿Tema piyotero kantainchari?*

*(Mt. 16.1-4; Mr. 8.11-13)*

<sup>54</sup> Ikanta Jesús ikantziri atziri piyowentakariri: “Arika piñeero menkori ikyaapiintzira ooryaatsiri, pikantapiintzi: ‘Omparyaatye inkani.’ Matachaga pikantakeri. <sup>55</sup> Arika pinkemero tampyya ompoñeeya katonkonta, pikantapiintzi: ‘Osaryaatye kameetha jiroka kiteesheri.’ Matachaga okaatzi pikantziri. <sup>56</sup> ¡Owapeyimotanteneri! Piyowetawo eeroka jimpe okanta piñaapiintziro inkite, eejatzzi kipatsi. ¿Oitaka kaari piyotakotantawo okaatzi awisatsiri iroñaaka?”

*Paapatziyaari kisaneentzimiri*

*(Mt. 5.25-26)*

<sup>57</sup> “¿Oitaka kaari paminantawo eeroka okaatzi kameethatatsiri? <sup>58</sup> Arika intzime kishemine, irojatzzi raantanakemi pinkathariki, pinthaawakote eeroka awot-siki, pinkanteri: ‘Eero pikisawaita, jame aakameethatawakagaiya.’ Tema arika ra-reetakaakemi pinkathariki, inkantaitakeri aamaawentanteneri: ‘Paanakeri jirika.’ Irojatzzi raantaitanakemiri romonkyagaitemi. <sup>59</sup> Tema eerorika pipinatashitawo pireewere, eerowa piñagairo romishitowakaantaimi. Imaperotatya.”

## 13

*Eerorika pipakairo pameyetari, ari pimpeyashitaiya*

<sup>1</sup> Ari ripokaiyakeni kamanterine Jesús, tema rowamaakaantake Pilato apaani Galileasatzi janta ritaapiintaitzinirira Pawa. <sup>2</sup> Ikantanake Jesús: “¿Piñaamatsitakema eeroka-paini iro awishimotantakariri jiroka tsika ikantaitakeri rowamaitakeri, iri maperotzirori ikaariperoshiretzi ranairi itsipa Galilea-satzi? <sup>3</sup> Nokantzi naaka: Te ari onkantya. Eerorika pipakairo pameyetari eeroka, ari poshiyakotaiyaari irirori. <sup>4</sup> Ari roshiyakari kaatatsiri 18 kamaintsiri anawyaakeri pankotsi janta Siloé-ki, ¿piñaamatsitakema iri maperotzirori ikaariperoshiretzi ranairi itsipa Jerusalén-satzi? <sup>5</sup> Nokantzi naaka: Te ari onkantya. Eerorika pipakairo pameyetari, ari poshiyakotaiyaari.”

*Roshiyakaawentaitziro pankirentsi kaari kithokitatsine*

<sup>6</sup> Ikanta Jesús roshiyakaawentanakero, ikantzi: “Otzimimotziri atziri iwankire rowaneki. Ikanta riyataake raminero tzimakerika okithoki, temaita iñaapaake. <sup>7</sup> Ikantakeri kempoyiiniriri: ‘Mawa osarentsi nipokaweta naminiro nowankire onkithokite, temaita noñi. Pichekero, aminaashiwaita okatziya jaka.’ <sup>8</sup> Rakanake



kempoyiiniriri, ikantzi: ‘Eero nowinkatharite, añawairoota jiroka osarentsika eerorika okithokitzi, nonkeekashitawakeroota nityaakotero oponkitziki onkithokitantaiyaari. <sup>9</sup> Arika onkithokitai, kameetha inatzi. Irooma eerorika, aripaite pitowakaantero.’ ”

*Rowawisaakotziro Jesús tsinane kiteesheriki rimakoryaantaitari*

<sup>10</sup> Ikanta riyotaantzi Jesús kiteesheriki rimakoryaantaitari janta ipiyotaitapiintaga, <sup>11</sup> ari isaikake tsinane tzimakotaintsiri 18 osarentsi raagaitziro. Tsinkamitzitake, te okanta onkatziye kameetha. <sup>12</sup> Ikanta iñaapaakero Jesús, ikaimapaakero, ikantziro: “Tsinané, etsiyatakotaimi pimantsiyawetaga.” <sup>13</sup> Riterotakero itsinkamitziwetakaga. Tampatzikatanai kameetha. Osheki okimoshirewentanairi Pawa. <sup>14</sup> Temaita inimoteri jewatatsiri ipiyotaitapiintaga, antawoite ikisanaka, iñaakerira Jesús retsiyatakotakaantake kiteesheriki rimakoryaantaitari. Ikantanake jewari, ikantziri atziripaini: “Eenitatsi 6 kiteesheri rantawaitantaitari, arika pinkowe petsiyatakotakaante, pipoke kiteesheriki kaari rimakoryaantaitari. Te ishinetaantsita kiteesheriki rimakoryaantaitari.” <sup>15</sup> Irojatziri rakantanakari Jesús, ikantzi: “¡Owapeyimotantanerí! Kiteesheriki rimakoryaantaitari pithataryaakotapiintziri pipira pirakairi imere. \* <sup>16</sup> Tema jiroka tsinane asheninka inatzi, iro isawontari Abraham-ni tzimakotake 18 osarentsi ikemaatsitakaakawo peyari. ¿Tema okameethatzi etsiyatakotakagairo kiteesheriki rimakoryaantaitari?” <sup>17</sup> Ikantanakera Jesús, antawoite ikaanitanake ikaatzi kisaneentziriri. Iro kanzimaitacha kimoshire ikantaiyanakani atziri ikaatzi ñaakerori rantakeri Jesús.

*Roshiyakaawentaitziro okithoki inchato oryaanikitatsiri*

*(Mt. 13.31-32; Mr. 4.30-32)*

<sup>18</sup> Ari ikantanake Jesús: “¿Oitaka oshiyari ipinkathariwentantai Pawa? ¿Oitaka noshiyakaawentemirori? <sup>19</sup> Tema oshiyaatyaawo arika impankiitero okithoki oryaanikitatsiri pankirentsi. Tema tzimatsi atziri pankitakerori rowaneki, anaanakero otsipa pankirentsi, antawo otewayetanake, ari imenkoshiyetari tsimeryaani itsimankatapishitakera.” †

*Roshiyakaawentaitziro kachopathari*

*(Mt. 13.33)*

<sup>20</sup> Ari rapiitakero Jesús, ikantzi: “¿Oitaka noshiyakaawentemirori ipinkathariwentantai Pawa? <sup>21</sup> Tema oshiyawaitakawo apaani tsinane naashewaitatsiri. Aake eepichokini kachopathari, owaitantakawo maawoini oshe. Ari oñaakero onkachopathate.”

*Ikenkithatakoitziro oryaanityenkaki ikyapiintaitzira*

*(Mt. 7.13-14, 21-23)*

<sup>22</sup> Rithonka ikenayetake Jesús nampitsiki riyotaantzi. Irojatziri ikenantanakari Jerusalén-ki. <sup>23</sup> Ari rosampitaitakeri, ikantaitziri: “Pinkatharí, ¿eepichokima awisakotaatsine?” Irojatziri ikantantari Jesús: <sup>24</sup> “Ontzimatyé piñaashintsitya poshiyakayero pinkyaatyeeeme oryaanityenkaki ikyapiintaitzira. Tema osheki kowawetachari inkyaantaiyaawome, eeromaita rimatziro. <sup>25</sup> Arika rashitanakero ipanko ashitawori, irojatzirika pisaikake jakakeroki, pinkantawetya: ‘Pinkatharí, pashitareenawo.’ Ari rakanake irirori, inkante: ‘Te niyotzimi tsika pipoña eeroka.’ <sup>26</sup> Ari pinkantawetanakya eeroka: ‘¿Tema piyotana ari akaatzi atsipatawakaa pairani owaiyani, ari akaatzi atsipatawakaa irawaitaiyini eejatzi? Piyotaantapiintana nonampiki.’ <sup>27</sup> Inkante irirori: ‘Imapero, te niyotemi jimpe pipoña. Piyaaperote tzimawentzirori kaariperori.’ <sup>28</sup> Ari pi-raawaityaari, patsikaikiwaitya, arika piñaayetairi Abraham, Isaac, Jacob intsipataiyaari Kamantantaneriite risaike ipinkathariwentantaira Pawa. Irooma eeroka jakakeroki

\* **13:15** Iriitake ipiraitari janta: buey eejatzi asno. † **13:19** Iroowa ikantakoitzi jaka “okithoki oryaanikitatsiri pankirentsi” jitachari mostaza, irootake shookatsiri inampiki itsipa atziri.

pisaikamatsitai. <sup>29</sup> Tema inkaate awisakoshiretaatsine impoñaayetaiya tsikarika iweyaa-paa kipatsi, risaikai rakiyooyetairi Pawa ipinkathariwentantaira. <sup>30</sup> Tzimatsi etaweta-wori iroñaaka, iriitake ñagairone rimpoiyyetai. Eeniyetatsi eejatzi impoiyyetatsiri iroñaaka, iriitake ñaayetairone retaiyaawo.”

*Riraaneentakotawo Jesús Jerusalén  
(Mt. 23.37-39)*

<sup>31</sup> Ari rareetapaaka Fariseo, ikantapaakeri Jesús: “Pishiye, kaakitake Herodes ikowi ritsitokemi.” <sup>32</sup> Ikantzi Jesús: “Pipiyanake, pinkanteri oshiyakariri sagari: netsiy-atakotakairi raayiri peyari, netsiyatakotakairi mantsiyari. Yotapaaka mawa kiteesh-eri nonkaatantyaawori nantziri. <sup>33</sup> Eekeromaitatya niyaataye irojatzi mawatapaint-sine kiteesheri, tema iro kameethatatsi ritsitokaiteri maawoini Kamantantaneriite Jerusalén-ki. <sup>34</sup> ¡Jerusalén-satzipaini! Osheki pitsitokake Kamantantaneriite. Pitsitokakeri ikaatzi rotyaantaweetakemiri. Tema nokowawetapiintaka noshiyaarime tsimeryaani rosatetziri iryaani. Ari nonkanterime naaka ikaatzi notomintaari. Iro kanzimaitacha te pikowaiyini. <sup>35</sup> Jiroka pinampi pisaikapiintawetaga, eero iñagaitai iita nampi-taiyaawone. Pinkeme nonkante: Eero piñiitaana, irojatzi paata pinkantantaiyaari: ‘Tasonkawentaarewo rinatzi, tema Pinkathari aitziri otyaantakeriri.’ ”

## 14

*Jesús retsiyatakotakairi eeniyawaitatsiri*

<sup>1</sup> Okanta kiteesheri rimakoryaantaitari, ikenanake Jesús ipankoki reeware Fariseo roya. Osheki kempoyaakeriri oita ranteri. <sup>2</sup> Ari risaikakeri janta mantsiyari eeniyawai-tatsiri. <sup>3</sup> Ikanta Jesús rosampitakeri Yotaantzirori Inintakaantaitanewo itsipataakeri Fariseo, ikantziri: “Kiteesheri rimakoryaantaitari inatzi iroñaaka, ¿tema ishinetaantsita etsiyatakotakaante?” <sup>4</sup> Te rakaiyini, irojatzi imairetaiyakeni. Raakeri Jesús mantsi-yari, retsiyatakotakagairi, rotyaantairi. <sup>5</sup> Ripithokashitanakari jirikapaini, ikantziri: “Arika rotetya pipira omooki kiteesheriki rimakoryaantaitari, ¿tema ari pinoshikairi intsipaite?” \* <sup>6</sup> Te rakanakeri.

*Oimoshirenkaantsi aawakagaantsiki*

<sup>7</sup> Ari risaiki Jesús ikempoyiiri akiyooterine reeware Fariseo, thaawako ikan-taiyani ikowi rosatekya niyankineki rakiyooteri jewari. Ikanta Jesús roshiyakaawen-tanakeniri, ikantanake: <sup>8</sup> “Arika inkaimaitemi poimoshirenkya aawakagaantsiki, eero posatekawaita pinkowe pintsipatyaari jewari, aamaaka tzimatsi itsipa pokatsine anay-imiriri ririiperotzi irirori. <sup>9</sup> Arika rareetapaakya kaimakaantzimiri, inkantapaakemi: ‘Eero posatekawaita eeroka, piyaate pisaike jantyaatsikaini.’ Antawoite pinkaaniwen-tanakya. <sup>10</sup> Iroowa kameethatatsi eero posatekawaita, pisaikapaake jantyaatsikaini. Irojatzi ripokantapaakya kaimakemiri, inkantakemi: ‘Asheninká, pipoke posatekya eeroka jaka.’ Aripaite impinkathaitemi. <sup>11</sup> Itzimirika kowashiwaitachane impinkathai-terime, aritake iñaakero intsinampashiretakaiteri. Iriima tsinampashirewaitatsiri, iri-itake ñeerone impinkathaitairi.”

<sup>12</sup> Irojatzi ripithokashitantanakariri Jesús aanakeriri rowakayaari, ikantziri: “Arika pinkaime atziri powakayaari, eero pikaimiri pisheninkaperotari eeroka, pirentzi, eejatzi ikaatzi ashaagantachari, tema ari ripiyataimi eeroka rakiyootaimi. <sup>13</sup> Arika poimoshirenkya, iriitake pinkaimayete ashironkainkari, mawityaakiri, pesapon-chokiyetatsiri. <sup>14</sup> Ari piñagairo pinkimoshiretai, tema jirikapaini, eero ripiyataimi paata rakiyootaimi roimoshirenkya. Aritzimaitaka ripinaitaimiro pantakeri arika rañaayetai kameethashireri.”

\* **14:5** Iriitake ipiraitari janta: buey eejatzi asno.

### *Roshiyakaawentaitziro antawoite rowaita*

<sup>15</sup> Ikanta ikemawake apaani ikaatzira risaiki rowaiyani, ikantanake: “Kimoshire inkantya inkaatera owaachane impinkatharitanakerika Pawa.” <sup>16</sup> Irojatzii ikan-tantari Jesús: “Tzimatsi atziri, riwetsikakaantake antawoite oimoshirenkaantsi, ari rowaiyaani. Rithonka ikaimakeri ikaataiyinira. <sup>17</sup> Okanta imonkaatapaaka rowantyaari rotyaantakeri rimperatanewo inkamanteri ikaatzi ikaimakaantakeri, tema irootaintsi rowaiyaani. <sup>18</sup> Te ikowi ripokaiyeni ikaatzi ikaimakaantawetakari. Retanakawo apaani, ikantzi: ‘Eero okanta niyaate, niyaataye naminero owaantsi namanantakeri. Irootake eero okantanta niyaate.’ <sup>19</sup> Ikantake itsipa: ‘Niyaataye noñaantyaari namanantakeri nopira, irootake eero okantanta niyaate.’ † <sup>20</sup> Ari ikantanake itsipa eejatzi: ‘Eero okanta niyaate, tema owakera naawakaaka.’ <sup>21</sup> Irojatzii ripiyantaawo imperataarewo, ikamantapairi iwinkatharite awisaintsiri. Antawoite owatsimaanakeri, ikantanakeri rimperatanewo: ‘Piyaate, panashityaawo jimpe iweyaa nampitsi, pamakeri ashironkainkari, mawityaakiri, pesaponchokiri inkaatera piñeeri janta.’ <sup>22</sup> Ari ikantakero rimperatanewo. Irojatzii ikantantaariri iwinkatharite, ikantziri: ‘Nimatakero okaatzi pikantakenari, eenitzimaitacha okaankitzi pankotsi.’ <sup>23</sup> Ikantanairi rimperatanewo: ‘Pithonkero panashityaawo awotsi, piyaate tsikarika, pishintsineenteri inkaate piñeeri janta, ripokeeta iyeekiteeta nopanko. <sup>24</sup> Pinkeme nonkante: Tzimawetacha osheki atziri netawetakari nokaimakaantziri, eeromaita iñaamatsitairo royaawo eepichokiini niwetsikakaantakeri owanawontsi.’”

### *Pomeentsitachari oshiyakotyaari Cristo*

<sup>25</sup> Osheki oyaatakeriri Jesús. Ari ripithokashitanakari, ikantziri: <sup>26</sup> “Irootake inimotzimiri petakotari pipaapate, pinaanate, piina, pitomi, pirentzi, pitsiro, petakotzita eejatzi eeroka. Iroorika anaanakerone onkaate pinintename naaka pawentaana, tekeraataga pithotyiiroota pinkemisantena. <sup>27</sup> Ontzimatyepinkyaaryoowentero nokenkithatakaakemiri, onkantawetakya inkentakoitemi. Arika pipakaakero, eero noshiyakagaimi eeroka niyotaanewo. <sup>28</sup> Apaani kowatsiri riwetsike pankotsi raminakomento, retawakyaawo inkenkithashiretya tzimatsirika rimatantyaawori riwetsikero. <sup>29</sup> Ari onkantya rithonkantyaawori riwetsikero retanakari, arika rookashitakyaawo, ishirontaminthatyaari inkaate ñeerine. <sup>30</sup> Inkantaiyeni: ‘Piñaamatsiteri jirika, te raawiuro, rookashitakawo.’ <sup>31</sup> Ari ikanta eejatzi pinkathari tzimatsiri 10,000 rowayerite, rominthata romanatyaari itsipa pinkathari tzimatsiri 20,000 rowayerite. Ontzimatyepretawakyaawo inkenkithashiretawakya, arika roitsinampaakeri. <sup>32</sup> Iñaakerorika eero roitsinampairi, eeniro riweyaa intaina itsipa pinkathari pokatsiri romanatyaari, rotyaante kanterine: ‘¿Tsikama ankantyaaka eero omanatawakaanta?’ <sup>33</sup> Ari onkantyaari eejatzi ontzimatyepretawakyaawo pinkenkithashiretawakya eerokapaini, eerorika pipakairo petakoyetawo pashiyetari, eero noshiyakaimi niyotaanewo.”

### *Oshiyakotawori masankari tziwi*

*(Mt. 5.13; Mr. 9.50)*

<sup>34</sup> “Tema kameetha okanta tziwi okatyotzi. Iro kantacha arika rowaitaitero tsika oitya, eero opantaawo inkatyokantaityaawo. <sup>35</sup> Te ompantaiyaawo tziwi, eero opan-taatsikaitawo eejatzi risaiponkitzitantaityaawo pankirentsi, ontzimatyepretawakyaawo. Kowirori inkemathatero jiroka, rowayempitatya inkemisante.”

## 15

### *Ikenkithatakoitziri oweja peyawetachari*

*(Mt. 18.10-14)*

† 14:19 Iriitake kantakotachari jaka “nopira”, kaatatsiri 5 buey.

<sup>1</sup> Ipiyotaka apatotziriri koriki itsipatakari osheki kaariperoshireri, ikemisantziri Jesús riyotaantzira. <sup>2</sup> Ikanta Fariseo itsipatakari Yotzinkariite, ikenkithatakotanakeri Jesús, ikantzi: “Pamineri jirika, itsipatakari atziri kaariperoshireri, itsipatari rowapiintaiyani.”

<sup>3</sup> Ikanta Jesús roshiyakaawentanakeniri, ikantanake: <sup>4</sup> “Tzimatsi atziri piratariri oweja ikaatzi 100. Ikanta ipeyaka apaani, rookanakeri itsipa ikaatzi 99 janta ow-intenipathatzira, jatake rithotyaakotairi peyainchari. ¿Tema pantziro eeroka jiroka? <sup>5</sup> Ikanta iñaapairi oweja, kimoshire ikanta inatapairi. <sup>6</sup> Tema areetaa ipankoki, ipiyotapairi isheninka, ikantapairi: ‘Pipoke pintsipatena oimoshirenkya, tema noñagairi oweja peyawetainchari.’ ” <sup>7</sup> Eekero ikantatzi Jesús: “Ari onkantaiyaari inkiteki, antawoite inkimoshirewentaiteri pakagairone ikaariperoshireweta. Ranaanakeri kameethashiretaintsiri kaatatsiri 99.”

### *Roshiyakaawentaitziri koriki peyawetachari*

<sup>8</sup> Ari ikantanake: “Eenitatsi tsinane tzimatsiri 10 oorikite. Okanta ipeyapithatakawo apaani oorikite, ootakeri ootamento, opishitakero maawoini opanko ithotyaakotairi oorikite. \* <sup>9</sup> Okanta oñagairi, okaimakeri osheninka, okantakeri: ‘Pipoke, pintsipatena noimoshirenkya, tema noñagairi noorikite peyawetainchari.’ ” <sup>10</sup> Eekero ikantatzi Jesús: “Ari inkantaiya imaninkarite Pawa antawoite inkimoshiretai iñaakerika apaani atziri ripakagairo ikaariperoshirewaitzi.”

### *Ikenkithatakoitziri tomitsi jewanawaitachari*

<sup>11</sup> Ari ikantanake eejatzi Jesús: “Eenitatsi atziri tzimatsiri apite itomi. <sup>12</sup> Ikanta iyaapitsi, ikantakeri ipaapate: ‘Papá, pimpenawo pashitakainari.’ Rimatakero, ipakeri itomi rashitakayaariri paata apaanipaini. <sup>13</sup> Jatanake iyaapitsi itomi intaina otsipaki nampitsi. Ari reewanawaitakari iyorikite. <sup>14</sup> Ikanta reewanawaitakari maawoini, iñaakero antawoite tashetsi janta nampitsiki. Ari ikoityaanakeriri ikaatzi reewanatakari. <sup>15</sup> Riyaatashitakeri nampitawori janta ikowi antawairentsi, rotyaantaitakeri inkempoyeeri chancho. <sup>16</sup> Antawoite ritasheyake, ikowake rakiyooteri chancho, tema tekaatsi perine rowanawo. <sup>17</sup> Irojatziki ikantashiretantanakari mainari: ‘Osheki inintaawaita rowaperowaita antawaitatsiri ipankoki nopaapate, ¿iitaka nashironkaawaitantari naaka jaka nitasheyawaitzi? <sup>18</sup> Ontzimatyeye niyaatai ashitanariki, nonkantapairi: “Papá, nokaariperotzimotakemi, nokantakeri eejatzi Inkitesatzi. <sup>19</sup> Te onkameethate poshiyakagaina pitomi, apatziro nokowi poshiyakagainari antawaitatsiri powaneki.” ’ <sup>20</sup> Katziyanaka, pokai ashitaririki. Tema aminawooki ikanta ashitariri, iñaawairi ripokai, rishiyashitawaari, rawithakitawairi, inintawootawairi. <sup>21</sup> Ikantapaake itomi: ‘Papá, nokaariperotzimotakemi, ari nokantakeri eejatzi Inkitesatzi. Te okameethatzi pintomitaina iroñaaka.’ <sup>22</sup> Iri kantzimaitacha ashitariri, ikantakeri rimperatanewo: ‘Pamake irooperori kithaarentsi, pinkithaatawairi notomi. Pinkyaantakayaari rakoki poreryaatsiri, pizapato-teri eejatzi. <sup>23</sup> Pamake wathantzi ewankari waaka, pitsitokeri. Nokowi oimoshirenkya. <sup>24</sup> Tema jirika notomi kamawetaka, iro kantzimaitacha añagai iroñaaka. Pairani ipeyaka, iñagaitairi iroñaaka.’ Ari retanakawo roimoshirenkaiyani.

<sup>25</sup> Ikanta rantarite irirentzi saikatsi rantawaitzi owaantsiki. Pokai pankotsiki, ikemapaatziiri roimoshirenkaiyani. <sup>26</sup> Rosampitapaakeri rimperatanewo oitarika iki-moshiretantaitari. <sup>27</sup> Ari ikantanakeri: ‘Areetaawo pirentzi, irootake rowamaakaan-tantari pipaapate ewankari waaka, tema kameethaini rareetaawo pirentzi tekaatsi

\* **15:8** Ikantakoitziri jaka “koriki”, irijatziki iitaitziri “dracma”, koriki rinatzi rashiyetari Grecia-satzi. Iriitake ripinaiziriri antawaitatsiri apaani kiteesheri.

awishimoterine.’<sup>28</sup> Ari ikisanaka, te ikowi inkyaapai pankotsiki. Irojatzri riyaaatashitan-takariri ipaapate, osheki ikowake intsipatyaaari roimoshirenkya. <sup>29</sup> Irojatzri ikantan-tanakariri ipaapate: ‘Piñaawetana naaka nashi nowiro nisaikimotzimi, tekaatsi nantz-imotemi. Te pipaatsikaitana apaani piratsi noimoshirenkya. † <sup>30</sup> Irooma ripokaira yeeye eewanatzitakemiriri piyorikite ipiro mayempero, iri powamainiri wathatatsiri piratsi poimoshirenkawairi.’ <sup>31</sup> Ari rakanake ipaapate, ikantziri: ‘Notomí, ari pashi powiro pisaikimotakena eeroka, maawoini okaatzi nashitari, eeroka ashitawori maa-woini. <sup>32</sup> Irootake ankimoshiretantaari iroñaaka, tema jirika pirementzi, kamawetaka, iro kantacha añagai iroñaaka. Ipeyawetaka iñagaitairi iroñaaka.’ ”

## 16

### *Roshiyakaawentaitziri kaariperori imperataarewo*

<sup>1</sup> Ikanta Jesús ikantakeri eejatzri riyotaanewo: “Eenitatsi atziri ashaagantachari. Tzimatsi irirori rimperatanewopaini. Eenitatsi pokaintsiri, ikantapaakeri ashaagantzinkari: ‘Jirika reeware pimperatanewo, rapaatzitakemiro pashaagawo.’ <sup>2</sup> Ikanta jirika ashaagantzinkari ikaimakaantakeri rimperatanewo, rosampitakeri: ‘¿Oitaka pantakeri? Nokemake ikantaitana. Poñaayenawo okaatzi pantawaitakenari. Ari iweyaapaaka peewatziri nimperatanepaini.’ <sup>3</sup> Ari ikantashiretanake jirika rimperatanewo: ‘¿Tsika nonkantyaaka iroñaaka? Romishitowatyena imperatanari. Te nimatziro nonpankiwaite, arika nonkowakotante impashitaitena, osheki nonkaani-wentya.’ <sup>4</sup> Ikantashiretanake: ‘Niyotake oita nanteri raakameethatantaitenari arika nishitowai.’ <sup>5</sup> Ipiyotakeri ireewetziriri iwinkatharite, ikantakeri etawori: ‘¿Okaatzika pireewetziri nowinkatharite?’ <sup>6</sup> Ikantzi irirori: ‘Nireewetziri 100 inchatonaa oyeenka pankirentsi.’ Ikantanairi: ‘Jiroka pireewere, posankenate otsipa, onkaatanai 50 pireewetanai.’ <sup>7</sup> Rosampitakeri itsipa ikantziri: ‘¿Eeroka okaatzika pireewetzi?’ Ikantzi: ‘Nireewetziri 100 royaantantaitawori trigo.’ Ikantanairi eejatzri: ‘Jiroka pireewere, posankenate otsipa, onkaatanai 80 royaantaitzirowa.’ <sup>8</sup> Ikanta jirika pinkathari, roñaagantakeri rimperatanewo tema iñaakeri imaperotatziri riyotzi tsika inkenakairo rantakeri. Ari ikantayeta atziripaini iroñaaka, imaperotziri riyotzi tsika inkenakairo raakameethatantyaariri isheninka, ranairi tsika ikanta kemisantzinkari-paini.” <sup>9</sup> Ari ikantanake Jesús: “Ontzimatyey piyote pantawaitakairo pashaagawo paakameethatantyaariri itsipa, okantaweta te opantaperowetawo ashaagawontsi, iroowa raakameethatantaitemiri paata eeroka inkiteki.

<sup>10</sup> Itzimirika kyaaryootaintsiri eepichokiini, iriitake kyaaryooperotaatsine. Itzimirika kaariperoshiretatsiri eepichokiini, iriitake maperotairone inkaariperotai. <sup>11</sup> Terika pikyaaryoowentziro ashaagawontsi kaari pantaperotawori jaka, tekaatsi ameentaimine impemiro ashaagawontsipero. <sup>12</sup> Terika pikyaaryoowentziro ashinentsi, tekaatsi pemine pashityaari eeroka. <sup>13</sup> Tekaaatsi imperataarewo materone rantawaiteniri apite pinkathari. Tema apaani inkowaperote rimperatyaari, iriima itsipa inkisaneentakeri. Ari oshiyawo eejatzri, tekaatsi materone inkemisanteri Pawa, arika inkenkithashiretakotero ashaagawontsi, oshiyawaitanakawo imperatatyeyaarime.”

<sup>14</sup> Ikemaiyakeni eejatzri Fariseo, tema irijatzi ñaawenatawori ashaagawontsi, ritainkimawaitakeri Jesús ikemirira inkenkithatzi. <sup>15</sup> Ikantanakeri: “Piyotziro potzikaawentaiyani eeroka eero riyotantzimi atziri, riyotzimitakemi Pawa okaatzi pikenkithashiryaaakari. Okaatzi kameethatziwometariri atziri, te iñaamatawo Pawa.”

### *Inintakaantaitanewo eejatzri ipinkathariwentantai Pawa*

† 15:29 Ikantakoitzi jaka “piratsi”, iriitake cabra.



<sup>16</sup> “Tema pairani ikenkithatakoitakero Inintakaantaitanewo eejatzi rosankenare Kamantantaneriite. Ipoñaapaaka Juan ikenkithatapaake. Ikematziiro atziripaini Kameethari Ñaantsi tsika ikanta ipinkathariwentai Pawa. Antawoite ikowaitzi iñagaitero, oshiyawaitakawo ishintsitaitzi arika romanataitya. <sup>17</sup> Te opomeentsita ithonkaiya paata kipatsi eejatzi inkite, iro kantzimaitacha eero ithonkimaitaa Inintakaantaitanewo.”

*Riyotaantzi Jesús ikantzi: “te opantawo pookero piina”*

<sup>18</sup> “Itzimirika jokerone iina, arika ragai otsipa tsinane, imayempiwentakero etakawori. Ari oshiyawo eejatzi, itzimirika agairone tsinane jokaarewo, mayempitake irirori.”

*Ashaagantachari eejatzi Lázaro*

<sup>19</sup> “Tzimatsi atziri ashaagantachari, owaneenka ikithaatapiinta. Ikamaitawo kiteesheriki roimoshirenka, owaneenka rawirikawaita. \* <sup>20</sup> Eenitzitacha ashironkaawaitachari iita Lázaro, rithonka ripathaawaitake. Ari romaryaapiinta jakakeroki ipankoki ashaagantachari. <sup>21</sup> Iriitake aperotapiintzirori rowaryaayetzi rowanawo ashaagantzinkari. Pokatsi otsitzi ithotzitziri ripathaawo. <sup>22</sup> Ikanta paata kamake ashironkainkari, raanakeri imaninkarite Pawa, jatake risaikira Abraham. Ikanta ikamake eejatzi ashaagantachari, ikitaitakeri. <sup>23</sup> Ikanta janta sarinkaweniki, osheki ikemaatsiwaitaka ashaagantawetachari. Raminakotakeri intaina iñaatziiri Abraham itsipatakari Lázaro. <sup>24</sup> Ari ikaimawetari irirori, ikantzi: ‘Chariné, Abraham, pineshironkatena. Potyaanteri Lázaro ramaatsikaitakena eepichokiini ñaa nirawa-keeta, tema antawo itaaneentakena paampari.’ <sup>25</sup> Ikantanake Abraham: ‘Nochariné, poshoretakotaiyaawo pashaagawo pairani, eejatzi ikantzita Lázaro roshiretakotaawo rashironkaawaitaga pairani. Iri kantzimaitacha kimoshire ikanta irirori jaka, irooma eeroka iroñaaka ontzimatye pashironkaawaitaiya. <sup>26</sup> Tekaatsi onkene pipoke, zimatsi antawo impeeta otzikaimiri, eero okanta niyaatashitemi eeroka.’ <sup>27</sup> Eekero ikantawetatya irirori: ‘Pinkemena nonkante chariné, potyaante jatatsine risaikira ashitanari. <sup>28</sup> Tzimatsi janta ikaatzi 5 nirentzi, pinkamanteri eero ripokanta irirori jaka, osheki rashironkaawaitaita.’ <sup>29</sup> Ikantanakeri Abraham: ‘Eenitatsi Inintakaantakeri Moisés, eenitatsi eejatzi ikenkithatakeri Kamantantaneri, iroowa inkemisanterime.’ <sup>30</sup> Ikantanake eejatzi: ‘Eerowa Chariné, Abraham. Tzimatsirika apaani kamatsiri kamantairine añaatsiri atziri, ari ripakagairo kaariperori rameyeteri.’ <sup>31</sup> Eekero ikantanakitzi Abraham: ‘Tema te ikemisantziro ikenkithawetakari Moisés eejatzi Kamantantaneri, eerowa ikemisantziro iroñaaka inkamantantawetyaarika kaminkari.’ ”

## 17

*Eero pantakaantziro kaariperori*

<sup>1</sup> Ikanta Jesús ikantanakeri riyotaanewo: “Ari intzimapiintatye antakaanterone kaariperori. Inkantamatsitaiteri jirika. <sup>2</sup> Itzimirika antakaakerine kaariperori oshiyakariri eentsi rawentagaana, ari rowasankeyeetairi. Iri kameethatatsi inthatait-enirime mapi ikentsiki, rowiinkaiteri inkaareki, ompoñaantyaari eero ikaariperotakaantanta. <sup>3</sup> Ontzimatye paamaakowentya eeroka. Tema intzimerika antzimotemirone kaariperori, pinkaminairi. Arika ripakaanairo rantayewetakari, pimpeyakotero rantzimowetakemiri. <sup>4</sup> Ari oshiyawo eejatzi. Tzimatsirika atziri osheki rantzimotakemi, onkaate 7 rapiipiintero apaaniki kiteesheri, ontzimatye papiipiinteri pimpeyakotakairi arika ripokashitemi inkowe pimpeyakotakagairi.”

*Poshiretakaaperotaina*

\* **16:19** Irootake ikantakoitziri jaka “owaneenka”, kithaarentsi anashirikimawotatsiri. Osheki owinawo jiroka. Apatziro ikithaayetawo ashaagantzinkari.

<sup>5</sup> Ikanta Rotyaantaperotanewo, ikantanakeri Jesús: “Nokowi poshoretakaaperotaina.” <sup>6</sup> Ari ikantanake Awinkatharite: “Onkantawetakya eero antawotzi poshoretana, poshiyaawo okithoki oryaanikitatsiri pankirentsi, aritake pimatakero antawo inchato katziyainchari, pinkantero: ‘Pishirinke, pinkatziye inkaareki.’ Nonkante naaka, atake imatakya.” \*

### *Rantayeteri imperataarewo*

<sup>7</sup> “Tzimatsirika pimperatanewo, piñaawairi rareetaiya rowintawaitzira powaneki, ikempoyiirira pipira ¿arima pinkantawairi: ‘Pakiyootapaina?’ <sup>8</sup> Tema eero, apatziro pinkantawairi: ‘Ponkotsitapai owanawontsi. Pomathakitya onkene poyiitena, nowawaitya, nirawaite nomere eejatzi. Eeroka impoitatsine poya.’ <sup>9</sup> ¿Arima pinkimoshirewentakero okaatzi rantakeri pimperatanewo? Tema eero. <sup>10</sup> Ari pinkantyaari eejatzi eeroka, arika pimonkaatakero inintakaimiri Pawa, pinkante: ‘Eero asagaawentawaita arika rimperayeetai, tema apatziro amonkaatero ikowakaitakairi anteri.’ ”

### *Retsiyatakotakagaitziri 10 pathaawaitatsiri*

<sup>11</sup> Ikanta rawisanake Jesús riyaate Jerusalén-ki, ikenanakero Samaria-ki ipoñagaawo Galilea-ki. <sup>12</sup> Ikanta rareetaka nampitsiki, ari ritonkyotakari 10 atziri pathaawaitatsiri, jantyaatsikaini ikatziyaiyapaakani. <sup>13</sup> Ikaimimaita, ikantzi: “¡Yotaantanerí Jesús, pineshironkatana naaka!” <sup>14</sup> Ari raminanake irirori, iñaatziiri ikatziyaiyani, ikantziri: “Piyaatashiteri Imperatasorentsitaarewo raminawakemiro pipathaawo.” Ikanta riyaataiyanakeni, omapokashitaka opeyanaka ripathaawo, etsiyatakotanai. <sup>15</sup> Ikanta apaani iñaakero retsiyatakotai, thaamenta ripiyaawo irirori, ikimoshirewentanakeri antawoite Pawa. <sup>16</sup> Rotziwerowashitapaakari iitziki Jesús, riwetharyapaakari. Jirika piyaachari Samaria-satzi rinatzi. <sup>17</sup> Irojatzi ikantantanakari Jesús: “¿Tema 10 etsiyatakotaatsiri, tsika ikenakeka itsipa? <sup>18</sup> Tekaatsi nosheninka piyaatsine inkimoshirewentanairi Pawa riwetharyagaiyaari, apatziro ripiyaawo itsipasatzi atziri.” <sup>19</sup> Riñaananakeri Jesús pathaawaitewetachari, ikantziri: “Pinkatziye, piyaatai. Iroowa etsiyatakotakagaimiri poshoretana.”

### *Tsikapaiteka etantanakyaawo impinkathariwentantai Pawa (Mt. 24.23-28, 36-41)*

<sup>20</sup> Ikanta Fariseo rosampitakeri Jesús, ikantziri: “Tsikapaiteka etantanakyaawo impinkathariwentantai Pawa.” Ari rakanake irirori: “Omapokashitaiya impinkathariwentantai Pawa. <sup>21</sup> Tekaatsi kantaatsine: ‘Jiroka jaka. Jironta janta.’ Tema mataka pinkatharishirewentantai Pawa.” <sup>22</sup> Ari ripithokashitanakari riyotaanewo, ikantziri: “Ari pinkowawetaiya paata piñeerime eepichokiini Itomi Atziri, eero okantzimaita. <sup>23</sup> Ari pinkemake inkantaite: ‘Jirika jaka.’ Itsipa kantatsine: ‘Jirinta janta.’ Eero piyaatashitziri, eero poyaatziri eejatzi. <sup>24</sup> Arika ripiyai Itomi Atziri, roshiyapaatyeyyaawo ookathawontsi, etanakyaawo tsika iweyaa kipatsi irojatzi tsika janta ithonka. <sup>25</sup> Etanakya iñagaitawakero antawoite rashironkawaitaitya, imanintawaitaiteri jirikapaini atziri tzimatsiri iroñaaka. <sup>26</sup> Aritake oshiyaiyaawo okanta pairani eeniro risaikaweta Noé. Aritake onkantaiyaari eejatzi arika ripokimatai Itomi Atziri. <sup>27</sup> Inimotziri atziripaini rowawaita, rirawaitzi, raawakaawaita eejatzi. Irojatzi ikyaantanakari Noé antawoki pitotsi riwetsikakeri. Okanta oonkanaka kipatsiki, thonkaiyakani maawoini atziri ikamake. <sup>28</sup> Ari oshiyaaawo pairani eeniro risaikaweta

\* **17:6** Iro ikantakoitzi jaka “okithoki oryaanikitatsiri pankirentsi”, jitachari “mostaza”, iro shookatsiri inampiki itsipa atziri. Iro ikantakoitzi jaka “antawo inchato”, jitachari “sicómoro”, irojatzi shookatsiri otsipaki inampi atziri.

Lot. Inimotziri atziri rowaiyani, rirawaitzi, riyomparitaiyani, ipankiwaitaiyini, riwetsikaiyini ipanko eejatzi. <sup>29</sup> Iro kantzimaitacha imonkaatapaaka kiteesheri rishitowantanakari Lot nampitsiki Sodoma, omapokashitaka oparyaapaake paampari, ari rithonkakari maawoini atziri ritagaa. <sup>30</sup> Arira onkantaiyaari eejatzi arika ripiyai Itomi Atziri. <sup>31</sup> Tzimatsirika saikatsiri jakakeroki ipanko, ari impoñaanakya rishiyanake, eero ikyaapanaantzi raapanaante tsika oita. Itzimirika saikatsine rowaneki, rishiye tsika ikanta, eero ripiyapanaanta. <sup>32</sup> Pinkenkithashiryaaakotero awishitzimotakerori pairani iina Lot. <sup>33</sup> Ikaatzi etakowaitachari apaniroidini rantayetziro iñaawenatashitari, aritake impeyashiretaiya. Iriima inkaate kamawentenane rantanairo nokowakairiri naaka, aritake rawisakoshiretai.” <sup>34</sup> Eekero ikantatzi Jesús: “Intzimai tsipatawakaachane rimaye. Apaani ragaitai inkiteki, iriima itsipa rookaitanairi. <sup>35</sup> Ontzimai apite tsinane tsipatawakaachane itoonkawaite. Apaani ragaitai inkiteki, irooma otsipa rookaitanairo. <sup>36</sup> Risaike apite atziri rowaneki. Apaani ragaitai inkiteki, iriima itsipa rookaitanairi.” <sup>37</sup> Ari rosampitaitanakeri Jesús, ikantaitziri: “¿Tsikajaantaka Pinkathari?” Ikantzi Jesús: “Tsikarika risaiki kaminkari, ari rewotaiyani tziso.” †

## 18

### *Ikenkithatakoitziro kinankawo eejatzi kaariperori pinkathari*

<sup>1</sup> Ari roshiyakaawentanakero Jesús ompoñaanayaarime ramanaityaarime kiteesheriki, eero ripakagaitantawo. <sup>2</sup> Ikantzi: “Eenitatsi nampitsi, ari risaikiri kaariperori pinkathari, te ipinkathatziri Pawa, te ipinkathatzitari eejatzi atziri. <sup>3</sup> Ari isaikitari tsinane kinankawo. Ipokashitakeri kaariperori pinkathari, okantziri: ‘Nokowi pinkaimenari kisaneentanari, piwetsikainawo awishimotanari.’ <sup>4</sup> Te ikowaweta pinkathari. Irojatzzi ikantashiretantakari: ‘Te nompinkathateri Pawa, eejatzi atziri. <sup>5</sup> Iro kantacha jiroka kinankawo, ontzimatyete nanteniro okowiri. Nisamawokari arika oomerencheena ipiyapiyatashitena.’ ” <sup>6</sup> Ikantzi Jesús: “Piñaakero ikantashiretakeri kaariperori pinkathari. <sup>7</sup> Iri maperotzirori Pawa, te rishenkaantzi rantainiri kameetha rashiyetaari, kamaitanaawori ramanaiyaari kiteesheriki.” <sup>8</sup> Eekero ikantatzi Jesús: “Eero rishenkagaita rantantaityaawori kameethari. Iro kantacha arika ripiyapaake Itomi Atziri, ¿eekeroma iñaapaatye awentaapiintaariri kipatsiki?”

### *Roshiyakaawentaitziri Fariseo eejatzi apatotziriri koriki*

<sup>9</sup> Eeniyetatsi kenkithashiretachari kameethashireri rinatzi. Irojatzzi imanintashirewaitantariri itsipa atziri. Irojatzzi roshiyakaawentantanakanariri Jesús, ikantzi: <sup>10</sup> “Eenitatsi apite atziri jatake tasorentsipankoki ramaña. Fariseo rinatzi apaani, iriima itsipa apatotziriri koriki. <sup>11</sup> Ikanta ikatziyapaaka Fariseo ramana, ikantzi: ‘Ariwé Pawa, tema te noshiyari naaka itsipa atziri, koshintzi rinatzi, kaariperoshireri ikanta, mayempiri rinatzi, ari roshiyari apatotziriri koriki. <sup>12</sup> Apite nitzitapiintawo awisayetzi kiteesheri rimakoryaantaitari, nowapiintzi koriki ikaatzi ripinaitanari.’ <sup>13</sup> Ikanta apatotziriri koriki, ikatziyapaaka jantyaatsikaini, oiyotapaaka ramana te ramini jenoki. Tema rowashiretakoshiryaanakitya, ikantzi: ‘Pawa, pinkaminthagaina naaka, kaariperoshireri ninatzi.’ ” \* <sup>14</sup> Ikantanake Jesús: “Iriitake raakameethaiteri jirika, kameethashire riyaatai ipankoki, te roshiyari itsipa. Tema ikaatzi iriiperowaiwetachari iroñaaka, ari intsinampashiretakagaitairi. Iriima ikaatzi tsinampashirewaitatsiri iroñaaka, aritake iñagairo ririiperotakagaitairi.”

† **17:37** Oshiyawo añaapiintziri rewotaiyani tziso, ayotzi tzimatsi kamaintsiri. Ari oshiyawo eejatzi arika añaayetakero okaatzi ikenkithatakotakeri jaka Jesús, ayotzi irootaintsi ripiyimatai. \* **18:13** Kantakotachari jaka “rowashiretakoshiryaanakitya”, irootake kantakotachari romposashipaneetanakitya atziri. Tema irootake rameyeteri Judá-ite arika rowashiretakoshiretyaawo oitarika. Inashita ametari aakapaini arika omposashipaneetya, tema asagaawentawaitatya.

*Ritasonkawentziri Jesús eentsipaini*  
(Mt. 19.13-15; Mr. 10.13-16)

<sup>15</sup> Ikanta ramaitapaakeniri Jesús eenchaaniki, ikowaitzi riterotantyaari rako. Iri kantacha riyotaanewo Jesús, ikisathatawakeri amayetziriri eentsi. <sup>16</sup> Irojatzzi ikantan-tanakari Jesús: “Pishineteri eenchaaniki ripokashitena. Eero pithañaana. Tema inkaate oshiyaarine eentsi, iriitake ñaagairone ipinkathariwentantaira Pawa. <sup>17</sup> Imaperotatya, eerorika ipinkathaitziri Pawa roshiyakotaityaari ikantaga eentsi, eero inagairo im-pinkatharitai.”

*Mainari ashaagantzinkari pinkatharitatsiri*  
(Mt. 19.16-30; Mr. 10.17-31)

<sup>18</sup> Ikanta apaani pinkathari rosampitakeri Jesús, ikantziri: “Kameethari Yotaantan-erí, ¿oitaka nantairi noñaantaiyaawori kantaitaachane añaaamentotsi?” <sup>19</sup> Irojatzzi rakan-tanakari Jesús, ikantzi: “¿Oitaka pikantantanari: ‘kameethari pinatzi?’ Apatziro ikan-takaawo Pawa ikameethatzi, tekaatsi itsipa. <sup>20</sup> Piyotakotakeroma Inintakaantaitanewo, kantatsiri:

Eero pitsitokantzi.

Eero pimayempitzi.

Eero pikoshitzi.

Eero pithaiyakowaitanta.

Eero pamatawitantzi.

Pimpinkathateri ashitzimiri.”

<sup>21</sup> Ari rakanake mainari, ikantzi: “Yotaantanerí, nithotyaakero maawoini netanakawo pairani eeniro neentsitzi.” <sup>22</sup> Ikanta ikemakerira, ikantanakeri Jesús: “Tzimatsi kowa-painchari panteri. Pimpimantero okaatzi pashitari, pimpashityaari ashironkaachari. Tema ari piñagairo pinintagaiya inkiteki. Pipoke, poyaatena.” <sup>23</sup> Ikanta ikemawake, owashire ikantanaka, tema ashaagantzinkari rinatzi. <sup>24</sup> Tema inñaakeri Jesús antawoite rowashiretanaka, ikantanake: “¡Imapero opomeentsita riyataai ashaagantzinkari tsika ipinkatharitzzi Pawa! <sup>25</sup> Tema eero okanta inkye piratsi camello imooki akoshi, iriitake maperotzirori impomeentsitya inkye ashaagantzinkari tsika ipinkatharitzzi Pawa.” <sup>26</sup> Ikantayetanake ikaatzi kemakeriri Jesús: “¿Iitakama awisakoshiretaatsine?” <sup>27</sup> Irojatzzi ikantantanakari Jesús: “Eenitatsi pomeentsitzimotariri atziri, iriima Pawa tekaatsi pomeentsitzimotyaarine.” <sup>28</sup> Ari ikantanake Pedro: “Jirika nokaataiyakenika naaka, nookayetanakero tzimimoyetanari, noyaataiyakemini.” <sup>29</sup> Ikantanake Jesús: “Imaperotatya, tzimatsirika kowanairori impinkathariwentairi Pawa, irootake rookantanaka-wori ipanko, ashitariri, irirentzi, iina, eejatzzi rowaiyanepaini, <sup>30</sup> tema osheki raakotakeri iwairo Pawa jirika, aritake anagairo okaatzi rookanakeri. Ari inkantaityaari eejatzzi paata arika inagairo kantaitaachane añaaamentotsi.”

*Rapiitairo Jesús ithawetakota rowamagaiteri*  
(Mt. 20.17-19; Mr. 10.32-34)

<sup>31</sup> Ikanta Jesús rapatotairi 12 riyotaanewo, ikantziri: “Aatatye iroñaaka Jerusalén-ki. Ari imonkaatyaari awishimoterine Itomi Atziri, tema irootake rosankenatakotakeri pairani Kamantantaneri. <sup>32</sup> Ari raakaantaiteri, rayeri atziri kaari asheninkata. Antawoite ishiron-taminthaityaari, inkemaatsitakagaityaari, reewawootaiteri. <sup>33</sup> Arika onkaatake ripasawaitaiteri, ari rowamagaiteri. Iro awisawetakya mawa kiteesheri, ari rañagai eejatzzi.” <sup>34</sup> Iro kantzimaitacha, te ikemathatziro jirikapaini ikaatzi kemawetain-chari, tema te ikowaitzi inkemathatakagaiteri.

*Raminakagaitairi Jericó-satzi*  
(Mt. 20.29-34; Mr. 10.46-52)

<sup>35</sup> Ikanta Jesús areetzimataka nampitsiki Jericó. Ari risaiki mawityaakiri awotsi-nampiki ikowakotantzi impashitaityaari. <sup>36</sup> Ikemake mawityaakiri, rosampitakeri awisayetatsiri atziri, ikantziri: “¿Iitaka pokatsiri?” <sup>37</sup> Ikantaitanakeri: “Ripokatzi Jesús, iitaitziri Nazaret-satzi.” <sup>38</sup> Irojatzi ikaimantanakari, ikantzi: “¡Jesús, icharinetari David-ni, pineshironkataina naaka!” <sup>39</sup> Osheki ikisathaweetanakari imairetantyaari. Eekero ikaimanakitzi shintsiini, ikantzi: “¡Icharinetari David-ni, pineshironkataina naaka!” <sup>40</sup> Ari ikatziyapaaka Jesús, ikantzi: “Pamakenari jaka.” Ikanta ramaitapaakeniri, rosampitawakeri. <sup>41</sup> Ikantziri: “¿Oitaka pikowiri nantaimiri?” Rakanake mawityaakiri, ikantzi: “Nokowi nokiryagai, Pinkathari.” <sup>42</sup> Ikantanake Jesús: “Aritake pokiryagai, iro etsiyatakotakagaimiri pawentagaana.” <sup>43</sup> Romapokashitanaka raminanai, roy-aatanakeri Jesús, kimoshire ikantawentanakari Pawa. Ikanta atziripaini iñaakero rantakeri Jesús, rimatanakero iriroripaini ithaamentawentanakari Pawa.

## 19

### *Jesús eejatzi Zaqueo*

<sup>1</sup> Ikanta rareetapaaka Jesús Jericó, ranashitapaakawo nampitsi. <sup>2</sup> Ikanta reeware apatotziriri koriki iita Zaqueo. Ashaagantzinkari rinatzi. <sup>3</sup> Ikowaperotake irirori iñeeri Jesús. Iro kantacha te imata osheki atziri otzikaakeriri, ikaamokokitziini eejatzi. <sup>4</sup> Irojatzi reewatantanakari Zaqueo, ateetapaake inchatoki onkene iñeeri Jesús, tema ari inkenapaakeri. \* <sup>5</sup> Ikanta rareetapaaka Jesús rateetakera Zaqueo, raminapaake jenoki, iñaapaakeri, ikantapaakeri: “Zaqueo, payiite intsipaite, ari noshiretawo nimaye pipankoki.” <sup>6</sup> Intsipaite rayiitanake Zaqueo. Kimoshire raanakeri ipankoki. <sup>7</sup> Ikanta iñagaitakeri, ñaawaitanake atziripaini ikantzi: “¿Iitaka ikyaawankotantariri Jesús kaariperoshireri?” <sup>8</sup> Irojatzi ikantantanakari Zaqueo: “Pinkathari, ari nompakeri ashironkainkari niyanki nashaagawo. Tzimatsirika namatawitakeri nokoshitziri, ari noipiyainiri onkaate 4 nayitakeriri.” <sup>9</sup> Ikantanake Jesús: “Iroñaaka piñeero pawisakoshiretai. Tema pantanairo poshiyakotanaari rowawiiroki isheninkaani okaakiini Abraham. <sup>10</sup> Tema iro ripokantakari Itomi Atziri rithotyaaakoyetairi ikaatzi peyashiwe-tainchari, rowawisaakoshireyetairi.”

### *Roshiyakaawentaitziri 10 koriki*

<sup>11</sup> Irojatzi ikemisantaiyakeni atziri ikenkithatzira Jesús. Irojatzi roshiyakaawentan-tanakanariri, tema ikenkithashirewetaiyani atziripaini koñaawoini impinkathariwent-tantai Pawa, tema irootaintsi rareetya Jerusalén-ki. <sup>12</sup> Ikantanake: “Tzimatsi jewari jatake otsipaki nampitsi, impinkatharitakagaiteri, eejatzi ripiyai. <sup>13</sup> Ipiyotanakeri 10 rimperatanewo, ipanakeri 10 koriki, ikantayetanakeri: ‘Pantawaitakairi koriki nopayetakemiri, irojatzi nipiyantaiyaari.’ † <sup>14</sup> Iro kantacha eenitatsi kaari kowerine impinkathariwentante. Rotyaantaitake kantatsine: ‘Te nokowaiyini impinkatharite.’ <sup>15</sup> Ikanta ripiyaa, ipinkatharitakaitakeri. Rapatotapairi rimperatanewo ipayetanageri-ranki koriki, ikowi iñeeri tsika ikanta rantawaitakaakeri iyorikite. <sup>16</sup> Retapaakawo ripokake apaani, ikantapaake: ‘Pinkathari, nosheñaakerira piyorikite, nagai itsipa ikaatzi 10.’ <sup>17</sup> Ikantanake irirori: ‘Kameethatake nimperatanewo, okamintha pikyaaryootake eepichokiini, aritake piñaakero peewatakaantero nampitsi onkaate 10.’ <sup>18</sup> Ari ripokapaake itsipa rimperatanewo, ikantapaake: ‘Pinkathari, nosheñagaimiri piyorikite, nagai itsipa ikaatzi 5.’ <sup>19</sup> Eejatzi ikantanakeri irirori: ‘Ari pinkantzityaari eeroka, aritake piñaake peewatakaantero nampitsi onkaate 5.’ <sup>20</sup> Ripokapaake itsipa,

\* **19:4** Kantakotachari jaka “incható”, irootake iitaitziri otsipaki nampitsi sicómoro. † **19:13** Ikantakoitziri jaka “koriki”, iriitake iitaitziri pairani “mina”. Raantaityaariri mina, ontzimatyte rantawentaiteri inkaate mawa kashiri.



ikantapaake: ‘Pinkathari, jirika piyorikite kameetha noponatakemiri. <sup>21</sup> Tema anta-woite nothaawantzimi imaperotatzimi pimashireyantziti, te piñaakota posheñaantariri piyorikite.’ <sup>22</sup> Ikantanake irirori: ‘Kaariperori nimperatanewo pinatzi. Eeroka atsipetyaawone okaatzi pikantakenari. Piyowetaka osheki nomashireyantziti, te noñaakoneta nosheñaantariri noorikite. <sup>23</sup> Piñaawetaka eero pimatziro, pamineme iita antawaitakairineme noorikite, ari ishenineentakeme iroñaaka, iri pimpawainarime nipiyaaga.’ <sup>24</sup> Ari ikantanakeri atziripaini piyotainchari: ‘Paapithateri koriki, pimperi osheñaakeriri ikaatzi 10.’ <sup>25</sup> Ikantaiyanakeni atziri: ‘Pinkathari, ¿oitaka impantaityaariri, tema tzimatsi rashi irirori 10 koriki pipakeriri inkaaganki?’ <sup>26</sup> Eekero ikantatzi ashitariri iyorikite: ‘Ikaatzi ishekitzimotakeri, ari ishekitzimoperotairi. Iriima kaari ishekitzimoperotzi, eekero iñaatyeeeri eero ishekitzimoperotairi.’ <sup>27</sup> Ikantanake eejatzi: ‘Pamakeri ikaatzi kisaneentanari kaari kowatsine nompinkathariwenter, poñaayenari pithatzinker.’ ”

*Areetaawo Jesús Jerusalén-ki*  
(Mt. 21.1-11; Mr. 11.1-11; Jn. 12.12-19)

<sup>28</sup> Rithonkanakero ikantakeri Jesús, jewanake riyaatziro Jerusalén-ki. <sup>29</sup> Ikanta rareetzimataka nampitsiki Betfagé eejatzi Betania imontenampitari otzishi Olivo. Ari rotyaantakeri Jesús apite riyotaanewo. <sup>30</sup> Ikantakeri: “Piyaate nampitsiki amontenampitakari. Ari piñaapaakeri ewonkeri burro inthatakotya, tekera ikyaakagaitariita. Pinthataryaakoteri, pamakenari jaka. <sup>31</sup> Arika rosampiitawakemi: ‘¿Piiterika pithataryaakotantariri burro?’ Pinkantanakeri eeroka: ‘Ikowatziiri Pinkathari.’ ” <sup>32</sup> Jataiyanakeni rotyaantaitakeri, iñaakero okaatzi ikantaitakeriri. <sup>33</sup> Ithataryaakotapaakeri burro. Rosampitakeri ashitariri, ikantziri: “¿Piiterika pithataryaakotantariri?” <sup>34</sup> Ikantanake irirori: “Ikowatziiri Pinkathari.” <sup>35</sup> Irojatziri ramantakanariri Jesús. Rowanketakeniri manthakintsi imitzikaaki, ikyaakaanakari Jesús. <sup>36</sup> Ikanta ranashitakaanakari Jesús burro, romaankashiitanakeri manthakintsi awotsiki inkenanakera. <sup>37</sup> Ikanta riyotaapiintziri Jesús, oirinkimatanaka otzishiki Olivo, ikaimaiyini ithaamentawentari Pawa, tema iñaapiintziri ritasonkawentantzi Jesús. <sup>38</sup> Ikantaiyini:

¡Kaakitataike awinkatharite! Tasonkawentaarewo rinatzi, tema Pinkathari aitziri otyaantakeriri.

¡Risaikakaayetziri kameetha nampitawori inkiteki!

¡Iri kameethatatsiri oshekitzimotziri rowaneenkawo Pawa nampitawori ojenokiper-otzinta inkite!

<sup>39</sup> Ikanta Fariseo saikayetaintsiri eejatzi janta, ikantakeri Jesús: “Yotaantanerí, pinkisathateri piyotaanewo.” <sup>40</sup> Rakanake Jesús, ikantzi: “Arika nomairyaakeri ikaatzi kaimayetaintsiri, aritake onkaimanake mapi iroori.”

<sup>41</sup> Ikanta rareetzimataapaakaga Jesús Jerusalén-ki, riraakotapaakawo iñaapaakerowa. <sup>42</sup> Ikantzi: “¡Osheki onkameethateme pinkemathatawakityeerome eepichokiini iroñaaka, irootake kiteesheri piñaantaiyaawori pisaikai kameetha! Iro kantzimaitacha eero imata tema mawityaaki ikantakagaitakemi. <sup>43</sup> Tema irootaintsi ripoke kisaneentzimiri, riwetsikashitapaakemi rithonkantemiri. Rithonka rotzikapaakemi iweyaaga potanto, eero piñiuro tsika pinkene pishiye. <sup>44</sup> Ari intzimpookaitakemi, rashiryagaityaari maawoini. Eero iñagaitairo mapipaini okaatzi pewiryaaayetachari iroñaaka, okantakaantziro te piyotawakeri tsika itzimi pokashiwetakemiri.”

*Rookapaakeri Jesús yompariyetachari tasorentsipankoki*  
(Mt. 21.12-17; Mr. 11.15-19; Jn. 2.13-22)

<sup>45</sup> Ikanta ikyaapaake Jesús tasorentsipankoki, rookapaakeri yompariyetachari. <sup>46</sup> Ikantayetziri: “Pairani rosankenaitakero kantatsiri: ‘Nopanko inatzi jiroka, ari

ramanapiintaitenari.’ Iro kantzimaitacha eeroka pamatawitantapiintake jaka pipimantayetzi, poshiyakaakero koshintzipanko.” <sup>47</sup> Rashi rowapaakitziro Jesús riyotaantzi kiteesheriki tasorentsipankoki. Iri kantacha reeware Imperatasorentsitaneri, itsipatakari Yotzinkariite eejatzi Antariite, raminaminatakero tsika inkenakairo rowamaakaanteri. <sup>48</sup> Te iñimaita tsika inkenakairo, tema owayempita ikantaiyakani atziripaini ikemisantziri Jesús.

## 20

### *Ishintsinka Jesús*

*(Mt. 21.23-27; Mr. 11.27-33)*

<sup>1</sup> Ikanta Jesús riyotaayetakeri atziri tasorentsipankoki, ikenkithatakairi Kameethari Ñaantsi. Irojatzri ripokantapaakari reeware Imperatasorentsitaarewo, itsipatakari Yotzinkariite, ripokitaka Itzinkamipaini eejatzi. <sup>2</sup> Rosampitapaakari Jesús, ikantziri: “Pinkantena, ¿Jimpe itzimajaantzika pinkathari otyaantzimiri pantantawori jiroka?” <sup>3</sup> Irojatzri rakantanakari Jesús, ikantziri: “Tzimatsi eejatzi nosampitemiri naaka, ontzimatye pakena. <sup>4</sup> Tema romitsitsiyaatantake Juan-ni, ¿iitaka otyaantakeriri? ¿Pawama? ¿Iriima otyaantakeri atziri?” <sup>5</sup> Ari ikantawakaiyanakani irirori: “Arika ankantakeri Pawa otyaantakeriri, ari inkantanakai: ‘¿Oitaka kaari pikemisantantari?’ <sup>6</sup> Irooma ankanteririka: “Tema atziri otyaantakeriri”, ari rishemyagaitakai. Tema maawoini atziripaini ikantaiyini Kamantantaneri rinatzi Juan-ni.” <sup>7</sup> Ari ikantaiyakeni: “Te niyote iita otyaantakeriri.” <sup>8</sup> Ari ikantzitanakari Jesús irirori: “Eejatzi naaka, eero nokamantzimiro iita otyaantakenari.”

### *Kaariperoshireri antawairentzi*

*(Mt. 21.33-34; Mr. 12.1-11)*

<sup>9</sup> Ikanta Jesús roshiyakaawentanakeniri atziripaini, ikantzi: “Tzimatsi pankitzirori chochokimashi. Irojatzri raminantakari iita aminerone iwankiremashi, jatake irirori intaina osheki ipeyaka. <sup>10</sup> Ari rotyaantawetaari rimperatanewo ragaateme okithoki iwankire. Ikanta iñaawakeri antawairentzi, ripasapasatawakeri, roipiyairi tekaatsi raanai. <sup>11</sup> Rotyaantake itsipa. Eejatzi roshiyakaawakeri, ikisawaitawakeri, romposaposaatawakeri, roipiyairi tekaatsi raanai. <sup>12</sup> Irojatzri rotyaantantakariri mawatanaintsiri rimperatanewo. Eejatzi roshiyakagaitakeri, rantawakeri, roipiyakeri. <sup>13</sup> Ikantzi ashitawori iwankiremashi: ‘¿Tsika nonkantyaaka? Iriirika notyaantake netakotanewo notomi naaka, aamaaka ari impinkathaitakeri.’ <sup>14</sup> Ikanta antawairentzi iñaawakeri itomi ripokake, ikantawakagaiyani: ‘Pokake ashitaiyaawone paata pankirentsimashi. Jame owamayeri, ayeroota aaka.’ <sup>15</sup> Raawakeri, raanakeri othapiiteki pankirentsimashi, rowamaakeri. ¿Oitaka ranteri ashitawori pankirentsimashi? <sup>16</sup> Tema pokanake irirori, rowamaakeri maawoini kempoyiirori rowane, raminai itsipa atziri.” Ikanta jirikapaini ikaatzi kemakerori ikantakeri Jesús, ikantaiyanakeni: “¡Onkamintha eero imata!” <sup>17</sup> Ikanta Jesús raminanakeri atziripaini, ikantanakeri: “¿Tsika okantziranki osankenatainchari? Imanintawetakawo mapi jirikapaini wetsikirori pankotsi. Iro kantzimaitacha ipiriintaitairo mapi pankotsinampiki, roshiyakaitairo iroome tzinkamitsi.”

<sup>18</sup> Jiroka okantakota mapi: iitarika ontziwatyaawone, ari risataake. Iriima anawya-gairi, ari ishemyaakeri.

### *Ikenkithatakoitziri koriki impaiteriri pinkathari*

*(Mt. 21.45-46; 22.15-22; Mr. 12.12-17)*

<sup>19</sup> Ari ikowawetaka reeware Imperatasorentsitaarewo itsipatakari Yotzinkariite raakaanterime Jesús, tema riyotake iriitake ikenkithatakotzi. Temaita rimatziro,

osheki ithaawantakari atziri piyotainchari. <sup>20</sup> Irojatzí rotyaantantaitakariri ami-naantantaneri, roshiyakotapaakyaari atziri kameethashireri, ikowaiyawetani rikompitakayaarime Jesús, inthawetakotzimaityaari pinkathariki. <sup>21</sup> Ikanta rareetaiyakani, ikantapaakeri Jesús: “Yotaantanerí, okaatzi piñaanetari eeroka irooperori inatzi, kaari Inintakaantashitari atziri. Piyotaantziro eeroka irooperori Inintakaantziro Pawa. <sup>22</sup> ¿Okameethatzima amperi koriki ikowakaantane Pinkathari César?” <sup>23</sup> Iri kantzimaitacha Jesús riyotawake ikowatzi ramatawiteri ikaatzi osampitakeriri, ikantanakeri irirori: “¿Oitaka piñaantantanari? <sup>24</sup> Janjaatya poñaayenari koriki. ¿Iitaka ashitawori ipoo oshiyakaawentainchari? ¿Iitaka ashitawori iwairo eejatzi?” Ikantaiyini: “Rashi César.” <sup>25</sup> Eekero ikantatzi Jesús: “Tema iri César ashitari, pantantyaanari okaatzi ikowakayimiri. Iriima ikaatzi rashitari Pawa, pantantyaanari ikowakaayetzimiri irirori.” <sup>26</sup> Te roitsinampairi rikompitakayaari, apatziro riyokitziwentanakeri ikemakeri ikantake, tekaatsi inkantanake.

*Rosampikowentaitziro arika rañagai kamayetatsiri*

*(Mt. 22.23-33; Mr. 12.18-27)*

<sup>27</sup> Ikanta ripokaiyakeni Sadoc-iite iñeeri Jesús. Iriitake Sadoc-iite kantayetatsiri eero rañagai kamayetatsiri. Rosampitapaakeri Jesús, <sup>28</sup> ikantapaakeri: “Yotaanarí, rosanke-natake pairani Moisés-ni, kantatsiri: ‘Arika inkame atziri, rokanawentanaiyaawo iina. Eerorika rowaiyakaawo, okameethatzi ragairo irirentzi iinantaiyaawo irirori. Arika rowaiyakagaiyaawo tsinane, oshiyawaityaawo iriime ashityaarineme irirentzi kamaintsiri.’ <sup>29</sup> Jame oshiyakaawentawakero: Tzimatsi ikaatzi 7 irirentzi. Etawori itzimi raawetaka iina, tekera osamaniteeta, kamake, te rowaiyakaawo iina. <sup>30</sup> Irojatzí raantawetaawori itsipa irirentzi oyaatapaakeriri. Eejatzi ikantakari irirori, kamake, te rowaiyakaawo. <sup>31</sup> Ipoñaawetapaaka itsipa irirentzi, eejatzi ikantaka irirori. Ari ikantakari maawoini irirentzi ikaatzira 7. Tekaaitsi owaiyakayaawone tsinane. <sup>32</sup> Okanta osamanitake kamai eejatzi iroori. <sup>33</sup> Arika rañaayetaima paata ikamayetakera, ¿Iitaka oimentaperotari tsinane? Tema oimentawetakari ikaatzira 7.”

<sup>34</sup> Ari rakanakeri Jesús, ikantanakeri: “Apatziro raayetzi iina atziripaini añaaetziri iroñaaka jaka, rakotagaitziri kowatsiri iina. <sup>35</sup> Iriima añagaatsine paata ikamawetakaga, eero raayetzi iina, eero rakotagaitairi kowatsine iina. <sup>36</sup> Tema eero ikaamanetapai janta, roshiyapaiyaari maninkariite, tema itomi Pawa rinayetaatzi rañaayetzi. <sup>37</sup> Jiroka ikenkithatakoitziri rañaayetzi kamayetaintsiri, ¿tema piñaanatero rosankenare Moisés-ni riñaanatantakariri Pawa kitocheemaishiki? Ikantakeri:

Moisés, Naaka Pawa, ipinkathatziri Abraham, Isaac, eejatzi Jacob.

<sup>38</sup> Ari ayotziri, añaaetzisi irirori, tema te rimatziro kaminkari impinkathateri Pawa, apatziro añaaetzisi. ¿Piñaakero? Tema ikaatzi kamayewetachari, irojatzí rañiimotziri Pawa.” <sup>39</sup> Ari ikantanake apaani Yotzinkari: “Yotaantanerí, pimatakerowa.” <sup>40</sup> Tekaaitsi kowanaatsine rosampitanairi.

*¿Iita charinetariri Cristo?*

*(Mt. 22.41-46; Mr. 12.35-37)*

<sup>41</sup> Ikanta Jesús rosampitantake, ikantzi: “¿Oitaka ikantantaitari, ‘jirika Cristo-tatsine, iriitake incharinetyaari David-ni?’ <sup>42</sup> Tema iri David-ni osankenatakerori kantatsiri:

Ikenkithawaitake Pinkathari, ikantawairi Nowinkatharite, ikantziri:

Pisaikapai nakoperoki, ampinkathariwentantai,

<sup>43</sup> Irojatzí paata nowasanketantaiyaariri kisaneentayetakemiri,

Ari pimakoryaayitzi tantaiyaari.

<sup>44</sup> Piñaakero, ikantzita David-ni irirori: ‘Nowinkatharite rinatzi Cristo.’ ¿Iitama incharinetantaitaiyaariri David-ni?”

*Ikenkithatakoitziri Yotzinkariite*  
(Mt. 23.1-36; Mr. 12.38-40; Lc. 11.37-54)

<sup>45</sup> Maawoini atziripaini ikemaiyakerini Jesús ikantakeri riyotaanewo:  
<sup>46</sup> “Paamaiyaari Yotzinkariite. Osheki iñaamatawo rowaneenkakitya, ishametakaayetero iithaarekoryampyaa. Ikowi pinkatha riwethatapiintaityaari arika iñagaiteri. Arika riyaaate pankotsiki rapatotapiintaita, ikowapiintziro rosatekyaya niyankineki. Ari ikantzitari arika rowaiyaani isheninka, ikowapiintzi rosatekyaya.  
<sup>47</sup> Rowashironkaakero kinankawo raapithatziro opanko. Iro rosamaninkantayetawori ramanapiinta eero riyotantaitari. Oshekimaita rowasankeyeetairi.”

## 21

*Ashironkainkawo tsinane*  
(Mr. 12.41-44)

<sup>1</sup> Ikanta Jesús raminaminthatziri ashaagantzinkari roteyetziri iyorikite janta rote-tapiintaitzirira. <sup>2</sup> Irojatziri ipokantapaaka kinankawo tsinane ashironkainkawo inatzi, otetapaake iroori apipentyakite koriki. <sup>3</sup> Ikantzi Jesús: “Imapero anaantake jiroka tsinane, anaakeri ikaatzi oteyewetainchari. <sup>4</sup> Tema ikaatzi oteyewetainchari osheki ikashaakaawetariri Pawa, rotetashitakari tzimagaantatsiri iyorikite. Irooma jiroka tsinane, apintziryaakeri otetakeri oorikite amanantantyaarime owanawo.”

*Ikenkithatakotziro Jesús ipooke tasorentsipanko*  
(Mt. 24.1-2; Mr. 13.1-2)

<sup>5</sup> Eenitatsi kantayetaintsiri: “Kameetha inatzi mapi riwetsikantaitawori tasorentsipanko, owaneenka okanta.” Irojatziri ikantantanakari Jesús: <sup>6</sup> “Okaatzi piñiiri wetsikayetainchari, irootaintsi rithonkaitero intzimpookaitero, eero iñagaitairo pewiryaaayetachari mapi.”

*Iñagaitairi arika ithonkimataiya*  
(Mt. 24.3-28; Mr. 13.3-23)

<sup>7</sup> Ari rosampitaitanakeri, ikantaitziri: “Yotaanarí, ¿tsikapaiteka imatya pikantakeri? Arika imonkaatzimatayya, ¿onkantyaaka riyotantaityaari?” <sup>8</sup> Ari rakanake Jesús ikantzi: “Paamaiya ramatawitaitzimikari. Tema osheki kowatsine ramatawitemi paata, raakotapaakero nowairo, inkante: ‘Irootaintsi imonkaatzimatya, Naakaga Cristo.’ Eero poyaatziri. <sup>9</sup> Ari pinkemakotakero omanarentsi, koshekawakagaantsi, paamaiya omapokimikari, ontzimatyey imonkaayetya jiroka, eekero iyaatanakitye imaperotya.

<sup>10</sup> Rantaminthatawakaanakya maawoini nampitsiki inkaate rotyaantayeteri pinkathariyetsiri. <sup>11</sup> Iñagaitero osheki omoyekayetya kipatsi, ritasheneentayeete, imantsiyataite. Iñagaite osheki inthaawantaityaari, iñagaite inkiteki kaari iñagaitapiintzi. <sup>12</sup> Iroowa etayetanakyaawone raakaantawaitanakemi atziri, inkoshekakaantawaitemi. Ari ripasatakaantawaitemi rapatotapiintaitaga, romonkyaakaantawaitemi. Raayetanakemi risaikira pinkatharentsipero okantakaantziro paakotaana nowairo pikemisantaanaga. <sup>13</sup> Irootake antantari jiroka ompoñaantyaari pinkenkithatakotantenari janta. <sup>14</sup> Ontzimatyey pawentina naaka, eero pipomeentsiwentashitawo oita pinkantapaakeri. <sup>15</sup> Tema naaka yotakaimirone, ompoñaantyaari eero piñaantawo ripiyatemi onkaate pinkanteriri. <sup>16</sup> Ari piñaake raakaantemi ashitzimiri, raakaantemi pirentzi, raakaantemi pisheninkathori eejatziri. Eeniyetatsi rowamaakaantaite. <sup>17</sup> Osheki piñeero inkisaneentaitemi okantakaantziro paakotaana nowairo pikemisantaanaga. <sup>18</sup> Iro kantzimaitacha eero opeyagaantawaita apaani piishi. <sup>19</sup> Arika pinkisashitakyaawo, iroowa piñaantaiyaawori pawisakoshireyetai.

<sup>20</sup> Arika piñaake rotzikapaakero owayeripaini Jerusalén, ari piyote monkaatapaaka raperoitanyaaawori. <sup>21</sup> Inkaate nampitaiyaawone paata Judea-ki, rishiyayetai otzishiki. Inkaate saikatsine nampitsipainiki, ari impoñeeya rishiyanake. Inkaate saikatsine rowaneki, eero ripiyapanaanta ipankoki. <sup>22</sup> Tema ripiyakowentaitatziiri jirikapaini, ari imonkaatyaari rosankenaitakeri pairani. <sup>23</sup> ¡Inkantamatsitaitero paata onkaate motziyetatsine, eejatzi onkaate tzimatsine eentsite eeniro ithotayetzi iteni! Tema antawo onkantya rashironkagaitya arika rowasankeyeetairi. <sup>24</sup> Rithonkaitairime Jerusalén-satzi. Rimperatanewo rowayetairi atziri poñaayetachari otsipaki nampitsi. Iriitake oipatsiterone nampitsi Jerusalén itsipasatzi atziri, irojatzii imonkaatantaiyaari okaatzi ikowakaakeriri Pawa jirikapaini.”

### *Ripiyantaiyaari Itomi Atziri*

*(Mt. 24.29-35, 42-44; Mr. 13.24-37)*

<sup>25</sup> “Ari iñagaitake paata kaari iñagaitapiintzi inkiteki, impashiniyetai ooryaatsiri, kashiri, eejatzi impokiro. Ari onkantzityaari kipatsiki, antawoite rashironkaayetya atziripaini, eero riyotai oita rantairi, onkantakaantero owaimanka otamakaare inkaare. <sup>26</sup> Owamayimatakeri ithaawanka atziripaini inkenkithashiretakotero awisatsine kipatsiki. Ari inkantzitakyaari eejatzi inkiteweri oshekitzimotziri ishintsinka, osheki inkantakantayetanyakya. <sup>27</sup> Aripaitera ripokai Itomi Atziri, inkenapai menkoriki, iñagaitawairo ishintsinka, eejatzi rowaneenkawo. <sup>28</sup> Arika piñaayetakero etanyakyaawo kantayetachane, aminapiinta pinkantya jenoki, tema irootaatsi rontsiparyaakowentaitaimi.”

<sup>29</sup> Irojatzii roshiyakaawentantanakanariri, ikantzi: “Pinkenkithashiretakotero tsika okanta piñaayetapiintziro inchatopaini. \* <sup>30</sup> Arika piñaakero eereshiyetai, piyotzi irootaintsi osarentsitzimatai. <sup>31</sup> Iroowa piyoteri eerokapaini, arika piñaayetakero nokamantayetakemiri, irootaintsi impinkathariwentantai Pawa. <sup>32</sup> Imaperotatya nonkante, eero ipeyaawo jirika asheninkapaini, irojatzii iñaantakyaawori nokamantayetakemiri. <sup>33</sup> Eero ashi owero piñeero inkite eejatzi kipatsi, irooma niñaaneyetakari imaperotaatyeyya iroori.

<sup>34</sup> Aamaawenta pinkantayetaiya eerokapaini, eero ityiimi piyaariperonka, ayimawaitemi pishinkitya, onkantzimowaiyetemi. Kyaaryoowa romapokaitzimikari. <sup>35</sup> Eenitatsi oshiyapaakyaawone iwirentsi. Ari riwitaiyaari saikayetatsiri kipatsiki. <sup>36</sup> Paamaiya, kamaita pinkantya pamaña, pinkante: ‘Pookaakowentena eero nokemaat-sitantawo kenkithatakoyetainchari. Piwetsikashiretakayena nitonkyotantawaiyaariri Itomi Atziri.’ ”

<sup>37</sup> Tema kiteesheriki riyotaantzi Jesús tasorentsipankoki. Irooma tsireniriki, riyaatzi tonkaariki Olivo, ari rimayi. <sup>38</sup> Ananinkayetake osheki atziri ikemisantziri Jesús riyotaantzi tasorentsipankoki.

## 22

### *Ikamantawakaita raakaantaiteri Jesús*

*(Mt. 26.1-5, 14-15; Mr. 14.1-2, 10-11; Jn. 11.45-53)*

<sup>1</sup> Irootaatsi roimoshirenkaitero rowantapiintaitawori tashirentsiponka iitaitziro kiteesheri Anonkoryagaantsi. <sup>2</sup> Ari ikamantawakaari reeware Imperatasorentsitaarewo itsipatakari Yotzinkariite, ikantawakaiyani: “Jame owamaakaanteri Jesús.” Iro kantzimaitacha antawoite ithaawantakariri atziripaini.

<sup>3</sup> Ikanta Judas iitaitziri eejatzi Iscariote kaawetachari 12 riyotaanewo Jesús, ikyaantashiretanakariri Satanás. <sup>4</sup> Riyaatashitakeri reeware Imperatasorentsitaarewo, eejatzi reeware kempoyiirori tasorentsipanko, inkenkithawaitakaakeri tsikapaite raakaanteri

\* **21:29** Iro ikantaitziri jaka “piñaayetapiintziro inchatopaini”, pankirentsi higo shookatsiri otsipaki nampitsi.



Jesús. <sup>5</sup> Antawoite ikimoshiretanake jewari, ikamantawakaiyakani imperi koriki. <sup>6</sup> Arira raminaminatanakero Judas tsikapaite raakaanteri, eero riyotzimaita atziripaini.

*Riweyaantawo rowakaanaari riyotaanewo*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Ari imonkaatakari kiteesheri rowantapiintaitawori tashirentsiponka, rowamaapi-intaitantariri eejatzi oweja rowaitari kiteesheriki Anonkoryagaantsiki. <sup>8</sup> Ikanta Jesús rotyaantakeri Pedro itsipatanakari Juan, ikantakeri: “Piyaate ponkotsitakaante oyaari kiteesheriki Anonkoryagaantsiki.” <sup>9</sup> Ikantaiyini irirori: “¿Tsika pikowika nonkotsitakaante?” <sup>10</sup> Ikantanake Jesús: “Arika pareetzimatakya nampitsiki, ari pitonkyotakya aakotzirori iñaate chomaanikiki. Poyaatanakeri irojatzzi pankotsiki tsika inkyaapaake. <sup>11</sup> Tsikarika inkyaapaake, pinkanteri ashitawori ipanko: ‘Ikowi riyote yotaanari tsika rowakayaari riyotaanewo, roimoshirenkero kiteesheri Anonkoryagaantsi.’ <sup>12</sup> Ari roñaaganakemiro jenoki ipanko, antawo okantaka riwetsikaitakero onkene rowaitya. Ari ponkotsitakaanteri janta.” <sup>13</sup> Jataiyakeni riyotaanewo, iñaakero okaatzi ikantakeriri, ari ronkotsitakaanteri royaari.

<sup>14</sup> Okanta imonkaataka rowantyaari, saikapaake Jesús itsipatakari riyotaanewo. <sup>15</sup> Irojatzzi ikantantakariri: “Irootaintsi noñeero inkemaatsitakagaitena, antawoite nokimoshiretzi owaiyanira iroñaaka kiteesheriki Anonkoryagaantsiki. <sup>16</sup> Tema eero nowitaawo jiroka, irojatzzi paata imonkaatantaiyaari impinkathariwentantai Pawa, aripaite napiitairo.” <sup>17</sup> Irojatzzi raakotantakawori riraitziri, riwetharyaawentanakawo, ipakotakeri riyotaanewo, ikantakeri: “Pirero jiroka, pantetyaawo pikaataiyinira. <sup>18</sup> Tema eero niritawo naaka, irojatzzi paata arika imonkaataiya impinkathariwentantai Pawa.” <sup>19</sup> Irojatzzi raantanakawori pan, riwetharyaawentakawo, itzipetowakero, ipayetakeri riyotaanewo, ikantziri: “Poyaawo, nowatha inatzi, irootake kamawentemine. Irootake pinkenkithashiryaapiintantenari.” <sup>20</sup> Ari ikaatanakero rowaiyanira, raakotakero riraitziri, ikantzi: “Niraa inatzi, irootake shitowaatsine rawisakantaiyaari osheki atziri. Irootake oñaagantairone owakerari aapatziyawakagaantsi. <sup>21</sup> Imaperotatya nonkante: Pikaataiyakenira pakiyootana, eenitatsi pithokashitenane raakaanena. <sup>22</sup> Tema imaperotya impeya Itomi Atziri, ari imonkaatakari ikowaitakeri pairani. Iro kantacha, jinkantamatsitaiteri aakaanterine!” <sup>23</sup> Irojatzzi riñaanatawakaanakari riyotaanewo, ikantzi: “¿Iitaka koshekachane?”

*Tsika itzimi iriiperotatsine*

<sup>24</sup> Ikanta riñaanatawakagaiyanakani riyotaanewo, ikantzi: “¿Itzimika iriiperotatsine paata?” <sup>25</sup> Irojatzzi ikantantanakari Jesús: “Piyotaiyini eeroka tsika ikanta pinkatharitatsiri jaka, rimperatanta. Tema iriiperori rinayetzi ipashitantayeta ikosheka rimperatantantyaari. <sup>26</sup> Eero pimatziro eerokapaini arika piriiperoyete iroñaaka, ontzimatye poshiyakotyaari iyaapitsi rowaiyaitziri. Arika peewatakaante, poshiyakotyaari onampirentsi <sup>27</sup> ¿Tsikama itzimi iriiperotatsiri? ¿Tema iriitake iriiperotatsiri oshiyariri oyaawentachari rantawaitaiteniri? Irooma naaka noshiyaari pantawaitakaaneme powena.

<sup>28</sup> Iro kantzimaitacha, eerokapaini pitsipatapiintakena, noñaayetzirowa pomeentsitzi-moyetanari. <sup>29</sup> Irootake nokashaakaanakemirori pimpinkathariwentante, ari ikantakenari Ashitanari naaka ikashaakaanawo. <sup>30</sup> Ari piñeero ankaate owaiyaani, irawaitaiyeni janta tsika nompinkatharitari. Ari poshiyakotaiyaari pinkathari risaikantawo owaneenkatachari risaikamento, pimpinkathariwentairi maawoini icharineyetari Israel, kaatatsiri 12 rinashiyeta.”

*Ikenkithatakotziro Jesús rookanawentante Pedro*

(Mt. 26.31-35; Mr. 14.27-31; Jn. 13.36-38)

<sup>31</sup> Ikanta Jesús ikantanakeri riyotaanewo: “Simón, ikowakemi Satanás iñaantashiretemi, roshiyakaimi ritsikaatatyemime. \* <sup>32</sup> Iro kantzimaitacha osheki namanakoyetakemi eero pipakaantawo pikemisananairi. Tema arika pipiyashiretapaake, eerokatake aawyaashiretakaapairine pisheninka.” <sup>33</sup> Ari rakanake ikantanake: “Tema ari ankaate Pinkatharí romonkyagaitai, aritake ankaate eejatzi rowamagaitai.” <sup>34</sup> Irojatzzi rapiitantanakawori Jesús ikantziri: “Pedro, nonkantemi, iroñaaka tsirenirikika, tekera riñiita tyaapa, mawa papiitero pinkantake: ‘Te noñiiri Jesús.’ ”

### *Thaato eejatzi osataamentotsi*

<sup>35</sup> Ikanta Jesús rosampitanakeri riyotaanewo, ikantziri: “Chapinki notyaantakemi te paanake pithaate, te paanake pizapato-te. ¿Eenitatsima kowimotakemiri?” Ikantaiyini irirori: “Tekaaitsi.” <sup>36</sup> Irojatzzi ikantantariri eejatzi: “Kameethatatsi iroñaaka payero pithaate. Kaari tzimatsiri rosataamento, impimantero iithaare, ramanantantyaari. <sup>37</sup> Tema imapero imonkaatya rosankenatakoitakenari pairani, kantatsiri: Ari intsipatagaitakeri kaariperoshireri. Eero awisashita jiroka, ontzimatyem imonkaatya.” <sup>38</sup> Ikaimaiyanakeni riyotaanewo: “Pinkatharí, tzimatsi jaka apite osataamentotsi.” Ikantanake Jesús: “Ataama.”

### *Ramana Jesús Getsemani-ki* (Mt. 26.36-46; Mr. 14.32-42)

<sup>39</sup> Ikanta ikenanai Jesús otzishiki Olivo ikenapiintzira, ari itsipatanari riyotaanewo. <sup>40</sup> Ikanta rareetaiyakani janta, ikantanakeri riyotaanewo: “Pamanaiyaani eeroka jaka inkempoyaawentantaitemiri otzimikari inkenakaashitakagaitemiri.” <sup>41</sup> Ari rowaaganeentanakeri irirori. Otziwerowapaaka kipatsiki, amanapaaka. † <sup>42</sup> Ikantzi ramana: “Ashitanarí, iroorika pikowakaanari, paawyaakainawo pookapithatenawo onkaate nonkemaatsityaari. Iro kantzimaitacha, eero pantanawo nokowawetari naaka, iro pante pikowakaakenari eeroka.” <sup>43</sup> Ari romapokapaaka maninkari poñagainchari inkiteki, iñaaperoshiretakaapaakari. <sup>44</sup> Tema antawoite okantzimoshiretanakeri, ramanaperotanaka. Iro ishitowantanakeri imasawinka oshiyawaitanakawo iro thaatanainchari riraa ipitenkapaaka kipatsiki. <sup>45</sup> Ikanta ramanaka, piyapaaka, iñaapaatziiri riyotaanewo rimagaiyini okantakaawo rowashiretaiyani. <sup>46</sup> Ikantapaakeri: “¿litaka pimaantari? Pinkaakitaiyeni, pamaña eeroka inkempoyaawentantaitemiri otzimikari inkenakaashitakagaitemiri.”

### *Ragaitakeri Jesús* (Mt. 26.47-56; Mr. 14.43-50; Jn. 18.2-11)

<sup>47</sup> Ikenkithawaiminthaitzi Jesús, iñaawakitziiri pokaiyaintsirini. Iri jewatapaintsi Judas kaawetachari ketziroini 12. Rontsitokapaakari Jesús ithowootapaakeri. <sup>48</sup> Ikanta Jesús ikantawakeri: “Judas, ¿Arima pipithokashityaari Itomi Atziri pithowootapaakeri?” <sup>49</sup> Ikanta iñaawakeri itsipatakari Jesús, ikantanakeri: “Pinkatharí, jame apiyatantyaari osataamento.” <sup>50</sup> Akotanake, rithatzingitakeri rakoperoki ikempita rimperatanewo reewaperore Imperatasorentsitaarewo. <sup>51</sup> Ikantanake Jesús: “Ataama, eero pikoshekari.” Ipampitzitairi ikempita, etsiyatakotanai rithatzingitawetakarira.

\* **22:31** Ikantakoitziri jaka “ritsikaatatyemime”, ari ikantaitzirori trigo-pane ritsikaataitziro. Tema ritsikaataitakeri, iyoshiitanakya oshiteki kaari pantyaawone. Irootake roshiyakaawentantantariri riyotaanewo roshiyakotakawo ritsikaataitziro trigo-pane. Tema ari riyotaiteri te rimatziro inkameethashirete. † **22:41** Kantakotachari jaka “rowaaganeentanaka”, tema rowaaganakitya eepichoki Jesús, te osamani riyaaate, oshiyawaitakawo iweyaaga osanthatzi arika romanaitero mapi.

<sup>52</sup> Ikanta Jesús ikantanakeri pokashitakeriri, reeware Imperatasorentsitaarewo, kempoyiirori tasorentsipanko, Itzinkamipaini, ikantziri: “¿Naakama koshintzi pamashitananari posataamento, eejatzi pipasamento?” <sup>53</sup> ¿Tema piñaawetapiintana tasorentsipankoki niyotaantzi? ¿Kaarima paantana janta? Aritake onkantya, tema aripaite rimatakaimiro tsireniriweri kaari pimatzi pairani.”

*Ikantzi Pedro: “Te noñiiri Jesús”*

*(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

<sup>54</sup> Ikanta rosoitanakeri Jesús, ragaitanakeri risaikira reewaperore Imperatasorentsitaarewo. Impoitatsi Pedro irirori royaatakowentziri Jesús jantyaatsikaini. <sup>55</sup> Irojatziri roonthotaitantaka paampari pankotsinampiki, rakitsitaiyani. Ari risaikitapaaka irirori Pedro rakitsita. <sup>56</sup> Okanta tsinane imperataarewo, oñaapaakeri Pedro risaiki rakitsita. Opampoyaapaakeri, ari okantzi: “¿Tema irijatzi jirika itsipatapiintakari Jesús?” <sup>57</sup> Iri kantzimaitacha Pedro, ikantanake irirori: “Te noñiiri.” <sup>58</sup> Okanta osamaniityaake, ikenapaake itsipa, ikantapaakeri Pedro: “¿Tema eejatzi eeroka ari pikaatziri Jesús?” Ikantanai Pedro: “Tera naaka.” <sup>59</sup> Iro osamani eejatzi, tzimatsi itsipa kantapaakeriri Pedro: “Imaperotatya, eerokatake tsipatariri Jesús chapinki, tema Galilea-satzi pinatzi.” <sup>60</sup> Irojatziri ikantantanaari Pedro: “Te niyotziri iita pikantanari.” Aripaite riñaanake tyaapa. <sup>61</sup> Ari ripithokapainta Jesús, raminapaintziri Pedro. Irojatziri ikenkithashiretantanakari Pedro ikantakeriri ketziroini: “Tekera riñeeta tyaapa, mawa pinkante: ‘Te noñiiri Jesús.’” <sup>62</sup> Shitowanake jakakeroki, antawoite riraawaitanaka.

*Ripasawaitaitziri Jesús*

*(Mt. 26.67-68; Mr. 14.65)*

<sup>63</sup> Ikanta jirikapaini ikaatzi kempoyiiriri Jesús, ishirontawentawaitakari, ripasawaitanakeri. <sup>64</sup> Rotzimikawootakeri, romposawootzimaitari, ikantziri: “¿Kamantantaneri pinatzi, janjaatya piyote iita pasawootakemiri?” <sup>65</sup> Tzimatsi osheki oita ikantawaitziriri kaariperori ñaantsi.

*Rapatowentaitari Jesús*

*(Mt. 26.59-66; Mr. 14.55-64; Jn. 18.19-24)*

<sup>66</sup> Okanta okitaitamanai, rapatotaiyakani reewaperore Imperatasorentsitaarewo itsipatakari Itzinkamipaini, eejatzi Yotzinkariite. Ari ramaitakeri Jesús, rosampiitakeri, ikantaitziri: <sup>67</sup> “Pinkantena, ¿Eerokatakema Cristo?” Ikantanake irirori: “Arika nonkantakemi, eero pikemisantana. <sup>68</sup> Arika nosampitemi, eero pakana, eero pipakaana eejatzi. <sup>69</sup> Iro kantzimaitacha retanakyaaowo iroñaaka, iñagairo Itomi Atziri risaikai rakoperoki Pawa roñaagantairo ishintsinka.” <sup>70</sup> Irojatziri rosampitantanakariri apatowentakariri, ikantziri: “¿Eerokama Itomi Pawa?” Ikantanake Jesús: “Eerokatake kantaintsi naakatake.” <sup>71</sup> Irojatziri ikantantanakariri jirikapaini: “Aakaite kemakeriri. ¿Iitaka ankoweri iroñaaka?”

## 23

*Ragaitanakeri Jesús Pilato-ki*

*(Mt. 27.1-2, 11-14; Mr. 15.1-5; Jn. 18.28-38)*

<sup>1</sup> Ikanta ikatziyaiyanaani ikaatzi apatotainchari, raanakeri Jesús Pilato-ki. <sup>2</sup> Ikantapaakeri Pilato: “Jirika atziri osheki rowaariperotakero nampitsi, ikaminaakeri atziripaini eero ipantaari koriki pinkathari César, ikantake eejatzi Cristo rinatzi iri pinkatharitatsiri.” <sup>3</sup> Ikanta Pilato, rosampitanakeri irirori, ikantziri: “¿Eeroka iwinkatharite Judá-ite?” Ari rakanakeri ikantzi: “Irootake pikantakeri.” <sup>4</sup> Ikantziri Pilato Imperatasorentsitaarewo, eejatzi maawoini atziripaini: “Tekaatzi noñe oita inkenakaashityaari jirika.” <sup>5</sup> Iri kantzimaitacha atziripaini eekero ishintsitanakitzi

ikantzi: “Osheki ikaminaantake jirika inkoshekantya atziripaini nampitsiki, retanakawo Galilea-ki irojatzji iroñaaka jaka Judea-ki.”

### *Rowawisaitakeri Jesús janta Herodes-ki*

<sup>6</sup> Ikanta ikemawake Pilato ikaminaantake Galilea-ki, rosampikowentanakeri Jesús iriirika Galilea-satzi. <sup>7</sup> Ikematzi ikantaitzi iriitake. Rowawisaakeniri pinkathari Herodes ripoki irirori rareeta Jerusalén-ki. <sup>8</sup> Ikanta Herodes iñaawakeri Jesús, antawoite ikimoshiretanake, tema osheki ikowawetapiintaka iñeeri, osheki ikemakowentakeri eejatzi okaatzi rantayetakeri, ikowaperotake iñeeri irirori ritasonkawentante. <sup>9</sup> Osheki rosampitawakeriri. Iri kanzimaitacha Jesús te rakiri. <sup>10</sup> Ari risaikitakari reeware Imperatasorentsitaarewo itsipatakari Yotantaneripaini, osheki ikantakowetakariri. <sup>11</sup> Ikanta Herodes itsipatakari rowayerite irirori, ikisashiryaanakeri, ikaweyawaitanakeri. Ikithaantakariri irooperori kithaarentsi, roipiyairi risaikira Pilato. <sup>12</sup> Aripaite raakameethatanakeri Herodes jirika Pilato, tema pairani osheki ikisaneentawakaawetaka.

### *Riyakowentaitziri Jesús*

*(Mt. 27.15-26; Mr. 15.6-15; Jn. 18.38-19.16)*

<sup>13</sup> Ikanta Pilato rapatotakeri reeware Imperatasorentsitaarewo itsipataakeri ikaatzi jewatakaantatsiri nampitsiki, eejatzi maawoini atziripaini. <sup>14</sup> Ikantakeri: “Tema pamawetakenari jirika atziri owaariperoterone nampitsi, nosampisampiwetakari, te noñiuro onkaariperote okaatzi rantakeri ikantakoitziriri. <sup>15</sup> Ari ikantakari eejatzi Herodes, tema notyaantawetakanari irirori. Tekaatsi rante jirika atziri ompoñaantyaari owamaakaanteri. <sup>16</sup> Apatziro nipasataakaanteri naaka, nipakagairi.” <sup>17</sup> Iroowa rametapiintari Pilato romishitowakaantziri omonkyaakaantaarewo kiteesheriki roimoshirenkaitaga.

<sup>18</sup> Iro kanzimaitacha ikantaiyanakeni atziripaini: “¡Te nokowiri jirika! ¡Iri pomishitowakaante Barrabás!” <sup>19</sup> Jirika Barrabás iri romonkyaakaantaitziri okantakaantziro ritsitokantzi ikoshekakari pinkatharitatsiri nampitsiki. <sup>20</sup> Ari rapiiwetanakawo Pilato tema ikowawetatya irirori ripakaakaantairime Jesús. <sup>21</sup> Iro kantacha rapiitanakero atziripaini ikaimaiyini: “¡Pinkentakotakaanteri, pinkentakotakaanteri!” <sup>22</sup> Iro mawawetainchari rapiiwetakawo Pilato rosampitantzi: “¿Oitaka kaariperori rantakeri jirika? Tekaatsi oita rante, eero okanta owamaakaantashityaari. Apatziro nipasatakaantashityaari, riyataaita.” <sup>23</sup> Eekero ishintsitatzi atziripaini ikaimaiyini, ikowi inkentakoiteri Jesús. Rimatzitanakawo ikaimaiyini reeware Imperatasorentsitaarewo, ari imatakari. <sup>24</sup> Irojatzji rantantakawori Pilato okaatzi ikowakeri. <sup>25</sup> Romishitowakaantakeri tsitokantzinkari koshekariri pinkatharitatsiri nampitsiki, iriitake ikowaiyakerini atziripaini. Rishinetakeniri inkantawaiteri Jesús ikowakaari iriroripaini.

### *Ikentakoitakeri Jesús*

*(Mt. 27.32-56; Mr. 15.21-41; Jn. 19.17-30)*

<sup>26</sup> Ikanta ragaitanakeri Jesús, ritonkyotaitakari jitachari Simón poñaachari Cireneki, ari rareetaka irirori ipoñagaawo rowaneki, ishintsineentanakeri inatanakero inkentakoitantaariri Jesús. <sup>27</sup> Osheki atziri oyaatakowentanakeriri Jesús. Eenitatsi tsinane irakotanakariri. <sup>28</sup> Raminapaintziro Jesús okaatzira tsinane irakotakariri, ikantziro: “Jerusalén-sato, eero piraakowaitashitana naaka, piraakotaiya eero, eejatzi powaiyanepaini. <sup>29</sup> Tema irootaintsi piñeero inkantayeetai: ‘Kimoshire onkantya tsinane kaari owaiyachane, othotaantashitakari.’ <sup>30</sup> Arira inkaimayeetai, inkantaite: ‘Pitaankashitena impeeta, pinkitatenaata.’ <sup>31</sup> Tema piñaakero tsika ikantaitakero in-chato añiinkawo, iro rimaperoite kaminkawo.”

<sup>32</sup> Ari ragaitanake eejatzi apite kaariperoshireri itsipatagaitanakeri Jesús rowama-gaiteri. <sup>33</sup> Ikanta rareetakagaitapaakari iitaitziro atziriiitoni, ari ikentakoitakeri. Iken-takoitake apaani kaariperoshireri rampateki, iriima itsipa rakoperoki. <sup>34</sup> Ikantanake Jesús: “Ashitanarí, te riyotzi oita rantziri kemaatsiwaitakaakenari, pimpeyakoteri.” Irojatzí ragaitantakawori iithaare Jesús rookaitawakaakawo, roshiyakaakero inewiy-ataita. <sup>35</sup> Irojatzí raminaiyakeni atziripaini. Rimatzitakawo jewatakaantatsiri nampit-siki, rithainkimatakeri Jesús, ikantziri: “Rowawisaakotziri itsipa, ¿kaari rimatantawo rowawisaakotyá irirori? Iriime Cristo riyoyaanewo Pawa, ari rimatakerome.” <sup>36</sup> Rimatzitanakawo eejatzi owayeripaini, rithainkakeri Jesús, irojatzí ramakotan-kanakari kepishaari. <sup>37</sup> Ikantapaakeri: “Janjaatya powawisaakotyá, kyaaryooper-orika eeroka iwinkatharite Judá-ite.” <sup>38</sup> Tzimatsi osankenarentsi ikentakoitakeri jeñokiini ipatziitoki, riñaaneki Judá-ite, riñaaneki Roma-satzi, riñaaneki eejatzi Grecia-satzi, okantzi: “IWINKATHARITE JUDÁ-ITE.”

<sup>39</sup> Ari rimatzitakawo eejatzi riñaanaminthatziri apaani kaariperoshireri itsipatakarira ikentakota, ikantziri: “Eerokatakerika Cristo, powawisaakotyá, powawisaakotzitena naaka eejatzi.” <sup>40</sup> Irojatzí rakantanakari itsipa kaariperoshireri, ikisathanakeri ñaanatakeri Jesús, ikantziri: “Pimatziawoma eeroka te pipinkathatziri Pawa, ari akaatakeri rowasankeyeetai. <sup>41</sup> Tema eenitatsi antakeri aaka añaanatakawori rowasanketai. Iriima jirika rowasanketashitaitari, te rantziro kaariperori.” <sup>42</sup> Ripithokashitanakari Jesús, ikantziri: “Pinkatharí, eero pipeyakotana naaka paata arika pipiyai pimpinkathariwentantai.” <sup>43</sup> Rakanake Jesús, ikantzi: “Imaperotyá nonkantemiri, aritake pintsipatapaina iroñaaaka janta tsika ikimoshireetai.”

<sup>44</sup> Ikanta itampatzikatapaake ooryaatsiri, omapokashitapaaka otsirenikitanake, iro-jatzí ishaawiiteeni ithaperotanakaga ooryaa. \* <sup>45</sup> Ari ritsiwakanakeri ooryaatsiri. Okanta janta tasorensipankoki, saperyaanake niyanki tontamawotatsiri ithatashi-itziro. <sup>46</sup> Irojatzí ikaimantanakari Jesús shintsiini, ikantzi: “Ashitanarí, paawainawo noshire.” Ikantanakera, kamanake. <sup>47</sup> Ikanta reeware owayeri katziyawentakari iñakero okaatzi awisaintsiri, antawoite ithaamentawentanakari Pawa, ikantanake: “Imaperotyáama ikameethashiretzi jirika atziri.” <sup>48</sup> Eejatzi ikaatzi ñaayetakerori awi-saintsiri, okatsitzimoneentanakeri riyaayetai. † <sup>49</sup> Iriima ikaatzi ñaapiintakeri, eejatzi tsinanepaini, tsipatakariri ipoñaanakari Galilea-ki, intaina ikatziyaiyakani raminako-takeri oita awisaintsiri.

### *Ikitaitakeri Jesús*

*(Mt. 27.57-61; Mr. 15.42-47; Jn. 19.38-42)*

<sup>50</sup> Ikanta José poñaaçhari nampitsiki Arimatea saikatsiri Judea-ki, kameethashireri rinatzi jirika, iriitake itsipatapiintari rapatota reewarepaini Judá-ite, <sup>51</sup> temaita in-imoteri okaatzi ikantawaitaitakeri Jesús, tema osheki royaakotziri irirori Pawa impinkathariwentantai. <sup>52</sup> Riyaatashitakeri Pilato, ikantapaakeri: “Pishinetenari Jesús, nonkitatairi.” <sup>53</sup> Irojatzí ikentakoryaakotantaariri, iponatantanaari manthak-intsi, ikitatakeri ikiyaitzirowa shirantaamoo, kaari ikitatantaita kaminkari. <sup>54</sup> Tema irootake kiteesheri raminantapiintaitari royaari inkaamani kiteesheriki rimakoryaan-taitari. <sup>55</sup> Okanta tsinanepaini tsipatakariri ipoñaanakari Jesús Galilea-ki, oyaatakowen-tanakeri, oñakowentakeri tsika ikanta romaryagaitapaintziri ikitaitakerira. <sup>56</sup> Okanta ipiyaiyapaakani iwetsikayetakeniri kasankaari. Imakoryagaiyakeni, tema iro kiteesh-eri Inintakaanaitziri rimakoryaantaityaawo.

\* **23:44** Irootake ikantaitziri pairani: riweyaanaka ooryaa 6, ari omapokapaaka otsirenikitanake irojatzí ri-weyaanaka ooryaa 9. † **23:48** Kantakotachari jaka “okatsitzimoneentanakeri”, romposashipaneetanakitya jirika atziri. Tema irootake rameyetari Judá-ite arika onkatsitzimoshireteri tsikarika oitya. Inashita okaatzi ametari aakapaini arika omposashipaneetya, tema asagaawentawaitatya.



## 24

### *Raŋaantaari Jesús*

*(Mt. 28.1-10; Mr. 16.1-8; Jn. 20.1-10)*

<sup>1</sup> Okanta okiteeshetamanai tominko, ananinkamanake tsinane iyaate shirantaamooki romonkyaakoitakerira Jesús, aanakero kasankaari iwetsikakeri ketziroini. Ari otsipatanaawo eejatzi otsipapaini tsinane. <sup>2</sup> Okanta aminawetapaaka, oñaatzi itainkanake mapi rashitantaweetakawori omoo. <sup>3</sup> Kyaapaake inthomoiki, te oñaapairi tsika rowakoweetakari. <sup>4</sup> Osheki othaawanake. Oñaashitakari ikatziyimotapaakawo apite mainari, shipakiryaa okantaka iithaare. <sup>5</sup> Tema othaawantanakityaari, otziwerowashitanakari. Ari ikantanakero: “¿Iitaka paminaminatantariri añaagatsiri jaka kaminkarimooki? <sup>6</sup> Te risaiki, añaagai. Pinkenkithashiretero okaatzi ikantakeri risaikantawetari Galilea-ki. <sup>7</sup> Ikantake ketziroini: ‘Irootaintsi raakaantaiteri Itomi Atziri, inkentakoteri kaariperoshireri atziri. Awisawetakya mawa kiteesheri, aritake rañaagai eejatzi.’ ” <sup>8</sup> Ari okenkithashiryaaanakawo iroori okaatzi ikantakeri ketziroini Jesús. <sup>9</sup> Ipiyapithatanakawo omoonaki, okamantapairi 11 riyotaanewo Jesús eejatzi itsipapaini. <sup>10</sup> Jiroka okaatzi tsinane: María Magdala-sato, Juana, María inaanate Jacobo eejatzi otsipapaini tsinane, irootake kamantapaakeriri Otyaantaperoriite. <sup>11</sup> Iro kanzimaitacha ikaatzi okamantawetapaakari, te ikemisantziro, roshiyakaaminthaitziro okantawaitashita jirokapaini tsinane. <sup>12</sup> Ikanta Pedro, jatanake irirori omoonakiki, rishiyaarikoperotanakitya. Raminawetapaaka inthomoiki omoonaki, iñaapaatziro omaryaaka manthakintsi iponatantaitakariri ketziroini. Iyokitziitapaake iñaapaakerowa, piyaawo pankotsiki.

### *Awotsi jatachari Emaús-ki*

*(Mr. 16.12-13)*

<sup>13</sup> Tekera rimakoteeta, ranashitaiyani apite riyotaanewo Jesús riyaaero nampitsiki jitachari Emaús. Te osamaniperotzi isaikinta Jerusalén okaatzi 11 kilómetro. \* <sup>14</sup> Iro ikenkithatakaawakaiyarini ranashitaga okaatzi awisaintsiri. <sup>15</sup> Ikenkithawaiminthaitzi ranashitaiyanira, ripokapaake Jesús itsipatapaakari ranashitaga. <sup>16</sup> Iro kanzimaitacha jirika riyotaanewo, oshiyawaitakawo rotzimikaitatyeerime rokiki, eero riyotantawaari. <sup>17</sup> Ikantapaakeri: “¿Oitaka pikenkithatakotziri panashitaiyanira? ¿Oitaka powashireneentantari?” <sup>18</sup> Ari rakanake apaani iitaitziri Cleofas, ikantanake: “¿Eerokama yotapainchari te piyotakotziro okaatzi awisaintsiri Jerusalén-ki?” <sup>19</sup> Ikantzi: “¿Oitaka awisaintsiri?” Ari ikantaiyini riyotaanewo: “Iriitake Jesús iitaitziri Nazaret-satzi, rotyaantakeri Pawa, Inkamantantannerite, iri riyotawake atziripaini. Tema okaatzi rantayetakeri, okaatzi ikantayetakeri eejatzi, ari roñaagantziro ishintsinka. <sup>20</sup> Iro kanzimaitacha raakaantakeri reeware Imperatasorentsitaarewo itsipatakari pinkatharipaini, ritsitokaantakeri janta ikentakoitakeri. <sup>21</sup> Tema noshiyakaaminthaitziro naakapaini iri jokaawiritaantairine maawoini asheninka. Irootake mawatatsiri iroñaaka kiteesheri rowamagaitantakariri. <sup>22</sup> Eeniyetatsi tsinane nokaatapiintzira omapokashitakenari, ananinkamanake iyaatamanai omoonakiki. <sup>23</sup> Te oñaapairi rowaweetakarira Jesús, ipiyaawo okamantantapai: ‘Noñaake maninkari, ikantakena: “Añaagai Jesús.” ’ <sup>24</sup> Ari riyaaanake nokaataiyinira janta omoonakiki, iñaapaakero okaatzira okantaiyakerini tsinane, te iñiimaitapaari Jesús.” <sup>25</sup> Ari rakanakeri irirori, ikantanakeri: “¡Te piyotanetzi eerokapaini, osheki pithainkashiretakero okaatzi ikamantantayetakeri Kamantantanneriite! <sup>26</sup> Tema iro kowaperotacha awishimoteri Cristo jirokapaini, irojatzisi risaikantaiya rowaneenkawoki.” <sup>27</sup> Ari retanakawo roñaawontziniri okaatzi

\* **24:13** Iro ikantakoitziri jaka “11 kilómetro”, ikantaitziro pairani 60 estadio.

osankenayetainchari tsika ikenkithatakoitziri Cristo. Retanakawo rosankenareki Moisés rithonkakeniri okaatzi rosankenayetakeri maawoini Kamantantaneriite.

<sup>28</sup> Areetaiyakani nampitsiki tsika roshiretawo. Ari ikowi Jesús rawisanakeme irirori oshiyawaitakawo riyaatatyeeme intaina. <sup>29</sup> Ikantaiyini jirika apite: “Eero pawishi, ari pimaanake. Tema tsireniityaake.” Irojatziri risaikantapaakari Jesús pankotsiki. <sup>30</sup> Ari risaikaiyakani rowaiyaani, raakero Jesús pan, riwetharyaawentakawo, itzipetowakero, ipayetakeri. <sup>31</sup> Aripaite riyotakaayeetanairi iriitakera Jesús. Iri kantzimaitacha Jesús ipeyashiwaitanaawo, te iñaawairi jimpe ikenanai. <sup>32</sup> Ikantawakagaiyani: “¿Tema thaamentashire pikanta ikenkithawaitakaira ketziroini awotsiki, ikenkithatakotairo osankenarentsipaini?” <sup>33</sup> Te rimaapaintzi, piyanaka Jerusalén-ki. Iñaapaatziiri 11 riyotaanewo rapatotaiyani, itsipayetakari ikaatapiintzira. <sup>34</sup> Ikantaiyini: “Imaperotatya rañagai Awinkatharite. Tema roñaagaari Simón.” <sup>35</sup> Irojatziri ithawetakotantapaawori okaatzi awishimotakeriri awotsiki, tsika okanta riyotantawaariri riwetharyaawenta-paawowa pan.

### *Jesús roñaagari riyotaanewo*

*(Mt. 28.16-20; Mr. 16.14-18; Jn. 20.19-23)*

<sup>36</sup> Ikenkithawaiminthaitzi riyotaanewo, osatekapaaka Jesús, riwethatapaakari ikantziri: “Pisaikai kameetha.” <sup>37</sup> Antawoite ithaawaiyanakeni, roshiyakaaminthaitziri shiretsi ñaanatziriri. <sup>38</sup> Irojatziri ikantantanakariri eejatzi: “¿Litaka pithaawantari? ¿Litaka pikisoshirewentantanari?” <sup>39</sup> Paminero nako, eejatzi noitzi, naakatake. Piterotena, potzikanatena. Naakame shiretsi eero otzimime nowatha, eejatzi notonki. Irooma naaka tzimatsi.” <sup>40</sup> Ikantakerira, roñaaganakeri rako eejatzi iitzi. <sup>41</sup> Okantakaanakari ithaamentanaka te ikenkithashiretanaka iriira Jesús. Eekero rosampitanakitziiri, ikantziri: “¿Eenitatsima oyaari?” <sup>42</sup> Ari ipaitakeri tzimagaantatsiri shima itsipatagaitakeniri iyaa pitsi. <sup>43</sup> Raawakeri Jesús, iñaakeri ikaatzira riyotaanewo rowakari.

<sup>44</sup> Ari ikantanake: “Iroowa nokantzitakemiri ketziroini eeniro notsipatzimi. Ontzimatye imonkaayetya rosankenatakoyetakenari Moisés-ni, Kamantantaneriite, eejatzi Salmo.” <sup>45</sup> Ikemathatakaanairi Jesús okaatzi osankenatakoyetainchari. <sup>46</sup> Ikantziri: “Irootake rosankenayeetakeri. Ontzimatye inkemaatsitakagaityaari Cristo, iro awisawetakya mawa kiteesheri aritake rañagai. <sup>47</sup> Ontzimatye rowaagakoitero nowairo maawoiniki kipatsi, retaitanakyaawo Jerusalén-ki. Iro ompoñaantyaari ripakaantaiyaa-wori kaariperori rantayeetziri, impeyakoyeetairi eejatzi. <sup>48</sup> Eerokatake ñaayerone jiroka. <sup>49</sup> Ari piñaakeri notyaantemiri ikashaakaakemiri Ashitanari. Ari pisaikaiyawakeni jaka Jerusalén-ki, irojatziri ishintsitakaantanakemiri poñaachane inkiteki.”

### *Reethonkitantaari Jesús inkiteki*

*(Mr. 16.19-20)*

<sup>50</sup> Ikanta Jesús raanakeri riyotaanepaini janta Betania-ki. Ari itzinaawakotanaka, ritasonkawentanairi. <sup>51</sup> Ikanta ritasonkawentakari, romapokashita reethonkitanai inkiteki. <sup>52</sup> Ikanta ipinkathataiyanakerini riyotaanewo. Piyaiyaani Jerusalén-ki, antawoite ikimoshiretaiyanakeni. <sup>53</sup> Ari ikantapiintanaatya ithamentawentanaari Pawa janta tasorentsipankoki. Ari onkantaitaatyeeyaani.

## KAMEETHARI ÑAANTSI ROSANKENATAKERI JUAN

### *Atziritake iitaitziri “Ñaantsi”*

<sup>1</sup> Owakera etantanakari riwetsikantaitzi pairani, ari itzimake iitaitziri “Ñaantsi”. Ari itsipatari Pawa. Tema Pawa rini irirori. <sup>2</sup> Iri itsipatakari pairani Pawa owakera etantanakari riwetsikantaitzi. <sup>3</sup> Iri wetsikajaantakerori maawoini tzimayetatsiri. Tekaatsi apaani okaatzi tzimayetatsiri jaka kaari riwetsike irirori. <sup>4</sup> Roshiyawaitakari kiteesheenkari ikiteenkaatakotairi atziripaini ompoñaantyaari inkañaaneyetai. <sup>5</sup> Roshiyawaitakari kiteesheenkatakotantatsiri otsirenikitziira. Temaita roitsinampairi roitsiwakawakerira oshiyakotakawori tsirenikiri.

<sup>6</sup> Pairani rotyaantake Pawa apaani atziri, iita Juan. <sup>7</sup> Iriitake kenkithatakotapaakeriri iitaitziri “Kiteesheenkari”, ompoñaantyaari inkemisantaitero maawoini riyotaanteri. <sup>8</sup> Jirika Juan kaari iitaitziri “Kiteesheenkari.” Iriira pokaintsiri inkenkithatakoteri.

<sup>9</sup> Tema pokake jaka kipatsiki maperotzirori roshiyakotari kiteesheenkari, iri kiteesheenkatakotairiri atziripaini. <sup>10</sup> Risaikapaintzi jaka isaawiki. Tema iri wetsikakeriri isaawikisatzipaini. Iro kanzimaitacha te riyotawakeri isaawikisatziite. <sup>11</sup> Risaikimowetapaintari isheninkapaini. Temaita raakameethatawakeri. <sup>12</sup> Iriima ikaatzi aakameethatawakeriri, aakotaapiintanairiri iwairo ikemisantairi, iriira itomintaari Pawa. <sup>13</sup> Itomi rowayetairi Pawa. Temaita oshiyawo itomintantapiinta atziripaini, iñaamankakiini ikowi rowaiyantawaite. Iriima Pawa apaniroini ikowake intomitantya tekaatsi otsiwakakaiyaarine.

<sup>14</sup> Jirika iitaitziri “Ñaantsi”, atziritake, risaikimotapaintai. Neshironkakitantaneri rini. Irooperori okanta riñaaneyetari. (Naakapaini ñaakerori itasorenka rapintzite itomi, ari oshiyakawo itasorenka Ipaapate.) <sup>15</sup> Iriitake richeraawentapaake pairani Juan, ikantapaake: “Jirika nokenkithatakotakeri pairani, nokantake: ‘Awotsikitake poyaatenane, ranaana naaka, tema iri etakawo pairani itzimi.’ ” <sup>16</sup> Tema iriiperowaitake irirori, iro añaantaawori maawoini ineshironkatapiintai. <sup>17</sup> Pairani, iri Moisésni rosankenatakaitakeri Inintakaantaitanewo. Iriima Jesucristo iri neshironkayetairi, irijatzi kenkithatapiintzirori Irooperori. <sup>18</sup> Tekaatsi materone iñeeri Pawa. Iriima rapintzite itomi Ashitairi, saikimotziriri, iriitake kamantairi aakapaini ayotantaari tsika ikanta irirori.

### *Ikamantakeri Juan omitsitsiyaatantaneri*

*(Mt. 3.11-12; Mr. 1.7-8; Lc. 3.15-17)*

<sup>19</sup> Ikanta Judá-ite nampitawori Jerusalén-ki, rotyaantake Imperatasorentsitaarewo itsipataakeri Leví-ite, riyate rosampiteri Juan, inkanteri: “¿Piitaka eeroka?” <sup>20</sup> Te rimanakota Juan, ikamantakeri, ikantziri: “Te naaka Cristo.” <sup>21</sup> Irojatziri rapiitantaitakariri rosampiitziiri: “¿Tsikama piitayaaaka? ¿Eerokama Elías-ni?” Ikantziri Juan: “Te naaka.” Eekero ishintsitaitatzi rosampiitziiri: “¿Eerokama Kamantantaneri noyaakoneentziri?” Ikantziri: “Te.” <sup>22</sup> Ari ikantaitziri: “¿Piitaka eeroka? Pinkamantena, onkene nonkamantapairi otyaantanari. Pinthawetakotya.” <sup>23</sup> Rapiitanakero Juan, ikantziri: “Naakatake cheraacheraatapaintsine ochempiki, nonkantante: ‘Powameethatainiri Awinkatharite tsika inkenapaake, poshiyakayero rotampatzikaitziro awotsi.’ Irootajaantake inkenkithatakotakeri pairani Kamantantaneri Isaías-ni.”

<sup>24</sup> Ikanta rotyaantane Fariseo-paini, <sup>25</sup> eekero rosampitanakitziiri, ikantziri: “Tera eeroka Cristo pine, te eeroka Elías, te eeroka Kamantantaneri eejatzi. ¿Oitaka pomitsitsiyaatantantari?” <sup>26</sup> Ari ikantziri Juan: “Apatziro nomitsitsiyaatantashimatsitawo naaka

ña. Iro kantzimaitacha eenitatsi apaani jaka pitsipatakari, kaari piyotaiyeni,<sup>27</sup> iriitake poyaatapaakenane. Te onkantaatsikaitya naaka roshiyakaina rimperatanewo ompoñaantyaari no-zapato-ryaayitziteri.”<sup>28</sup> Maawoini jiroka, iro awisaintsiri pairani janta iitaitziri Betábara, íntatsikero ñaa Jordán tsika romitsitsiyaatantzi pairani Juan.

### *Rowejate Pawa*

<sup>29</sup> Okanta okiteeshetamanai iñaawairi Juan ikenapai Jesús, ikantzi: “Jirika rowejate Pawa, iriira peyakotairine iyaariperonka atziripaini. <sup>30</sup> Iri nokenkithatakotzitakari nokantake: ‘Awotsikitake atziri poyaatenane, ranaana naaka, tema iri etakawo pairani tekera notzimiita naaka.’ <sup>31</sup> Te niyowetari naaka. Iro nipokantakari nomitsitsiyaatante, ompoñaantyaari riyote Israel-iite.” <sup>32</sup> Jiroka ikantanake eejatzi Juan: “Noñaakeri Tasorenkantsi ikenapaake jenoki roshiyapaakari shiro. Rookantapaakari. <sup>33</sup> Te niyowetari naaka. Iri kantacha jirika otyaantakenari nomitsitsiyaatante, ikantakena: ‘Arika piñaake rishaawiinkashiteri Tasorenkantsi rookantapaakyaari iitoki, iriitake oshiyakaanterone romitsitsiyaatantatyeerime Tasorenkantsi.’ <sup>34</sup> Naakatake ñaakeriri, iro nokenkithatakotantariri tema Itomi Pawa rini.”

### *Etanakawori riyotaanewo Jesús*

<sup>35</sup> Okanta okiteeshetamanai ari risaiki Juan itsipatakari apite riyotaanewo. <sup>36</sup> Ikanta iñaawairi Jesús ikenapai, ikantanake Juan: “Jirinta rowejate Pawa.” <sup>37</sup> Ikemawake apite riyotaanewo Juan, royaatanakeri Jesús iñeeri. <sup>38</sup> Ripithokanaka Jesús, iñaatziiri roy-aatakeri, ari rosampitziri: “¿Tsika piyaateka?” Ikantaiyini irirori: “Rabí (Iro ikantaitziri ‘Yotaantanerí’), ¿tsika pinampitawoka?” <sup>39</sup> Ikantzi Jesús: “Pipoke piñeero.” Ikanta roy-aatanakeri, iñaakero tsika inampitawo. Ari rimayimotapaintziri, tema tsireniityaake. \* <sup>40</sup> Jirika kemakeriri Juan, oyaatanakeriri Jesús, iriitake Andrés irirentzi Simón Pedro. <sup>41</sup> Ikanta Andrés, apatziro riyaatashitanakeri irirentzi, jirika Simón, ikantapaakeri: “Noñaakeri Mesías (iri ikantaitziri eejatzi, ‘Cristo.’)” <sup>42</sup> Ikanta Andrés raanakeri Simón risaikira Jesús. Ikanta Jesús iñaawakeri irirentzi Andrés, ikantawakeri: “Eeroka Simón, itomi Jonás. Iroñaaka piitaiya ‘Cefas.’ (Iri ikantaitziri eejatzi, Pedro.) †

### *Ikaimaitakeri Felipe eejatzi Natanael*

<sup>43</sup> Okanta okiteeshetamanai, jatake Jesús Galilea-ki. Ari iñaakeri Felipe, ikantapaakeri: “Poyaatena.” <sup>44</sup> Jirika Felipe, Betsaida-satzi rini, irojatziri inampi Andrés eejatzi Pedro. <sup>45</sup> Ikanta Felipe, riyaatashitakeri Natanael, ikantapaakeri: “Noñaakeri rosankenatakotakeri Moisés-ni janta Inintakaanaitaneki, rosankenatakotakeri eejatzi Kamantantaneriite. Iriitake itomi José, Nazaret-satzi.” <sup>46</sup> Ikantzi Natanael: “¿Eenitatsima kameethashireri poñaachari Nazaret-ki?” Ikantzi Felipe: “Pipoke, piñeeri.” <sup>47</sup> Ikanta Jesús iñaawakeri ripokake Natanael, ikantanake: “Kaakitake iriiperori isheninka Israel-ni, te ithaiyaneta.” <sup>48</sup> Rakanake Natanael ikantzi: “¿Tsikama piñaanaka piyotantanari?” Rakanake Jesús: “Noñaakemi tekera ikaimimiita Felipe pisaiki pankirentsitapishiki.” ‡ <sup>49</sup> Ikantanake Natanael: “Rabí, ¡Eerokatake Itomi Pawa, eeroka Iwinkatharite Israel-iite!” <sup>50</sup> Ikantzi Jesús: “Iroowa pikemisantantamatsitanakari nokantakemiro ‘noñaakemi pisaiki pankirentsitapishiki.’ Iro kantacha, ari piñaakero otsipa anayerone jiroka.” <sup>51</sup> Eekero ikantanakitzi Jesús: “Ari piñaakero ashitaryagaiya inkite. Ari ripiyapiyataiyeni maninkariite rayiitashiteri Itomi Atziri.” §

\* **1:39** Kantakotachari jaka “tsireniityaake”, irootake oshiyawori ikantaitziri pairani “riweyaaka ooryaatsiri 10”.

† **1:42** Riñaane inatzi Aram-thato ikantaitziri “Cefas”, irootake oshiyawori akantziri aakapaini “Mapi”.

‡ **1:48** Jitachari jaka “pankirentsitapishi”, irootake iitaitziri “higuera”. § **1:51** Oshiyakaawentachari jaka “ashitaryagaiya inkite”, ari iñagaitairi inkiteweri, kaari iñagaitapiintzi.

## 2

*Aawakagaantsi Caná-ki*

<sup>1</sup> Okanta mawatapaintsiri kiteesheri ari raawakaitakari nampitsiki jitachari Caná, saikatsiri Galilea-ki. Ari isaikakeri eejatzi inaanate Jesús janta. <sup>2</sup> Ari ikaimakaan-taitakeri eejatzi Jesús itsipatanakari riyotaanewopaini. <sup>3</sup> Ikanta roimoshirenkaiyani, thaatapaaka riraiyirini. Okanta inaanate Jesús, okantakeri: “Thaatapaakaga riraitziri.” \* <sup>4</sup> Ikantzi irirori: “Tsinané, ¿Oitaka pikantantanari naaka? Tekera imonkaapaitetaata noñaagantya.” <sup>5</sup> Okantanakeri iroori kitantatsiri: “Pantero onkaate inkantemiri notomi.” <sup>6</sup> Ari otaamaaka 6 chomo mapinatatsiri, iro rowantapiintari Judá-ite ñaa ikiwantari inkitewathatantyaari. Jiroka chomo, tzimatsi okaatzi yeekitatsiri 50 litro ñaa, otsipa 60 litro. † <sup>7</sup> Ikantanakeri Jesús ikaatzi kitantatsiri: “Piyeeekite ñaa maawoini chomoki.” Riyeekiperotakero chomoki. <sup>8</sup> Ikantzi Jesús: “Pinki-tanake eepichokiini, paakotanakeniri aminakaantzirori oimoshirenkaantsi.” Ari ikantaiyakeroni. <sup>9</sup> Ikanta jirika aminakaantzirori oimoshirenkaantsi ikemaantawakero eepichokiini riraitziri ñaawetachari naaweta, te riyotzi tsika okenakotapaake irooperori riraitziri. Apatziro riyotaiyini kitantatsiri, tema iri yeekitakerori ñaa. Ikanta jirika aminakaantzirori oimoshirenkaantsi, ikaimakeri aawakaachari, <sup>10</sup> ikantziri: “Iro rametari atziripaini retapiintawo ikitakaantziro irooperori riraitziri, arika inke-makitaiyakyaani oimoshirenkachari, ari roitaatantaitero saakyaari. Irooma eeroka powapithatantakero irooperori riraitziri.” <sup>11</sup> Iro rantakeri Jesús nampitsiki Caná saikatsiri Galilea-ki, ari retanakawo ritasonkawentantzi roñaagantziro ishintsinka. Ari ikemisantaperotanake riyotaanepaini.

<sup>12</sup> Okanta okaatapaake roimoshirenkaiyani, jatanake Capernaum-ki itsipatanakawo inaanate, irirentzipaini, eejatzi riyotaanewopaini. Te osamani risaikapainte janta.

*Romishitowiri Jesús pimantayetatsiri tasorentsipankoki*  
(Mt. 21.12-13; Mr. 11.15-18; Lc. 19.45-46)

<sup>13</sup> Okaakitizimatai roimoshirenkapiintantawori Judá-ite Anonkoryagaantsi. Jatake Jesús Jerusalén-ki. <sup>14</sup> Iñaapaakeri tasorentsipankoki pimantayetziriri ipira eejatzi ishironepaini. Ari risaikakeri eejatzi amanantziriri koriki. ‡§ <sup>15</sup> Ikanta iñaapaakeri, raminthatake Jesús ripasamento, rookapaakeri maawoini yompariwaitachari tasorentsipankoki, ari itsipataakeri ipirapaini. Rosokitakeri iyorikite ikaatzi amanantziriri koriki, rotatsinkitakeri risaikamentopaini. <sup>16</sup> Ikantakeri Jesús yomparitariri ishironi: “¡Paanairi pipira! ¡Te okameethatzi poshiyakairo ipanko Ashitanari yomparimentotsipanko!” <sup>17</sup> Ari ikenkithashiretanakero riyotaanewo okaatzi rosankenaitakeri, kantatsiri: Antawoite nonkisakotyaawo pipanko.

<sup>18</sup> Ikanta Judá-ite ikantanakeri Jesús: “Janjaatya pitasonkawentante noñaantemiri eenitatsirika pishintsinka pantantakaworitya jiroka.” <sup>19</sup> Ikantanake Jesús: “Pintzim-pookero jiroka tasorentsipanko, awisawetakya mawa kiteesheri, ari nontzinagairo eejatzi.” <sup>20</sup> Ikantaiyini Judá-ite: “Okaatzi 46 osarentsi riwetsikantaitakawori jiroka tasorentsipanko, ¿arima pintzinagairo eeroka onkaate mawa kiteesheri?” <sup>21</sup> Jiroka “tasorentsipanko” ikenkithatakotakeri Jesús, iro ikantakotzi iwatha irirori. <sup>22</sup> Ikanta itzinagaa pairani Jesús, ikenkithashiretanairo riyotaane okaatzi ikenkithatakotzitakeri. Iro ikemisantaperotantanakawori Osankenarentsipero, eejatzi okaatzi ikantayetakeri Jesús.

\* **2:3** Kantakotachari jaka “riraitziri”, irootake “vino”. † **2:6** Kantakotachari jaka “50 litro otsipa 60 litro ñaa”, irojatzi oshiyawori ikantaitziri pairani 2 cántaro otsipa 3 cántaro. ‡ **2:14** Kantakotachari jaka “ipira”, iriitake buey eejatzi oweja. § **2:14** Ikaatzi pokayetatsiri Jerusalén-ki, ramayetzi iyorikite ipoñaakaari inampikipaini irirori. Iro opoñaantari ramanantziri iyorikite Jerusalén-ki, ramanantantyaari piratsipaini ritayeniriri Pawa.



### *Riyoshiretantzi Jesús*

<sup>23</sup> Eeniro risaiki Jesús Jerusalén-ki roimoshirenkaitziro Anonkoryagaantsi, osheki kemisantanageriri ñagaitakerira ritasonkawentantake. <sup>24</sup> Iri kantacha Jesús, te rawentaashiretari jirikapaini, tema riyoshiretziri maawoini. <sup>25</sup> Te okowajaanta Jesús inkamantaiteri tsika ikantashiretzi atziripaini riyoshireyetziri irirori.

## 3

### *Jesús eejatzi Nicodemo*

<sup>1</sup> Eenitatsi apaani Fariseo jitachari Nicodemo, iriiperori Judá-ite rini. <sup>2</sup> Ikanta jirika jatake tsireniriki ñeeri Jesús. Ikantapaakeri: “Rabí, niyotaiyini iriitake Pawa otyaan-takemiri piyotaayetena, tekaatsi kanterone rantero okaatzi poñaagantakeri eeroka, eerorika itsipashiretari Pawa.” <sup>3</sup> Ari rakanakeri Jesús, ikantziri: “Kaari apiitairone intzimai, eero ñagairo ipinkathariwentantaira Pawa. Imaperotatya.” <sup>4</sup> Ikantzi Nicodemo: “¿Kantachama rapiitairo intzimai apaani atziri antarikitaintsiri? ¿Arima onkantakya inkyagai omotziki inaanate, onkene rapiitairo intzimai?” <sup>5</sup> Ari rakanake Jesús, ikantziri: “Kaari tzimantaiyaawone ñaa, kaari itzimashiretakai Tasorenkantsi, eero ñagairo tsika ipinkathariwentantai Pawa. \* <sup>6</sup> Ikaatzi rowaiyantziri atziripaini, atziri rini. Iri-ima ikaatzi tzimantaariri Tasorenkantsi, tasorentsishireri ikantanaa. <sup>7</sup> Eero ikompitzimotzimi nokantakemiri: ‘Papiitairo pintzimayetai.’ <sup>8</sup> Okanta tampyainka itasonkantapiintzi tsika okowakaawo. Pikemawetawo oyameninka, temaita piyote tsika okenapaake, tsikarika iyaatziro. Ari ikantari eejatzi ikaatzi itzimashiretakaayetairi Tasorenkantsi.” <sup>9</sup> Rapiitanakero Nicodemo rosampitziri: “¿Tsikama okantakotaka jiroka?” <sup>10</sup> Ikantzi Jesús: “¿Eeroka, yotaapiintziriri Israel-iite, tema piyote tsika okantakotaka jiroka? <sup>11</sup> Nokenkithatakotaiyimironi okaatzi niyotakotziri. Nokenkithatakotaiyimironi okaatzi nokitari. Iro kantzimaitacha te pikemisantziro eerokapaini nokantayetzimiri. Imaperotatya. <sup>12</sup> Te pikemisantana nokenkithatakotzimiro isaawikisato, iro owatsipero eero pikemisantana arika nonkenkithatakotemiro inkitesato. <sup>13</sup> Tekaaitsi apaani jatatsine inkiteki, apatziro apaani poñainchari inkiteki. Iriira akenkithatakotzi, Itomi Atziri. † <sup>14</sup> Tema pairani Moisés-ni rowatzikakotake maanke ochempiki, ari inkantaiteri eejatzi Itomi Atziri, ontzimatye rowatzikakoiteri irirori, <sup>15</sup> ompoñaantyaari inkañaaneyetai inkaate kemisantairine.”

### *Retakotaari Pawa maawoini isaawikisatzi*

<sup>16</sup> “Tema retakokiperotari Pawa isaawikisatzi, rishinetakeri rapintzite Itomi inkamawenter, eero ikaamanetantaa inkaate kemisantairine, tema ontzimatye inkañaaneyetai. <sup>17</sup> Tema Pawa te iro rotyaantantyaariri Itomi kipatsiki riyakowentairi isaawikisatzi, rotyaantakeri rowawisaakoshiretairi. <sup>18</sup> Ikaatzi kemisantairine Itomi Pawa, eero riyakowentaitziri. Iriima kaari kemisantaatsine, riyakowentaiteri, okantakaantziro te ikemisantairi rapintzite Itomi Pawa. <sup>19</sup> Maawoini kaari kemisantatsine, aritake riyakowentaitakeri, tema rantapiintatziro kaariperori. Tema ripokawetapainta pairani kipatsiki iitaitziri ‘Kitesheenkari’, iro ikowaperotake tsirenikiri, imanintawakeri ‘Kitesheenkari.’ <sup>20</sup> Maawoini antayetzirori kaariperori ikisaneentatziiri iitaitziri ‘Kitesheenkari.’ Ramawenawaita eero riyotantaitari rantayetziro kaariperori. <sup>21</sup> Iriima antanairori irooperori, rawentaanaari ‘Kitesheenkari’, iroowa ñagaitantyaariri rantawaitainirira Pawa.”

\* **3:5** Okaatzi kenkithatakotachari jaka “tzimantaiyaawone ñaa”, tzimatsi oshiyakaawentachari: (1) Eenitatsi kantatsiri iri kenkithatakotacha ikaatzi omitsitsiyaatanaachari ripakaanairo kaariperori. (2) Eenitatsi kantatsiri iro kenkithatakotacha itzimaare eenchaaniki. (3) Eenitatsi kantatsiri iri kenkithatakotacha Tasorenkantsi, tema añaakotapiintakeri Tasorenkantsi roshiyakaawentaitziri ñaa. † **3:13** Eenitatsi osankenarentsi kantatsiri Itomi Atziri saikatsiri inkiteki.

*Rapatziyaminthare iimentaitari*

<sup>22</sup> Okanta okaatapaake jiroka, jatanai Jesús Judea-ki itsipatanaari riyotaanewo, ari itsipatakari romitsitsiyaatantzi. <sup>23</sup> Romitsitsiyaatzitanta irirori Juan janta Enón-ki, okaakitapai Salim, ari otzimaperotziri ñaa janta. Ikaatzi jatashitziriri janta, romitsitsiyaayetzi. <sup>24</sup> Tekera raakaantaiteriita Juan romonkyagaiteri.

<sup>25</sup> Ikanta riyotaanewo Juan riñaanaminthatake apaani Judá-ite tsika onkantya inkite-wathatantaiyaari. <sup>26</sup> Irojatzzi riyaatantanakari risaikira Juan, ikantapaakeri: “Rabí, jirintaganki tsipatakemiri intatsikero ñaa Jordán, pikenkithatakotakenari, romitsitsiyaatantzi irirori, osheki atziripaini pokashitziriri.” <sup>27</sup> Ari rakanake Juan, ikantzi: “Tsika ikanta piñaakeri jirika, iriira Pawa iriiperotakaakeri. <sup>28</sup> Eeroka kemajaantakena nokantake pairani: ‘Te naaka Cristo apatziro rotyaantaitakena neewatapaakeri irirori nonkenkithatakoteri.’ <sup>29</sup> Thame noshiyakaawentemiro: apaani aawakagaantsi, iriitake iimentaitari iriiperori, aapiintzirori tsinane. Iriima itsipaminthare, eero iñaaperowaita irirori, apatziro inkimoshiretanake inkemakeririka inkenkithawaitanake jimetsi. Ari nokantakari naaka, te niriiperowaita, iro kantzimaitacha, antawo nokimoshiretake. <sup>30</sup> Eekero riyaatatye ririiperote jirika, irooma naaka ari nompairaniityaakotai.”

*Poñagainchari jenoki*

<sup>31</sup> “Tema poñagainchari jenoki ranairi maawoini. Iriima nampitawori kipatsiki, isaawikisatzi rinatzi, inkenkithatakotashitapiintawo isaawikisato. Iriima poñagainchari inkiteki ranairi maawoini, <sup>32</sup> inkenkithatakotziro okaatzi iñiiri, okaatzi ikemiri. Iro kantzimaitacha eero ikemisantaitziro okaatzi inkenkithatakotziri. <sup>33</sup> Iri kantacha inkaate kemisantanairine, ari inkantanakya irirori inkenkithatakotanakeri Pawa iriiperori rinatzi. <sup>34</sup> Itzimi rotyaantakeri Pawa, riñaane Pawa inkenkithatakotzi. Tema rithotyiro Pawa inampishiretakaantawo Itasorenka. <sup>35</sup> Jirika Ashitairi retakotari Itomi, ipinkathariwentakaakeri maawoini tzimayetatsiri.

<sup>36</sup> Ikaatzi kemisantanairine Itomi, ari inkañaanetai. Iriima kaari kemisantairine Itomi, eero iñagairo inkañaanetai irirori, apatziro ratsipetaiyawo rowasanketairi Pawa.”

**4***Jesús eejatzi Samaria-sato*

<sup>1</sup> Ikanta Fariseo-paini ikemaiyakeni, ikantaitzi: “Tzimake osheki riyotaanewo Jesús, romitsitsiyaatake osheki atziripaini, ranaanakeri Juan.” Riyotake irirori Jesús okaatzi ikemaiyakerini Fariseo. <sup>2</sup> (Kaarira Jesús omitsitsiyaatantatsine, tema riyotaanewopaini omitsitsiyaatantatsiri.) <sup>3</sup> Iro rishitowantanakari Jesús Judea-ki, ripiyaawo Galilea-ki. <sup>4</sup> Ari eekaatziri inkenanairo iipatsiteki Samaria-satzi. <sup>5</sup> Irojatzzi rareetantakari nampitsiki saikatsiri Samaria-ki oita Sicar, iro tsipanampitawori iipatsite pairani Jacob-ni ipanairiri itomi, José. <sup>6</sup> Ari isaikiri ñaa iiyane Jacob-ni. Tema makokitake Jesús ranashitaga, risaikashitapaakero ñaa, riweyaaka ooryaa tampatzika. \*

<sup>7</sup> Ari ipokake apaani Samaria-sato onkaye ñaa. Ikantawakero Jesús: “Pimpena ñaa ni-rawakeeta.” <sup>8</sup> Tema riyataiyatziini riyotaanewo nampitsiki ramanante owanawontsi. <sup>9</sup> Maawoini Judá-paini te rapatziyari kameethaini Samaria-satzipaini. Ari akanakeri tsinane okantanakeri: “¿Tsika pikenakairoka eeroka Judá-ite pini, pikowakotana naaka Samaria-sato nompemi ñaa?” <sup>10</sup> Ari rakanakero Jesús, ikantziro: “Arime piyote oita ipantziri Pawa, ari piyoterime kowakotakemiri ñaa, eeroka kowakotenaneme naaka. Aritake nompakemiro ñaa añaakaantatsiri.” <sup>11</sup> Okantanake tsinane: “Pinkatharí, tekaatsi pinkitaagantyaari ñaa, inthomoi okantaka omoo, ¿tsika payeroka pimpenari ñaa añaakaantatsiri? <sup>12</sup> Iri acharineete Jacob-ni panairori pairani jiroka ñaa, iro rirakeri irirori, irojatzzi rirakeri itomipaini, rirakero eejatzi ipirapaini. ¿Panairima

\* 4:6 Ikantaitziri jaka “ooryaa tampatzika”, iri ikantaitziri pairani riweyaaka ooryaa 6.

eeroka?” <sup>13</sup> Rakanakero Jesús, ikantanakero: “Maawoini irayetzirori jiroka ñaa, eero opeyawo imeretzi. <sup>14</sup> Inkaate irakerone ñaa nomperiri naaka, eero imerenetai. Tema ñaatatsiri nopantziri naaka ari ishitowashiretantaiyaari oshiyawaityaawo ishitowan-tatyeeyaarime ñaa añaakaantatsiri.” <sup>15</sup> Okantanake tsinane: “Pinkatharí, pimpenawo naaka jiroka ñaatatsiri, eero napiitantaawo nomeretai, eero nipiypiyawaitanta jaka nonkaye ñaa.”

<sup>16</sup> Ikantanakero Jesús: “Piyaate, pinkaimeri piime, eejatzi pipiyapai jaka.” <sup>17</sup> Okantanake tsinane: “Tekaaitsi noime.” Ikantziro Jesús: “Kyaaryoopero pikantake, tekaaitsi piime, <sup>18</sup> tema tzimawetaka pairani ikaatzi 5 piime. Iriima pitsipatari iroñaaka, kaari piime. Imaperotatya okaatzi pikantakeri.” <sup>19</sup> Okemakerira ikantakero, okantanake tsinane: “Pinkatharí, niyotanakemi naaka Kamantantaneri pini. <sup>20</sup> Pairani nosariite Samaria-satzi ipinkathatapiintakeri Pawa jaka ochempiki. Iro kantzimaitacha eerokapaini Judá-peroriite, pikantaiyini apinkathatapiintairi Pawa janta Jerusalén-ki.” <sup>21</sup> Ikantanakero Jesús: “Pinkemisantawake tsinane, irootaintsi piñero, eero okowajaanta piyaate janta ochempiki pimpinkathayetairi Ashitairi, eero okowajaanta piyaate eejatzi Jerusalén-ki. <sup>22</sup> Imaperowetatya, te piyotaiyirini eerokapaini iita pipinkathatapiintziri. Irooma naakapaini niyotziri itzimi nopinkathatziri. Tema jirika owawisaakotantatsine, Judá-ite rine. <sup>23</sup> Iro kantacha, irootzimataintsipiñero. Ikaatzi maperotachari ipinkathatairi Ashitairi, iriitakera ikaatzi pinkathatairiri ishireki. Tema iriyyetake raminaminatairi Ashitairi impinkathatakaantaiyaariri. <sup>24</sup> Pawa irijatzi Tasorenkantsi, kaari koñaatatsine. Inkaate pinkathayetairine, ontzimatye impinkathashiretairi, te okowajaanta rantayetairo koñaayetatsiri.” <sup>25</sup> Akanake tsinane okantzi: “Niyotzi naaka, arika ripokake Mesías, iitaitziri Cristo, arika rareetakya irirori, ari inkamantapaakairo maawoini tsika okantakota.” <sup>26</sup> Ikantanake Jesús: “Naakatake, ñaanatakemiri.”

<sup>27</sup> Ari rareetaiyapaani riyotaanewo, iñaapaakitziiri itsipatawo tsinane ikenkithawaitakairo, riyokitziwentapaakeri. Iro kantzimaitacha tekaaitsi osampitapaakerine oita okowiri tsinane, tsikarika oita ikenkithawaitakairori. <sup>28</sup> Ookanakero tsinane ochomone, jatake nampitsiki, okantapaakeri atziripaini: <sup>29</sup> “Pipokaiyeni pamineri apaani atziri yotakotakenawori maawoini nantayetakeri pairani. ¿Kaaririka Cristo?” <sup>30</sup> Ikanta ripokaiyanakeni atziripaini ipoñaakawo nampitsiki, areetaiyakani risaika-paakera Jesús.

<sup>31</sup> Ari ipankenataiyarini riyotaanewo, ikantziri: “¡Rabí, poya!” <sup>32</sup> Rakanakeri Jesús, ikantzi: “Tzimatsi oita nowari naaka, te piñagaiyironi eeroka.” <sup>33</sup> Ari rosampitawakaiyanakani riyotaanewo: “¿Eenitatsima amakeniriri rowanawo?” <sup>34</sup> Ikantanake Jesús: “Iro noshiyakairi nowanawo nantero okaatzi ikowiri otyaantakenari, ontzimatye nithonkero eejatzi antawairentsi ipakenari. <sup>35</sup> Jiroka pikantapiintaiyini eeroka: ‘Yotapaaka 4 kashiri isampatantyaari pankirentsi.’ Nonkantemi naaka: paminero pankirentsimashi, sampainkatake, ontzimatye owiitya. <sup>36</sup> Inkaate antawaitatsine rowiitero pankirentsi ari ripinaitairi. Okaatzi pankirentsi rowiyeetairi iriitake oshiyakaawentacha inkaate kañaanetatsine. Iro inkimoshiretantaiyaari pankitakerori intsipataiyaari owiitairori. <sup>37</sup> Imaperotatya jiroka roshiyakaawentaitakeri, ikantaitzi: ‘Eenitatsi pankitakerori, tzimatsi itsipa owiitairone.’ <sup>38</sup> Notyaantakemi piyaate eerokapaini powiitairo kaari pipomeentsi-wenta pantawaiwentero. Tema tzimayetatsi itsipa pomeentsiwentakawori rantawaiwentakero. Eerokatake nintagaawori rantawaiwentanewo jirikapaini.”

<sup>39</sup> Tema osheki Samaria-satzi saikatsiri nampitsiki kemisantawakeriri Jesús okantakaantziro tsinane okamantantapaakera: “Riyotakotakenawo maawoini nantayetakeri pairani.” <sup>40</sup> Ikanta rareetaiyapaakani Samaria-satzipaini, ishintsineentapaakeri Jesús risaikimotanakeri inampiki. Rimatakero Jesús, apite kiteesheri risaikanake,

<sup>41</sup> osheki itsipa kemisantanaintsiri ikemaiyakenira iriroripaini okaatzi ikantayet-ziri Jesús. <sup>42</sup> Ikantaitanakero tsinane: “Kemisantayetaana naaka iroñaaka, te iro nonkemisantantaiyaari pikamantapaakenaga, tema naaka kemawakeri okaatzi ikantayetakeri. Niyotaiyaini eejatzi iriitake owawisaakoshiretantaatsine jaka kipatsiki, iriitake Cristo.”

### *Retsiyatakotakagairi Jesús itomi jewari*

<sup>43</sup> Okanta imonkaatakaga apite kiteesheri risaikapaake Jesús Samaria-ki, awisanake riyaatairo Galilea-ki. <sup>44</sup> Tema iri Jesús kantaintsi: “Apaani Kamantantaneri te ipinkathaitziri inampiki.” <sup>45</sup> Ikanta rareetaawo Galilea-ki, osheki raakameethaitawairi janta, tema ari ikaatake riyaataiyakeni Jerusalén-ki roimoshirenkawo Anonkoryagaantsi, iñaakero maawoini rantayetakeri Jesús janta.

<sup>46</sup> Ari rareetaawo Jesús janta Caná-ki saikatsiri Galilea-ki, tsika ipeyakero ñaa os-hiyawaitanakawo riraitziri. Tzimatsi janta Capernaum-ki iriiperori jewari, mantsiy-ataintsiri itomi. <sup>47</sup> Ikanta jirika jewari ikemakotakeri Jesús areetaawo Galilea-ki ipoñagaawo Judea-ki, riyaatashitanakeri iñeeri. Ikowakowatapaakeri, riyaatakairi ipankoki, retsiyatakotakagainiri itomi, irootaintsi inkame. <sup>48</sup> Ikantanake Jesús: “¿Litaka kaari pikemisantantana? Pikowaperotake noñaayemiro kaari piñaapiintzi pairani, pikowaperotzi nitasonkawentante.” <sup>49</sup> Ikantanake jewari: “Pinkatharí, jameeta iroñaaka, tekera ikamanakeeta notomi.” <sup>50</sup> Ikantanake Jesús: “Pipiye pipankoki. Etsiyatakotai pitomi.” Ikemisantana atziri okaatzi ikantakeriri Jesús, piyanaka. <sup>51</sup> Ripiyaminthaitanaka ipankoki, ritonkyotakari inoshikane, ikantawakeri: “¡Etsiy-atakotai pitomi!” <sup>52</sup> Rosampitanakeri irirori tsika ikaatake ooryaa retsinaryaakotanai itomi, ikantaiyanakeni rinoshikanewo: “Chapinki, ritainkanakera ooryaa, ari awisanakeri isaawakitzi.” † <sup>53</sup> Ari ikenkithashiretanaawo ashitariri ari riweyaaka ooryaa chapinki ikantakeri Jesús: “Etsiyatakotai pitomi.” Iroowa ikemisantantaari irirori, ari ikantakari eejatzi maawoini isheninkapaini irirori ikemisantanaakeri Jesús. <sup>54</sup> Iro apitetaintsiri roñaagantziro Jesús ritasonkawentantzi rareetaawo Galilea-ki ipoñagaawo Judea-ki.

## 5

### *Kisopookiri Betesda-satzi*

<sup>1</sup> Okanta okaatapaake roimoshirenkaiyaani Judá-ite Jerusalén-ki, ari riyaatzitaka eejatzi Jesús.

<sup>2</sup> Janta Jerusalén-ki, ari isaiki rowaankanaitziro ñaa iitaitziro riñaaneki Heber-thato “Betesda.” Tzimatsi okaatzi 5 opankoshetaaniki. Ari otsipakerotawo ashitakowontsi iitaitziri “Oweja.” <sup>3</sup> Ari ipiyotakari osheki mantsiyari, kaari kowichaataatsi, kisopookiri, ethoriwaitatsiri romaryaayeta kipatsiki royaawentziro ishewaata ñaa. <sup>4</sup> Tema ikantaitzi: Rinatzi ripokapiintzi maninkari rishewaatakaairo ñaa, itzimirika etanakyaawone ripiinkaantyaawo ñaa ishewaatakaga, aritake retsiyatakotai imantsiyawaitzi. <sup>5</sup> Eenitatsi janta mantsiyarimashiki apaani tzimakotaintsiri 38 osarentsi imantsiyawaitake. <sup>6</sup> Ikanta Jesús iñaapaakeri romaryaaka, riyotapaake osamani okantaka imantsiyawaitake jirika, rosampitapaakeri, ikantziri: “¿Pikowi petsiyatakotai?” <sup>7</sup> Rakanake mantsiyari: “Pinkatharí, tekaatsi iita owiinkenane arika ishewapaitetanaiya ñaa. Tema nokowawetapiintaka nipiinkaateme naaka, ranaakotakena itsipa ripiinkaatake irirori.” <sup>8</sup> Ikantanakeri Jesús: “Pimpiriinte, paanairo pomaryaamento, piyaatai.” <sup>9</sup> Apathakerotanaka retsiyatakotanai jirika, raanairo romaryaamento, anashitanaa. Iro kantacha kiteesherira rimakoryaantaitari ini, <sup>10</sup> ikantakeri Judá-ite jirika atziri etsiyatakotaatsiri: “Kiteesheri rimakoryaantaitari

† 4:52 Kantakotachari jaka “ritainkanakera ooryaa”, iri ikantaitziri pairani “ooryaa 7”.

ini iroñaaka, te ishinetaantsite paanairo pomaryaamento.” <sup>11</sup> Rakanake jirika atziri, ikantzi: “Jirinta etsiyatakotakagaanari, ikantakena: ‘Paanairo pomaryaamento, piyaatai.’ ” <sup>12</sup> Ikantaiyanakeni Judá-ite: “¿Iitaka kantakemiri: ‘Paanairo pomaryaamento, piyaatai?’ ” <sup>13</sup> Iri kantacha jirika atziri te riyotziri iitaka etsiyatakotakagairiri, tema te iñaawairi Jesús tsika ikenanake, ipiyotaiyakanira atziripaini janta. <sup>14</sup> Ikanta Jesús iñagairi atziri janta tasorentsipankoki, ikantziri: “Pinkeme, etsiyatakotaimi iroñaaka, eerowa papiitairo pantairo kaariperori, eero awishimotantaimi koweenkaperotatsiri.” <sup>15</sup> Ikanta jirika atziri jatanake, ikamantakeri Judá-ite iri Jesús etsiyatakotakagairi. <sup>16</sup> Iro opoñaantari ikowi Judá-ite rowamairi Jesús, tema retsiyatakotakaantake kiteesheriki rimakoryaantaitari. <sup>17</sup> Iro kantzimaitacha, ikantanake Jesús: “Ashi rowatziro rantawaitzi Ashitanari, ari nokantzitari eejatzi naaka nantawaitzi.” <sup>18</sup> Irootake, ikowaperotantanakari Judá-ite rowamairi Jesús, te apatziro rantawaitantakawo kiteesheri rimakoryaantaitari, tema roshiyakotakari Pawa, ikantake Jesús iriitake Pawa ipapatetari irirori.

### *Ishintsinka Itomintari Pawa*

<sup>19</sup> Ikanta Jesús rakanake, ikantzi: “Jirika Itomi Pawa tekaatsi rantashiwaitya irirori ikowakaanekiini. Apatziro rantziro okaatzi iñaakotziriri Ashitariri. Maawoini okaatzi rantziri Ashitariri, irojatzi rantziri Itomi. Imaperotatya. <sup>20</sup> Tema retakotari Ashitariri jirika Itomi, roñaayiri maawoini rantayetziri irirori. Eekero roñaagatyeeeri oitarika antawoitetsiri, iroowa piyokitziwentantyaariri eerokapaini. <sup>21</sup> Tema ikantaga Ashitariri rowañaayetziri kaminkari, ikañaanetakairi, ari inkantyaari eejatzi Itomi, rañaakaayetairi ikowiri irirori. <sup>22</sup> Te iri yakowentantatsine Ashitariri, Itomira rishinetake riyakowentantai, <sup>23</sup> ompoñaantyaari maawoini impinkathatairi Itomi roshiyakagaitairi Ashitariri. Kaari pinkathatairine Itomi, te ipinkathatziri Ashitariri otyaantakeriri.

<sup>24</sup> Inkaate owayempitataiyaawone nokantayetziri, inkemisantanairi otyaantakenari, ari inkañaaneshireyetai. Eero rowasankewaitaitziri, tema kaatapaake ikaamanewaitzi, kañaane ikantayetaa. Imaperotatya. <sup>25</sup> Irootzimataintsi imonkaatya, inkemayetairo kamayetatsiri riñaane Itomi Pawa. Inkaate kemairone, ari rañaashireyetai. Imaperotatya. <sup>26</sup> Tema ikantaga Ashitariri rañaakaantzi, ikashaakaakeri eejatzi Itomi rañaakaante irirori, <sup>27</sup> ikashaakaakeri eejatzi riyakowentantai, tema Itomi Atziri rini. <sup>28</sup> Eero piyokitziwentashitawo jiroka. Tema irootzimataintsi imonkaatya inkemantaiyaawori kaminkariite riñaane, <sup>29</sup> impiriintayetanake tsika ikitayetaka. Ikaatzi antayetakerori kameethari, ari inkañaaneyetai. Iriima ikaatzi antapiintakerori kaariperori, rañaayewetaiya rowasankeyetairi.”

### *Ñaayetawakeriri Cristo*

<sup>30</sup> “Te nantashiwaitawo nokowashitari naaka, Ashitanari nintatakanawori niyakowentemi. Okaatzi nokantakowentantziri tampatzika okanta, tema te nantashiwaitawo nokowiri naaka, iro ikowiri Ashitanari otyaantakenari. <sup>31</sup> Naakame kenkithatakowaitashitachane apaniroini, tera opantawo nokenkithatakowaiwetaga. <sup>32</sup> Iro kantzimaitacha eenitatsi itsipa kenkithatakotanari, niyotzi iro kyaaryooperotatsiri okaatzi ikenkithatakotakenari irirori. <sup>33</sup> Imaperowetatya ikenkithatakotakenari Juan potyaantantakariri pairani rosampiteri. Tema okaatzi ikenkithatakotakenari imaperotatya. <sup>34</sup> Iro kantacha te iro nonkenkithatakote okaatzi ikenkithatakotanari apaani atziri oshiyakariri Juan. Iroowa nokenkithatakotzi matairone owawisaakoshiretami. <sup>35</sup> Tema roshiyawetakari Juan apaani ootamentotsi kiteesheenkatapaintsiri. Iro pikowapaintziri eerokapaini pinintaawakyaawo roshiyapaintari kiteesheenkari. <sup>36</sup> Iro kantacha eenitatsi kenkithatakotanari naaka anairiri Juan. Okaatzi nantziri naaka, iro ikantanari Ashitanari nanteri, iroowa riyotantaitari naaka rotyaantane Ashitanari. <sup>37</sup> Ari ikantakari Ashitanari



otyaantakenari, ikenkithatakotakena irirori, temaita pikemisantziro riñaane. Te piñaawooteri. <sup>38</sup> Te okyaantzimi riñaane, tema te pikemisantziri rotyaantanewo. <sup>39</sup> Amatsinka pikantaweta piñaanatziro Osankenarentsipero, ari poyaakoneentaawo pinkañaanetai. Naakawetakaga okenkithatakotzi Osankenarentsipero, <sup>40</sup> temaita pikowaiyini eerokapaini pawentaayetaina ompoñaantyaari pinkañaneyetai. <sup>41</sup> Te nokowi naaka inthaamentawentena atziripaini. <sup>42</sup> Niyotzimi ketziroini tsika pikantaiyani eeroka, niyotzimi eejatzi te pinintziri Pawa. <sup>43</sup> Naakatake rowake Ashitanari nipoke naakotairi iwairo. Temaita paakameethatawakena eerokapaini. Arika ripoke itsipa aakowaitashitapaakyaawone iwairo irirori, iri paakameethaiyawakerini. <sup>44</sup> ¿Tsika pinkene pinkemisantaiyeni? Apaniroini pithaamentashiwaitawakaa, te paminaminatairo iri Pawaperori thaamentaimine. <sup>45</sup> Eero pikenkithashirewaita naaka yakowentemine Ashitanariki. Iri Moisés-ni yakowentaimine, pawentaawetakarira eerokapaini. <sup>46</sup> Arime pinkemisantakerime Moisés-ni, aritakeme pinkemisantawakena naaka, tema naakatake rosankenatakotake Moisés-ni. <sup>47</sup> Tera pikemisantziro okaatzi rosankenawetakari Moisés-ni, ¿tsika pinkene pinkemisantero onkaate nonkantemiri naaka?”

## 6

### *Rowakaari Jesús 5000 shirampari* (Mt. 14.13-21; Mr. 6.30-44; Lc. 9.10-17)

<sup>1</sup> Okanta okaatapaake jiroka, montyaanaka Jesús intatsikero inkaare saikatsiri Galilea-ki, irojatzí iitaitziri Tiberias. <sup>2</sup> Osheki atziri oyaatakeriri, tema iñaakerira ritasonkawentantake retsiyatakotakaayetairi mantsiyaripaini. <sup>3</sup> Irojatzí ritonkaantanakari Jesús otzishiki, ari risaikapaake itsipayetakari riyotaanewo. <sup>4</sup> Iro areetzimataiya kiteesheri Anonkoryagaantsi, ari roimoshirenkapiintari Judá-ite. <sup>5</sup> Ikanta raminapaake Jesús, iñaatzi osheki atziri oyaatakeriri, ikantakeri Felipe: “¿Tsika amananteka owanawontsi owakayaariri maawoini jirika atziripaini?” <sup>6</sup> Rosampitashitari Felipe inkemantyaariri tsika inkante, tema riyotake Jesús oita ranteri. <sup>7</sup> Ari rakanake Felipe, ikantanake: “Eero rimonkaata koriki amanantantyaawori owanawontsi, eepichokiinira roya jirikapaini.” \* <sup>8</sup> Irojatzí rakantanakari Andrés, itsipa riyotaanewo, irirentzi Simón Pedro, ikantzi: <sup>9</sup> “Jirika apaani eentsi amaintsiri 5 pan, apite shima. ¿Arima riyomaatakyaari osheki atziri?” † <sup>10</sup> Ikantanake Jesús: “Pinkanteri maawoini risaikayete.” Onatsiryaapankaatakera, saikaiyanakeni. Ikaataiyini 5000 atziripaini. <sup>11</sup> Raakotanakero Jesús pan, riwetharyaanakari Pawa, itzipetowakeniri ikaatzi saikaintsiri. Rimatakeri eejatzi shima, ipayetakeri okaatzi ikowakeri royaawo. <sup>12</sup> Ikanta ikemakitaiyakani maawoini, ikantairi Jesús riyotaanewo: “Powiitairo opetoki tzimagaantapaintsiri, eero apaawaitanta.” <sup>13</sup> Rowiiyetairo riyotaanewo, yeekitai 12 kantziri opetoki tzimagaantapaintsiri kaawetachari 5 pan. <sup>14</sup> Jirikapaini atziri, iñaakero ritasonkawentakero Jesús owanawontsi, ikantaiyanakeni: “Imaperotatyá, iriitake jirika Kamantantaneri ikashaakaitakairi ripoke jaka kipatsiki.”

<sup>15</sup> Iri kantacha riyotake Jesús ishintsineentaitatyeeri ragaitanakeri impinkathariwen-teri atziripaini, piyanaka otzishiki, ari risaikawaite apaniroini.

### *Ranashaatantaawo Jesús inkaare* (Mt. 14.22-27; Mr. 6.45-52)

<sup>16</sup> Okanta otsireniityaanake, oirinkaiyaani inkaareki riyotaanewo Jesús, <sup>17</sup> otetaiyapaani pitotsiki, montyaakotaiyaani riyaatairo Capernaum-ki. Tema tsireniperotanake, te ripokita Jesús. <sup>18</sup> Ari otampyaatapaake, antawoite

\* **6:7** Kantakotachari jaka “koriki” irijatzí ikantakoitziri 200 denario. † **6:9** Ikantaitziri jaka “pan”, iroowa riwetsikaitake cebada.

otamakaanake inkaare. <sup>19</sup> Osamanitake rimontyaakotaiyani, iñaawaatziiri Jesús ripokashitairi ranashaatantaawo inkaare. Antawo ithaawaiyanakeni riyotaanewo. ‡ <sup>20</sup> Ikantapai Jesús: “¡Naakatake, eero pithaawaiyini!” <sup>21</sup> Kimoshire ikantaiyani rotetawairi pitotsiki, tekeru osamaniteeta, aatakotaiyapaakeni tsika ikowakero rareetya.

*Osheki atziripaini aminaminatakeriri Jesús*

<sup>22</sup> Okanta okiteeshetamanai, irojatzi royaawentaka atziripaini intatsikero, riyotaiyakeni apinto pitotsi rimontyaantanakari riyotaarewopaini, te royaatanairi Jesús. <sup>23</sup> Areetakotantapaaka otsipa pitotsi poñaachari Tiberias-ki, aatapaake tsika rowaiyakani chapinki pan riwetharyaantakariri Awinkatharite. <sup>24</sup> Ikanta riyotaitake te risaiki Jesús, eejatzi riyotaanewo, otetiyanaani atziripaini pitotsiki, jatake Capernaum-ki rithotyaakotairi.

*Iitaitziri Jesús “owanawontsi añaaakantatsiri”*

<sup>25</sup> Ikanta rareetaiyanaani intatsikero, iñaapairi Jesús, rosampitapairi: “Rabí, ¿tsika-paitema pareetaka eeroka jaka?” <sup>26</sup> Ikantanake Jesús: “Iro pithotyaakotantanari eerokapaini pikemakitaiyakanira chapinki powaiyakani, te iro pithotyaakotantenari pikemathatatzirowa nitasonkawentantakera. Imaperotatya. <sup>27</sup> Te onkameethate patsipewentyaawo owanawontsi thonkanetachari iro patsipewentya owanawontsi en-itatsiri, kañaanetakaimine. Iro owanawontsi ipantziri Itomi Atziri, tema Pawa, Ashitariri, iriitake inintakaake ririiperote.” <sup>28</sup> Rosampitanakeri, ikantziri: “¿Tsika nonkantyaaka natsipewentantyaawori ikowiri Pawa?” <sup>29</sup> Rakanake Jesús: “Eenitatsi ikowiri Pawa pantairi, ontzimatyepinkemisantairi rotyaantakeri.” <sup>30</sup> Rosampiitanakeri eejatzi: “¿Janjaatya pitasonkawentante ompoñaantyaari nonkemisantemi? ¿Iitakama panteri?” <sup>31</sup> Pairani acharineete rowayetakawo ochempiki iitaitziri ‘maná’, iro ikantaitziri Os-ankenarentsi:

Pawa pakeri owanawontsi poñagainchari inkiteki.” §

<sup>32</sup> Rakanake Jesús, ikantzi: “Okaatzi owanawontsiperori poñagainchari inkiteki, kaari Moisés-ni panterone. Iri Ashitanari pemirone. Imaperotatya. <sup>33</sup> Tema jirika owanawontsi ipantziri Pawa, iriitake poñagainchari inkiteki, iri kañaanetakaayetairine isaawik-izatzipaini.” <sup>34</sup> Ari ikantaitanakeri: “Pinkatharí, pimpapiintenawo jiroka owanawontsi.”

<sup>35</sup> Ikantanake Jesús: “Naakatake owanawontsi owañaantatsiri. Inkaate shentashire-tainane naaka, eero ritasheyawaitai. Inkaate kemisantainane naaka, eero imere-waitai. <sup>36</sup> Tema nokantzitakemi, okantawetaka piñaawetakena temaita pikemisantaiyini. <sup>37</sup> Ikaatzi rishentashiretakaakenari Ashitanari, iriitake shentashireperotainane, eero nomanintawakeri naaka. <sup>38</sup> Te iro nipokantyaari nopoñaakaga inkiteki nantayetero nokowashiwaitari, iro nantapiinte ikowiri Ashitanari, otyaantakenari. <sup>39</sup> Jiroka ikowiri Ashitanari otyaantakenari, eero nopeyagaantawaitzi apaani rishentashiretakaakenari, nowiriintairi paata weyaantapaakyaawone kiteesheri. <sup>40</sup> Ikowi Ashitanari, maawoini aminairine Itomi Pawa, kemisantairine, aritake rañaakaayetairi. Naakatake owiriintairine imonkaatapaakyaarika kiteesheri.”

<sup>41</sup> Iro ipoñaantanakari Judá-ite ikishimawaitanakeri Jesús, ikemakeri ikantake: “Naakatake owanawontsi poñagainchari inkiteki.” <sup>42</sup> Ikantawakaiyanakani: “¿Kaarima jirika Jesús, itomi José? Niyotziri naaka ashitariri. ¿Iitaka ikantantari: ‘Nopoñaawo inkiteki?’ ” <sup>43</sup> Ikantanake Jesús: “Atake pikishimawaitakena.

‡ 6:19 Kantakotachari “osamanitake rimontyaakotaiyani”, irojatzi ikantaitzi “5 kilómetro aama 6”, ikantaitziri eejatzi pairani “25 aamaakarika 30 estadio”. § 6:31 Jaka tsika okenkithatakota “owanawontsi”, iro ikantaitziri pairani “pan”. Ikenkithatakoitziro pairani pan, irojatzi ikenkithatakoitzi maawoini owanawontsi. Ariwaitake akantapiintaiyini aakapaini: “Poya kaniri”, te apatziro akenkithatakotziro kaniri, tzimatsi eejatzi tsimeri oyaari.

<sup>44</sup> Tekaatsi shentashirewaitenane naaka, eerorika ramashiretairi Ashitanari otyaantakenari. Naaka owiriintairine imonkaapaitetapaakyaarika kiteesheri.

<sup>45</sup> Ikantake rosankenareki Kamantantaneriite:

Iriitake Pawa yotairine maawoini.

Maawoini kemairiri Ashitanari, yotairiri irirori, rishentashiretaana naaka. <sup>46</sup> Te nokantzi eenitatsi ñaawootakeriri Ashitanari, apa iñaawootziri poñagainchari Pawaki.

<sup>47</sup> Inkaate kemisantainane naaka, ari inkañaanetai. Imaperotatya. <sup>48</sup> Naakatake owanawontsi añaakaantatsiri. <sup>49</sup> Rowawetakawo picharinepaini ‘maná’ ochempiki, kamimaitaka. <sup>50</sup> Iriima oshiyakawori owanawontsi nokenkithatakotziri naaka ipoñaakawo inkiteki. Inkaate owaiyaarine jirika, eero ikaamanetai. <sup>51</sup> Naaka kañaaneri owanawontsi poñagainchari inkiteki. Inkaate owakyaawone jiroka owanawontsi, ari inkañaanetai. Jiroka owanawontsi nopantziri naaka, nowathapero ini. Iri nishinewenta isaawikisatzipaini inkañaanetantaiyaari.”

<sup>52</sup> Ari ikantawakaiyani Judá-ite: “¿Tsika ikenakairoka jirika rowakaantairori iwatha?”

<sup>53</sup> Ikantzi Jesús: “Eerorika powawo eerokapaini iwatha Itomi Atziri, eerorika piriro riraa, eero pikañaanetai. Imaperotatyaaga. <sup>54</sup> Inkaate owakyaawone nowatha, irakerone niraa, ari inkañaanetai. Naakatake owiriintairine imonkaapaitetapaakyaarika kiteesheri. <sup>55</sup> Tema jiroka nowatha owanawontsiperori ini, jiroka niraa iro riraperotairi.

<sup>56</sup> Inkaate owakyaawone nowatha, irakerone niraa, rishentashiretaanaga naaka, eejatzi naaka nishentashiretaari irirori. <sup>57</sup> Tema Ashitanari, otyaantakenari, kañaaneri rini, iriitake añaakaanari naaka. Ari okantari eejatzi, inkaate owainane naaka, aritake nañaakaayetai. <sup>58</sup> Nokenkithatakotatziro owanawontsi poñagainchari inkiteki. Jiroka owanawontsi te oshiyawo ‘maná’ rowayetakari pairani picharinepaini. Okantawetaka rowawetakawo, kamayetai. Iriima inkaate owakyaarine jirika oshiyawori owanawontsi, ari inkañaanetai.” <sup>59</sup> Iro riyotaantakeri Jesús janta rapatotapiintaiyanira nampitawori Capernaum-ki.

### *Ikenkithakotziro kañaanetaantsi*

<sup>60</sup> Ikanta ikemaitakero jiroka yotagaantsi, ikantaiyanakeni oyaatakeriri Jesús: “Pomeentsi ayotantyaawori ikantayetakeri Jesús. ¿Iitaka kemisantamatsiterine?”

<sup>61</sup> Iyotake Jesús, okaatzi ikishimawaitaitziriri, rosampitanakeri: “¿Te inimotemi jiroka?”

<sup>62</sup> ¿Oitaka awisatsine, arika piñeeri Itomi Atziri rowenonkaiya ipoñaakaga pairani?

<sup>63</sup> Okaatzi nokenkithatakoyetakemiri, irootake añaashiretakaantatsiri, kaari awathapero nonkenkithatakote, tekaatsi oiperotya awatha. Iro nokenkithatakotzi awentaashirenkantsi kaari koñaanetatsi, añaakaantatsiri. <sup>64</sup> Iro kantacha eenitatsi apawopaini pikaataiyinira kaari kemisantatsine.” Tema riyotzitakari Jesús kaari kemisantatsine, tsika itzimi pithokashityaarine. <sup>65</sup> Eekero ikantanakitzi Jesús: “Iro nokantzitantakemiri: ‘ikaatzi shentashiretaanari naaka, iriira rishinetaanari Ashitanari.’ ”

<sup>66</sup> Aripaite iñagaitake ripiyapithatanakari osheki oyaawetapiintariri Jesús. <sup>67</sup> Ikanta Jesús rosampitanakeri 12 riyotaanewo: “¿Pikowatziima eejatzi eerokapaini piyaayetai?”

<sup>68</sup> Rakanakeri Simón Pedro: “Pinkatharí, ¿Iitaka niyaatashiteri? Eerokatake kenkithatakotakerori kañaanetaantsi. <sup>69</sup> Tema nokemisantakemi naakapaini.

Niyotaiyini eerokatake Cristo, Itomi Pawa Kañaaneri.” <sup>70</sup> Rakanake Jesús, ikantziri: “¿Kaarima naaka yoyaakemiri pikaatakera 12? Iro kantzimaitacha, eenitatsi apaani pikaatakera kamaari rinatzi.” <sup>71</sup> Ikenkithawaitakero jiroka Jesús, ikenkithatakotatziiri Judas, itomi Simón Iscariote. Tema iriitake Judas pithokashityaarine, iriiwetaka apaani kaawetachari 12 riyotaanewo.

## 7

### *Irirentzipaini Jesús te ikemisantaiyirini*

<sup>1</sup> Okanta okaatapaake jirokapaini, rareetantawaita Jesús janta Galilea-ki. Te ikowi risaikanaí Judea-ki. Tema rithotyaakotatziiri janta Judá-ite ritsitokeri. <sup>2</sup> Iro kantacha monkaatzimataka kiteesheri ikimoshirewentapiintziro Judá-ite iitaitziri “pankoshetantsi.” <sup>3</sup> Rithainkitanakari irirentzi irirori okaakiini, ikantanakeri: “Eero pimanashiwaita jaka, piyaate Judea-ki iñaantemiri piyotaanewopaini onkaate pantayeteri. <sup>4</sup> Ikaatzi kowatsiri rasagaawentaityaari, te rimanakaawo rantayetziri. Pantayetziro eeroka oitarika, poñaagantero tsika ipiyotaiyani atziripaini.” <sup>5</sup> Te ikemisantaatsikaitziri eejatzi irirentzipaini. <sup>6</sup> Ikantanake Jesús: “Tekera imonkaata noñaagantantya naaka, irooma eerokapaini inimowaitzimi maawoini kiteesheriki. <sup>7</sup> Te ikisaneentzimi eeroka isaawikisatzipaini. Irooma naaka osheki ikisaneentana, tema koñaawo nokantziro naaka, okaatzi rantayetziri kaariperori ini. <sup>8</sup> Piyaataiyeni eeroka roimoshirenkaitaga, eerowa niyaatzita naaka, tema tekera imonkaapaitetyaata noñaagantantya.” <sup>9</sup> Riñaawaitakerowa jiroka, irojatzi risaikanaí Galilea-ki.

### *Roimoshirenkero Jesús iitaitziri “pankoshetantsi”*

<sup>10</sup> Tema jataiyanakeni irirentzipaini, jatanake eejatzi Jesús roimoshirenkaitaga te roñaaganta rimananeekiini ikantaka. <sup>11</sup> Rithotyaakotakeri Judá-ite janta roimoshirenkaitaga, ikantaiyini: “¿Tsika risaikika atziri?” <sup>12</sup> Osheki atziripaini kenkithatakotakeriri Jesús. Eenitatsi kantayetatsiri: “Kameetha rini atziri.” Tzimatsi itsipa kantatsiri: “Te ikameethatzi, ramatawitakeri atziripaini.” <sup>13</sup> Iro kantzimaitacha, rimanashirekiini ikenkithatakoitziri Jesús, tema ithaawantatyaari Judá-ite.

<sup>14</sup> Okanta osamanitake roimoshirenkaita, kyaapaake Jesús tasorentsipankoki, riyotaantapai. <sup>15</sup> Riyokitziwentakeri Judá-ite, ikantaiyini: “¿Litaka riyotanetantari jirika, te ikyaaperoweta tsika riyotaantaitzi?” <sup>16</sup> Ari rakanake Jesús, ikantzi: “Okaatzi niyotaantziri te naaka yotashityaawone, iri yotakaanawo otyaantakenari. <sup>17</sup> Inkaate kowaperotairone ikowiri Pawa, ari riyotairo iri Pawa yotakaanawori okaatzi niyotaantziri, tema te naaka yotashiwaityaawone. <sup>18</sup> Tema ikaatzi yotaantzirori riyotashiwaitari, ikowashita impinkathataiteri. Iriima kowakowatzirori impinkathatairi otyaantakeriri, iri kenkithawaitzirori irooperori. Te itzipishirewainetzi irirori. <sup>19</sup> ¿Tema rosankenawetakemi pairani Moisés-ni Inintakaantaitanewo? Iro kantacha, te pimonkaataiyironi. ¿Litaka pasaryaantanari pitsitokena?” <sup>20</sup> Ari ikantaiyanakeni atziripaini: “¡Kamaari! ¿Litaka asariimiri ritsitokemi?” <sup>21</sup> Ikantzi Jesús: “Maawoini eerokapaini osheki piyokitziwentakero piñaakenaga nantakeri kiteesheriki rimakoryaantaitari. <sup>22</sup> Iro kantzimaitacha, inintakaantake Moisés-ni pitomeshaanitapiintante. (Okantawetaka kaari Moisés-ni poñaakaantyaawone jiroka, iri ira poñaakaanakawori acharineete tekera itzimiita Moisés-ni.) Iro opoñaantari pitomeshaanitapiintantzi eerokapaini, okantawetaka kiteesheriki rimakoryaantaitari. <sup>23</sup> Piñaakero, pimonkaantantyaawori eerokapaini Inintakaantaitanewo rosankenakeri Moisés-ni pitomeshaanitapiintantake kiteesheriki rimakoryaantaitari. ¿Litaka pikisaneentantanari naaka netsiyatakotakagairi maawoini iwathaki apaani atziri kiteesheriki rimakoryaantaitari? <sup>24</sup> Paamaawentya owapeyimotashitzimikari arika piyakowentante. Tampatzikashirepero pinkantya paminakoyetante.”

### *¿Iriitakema jirika Cristo?*

<sup>25</sup> Eenitatsi Jerusalén-satzi, osampitantanaintsiri, ikantzi: “¿Kaarima jirika rithotyaakoitziri ritsitokaiteri? <sup>26</sup> Jirinta risaikake, maawoini iñagaitziri ikenkithawaitzi. Tekaatzi akotashiterine. ¿Riyotatziiima jewaripaini imaperotatyaaga Cristo rinatzi jirika atziri? <sup>27</sup> Iri kantacha jirika, ayotaiyini tsika ipoñaawo. Irooma paata arika ripokake maperotzirori iita Cristo, tekaatzi yotatsine tsika ipoñaawo.” <sup>28</sup> Ikanta ikemake Jesús, risaikake riyotaantzi tasorentsipankoki, shintsineenka ikantanake: “¡Arima, piyotaiyanani eerokapaini tsika nopoñaawo! Iro kantacha

te naaka nintakaashityaawone nipoke, rotyaantanewo nini rawentaaperoitari. Tsika itzimi kaari piyotamatsite eerokapaini. <sup>29</sup> Niyotziri naaka tema ari nokaatziri, iriitake otyaantakenari.” <sup>30</sup> Ari ikowawetanaka raakaanakerime, iro kantacha tekaatsi akotashitanakerine, tema tekera imonkaapaitetaata. <sup>31</sup> Osheki kemisantakeriri Jesús, ikantaiyini: “Kaarikame jirika Cristo pokatsineme, eero ritasonkawentantayetzime jirika, piñaakero.”

### *Rotyaantake Fariseo otaiyerine Jesús*

<sup>32</sup> Ikanta Fariseo-paini ikemakero ikantayetakeri atziripaini ikenkithatakotziri Jesús, raapatziyanakari reeware Imperatasorentsitaarewo, rotyaantakeri kempoy-aawentzirori tasorentsipanko rotaiyakiteri. <sup>33</sup> Ikantanake Jesús: “Eero osaman-itzi nisaikimotanaimi eerokapaini, iro niyaatai risaikira otyaantakenari. <sup>34</sup> Osheki pinkowakowawetaina eerokapaini, eeromaita piñagaana, tema eero pitsipatana tsika nisaikapai naaka.” <sup>35</sup> Ari rosampitawakaanaka Judá-ite: “¿Tsika riyaamatsiteka jirika eero añaatari? ¿Riyaatatyema otsipaki nampitsi roiwawaayetakaga asheninkapaini Judá-ite, riyotaayetairi kaari asheninkata? <sup>36</sup> ¿Litaka ikantakotziri: ‘Pinkowakowawetaina, eeromaita piñagaana, tema eero pitsipatana tsika nisaikapai naaka?’ ”

### *Ñaa kañaanetakaantatsiri*

<sup>37</sup> Weyaantapaakawori kiteesheri ari roimoshirenkaperoitari. Ari ikatziyanakari Jesús, shintsiini ikanta ikenkithawaitanake, ikantzi: “Inkaate mereneentawaitatsine, rishentashiretaina naaka, rirawaitai. <sup>38</sup> Tema okantzi Osankenarentsiperoro: Inkaate kemisantainane naaka, oshiyawaityaawo oshiyashiretantairime ñaa kañaanetakaantatsiri.”

<sup>39</sup> Iri roshiyakaawentzi Jesús inkaate kemisantairine ari risaikashiretantaiyaari Tasorenkantsi. Okantawetaka tekera rotyaantaitzirriita Tasorenkantsi, tema Jesús tekera rowenonkashitaawoota rowaneenkawo.

### *Itzimpookanaka atziripaini*

<sup>40</sup> Tzimatsi atziri kemakeriri Jesús ikantakeri, ikantaiyanakeni: “Rimaperotatya jirika atziri Kamantantaneri rini.” <sup>41</sup> Tzimatsi itsipa kantanaintsiri: “Cristo rini jirika.” Iro kantacha eenitatsi itsipa kantatsiri: “Kaari, tema Cristo te ipoñaawo Galilea-ki. <sup>42</sup> Tema okantzi Osankenarentsiperoro: Icharine rinatzi pinkathari David-ni tsikarika intzime Cristo-tatsine, impoñeeyaawo Belén-ki, inampiki pairani David-ni.”

<sup>43</sup> Ari itzimawentawakaawentanakari atziripaini Jesús. <sup>44</sup> Tzimatsi kowawetanainchari raakaanterime, tekaatsimaita akotashiterine.

### *Te iñagaitzi oshiyaarine jirika ikenkithatzi*

<sup>45</sup> Ikanta saikawentzirori tasorentsipanko jatake risaikira Fariseo-paini itsipatakari reeware Imperatasorentsitaarewo, ari rosampitawairi, ikantziri: “¿Litaka kaari pamantakari?” <sup>46</sup> Ikantaiyini irirori: “¿Te iñagaitzi oshiyaarine jirika ikenkithatzi!” <sup>47</sup> Ikantaiyanakeni Fariseo: “¿Pimatzitakawoma eerokapaini pishinetaka ramatawitemi? <sup>48</sup> ¿Tzimatsima Itzinkami nokaataiyini kemisantakeriri jirika atziri? ¿Tzimatsima nokaatzirira naakapaini Fariseo kemisantakeriri? <sup>49</sup> Apatziro ikemisantamatsitake atziripaini kaari yotakoterone Inintakaantaitanewo, owasanketaarewo rinayete.” <sup>50</sup> Ikanta Nicodemo, Fariseo jatashitakeriri pairani iñeeri Jesús, ikantanake: <sup>51</sup> “Okantzi Inintakaantaitanewo, te ishinetaantsite ayakowentero atziri terika ankemeri aakapaini onkene ayotero oita rantakeri.” <sup>52</sup> Ari ikantaiyanakeni irirori: “¿Eerokama eejatzi Galilea-satzi? Piñaanaperotero Osankenarentsiperoro, ari piñaakero tekaatsi Kamantantaneri poñaachane Galilea-ki.”

### *Tsinane mayempiro*



<sup>53</sup> Ikanta riyaataiyaini ipankokipaini.

## 8

<sup>1</sup> Tonkaanake irirori Jesús otzishiki Olivo. <sup>2</sup> Okanta okiteeshetamanai, piyaawo tasorentsipankoki. Osheki atziri piyowentawaariri, saikapai Jesús riyotaapairi atziripaini. <sup>3</sup> Ikanta Yotzinkariite itsipayetakari Fariseo-paini ramakeniri apaani tsinane roonthagaitakari omayempitzi. Ikatziyapaakero niyankineki ipiyotaiyakanira. <sup>4</sup> Ikantapaakeri Jesús: “Yotaantanerí, jiroka tsinane roonthagaitakari omayempitzi. <sup>5</sup> Inintakaantziro Moisés-ni pairani ritsitokaitero antzirori jiroka. ¿Tsika pikantzika eeroka?” <sup>6</sup> Iroowa rosampitanariri jirikapaini ikowi rikompitakayaari, ontzimantyaari oita inkantakoteriri. Iri kantacha Jesús oiyotanaka rosankenawaitantawo rako kipatsi. <sup>7</sup> Eekero rosampitatziri, katziyanaka roiyotakaga, ikantanake: “Terika pikaariperoshiretaiyini eeroka, petyaawo pishemeero jiroka tsinane.” <sup>8</sup> Eejatzi roiyotanaa, rapiitanairo rosankenawaitzi kipatsiki. <sup>9</sup> Ikanta ikemaiyawakeroni jiroka, piyayetanaka ikenkithashiretanakero tsika ikantayeta iriroripaini. Iri etanakawo ripiyanaka antariitepaini. Ikanta risaikanake Jesús apitekeroini itsipatakawo tsinane ramaitakeri, <sup>10</sup> ikatziyanaawo roiyowetakaga, rosampitakero ikantziro: “Tsinané, ¿Tsika ikenaiyanakenika? ¿Tekaatsima jatakairone riyakowentemi?” <sup>11</sup> Akanakeri iroori okantziro: “Tekaatsi Pinkatharí.” Ikantanake Jesús: “Eejatzi naaka eero niyakowentzimi. Piyaatai iroñaaka, eero rapiitairo pinkaariperoshirewaitai.”

### *Jesús kiteesheenkatakotziriri isaawikisatziite*

<sup>12</sup> Ari rapiitanakero Jesús riyotairi atziripaini, ikantziro: “Naakatake kiteesheenkatakotziriri isaawikisatzipaini. Inkaate shentashiretainane naaka, aritake nonkiteesheenkatakoshiretai, oshiyawaityaawo te ikenawaitzi otsirenikitziro.” <sup>13</sup> Ikantaiyanakeni Fariseo-paini: “Powakowentawaitashitaka pikenkithatakowaita apaniroini, te opantawo pikenkithatakowaiwetaka.” <sup>14</sup> Ari rakanake Jesús: “Arime onkantawetyaame nokenkithatakowaiwetaka apaniroini, opantawo nokenkithatziro naaka. Tema niyotzi tsika nopoñaakawo, tsika janta niyaate. Temaita piyotaiyironi eerokapaini. <sup>15</sup> Iro pametashitapiintari eerokapaini poshiyakotari atziripaini riyakowentantzi. Irooma naaka tekaatsi niyakowente. <sup>16</sup> Arime niyakowentanteme naaka, okaatzi nokantayetziro imaperotatya, te apaniroini niyakowentante, ari nokaatziro Ashitanari otyaantakenari. <sup>17</sup> Jiroka okantzi Inintakaantaitakemiri eerokapaini:

Arika oshiyawakaiyaani inkantayeteri apite thawetakotantaneri, imaperotatya okaatzi ikenkithatziro.

<sup>18</sup> Naakatake thawetakotaincha. Eejatzi Ashitanari otyaantakenari irijatzi itsipa thawetakotakenari. Apite nokaatzi nothawetakotaka.” <sup>19</sup> Ari rosampitanakeri: “¿Tsika risaikika Ashitzimiri?” Ikantzi Jesús: “Eerokapaini te piyotaiyenani naaka, ari pikantziro eejatzi Ashitanari. Arika piyotename naaka, ari piyotakerime eejatzi Ashitanari.” <sup>20</sup> Ari riyotaantake Jesús tasorentsipankoki tsika rowaitapiintziro koriki rashitakaitariri Pawa. Iro kantzimaitacha tekaatsi aakaanterine, tema tekeri imonkaataata.

### *Tsika niyaatai naaka, eero pareetaawo eerokapaini*

<sup>21</sup> Rapiitanakero Jesús ikantzi: “Arika niyaatai, osheki pithotyaakowetaina eerokapaini, iro kantzimaitacha ari pinkamakoyetairo piyaariperonka. Tsika niyaatai naaka, eero pareetaawo eerokapaini.” <sup>22</sup> Ari ikantaiyanakeni Judá-ite: “¿Rishinewaitatyaama jirika. Ikantantaritya eero areeta aakapaini tsika inkenai irirori?” <sup>23</sup> Ikantanake Jesús: “Isaawikisatzi pinatzi eerokapaini, irooma naaka jenokisatzi nini. Arira pinampitawo eerokapaini kipatsiki, irooma naaka te nonampitawo. <sup>24</sup> Iroowa nokantanzimiri: ‘Ari pinkamakoyetairo piyaariperonka. Tema eerorika pikemisantairo nothawetakowetakaga noitaga naaka, irootake pinkamakotantaiyaawori piyaariperonka.’ ” <sup>25</sup> Irojatzi

rosampitantanakariri: “¿Piitakama eeroka?” Ari rakanakeri Jesús: “Nokamantakemi ketziroini. <sup>26</sup> Eenitatsi osheki nonkantemiri, ari niyakowentakemi eejatzi. Tema okaatzi ikenkithawaitziri otyaantakenari irooperori inatzi. Okaatzi nokamantakemiri eeroka isaawikisatzipaini, irootake ikamantakenari irirori.” <sup>27</sup> Iri kantacha jirikapaini kemakeriri Jesús, te ikemathatawakeri ikenkithatakotziri Ashitairi. <sup>28</sup> Ikantanake Jesús: “Arika pinkentakotakaantakeri Itomi Atziri, aripaite piyote naakatake. Te naaka antashiwaityaawone nokowiri. Apatziro niyotaantziro okaatzi riyotaanari Ashitanari. <sup>29</sup> Tema itzimi otyaantakenari ari itsipashiretana naaka. Te rookanawentana Ashitanari, tema nantapiintakeniri okaatzi kameethatzimotziriri.” <sup>30</sup> Ikanta ikenkithatakoyetakerowa Jesús jiroka, osheki kemisantanakeriri.

### *Irooperori ini risaikakaashiwaitai*

<sup>31</sup> Ipoña Jesús ikantanakeri Judá-ite ikaatzi kemisantanakeriri: “Arika poisokerotanakyaawo niñaane, eerokatake iriiperori niyotaanewo. <sup>32</sup> Ari piyotairo irooperori, iro saikakaashiwaitaimine.” <sup>33</sup> Rakaiyanakeni jirikapaini: “Icharineete Abraham-ni ninayetzi naakapaini. Tekaatsi imperawaitenane. ¿Iitaka pikantantanari eeroka: ‘Ari pisaikashiwaitaiya?’ ”

<sup>34</sup> Ikantanake Jesús: “Ikaatzi antapiintzirori kaariperori, oshiyawaitakawo imperawaitatyeyearime. Imaperotatya. <sup>35</sup> Apaani imperataarewo eepichokiini isheninkaitari, iriima itomintaitari rashi rowaatyeero isheninkaityaari. <sup>36</sup> Tema arika risaikakaashiwaitaimi Itomintaitari, ari pisaikashiperowaitaiya. <sup>37</sup> Niyotaiyimini icharineete Abraham-ni pini. Iro kanzimaitacha pikowaiyakeni pitsitokena, tema te inimotemi niñaaneyetari. <sup>38</sup> Iro nokenkithatakoyetzi naaka okaatzi roñaaganari Ashitanari. Irooma eerokapaini pantashitawo pikemakotziriri ashitzimiri eeroka.”

### *Iri ashitariri Kamaari*

<sup>39</sup> Ari rakaiyanakeni iriroripaini: “¡Iri Abraham-ni aitziri Ashitanari, iriitake nocharineete!” Ikantanake Jesús: “Eerokame charinetyaarineme Abraham-ni, ari pantakerome okaatzi rantayetakeri irirori. <sup>40</sup> Iro kantacha, okantawetaka nokenkithatakemiro irooperori okaatzi riyotakaakenari Pawa, pikowaiyakeni eerokapaini pitsitokena. ¡Iroowa kaari rantzi pairani Abraham-ni! <sup>41</sup> Irojatzu pantapiintakeri rantakeri pairani picharinepaini.” Ari ikantaiyanakeni iriroripaini: “¿Te naakapaini rowaiyane thainkatasorentsiwaitaneri. Apatziro ikanta Ashitanari, iriitake Pawa!”

\* <sup>42</sup> Ari rakanakeri Jesús: “Kyaaryoome rashitemime Pawa, ari pinintakename, tema Pawaki nopoñaakawowanki naaka, piñaakena jaka. Te naaka pokashiwaitachane nonintakaanekiini, Pawa otyaantakenari. <sup>43</sup> ¿Iitaka kaari pikemathatantana eerokapaini? Iro kantakaawori te pikowaiyini pinkemisantero niñaane. <sup>44</sup> Iriira ashitzimiri Kamaari, pantapiintakeniri ikowiri. Tema ari rashi rowiro Kamaari owakera etantanakari pairani, rowamaashiretantzi. Thairi rini, te riñaawaitziro irooperori. Arika inkowe ramatawitante, riñaawaitziro thaiyaantsi. Antariite thairi. <sup>45</sup> Irooma naaka niñaawaitziro irooperori ñaantsi, temaita pikemisantaiyanani eerokapaini. <sup>46</sup> ¿Eenitatsima jaka pikaatayakeni yotzirori ikantzi: ‘Kaariperoshireri rini Jesús?’ Tema irooperori okaatzi nokenkithawaitziri ¿iitaka kaari pikemisantantana? <sup>47</sup> Ikaatzi rashitari Pawa, ikemisantziro riñaane. Irooma eerokapaini te rashitzimi Pawa, te pikowi pinkemisantaiyeni.”

### *Itzimitaka Cristo*

<sup>48</sup> Ikanta Judá-ite ikantanakeri Jesús: “Imaperotya nokantaiyakemini Samaria-satzi pini, tema Kamaari pini.” <sup>49</sup> Rakanake Jesús: “Te nonkamaarite, nopinkathatziri naaka

\* **8:41** Ikantakoitziri jaka “thainkatasorentsiwaitaneri”, irijatzu ikantaitziri mayempiriite. Tema roshiyakaawentapiintakeri pairani Judá-ite, te ikinatari Pawa, rantayetziro kaariperori.

Ashitanari. Irooma eerokapaini, te pimpinkathataiyenani. <sup>50</sup>Te naaka kowashitachane pimpinkathatena, tzimatsi itsipa kowatsiri impinkathaitena, iriitake yakowentantatsine. <sup>51</sup>Inkaate kemisantairone niñaane, eero ikaamaneyetai. Imaperotatya.” <sup>52</sup>Ikantaiyanakeni Judá-ite: “Ari niyoperotaiyini imapero pikamaaritzzi. Tema kamake Abraham-ni, ari ikantakari Kamantantaneriite, kamayetake maawoini. Iro pikantantari eeroka: ‘Inkaaterika kemisantairone niñaane, eero ikaamaneyetai.’ <sup>53</sup>¿Panairima eeroka nocharineni Abraham? Kamake irirori, ari ikantayetakari Kamantantaneriite eejatzi. ¿Tsikama piimatsitaka eeroka?” <sup>54</sup>Rakanake Jesús: “Naakame kowashitachane impinkathaitename, tekaatsi pantenane. Iri kantacha, iri Ashitanari pinkatharitakaanari. Irijatzi pikantawetapiintari eerokapaini ‘Nowawane.’ <sup>55</sup>Tetzimaita piyotaiyirini eerokapaini. Irooma naaka noñiiri. Arikame nonkante ‘te noñiiri’, thairi nini noshiyakotakemiro eerokapaini. Iro kantzimaitacha imapero noñiiri. Nokemisantziro riñaane. <sup>56</sup>Pairani Abraham-ni, picharineyetanakari eerokapaini, ikimoshiretake iñeero nipokapaitete. Aritake iñaakena ketziroini, antawoite ikimoshiretake.” <sup>57</sup>Ikanta Judá-ite ikantanakeri Jesús: “Te otzimi eeroka 50 posarentsite. ¿lita pikantantari piñiiri Abraham-ni?” <sup>58</sup>Ari rakanake Jesús: “Tekera itzimiita Abraham-ni. ‘Naakatzitaka jirika naakatapiintatsiri.’ Imaperotatya.” † <sup>59</sup>Ikanta jirikapaini raawetanaka mapi ikowi rishemeerime. Iri kantzimaitacha Jesús, rimanapithatanakari. Shitowanake tasorentsipankoki.

## 9

### *Retsiyatakotakagairi Jesús mawityaakiri*

<sup>1</sup>Ikanta ikenayetzi Jesús, iñaake mawityaakiri, rashi rowatziro owakera itzimapaake. <sup>2</sup>Ikanta riyotaanewo rosampitakeri, ikantziri: “Rabí, ¿litaka kaari ikowichaataanta owakera itzimake jirika atziri? ¿Irooma kantakaantzirori iyaariperonka ipaapate? ¿Irooma kantakaantzirori iyaariperonka irirori?” <sup>3</sup>Rakanake Jesús, ikantzi: “Te iro kantakaanterone iyaariperonka irirori, te okantakaantziro eejatzi iyaariperonka ipaapate. Iroowa opoñaantari jiroka, iñaantaityaawori ishintsinka Pawa. <sup>4</sup>Eeniro okiteeshetzi, ontzimatyte antero rantawaire otyaantakenari. Tema arika ontsirentanake, tekaatsi kanterone rantawaite. <sup>5</sup>Eeniro nisaiki naaka jaka kipatsiki, naakatake kiteesheenkatakotziriri isaawikisatziite.” <sup>6</sup>Ikaatakero ikenkithawaitake Jesús, reewatanake kipatsiki, ramirokake eepichokiini kipatsipitha, ritziryookitakeri mawityaakiri. <sup>7</sup>Riñaanatakeri ikantziri: “Piyaate pinkiwaakitya owaankanaataga jitchari Siloé.” Jatanake mawityaakiri, ikiwaakitapaaka. Ikanta ripiyapaa, kantanaa raminanai kameethaini. \* <sup>8</sup>Ikanta isheninkapaini, ikaatzi ñaapiintziriri ikowakotantzi impashitaityaari, rosampitawakaiyani, ikantzi: “¿Kaarima jirika kowapiintatsiri impashitaityaari?” <sup>9</sup>Tzimatsi kantatsiri: “Iriitake.” Itsipa kantatsiri: “Kaari, iri oshiyawetariri.” Iro kantzimaitacha, ikantzi irirori: “Naakatake.” <sup>10</sup>Rosampitaitanakeri: “¿Tsika pikantaaka pikowichaataantaari iroñaaka?” <sup>11</sup>Ikantzi irirori: “Jirinta atziri jitchari Jesús, iriitake aminakagaanari, eenitatsi ritziritantakenari nokiki, ikantakena: ‘Piyaate owaankanaataga Siloé. Pinkiwaakitya.’ Nokanta niyaatanake, ari nokiwaakitapaaka, koñaatanai namine.” <sup>12</sup>Ikantziri: “¿Tsika iroñaaka jirika atziri?” Rakanake irirori: “Te niyotzi.”

### *Fariseo-paini rosampitziri mawityaakiri kowichaataatsiri*

† **8:58** Raakotapiintaka iwairo Jesús ikantzi: “Naakatzitaka”, ari oshiyakawo ikenkithawaitake Pawa pairani, riñaanantakariri Moisés-ni. Tema pairani Moisés-ni rosampitakeri Pawa, ikantziri: “¿Tsika piitaka?” Ari rakanake Pawa, ikantzi: “Naakatzitaka.” Arira rowaitziri eejatzi Pawa, ikantaitziri “Naakatzitaka.” Iro riyotantaiyarini Judá-ite okaatzi ikantakeri Jesús, ikowatzi rimonkaatyaari Pawa. \* **9:7** Jiroka jitchari “Siloé”, irojatzzi iyeetziri: “Otyaantaawo.”

<sup>13</sup> Ari ragaitanakeri mawityaakiri risaikira Fariseo-paini. <sup>14</sup> Tema kiteesheri rimakoryaantaitari ini, ritziryookitantakariri Jesús mawityaakitatsiri, aminai kameethaini. <sup>15</sup> Rosampitakeri Fariseo-paini tsika okanta raminantaari kameethaini. Ikantanake irirori: “Ritziritantakenawo nokiki eepichokiini kipatsi, irojatzi nokiwaakitantakariri. Aminaana iroñaaka kameethaini.” <sup>16</sup> Ikantzi Fariseo: “Itzimi antakerori jiroka kaari rashi Pawa, tema te ipinkathatziro kiteesheri rimakoryaantaitari.” Iro kantacha ikantaiyini itsipa: “¿Kaariperoshireri rinatyeeme, eerome rantziro jiroka?” Te raapatziyawakaawo ikantaiyakerini Fariseo-paini. <sup>17</sup> Ari rapiitakeri rosampitziri mawityaakiwetachari: “¿Litaka pikenkithashiretari eeroka, itaka aminakagaimiri kameethaini?” Ikantzi irirori: “Kamantantaneri rini.”

<sup>18</sup> Aminawaitai iroñaaka kameethaini, te ikemisantziri Judá-ite mawityaakiperori rinaweta. Irojatzi ikaimantakariri ipaapate, <sup>19</sup> rosampitawakeri, ikantziri: “¿Iriima pitomi jirika? Pinkantena rashi rowiro imawityaakitzi owakera itzimapaake. ¿Tsika okantaka raminantaari iroñaaka kameethaini?” <sup>20</sup> Rakanake ashitariri: “Niyotaiyini iriitake nowaiyanewo, ari rashi rowiro imawityaakitzi owakera itzimapaake. <sup>21</sup> Iro kantacha te niyote tsika okanta raminantaari kameethaini iroñaaka, te niyote eejatzi iita aminakagairiri kameethaini. Posampiteri irirori, antari rinatzi, iriitake kamantemine.” <sup>22</sup> Iro ikantantari ashitariri tema ithaawatzi, ikantaiyakeni Judá-ite: “Tzimatsirika kantatsine Cristo rini jirika Jesús, eero nishinetairi inkyagai ipiyotaitapiintaga.” <sup>23</sup> Iro ikantantari ashitariri: “Posampiteri irirori, tema antari rinatzi notomi.”

<sup>24</sup> Rapiitakero Judá-ite ikaimairi mawityaakiwetachari, ikantziri: “Pimpinkathateri Pawa, pinkamantena kameethaini, eero pipinkathawaitashitari jirika atziri, kaariperoshireri rini.” <sup>25</sup> Ikantanake irirori: “Te niyote naaka kaariperoshirerira rini. Apatziro niyotzi mawityaakiri ninaweta. Iro kantacha aminaana kameethaini.” <sup>26</sup> Rapiitakeri rosampitziri: “¿Tsika ikantakemika? ¿Litaka rantakeri raminakaantaimiri?” <sup>27</sup> Ari rakanairi: “Nokantawetakemi, temaita pikemisantziri. ¿Litaka pikowantari napiitemiro? ¿Pikowatziima pinkemisanteri eerokapaini?” <sup>28</sup> Ari ikaweyawaitanakeri, ikantziri: “Aamaaka pikemisantziririka eeroka jirika atziri, irooma naakapaini nokemisantziro Inintakaantziri Moisés-ni. <sup>29</sup> Niyotzi naakapaini riñaanatakeri Pawa pairani Moisés-ni. Iriima jirika, tekaatsi yoterine tsika ipoñaaka.” <sup>30</sup> Ari rakanake atziri, ikantzi: “¿Tsikama okantatyaaka jiroka! Raminakagaana naaka kameethaini, te piyoteri eerokapaini tsika ipoñaaka. <sup>31</sup> Ayotaiyini maawoini te ikemiri Pawa kaariperoshireri. Apatziro ikemiro riwetharyaanewo tsika itzimi pinkathatziiriri, ikaatzi antanairori ikowakairiri. <sup>32</sup> Tekaaitsi ankemakowentapiinte tzimatsi aminakagairine mawityaakitatsiri owakera itzimapaake. <sup>33</sup> Eerome ipoñaakawo jirika atziri Pawakinta, eero rantzirome jiroka.” <sup>34</sup> Ari ikantanakeri: “Piyaariperonka pitzimakaake eeroka. ¿Pikowima piyotaina naaka iroñaaka?” Romishitowakaantairi.

### *Oshiyariri Mawityaakiri*

<sup>35</sup> Yotake Jesús romishitowakaantaitakeri mawityaakiwetachari. Ikanta iñagairi paata, rosampitairi: “¿Pikemisantzirimaa eeroka Itomi Atziri?” <sup>36</sup> Ikantanakeri irirori: “Pinkatharí, pookotainari tsika itzimi, onkene nonkemisanteri.” <sup>37</sup> Ikantanakeri Jesús: “Tema piñaakeri, naakatake pikenkithawaitakaakerira.” <sup>38</sup> Ikanta jirika atziri rotziwerowashitanakari Jesús ipinkathatanakeri, ikantziri: “Nokemisantzimi Pinkatharí.” <sup>39</sup> Ikantzi Jesús: “Nipokake naaka kipatsiki niyakowentantai, iroowa inkowichaataantaiyaari mawityaakiwetachari. Iriima ikaatzi aminawetachari, mawityaaki inkantaiya.” <sup>40</sup> Tzimatsi Fariseo tsipatakariri Jesús, ikemikeri ikantake, rosampitanakeri: “¿Poshiyakaantatyaanarima naakapaini mawityaakiri?” <sup>41</sup> Ikantanake Jesús: “Imaperotatyeyyaame poshiyakari mawityaakitatsiri eerokapaini, tekaatsi

yakowentemirone piyaariperonka. Irooma pikantaiyinira te poshiyari mawityaakiri, irootake piñaantaiyaawori riyakowentaitemiro pipiyathatakenaga.”

## 10

### *Roshiyakaawentaitziro owejatanto*

<sup>1</sup> Ari ikantanake Jesús: “Inkaaterika kaari kyaatsine imoontaitzirowa owejatanto, ranonkashitakyaarika inkyaantyaari, koshintzi rini, kaariperori rini. Imaperotatya. <sup>2</sup> Iriima kyaatsiri imoontaitzirowa, iriitake kempoyaapiintziriri oweja. <sup>3</sup> Iriirika ashitaryaakerone kempoyiirori ashitakowontsi, irojatzi inkyaantapaakya kempoyiiriri oweja, ripairyaapairi inkaimayetapaakeri, ari riyowaantetawairi. Iri omishitowairine kempoyaapiintakeriri oweja. <sup>4</sup> Arika romishitowakeri maawoini, iri jewaterine kempoyiiriri, royaatzimaityaari oweja, tema riyowaantetziri iri kempoyiiriri. <sup>5</sup> Iro kantacha te royaatziri kaari iñaapiintzi, osheki rishiyapithatari, tema te riyowaantetziri.” <sup>6</sup> Ikantakera Jesús roshiyakaawentziniri, iro kantacha te ikemathatawakero jirikapaini oita ikantziri.

### *Roshiyari Jesús kameethari kempoyaantaneri*

<sup>7</sup> Ari rapiitanakero Jesús ikantziri: “Naakatake oshiyawori imoontaitzirowa owejatanto. Imaperotatya. <sup>8</sup> Ikaatzi kaariperoriite etakawori ketziroini tekera nipokita naaka, roshiyashitakari koshintzi. Irootake kaari ikemisantantaiyarini oweja. <sup>9</sup> Naakatake oshiyawori imoontaitziro owejatanto. Ikaatzira kyagaatsine noshiyakawowa imoontaitziro owejatanto, ari rawisakoshiretai. Ari roshiyakotaiyaari oweja ripiyapiyata ikyaapiintzira, rishitowapiintzi eejatzi. Te okoityimotari rowanawo. <sup>10</sup> Iriima koshintzi apatziro ripoki inkoshite, ritsitokante, rithonkante. Irooma naaka nipokake nañaakaashireperotantai. <sup>11</sup> Naaka oshiyari kameethari kempoyiiriri oweja. Apaani kameethari kempoyiiriri oweja, rishinewentari. <sup>12</sup> Ikaatzi ripinaiziri ikempoyiirira ashinentsi oweja, arika iñaawake owaminthatariri, rookanawentziri, ari rowagaantaitya piratsi rishiyanagerika kempoyiiriri, pookayetai itsipa piratsi. <sup>13</sup> Iro rishiyantari kempoyiiriri, ikowashita ripinaiteri. Te inkowaperote inkempoyeeri oweja. <sup>14</sup> Naaka oshiyari kameethari kempoyiiriri oweja. Niyotziri nowejate. Riyotzitana eejatzi irirori. <sup>15</sup> Ikantanaga riyoperotana naaka Ashitanari, ari nokantzitari eejatzi naaka niyoperotziri irirori. Nishinewentari naaka nowejawte. <sup>16</sup> Eenitatsi itsipa nowejate kaari saikatsine jaka. Ontzimatyete namayetairi eejatzi. Aritake inkemisantaina irirori. Apaani inkantya impiyotaiya. Apaani inkantaiya kempoyagairine. <sup>17</sup> Retakotana naaka Ashitanari, iro nishinetantyaawori nañaamento onkene nañagai eejatzi. <sup>18</sup> Tekaatsi shintsineentenane, naaka shinetashitacha. Oshekitzimotana noshintsinka nishinetantari, iroowa nañaantaiyaari eejatzi. Iro ikowakaakenari Ashitanari nantero.”

<sup>19</sup> Ikanta ikemaiyawakeroni Judá-ite jiroka ñaantsi, rapiitanakero itzimawentawakaanaka. <sup>20</sup> Tzimatsi osheki kantanaintsiri: “¿Litaka pikemisantantariri? Ikamaaritatziri, iroowa ishinkiwentantakariri.” <sup>21</sup> Iro kantacha eenitatsi itsipa kantatsiri: “Tekaatsi kamaari materone inkenkithawaitero jiroka ñaantsi. ¿Kantachama kamaari raminakagairi mawityaakiri?”

### *Ikisaneentanakeri Judá-ite Jesús*

<sup>22</sup> Okanta okyaawontsitapai. Ari roimoshirenkaitziro tasorentsipanko janta Jerusalén-ki. <sup>23</sup> Ari risaikitakari Jesús tasorentsipankoki, ranashiwaitaga awisatapishitzira iitaitziro “Salomón-tapishi.” <sup>24</sup> Ipiyowentapaakari Judá-ite, rosampitakeri: “¿Tsikapaiteka pipakairo pikompitakaashiretena? Eerokarika Cristo, janjaatya poñaayenawo.” <sup>25</sup> Rakanake Jesús ikantzi: “Nokamantzitakemira ketziroini, temaita pikemisantana. Okaatzi imatakaanari ishintsinka Ashitanari,



ooñaawontawaitakero kameethaini. <sup>26</sup> Iro kantacha eerokapaini te pikemisantaiyini, te poshiyakaanta eerokame noweiate. <sup>27</sup> Ikaatzi oshiyakaantachari noweiate riyowaantetana, niyotzitari eejatzi naaka. Royaatanana iriroripaini. <sup>28</sup> Naakatake añaakaayetairine. Eero ipeyawaita, tekaatsi aapithatenarine. <sup>29</sup> Ikaatzi rashitakaanari Ashitanari, tekaatsi aapithatenarine, iri matzirori rantaritzii anaakoperotantatsiri maawoini. <sup>30</sup> Itsipashiretana Ashitanari, oshiyawaitakawo apaanime nonkantya.”

<sup>31</sup> Ikanta Judá-ite raawetanaka mapi ikowi rishemeeri, <sup>32</sup> iri kantacha Jesús, ikantanakeri: “Iro ishintsinka Ashitanari antakaanawori kameethayetatsiri piñaakoyetakenari eeroka. ¿Tzimatsima apaani piñaakeri pitsitokawentantenari?” <sup>33</sup> Ari ikantaiyanakeni Judá-ite: “Te iro nishemyaawentemi kameethatatsiri, irootake nishemyaawentemiri pithainkatasorentsitakerira Pawa. Tekaatzi piimatsitya eeroka, atziri pini, poshiyakaantashiwaitaka Pawame pinatyé.” <sup>34</sup> Ari ikantanake Jesús: “Jiroka osankenata Inintakaanaitanewo, Naaka kantatsi: ‘Pawaite pinaiyini eerokapaini.’

<sup>35</sup> Ayotaiyironi Osankenarentsiperi, eero okanta oipiyawaantetero. Iri Pawa jitakeri atziripaini ‘Pawaitera’ riyotakaayetairi riñaane. <sup>36</sup> ¿Iitaka pikishimatantanari eerokapaini pikantaiyini nithainkatasorentsitake nokantake naaka Itomi Pawa? Naakaga rookotake, rotyaantakena nipoke kipatsiki. <sup>37</sup> Eero nantzirome naaka rantziri Ashitanari, eero pikemisantaiyini. <sup>38</sup> Iro kantacha nantzitakawowa. Onkantawetya eero pikemisantana naaka, iro pinkemisante okaatzi nitasonkawentantayetake, iro piyoperotantyaari niwithagaari naaka Ashitanari, riwithagaana eejatzi irirori.” <sup>39</sup> Ari ikowawetanaka raakaanterime eejatzi, iri kantacha Jesús rishiyapithatanakari.

<sup>40</sup> Piyanaawo Jesús katonko ñaa Jordán. Ari risaikapai tsika romitsitsiyaatantzi pairani Juan-ni. <sup>41</sup> Osheki atziri jatashitakeriri iñeeri Jesús. Ikantaiyini: “Ikantawetaka Juan-ni te ritasonkawentantzi irirori, iro kantacha okaatzi ikenkithatakotakeriri jirika atziri irooperori ini.” <sup>42</sup> Osheki kemisantanageriri Jesús janta.

## 11

### *Ikamantakari Lázaro*

<sup>1</sup> Eenitatsi apaani mantsiyari atziri jitachari Lázaro, Betania-satzi rini, ari onampitawori janta María eejatzi irento Marta. <sup>2</sup> (Jiroka María, iritsiro Lázaro, irootake saitantakariri kasankari iitziki Awinkatharite opoña oshetantanaari oishi.) <sup>3</sup> Okanta apite iritsiro Lázaro, okaimakaanakeri Jesús, okantake: “Pinkatharí, imantsiyatatziira pitsipaminthare.” <sup>4</sup> Ikanta ikemawake Jesús, ikantzi: “Jiroka mantsiyarentsi te owamaantzi, arira iñagaitero ishintsinka Pawa, ari iñagaitero eejatzi ishintsinka Itomi.”

<sup>5</sup> Ikantawetaka Jesús osheki retakotawo Marta, eejatzi irento, eejatzi Lázaro, <sup>6</sup> ikemawetaka ikantaitakeri imantsiyatatzi, eekero risaikawaitanaatzi okaatzi apite kiteesheri. <sup>7</sup> Irojatzii ikantantanaariri riyotaanewo: “Jame apiyai Judea-ki.” <sup>8</sup> Ari ikantaiyanakeni riyotaanewo: “Rabí, ikowaiyatziinira Judá-ite ritsitokemi. ¿Eejatzi pikowanai pipiyanai janta?” <sup>9</sup> Ikantanake Jesús: “¿Tema osamani okanta kiteesheri okaatzi 12 hora? Ikaatzi anashitachari kiteesheriki, te rontziwawaita, tema iñaakeri kiteesheenkari jaka kipatsiki. \* <sup>10</sup> Iriima anashitachari tsireniriki, rontziwawaita, tema okoityaatya janta kiteesheenkari.” <sup>11</sup> Eekero ikantanakitzi Jesús: “Makoryaake

\* **11:9** Oshiyakaawentachari jaka “12 hora”, rañaamentowa ini Jesús, iro oshiyakawori apaani kiteesheri. Tema ikenkithawaitakero Jesús jiroka, riyotzi tekera imonkaapaitetaata rowamaantaityaariri. Jiroka ikantakeri: “Pinkenkithashiretakotero oita awisatsiri arika anashitya kiteesheriki. Tema arika anashitya kiteesheriki, kameetha okoñaatzi, eero ontziwawaita, añaairo eejatzi tsika ankene eero aminaashiwaita tsikarika aate. Irooma anashityaarika tsireniriki, osheki ontziwawaitya, aminaashitya tsikarika aate. Iro aatantyaari iroñaaka tsika inintakairo Pawa, eero aminaashiwaita aate. Eerorika aatzi tsikarika ikowakairo Pawa, ari aminaashiwaitakya tsika aate. Tema iri Pawa oshiyawori iroñaaka kiteesheri, tsikarika aate, eero aminashiwaita.”

atsipaminthare Lázaro, iro kantacha ontzimatye niyaate nowiriintairi.” <sup>12</sup> Ari ikan-taiyanakeni riyotaanewo: “Pinkathari, aamaa iro retsiyatakotai, tema rimakoryaatzi.” <sup>13</sup> Okaatzi ikantawetariri Jesús riyotaanewo rimakoryaatzi, roshiyakaatzi riyotaanewo iro ikenkithatakotzi Jesús makoryagaantsi. <sup>14</sup> Irojatzi rooñaawontantanakawori, ikan-tanakeri: “Kamakera Lázaro. <sup>15</sup> Owanaa nokimoshiretake te nisaiki janta, tema iro pinkemisantaperotantyaari, jame aate amineri.” <sup>16</sup> Ikanta Tomás iiyeetziri “Tsipari”, ikantanakeri ikaataiyinira: “Jame oyaatanakeri, aminawakero eero rowamagaitai aaka.” †

### *Iri Jesús, owiriintantaneri, añaakaantaneri*

<sup>17</sup> Ikanta rareetzimatapaaka Jesús, ikemapaake tzimakotake Lázaro 4 kiteesheri ikitai-tantakariri. <sup>18</sup> Te intainaperote Betania isaikira Jerusalén, ‡ <sup>19</sup> iroowa riyatashitantakawori Judá-ite jiroka Marta eejatzi María, roimoshirenkantyaawori ikamakera iyaariri. <sup>20</sup> Okanta iyotake Marta iro rareetzimatya Jesús, jatanake itonkyotyaari. Iroowa saikanaintsiri María pankotsiki. <sup>21</sup> Okantawakeri Jesús Marta: “Pinkatharí, arime pisaikeme eeroka jaka, eero ikamime aarini. <sup>22</sup> Iro kantacha niyotzi naaka arika pinkowakoteri Pawa oita rantemiri, ari rimatakemiro.” <sup>23</sup> Ari rakanakero Jesús: “Ar-itake rañagai piyaariri.” <sup>24</sup> Okantzi Marta: “Niyotzi aritake impiriintai paata weyaan-tapaakyaawone kiteesheri impiriintantaiyaari kamayetatsiri.” <sup>25</sup> Ikantanakero Jesús: “Naakatake owiriintantatsiri, naakatake añaakaantananeru. Tzimatsirika kemisan-tainane naaka, onkantawetya inkame, ari rañagai. <sup>26</sup> Ikaatzi añaayetatsiri iroñaaka, ikaatzi kemisantainane, eero ikaamaneyetai. ¿Pikemisantziroma jiroka?” <sup>27</sup> Ari okantziri iroori: “Arima Pinkathari, nokemisantzimi naaka eerokatake Cristo Itomi Pawa, ikowakaakerira ripoke jaka kipatsiki.”

### *Riraapaaka Jesús ikitaitzirira Lázaro*

<sup>28</sup> Ikaatakero Jesús ikantayetakero jiroka, jatanake Marta okaimiro irento María, okamantapaakero, okantziro: “Areetapaaka yotaantaneri, ikaimimi.” <sup>29</sup> Okanta okemawake María, katziyanaka, pokanake oñeeri Jesús. <sup>30</sup> Tekera rareetyaata Jesús nampitsiki, irojatzi risaikake itonkyotawakarira Marta. <sup>31</sup> Okanta iñagaitakero María okatziyanaka ishiyanaka, jirikapaini Judá-ite ikaatzi tsipatakawori opankoki, roimoshirenkiro, royaataiyanakeroni roshiyakaatziro iraawaitatyeeya kitataarewoki. <sup>32</sup> Okanta areetapaaka María risaikakera Jesús, otziwerowashitapaakari okantziri: “Pinkatharí, arime pisaikeme eeroka jaka, eero ikamime aari.” <sup>33</sup> Ikantanakero Jesús, iñaakerowa María irayimotapaakari, ari ikantapaakari eejatzi Judá-ite oyaatapaakerori, antawoite rowashiretanaka, okatsitzimoshiretanakeri, <sup>34</sup> rosampitanakero: “¿Tsika-jaantaka pikitakerika?” Ari ikantaitanakeri: “Pipokeeta Pinkatharí, piñeeri.” <sup>35</sup> Ari riraapaakari irirori Jesús. <sup>36</sup> Irojatzi ikantantanakari Judá-ite: “¿Pamine antawoite retakotari!” <sup>37</sup> Iro kantacha tzimatsi itsipa kantanaintsiri: “Iriiwetaka jirika etsiyatakotakagairiri mawityaakiri, ¿kaari rantantawo eero ikamanta Lázaro?”

### *Rañaantaari Lázaro*

<sup>38</sup> Apiitanaka Jesús okatsitzimoshiretanakeri, riyatashitanakeri okaakiini kitataarewoki. Omoonaki ini, mapi rashitakotantaitakari. <sup>39</sup> Ikantanake Jesús: “Potainkero mapi.” Ari okantanake Marta iritsiro kamaintsiri: “Pinkatharí, aama shitzitake, tema tzimake 4 kiteesheri ikamantakari.” <sup>40</sup> Rakanakero Jesús: “¿Tema nokantakemi, pinkemisantenarika, arira piñaakero ishintsinka Pawa?” <sup>41</sup> Rotainkaitakero mapi. Aminanake Jesús inkiteki, ikantanake: “Ashitanari, niwethariimi eeroka, tema pikemana.

† 11:16 Ikantakoitziri jaka “Tsipari”, irijatzi itaitziri pairani “Dídimo”. ‡ 11:18 Kantakotachari jaka “te intainaperote”, iro oshiyawori ikantaitziri iroñaaka 3 kilómetro, irojatzi ikantaitziri pairani 15 estadio.

<sup>42</sup> Niyotzi ari pikantapiintatya pikemana. Iroowa nokantantari inkemantyaari jirikapaini atziri saikaintsiri jaka, iroowa inkemisantantyaari eerokatake otyaantakenari.”

<sup>43</sup> Okanta okaatapaake ikenkithawaitakero jiroka, ikaimanakeri: “¡Lázaro, pishitowe!”

<sup>44</sup> Shitowapai kaminkari, roosotakawo manthakintsi rakoki eejatzi iitziki, irojatzi iponawootakawo rankowitantaitawakariri ketziroini. Ikantanake Jesús: “Poosoryaakoteri, riyaaaita.”

### *Ikamantawakaita ritsitokakaantaiteri Jesús*

(Mt. 26.1-5; Mr. 14.1-2; Lc. 22.1-2)

<sup>45</sup> Iroowa ikemisantantanakari osheki Judá-ite ikaatzi jatanaintsiri itsipatawo María, ikaatzi ñaakerori rantakeri Jesús. <sup>46</sup> Iro kantacha eenitatsi jatashitanakeriri Fariseo-paini. Ikamantapaakeri okaatzi rantakeri Jesús. <sup>47</sup> Ikanta Fariseo-paini itsipatakari reeware Imperatasorentsitaarewo, ipiyotakeri Itzinkamipaini, ikantaiyini: “¿Tsikama ankantyaaka? Jirika atziri osheki ritasonkawentantake. <sup>48</sup> Arika añaminthatashitakyaari, arira inkemisantakaakeri maawoini. Ripokake reewarepaini Roma-satzi, itzimpookakaantakero tasorentsipanko, rithonkakaantakero anampipaini.” <sup>49</sup> Iri kantacha, jirika jitachari Caifás, reewaperore Imperatasorentsitaarewo, ikantanakeri irirori: “Te piyotaiyeni eeroka. <sup>50</sup> Iri kameethatatsi ashinete apaani atziri inkamawentayetai, iro ompoñaantyaari eero rithonkaitantai anampiki.” <sup>51</sup> Iri kantacha Caifás, Imperatasorentsiperori, riñawaitakaanakeri Pawa. Okantawetaka te riyowetawo, iri Jesús ikenkithatakotake inkamawenteri isheninkapaini. <sup>52</sup> Te apatziro inkamawenteri isheninkapaini inkamawentzityaari maawoini itomipaini Pawa pookayetanaintsiri, ompoñaantyaari riwithaawakaantaiyaari inkaate rashitaiyaari. <sup>53</sup> Ari ikowaiyanakeni reeware Judá-ite rowamairi Jesús.

<sup>54</sup> Iro kaari ikowantanaa Jesús intsipatanaiyaari Judá-ite. Shitowanake Judea-ki, jatake ochempiki isaikira nampitsi jitachari Efraín. Ari risaikakaapairi riyotaanewo.

<sup>55</sup> Irootzimataatsi roimoshirenkauro Judá-ite Anonkoryagaantsi, osheki atziri jatatsiri Jerusalén-ki riwetsikashiretaiya. <sup>56</sup> Rithotyakoitakeri Jesús, rosampitawakaiyani tasorentsipankoki: “¿Tsika pikantaiyinka eeroka? ¿Ari ripokake roimoshirenkaityaaga?” <sup>57</sup> Ikanta Fariseo-paini itsipayetakari Imperatasorentsiperoriite, ikantantayetake: “Ikaatzi yotatsine tsika risaiki Jesús, inthawete, naakaanteriita.”

## 12

### *Risaitantaitari Jesús kasankari*

(Mt. 26.6-13; Mr. 14.3-9)

<sup>1</sup> Iyotapaaka 6 kiteesheri roimoshirenkantaityaawori Anonkoryagaantsi, jatake Jesús Betania-ki, inampiki Lázaro rowiriintairi chapinkiranki. <sup>2</sup> Ari roimoshirenkaitakeri Jesús. Iro Marta owiitantatsiri. Ari risaikitaka eejatzi Lázaro itsipatakari Jesús rowaiyani. <sup>3</sup> Amakotake María kasankari. Osheki owinawo jiroka. Isaitantakari iitziki Jesús. Oshetantzimaitari oishi. Kasankainka maawoini okantaka pankotsi. \* <sup>4</sup> Ikanta Judas Iscariote, riyotaanewo Jesús iri pithokashityaarine paata, ikantanake: <sup>5</sup> “Arikame ampimanterome jiroka kasankari, ari aakeme osheki koriki aneshironkatantyaariri ashironkainkari. ¿Kaari antantawo iroori?” † <sup>6</sup> Te iro inkantantyaari Judas retakotatyaarira ashironkainkaripaini, ikowashita inkoshite. Iriira rowaitake rapatoteri koriki, ikoshitapiintzi eepichokiini. <sup>7</sup> Ari ikantanake Jesús: “Piñaminthatashityaawo,

\* **12:3** Jiroka kasankari kenkithatakotachari jaka, iro riwetsikaitziri inchateyaki jitachari “nardo”. Okaatzi otenatzi apaani libra, irojatzi ikantaitairi iroñaaka 300 gramo. † **12:5** Kantakotachari jaka “osheki koriki”, irijatzi ikantaitziri pairani “300 denario”. Iri ripinaitziriri antawairentzi rimonkaatakerorika apaani osarentsi rantawaitake.

tema imotaitatyaanawo inkitaitakenaga paata. ‡ <sup>8</sup> Iriima ashironkainkaripaini rashi rowaatyeero risaikimotemi, irooma naaka eero nokantaitatyaani nisaikimotemi.”

*Ikamantawakagaita ritsitokaiteri Lázaro*

<sup>9</sup> Osheki Judá-ite yotaintsiri ari risaiki Jesús janta Betania-ki. Jataiyakeni janta, te apatziro ramineri Jesús eejatzi Lázaro rowañagairi pairani Jesús. <sup>10</sup> Iri kantacha Imperatasorentsiperoriite ikamantawakaayetaka ritsitokeri eejatzi Lázaro. <sup>11</sup> Tema iri kantakaawori Lázaro kaari raapatziyaitantanaari Judá-ite ikemisantaitanakeri Jesús.

*Areetaa Jesús Jerusalén-ki*

*(Mt. 21.1-11; Mr. 11.1-11; Lc. 19.28-40)*

<sup>12</sup> Osheki atziri jataintsiri Jerusalén-ki roimoshirenkawo Anonkoryagaantsi. Okanta okiteeshetamanai, ikemaiyakeni ripokatye Jesús nampitsiki. <sup>13</sup> Richekaiyakeni oshiya-wori tsiyaroshitenki. Jataiyini ritonkyotyaaari, ikaimaiyini ikantzi:

¡Kaakitake Awinkatharite!

Tasonkawentaarewo rini, Pinkathari aitziri otyaantakeriri.

¡Iri Awinkathariteperotaiyaari aakapaini Israel-iite!

<sup>14</sup> Ari iñaapaake Jesús ewonkeri burro, ikyakaanakari, tema othawetakotzitakari Os-ankenarentsiperi, ikantaitake:

<sup>15</sup> Sion-satoité, eero pithaawaiyini,

Pokataike Piwinkatharite,

Kyaakaapaakariri ewonkeri burro.

<sup>16</sup> Ketziroini, te ikemathatziro riyotaanewo jiroka. Iro kantacha rowenonkashitaawo pairani rowaneenkawo Jesús, aripaite riyotairo iriitake Jesús rosanke-natakoitzi. <sup>17</sup> Atziripaini ikaatzi tsipatakariri pairani Jesús rowiriintairi Lázaro, ikenkithatakoyetairo okaatzi iñaakeri. <sup>18</sup> Iro riyaatantanakari atziripaini ritonkyotyaaari Jesús, tema ikemakotakeri rowañagairi. <sup>19</sup> Iriima Fariseo-paini ikantawakaiyakeni iriroripaini: “Piñaakero, eero otsinampairi. Pamineri, iro riyaatashiteri maawoini.”

*Rithotyaaakotziri Jesús Grecia-thato*

<sup>20</sup> Tzimatsi Grecia-thatoweri pokaintsiri itsipatakariri atziripaini roimoshirenkaiyani. <sup>21</sup> Ripokashitakeri Grecia-thatoweri jirika Felipe Betsaida-satzi, nampitsi saikatsiri Galilea-ki. Ikantapaakeri: “Pinkatharí, nokowi noñeeri Jesús.” <sup>22</sup> Jatanake Felipe, ikamantapaakeri Andrés. Apitekeroini riyaaatanake, ikamantakeri Jesús. <sup>23</sup> Ikantanakeri Jesús: “Monkaatapaaka rowenonkashitantaiyaawori rowaneenkawo Itomi Atziri. <sup>24</sup> Apaani okithoki kaari ipankiitzi, ari ashi owaatyero onkaate apakithowoini. Irooma arika ipathaakitanake ishokantanyakaaari ipankiitakerowa, ari iñagaitairo onkithok-itai. Imaperotatya. § <sup>25</sup> Ikaatzi etakowaitashitachari rantayetziro iñaamatashiyetari, ari impeyawaitashitaiya. Iriima manintanakerone rantashiwaitari jaka kipatsiki, ikamaitanaatyaawowa inkañaaneyetai. <sup>26</sup> Ikaatzi kowatsiri noshiyakairi nimperatanewo, roshiyakotenawo naaka. Tsikarika nisaikai naaka, ari risaikitaiya eejatzi irirori nimperatanewo. Ikaatzi noshiyakagairi nimperatanewo naaka, iri Ashitanari kantakaawori impinkathaitantyaariri paata.”

*Ithawetakota Jesús rowamagaiteri*

<sup>27</sup> “¡Antawoite okatsitzimoshiretakena iroñaaka! ¿Tsikama nonkanteka? ¿Nonkantema: ‘Ashitanari, petsinaryaakotaina?’ ¡Tema iro nipokantakari, nimonkaatairo! <sup>28</sup> Ashitanarí, poñaagantairo powaneenkawo.” Ikemaitatzi inkiteki, ikantaitzi: “Tema noñaagantzitakawo, iroñaaka napiitero.” <sup>29</sup> Atziripaini piyotainchari ikaatzi kemawakerori, ikantaiyanakeni: “Ookathawontsi ini.” Ikantayetzi

‡ 12:7 Enitatsi rametaitari pairani. Arika inkamayete, risaitantaitari kasankari onkene inkitaiteri. § 12:24 Kantakotachari jaka “okithoki”, trigo ini.

itsipa: “Riñaanatakeri maninkari.” <sup>30</sup> Ari ikantanake Jesús: “Te apatziro naaka riñaanate, eerokapaini riñaawaiwentake. <sup>31</sup> Irootaintsi iñagaiteri rowasankeeteri okantakaantziro iyaariperonka isaawikisatzipaini, roitsinampaitairi eejatzi pinkathariwentantashitainchari. <sup>32</sup> Iro kantacha arika rowatzikakoitakena jaka kipatsiki, aritake nonkaimashiretanairi maawoini.” <sup>33</sup> Ari rooñaawontziro Jesús tsikarika onkantya arika rowamagaitakeri. <sup>34</sup> Ari rakaiyanakeni atziripaini: “Ayotaiyini okantziri Inintakaantaitanewo: ‘Kañaaneri rini Cristo.’ ¿Iitaka pikantantari ontzimatyete rowatzikakoiteri Itomi Atziri? ¿Iitaka Itomi Atziri?” <sup>35</sup> Rakanake Jesús: “Eenitatsi risaikimotanaimi iitaitziri ‘Kiteesheenkari’, eepichokiini risaikanai. Poshiyakayero panashitatyeeeme okiteesheenkatzira, iroowa ompoñaantyaari eero omapokantzimi oshiyawori tsireniri. Tema ikaatzi anashitachari otsirenikitziro, te iñiuro tsika inkene. <sup>36</sup> Pinkemisantairi iitaitziri ‘Kiteesheenkari’ eeniro itsipatzimira, poshiyakotyaari irirori.”

### *Te ikemisantaiyini Judá-ite*

Ikaatanakero ikenkithawaitakero jiroka, shitowanake Jesús. Te roñaagantanaa.

<sup>37</sup> Ikantawetaka Jesús osheki ritasonkawentantake inampiki jirikapaini, te ikemisantaiyini. <sup>38</sup> Ontzimatyete imonkaatya rosankenatakeri Kamantantaneri Isaías-ní, kantatsiri:

Pinkathari, ¿Iitaka kemisanterone ñaane?  
¿Iitaka roñaagaitakeri ishintsinka Pinkathari?

<sup>39</sup> Jiroka otsipa rosankenatakeri Isaías-ni, iro kaari ikemisantantaita, ikantake pairani:

<sup>40</sup> Iri Pawa mawityaakitakaakeriri,  
Imasontzitakaayetakeri,  
Iro ompoñaantyaari eero ikowichaatanta  
Eero ikemathawaitanta.  
Iro ompoñaantyaari eero ripiyashitaana naaka nowawisaakotantaiyaariri.

<sup>41</sup> Iro riñaawaitantakawori jiroka Isaías-ni, tema inewiyatakityaawo rowaneenkawo Jesús, irootakera ikenkithatakotantakariri. <sup>42</sup> Iro kantacha, osheki Judá-ite kemisantairi Jesús, ari ikantzitanakawo Itzinkamipaini. Iro kantzimaitacha te ithawetakota irirori, tema ithaawantatyaari Fariseo-paini eero rishinetanairi inkyaayetai rapatotapiintaitaga. <sup>43</sup> Ari okantzimaitaka. Iri ikowaperotake Fariseo-paini raapatziyaari, iriima Pawa, te.

### *Jesús yakowentairine atziripaini*

<sup>44</sup> Ari riñaawaitanake shintsini Jesús, ikantanake: “Tzimatsirika kemisaintainane, te apaniro ikemisantana naaka, ikemisantzitakariri otyaantakenari. <sup>45</sup> Ikaatzi okitaanari naaka, oshiyawaitakawo iriime rokityaame otyaantakenari. <sup>46</sup> Iro nipokantakariri naaka, noshiyaari ‘Kiteesheenkari’, ompoñaantyaari noiteenkatakotairi isaawikisatzi. Eero risaikayetai otsirenikitziro inkaate kemisaintainane. <sup>47</sup> Te iro nipokantyaari kipatsiki nowasanketante, tema nipokatzi nowawisaakotante. Iro kantacha ikaatzi kemayewetawori niñaane, temaita ikemisantzi, te naaka owasanketerine. <sup>48</sup> Inkaate manintanane, kaari kemisaintairone niñaane, tzimatsi iita owasanketerine. Oshiyawaitakawo jiroka ñaantsipaini okaatzi niñaawaitakeri atzirime inatyete, iro owasanketantatsine paata, ripiyathawaantetaitakenaga. <sup>49</sup> Tema naaka te niñaawaitashiwaitya nonintakaanekiini. Ashitanari otyaantakenari, iriitake kantakenawori okaatzi nokantakeri, okaatzi niyotaantakeri. <sup>50</sup> Niyotzi naaka, okaatzi inintakaantziri Ashitanari iro kañaanetakaantatsiri. Ari okantari, okaatzi nokantakeri naaka, nithotyaatziro ikantakenari Ashitanari.”



<sup>1</sup> Yotapaaka apaani kiteesheri roimoshirenkantaityaawori Anonkoryagaantsi. Riyotake Jesús monkaatzimatapaaka rookanawentantyaawori kipatsi, riyatai intsipatapaiyaari Ipaapate. Antawoite retakoyetakari ikaatzi kemisantakeriri, ari ikantapiintatya retakotari irojatzi weyaantapaakyaawone. <sup>2</sup> Ikanta risaiki rowaiyani, kamaarishiretanake Judas Iscariote, itomi Simón, pithokashityaarine Jesús. <sup>3</sup> Riyotake Jesús tema ipoñaatyaawo irirori Pawaki, ari riyateri janta. Iriitake shintsitakaakeriri Ipaapate. <sup>4</sup> Ari ikatziyanaka risaikakera rowaiyani, raatonkoryaanakawo iwewiryakowo, romathakitanakawo manthakintsi. <sup>5</sup> Raake ñaa risakero kiwaakomentotsiki. Ikiwayitzitakeri riyotaanewo, rosheyitzitanzimaitari manthakintsi romathakitakari. \* <sup>6</sup> Iro inkiwayitzitantaaririme Simón Pedro, ikantanake irirori: “Pinkatharí, ¿eerokama kiwayitzitenane naaka?” <sup>7</sup> Ikantzi Jesús: “Te pikemathatziro okaatzi nantziri iroñaaka, iro kantacha paata, ari pinkemathatairo.” <sup>8</sup> Ikantanake Pedro: “¡Eero nishinetzimaitzimi poshiyaari imperataarewo pinkiwayitzitena!” Rakanake Jesús: “Eerorika nokiwayitzitizimi, te paapatziyana.” <sup>9</sup> Ikantzi Simón Pedro: “¡Pinkatharí, eero pikiwayitzitana eepichokiini, maawoini pinkiwena nakoki eejatzi noitoki!” <sup>10</sup> Ikantzi Jesús: “Ikaatzi eshitakerone ikaawoshita, apatziro ikowi inkiwayitzitya, tema kitetake maawoini. Ari kitetakemi eerokapaini, okantawetaka te maawoini pinkiteshiretaiyeni.” <sup>11</sup> Tema riyotakeri Jesús iita pithokashityaarine, iro ikantantari: “Te maawoini pinkiteshirete.” <sup>12</sup> Ari rithonkakeri ikiwayitzitakerira, ikithaatanaawo Jesús iwewiryakowo, saikanai tsika rowaiyani, ari ikantzi: “¿Pikemathatakeroma okaatzi nantakeri?” <sup>13</sup> Pikantapiintaiyini eerokapaini ‘Yotaanarí, Pinkatharí.’ Imatatyá pikantanari, tema naakatake. <sup>14</sup> Naaka ‘Yotaanarí’, naaka ‘Pinkatharí.’ Iro kantacha, noshiyakotari imperataarewo, nokiwayitzitakemi, ari pinkantaiyaari eerokapaini pinkiwayitzitawakagaiya. <sup>15</sup> Naaka yotaakemirori, poshiyakotenawo tsika nokantakemi naaka. <sup>16</sup> Te ipinkathaitziri noshikaarewo ranairi imperatariri. Tekaatsi eejatzi otyaantaarewo anairine otyaantziriri. Imaperotatyá. <sup>17</sup> Arika pinkemathatanairo jiroka irojatzi pantantaiyaawori, aritake pinkimoshiretai. <sup>18</sup> Pinkeme nonkantemi, iro kantacha te maawoini niñaanatemí. Niyotziri naaka ikaatzi niyoshiitakeri. Arira imonkaatyaari Osankenarentsipero, kantatsiri: Eenitatsi akiyootakenari, iriitake pithokashitenane. <sup>19</sup> Arika imonkaatakya jiroka, iroowa pinkemisantaperotantenari ‘Naakatzitaka.’ Iro neewatanzimirori nokamantzimiro. † <sup>20</sup> Inkaate kempiyaraine notyaantanewo, naakatake ikempiyaminthata. Inkaate kempiyenane naaka, ikempiyaminthatari otyaantakenari.”

*Ithawetzi Jesús ripithokashityaari Judas*  
(Mt. 26.20-25; Mr. 14.17-21; Lc. 22.21-23)

<sup>21</sup> Ikaatapaakero riñaawaitakero jiroka, antawoite okatsitzimoshiretanakeri Jesús. Eekero rooñaawontanakitziiro ikenkithatakotakeri, ikantzi: “Pikaatakera eerokapaini jaka, eenitatsi apaani pithokashitenane. Imaperotatyá.” <sup>22</sup> Ari raminawakaanaka riyotaanewo, te riyotzi itzimi ikantziri. <sup>23</sup> Ikanta apaani riyotaanewo, retakoperotanewo Jesús, shentakeriri okaakiini rowaiyani, <sup>24</sup> riñaanacheratakeri Simón Pedro, ikantziri: “Posampiteri itzimirika ikantziri.” <sup>25</sup> Ikanta jirika shentakeriri okaakiini, rosampitakeri: “Pinkatharí, ¿Itzimika?” <sup>26</sup> Rakanake Jesús: “Piñeena nashete eepichokiini pan, itzimirika nompakeri, iriitakera.” Rashetake eepichokiini pan, ipakeri Judas Iscariote,

\* **13:5** Iro rametari Judá-ite ikiwayitzitapiinta inkyaantyaari ipankoki. Iroowa rantawaire apaani imperataarewo ikiwayitzitantiintzi. Apaani iriiperori atziri, eero okanta inkiwayitzitante. Iro kaari inimotantariri pairani riyotaanewo Jesús ikiwayitzitakerira. Iro rantantakawori jiroka Jesús, riyotaatziiri riyotaanewo, onkantawetya jewari rine apaani atziri, ontzimatyé raapatziyaari itsipa, roshiyakotyaari ikanta apaani imperataarewo, tsinampashireri inkantya. † **13:19** Raakotapiintaka Jesús ikantzi “Naakatzitaka”, ari oshiyawo riñaawaitake Pawa pairani. Paminero Jn. 8.58.

itomi Simón. <sup>27</sup> Ikanta rowawakawo Judas pan. Kamaaritanake. Ikantziri Jesús: “Thaakyaapaini pantero pikenkithashiretapiintakari.” † <sup>28</sup> Ikaatzira rowaiyani tekaatsi kemathatawakerone oita ikantantariri. <sup>29</sup> Tema jirika Judas iriitake kempoyiiriri koriki, roshiyakagaitzi riyaatatye ramanante roimoshirenkyaari ikantakeriri Jesús, roshiyakagaitzi eejatzi ramanantatye imperiri ashironkainkaripaini. <sup>30</sup> Ikaatakero Judas rowakawo pan, jatanake. Tema tsirenitaneke.

### *Owakerari Inintakaantaitanewo*

<sup>31</sup> Jatake Judas, ikantzi Jesús: “Monkaatapaaka rowenonkashitantaiyaawori rowaneenkawo Itomi Atziri. Ari iñagaitairo rowaneenkawo Pawa. <sup>32</sup> Ari okanta, iriitake Pawa oñaaganterone iñagaitantyaawori rowaneenkawo. Iroñaakaga rantero. <sup>33</sup> Notomipaini, eepichokiini nisaikimotanaimi. Osheki pithotyaakowetaina eerokapaini, eeromaita piñagaana. Iro nokantzitariri eejatzi asheninkapaini Judá-ite, iroowa napiitemiri nonkantemiro eerokapaini, ero pitsipatana tsika nisaikapai naaka. <sup>34</sup> Jiroka owakerari nonintakaantaneke: ‘Ontzimatyete petakotawakagaiya.’ Poshiyena naaka netakotzimi, ari pinkantyaari eerokapaini, petakotawakagaiya. <sup>35</sup> Arika petakotawakaanaiya eerokapaini, ari riyoitaimi maawoini eerokatake niyotaanewo.”

### *Ikenkithatakotziro Jesús rookanawentante Pedro* (Mt. 26.31-35; Mr. 14.27-31; Lc. 22.31-34)

<sup>36</sup> Ikanta Simón Pedro rosampitanakeri Jesús: “Pinkatharí, ¿tsika piyaateka?” Rakanake Jesús, ikantzi: “Tsikarika niyaate naaka, eerowa pimatziro poyaatena eerokapaini, irooma paata aritake poyaatakana.” <sup>37</sup> Ikantanake Pedro: “Pinkatharí, ¿iitaka ero noyaatantzimi iroñaaka? ¡Arira nishinewentakemi!” <sup>38</sup> Rakanakeri Jesús, ikantziri: “¿Imaperotatya pishinewentena? Tekera riñeeta tyaapa, mawa papiitero pinkante: ‘Te niyotziri Jesús.’ Imaperotatya.”

## 14

### *Iriitakera Jesús oshiyawori awotsi rareetantaitari Ashitairiki*

<sup>1</sup> “Eero powashireshiryaawaitashita. Pawentaiyaari Pawa, pawentina eejatzi naaka. <sup>2</sup> Janta ipankoki Nopaapate eenitatsi osheki tsika anampitapaiyaawo. Eerome otzimi, ero nokantawaitzimime niyaatai niwetsikayetapaimi tsika pinampitapaiyaawo eeroka. <sup>3</sup> Arika niyaatai, niwetsikayetapaimirika tsika pisaikapai, ari nipiashitaimi nagaatemi, pintsipatantapainari eerokapaini tsika nisaikai naaka. <sup>4</sup> Piyotaiyironi eerokapaini awotsi riyaatantaitari tsika nisaikai.” <sup>5</sup> Ari ikantanake Tomás: “Pinkatharí, te niyotaiyeni tsika piyaate. ¿Tsika nonkantyaaka niyotantyaawori awotsi?” <sup>6</sup> Rakanake Jesús, ikantanake: “Naakatake ‘Awotsi’, ‘Kyaaryooperotatsiri’, ‘Añaamentotsi.’ Apatzirowa impampithawokitaitena naaka, aritake rareetaitakya Ashitanariki. <sup>7</sup> Arime piyoperotaiyenane, arira piyotairime eejatzi Nopaapate. Tema piyotzitariri iroñaaka, iriitakera piñaapiintakeri.”

<sup>8</sup> Ikantanake Felipe: “Pinkatharí, janjaatya poñaayenari Pipaapatetari, tekaatsi it-sipa nonkoweri.” <sup>9</sup> Ikantanake Jesús: “Felipe, osamanitake notsipayetakemi eeroka, ¿tekerama piyotenaata? Ikaatzi ñaakenari naaka, iñaakeri Nopaapate. ¿Iitaka pikantantari? <sup>10</sup> ¿Tema pikemisantzi ari niwithaari Nopaapate, ari riwithaana irirori? Okaatzi niñaawaitziri, te naaka kowashiwaityaawone niñaawaitero. Iri Nopaapate withaashiretanari, iri antakaanawori rantawaitanewo. <sup>11</sup> Pinkemisante ari niwithaari Nopaapate, ari riwithaana irirori. Ikompitzimotzimirika jiroka, pinkemisantaatsikaitena nita-sonkawentantayetake.

† 13:27 Kantakotachari jaka “Kamaaritanake”, te iro pan kantakaanterone rowawakawowa ikamaaritantanakari Judas, iriitakera kantakaashitakawo ikamaaritantanakari.

<sup>12</sup> Inkaate kemisantainane naaka, ari ritasonkawentantayetai eejatzi. Ari rimaperotanakero ritasonkawentante, anaanakero okaatzi iñaakoitakenari, tema iro niyaatzi-matai naaka nontsipatapaiyaari Nopaapate. Imaperotatya. <sup>13</sup> Maawoini aakotainane nowairo naaka inkowakotaina ramanamanaatana, aritake nantakeniri. Iro om-poñaantyaari inthaamentaiyaari Nopaapate, okantakaantziro rantzimotantakeri Itomi. <sup>14</sup> Onkaate pinkowakotainari paakotaina nowairo naaka, ari nimatakemiro.”

### *Ikashaakaantziro Tasorenkantsi*

<sup>15</sup> “Arika pinintayetaina, aritake pinkemisantairo nonintakaanewo. <sup>16</sup> Ari nonkowakotairi Nopaapate rotyaantemi itsipa Kaminaakowentantaneri, <sup>17</sup> Tasorensiperori rinatye, iriitake tsipashiretapiintaimine. Iriima isaawikisatzipaini eero risaikimotziri, te iñiiri, te riyotziri eejatzi. Irooma eerokapaini piyotaiyirini, tema risaikimotakemi, iri saikashiretantakemiri.

<sup>18</sup> Eero poshiyakotari miritzi rookanawentaitziri, ari nipiashitaimi. <sup>19</sup> Okaakitake, eero iñagaana isaawikisatzipaini. Irooma eerokapaini ari piñaayetaina, kañaaneri pinkantayetaiya, tema kañaaneri nini naaka. <sup>20</sup> Ari piyotai niwithaashiretari Nopaapate, eejatzi eerokapaini piwithaashiretana, ari nokantari naaka niwithaashiretzimi eerokapaini.

<sup>21</sup> Inkaate kemisantawaantetainane, roñaagantziro imaperotatya inintana. Iroowa retakotantaiyaariri Nopaapate, nimateri naaka netakotaiyaari, ari noñaagaiyaari.”

<sup>22</sup> Ikanta Judas (kaari Iscariote) rosampitanakeri: “Pinkathari, ¿litaka eero poñaagantaari itsipapaini, apa poñaagaina naakapaini?” <sup>23</sup> Rakanake Jesús: “Ikaatzi nintanari naaka, ikemisantawaantetana. Iro retakotantaariri Nopaapate. Ari nontsipatari Nopaapate nontsipashiretaiyaari jirikapaini. <sup>24</sup> Iriima kaari nintenane, ripiyathawaantetakena. Te naaka yotashiwaityaawone okaatzi nokantayetakemiri, ashitanari otyaantakenari, iri yotakaakenawori.

<sup>25</sup> Nokamantatziimiro maawoini jirokapaini eeniro nisaikimoyetzimi. <sup>26</sup> Iriima Tasorenkantsi, Kaminaakowentantaneri, rotyaantemiri Nopaapate poyaatenane, riyotakaapaakemiro maawoini, inkenkithashiretakaimiro okaatzi nokantayetakemiri.

<sup>27</sup> Kameetha pisaikayetai. Te nonkenkithatakotashityaawo tsika ikanta risaikakaantzi isaawikisatzipaini. Naaka kantakaantziro pisaikantaiyaari kameethaini. Eero powashirewaiyeta, eero pithaawawaitzi eejatzi. <sup>28</sup> Tema pikemakena nokantake: ‘Iro niyaatai, irojatzi nipiyanaiyaari ari ankaatai asaikayetai.’ Arime pinintename, eerome powashirewaitame nookayetanaimi, ari pinkimoshirewentakename piyotake niyaatatye Nopaapateki, anaakenari iroñaaka natziritapaintzira.

<sup>29</sup> Nokamantatziimiro jiroka, pinkenkithashiretantyaawori paata, arika imonkaatapaakya. <sup>30</sup> Eero nokenkithawaitakayitzimi, tema okaakitake pinkathariwetachari kipatsiki. Temaita ipinkathatana naaka. <sup>31</sup> Ari onkantaari, iro riyotantyaari isaawikisatzipaini nonintziri naaka Nopaapate, nantziniri okaatzi inintakaanari irirori. Pinkatziyaiyeni. Thame aatai.”

## 15

### *Roshiyawo Jesús oponkitzithapero pankirentsi*

<sup>1</sup> Eekero ikantanakitzi Jesús: “Naaka oshiyawo oponkitzithapero pankirentsi. Iriima Nopaapate roshiyari pankitzirori. <sup>2</sup> Eerorika okithokitzi otewatha, richekathatziro ashitawori. Irooma kithokitatsiri, rowameethatewatziro, rowaankiityaakotziro onkene onkithokiperote. <sup>3</sup> Kaankiityaakotaimi iroñaaka eerokapaini, okantakaakemi ñaantsipaini nokamantayetakemiri. <sup>4</sup> Apaani otewatha pankirentsi tewaryagaintsiri eero okithokitai, tema ontzimatye ishooke oponkitziki. Ari okantari eejatzi eerorika poisokerotana, eerowa pantairo kameethari. <sup>5</sup> Naaka oshiyakawo oponkitzi pankirentsi, irooma eerokapaini poshiyaawo notewa pinayetzi. Ikaatzi oisokerotanari naaka ari nokantzitakariri irirori, oshiyawaitakawo osheki

inkithokiperotaime. Eerorika pitsipashireyetana, tekaatsi kameethari pantairi. <sup>6</sup> Ikaatzi kaari oisokerotenane naaka, ari nookakeri. Arira roshiyaiyaawo okamatewatzi pankirentsi, ragaitziro ritagaitero. <sup>7</sup> Kisokerorika powayetaina, pinkyaaryoowentairorika okaatzi niyotaayetakeri, pinkowakotairi Nopaapate oitarika pikowiri, aritake rimatakemiro. <sup>8</sup> Arika pimatanairo roshiyakaawentaitakeri kithokiperotatsiri pankirentsi, aritake riyoitaimi imapero niyotaanetaimi. Iroowa impinkathaitantyaariri Ashitanari. <sup>9</sup> Antawoite netakoyetakemi, noshiyakari Ashitanari retakotana naaka. Pinintaawaityaawo netakoyetaimira. <sup>10</sup> Eekerorika pinkemisantanakityeero nonintakaantanewo, ari pinintaawaitaiyaawo netakonka, poshiyaina naaka nokemisantawaantetziri Ashitanari nonintaawaitawo retakonka. <sup>11</sup> Iro nokamantantzimirori jiroka onkene ankimoshiretaiyeni. Imapero iroowa pinkimoshirekitantaiyaari eeroka.

<sup>12</sup> Jiroka nonintakaantanewo: ‘Ontzimatyete petakotawakaayetaiya, poshiyaina naaka netakoyetaimi eerokapaini.’ <sup>13</sup> Inkaate shinewentyaarine raapatziyanewo, roñaagantatziro retakokitanta. <sup>14</sup> Notsipaminthatanewo pinatzi eerokapaini, arika pantanairo nokantzimiri. <sup>15</sup> Aritapaake noshiyakaimi nonoshikane, tema apaani noshikaarewo te riyotzi oita rantziri onampitariri. Noshiyakagaimi naapatziyanewo, tema nokamantaimiro maawoini ikamantanari Ashitanari. <sup>16</sup> Te eerokapaini yoshiitenane, tema naaka yoshiitaimiri eerokapaini. Naakatake otyaantayetemine piyaate tsikarika, poshiyakotaiyaawo pankirentsi kithokiperotatsiri, ari pinkantapiintanakityeeya. Iro ompoñaantyaari rimatakaayetaimiro Ashitanari oitarika pinkowakoteriri paakotainarika nowairo. <sup>17</sup> Pinkeme nonkantemi: ‘Ontzimatyete petakotawakaayetaiya.’”

### *Ikisaneentayetanakemi isaawikisatzipaini*

<sup>18</sup> “Arika piñaayetakeri inkisaneentanakemi isaawikisatzipaini, poshiyetyaawo ari ikantaitakena naaka ikisaneentawaitaitakena. <sup>19</sup> Irojatzirikame poshiyakotyaari isaawikisatzipaini, ari retakoyetakemime ikantawakaaga irirori retakotawaka. Iro kantacha niyoyagaimi naaka, pitsipawetari isaawikisatzipaini, iro ikisaneentantanakemiri. Oshiyawaitakawo iroñaaka kaarime eeroka isaawikisatzipaini. <sup>20</sup> Pinkenkithashiretero nokantzitakemiri: Te añi apaani noshikaarewo impinkathaiteri ranairi imperatariri. Ari inkantaitemi eerokapaini inkowaite ritsitokaitemi, ikantaitakenaga naaka. Ari okantari eejatzi ikaatzi kemisantawaantetanari naaka, aritake inkemisantaitakemi eerokapaini. <sup>21</sup> Iro inkowaitantyaari ritsitokaitemi, naakatake tsitokakaantemine, okantakaantziro te riyotena iri Pawa otyaantakenari. <sup>22</sup> Eero otzimime iyenakaashitanewo, eero nipokime niyotaayetairi. Eeromaita okanta rookaakowentaiyaawo iyaariperonka. <sup>23</sup> Ikaatzi kisaneentakenari naaka, ikisaneentzitakari eejatzi Ashitanari. <sup>24</sup> Eero otzimime iyenakaashitanewo, eerome nitasonkawentzimoyetakeri iñaantakawori kaari iñaapiintzi. Okantawetaka iñaawetakawo jirokapaini, eekero ikisaneentanakityaana, ikisaneentzitakari eejatzi Ashitanari. <sup>25</sup> Ari okantzimaitaka, ontzimatyete imonkaatya osankenarentsi, kantatsiri:

Ikisaneentashiwaitakena.

<sup>26</sup> Iriima Tasorenkantsi iriiperotatsiri, iitaitziri ‘Kaminaakowentantaneri’, rotyaantaimiri Ashitanari poyaatenane, iri yotakaapaakemirone maawoini, inkenkithashiretakaimiro okaatzi nokantayetakeri. <sup>27</sup> Arira pinkenkithatakoyetaina eerokapaini, tema pitsipayetaitakena ketziroini etantanakawori.”

## 16

<sup>1</sup> “Iro nokantantzimirori jirokapaini, eero pontziwashirewentantana. <sup>2</sup> Ari piñaayetakeri eero rishineetaimiro pinkyaayetai ipiyotaitapiintaga. Ari piñaakero eejatzi ritsitokaitemi, roshiyakagairo rantatziiniri Pawa kameethatatsiri. <sup>3</sup> Iro

rantantawori jiroka, tema te riyotziri Ashitanari, te riyotana eejatzi naaka. <sup>4</sup> Arika imonkaatakya jiroka, pinkenkithashiretakotero nokantayetakemiri. Iroowa netantawori nokamantzimiro ketziroini.”

### *Rantakaantziri Tasorenkantsi*

“Te nokamantzimiro ketziroini jiroka, tema irojatzi notsipayetzimi. <sup>5</sup> Iro kantacha jataana iroñaaka nontsipatapaiyaari otyaantakenari. Tekaatsumaita osampikowenterone tsikarika niyaatai, <sup>6</sup> apatziro powashiretaiyani pikemakenaga nokantakemiro jirokapaini. <sup>7</sup> Pinkeme nonkamantemiro irooperori. Osheki onkameethatzimotemi niyaatai. Tema eerorika niyaatai, eero ripoki jitachari ‘Jokaakotantaneri’ intsi-pashiretantapiintaimiri. Irooma arika niyaatai, naakatake otyaantapairine. <sup>8</sup> Arika ripokake Tasorenkantsi, roñaagantapaakero ikenkithashirewaitashitari isaawikisatzipaini, tema ikenakaashiwaitakawo ikenkithashiretawo kaariperonkantsi, tsika okantakota kameethashiretaantsi, tsika okantakota yakowentaantsi. <sup>9</sup> Ari riyotakaan-tairo kaariperonkantsi ini eerorika ikemisantaitana naaka. <sup>10</sup> Ari riyotakaan-tairo kameethashirenkantsi, nimatziro naaka nowameethashiretantzi, tema niyaatairika Ashitanariki eero iñagaitaana. <sup>11</sup> Ari riyotakaayetairi riyakowentakeri, iri pinkathari-wentashiwaitakari isaawikisatzipaini.

<sup>12</sup> Eenitatsi osheki nonkantemiri, iro kantacha tema anaanakemi nokantayetakemiri. <sup>13</sup> Arika ripokapaake iriiperori Tasorenkantsi, iri yotakaapaakemirone maawoini irooperori. Eero riñaawaitashiwaitawo ikowashiwaitari irirori, inkamantantairo ike-makeri. Ari riyotakagaimiro onkaate awisayetaatsine paata. <sup>14</sup> Iri kemayetaianane niñaawaitero, irojatzi rowaagayetaimiri eerokapaini, inantyaari riyoitairo nowa-needkawo. <sup>15</sup> Tema okaatzi riyotanetari Ashitanari, irojatzi niyotanetari naaka. Irootake nokantantakari: ‘Iri kemayetaianane niñaawaitero, irojatzi rowaagayetaimiro eerokapaini.’ ”

### *Onkantawetya powashiretya, aritake pinkimoshiretai*

<sup>16</sup> “Eepichokitapaake eero piñagaana, iro osamaniwetakya ari piñagaina eejatzi. Tema niyaatatye naaka Ashitanariki.” <sup>17</sup> Ikanta riyotaanewo rosampitawakaanaka: “¿Oita ikantakotziri? Ikantayetakai eepichokitapaake eero añaaayetairi, iro osamaniwetakya ari añagairi eejatzi, tema riyaatatye Ashitaririki. <sup>18</sup> ¿Litaka ikantakotziri ‘eepichokitapaake?’ Te akemathatziro iitarika ikenkithatakotziri.” <sup>19</sup> Riyotanake Jesús ikowatzi rosampiteri riyotaanewo, ikantanakeri: “Nokantaiyakemini: ‘Eepichokitapaake, eero piñagaana, iro osamaniwetakya ari piñagaina eejatzi.’ ¿Irooma posampitawakaawentari? <sup>20</sup> Ari piñaayetairo piraawaitaiya, owashireki pinkantaiya, piñaaminthateri isaawikisatzipaini ikimoshiretaiyini. Onkantawetya powashirekitaiyani, ari piñagairo pinkimoshiretai. Imaperotatya. <sup>21</sup> Arika ontzimaanitzimate apaani tsinane, okemaatsiwaita. Iro kantacha arika intzimake eentsite, ompeyakotanairo iyatsinka okimoshirewentanakeri eenchaanikite. <sup>22</sup> Ari okantari eejatzi, ontzimatye powashireneentawakya eerokapaini iroñaaka. Arika piñaawaina paata, osheki pinkimoshiretai, tekaatsi owashiretakagaimine. <sup>23</sup> Paata tekaatsi posampitainari naaka. Iri mataimirone Ashitanari oitarika pinkowakotenari paakotainarika nowairo. <sup>24</sup> Tema pamanapiintayetari Ashitanari pikowakoyetziri oiyetarika, pikowakowaitashitakari. Irooma iroñaaka arika pinkowakoyetairi, paakotapiintaina nowairo naaka. Ari pinkantya pinkowakotapiintairi, ari rimatakemiro, irootake pinkimoshirekitantaiyaari.”

### *Noitsinampagairo naaka isaawikisato*

<sup>25</sup> “Noshiyakaawentatziimiro jirokapaini nokenkithatakotzimiri. Iro kantacha eepichokitapaake imonkaatantyaari eero noshiyakaawentaimiro, koñaawoini nonkenkithatakotaimiri Ashitairi. <sup>26</sup> Paata, ari piñaayetairo paakotaina nowairo pinkowakotairirika Ashitanari. Te naaka kowakowentaimine. <sup>27</sup> Tema iri



Ashitairi etakoyetaimi eerokapaini. Iro retakoyetantaimiri pinintayetaanaga naaka, pikemisantaana nopoñaagaawowa Pawaki. <sup>28</sup> Ashitairiki nishitowanake nipokantanakari jaka kipatsiki. Iroñaaka nookanawentairo kipatsi nipiyaatyero Ashitairiki.”

<sup>29</sup> Ikantaiyanakeni riyotaanewo: “Koñaatake iroñaaka pikenkithawaitziri, te poshiyakaawentero. <sup>30</sup> Noñaayetakemi iroñaaka piyotziro maawoini tsikarika oiyeta, te okowa iita osampitemine piyotziro oitarika ikenkithashiretairi. Iro nokemisantantari imapero pipoñaaka Pawaki.” <sup>31</sup> Ari rakanake Jesús, ikantzi: “¿Arima, kemisantaimima iroñaaka? <sup>32</sup> Monkaatzimatapaaka. Iroñaaka piñaayetero apawopaini pipookayetai tsikarika, ari pookanawentanakena apaniroini. Temaita nisaike apaniroini itsipatana ashitanari. <sup>33</sup> Nokamantakemiro maawoini jiroka piñaantyaawori kameetha pisaikie pintsipatena naaka. Jaka isaawiki, osheki piñaayetero pinkemaatsiwaityaawo. Iro kantacha, pishintsishirete. Tema noitsinampaakero naaka isaawikisato.”

## 17

### *Jesús ramanakotari riyotaanewopaini*

<sup>1</sup> Ikanta rithonkakero riñaawaitakero jirokapaini, aminanake Jesús inkiteki, ikantanake: “Ashitanarí, monkaatapaaka. Pooñaawontero iroñaaka rowaneenkawo pitomi, roñaagantantyaawori pitomi eejatzi powaneenkawo eeroka. <sup>2</sup> Eeroka owakeri ipinkathariwentantakariri maawoini atziri, inkañaanetakaantyaariri ikaatzi pashitakaakariri. <sup>3</sup> Arika riyoitaimi apaniroini Pipawaperotzi eeroka, riyoitairi eejatzi Jesucristo potyaantakeri, ari inkañaanetakaayetairi. <sup>4</sup> Nooñaawontakero powaneenkawo jaka kipatsiki, nithotyaakero pikantakenari nantero. <sup>5</sup> ¡Ashitanarí! Pishinetena nontsipataimi iroñaaka, ari ankaate añaayetairo owaneenkawo akantaga pairani tekera awetsikeroota kipatsi.

<sup>6</sup> Jirikapaini piyoshiitairi pashitakaakenari, niyotaayetairi tsika piita eeroka. Eeroka ashitakariri ketziroini, ipoña pashitakagaanari naaka. Nokemisantakaayetairi piñaane. <sup>7</sup> Ikenkithashireyeta iroñaaka, okaatzi niyotanetari naaka, eerokatake yotakaayetanawori. <sup>8</sup> Niyotaayetairi okaatzi piyotakaayetanari, ikemisantanakero jirikapaini. Ikenkithashiretanai imapero nopoñaakawo pisaikira eeroka, ikemisan-tayetanai eerokatake otyaantakenari. <sup>9</sup> Naakatake kowakowentziriri jirikapaini. Te iri nonkowakowente nampitashiwaitawori kipatsiki, apa nokowakowentatziiri pashitakaanari. <sup>10</sup> Maawoini nashitari naaka irijatzi pashitari eeroka. Ikaatzi pashitari eeroka irijatzi nashitari naaka. Tema iri oñaawontakerori nowaneenkawo. <sup>11</sup> Ero nisaikanai jaka isaawiki, niyaatai nonkaatapaimi eeroka, iriima jirikapaini eekero risaikanaaty. Ashitanarí Tasorentsi, pinkempoyaawentero raakotapiintantemiri piwairo, riwithaawakaantyaari eejatzi, akemetaawakaga aaka. <sup>12</sup> Eenirowa notsipayetari jaka isaawiki, nokempoyaayetziri raakotapiintantakemiri piwairo. Te ipeyagaantawaita, apatziro ikantakaawo iitaitziri ‘Otomí peyashiwaitaantsi’, irojatzí imonkaatantyaari okenkithatakotakeri Osankenarentsiperó. <sup>13</sup> Iroñaaka niyaatai pisaikinta eeroka. Iro nokantantawori jirokapaini eenirowa nisaikira isaawiki, roshiyantenari naaka inkimoshiretai kameetha jirikapaini. <sup>14</sup> Osheki ikisaneentaitanakeri niyotagairi piñaane, te roshiyanaari isaawikisatzipaini, roshiyaana naaka te isaawikisatzi ninaty. <sup>15</sup> Te nokowakotzimi paayetairi risaiki jaka isaawiki, apatziro pinkempoyaawentairi ikaariperotakaitzirikari. <sup>16</sup> Nokanta naaka te isaawikisatzi nini, eejatzi jirikapaini te roshiyanaari isaawikisatzipaini. <sup>17</sup> Pintasorentsishiretakagairi inkyaaryoowentantyaawori irooperori. Tema irooperori ini piñaanetari eeroka. <sup>18</sup> Pikantakena naaka potyaantakena nisaikimoteri isaawikisatzipaini, ari nonkantzityaari naaka notyaanteri risaikimoteri.

<sup>19</sup> Okowaperotatya iroñaaka nontasorentsishiretai nishinewentaiyaari jirikapaini, intasorentsishireperotantaiyaari eejatzi irirori.

<sup>20</sup> Te apatziro nonkowakowenteri jirikapaini, tema nokowakowentzitari inkaate kemisantainane arika inkenkithatakaayetairi jirikapaini. <sup>21</sup> Namanakotari maawoini jirikapaini riwithaawakaantyaari, apaani inkantanaiya riwithagaimi eeroka. Ashitanarí, oshiyawaityaawo awithaawakaiyani aaka, ari inkantaiyaari eejatzi riwithaawakaaperotaiya inkemisantantaiyaari isaawikisatzipaini, eeroka otyaantakenari. <sup>22</sup> Jiroka nowaneenkawo okaatzi poñaagakenari, irojatzi nimatairi naaka noñaagairi iriroripaini. Ompoñaantyaari riwithaawakaaperotantyaari, roshiyakotairo aaka. <sup>23</sup> Tema piwithaashiretana eeroka, ari nonkantzityaari eejatzi naaka niwithaashiretaiyaari iriroripaini, riwithaawakaantaperotyaari. Iro inkenkithashiretantyaari isaawikisatzipaini eerokatake otyaantakena, antawoite petakoyetzitakari poshiyakaakenaga naaka, antawoite petakotakena. <sup>24</sup> Ashitanarí, eerokatake ashitakaakenariri jirikapaini, nokowi intsipatina tsika nisaikai naaka, iñaantaiyaawori nowaneenkawo. Eeroka owaneenkatakaakenari, tema petakotakena ketziroini tekera iwetsikaata kipatsi. <sup>25</sup> Ashitanarí tampatzikashireri, te riyotzimi isaawikisatzipaini. Iro kantacha naaka niyotzimi, eejatzi ikanta jirikapaini riyotzi eeroka otyaantakenari. <sup>26</sup> Niyotagairi tsika piita eeroka, eekero niyaatakaatyero niyotagairi, notsipashiretaari, netakoyetaari pikemetaakena naaka petakotakena.”

## 18

### *Ragaitanakeri Jesús*

(Mt. 26.47-56; Mr. 14.43-50; Lc. 22.47-53)

<sup>1</sup> Ari rithonkanakero ikantayetakero jiroka, shitowanake Jesús itsipatanaari riyotaanewo riyaaero intatsikeronta pareenkariki iitaitziro “Cedrón.” Ari otzimiri pankirentsimashi, tsika risaikapaake Jesús itsipayetakari riyotaanewo. <sup>2</sup> Iñiitawo eejatzi jirika Judas pithokashitanchari, ari risaikakaapiintziri Jesús riyotaanewo janta. <sup>3</sup> Areetapaaka Judas itsipatakari owayeriite, itsipatakari kempoyaantaneri rotyaantanewo reeware Imperatasorentsitaarewo, rotyaantanewo eejatzi Fariseopaini. Rotaiyayetakero ripasamento, ramake eejatzi rootamento. <sup>4</sup> Riyotzitakawo ketziroini Jesús oita awishimoterine, rishitowashitanakeri, rosampitawakeri: “¿Iitaka pithotyaakotziri?” <sup>5</sup> Ikantaiyini jirikapaini: “Nithotyaakotatziiri Jesús Nazaret-satzi.” Rakanake Jesús: “Naakatake.” Jirika Judas pithokashitakariri, ari itsipayetakari jirikapaini. <sup>6</sup> Riñaawaitanakera Jesús, piyaponthoianakani, tyagaiyanakeni. <sup>7</sup> Rapiitanakeri Jesús, rosampitziri: “¿Iitaka pithotyaakotziri?” Rapiitanakero iriroripaini, ikantzi: “Nithotyaakotatziiri Jesús Nazaret-satzi.” <sup>8</sup> Ari rapiitanakeri Jesús, ikantziri: “Nokantakemi naakatake. Naakarika pithotyaakotzi, potyaantairi jirikapaini notsipayetakari, riyaaaita.” <sup>9</sup> Ari imonkaatari ikantzitakari ketziroini Jesús: “Ashitanarí, te ipeyagaantawaita apaani pashitakaakenari.” <sup>10</sup> Ikanta Simón Pedro, eenitatsi irirori rosataamento, inowikyaanakero, rithatzinkitakeri rakoperokempita jitachari Malco, inoshikanewo Imperatasorentsiperori. <sup>11</sup> Ikanta Jesús riñaanatanakeri Pedro, ikantziri: “Poyaagairo posataamento. Iri shinetakenari Ashitanari nonkemaatsiwaityaawo jiroka, ¿eeroma okanta nimonkaateniri?” \*

### *Ragaitanakeri Jesús Imperatasorentsiperoriki*

(Mt. 26.57-58; Mr. 14.53-54; Lc. 22.54)

<sup>12</sup> Ikanta owayeripaini itsipatakari reeware, eejatzi reeware kempoyaawentantantneri rotyaantanewo Judá-ite, rotaiyanakeri Jesús, roosotanakeri. <sup>13</sup> Retapaintawo

\* **18:11** Jiroka jaka ikantajaantziri Jesús: “Iri shinetakenawori Ashitanari nirantyaawori kepishaari.” Tema iro oshiyakaawentacha arika inkemaatsiwaitaitya, oshiyawaitakawo rirerome kepishaari.

ikenakaanakeri ipankoki Anás. Iriitake rikonkiri Caifás Imperatasorentsiperotatsiri. <sup>14</sup> Jirika Caifás iriitake kantakeriri pairani Judá-ite: “Iro kameethatatsi ashinete apaani atziri inkamimowentai.”

*Ikyaake Pedro iyaankiipankariteki Anás*  
(Mt. 26.69-70; Mr. 14.66-68; Lc. 22.55-57)

<sup>15</sup> Ikanta Simón Pedro itsipatakari itsipa riyotaanewo Jesús, royaatakowentakeri Jesús. Jirika itsipa yotaarewo, iñaapiintanewo rini Imperatasorentsiperori, irootake ikyaantapaakari royaatakowentakerira Jesús. <sup>16</sup> Iriima Pedro ikatziyapaaka jan-takeronta otantotsiki. Jirika yotaarewo iñaapiintanewo rini Imperatasorentsiperori, ikenkithawaitakaakero kempoyiirori ashitakomentotsi, omonkyaakeri eejatzi Pedro. <sup>17</sup> Okanta kempoyiirori ashitakomentotsi, osampitakeri Pedro: “¿Kaarima eeroka riyotaanewo jirika atziri?” Rakanake Pedro, ikantziro: “Tera naaka.” <sup>18</sup> Tema okatsinkaityaatzi, jirikapaini noshikaarewo itsipayetakari kempoyaawentantaneri, rowaampataiyakeni paampari. Ari risaiki rakitsitaiyani. Ari itsipatakari eejatzi Pedro jirikapaini rakitsitaiyani paampari.

*Anás rosampitziri Jesús*  
(Mt. 26.59-66; Mr. 14.55-64; Lc. 22.66-71)

<sup>19</sup> Ikanta Imperatasorentsiperori retanakari Jesús rosampikowentziri riyotaanepaini, eejatzi okaatzi riyotaantayetakari. <sup>20</sup> Ari ikantanake Jesús: “Nokenkithatakaapi-intakeri maawoini atziripaini. Niyotaantapiintake ipiyotaitapiinta eejatzi janta tasorentsipankoki, tsika rapatotapiintaiyani maawoini Judá-ite. Te nimanakaawo okaatzi nokenkithayetziri. <sup>21</sup> ¿litaka posampitantanari naaka? Posampiteri ikaatzi kemayetakenari. Iriitake yotziirori okaatzi nokantayetakari.” <sup>22</sup> Ikantakero Jesús jiroka, apaani kempoyaawentantaneri ripasawootanakeri, ikantziri: “¿Arima pinkantya pak-eri Imperatasorentsiperori?” <sup>23</sup> Rakanakeri Jesús, ikantanakeri: “Eenitatsirika kaariperori niñaawaitakeri, pinkantenawo tsika otzimi. Okaatzi niñaawaitakeri kameetha ini. ¿litaka pipasawootantanari?” <sup>24</sup> Ikanta Anás rotyaantakeri janta Caifás-ki Imperatasorentsiperotatsiri, roosotaka.

*Ikantzi Pedro: Te niyotziri naaka Jesús*  
(Mt. 26.71-75; Mr. 14.69-72; Lc. 22.58-62)

<sup>25</sup> Irojatziki ikatziyaka Pedro rakitsiwaita paampariki. Ari rosampiitakeri: “¿Kaarima eeroka riyotaanewo jirika atziri?” Ari roipiyanakero ñaantsi Pedro, ikantanake: “Tera naaka.” <sup>26</sup> Okanta osamaniityaake rosampitairi eejatzi inoshikanewo Imperatasorentsiperori, iri sheninkathoritariri ritotzitakeri inkaaganki Pedro ikempita, ikantziri: “¿Kaarima eeroka noñaake itsipatzimi janta pankirentsimashiki?” <sup>27</sup> Ari rapiitanakero Pedro roipiyañaanetantzi, ari riñaanake tyaapa.

*Ragaitanakeri Jesús Pilato-ki*  
(Mt. 27.1-2, 11-31; Mr. 15.1-20; Lc. 23.1-5, 13-25)

<sup>28</sup> Tema kiteeshetzimatake, romishitowaitanairi Jesús ipankoki Caifás, ragaitanakeri risaikinta Pilato reewarite Roma-satzi. Te ikyagaiyapaakeni Judá-ite ipankoki Pilato, tema arika inkyaapankotakeri ripiyathatakawo Inintakaantaitanewo ikitewathatan-taitari, eero okantzi roimoshirenkero kiteesheri Anonkoryagaantsi. <sup>29</sup> Iro rishitowantapaakari Pilato, ikenkithawaitakairi, ikantziri: “¿litaka rantakeri jirika atziri?” <sup>30</sup> Ikantaiyini irirori: “Eerome ikaariperotzime jirika, eero namirime jaka.” <sup>31</sup> Ari ikantanake Pilato: “Paanairi eerokapaini, powasanketeri tsika okantzi Inintakaantaitz-imi.” Ikantaiyanakeni Judá-ite: “Te pishinetapiintaiyenani nitsitokeri nosheninkaite.” <sup>32</sup> Ari imonkaatakari ikantakeri ketziroini Jesús tsika onkantya rowamagaiteri.

<sup>33</sup> Irojatzí ripiyantanakari Pilato ikyaapaintzi inthomoi ipankoki, ikaimapaakeri Jesús, rosampitakeri: “¿Eerokatakema Iwinkatharite Judá-ite?” <sup>34</sup> Ari ikantzi Jesús: “¿Piyotashitawoma jiroka posampitanari? Aamaaka tzimatsi kantakemiri noitaga naaka.” <sup>35</sup> Rakanake Pilato: “¿Naakama Judá-ite? Iriira pisheninkaite amakemiri jaka itsipatakari reeware Imperatasorentsitaarewo. ¿Litaka pantakeri?” <sup>36</sup> Ari rakanake Jesús: “Te nopinkathariwentantzi naaka jaka isaawiki. Ari onkantyaame, ari piñaakeme osheki nowayerite kisawentenane, eero raakaantantana Judá-ite. Iro kantacha te ari nompinkathariwentante jaka.” <sup>37</sup> Rapiitanakeri Pilato rosampitanakeri: “¿Arima, eerokatakema Pinkathari?” Ari rakanake Jesús: “Eerokatake kantaintsiri. Iro notzimantakari, iro nipokantakari jaka kipatsiki nonkenkithatakotairo irooperori. Tema ikaatzi kamaitanaawori irooperori, ikemisantawaantetana.” <sup>38</sup> Ari ikantzi Pilato: “Irojatzitaweeacha, irooperori.” Ikantanakera, shitowanake ipiyotaiyakanira Judá-ite, ikantapairi: “Te noñi oita inkenakaashityaari jirika atziri.

<sup>39</sup> Poimoshirenkapiintziro Anonkoryagaantsi, pametapiintawo nomishitowi apaani raakaantaitziri. ¿Nomishitowakaantairima iitaitziri ‘Piwinkatharite?’ ” <sup>40</sup> Ari ikaimaiyanakeni maawoini, ikantaiyini: “¿Eero pomishitowiri jirika! ¡Iri pomishitowe Barrabás!” Jirika Barrabás, koshintzi rini.

## 19

<sup>1</sup> Ikanta Pilato ripasatakaantakeri Jesús. <sup>2</sup> Ikanta owayeripaini rimpitatake kitochee-tapo roshiyakaakero amanthairentsi, ramanthaitakaakeri Jesús. Ikithaatakaakari anashirikimawotatsiri kithaarentsi. \* <sup>3</sup> Ipiyowentapaari, ishirontawentawaitari ikantaiyirini: “¡Jirikaga Iwinkatharite Judá-ite!” Ripasawootzimaitari. <sup>4</sup> Eejatzí rishitowapai Pilato, ikantapairi Judá-ite: “Pamine, jirika nomishitowakeri te noñi oita inkenakaashityaari.” <sup>5</sup> Rishitowakaapaakeri Jesús ramanthaitakagaitakeri kitochee-tapo iitoki, ikithaataitakeri anashirikimawotatsiri kithaarentsi. Ikantzi Pilato: “¡Jirika atziri!” <sup>6</sup> Ikanta iñaawakeri reeware Imperatasorentsitaarewo eejatzí kempoyaan-taneripaini, ikaimaiyanakeni, ikantaiyini: “¡Pinkentakotakaanteri! ¡Pinkentakotakaanteri!” Irojatzí ikantantari Pilato: “Jirika paanairi eeroka pinkentakoteri, te noñi naaka oita inkenakaashityaari jirika.” <sup>7</sup> Rakaiyanakeni Judá-ite: “Eenitatsi Inintakaantaitanari naakapaini, ontzimatyé rowamagaiteri jirika, tema roshiyakaantashiwaitaka Itomi Pawa.” <sup>8</sup> Ikemawake Pilato ikantaiyakeni roshiyakaantaka Itomi Pawa rini, osheki ithaawanake. <sup>9</sup> Eejatzí ripiyanaa inthomoiki ipankoki, rosampitapaakeri Jesús: “¿Tsikama pipoñaaka eeroka?” Te raki Jesús. <sup>10</sup> Ikantanake Pilato: “¿Tema pakana? ¿Tema piyote pinkathariperori nini naaka, ari imatakya nonkentakotakaantemi, ari onkantakya eejatzí nomishitowakaantaimi?” <sup>11</sup> Rakanake Jesús, ikantzi: “Eero pipinkathariwentaatsikaitzime eero ikowakaimirome Jenokisatzi. Iro nokantantari naaka, iri maperotainchari ikaariperotake amakenari jaka, anaanakero piyaariperonka eeroka.”

<sup>12</sup> Ari rithotyaakowetanakawo Pilato romishitowakaantairime Jesús, iro kantacha eekero ikaimaiyatziini Judá-ite ikantaiyini: “¡Arika pomishitowakaantairi jirika, te paapatziyari piwinkathaperorite César! ¡Tema tzimatsirika oshiyakyaarine jirika, roshiyakaantashiwaitaka pinkatharime rinatyé, ikisaneentaitatziiri César!” <sup>13</sup> Ikanta ikemawake Pilato, ramakaantairi Jesús, ragaitanakeri ipiyotaiyakanira, roisaikapaakeri raminakoitapiintzirira yakowentaarewo, iitaitziro “Mapipankaari”, iro iitaitziri eejatzí Heber-thatoki “Gabata.” <sup>14</sup> Ari riwetsikawentaiyakawoni Anonkoryagaantsi roimoshirenkantaityaawori, tampatzikatapaake ooryaa. Ikantziri Pilato jirikapaini Judá-ite: “¡Jirika Piwinkatharite!” <sup>15</sup> Ikaimaiyanakeni jirikapaini, ikantzi: “¡Inkame! ¡Inkame! ¡Pinkentakotakaanteri!” Ikantanai Pilato: “¿Kantachama nonkentakotakaanteri

\* **19:2** Irootake rametapiintari pinkatharipaini ramanthaiyetawo poreryaayetatsiri, ikithaayetawo eejatzí kithaarentsi anashirikimawotatsiri.

piwinkatharite?” Rakaiyanakeni reeware Imperatasorentsitaarewo, ikantaiyini: “¡Apatziro César nowinkatharitetari, tekaatsi itsipa!” <sup>16</sup> Ikanta Pilato, romishitowanakeri inkentakotakaanteri. Raanakeri.

*Ikentakoitakeri Jesús irojatzi ikamantakari*  
(Mt. 27.32-50; Mr. 15.21-37; Lc. 23.26-49)

<sup>17</sup> Ikanta Jesús inatanakero inkentakoitantaariri, jatanake janta iitaitziri “Atziritoni”, irojatzi iitaitziri Heber-thatoki “Gólgota.” <sup>18</sup> Ari ikentakoitakeri, itsipatagaitakeri apite atziri, apaani rowatzikakoitake rakoperoki, rowatzikakoitakeri itsipa rampateki. <sup>19</sup> Ikanta Pilato rontarekakotakaanake osankenarentsi opoñaantari ikentakoitziri Jesús, kantatsiri: “JESÚS NAZARETSATZI, IWINKATHARITE JUDÁITE.” <sup>20</sup> Osheki Judá-ite ñaanatakerori jiroka osankenarentsi, te intainaperote nampitsi ikentakoitakerinta Jesús. Rosankenaitakero jiroka osankenarentsi Heber-thatoki, Grecia-thatoki, eejatzi Latín-thatoki. † <sup>21</sup> Iro ikantantakari reeware Imperatasorentsitaarewo, ikantziri Pilato: “Eero posankenatziro: ‘Iwinkatharite Judá-ite.’ Onkantatyeeme: ‘Oshiyakaantashiwaitachari iwinkatharite Judá-ite.’ ” <sup>22</sup> Iri kantacha Pilato, ikantanakeri: “Okaatzi nosankenatakeri, ari ashi owatyeeero osankenatakaga.”

<sup>23</sup> Ikanta owayeripaini ikentakotakerira Jesús, rayitanakeri imanthaki, ritotakero 4-kota ipawakaiyakawoni apaanipaini. Rayitzitakeri eejatzi iithaare, te owawimawota iroori, apamawo okanta rontyagaitakero. <sup>24</sup> Ari ikantawakaiyani owayeripaini: “Eero athatyaawaitziro jiroka, apatziro ñaaryaawentyaawo, ari ñeero iita ayerone.” Ari imonkaatari Osankenarentsiperi, kantatsiri:

Ipawakaayetakawo nomanthaki.  
Iñaaryaawentakawo noithaare.

Irootake rantaiyakerini owayeripaini. <sup>25</sup> Okanta janta ikentakoitakerira Jesús ari isaikitakari inaanate otsipatakawo irento, María iina Cleofas, eejatzi María Magdala-sato. <sup>26</sup> Ikanta Jesús iñaakero inaanate, otsipatakari riyotaanewo retakoperotane, ikantanakero inaanate: “Tsinané, iriitake pintomintaiyaari jirika.” <sup>27</sup> Ikantanakeri riyotaanewo eejatzi: “Iro pinaanatetai yaari jiroka.” Aripaite isaikapankotanakeri jirika riyotaanewo.

<sup>28</sup> Okanta awisayetake jiroka, yotake Jesús rimonkaatakerowa maawoini, ikaimanake: “¡Nomerewé!” Ari imonkaatari okenkithatakotakeriri Osankenarentsiperi. <sup>29</sup> Ari owakotakari kepishaari janta chomoki. Ragaitanake manthakintsi, rankow-itantaitakawo inchatewa, romitsitsiyaatakero kepishaariki, rowaankakoitakeniri ipaanteki Jesús. ‡ <sup>30</sup> Ratsimiyawakero Jesús jiroka kepishaari, ikantanake: “Thotyaapaaka maawoini.” Ari ithamenkotanaka, jatashirenkatanake.

*Rosataamerekitaitakeri Jesús*

<sup>31</sup> Ari imonkaatapaaka riwetsikawentapiintantaitawori kiteesheri rimakoryaan-taitari. Iro kaari ikowanta Judá-ite inkatziyakote ikentakoitakeri kiteesheriki rimakoryaan-taitari, tema jiroka kiteesheri iro ipinkathaperoitzi. Iro ikantantakariri Pilato intzinkaaporitakaanteri kentakotaarewo inkamantyaari intsipaite, rowatzikaryaakotairiita eejatzi. <sup>32</sup> Ikanta riyataiyanakeni owayeripaini, itzinkaaporitapaakeri itsipatakari Jesús ikentakoitziri, eejatzi itsipa. <sup>33</sup> Ari ripithokashiwetanakari Jesús, iñaatziiri kamake. Iro kaari itzinkaaporitanti irirori. <sup>34</sup> Ikanta apaani owayeri rosataamerekitantanakari rosataamento, ari iyowanake riraa otsipatanakawo ñaa. <sup>35</sup> Kenkithatziro jiroka, iriitake ñaakerori. Imaperotatya ikamantzimiri, pinkemisantayetai eerokapaini. <sup>36</sup> Awisantakari jirokapaini imonkaatatya okantzitakari Osankenarentsiperi: Eero itzinkayiwaitaitziri apaani itonki irirori.

† 19:20 Ikantaitziri jaka “Latín-thatoki”, iroowa riñaaneyetari Roma-satzi.

‡ 19:29 Kantakotachari jaka

“inchatewa”, iro ikantaitziri pairani “isopo”.



<sup>37</sup> Okantzitaka eejatzi Osankenarentsiperero:  
Ari raminakoitakeri rosataamerekitaitakeri.

*Ikitaitakeri Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Okanta okaatapaake jiroka, José Arimatea-satzi, ikowakotairi Pilato, ikantziri: “Pishinetenari naanairi Jesús.” Jirika José irijatzi kemisantakeriri Jesús, rimananeekiini ikemisantzi ithaawantari Judá-ite. Ikanta Pilato rishinetakeniri. Jatake José, raanairi.

<sup>39</sup> Ari ripokapaake eejatzi Nicodemo, jatashitakeriri pairani Jesús tsireniriki, ramakotapaake rowaitaitziri kasankari, osheki otenanka jiroka. § <sup>40</sup> Ikanta José itsipatakari Nicodemo raanairi Jesús, iponatantakariki manthakintsi rashetantakawo kasankari. Iro rametari Judá-ite arika inkitateri kaminkari. <sup>41</sup> Janta tsika ikentakoitakeri Jesús, tzimatsi pankirentsimashi, ari isaikiri owakerari omoona tsika ikitaitziri kaminkari, tekera ikitatantaitawoota. <sup>42</sup> Ari rowaitakeri Jesús, tema okaakiini isaiki jiroka omoonaki, irootzimatake areetya kiteesheri rimakoryaantapiintari Judá-ite.

## 20

*Rañaaantaari Jesús*

(Mt. 28.1-10; Mr. 16.1-8; Lc. 24.1-12)

<sup>1</sup> Okanta awisanake kiteesheri rimakoryaantaitari, ananinkanake María Magdala-sato iyaate omoonakiki rowaitakerira Jesús. Oñaapaatziro itainkake mapi rashitaitakawori omoonaki. <sup>2</sup> Piyana iroori ishiyaperotanakitya, iyaatashiteri Simón Pedro itsipatakari itsipa yotaarewo, retakoperotanewo Jesús, okantapaakeri: “¡Ragaitakeri Awinkatharite, te ayote tsikarika rowaitairi!” <sup>3</sup> Ikanta Simón Pedro itsipatakari itsipa riyotaanewo Jesús, jatanake kitataarewoki. <sup>4</sup> Rishiyanakitya apitekeroini. Rishiyaperotanakitya itsipa rookanakeri Pedro, iri etapaakawo rareetaka kitataarewoki. <sup>5</sup> Inetapitapaake omoonakiki, iñaapaakitziro omaryaamawotaka iponataitakariri, temaita ikyaapaake inthomoiki. <sup>6</sup> Areetapaaka Simón Pedro, ikyaapaake inthomoiki, iñaapaakero irirori omaryaamawotaka iponaitantakariri. <sup>7</sup> Iñiitapaakawo manthakintsi iponaitantakariri iitoki, inashita rowaitanakero te otsipatawo iponaitantakariri, kameetha ichonaankanake. <sup>8</sup> Ikyaapaake eejatzi itsipa yotaarewo etawetakawori rareeta kitataarewoki. Iñaapaakero okaatzi awisaintsiri, ari opoña ikemisantaperotanake. <sup>9</sup> Te ikemathatziro okantziri Osankenarentsiperero, aritake rañagai Jesús. <sup>10</sup> Irojatziri ripiyantanakari ipankoki jirika apite yotaarewo.

*Roñaagaawo Jesús María Magdala-sato*

(Mr. 16.9-11)

<sup>11</sup> Ari isaiki María omookeroki irawaita. Okanta irawaitaka, onetapitzi inthomoiki omoonakiki, <sup>12</sup> oñaatziiri apite maninkari okitamaakitake iithaare, risaikake tsika romaryaawetaitakarira Jesús. Apaani risaikake iitowetakaga, risaikake itsipa iitziwetakaga. <sup>13</sup> Ikanta maninkariite, rosampitakero ikantziri: “Tsinané, ¿iitaka piraantari?” Akanakeri iroori, okantzi: “Rayitaitakenari Nowinkatharite, te niyotzi tsika rowaitakeri.” <sup>14</sup> Ari ipithokanaka, oñaatziiri Jesús, temaita iyotawairi. <sup>15</sup> Rosampitanakero Jesús, ikantziri: “¿Iitaka piraantari tsinané? ¿Iitaka pithotyakotziri?” Oshiyakaatzi iroori iri ñaanatziro aminirori pankirentsi, okantanakeri: “Pinkathari, eerokarika aakeri, pinkamantena tsika powakeri, niyaateeta naminairi.” <sup>16</sup> Riñaanatanakero Jesús, ikantziri: “¡María!” Ari aminanakeri iroori, okantzi: “¡Raboní!” (iro ikantaitziri Heber-thatoki “Yotaantanerí.”) <sup>17</sup> Ikantziri Jesús: “Papanakaina, tema tekera niyaatziita nontsipatapaiyaari Ashitanari. Piyaate pinkamanteri iyekiite, iro niyaatai nontsipatapaiyaari

§ 19:39 Jiroka kasankari, rowaitaitakero mirra, rowaitaitzitakawo eejatzi owaa inchashi iitaitziri áloe. Osheki otenanka okaatzi 100 libra, iro ikantaitziri iroñaaka 30 kilo.

Ashitanari tsika itzimi Ashitzimiri eejatzi eerokapaini. Iri Nowawanetari naaka, irijatzi Piwawanetzitari eerokapaini.” <sup>18</sup> Okanta iyaatanake María Magdala-sato, okamanta-paakeri maawoini iyotaarewo oñagairi Awinkatharite, okamantapaakeri eejatzi okaatzi ikantawakerori.

*Roñaagaari Jesús riyotaanewoite*

(Mt. 28.16-20; Mr. 16.14-18; Lc. 24.36-49)

<sup>19</sup> Okanta otsirenitanake awisanake rimakoryaantaitari kiteesheri, piyotaiyakani riyotaanewo rashitakotaiyakani shintsiini ithaawantari Judá-ite. Ari ikyaapaake Jesús, ikatziyimotapaakari, riwethatapaari ikantapairi: “¡Pisaikayetai kameetha eerokapaini!” <sup>20</sup> Ikanta riwethatapaakari, roñaagapairi rako, eejatzi imereki. Kimoshire-taiyanakeni jirikapaini iñaawairira Awinkatharite. <sup>21</sup> Rapiitanakeri Jesús, ikantziri: “¡Pisaikayetai kameetha eerokapaini! Rotyaantakena naaka Ashitanari, ari nonkan-temiri eejatzi eerokapaini notyaantayetaimi.” <sup>22</sup> Ritasonkakeri riyotaanewopaini, ikantziri: “Risaikashiretantaimi Tasorenkantsi. <sup>23</sup> Inkaate pimpeyakotairi eeroka jaka, ari ipeyakoitairi janta. Iriima kaari pimpeyakoyetai eeroka jaka, te ipeyakoitairi eejatzi.”

*Iisoshirenka Tomás*

<sup>24</sup> Ikanta Tomás kaatatsiri 12 yotaarewo, iitaitziri eejatzi “Tsipari”, te risaiki irirori raretantapaakari Jesús. \* <sup>25</sup> Ikanta itsipapaini yotaarewo ikamantairi, ikantziri: “Noñagairi Awinkatharite.” Rakanake Tomás, ikantzi: “Eerorika noñagairi tsika ikentawakoitakeri, eerorika nokyaantawakotari rakoki, eerorika nokyaantamerekitari eejatzi, eero nokemisantzi.”

<sup>26</sup> Okanta awisanake 8 kiteesheri, rapiitairo yotaarewo ipiyotaiyani. Ari risaikitakari eejatzi Tomás irirori. Rashitakoiyakani kameetha, iri kantacha Jesús kyaapaake, ikatziyimotapaari, riwethatapaari ikantapairi: “¡Kameetha pisaikaiyini eerokapaini!” <sup>27</sup> Ikantapaakeri Tomás: “Jiroka nako, pinkyaantawakotena, pinkyaantamerekitena eejatzi. Eero pikisoshirewaitzi, ¡Pinkemisantel!” <sup>28</sup> Rakanake Tomás, ikantanake: “¡Nowinkatharité, Nowawané!” <sup>29</sup> Ikantzi Jesús: “Iro pikemisantamatsitantanakari piñaakenaga. ¡Kimoshirera inkantaiya inkaate kemisantainane kaari ñaanari!”

*Oita rosankenaitantawori jiroka*

<sup>30</sup> Osheki rapiipiintakero Jesús ritasonkawentzimoyetanairi riyotaanewoite, te osankenatakoyeta jaka. <sup>31</sup> Iroowa osankenayetantakari jirokapaini pinkemisantantayeyaari, jirika Jesús iriitake Cristo, Itomi Pawa. Arika paakotapiintanairi iwairo pinkemisantanairi, aritake inkañaanetakaayetaimi.

## 21

*Roñaagari Jesús 7 Riyotaanewo*

<sup>1</sup> Okanta okaatapaake jiroka, rapiitakero Jesús roñaagari riyotaanewo, inkaarecheraki iitaitziri Tiberias. Jiroka okantaka. <sup>2</sup> Ari itsipatawakagaiyani risaiki Simón Pedro, Tomás, iitaitziri “Tsipari”, Natanael, poñaachari Caná-ki saikatsiri Galilea-ki, itomipaini Zebedeo, eejatzi apite itsipa yotaarewo. \* <sup>3</sup> Ari ikantanake Simón Pedro: “Niyaatatye nontarajaate.” Ikantaiyini itsipa: “Ari ankaatanake.” Jataiyanakeni, otetaiyapaakani pitotsiki. Tekaatsimaita raye itarajaawetaka tsireniriki.

<sup>4</sup> Okanta okiteeshetzimatake, katziyapaaka Jesús omapipookitzira inkaare. Te riyotawairi riyotaanewo. <sup>5</sup> Ikaimotapaakeri, ikantziri: “Mainariité, ¿Te payi?” Rakaiyanakeni iriroripaini: “¡Tetaawé!” <sup>6</sup> Ikantzi Jesús: “Powiinkero pakoperoki pitarajaamento, ari paake.” Rowiinkakero tsika ikantaitakeri. Raake osheki shima,

\* **20:24** Ikantakoitziri jaka “Tsipari”, irijatzi iitaitziri pairani “Dídimo”. \* **21:2** Ikantakoitziri jaka “Tsipari”, irijatzi iitaitziri pairani “Dídimo”.

te raawyagairo inoshikairo itarajaamento. <sup>7</sup> Ikanta yotaarewo retakoperotanewo Jesús, ikantanakeri Pedro: “¡Iriitake Awinkatharite jirinta!” Ikemawake Simón Pedro, tema raatonkoryaawetakitya iithaare, ikithaataanaawo, rimitaakaanakero inkaareki. <sup>8</sup> Iriima itsipapaini yotaarewo pitotsiki ikenakoyetanai inoshikakotairi ishimane, iro-jatzi raatakotantapaari omapipookitzira. Tema risaikakotakitzi niyankyeeronkaini. †

<sup>9</sup> Ikanta rayiitaiyapaakeni, iñaapaakitzi oisaka paampari, ari ritashitakeri shima, itsipataitakeri pan. <sup>10</sup> Ari ikantzi Jesús: “Pamake shima owakera paakeri.” <sup>11</sup> Ikanta Simón Pedro, roosoryaakotakeri ishimane, inoshikakotakeri irojatzi omapipookitakera. Antaripaini ikanta shima, ikaatzi 153. Temaita isagayi itarajaamento. <sup>12</sup> Ikantzi Jesús: “Jame oya.” Tekaatsi apaani yotaarewo osampiterine iitakarika, tema riyoperotaiyakerini iriitake Awinkatharite. <sup>13</sup> Raakero Jesús pan, ipayetakeri apawopaini, ari ikantakeri eejatzi shima. <sup>14</sup> Irootake mawatanaintsiri roñaagari Jesús riyotaanewoite rañagaira.

### *Pinkempoyagainari nowejate*

<sup>15</sup> Rithonkanakero rowaiyani, rosampitanakeri Jesús jirika Simón Pedro, ikantziri: “Simón, itomi Jonás, ¿Pinintaperotanama eeroka?” Ikantzi Pedro: “Piyotzi eeroka Pinkathari, naapatziyimi.” Ikantzi Jesús: “Pinkempoyagainari noshiyakayiri nowejate.” <sup>16</sup> Rapiitakeri rosampitziri: “Simón, itomi Jonás, ¿pinintanama?” Ikantzi Pedro: “Piyotzi eeroka naapatziyimi.” Ikantzi Jesús: “Pinkempoyagainari noshiyakayiri nowejate.” <sup>17</sup> Iro mawatatsiri rosampitziri, ikantziri: “Simón, itomi Jonás, ¿pinintanama?” Ari rowashiretanaka Pedro, tema mawa rosampiminthatakeri, ari rakake: “Pinkatharí, eerokatake yotzirori maawoini, piyotzi eeroka nonintzimi.” Ikantzi Jesús: “Pinkempoyagainari noshiyakayiri nowejate. <sup>18</sup> Tema eeniro pimainaritziri, pikithaata pikenayetantari tsika pinintakaawo. Irooma arika pantarikitapaake, apatziro powaankawakotaiya, itsipa kithaataimine, raayetaimi tsika te pikowawetawo piyaate. Imaperotatya.” <sup>19</sup> Ikantantakawori Jesús jiroka, ikowatzi inkemathaitero eero ikamita Pedro irojatzi rantyashiparikitantakya, iroowa impinkathaitantyaariri Pawa. Ikanta Jesús ikantanakeri Pedro: “¡Poyaatena!”

### *Yotaarewo retakoperotanewo*

<sup>20</sup> Ikanta ripithokanaka Pedro, iñaatzi royaatakeri retakoperotanewo Jesús, iri shentakeriri Jesús rowaiyani pairani, osampitakeriri, ikantziri pairani: “¿Pinkatharí, iitaka pithokashitemine?” <sup>21</sup> Iñaawakeri Pedro jirika impoitapaintsiri, rosampitanakeri Jesús: “Pinkatharí, jirika, ¿iitaka awishimoterine irirori?” <sup>22</sup> Ikantzi Jesús: “Arime nonkowe ari rañaaperotakeme jirika, irojatzi nipiyantakyaari paata, te okowajaanta piyotero jiroka. Poshiretaina eeroka.” <sup>23</sup> Okanta paata ithonka iyaatakotanake rakakeriri Jesús jirika Pedro, ikemayetakero maawoini iyekiite, roshiyakaatzi eero ikamita jirika yotaarewo rosampikowentakeri Pedro. Iro kantacha, tera inkantatye Jesús: “Ari nokowi rañaaperote...” Jiroka ikantajaantakeri: “Arime nonkowe ari rañaaperotakeme jirika, irojatzi nipiyantakyaari paata, te okowajaanta piyotero jiroka?”

<sup>24</sup> Naaka kenkithatakotaincha nokantake “jirika yotaarewo”, tema naaka osankenatakerori jiroka osankenarentsi. Iro riyoperotantaitari imaperotatya jiroka.

<sup>25</sup> Te nonkenkithatakotero maawoini rantayetakeri Jesús, tema osheki okanta. Arime osankenatakoyetyaame maawoini, aritakeme anaanakero maawoini kipatsi ompiyotyaaame osankenarentsypaini. Ari onkantaitaatyeeyaani.

† 21:8 Kantakotachari “niyankyeeronkaini”, okaatzi osanthatzi “200 akosampi”, irojatzi ikantaitairi iroñaaka “100 metro”.

## RANTAYETAKERI OTYAANTAPERORIITE

### *Ikashaakagaitziri Tasorenkantsi*

<sup>1</sup> Teófilo, pairani owakera netantanakawori notyaantzimiro nosankenare, ari nokenkithatakotakemiro maawoini rantayetakeri Jesús, nokenkithatakotakemiro eejatzi okaatzi retanakari riyotaantziri, <sup>2</sup> irojatzii monkaatantapaakari reethonkitai inkiteki. Tekera reethonkitaita, riyoyaakeri Rotyaantaperotaarewo, ikantakaakari Tasorenkantsi, riyotakaakeri oitarika rantayeteri. <sup>3</sup> Ikanta ikamawetaka, iñagaitawairi koñaawoini, ari riyotaiyini riyotaanewo añagai. Okaatzi 40 kiteesheri roñaagapanaantari riyotaanewo, riyotaapanaantziri jimpe ikanta ipinkathariwentantzi Pawa. <sup>4</sup> Eeniro itsipayetari Rotyaantaperore, ikantzitakar irojatzii risaikayetawake Jerusalén-ki, ikantakeri: “Ari poyaawentawakya imonkaatya okaatzi ikashaakaakemiri Ashitanari, nokenkithatakotzitakemiri. <sup>5</sup> Tema imapero Juan romitsitsiyaatantakawo ñaa, iro kantacha eero osamanitzimaita piñaayetantyaariri Tasorenkantsi risaikashiretantemi oshiyawaitakawome romitsitsiyaatantatyeemiri.”

### *Reethonkitantaari Jesús*

<sup>6</sup> Ikanta jirikapaini tsipatakariri Jesús, rosampitakeri, ikantziri: “Pinkatharí, ¿Irootaintsima pookaawiritaantairi nosheninka Israel-iite?” <sup>7</sup> Ari rakanakeri Jesús, ikantziri: “Te okowajaanta piyotero eerokapaini tsikapaite, apatziro riyotzi Ashitanari tsikapaiterika, iriitajaantake oshekitzimotzi ishintsinka rantantyaawori. <sup>8</sup> Iro kantacha arika ripokake Tasorenkantsi risaikashiretantapaakemi eerokapaini, iriitake aawyaashiretakaimine, iro ompoñaantyaari piyaayetanake pinkenkithatakotaina naaka Jerusalén-ki, maawoini janta Judea-ki eejatzi Samaria-ki, irojatzii intaina jimpe iweyaapaa kipatsi.” <sup>9</sup> Ithonka ikenkithawaitakero jiroka, raminaminthaitziri riyotaanewo, eethonkitairo Jesús, irojatzii ipeyantapaakari menkoriki, te iñagaitanairi. <sup>10</sup> Raminaminthaitziri jimpe ikanta Jesús reethonkitai inkiteki, apite atziri katziyimotapaakari kitamaaniki iithaare, <sup>11</sup> ikantapaakeri: “Galilea-satzi, ¿litaka paminiri inkiteki? Piñaakeri jimpe ikanta Jesús riyatai, ari inkantaiyaari eejatzi paata arika ripiye.”

### *Raminake itsipa poyaatyaarine Judas*

<sup>12</sup> Ikanta ripiyaiyaani riyotaanewo janta Jerusalén-ki ipoñagaawo otzishiki iitaitziri Olivo, te osamaniperote, ishinetaantsita ranashiyeetya kiteesheriki rimakoryaantaitari. <sup>13</sup> Ikanta rareetaiyaani nampitsiki, ataitaiyapaini jenokinta pankotsi tsika rimaapiintaiyini. Jirika ikaataiyini: Pedro, Jacobo, Juan, Andrés, Felipe, Tomás, Bartolomé, Mateo, Jacobo itomi Alfeo, Simón iitaitziri “Jokaakotantaneri”, ipoñaapaaka Judas irirentzi Jacobo. <sup>14</sup> Maawoini jirikapaini ari ikantaiyapiintatyaani ipiyotaiyani ramanaiyani itsipayetakari irirentzi Jesús, itsipatawo María inaanate, eejatzi otsipaini tsinane.

<sup>15</sup> Ikanta ipiyotaiyani kemisantzinkaripaini, ikaataiyini 120 atziri. Ari ikenkithawaitanake Pedro, ikantanake: \* <sup>16</sup> “Iyekiiite, monkaataka okaatzi rosankenatakaakeriri Tasorenkantsi pairani David-ni, ikenkithatakotakeri Judas jewatapaintsiri raakaantziri Jesús. <sup>17</sup> Jirika Judas iri atsipatapiintawetari antawaireki. <sup>18</sup> Iro kantacha raakeri koriki ripinataitakeriri iyaariperonka, ramanantantakawo kipatsi. Ari iparyaakeri janta Judas, rowatziitotanaka, rithonka ritankawaitapaake, jokaporenthakeerekiwaitapaaka isheeto. <sup>19</sup> Ikanta ikemaiyakeni Jerusalén-satzi, iitakero kipatsi ‘Iraantsipatha’, iitziro riñaaneki iriroripaini ‘Acéldama.’ <sup>20</sup> Tema osankenarentsiki Salmo-ki, ikantaitake: Kaankithaante onkantya ipanko,

\* **1:15** Ikantaitziri jaka kemisantzinkaripaini, irijatzi iitaitziri “iyekiite”.

Tekaatsi saikantaiyaawone.

Ikantaitake eejatzi:

Intzime itsipa poyaataiyaarine rantawaireki.

<sup>21</sup> Eenitatsi jaka atziripaini tsipatapiintakairi eeniro itsipawetai Awinkatharite Jesús, <sup>22</sup> atsipatzitakari owakeraini romitsitsiyaataka Jesús irojatzí reethonkitantaari inkiteki. Ontzimatyé aminai antsipataiyaari ñiitakariri eejatzi Jesús rañagai.” <sup>23</sup> Irojatzí rookotaitantanakariri José, iitaitziri Barsabás, iitaitziri eejatzi Justo, ipoñaapaaka Matías. <sup>24</sup> Ari ramanakowentanakari, ikantzi: “Pinkatharí, eeroka yotashiretziriri maawoini, jirika apite nookotakeri, poñaayenari jimpe itzimi pinintakeri eeroka, <sup>25</sup> iriitake nontsipataiyaari notyaantaperoritari nantawaitaimi, ripoyaataiyaari Judas-ni opeyakaashitakari iyaariperonka irirori. Tema Judas, jatake irirori tsika inintakagaitakeri. <sup>26</sup> Irojatzí roshiyakaantanakawori jirikapaini iñaaryaataita, iñaatziro iriitake Matías. Iriitakera Matías kaatanairiri jirikapaini 11 Otyaantaperoriite.

## 2

### *Ripokantakari Tasorenkantsi*

<sup>1</sup> Okanta imonkaatapaa roimoshirenkantaitawori kiteesheri “Owiitaantsi”. Ipiyotaiyaani maawoini riyotaanewo Jesús. \* <sup>2</sup> Ari omapokapaakari antawoite kamenitapaintsiri oshiyawetapaakawo antawo tampyaa, okenapaake jenoki inkiteki, ookantapaakawo pankotsi risaikaiyakenira. <sup>3</sup> Iñaawakitzi paampashithakeerekitapaintsiri, opeyantapaakari apanipaini ikaatzi piyotainchari. <sup>4</sup> Maawoini risaikashiretantapaakari Tasorenkantsi. Ari retanakawo riñaawaiyetanakero otsipasato ñaantsi, iriitakera Tasorenkantsi ñaawaitakaanakeriri.

<sup>5</sup> Okanta janta Jerusalén-ki, ari risaikayetziri Judá-ite poñaayetachari intaina otsipaki nampitsi. Iriiyetake pinkathatasorentsitaneripaini. <sup>6</sup> Ikanta ikemaitakero kamenitapaintsiri, ripokaiyapaakeni osheki atziri, te riyotawakero oita awisatsiri, tema ikemathatakero apanipaini ñaantsi okaatzi riñaawaiyeetziri, irootake riñaane. <sup>7</sup> Iyokitzi ikantayetanaka, ikantawakagaiyani: “¿Tema Galilea-satzi rinatzi ñaawaiyetakerori otsipasato ñaantsi? <sup>8</sup> ¿Tsika okantaka akemantariri riñaawaitziro añaanepaini aaka? <sup>9</sup> Tema atsipayetakari jaka Parto-satzi, Medo-satzi, Elam-satzi, Mesopotamia-satzi, Judea-satzi, Capadocia-satzi, Ponto-satzi, Asia-satzi, <sup>10</sup> Frigia-satzi, Panfilia-satzi, Egipto-satzi, eejatzi Africa-satzi jekaatapai Cirene. Tema atsipatakari eejatzi poñaayetachari Roma, Judá-ite eejatzi kaari Judá-itetatsi pairani. <sup>11</sup> Eejatzi Creta-satzi, ipoñaapaaka Arabia-satzi. Ari atsipatakari maawoini irirori akemayetakeri riñaawaitantayetakawo añaanepaini, ikenkithatakotziri Pawa ritasonkawentantzi.” <sup>12</sup> Iyokitzi ikantanaka atziripaini, te riyotzi oita iñiiri. Ikantawakagaiyani: “¿Oitaka jiroka?” <sup>13</sup> Iro kantacha tzimatsi atziri thainkantaneri, ikantayetzi irirori: “¡Ishinkitaiyayaani jirikapaini!”

### *Retantanakawori ikenkithatanake Pedro*

<sup>14</sup> Ikanta ikatziyanaka Pedro irirori, itsipatakari Otyaantaperoriite ikaatzi 11, ikenkithawaitanake shintsiini, ikantzi: “¡Asheninká! ¡Jerusalén-satzipaini! Pinkemisantawakena piyotantyaari. <sup>15</sup> Piñaawetaka eerokapaini ishinkitayati jirikapaini. Te, tema owakera reenokiityaapaake ooryaa. † <sup>16</sup> Imonkaatatya okaatzi rosankenatakeri pairani Kamantantaneri Joel-ni, ikantake:

<sup>17</sup> Ikantzi Pawa:

Tzimatsi awisatsine weyaantapaakyaawone kiteesheri.

Ari notyaantakeniri atziripaini Notasorenka oshiyawaitakawo risakoperoitatyeenirime.

\* **2:1** Kantakotachari jaka “Owiitaantsi”, irojatzí ikantaitzitari “Pentecostés”. † **2:15** Kantakotachari jaka “reenokiityaapaake ooryaa”, irootake ikantaitziri pairani “ooryaa 3”. Okaatzi rametari Judá-ite irirori, te ishinkineta owakera okiteeshetamanai.



Ari inkenkithatakoyetanaina itomipaini eejatzi rishintopaini.

Ari iñaawyaawaitakya mainaripaini,  
Eejatzi antarikitaintsiri rimishiwaiyetai.

<sup>18</sup> Ari nonkantakeri ewankaripaini ronampireyeetari, eejatzi ewankawopaini.  
Notyaantainiri Notasorenka paata, ari inkenkithatakaantayetai.

<sup>19</sup> Ari iñagaitake inkiteki kaari iñaapiintaitzi.

Iñagaitero kipatsiki iraantsi, paampari, antawo oyachaarinka.

<sup>20</sup> Iñagaiteri ritsiwakimate ooryaatsiri,  
Iñagaiteri eejatzi kashiri riratzimotante,  
Irootaatsi iyomaataiya kiteesheri ripokantaiyaari Pinkathari.

Tema antawo rowaneenkawo onkantaiya.

<sup>21</sup> Inkaate aakotairine iwairo Pinkathari, rawentaayetaari, iriiyetake awisakoshiretaatsine.

<sup>22</sup> ¡Shiramparipaini! ¡Israel-iite! Pinkemaiyeni nonkante. Piñagaiyakerini eeroka, jirikaganki Jesús Nazaret-satzi, iriitake rotyaantakemiri Pawa. Ritasonkawentayetakemi, roñaagayetakemiro kaari piñaaweta pairani. <sup>23</sup> Iro kantacha, ramaitapaakemiri jirika, powamaakaanakeri eerokapaini ikentakotakeri kaariperoshireripaini, ari imonkaatakari onkaate awishimoterine, tema irootake ikenkithashiriitakari Pawa. <sup>24</sup> Ikanta rowiriintairi Pawa ikamawetakaga, te rishinetairi inkemaatsiwaitaiya. Tema te okitsirinkiri kaamanetaantsi. <sup>25</sup> Tema iri rosankenatakotakeri pairani David-ni, ikantake:

Noñaapiintziri Nowinkatharite itsipatana.

Tema risaiki nakoperoki, tekaatsi kitsirinkerine.

<sup>26</sup> Irootake nokimoshiretantari,  
Kameniwaante nokanta nothaamentawentari.  
Iriitake noyaakoperotairi, nawentagaiyaarini.

<sup>27</sup> Tema eero pookanawentanawo noshire sarinkaweniki arika nonkamawetakya.

Eero pishinetziro ipathaye nowatha, pitasorentsine ninatzi.

<sup>28</sup> Piyotaakenawo jimpe nonkantya nañaashiretai.

Osheki poimoshirenkaina arika nontsipataimi.

<sup>29</sup> Iyekiite, ayotaiyini aaka te iri acharine David-ni kenkithatakotachane jaka, kamaake pairani irirori, ikitaitakeri, irojatzzi risaiki iroñaaka jimpe ikitataka. <sup>30</sup> Tema Kamantantaneri rinake irirori, riyotzitaka pairani tzimatsi ikashaakaakeriri Pawa, ari impinkatharitakagairi apaani incharinentyaari. ‡ <sup>31</sup> Tema oshiyawaitakawo iñaakityeerome David-ni, ikenkithatakotakero rañagai Cristo, ikenkithatakotakeri eero risaiki sarinkaweniki, eero ipathai eejatzi iwathaki. <sup>32</sup> Iriitake añaakagairiri Pawa jirika Jesús. Imaperotatya maawoini noñagaiyawairini naaka. <sup>33</sup> Ari reethonkitai, risaikimotapairi rakoperoriki Pawa ipinkathariwentantapai. Ari imonkaatari okaatzi ikashaakayitakairi pairani Ashitairi, tema rotyaantakairi Tasorenkantsi oshiyawaitakawo risakoperoitaatyainirime. Irootajaantakera piñaayetakeri iroñaaka. <sup>34</sup> Tema kaari David-ni eethonkitaatsine inkiteki iriitake kenkithatakakerori pairani jiroka, ikantake:

Ikenkithawaitake Pinkathari, ikantawairi Nowinkatharite:

Pisaikapai nakoperoki ampinkathariwentante.

<sup>35</sup> Irojatzzi paata nowasanketantaiyaariri kisaneentakemiri,

Ari pimakoryaayitizantaiyaari.

<sup>36</sup> ¡Asheninká! iro kameethatatsi ayotaiyeroni jiroka maawoini aakapaini icharineyetaira Israel-ni. Jirika Jesús pikentakotakaanakeri eerokapaini, iri ipinkatharitakaanakeri Pawa, irijatziita Cristo.”

‡ 2:30 Tzimatsi osankenarentsi aakotziriri iwairo Cristo risaikimotairi Pawa tsika ipinkathariwentantzi irirori.

<sup>37</sup> Ikanta ikemaiyawakeni ikaatzi piyotainchari, antawoite ithaawashiryaaanake, rosampitanakeri Pedro, eejatzi itsipapaini Otyaantaperoriite, ikantaitanakeri: “Iyeki-ite, ¿jimpe nonkantaiyaaka naaka?” <sup>38</sup> Ari rakanakeri Pedro: “Pipiyashireyetai, pomitsitsiyaawentaiyaari Jesucristo, paakoyetanairi iwairo. Iro riyotantaityaari impyakotakagaimiro Pawa pikaariperowetaka, ari risaikashiretantaime Tasorenkantsi. <sup>39</sup> Irootake ikashaakagaitakemiri eejatzi eeroka, irojatziki ikashaakayitaitakariri pitomipaini, eejatzi ikaatzi nampiyetawori intaina. Tema maawoini ikaimashireyeetairi iri-itake ikashaakayitaitakariri eejatzi irirori.” <sup>40</sup> Osheki okaatzi ikenkithatakotakeri Pedro, ishintsithatantakariri eejatzi, ikantayetakeri: “¡Powawisaakoshiretya! ¡Pintainaryaapithateri atziripaini kenashiwaiyetainchari!” <sup>41</sup> Irojatziki ikemisantantanakariri osheki atziri, omitsitsiyaayetanaaka, ikaatzi 3,000 atziri kemisantanaaintsiri. <sup>42</sup> Kisokero rowanakeri okaatzi riyotaayetakeriri Otyaantaperoriite, kameetha raapatziyawakaanaka. Ari itzipetowapiintaiyironi pan, ikamaitanakawo eejatzi ramanaiyani. §

### *Rañaantare etayetanakawori ikemisantzinkaritziki*

<sup>43</sup> Riyokitziwentanakeri iñaakerowa ritasonkawentantayetake Otyaantaperoriite, rantayetakeri kaari iñagaitapiintzi. <sup>44</sup> Osheki raapatziyawakaanaka ikaatzi kemisan-tanaatsiri, rantetaawakaanawo okaatzi oshekitzimoyetziriri. <sup>45</sup> Ipimantayetziro oshekitzimoyetziriri. Rayi koriki ipayetziri itsipapaini kemisantanaatsiri ashironkaayetachari. <sup>46</sup> Ari ikantaitanaatya kiteesheriki raapatziyawakaanaka ipiyotaiyani tasorentsipankoki. Te ripakaanakeri ikaimawakaiyani ipankoki rowaiyaani, ari itzipetowirori pan. Kimoshire ikanta itsipatawakaiyani, itsinampashireyetana. <sup>47</sup> Ithaamentapiintanakariri Pawa. Iro inimoyetakeriri atziripaini iñaayetakeri jimpe ikantayetanaa. Ari okantaitanaatya kiteesheriki roshekyiiri Awinkatharite kemisantzinkaripaini inkaate awisakoshireyetaatsine.

## 3

### *Retsiyatakotakagaitziri kisopookiri*

<sup>1</sup> Okanta otsipa kiteesheri, tsireniityaanake ramanapiintaitantari. Ari ritonkaanakeri Pedro itsipatanakariri Juan, riyaaero tasorentsipankoki. \*  
<sup>2</sup> Ari ritonkyotakotantaka ramaitziri kisopookitatsiri. Rashi rowiro owakera itzimapaake. Maawoini kiteesheri ramaitapiintziri omooki tasorentsipanko iitaitziro “Owaneenkaanto”. Ari risaikapiintziri impashiyetantyaariri koriki ikowakoyetziriri kyaayetatsiri. <sup>3</sup> Ikanta jirika iñaawakeri Pedro itsipatakariri Juan, iro inkyaantapaakyaarime tasorentsipankoki, ikowakotawakeri impashitanakyaari koriki. <sup>4</sup> Ari ipampoyaanakeri. Ikantziri: “¡Paminena!” <sup>5</sup> Ikemisantatziki kisopookiri, roshiyakaatzi impatyeeri jimpe oitya. <sup>6</sup> Iri kantacha Pedro, ikantanakeri: “Tekaatzi noorikite, te itzimi eejatzi ooro, iro kantacha eenitatsi nantzimotemiri. ¡Pinkatziye! ¡Panashitai! Naakotatzimiri iwairo Jesucristo Nazaret-satzi, iriitake antemirone.” <sup>7</sup> Rakathatakeri, ipiriintakeri. Omapokashitanaka ishintsitanai iitziki eejatzi ishoonketziki. <sup>8</sup> Ari rimitaanake ikatziyanaka, anashitanaka. Itsipatanakariri jirikapaini ikyaapaake tasorentsipankoki, anashiwaitanaawo, mitaamitaawaitanai, ithaamentanaari Pawa. <sup>9</sup> Ithonka iñagaitakeri ranashitanaa, ikemaitakeri eejatzi ithaamentawaita. <sup>10</sup> Riyokitziwentaitanakeri iñagaitakerowa awisaintsiri, te

§ 2:42 Kantakotachari jaka “itzipetowiro pan”, iro rantayetanairi kemisantzinkaripaini arika inkenkithashiryaaakoteri Jesucristo ikamimotantake. Ari ikantziro rakiyootawakagaiyani, itzipetowiro pan, rowaiyani, riraiyini eejatzi imere. Tema roshiyakotatyaari Jesús tsika ikantanairo riweyaantanaawo rowakaanakaari riyotaanepaini. Irootake ikenkithatakotapiintaitakeri, ikantaitzi “Pintzipetowero pan.” \* 3:1 Kantakotachari jaka “tsireniityaanake”, irootake ikantaitziri pairani “ooryaa 9”.

rikompiyeetawakari jirika, iriitake kowakotantapiintatsiri impashiyeetyaari janta omooki tasorentsipanko, iitaitziri “Owaneenkaanto”.

*Ikenkithatakaantzi Pedro ikyaapiintaitzira tasorentsipankoki*

<sup>11</sup> Ikanta kisopookiwetachari, te rookanakeri Pedro itsipatakari Juan. Iyokitzi-wenta rowanakeri atziripaini, intsipaiteperoini ipiyowentapaakari awisashetakera tasorentsipanko iitaitziro “Rashi Salomón”. <sup>12</sup> Ikanta iñaawakeri Pedro, ikantawakeri: “¡Shiramparipaini! ¡Judá-itel! ¿Iitaka piyokitziwentantanari? Eero pikenkithashiryaashi-waita naaka ashitawo noshintsinka, naaka tasorentsi nimatantariri nanashitaka-gaari jirika. <sup>13</sup> Iwawane Abraham-ni, Isaac-ni, Jacob-ni, iwawanetanakari eejatzi acharineete, iriitake matakero jiroka, ari onkantya impinkathaitantyaariri Itomi Jesús, paakaantakeri eerokapaini janta jewaripainiki. Ikwawetaka Pilato romishi-towakaantairime, te pikowimaita eerokapaini. <sup>14</sup> Iriitakeme pomishitowakaantaima Tasorentsitsiri, matzirori itampatzikashiretzi, pomishitowakaantashitaari tsitokan-taneri. <sup>15</sup> Iro opoñaantari powamaantakariri añaashiretakaantaneri. Iri kantacha Pawa rowañagairi. Noñagaiyawairini naakapaini rañagai. <sup>16</sup> Okaatzi etsiyatakotak-agairiri kisopookiri piñaapiintziri eerokapaini, iro matakaakeriri rawentaashirenka ikemakenaga naakotakeri iwairo Jesús. Irootake piñaantakariri iroñaaka retsiyatakotai kameethaperoini. <sup>17</sup> Iyekiite, niyotzi naaka, te piyoperotero okaatzi pantayetakeri, ari roshiyakemi eejatzi peewarepaini. <sup>18</sup> Ari ikenakairori Pawa rimonkaatziro okaatzi ikenkithatakaayetakeriri maawoini Kamantantaneriite, ikantake: ‘Aritake inkemaat-sitakagaitakyaari Cristo paata.’ <sup>19</sup> Irootake pipiyashitantaiyaariri eerokapaini Pawa, pipakaayetairo piyaariperonka, oshiyawaitaiyaawome roshetakotaatyeeerome irirori pikaariperowetakaga. Ari piñagairo intsipashiretairi Awinkatharite, retsinaryaashire-takagaimi. <sup>20</sup> Aritake rotyaantairi Pawa eejatzi Jesucristo, tema ikashaakayitakemiro pairani aritake ripiye. <sup>21</sup> Onkantawetakya risaika Jesucristo inkiteki irojatziki inkowa-paitetantakyaari Pawa rowakeratakagairo maawoini okantawetaga pairani. Iro ikenkithatakaayetakeriri Tasorentsishireri Kamantantaneriite. <sup>22</sup> Iro ikenkithatako-takeri pairani Moisés-ni, ikantake:

Ari rotyaantake paata Pawa itsipa Kamantantaneri, ari roshiyapaakena naaka rotyaan-takenaga.

Asheninka rinatye. Maawoini inkamantayetapaakairi, ontzimatye ankemisantero.

<sup>23</sup> Maawoini kaari kemisanterine jirika Kamantantaneri, ari rithonkayeetakeri, Eero iñagairi isheninkapaini.

<sup>24</sup> Ari roshiyakari eejatzi Samuel-ni, ikenkithatakotakero okaatzi añaayetakeri iroñaaka, irojatziki ikenkithatakoyetakeri eejatzi maawoini itsipapaini Kamantantaneriite.

<sup>25</sup> Eerokayetake ñeerone okaatzi ikowakaantakeri Pawa ikenkithatakoyetakeri Kamantantaneriite. Eerokayetake ñeerone eejatzi okaatzi raapatziyawakaantari pairani Pawa itsipatakari acharineete. Tema Pawa ikantakeri Abraham-ni:

Iri picharine tasonkawentairine maawoini sheninkatawakagaachari tsikarikapaini janta kipatsiki.

<sup>26</sup> Ikanta rowañagairi Pawa itomi, retakeri rotyaantakemiri eerokapaini, ompoñaantyaari ritasonkawentemi. Iroowa pipakaantaiyaawori maawoini eerokapaini piyaariperonka.”

<sup>1</sup> Ikanta Pedro itsipatakari Juan ikenkithatakaayetziri atziripaini, areetaiyapaakani Imperatasorentsitaarewo, itsipatapaakari reeware kempoyiirori tasorentsipanko, eejatzi Sadoc-iite. <sup>2</sup> Ikisaiyatyaani, tema Pedro eejatzi Juan riyotaatziiri atziripaini, ikantayetziri: “Imaperotatya rañaayetai kamawetainchari, iriitake Jesús oñaagantapaintzirori.” <sup>3</sup> Rotaiyaitapaakeri, romonkyakaantakeri irojatzi oñaatamanai, tema tsireniityaake. <sup>4</sup> Iro kantacha osheki kemayetawakerori kenkitharentsi, ikemisantayetanake. Jirika ikaatzi tzimanaintsiri kemisantzinkaripaini, ikaataiyini 5,000 shiramparipaini.

<sup>5</sup> Okanta okiteeshetamanai, ipiyotaiyakani Jerusalén-ki maawoini reewarite Judá-ite, Itzinkamipaini, eejatzi Yotzinkariite. <sup>6</sup> Ari risaikakeri eejatzi Anás Imperatasorentsiperotaarewo, Caifás, Juan, Alejandro, ipoñaapaaka isheninkapaini Imperatasorentsiperoriite. <sup>7</sup> Ikaimakaantakeri ramaiteri Pedro eejatzi Juan. Rosatekaitawakeri niyanki ipiyotaiyakanira, rosampitakeri: “¿Litaka shintsitakaimiri pimatantakawori jiroka? ¿Litaka paakotakeri iwairo?” <sup>8</sup> Irojatzi rakantanakari Pedro, ikantakaaperotakarori Tasorenkantasi, ikantanake: “Pinkatharipaini, Itzinkamipaini. <sup>9</sup> ¿Iriima pikantakotanari netsiyatakotakagairira mantsiyari? ¿Pikowatziiima piyotaiyeni jimpe ikanta retsiyatakotantaari? <sup>10</sup> Ari nonkamantaiyakemironi, onkantya riyotantyaari maawoini Israel-iite. Jirika shirampari atsipataiyakarini jaka, iri Jesucristo etsiyatakotakaakeriri, iitzitaitari Nazaret-satzi. Iriitake naakotakeri iwairo, irijatzi pikentakotakaantakeri eerokapaini. Iro kantzimaitacha rowañagairi Pawa. <sup>11</sup> Jirika Jesús iri oshiyakawori mapi pimanintakeri eerokapaini, poshiyakowaitakarori wetsikirori pankotsi. Iro kantacha ipiriintaitairo pankotsinampiki roshiyaawo iroorikame tzinkamitsi. \* <sup>12</sup> Tekaatsi itsipa oshiyaarine Jesús rowawisaakotantzi. Tekaatsi aakotai iwairo jaka isaawiki kipatsi, apatziro ikantakaawo Jesús.”

<sup>13</sup> Iyokitzi rowaitanakeri Pedro, eejatzi Juan, ikantaiyanakeni piyowentakariri: “Pamineri jirika, te riyotaaperoweetari, iro kantzimaitacha pinkathawaante rowaitziri. ¿Iriima yotaakeriri Jesús itsipatakari pairani?” <sup>14</sup> Irojatzi itsipatakari Pedro eejatzi Juan jirika atziri retsiyatakotakagairi. Te otzimi oita inkantakoteriri. <sup>15</sup> Romishitowakaantairi ipiyotaiyanira, ari risaikaiyanakeni irirori riñaanatawakagaiyani. <sup>16</sup> Ikantzi: “¿Tsikama ankanterika jirikapaini atziri? Maawoini Jerusalén-satzi riyotaiyakeni ritasonkawentantake. Eero amatairo amanakoteri. <sup>17</sup> Jame asariimatashityaari, iro ompoñaantyaari eero riyataakantawo inkenkithatakoteri Jesucristo, raakotapiintairi iwairo.” <sup>18</sup> Irojatzi ikaimantaariri eejatzi. Ikantaiyakerini: “Atapaake pikenkithatakotakeri Jesús, eero papiitairo piyotaantayetai paakoyetairi iwairo.” <sup>19</sup> Iro kantacha rakanakeri Pedro eejatzi Juan, ikantanakeri: “¿Kameethatatsima nipiyathatyaari Pawa, nonkemisantantemiri eerokapaini? Janjaatya pinkantena. <sup>20</sup> Eero okanta nipakagairo nonkenkithatakoyetero okaatzira noñaawakeri, nokemajaantakeri eejatzi.” <sup>21</sup> Ikanta rasariimawaiwetakarori jewaripaini, ripakagairi. Tema maawoini atziripaini ithaamentawentanakarori Pawa iñaayetakero awisayetaintsiri, te otzimi oita rowasanketantyaariri. <sup>22</sup> Jirika atziri retsiyatakotakaayeetairi, tzimatsi rosarentsite awisaneentakero okaatzi 40.

*Ramanaiyani kemisantzinkaripaini rawentaashireperotantyaari eero ithaawan-taiyani*

<sup>23</sup> Ikanta Pedro eejatzi Juan, ripakagaitairi, jatake ipiyotaiyani ikaataiyinira, ikamantakeri okaatzi ikantakeriri reeware Imperatasorentsitaarewo eejatzi Itzinkamipaini. <sup>24</sup> Ikanta ikemaiyakeni, maawoini ramanaiyanakarini Pawa, ikantzi: “Pinkathariperorí, eerokatake wetsikakerori inkite, kipatsi, inkaare, eejatzi ikaatzi tzimantayetawori. <sup>25</sup> Eerokatake kenkithatakaakeri pairani ponampire David-ni, ikantake: ¿Litaka riñaawaiwentaiyirini atziripaini?”

\* 4:11 Paminero Mt. 21.42; Ef. 2.20; 1 P. 2.6-8.

¿Litaka ikenkithashiryaawaitantakari?

<sup>26</sup> Piyotaiyakani pinkathariwentantatsiri jaka kipatsiki,

Ipiyoyetaka jewaripaini,

Inkoshekantyaariri Pinkathari, eejatzi riyoyaanewo Cristo.

<sup>27</sup> Rimatzimaitakawo Herodes eejatzi Poncio Pilato ipiyotaiyakani nampitsikika, eejatzi Israel-iite ipiyotaiyakani itsipatakari itsipasatzi atziripaini, ikoshekakari Jesús, pitasorentsiti Pitomi, piyoyaanewo. <sup>28</sup> Ari okantaka, rimatakero jirikapaini okaatzi pikenkithashiryaakari tsika onkantya. <sup>29</sup> Iroñaaka, Pinkathari, paminero eeroka rasariimatakana, pishinetainawo ponampireyetaina, eero nothaawawaitanta nonkamantantairo piñaane. <sup>30</sup> Iro pishintsinka petsiyatakotakaantyaariri mantsiyayetatsiri. Iro pitasonkawentakaantantenari naakoteri iwairo Tasorentsi Pitomi Jesús.”

<sup>31</sup> Ikanta ikaatakero ramanaiyani, ontziñaanaka janta tsika ipiyotaiyakani. Ikan-takaakiperotanakari Tasorenkantsi ikenkithatakotanakero riñaane Pawa, tekaatsi inthaawakaanakya.

### *Okaatzi oshekitzimoyetziriri maawoini rashitaiyawoni*

<sup>32</sup> Shenitanake kemisantanaatsiri. Apaani okantanaa ikenkithashiretanaari. Te ishampitsitawakaiyaawoni oitarika, ipayetawakaawo okaatzi koityiimoyetariri.

<sup>33</sup> Jirikapaini Otyaantaperoriite eekero riyaatatzi ikenkithatakotziro tsika okanta rañaantaari Pinkathari Jesús. Antawoite ineshironkayetakeri Pawa maawoini.

<sup>34</sup> Te itzimawaitzi apaani koityaawaitatsine, itzimirika tzimatsiri iipatsite, ipanko, ipimantayetziro. Raakeri koriki, <sup>35</sup> impakeri Otyaantaperoriite, iriitake antetaariri maawoini raantayetari apaanipaini oita ikowiri. <sup>36</sup> Iro rimatakero apaani Leví-

ite iitaitziri José, Chipre-satzi rinatzi, irijatzi iitakeri Otyaantaperoriite, Bernabé. (Oshiyakaawentachari jiroka wairontsi Bernabé: “Otomi oimoshirenkaantsi”). <sup>37</sup> Jirika atziri tzimatsi iipatsite, ipimantakero. Raanakeri owinawo iipatsite, ipapaakeri Otyaantaperoriite.

## 5

### *Ananías eejatzi Safira*

<sup>1</sup> Iro kantacha eenitatsi itsipa atziri iita Ananías, itsipatakawo iina oita Safira, ipimantakero iipatsite. <sup>2</sup> Jirika atziri raapatziyakawo iina, rimanagaantake owinawo iipatsite. Ramakeri tzimagaantapaintsiri, ipapaakeri Otyaantaperoriite. <sup>3</sup> Ikantawakeri Pedro:

“Ananías, ¿itaka pishinetantakariri Satanás inthaiyakayemi, iro pikowantanakari pamatawiteri Tasorenkantsi, pimanagaantake owinawo piipatsite?” <sup>4</sup> “¿Kaarima eeroka ashiwetawo kipatsi? ¿Kaarima eeroka ashiwetari owinawo? ¿Litaka pikenkithashiryaantakawori pantero jiroka? Tera iri atziripaini pamatawite, Pawaga.” <sup>5</sup> Ikanta ikemawake Ananías, tyaanake, kamanake. Antawoite ithaawaiyanakeni ikaatzi kemayetaintsiri.

<sup>6</sup> Ikanta mainaripaini, iponatapaakeri, raanakeri, ikitatakeri.

<sup>7</sup> Tekera osamaniteeta, ari okyaapaake iina Ananías, te iyote iroori oita awisaintsiri. \*

<sup>8</sup> Rosampitawakero Pedro, ikantziro: “Pinkantena, ¿Arima ikaatzi owinawo?” Akanake iroori: “Jee, arimachee ikaatzi.” <sup>9</sup> Ikantziro Pedro: “¿Litaka paapatziyawakaantakari pikowi piñaantyaari Itasorenka Pinkathari? Piyaiyakani aanakeriri piime ikitatziri, iroñaaka rayitanakemi eeroka.” <sup>10</sup> Apathakero ityaanake Safira ikatziyakaga Pedro, kamanake. Ikanta ikyagaiypaini mainaripaini, iñaapaatziro kamake. Raanakero, itsipatagairo oime ikitatakaga irirori. <sup>11</sup> Ikanta iñagaitakero awisaintsiri, antawoite ithaawaiyanakeni kemisanzinkaripaini, ari ikantzitanakari eejatzi kemakoyetakerori okaatzi awisaintsiri.

\* 5:7 Kantakotachari jaka “tekera osamaniteeta”, iro ikantaitzitari eejatzi “3 horas”.



### *Osheki ritasonkawentantayeetake*

<sup>12</sup> Eekero riyaaatakanakitziiro Otyaantaperoriite ipiyotapiintaiyanakani janta awisashetatakera tasorentsipanko iitaitziro “Rashi Salomón”. Eekero ritasonkawentanakitzi osheki atziripaini. <sup>13</sup> Iwinkanewo rowayetanakeri itsipapaini, te ikowayetanai intsipatanaiyaari. Iro kantzimaitacha eenitatsi osheki thaamentaperowentanakariri. <sup>14</sup> Eekero ripokanakitzi osheki shirampari eejatzi tsinanepaini, shenitanake ikaatzi kemisantanaairiri Pinkathari. <sup>15</sup> Ramakoyetapaakeri atziri imantsiyarite romaryaakoyetapaakeri ishitashiki tsika inkenapaake Pedro. Ikantayetzi: “Inkenapaakerika Pedro jaka, arika ritsimankantanakyaari eepichokiini raampare, aritake retsiyatakotai.” <sup>16</sup> Ari ikantaiyapaakani atziripaini poñaayetainchari nampitsiki saikanampitzirori Jerusalén, ramayetake osheki mantsiyaripaini eejatzi osheki raagayetziri peyari, retsiyatakotakaayetawakeri maawoini.

### *Ikisaneentaitanakeri Pedro eejatzi Juan*

<sup>17</sup> Ikanta Imperatasorentsiperori, itsipatakari ikaatzi aapatziyakariri, jirikapaini Sadoc-iite, ikisaneentaiyanakani. <sup>18</sup> Raakaantakeri Otyaantaperoriite, romonkyaakaantakeri. <sup>19</sup> Okanta otsireniwetanaka, pokake imaninkarite Pinkathari, rashitaryaakotairi, romishitowayetairi, ikantawairi: <sup>20</sup> “Piyaate tasorentsipankoki, pinkenkithatakotainiri atziripaini tsika okantakota owakerari añaamentotsi.” <sup>21</sup> Okanta okiteeshetamanai, aretaiyapaakani tasorentsipankoki, retapaakawo ikenkithatakaantapaake. Te riyotaatsikaitzi Imperatasorentsiperori, piyotaiyachani itsipayetakari raapatziyanewo, eejatzi maawoini Itzinkampaini Israel-iite. Irojatziri rotyaantantakeri ramaiteri Otyaantaperoriite romonkyaakaantaweetakari.

<sup>22</sup> Ikanta riyaatashiweetanakari romonkyaakaantane, te iñaapairi. Piyapaaka, <sup>23</sup> ikantapaakeri: “Te añagairi. Irojatziri okanta noñaawetapaakawo ashita kameethaini, irojatziri ikatziyayeweta kempoyiiriri. Ikanta nashitaryaakowetapaakari, te noñaapairi.” <sup>24</sup> Ikanta ikemawake Imperatasorentsiperori, eejatzi reeware kempoyiirori tasorentsipanko, eejatzi reeware Imperatasorentsitaarewo, rosampitawakagaiyanakani oitarika awisatsine. <sup>25</sup> Areetapaaka kamantapaakeriri: “Jirikapaini pomonkyaakaantawetakari, risaikaiyini tasorentsipankoki ikenkithatakaayetziri atziripaini.” <sup>26</sup> Irojatziri riyaaantanakari reeware kempoyaantaneripaini, raanake osheki ratzirite, ramairi eejatzi. Iro kantacha te rakotashiwaitziri. Tema ithaawakaatyaari atziripaini rishe-myaantyaari mapi.

<sup>27</sup> Ikanta rareetakaapaakari, rowawisaapaakeri tsika ipiyotaiyakani jewaripaini. Ikanta Imperatasorentsiperori rosampitawakeri, <sup>28</sup> ikantziri: “¿Tema pikemi nokantzi chapinki: ‘Atapaake pikenkithatakotakeri Jesús?’ Eekero piyotaatziiri maawoini Jerusalén-satzi. Pikantakotakena eejatzi naaka, pikantzi: ‘Iri owamaakaantakeri Jesús.’ ” <sup>29</sup> Ari rakanake Pedro eejatzi itsipapaini Otyaantaperoriite, ikantanake: “Iriira Pawa nonkemisantaperote, eero nokemisantawaitashitari atziripaini. <sup>30</sup> Tema imapero powamaakaantakeri eeroka Jesús, pikentakotakaantakeri. Iro kantacha rowañagairi Pawa, ikemisantakeri pairani acharineni. <sup>31</sup> Rowenonkairi Pawa, roisakairi rakoperoki, itsipataari ipinkathariwentantzi. Iri owawisaakotaine eejatzi. Ikowake apiyashireyetai maawoini aakapaini Israel-iite, ompoñaantyaari impeyakotantairori akaariperoshirewetakaga. <sup>32</sup> Naaka ñaakero okaatzi rantayetakeri Jesús, ontzimatye nonkenkithatakotero. Irijatziri Tasorenkantsi matakainawone, tema iriitake rotyaantakenari Pawa risaikashiretantaina naakapaini nokemisantairira.”

<sup>33</sup> Ikanta ikemaiyakeni, antawoite ikisanaka, ikowanake ritsitokerime. <sup>34</sup> Iro kantacha ari ikatziyanaka apaani, jitachari Gamaliel. Fariseo rinatzi irirori, irijatziri yotaantzirori Inintakaantaitanewo. Pinkatha rowiri maawoini atziri. Ikantanake:

“Asheninká, jametya omishitowawakeri eepichokiini jirikapaini.” <sup>35</sup> Irojatzí ikantan-tanakari: “¡Shiramparipaini! ¡Israel-iite! Ontzimatyé pinkenkithashiryaaawakya kameetha tsikarika pinkanteri jirika atziripaini. <sup>36</sup> Pinkenkithashiryaaakoteri jitachari Teudas, ishamewaitake irirori. Ipiyotake pairani 400 atziri. Iri kantzimaitacha ritsitokaitakeri Teudas, rithonka ripookayetanaake maawoini tsipayewetakariri, ari ipeyari. <sup>37</sup> Ari okantzitakeri pairani rosankenatakotantari maawoini atziri, itzimaweta itsipa jitachari Judas, Galilea-satzi rinatzi. Ipiyotake atziri. Iro kantacha rowamagaitakeri irirori. Irojatzí ripookantanakari maawoini tsipayewetakariri, ari ipeyari. <sup>38</sup> Pinkeme nonkantemi naaka: Eero pikoshekari jirika, pinkempoyaaminthatashityaari. Iriirika antashiwaitawo inintakaanekiini, apanirowa impeyashitaiya, roshiyakotyaari apite-taintsiri nokenkithatakotakeri. <sup>39</sup> Iri kantzimaitacha, iriirika Pawa matakaayetziriri okaatzi rantayetziri, eerowa pimatziiri eerokapaini poitsinampairi. Paamaawentya pikoshekakeri Pawa.”

<sup>40</sup> Inimotanakeri maawoini kemaintsiri. Ikaimairi eejatzí Otyaantaperoriite, ripasatakaantakeri, ikantakeri: “Ataama pikenkithatakotzi Jesús.” Ripakagairi. <sup>41</sup> Irojatzí rishitowaiyantanaarini Otyaantaperoriite ipiyowentaitakeri. Thaamenta ikantaiyanakani, ikantaiyini: “Piñaakero, roshiyakagaitakai iriiperome anatyé, rowasankewentaitakairi Jesús, aakotairira iwairo.” <sup>42</sup> Ari ikantapiintanakitya riyotaantzi maawoini kiteesheriki, ikenkithatakaantzi tasorentsipankoki, ikantzi: “Cristo rinatzi jirikaganki Jesús.” Ari ikantayetakero eejatzí janta pankotsipainiki.

## 6

### *Raminaitake 7 amitakotantaneri*

<sup>1</sup> Ikanta isheniperotanake riyotaanewo, ikenkithawaiyetanake Grecia-weri, ikantzi: “Pamineri rantapiintakeri Heber-thato, ipapiintayetzíro owanawontsi kinankawo, ramaakiyetzimaitawo kaari isheninkayeta iriroripaini.” <sup>2</sup> Ikanta Otyaantaperoriite kaatatsiri 12, ipiyotakeri maawoini riyotaanewo, ikantakeri: “Te onkameethate nipakairo nonkenkithatakotanairi Pawa, nompantapiintemiri poyaari. <sup>3</sup> Iyekiite ontzimatyé pamine akaataiyinira, inkaate 7 atziri, iriitake aminakaantapiinterone jiroka. Piyoyee kameethashiretzimotakemiri, eenitatsi riyorenka, risaikashireperotantari Tasorenkantsi. <sup>4</sup> Iro ompoñaantyaari nonkamaitantyaawori naakapaini namanayetya, nonkenkithatakaante, niyotaantayete eejatzí.” <sup>5</sup> Ikanta maawoini piyotainchari, inimotanakeri okaatzi ikantakeriri. Ari riyoyagaitakeri Esteban, awentaariri kameethaini Pawa, risaikashireperotantari Tasorenkantsi. Riyoyagaitakeri eejatzí Felipe, Prócoro, Nicanor, Timón, Parmenas, ipoñaapaaka Nicolás Antioquía-satzi, oshiyakotaariri Judá-ite, tema kaari isheninka Judá-ite pairani. <sup>6</sup> Irojatzí ragaitantanakariri jirika 7 risaikira Otyaantaperoriite, ari ramanakotawakari, ritasonkawentayetakari rotzimikapatziitoyetantakariri rako.

<sup>7</sup> Eekero iyaatakotanakitzi riñaane Pawa. Eekero isheniperotanakitzi riyotaanewo Jerusalén-ki. Rimatzitanakawo ikemisantayetanake osheki Imperatasorentsitaarewo.

### *Raakaantantaitakariri Esteban*

<sup>8</sup> Ikanta Esteban osheki ritasonkawentantake atziripainiki, tema Pawa neshironkatakakeri, ipakeri ishintsinka. <sup>9</sup> Iro kantzimaitacha, eenitatsi Judá-ite ikaatzi piyotapiintachari jitayetachari “Rimperaweetari”. Iri poñaayetaingchari Cirene-ki, Alejandría-ki, Cilicia-ki eejatzí Asia-ki. Riñaanaminthatanakeri Esteban. <sup>10</sup> Iro kantzimaitacha te roitsinampairi, tema imaperotatya Esteban riyotanetakaakeri Tasorenkantsi. <sup>11</sup> Iro ikamantantakariri rimananeekiini isheninka, ikantziiri: “Pinthaiyakotyaari Esteban. Pinkante: ‘Nokemakeri Esteban rithainkimawaitziri Moisés-ni, eejatzí ikantzitari Pawa.’ ” <sup>12</sup> Iro owatsimaanakeriri atziripaini ikisaneentanakeri Esteban, rimatzitanakari Itzinkamipaini, eejatzí Yotzinkariite. Raakaantaitakeri, raayeetanakeri

ipiyotaiyanira jearipaini. <sup>13</sup> Ari ramaitapaakeri thaiyakotakariri Esteban, ikantapaake: “Jirika atziri osheki rithainkakero tasorentsipanko, rithainkakero Inintakaan-taitanewo eejatzi. <sup>14</sup> Nokemakeri ikantake: ‘Ari intzimpookakero tasorentsipanko Jesús, iitaitziri Nazaret-satzi. Rowashiñaayetairo eejatzi ameyetari aakapaini riy-otaayetairi pairani Moisés-ni.’ ” <sup>15</sup> Ikanta jearipaini piyotainchari, ikempoyaanakeri Esteban, iñaatziiri ipooki roshiyanakari maninkari.

## 7

### *Roipiyanakeriri ñaantsi Esteban irojatzi ritsitokantaitakariri*

<sup>1</sup> Ikanta Imperatasorentsiperori rosampitakeri Esteban, ikantziri: “¿Imaperoma ikantakoitzimiri?” <sup>2</sup> Ari rakanake irirori, ikantzi: “¡Iyekiite! ¡Ashitaanitachari! Pinkeme nonkantemi. Pairani risaikantawetakari acharine Abraham-ni janta Mesopotamia-ki, roñaagakari owaneenkatachari Pawa, tekera riyaatanakeeta inampityaawo Harán-ki. <sup>3</sup> Ikantakeri: ‘Pookanairo pinampi, pookanairi pisheninkapaini, piyaate otsipaki kipatsi noñaagakemiri naaka.’ <sup>4</sup> Ikanta Abraham-ni, rookanairo inampi jitachari Caldea. Irojatzi ripokantaari inampitaawo Harán-ki. Ikanta ikamai ipaapate, irojatzi rotyaantantakariri Pawa jaka, tsika anampitawo iroñaaka aakapaini. <sup>5</sup> Iro kantzimaitacha, te rashitakaaperotari, tekaachaajaini rashitakayaariri eepichokiini. Ikashaakaakeri imperi paata, arika inkamake. Iri ashitaiyaawone inkaate charinetaiyaarine. Irootake ikantakeriri okantawetaka Abraham-ni te itzimi rowaiyaneni. <sup>6</sup> Iro kantacha ikantakeri eejatzi: ‘Iñeero pincharineyetyaari inampityaawo iipatsiteki itsipa atziri. Onkaate 400 osarentsi inkemaatsiwaitya rimperawaitaityaari janta. <sup>7</sup> Ari nowasanketairi naaka inkaate imperawaitakyaarine. Iriima pincharineyetyaari namairi maawoini jaka nampitsiki, ari rantawaitainari naaka.’ <sup>8</sup> Irojatzi ikantantakariri Pawa eejatzi pairani Abraham-ni: ‘Ontzimatyepitomeshaanitya, tema tzimatsi aapatziyawakayaari.’ Rimatakero pairani Abraham-ni. Rimatakari eejatzi itomi irirori, rimaakotapaakera 8 kiteesheri, ritomeshaanitakeri. Rimatakero Isaac itzimake pairani Jacob-ni. Rimatakari eejatzi Jacob-ni 12 itomipaini, acharineyetanakari aakapaini. <sup>9</sup> Ikanta jirikapaini, acharineyetaari aakapaini, ikisaneentakeri irirentzi José, ipimantakeri. Irojatzi rareetantakariri inampiki Egipto-satzi. Iri kantacha, ari itsipatapiintakariri Pawa, <sup>10</sup> rowawisaakotairi okaatzi ikemaatsiwaiwetaka. Ipakeri yorenkantsi, irootake raakameethatantakariri iwinkatharite Egipto-satzi jitachari Faraón. Irojatzi ipinkathariwentantakariri irirori maawoini Egipto-satzi, eejatzi maawoini isheninkapaini Faraón. <sup>11</sup> Irojatzi areetantakariri antawo tashetsi janta. Osheki ikoityaaneentaiyakeni Egipto-satzi. Ari okantakariri eejatzi inampiki Canaán-satzi. Te iñiuro pairani acharineni oitarika rowayetaiyaari. <sup>12</sup> Ari ikemakeri Jacob eenitatsi owanawontsi janta Egipto-ki. Rotyaantakeri itomipaini ramanantakite. \* <sup>13</sup> Ikanta rapiitakeri riyaataiyini, ari riyotakagaari José irirentzipaini. Irojatzi riyotantakariri Faraón isheninkapaini José. <sup>14</sup> Ikanta José, ikaimakaantairi ipaapate Jacob, eejatzi maawoini isheninka, aamaaka ikaatzi 75 atziri jataintsiri Egipto-ki. <sup>15</sup> Irojatzi rareetantakariri Jacob Egipto-ki. Ari ikamairi irirori janta. Ari ikantakariri eejatzi ikaatzi acharineyetanakari. <sup>16</sup> Irojatzi raatonkiyeetantanaariri, ikitaitapairi Siquem-ki ramanantakeri pairani Abraham-ni, rashi naaweta itomipaini Hamor.

<sup>17</sup> Okanta imonkaatzimatata okaatzi ikantakeriri pairani Pawa acharine Abraham-ni. Tzimanake osheki reentsite asheninkapaini janta Egipto-ki, <sup>18</sup> irojatzi itziman-takariri itsipa pinkathari janta Egipto-ki, kaari yotakotziriri José. <sup>19</sup> Ikanta jirika

\* 7:12 Kantakotachari jaka “owanawontsi”, irootake ikantaitziri “trigo”.

pinkathari, osheki ramatawitakeri asheninka, rowashironkaawaitakeri. Ishintsineentakeri rookayeteri reenchaanikite, inkamantyaari, eero ishenitanta. <sup>20</sup> Aripaite itz-makeri Moisés irirori. Iriitake jirika eentsi kameethatzimotakeriri Pawa. Ikaatzi mawa kashiri rimanawetakari ipankoki ashitariri. <sup>21</sup> Okanta imonkaapaitetapaaka rookanawentantyaariri inkameme, oñaakeri rishinto Faraón, aakeri, opiraanikitakari, oshiyakaanakeri iriime owaiyane iroori. <sup>22</sup> Ari ikantakari Moisés-ni riyotantakawori okaatzi riyorenkatari Egipto-satzi. Iriiperori atziri rinake, iroopero okantayetaka rantayetakeri.

<sup>23</sup> Ikanta otzimake 40 rosarentsite Moisés-ni, ikowake rareetyaari isheninkapaini, Israel-iite. <sup>24</sup> Ikanta iñaapaakeri Egipto-satzi rowasanketziri isheninka. Ikisawenta-paakari Moisés isheninka, ritsitokakeri Egipto-satzi. <sup>25</sup> Roshiyakaatzi Moisés-ni ari inkenkithashiryagaiyakaani isheninkapaini, iriitake rotyaantakeri Pawa rookaawiritantairi. Iri kantzimaitacha jirikapaini te riyotaiyirini. <sup>26</sup> Okanta okiteeshetamanai, iñaatzi rantawakaiyani isheninka. Ikowawetaka Moisés rookakairime, ikantaweta-paakari: 'Eero powashironkaawakaiyani pantawakaa, pisheninka powawakaiyani.' <sup>27</sup> Ikanta jirika antziriri isheninka, rotatsinkawakeri Moisés. Ikantziri: '¿Litaka kantakemiri eeroka nowinkatharite? ¿Pikowatziima eeroka piyakowentena?' <sup>28</sup> ¿Pikowatziima pitsitokena naaka pikemetaakerira chapinki Egipto-satzi?' <sup>29</sup> Ikanta ikemawake Moisés ikantakeriri isheninka, shiyanaka. Jatake iipatsiteki Madián-satzi. Ari risaikakeri janta nampitsinentsiki, irojatzi itzimantakari apite itomi.

<sup>30</sup> Okanta awisake okaatzi 40 osarentsi. Janta ochempiki, okaakitapai otzishi jitachari Sinaí, ari roñaagakari imaninkarite Pawa, ipaampatakaairo kitocheemaishi. <sup>31</sup> Riyokitziwentanakeri Moisés iñaakerowa. Ikowaminthaitzi raminero okaakiini, ari ikemakeri Pinkathari riñaanatziri, ikantziri: <sup>32</sup> 'Pawa ninatzi naaka, naakatake ipinkathatziri picharine, Abraham, Isaac, eejatzi Jacob.' Ari ithaawanakeri Moisés, okawaitanaka, te ikowi raminanairo. <sup>33</sup> Irojatzi ikantantanakariri eejatzi: 'Pizapato-reeya, tema pikatziyantatyaawo iroñaaka kipatsi notasorentsipathatakaakeri. <sup>34</sup> Noñaakeri janta Egipto-ki niyoyaakeri pisheninkapaini, osheki rashironkaawaitaka. Nokemakeri ratekawaitaiyini. Irootake nipokantakari nookaawiritantairi. Eerokaga notyaante Egipto-ki pantero.'

<sup>35</sup> Tema pairani imanintaweetakari Moisés-ni, ikantaitakeri: '¿Litaka nintakaakemirori eeroka nowinkatharite?' Tema iriitajaantake rotyaantakeri Pawa impinkathariwentairi isheninkapaini, iri jokaawiritantairine eejatzi. Iriitakera matakaakeriri imaninkarite Pawa iñaakeri pairani ipaampatakaairo kitocheemaishi. <sup>36</sup> Irijatzi Moisés-ni omishitowairiri pairani asheninkapaini Egipto-ki, osheki ritasonkawentantake janta. Ari ikantakero eejatzi janta inkaareki iitaitziri 'Kityonkaari', eejatzi ikantakero risaikawaitantakari ochempiki okaatzi 40 osarentsi. <sup>37</sup> Irijatzi Moisés-ni kantakeriri pairani asheninkapaini: 'Ari rotyaantake paata Pawa itsipa Kamantantaneri, ari roshiyakotapaakenawo naaka rotyaantakena. Asheninka rinatye.' <sup>38</sup> Irijatzi Moisés-ni piyotakeriri pairani asheninkapaini janta ochempiki, ikenkithawaitakaakeri maninkari janta otzishiki Sinaí, itsipayetakari asheninkapaini. Iriitake ajaantakerori owañaantatsiri ñaantsi, irojatzi rowawisaantakairori aakapaini. <sup>39</sup> Iro kantacha te ikowi acharinene inkemisanteri Moisés-ni, osheki ripiyathatakari. Ikowaiyakeni ripiyaima inampiki Egipto-satzi. <sup>40</sup> Ikantakeri Aarón-ni: 'Iriiwetaka Moisés jokaawiritantaanari Egipto-ki. Iro kantacha te ayote oita awishimotakeriri kaari ripokanta riyaatzi chapinki otzishiki Sinaí. Piwetsikena nowawanetaiyaari.' <sup>41</sup> Ari riwetsikaitakeniri oshiyawetariri ewonkeri waaka. Ikowaiyakeni roshiyakairi Pawa. Rowamaakeniri ipirapaini roimoshirenkantyaariri iwawane. Iriiwetaiyakani wetsikakeriri. <sup>42</sup> Irootake, rintainaryaapithatantanakariri

Pawa jirikapaini, rishinetanakeri impinkathayetairi oorentayetchari inkiteki, tema iriitake rosankenatakotzitakari Kamantantaneriite, ikantake:

¡Israel-iite! ¿Naakama pipinkathatantaka pipirapaini pitaapiintzirira?

Tema iro pantapiintakeri okaatzi 40 osarentsi janta ochempiki.

<sup>43</sup> Iri Moloc pipinkathatapiintashitakari, pikenakenatakaapiintakero ipankoshetaitari.

Ari pikantapiintakeri iwawanetashiitari oshiyariri impokiro iitaitziri Renfán,

Pipinkathatashiwaitakari piwetsikayetaneewo eerokapaini.

Irootake nishinetantemiri ragaitemi intaina panaanakero Babilonia.

<sup>44</sup> Risaikawaitantakeri pairani acharineeteni ochempiki, otzimimotziri tasorentsithaante. Ari rowakoyetzirori rosankenare Moisés-ni. Jiroka tasorentsithaante, irootakera riwetsikakaantakeri kameethaini Moisés-ni okaatzira roñaagakeriri Pawa.

<sup>45</sup> Iroowa ikenakenatakaapiintakeri pairani acharineeteni, irojatzi raretantakari kipatsiki rashitakaitariri. Iro ramayetairi reewatantakariri Josué,

roitsinampaantakariri ashiwetawori iipatsite, ikantakaari Pawa. Ari ikantaitatziro roisokerotakawo tasorentsithaante, irojatzi itzimantakari pairani pinkathari David-ni.

<sup>46</sup> Ikanta pinkathari David, osheki raakameethatakeri Pawa, ikantake irirori: ‘Tema eeroka Pawa ipinkathatake pairani Jacob-ni, pishinetena naaka niwetsikemi pankotsi pisaikantyaari.’

<sup>47</sup> Iri kantacha Salomón, iriira wetsikaperotakerori tasorentsipanko.

<sup>48</sup> Iri kanzimaitacha Pawa Jenokisatzi, te inampitantawo pankotsi riwetsikanewoki atziri. Iro ikenkithatakotakeri Kamantantaneri, ikantake:

<sup>49</sup> Jiroka ikantake Pawa:

Iro inkite nisaikantari nopinkathariwentantzi.

Iroowa kipatsi nimakoryaayitizantari.

¿Tsika onkaateka pankotsi riwetsikaitenari?

Eero niyomaatawo nimakoryaantyaawo.

<sup>50</sup> ¿Tema naaka wetsikayetakerori maawoini tzimayetatsiri?

<sup>51</sup> Eeke riñaawaitanakitzi Esteban, ikantzi: ‘Iro kantacha eerokapaini, ari pikan-tapiintatya pikisoshiretzi, te pikemisantanetzi, poshiyakari itsipasatzi atziri kaari asheninkata. Pashi powapiintziro pipiyathatakari Tasorenkantsi poshiyakotaari picharineni.’

<sup>52</sup> ¿Eenitatsima Kamantantaneri kaari inkemaatsitakaya pairani picharineni? Rowamaayetzira ikaatzi kenkithataintsiri, ikantake: ‘Awotsikitake matzirori itampatzikashiretzi.’

Tema pokake iroñaaka matzirori, iriira pipithokashitaiyakarini eerokapaini, pitsitokakeri.

<sup>53</sup> Tema eerokatake yowetawori Inintakaantaitaneewo riy-otaawetakairi maninkari, iro kantacha osheki pipiyathataka.”

<sup>54</sup> Ikanta ikemaiyawakeni piyotainchari, antawo ikisanakeri Esteban, ratsikaiki-tashitanakari.

<sup>55</sup> Iriima Esteban risaikaperotantanakari Tasorenkantsi, raminanake inkiteki, iñaakero rowaneenkawo Pawa, iñaakeri eejatzi Jesús ikatziya rakoperoki Pawa.

<sup>56</sup> Ikaimanake, ikantanake: “¡Pamine! Noñaakero inkite ashitaryaanaka, noñaakeri Itomi Atziri ikatziyaka rakoperoki Pawa.”

<sup>57</sup> Ari rotzimikayempitatanakari jirikapaini. Ikaimaiyanakeni shintsiini, rishiyashitapaakari Esteban. Rotaiyapaakeri.

<sup>58</sup> Irojatzi ragaitantanakariri okaathapitzira nampitsi. Ari retapaakari rishemyaantari mapi, raatonkoryaanaka, rookanakeniri iithaare mainari jitachari Saulo, ikantakeri: “Potaiyawakenawo noithaare, nishemyaawakeriita.”

<sup>59</sup> Ikanta rishemyagaitzirira Esteban, ramananakari irirori Pawa, ikantziri: “Nowinkatharite Jesús, jatashire-taana noñaapaimi.”

<sup>60</sup> Ari rotziwerowanakari, riñaawaitanake shintsiini, ikantanake: “Nowinkatharite, eero poipiyiniri jiroka kaariperotaantsi.” Ikaatakerowa riñaawaitzi, peyanaka.

## 8

*Royaakyaaminthatziri Saulo kemisantzinkaripaini*



<sup>1</sup> Ikanta Saulo ipampoyaakowentakeri Esteban ritsitokaitziri, ikantanake irirori: “Ariwé, kamake Esteban.” Aripaite etanakawo royaakyaaminthaitziri kemisantzinkaripaini Jerusalén-ki. Irootake rishiyayetantanakari maawoini Judea-ki, ikenayetanake eejatzi nampitsiki Samaria. Irojatzimaita risaikanake Otyaantaperoriite. <sup>2</sup> Ikanta pinkathatasorentsitaneripaini ikitatakeri Esteban, antawoite riraakowaitakari. <sup>3</sup> Iriima Saulo ikowawetaka irirori rithonkerime kemisantanaatsiri. Riyaatashitapiintakeri ipankoki, inoshikayetziri atziri, tsinanepaini, maawoini. Romonkyaakaantayetakeri.

### *Ikenkithaitziro Kameethari Ñaantsi nampitsiki Samaria*

<sup>4</sup> Ikanta maawoini shiyayanainchari, jatayetanake otsipaki nampitsi. Ikenkithatakoyetakero Kameethari Ñaantsi. <sup>5</sup> Ikanta Felipe, iriitake itsipa shiyayanainchari eejatzi, areetaka nampitsiki Samaria. Ikenkithatakotapaakeri Cristo. <sup>6</sup> Ari ipiyotaiyanakani maawoini atziripaini, rowayempitatakawo ikenkithaitziri Felipe, tema iñaayetakeri ritasonkawentantapaake. <sup>7</sup> Retsiyatakotakaayetai osheki atziri raagawetari peyari. Antawo ikaimayetzi peyari rishiyayetaga. Eejatzi ikantakeri, osheki atziri kisopookiwetachari, kaari kameethawetachane iitzi, retsiyatakotakaayetairi maawoini. <sup>8</sup> Irootake ikimoshiretantakari maawoini nampitawori janta nampitsiki.

<sup>9</sup> Iro kantacha tzimatsi janta jitachari Simón. Sheripiyari rinaweta pairani. Ramataw-itake osheki atziri nampitachari Samaria-ki. Osheki ishamewaitake. <sup>10</sup> Ipinkathawetari atziripaini, jewaripaini, maawoini, ikantayetzi: “Jame ankemisanteri, jirika Simón rimatakero iñaawyaatari Pawa.” <sup>11</sup> Ikemisantaitziri Simón maawoini ikantayetziri. Osheki osarentsi riyokitziwentaitakeri eeni isheripiyariwetaga. <sup>12</sup> Iri kantacha raree-tapaaka Felipe, ikenkithatapaakero Kameethari Ñaantsi kenkithatakotziriri Jesucristo, kenkithatakotziri eejatzi Pawa tsika inkantaiya impinkathariwentantai. Romitsitsiyaayetanaaka shiramparipaini, eejatzi tsinanepaini. <sup>13</sup> Rimatzitanakawo eejatzi Simón irirori, ikemisantawetanaa, omitsitsiyaawetaka eejatzi. Kisokero rowanakeri Felipe itsipatari, iñaakeri ritasonkawentantayetzi. Iyokitzi ikantawentanakari.

<sup>14</sup> Ikanta Otyaantaperoriite saikatsiri Jerusalén-ki, ikemakotakeri Samaria-satzi ikemisantayetairo riñaane Pawa. Irootake rotyaantantakariri Pedro eejatzi Juan. <sup>15</sup> Ikanta rareetaiyakani Samaria-ki, ramanakotapaakari kemisantzinkaripaini, ompoñaantyaari risaikashiretantyaariri Tasorenkantsi. <sup>16</sup> Tema apatziro romitsitsiyaayeetakeri raakotakeri iwairo Awinkatharite Jesús. Tekeramaita risaikashiretantyaariita iriroripaini Tasorenkantsi. <sup>17</sup> Ikanta Pedro eejatzi Juan, rotzimikapatziitoyetantakariri rako apaanipaini. Risaikashireyetantanakari Tasorenkantsi. <sup>18</sup> Ikanta iñaakeri Simón rantakeri Otyaantaperoriite, ikaatzi rotzimikapatziitotantakariri rako atziri, risaikashiretantaari Tasorenkantsi, ripinawentanakari irirori Otyaantaperoriite, <sup>19</sup> ikantanakeri: “Jirika koriki, pimpena eejatzi naaka pishintsinka, noshiyakotantemirori eeroka, ompoñaantyaari nisaikashiretakaantyaariri Tasorenkantsi nosheninka, notzimikapatziitotantyaari nako.” <sup>20</sup> Ari rakanakeri Pedro, ikantziri: “¡Ari pinkaatzimaitaiyaari piyorikite pimpeyashitaiya! ¿Poshiyakaatzi ari pamanantantakyaawo piyorikite ipashitantziri Pawa? <sup>21</sup> Eero pimataatsikaitziro poshiyakotenawo naaka, tema iñaakemi Pawa te pitampatzikashiretzi. <sup>22</sup> Pipakagairo piyaariperonka, pinkowakotairi Pawa, añaamatsite ari impeyakotaimiro pikenkithashiryaawetakari. <sup>23</sup> Niyotakemi naaka, osheki pikisashirewaitaka. Ari pikantapiintatya pikaariperoshirewaitzi.” <sup>24</sup> Irojatziri rakantanakari Simón, ikantanake: “Pamanakotaina eeroka Pinkathariki, ompoñaantyaari eero awishimotantana okaatzi pikantakenari.”

<sup>25</sup> Ikanta Pedro eejatzi Juan, ikaatakero ikenkithatakotakeri Pawa. Irojatzí ikenayetanankari otsipaki nampitsi okaatzi saikatsiri janta Samaria-ki, ikenkithatakero janta Kameethari Ñaantsi. Ari ripiyaiyaani Jerusalén-ki.

### *Felipe eejatzi Etiopía-satzi*

<sup>26</sup> Ikanta imaninkarite Pawa, riñaanatakeri Felipe, ikantziri: “Piyaate nampitsiki jitachari Gaza, iro pimpampithatanake awotsi poñaachari Jerusalén-ki irojatzí janta.” Tema jiroka awotsi irootake awisatsiri ochempiki. <sup>27</sup> Jatake Felipe. Okanta niyanki awotsi, ritonkyotakari Etiopía-satzi. Iriiperori rinatzi. Iriitake kempoyiiriri koriki janta Etiopía-ki opinkathariwentantzira tsinane jitachari Candace. Ipoñagaawo irirori Jerusalén-ki iñaapinkathatzirira Pawa. \* <sup>28</sup> Iro riyatairo irirori inampiki, risaikantakawo ranashitakomento, riñaanatziro rosankenare Kamantantaneri Isaías-ni. <sup>29</sup> Riñaanashiretanakeri Tasorenkantsi Felipe, ikantziri: “Piyaatashiteri shiyakotainchari.” <sup>30</sup> Ikanta riyatashitanakeri Felipe, ikematziiri Etiopía-satzi riñaanatziro rosankenare Isaías-ni. Ari ikantziri: “¿Pikemathatakero piñaanatziri?” <sup>31</sup> Ari ikantzi Etiopía-satzi: “¿Tsika onkene nonkemathatero, tekaatsi yotainawone? Pipoke eeroka, pintsipatena.” <sup>32</sup> Jiroka okantzi Osankenarentsi riñaanatziri:

Roshiyakagaitakeri ragaitziri oweja ritsitokaiteri.

Roshiyakari oweja te ikaimawaitzi rameetaiziri,

Ari ikantakari eejatzi irirori, maire ikantaka.

<sup>33</sup> Tsinampashireri ikantakagaitakari, te otampatzikatzi okaatzi ikantakoweetakariri.

Ari rowamagaitakeri, temaita itzimi rowaiyane irirori.

<sup>34</sup> Ikanta jirika iriiperori Etiopía-satzi, rosampitanakeri Felipe: “Pinkanena. ¿Iitaka ikenkithatakotziri Kamantantaneri? ¿Iriijatzima kenkithatakotacha? ¿Itsipama ikenkithatakotziri?” <sup>35</sup> Ari retanakawo Felipe ikenkithatakaanakeniri rosankenareki Isaías-ni, ikenkithatakotanakeniri Kameethari Ñaantsi kenkithatakotziriri Jesús.

<sup>36</sup> Okanta osamaniityaake, ikenaitapaakero ñaa, ikantzi Etiopía-satzi: “Jiroka ñaa. ¿Eeroma okanta nomitsitsiyaatya naaka?” <sup>37</sup> Rakanakeri Felipe, ikantziri: “Pikemisantaperotanairika, ari onkantake.”

Ikantzi Etiopía-satzi: “Nokemisantzi, iriitake Jesucristo Itomi Pawa.” <sup>38</sup> Ari rowaatzinkakotapaake rishiyakomento Etiopía-satzi. Ayiitanake apitepaini, jatanake ñaaki. Ari romitsitsiyaatakari. <sup>39</sup> Ikanta ritonkaanai ñaaki, raanairi Felipe Tasorenkantsi. Jirika iriiperori Etiopía-satzi, te iñaanairi jimpe ikenanake. Iro kantacha jirika atziri kimoshire ikanta riyatai irirori.

<sup>40</sup> Iriima Felipe iñaashitaawo irirori risaikapai Azoto-ki. Irojatzí rawisantanakari otsipaki nampitsi ikamantantayetziro Kameethari Ñaantsi, irojatzí rareetantaari Cesarea-ki.

## 9

### *Pashinshiretai Saulo* (Hch. 22.6-16; 26.12-18)

<sup>1</sup> Ikanta irirori Saulo, te ripakairo rasariimayetari rowamayeri riyotaanewo Pinkathari. Irootake riyatashitantakariri Imperatasorentsiperori Judá-ite,

<sup>2</sup> ikantakeri: “Posankenateniri Imperatasorentsitaarewo saikatsiri nampitsiki Damasco, pinkanteri: ‘Pishineteri Saulo raayeteri aapatziyanaariri iitaitziri “Awotsiweri”. Inkyaayete ipiyotaitapiintaga, roosoyeteri atziri eejatzi tsinanepaini, ramakeri jaka Jerusalén-ki.’ ” <sup>3</sup> Iro rareetzimatata nampitsiki Damasco, ari romapokakeri morekanaintsiri inkiteki, roorentapaakeri ikatziyakaga Saulo.

<sup>4</sup> Tyaanake Saulo. Ikematzi ñaantsi inkiteki, ikantaitziri: “¡Saulo! ¡Saulo! ¿Oitaka

\* **8:27** Kantakotachari jaka “Iriiperori rinatzi”, Nowikyaanikiri rinatzi. Tema iro rametaiyarini pairani ikaatzi saikapankoyetziriri pinkathari, inowikyaanikiyetziri, onkene eero rowaiyakaantanta ipankoki pinkathari.

poyaakyaaminthatantanari?”<sup>5</sup> Rakanake Saulo, ikantzi: “¿Piitaka eeroka Pinkathari?” Ari ikantaitanakeri: “Naakatake Jesús poyaakyaaminthatakeri. Eerokatakera owasankewaitacha apaniroini, oshiyawaitakawo pipaikayitzitatieyaawome thoyempithowari.”<sup>6</sup> Ikanta Saulo, okawaitanaka ithaawanake, ikantanake: “Pinkathari, iita pikowiri nantairi naaka.” Ari ikantanakeri Awinkatharite: “Pimpiriintanai, piyaate nampitsiki. Ari inkamantaitemiro oita panteri.”<sup>7</sup> Osheki ithaawanake ikaatzi oyaatakeriri Saulo, tema ikemawakero eejatzi irirori ñaantsi, te iñiimaitari kenkithawaitatsiri.<sup>8</sup> Irojatzzi ikatziyantawetanaari Saulo. Ikowaweta rokiryanaime, te onkantya raminanai. Irootake rakathatantanaariri itsipayetakari, raanakeri nampitsiki Damasco.<sup>9</sup> Ari risaikeri janta okaatzi mawa kiteesheri, te okanta raminawaitai, te rowaiya, te rirai eejatzi imere.

<sup>10</sup> Okanta janta Damasco-ki, ari risaiki yotaarewo iita Ananías. Iriitake riñaanatakeri Awinkatharite rimishireki, ikantziri: “¡Ananías!” Ari rakanakeri irirori: “¿Iitaka, Pinkathari? Jaka nisaiki.”<sup>11</sup> Ikantziri: “Piyaate awotsiki iitaitziri ‘Tampatzikari’. Ari isaiki ipanko jitachari Judas, ari posampikowenteri atziri jitachari Saulo, iri poñaachari nampitsiki Tarso. Ari risaikiri irirori ramanawaita.<sup>12</sup> Nomishimpyaakeri irirori. Iñaakemi pikyaashitapaakeri, potzimikapatziitotantakari pako, irojatzzi ram-inawaitantanaari.”<sup>13</sup> Ikanta ikemawake Ananías, ikantanake: “Pinkathari, osheki nokemi ikenkithatakoitziri jirika atziri, koweenka okanta rantayetakeri Jerusalén-ki rowasankeyetziri pikiteshoretakaanewo.”<sup>14</sup> “Iro ripokantari iroñaaka jaka, tema rotyaantatziiri Imperatasorentsiperori raayeteri aakotzimiri piwairo rawentaanaimi.”<sup>15</sup> Ikantzi Pinkathari: “Piyaate. Tema jirika atziri iriitake niyoyaakeri naaka inkenkithatakotaina maawoiniki nampitsi. Inkenkithatakairi Israel-iite isheninkatari irirori, eejatzi itsipasatzi atziri kaari isheninkata, eejatzi iwinkatharite.<sup>16</sup> Ari noñaagakeri eejatzi jimpe onkaate inkemaatsiwentaina naaka.”<sup>17</sup> Irojatzzi riyaaantanakari Ananías pankotsiki risaikakera Saulo. Kyaapaake, rotzimikapatziitotantapaakari rako. Ikantziri: “Iyekí, rotyaantakena Awinkatharite Jesús, oñaagakemiri awotsiki pikenapaakera. Iro rotyaantantanari ompoñaantyaari pokiryaaantaiyaari, risaikashiretantaimiri eejatzi Tasorenkantsi.”<sup>18</sup> Ari oparyaanake rokiki oshiyawetariri shimapentaki, aminanai kameethaini. Irojatzzi ikatziyantanakari, jatanake romitsitsiyaataiteri.<sup>19</sup> Ari rowawaitanaa, irojatzzi ishintsitantaari kameethaini. Eepichokiinira risaikimowaitapaintziri kemisantzinkaripaini nampitawori Damasco-ki.

### *Ikenkithatzi Saulo Damasco-ki*

<sup>20</sup> Ari retanakawo Saulo ikenkithatakaantanake rapatotapiintayeta Judá-ite, ikantzi: “Iriitake Itomi Pawa jitachari Jesús.”<sup>21</sup> Riyokitziwentanakeri ikaatzi kemiriri, ikantawaka: “¿Tema iriitake jirika kisaneentziriri Jerusalén-ki ikaatzi aakotziriri iwairo Jesús? ¿Tema irijatzi pokaintsiri jaka rayeri kemisantzinkari Imperatasorentsiperorikinta?”<sup>22</sup> Iri kantacha Saulo eekero ishintsitatzi ikenkithatakaantzi tekaatsi inthaawantya. Te riyotzi oita inkanteri Judá-ite nampitawori Damasco-ki, ikemiri Saulo ikantzi: “Jirikaganki Jesús Cristo rinatzi.”

### *Saulo rishiyapithatari Judá-ite*

<sup>23</sup> Okanta awisanake osheki kiteesheri, ikantawakaaka Judá-ite: “Jame atsitokeri Saulo.”<sup>24</sup> Tema kiteesheriki eejatzi tsireniriki royaawentakeri rishitowapiintaitzira nampitsiki, ritsitokeri. Iri kantacha Saulo riyotake ikowatzi rowamagaiteri.<sup>25</sup> Ikanta kemisantzinkaripaini, rotetakeri antawoki kantziri, roinkitaakotakeri tsireniriki jakakeroki rotantotaitzirowa nampitsi. Ari okanta rishiyantakeri Saulo.

### *Areetaawo Saulo Jerusalén-ki*

<sup>26</sup> Ikanta rareetaawo Saulo Jerusalén-ki, ikowawetaka intsipatapaiyaarime riyotaanewo Pinkathari. Iro kantacha osheki ithaawantakari, roshiyakaatzi te ikemisantaperotai irirori. <sup>27</sup> Iro kantacha tzimatsi kemisantzinkari jitachari Bernabé, raapatziyanakari Saulo, jatake roñaagantairi ipiyotaga Otyaantaperoriite. Ikantapaakeri: “Jirika Saulo iñagairi Awinkatharite awotsiki jatachari Damasco-ki, ari ikenkithawaitakaakeriri. Ari retanakawo Saulo nampitsiki Damasco raakotanairi iwairo Jesús ikenkithatakotanairi. Tekaatsi inthaawantanakya.” <sup>28</sup> Ari ikantaka Saulo risaikantapaari Jerusalén-ki, itsipayetapaari jirikapaini Otyaantaperoriite. <sup>29</sup> Raakotakeri iwairo Pinkathari Jesús ikenkithatakotziri, tekaatsi inthaawantya. Ikenkithatakaayetziri Judáite Grecia-weri. Iro kantacha ikowake jirikapaini ritsitokeri. <sup>30</sup> Ikanta riyotaiyakeni kemisantzinkaripaini, raanakeri Saulo janta Cesarea-ki. Irojatzu rotyaantantaariri Tarso-ki.

<sup>31</sup> Ikanta kemisantzinkaripaini, nampiyetawori Judea-ki, Galilea-ki eejatzi Samaria-ki, kameetha ikanta risaikawaitaiyini, eekero rantakishireperotanakitzi, pinkatha rowapiintanakeri Pinkathari, ikempoyaawentziri Tasorenkantsi. Eekero riyaatatzi isheniperotanake.

### *Retsiyatakotakagaitairi Eneas*

<sup>32</sup> Ikanta rareetantayetaka Pedro nampitsipainiki, irojatzu rareetantaka Lida-ki inampiyetawowa ikiteshiretakagaitairi. <sup>33</sup> Ari iñaapaake jitachari Eneas, kisopookiri rinatzi, tzimakotake 8 osarentsi romaryaawaitaka. <sup>34</sup> Riñaanatapaakeri, ikantziri: “¡Eneas, retsiyatakotakagaimi Jesucristo. Pinkatziye, paanairo pomaryaamento!” Ari ikatziyanakari Eneas. <sup>35</sup> Ikaatzi nampitawori Lida-ki eejatzi Sarón-ki, iñaayetakeri ikatziyawaitanaa Eneas, iroowa ikemisantantanakariri Awinkatharite.

### *Añaantaari Dorcas*

<sup>36</sup> Okanta nampitsiki Jope, tzimatsi tsinane yotagaarewo oita Tabita, riñaaneki Grecia-thato iitaitziro “Dorcas”. Jiroka tsinane opashitantapiinta, oneshironkatantapiintzi. <sup>37</sup> Okanta apaani kiteesheri, omantsiyatake Dorcas, kamake. Raayeetakero, ikaawoshitaitakero, romaryagaitapaintziro jenoki opankoki. <sup>38</sup> Okanta janta Jope-ki te intainaperote nampitsi Lida, rareetakaga Pedro. Ikanta ikemaiyakeni yotaarewopaini ari risaikiri Pedro janta, rotyaantake apite atziri inkantakiteri: “Pipokeeta intsi-paite Jope-ki.” <sup>39</sup> Jatanake Pedro. Ikanta rareetapaaka janta, ragaitanakeri jenoki romaryagaitakerowa. Opiyowentapaakari maawoini kinankawo, iragaiyapaakani, oñaagayetapaakeri kithaarentsi ishirikanewo Dorcas. <sup>40</sup> Ikanta Pedro romishitowakero maawoini, ari rotziwerowanaka, ramananaka. Irojatzu ripithokashitantanaawori kaminkawo, ikantziri: “¡Tabita, pimpiriintai!” Ari okiryaanake, oñaatziiri Pedro, piriintanaka saikanai iroori. <sup>41</sup> Rakathawakotanakero, ikatziyakero. Ikaimayetairo kinankawo eejatzi ikaatzi ikiteshiretakagaitanewo, iñaayeetairo añagai. <sup>42</sup> Ikanta ikemakoyeetakero nampitsiki Jope, osheki kemisantanakeriri Pinkathari. <sup>43</sup> Osheki kiteesheri risaikawaitanake Pedro nampitsikika, iri risaikimotake jitachari Simón “Mashicheempeki”.

## 10

### *Pedro eejatzi Cornelio*

<sup>1</sup> Tzimatsi Cesarea-ki atziri jitachari Cornelio, iriitake reewarite owayeripaini Roma-satzi iitaitziri “Italia-satzi”. <sup>2</sup> Jirika atziri pinkathatasorentsiwaitaneri rinatzi, ari ikaataiyini maawoini isheninkapaini ipinkathatziri Pawa. Ipapiintziri ashironkainkari osheki iyorikite okantawetaka te isheninkatari. Ramanapiintari Pawa irirori. <sup>3</sup> Okanta apaani kiteesheri, thataawo ooryaa, ishaawiityaake, ari romapokakeri imaninkarite

Pawa ikyaashitapaakeri risaikakera irirori, iñaawakeri koñaawoini, ikantapaakeri: “¡Cornelio!” \* <sup>4</sup> Iyokitzi ikantanaka Cornelio, ithaawankakiini rosampitanakeri, ikantziri: “¿Pinkatharí, iitaka pikowakotanari?” Ikantanakeri maninkari: “Ikemakemiro Pawa pamananewo, iñaakemi pineshironkatantapiintzi. <sup>5</sup> Potyaante ponampire nampitsiki Jope ramantyaariri Simón, iitaitziri eejatzi Pedro. <sup>6</sup> Ari rimayimotziri itsipa Simón, ‘Mashicheempeki’ saikacheraatzirori inkaare. Iri kamantemine oita pantairi.” <sup>7</sup> Ikanta rishitowanai maninkari, ikaimake Cornelio apite ronampire. Ikaimake eejatzi owayeri, rawentaanewo rowiri, pinkathatasorentsiwaitaneri rinayetzi irirori. <sup>8</sup> Ikamantakeri okaatzi ikantaitakeriri. Rotyaantakeri Jope-ki.

<sup>9</sup> Okanta okiteeshetamanai, tampatzikatapaake ooryaa, areetzimataiyakani Jope-ki rotyaantaitakerira. Ari rateetanake irirori Pedro ramaña otaapiipankaki pankotsi. <sup>10</sup> Ikemaminthatakeri ritashe, ikowake roya, iro kantacha owakera ronkotsitaitzi royaari, ari iñaawyaatakari. <sup>11</sup> Iñaakero ashitaryaana inkite, rowayiitaitziro oshiyawetawori antawo manthakintsimanki, ithatotaitakeri opatzikaakipainiki. <sup>12</sup> Okanta manthakintsimankiki eenitatsi osheki itsipasatzipaini tsimeri, tzimatsi anashiyetachari kipatsiki, eejatzi shiwankiyetatsiri. <sup>13</sup> Irojatziki ikemantakeri riñaanataitanakeri, ikantaitziri: “Pedro, pinkatziye, powamayeri jirikapaini, poyaari.” <sup>14</sup> Rakanake Pedro: “Eero Pinkatharí. Te nowapiintari naaka jirika ipinkaitziri.” <sup>15</sup> Rapiitaitanakeri Pedro riñaanataitzi, ikantaitziri: “Tema jirikapaini ikaatzi rishinetaantziri Pawa, eero pitashiwaitari eeroka ‘ipinkaitziri.’ ” <sup>16</sup> Mawa apiitaka jiroka. Irojatziki ragaitantanaawori manthakintsimanki inkiteki.

<sup>17</sup> Antawo okantzimoshiretanakeri Pedro, ikenkithashiryaaawaitanaka oita oshiyakaawentachari okaatzi iñaakeri. Irojatziki rareetantapaakeri rotyaantanewo Cornelio, rosampikowentapaakero ipanko Simón. <sup>18</sup> Ikanta rareetapaaka pankotsiki, ikaimaiyapaakitziini rosampitantapaake, ikantzi: “¿Ari rimayiri jaka Simón, iitaitziri Pedro?” <sup>19</sup> Ikenkithashiryaaakominthaitawo Pedro iñaakeri, riñaanashiretanakeri Tasorenkantsi, ikantziri: “Pamine, areetapaaka mawa atziri aminaminatzimiri. <sup>20</sup> Pinkatziye, payiite. Eero pikisoshirewaitzi, pintsipatyaari, tema naaka otyaantakeriri.” <sup>21</sup> Ari rayiitapaake Pedro, ikantapaakeri areetapainchari: “Naaka pithotyaakotzi. ¿Iitaka pipokantari?” <sup>22</sup> Ikantaiyanakeni irirori: “Nipokantari rotyaantatyaana Cornelio, reeware owayeripaini. Tampatzikashireri rinatzi, pinkathatasorentsiwaitaneri rinatzi, iri aakameethatapiintziriri pisheninkapaini Judá-ite. Tema chapinki ripokashitakeri imaninkarite Pawa, ikantakeri: ‘Pinkaimakaanteri Pedro, ripokantyaari pipankoki, ari pinkemeri oita inkamantemiri.’ ” <sup>23</sup> Ikanta Pedro ikyaakaanakeri pankotsiki, ari rimagaiyapaakeni. Okanta okiteeshetamanai, jatake Pedro royaataiyanakerini pokashitakeriri, itsipatanakeri eejatzi Jope-satzi, “iyekiite” rinatzi.

<sup>24</sup> Okanta otsipa kiteesheri areetaiyakani Cesarea-ki. Oyaatsi Cornelio itsipayetakari isheninkapaini, eejatzi aapatziyariri ikaatzi ikaimayetakeri irirori. <sup>25</sup> Areetapaaka Pedro pankotsiki, rishitowashitanakeri Cornelio, rotziwerowashitawakari, impinkathatawakerime. <sup>26</sup> Iri kantacha Pedro ipiriintakeri, ikantziri: “Pinkatziye, atziri ninatzi eejatzi naaka, ari noshiyimi eeroka.” <sup>27</sup> Ikanta ikenkithawaitakaawakeri Cornelio, ikyaakaanakeri ipankoki, iñaapaakitzi osheki atziri piyotainchari. <sup>28</sup> Ikantanake Pedro: “Piyotaiyini eeroka, naakapaini Judá-ite te rishinetaitana nontsipatemi eerokapaini kaari nosheninkata, te onkantya nonkyaawankotemi. Iro kantacha owakeraini riyotaakena naaka Pawa, te onkameethate nonkantayetemi: ‘Nowinkane pinatzi.’ ” <sup>29</sup> Iroowa kaari nishenkaantanaka pikaimakaantantakeri. Iroñaaka nokowi niyote oita pikaimakaantantakeri.”

\* **10:3** Kantakotachari jaka “thataawo ooryaa”, iri ikantaitziri pairani “ooryaa 9”.



<sup>30</sup> Rakanake Cornelio, ikantzi: “Chapinki, tzimake 4 kiteesheri, ari ikaatake ooryaa iroñaaka, ishaawiityaake. Nisaiki naaka nopankoki nitziwentawaita, namana otsireniityaanaira, ari ikoñaatzimotakena atziri, shipakiryaa okantapaaka iithaare. † <sup>31</sup> Ikantapaakena: ‘Cornelio, ikemakemi Pawa pamanari, ikenkithashiryaakero pineshironkatantapiintzira. <sup>32</sup> Potyaante nampitsiki Jope amerine Simón, iitaitziri eejatzi Pedro. Ari rimayiri itsipaki Simón, mashicheempeki nampitawori inkaarecher-aaki.’ <sup>33</sup> Intsipate notyaantake iñagaitemi, pimatakeri eeroke pipokanake intsipate. Naakaga ipiyotakaakari Pawa iroñaaka. Janjaatya pinkantenawo okaatzi ikantakemiri Awinkatharite.”

<sup>34</sup> Irojatzzi ikantantanakari Pedro: “Ari niyotziri iroñaaka rimaperotatya Pawa te ramaakinetziri atziri, <sup>35</sup> raakameethatziri pinkathatanairiri, tampatzikashiretatsiri, okantawetaka jimpe inampiyetawo, kaari nosheninkata. <sup>36</sup> Tema jiroka Ñaantsi kenkithatakotziriri Jesucristo, okaatzi jatakotaintsiri nosheninkapainiki Israel-iite, iri-ira Pawa kantakaawori nokenkithatakotantaariri. Tema iriitake pinkathariwentaine maawoini, iriira saikakaayetaine kameetha. <sup>37</sup> Piyoperotaiyini eeroke okaatzi awi-saintsiri noipatsiteki. Tema pikemakowentakero pairani ikenkithatakotakero Juan-ni okantakota omitsitsiyaataantsi. Irojatzzi opoñaanaka Galilea-ki, <sup>38</sup> iñagaitakeri Jesús Nazaret-satzi. Iri Pawa pakeriri ishintsinka eejatzi Itasorenka. Irojatzzi ikenake-nayetantanakari irirori ineshironkatantayetzi, rowawisaakoyetake osheki raagayetziri peyari. Iroowa rantantakawori jiroka tema Pawa tsipatakari. <sup>39</sup> Naakayetake ñaaperotawakeriri rantayetakeri Jesús janta Judea-ki eejatzi Jerusalén-ki. Irojatzzi rowa-magaitantakariri, ikentakoitakeri. <sup>40</sup> Iro awisawetaka mawa kiteesheri rowañagairi Pawa, ikantakaakawo irirori noñaayetairi naakapaini. <sup>41</sup> Te roñaagapanaantari maawoini atziri, apatziro naakapaini, ikaatzi riyoyaakeri pairani Pawa iñaayetairi. Ikanta rañagaira, notsipatawaari nowaiyani eejatzi nirawaitaiyini. <sup>42</sup> Iriira otyaantakenari nonkamantayetairi atziripaini, nonkantairi: ‘Iri Jesús rowake Pawa kantakowentairine maawoini añaayetatsiri, eejatzi kamayetaintsiri.’ <sup>43</sup> Irijatzzi Jesús ikenkithatakotzitakari pairani Kamantantaniite, ikantake: ‘Inkaate kemisantairine jirika, raakoyetairi iwairo, aritake impeyakotainiri iyaariperonka.’ ”

<sup>44</sup> Ikenkithawaiminthaitzi Pedro, risaikashiretantapaakari Tasorenkantsi maawoini kemisantakeriri ikenkithatzi. <sup>45</sup> Iyokitziitanake ikaatzi oyaatakeriri Pedro, iñaakerira risaikashiretantapaakari Tasorenkantsi kaari isheninkata, oshiyawaitakawo risakoper-oitatyeenirime, ‡ <sup>46</sup> ikemaiyakerini riñaawaitantanakawo otsipasato ñaantsi, ithaamentanakari Pawa. <sup>47</sup> Ikantanake Pedro: “¿Kantachama athañaapithatyaari romitsitsiyaatya jirikapaini atziri, oshiyakairi aakapaini risaikashiretantaira Tasorenkantsi?” <sup>48</sup> Rotyaantakeri romitsitsiyaataiteri jirikapaini raakotakeri iwairo Jesucristo. Ikanta jirikapaini ikantakeri Pedro: “Pisaikimowaitanakena.”

## 11

### *Ikamantapairiri Pedro kemisantzinkaripaini Jerusalén-ki*

<sup>1</sup> Ikanta ikemaiyakeni itsipa Otyaantaperoriite eejatzi iyekiite nampitawori Judea-ki, ikantaitzi: “Ikemairo riñaane Pawa kaari asheninkata, ikemisantayetairi irirori.” <sup>2</sup> Iro kantacha rareewetaaga Pedro Jerusalén-ki, riñaanaminthatawairi Judá-ite kemisantayetatsiri. \* <sup>3</sup> Ikantawairi: “¿Iitaka pareetantariri kaari asheninkata, pakiyooyetakeri eejatzi?” † <sup>4</sup> Ari ikamantanakeri Pedro oita opoñaantari. Ikantanakeri: <sup>5</sup> “Nisaiki

† **10:30** Kantakotachari jaka “ishaawiityaake”, iri ikantaitziri pairani “ooryaa 9”. ‡ **10:45** Jirikapaini “oyaatakeriri Pedro”, irijatzzi iitaitzitari “Tomeshaaniri”. \* **11:2** Kantakotachari jaka “Judá-ite”, irijatzzi iitaitzitari “Tomeshaaniri”. † **11:3** Kantakotachari jaka “kaari asheninkata”, irijatzzi iitaitziri “kaari tomeshaaniri”.

naaka nampitsiki Jope, namana, ari noñaawyaatakari. Noñaake oshiyawetawori antawoite manthakintsimanki, ithataitakero opatzikaakiki, rowayiitaitakero okenapaake inkiteki irojatzzi tsika nisaikake naaka. <sup>6</sup> Ari naminaperotanakero, noñaake osheki tsimeri, noñaake anashiyetachari kipatsiki, eejatzzi shiwankiyetatsiri. <sup>7</sup> Irojatzzi noke-mantakari ñaanatakenari, ikantana: ‘Pedro, pinkatzziye, powamairi jirikapaini, poyaari.’ <sup>8</sup> Ari nakanake naaka: ‘Eero Pinkathari, tema te namonkotapiintziri naaka ipinkaitziri.’ <sup>9</sup> Rapiitaitanakena riñaanataitana, ikantaitana: ‘Tema jirikapaini ikaatzzi rishinetaantairi Pawa, eero piitashiwaitari eeroka “Ipinkaitziri”.’ <sup>10</sup> Mawa apiitaka jiroka. Irojatzzi ragaitantanaawori inkiteki okaatzzi noñaakeri. <sup>11</sup> Ari rareetaiyapaakani mawa atziri thotyaakotanari, rotyaantaitakeri ipoñaakawo Cesarea-ki. <sup>12</sup> Riñaanashiretakena Tasorenkantsi, ikantakena: ‘Poyaatanakeri jirikapaini, eero pikisoshirewaitanake.’ Irootake nantakeri. Jirika 6 iyekiite notsipatanakari. Iri notsipatakari nokyaapanokotakeri atziri kaari asheninkata. <sup>13</sup> Ikamantawakena, ikantana: ‘Chapinki, noñaake maninkari ikatziyapaaka jaka nopankoki, ikantakena: “Potyaante jatatsine nampitsiki Jope raakiteri Simón, iitaitziri eejatzzi Pedro. <sup>14</sup> Iriitake kamantemirone tsika pinkantya pawisakoshiretantaiyaari, pitsipataarira maawoini pisheninkapaini.”’ <sup>15</sup> Ikanta nokenkithawaitakaapaakeri, ari omapokapaaka risaikashiretantapaakari Tasorenkantsi iriroripaini, ariwaitake risaikashiretantakairi ketziroini aakapaini. <sup>16</sup> Ari nokenkithashiryaanakero ikantakeri pairani Awinkatharite: ‘Imapero Juan romitsitsiyaatantawo ñaa, iro kantacha ari piñaayetakero eeroka risaikashiretantemi Tasorenkantsi oshiyawaitaawome romitsitsiyaatantaitayeemirime.’ <sup>17</sup> Tema iriitake Pawa neshironkatakakeri eejatzzi iriroripaini itsipayetai aakapaini akemisantayetairi Pinkathari Jesucristo. ¿Iitaka nonkoshekantyaariri Pawa?’ <sup>18</sup> Ikanta ikemaiyawakeni iyekiite nampitawori Jerusalén-ki, tekaatsi inkantaiyanakeni. Ithaamentaiyanakarini Pawa, ikantaiyanakeni: “¡Imaperotatyaawé! ¡Ineshironkatakairi Pawa kaari asheninkata! ¡Kantacha iriroripaini ripakagairo iyaariperonka, ompoñaantaiyaari rañaashireyetai!”

### *Kemisantaatsiri Antioquía-ki*

<sup>19</sup> Rowamagaitakerira Esteban, ari retaitanakawo royaakyaataitaziri kemisantanzinkaripaini. Iro opoñaantanakari rishiyayetanaka kemisantanzinkaripaini janta Fenicia-ki, Chipre-ki eejatzzi Antioquía-ki. Ari ikenkithatakaayetakeri Judá-ite jimpe okantakota Kameethari Ñaantsi, temaita ikenkithatakairi kaari isheninkata. <sup>20</sup> Iro kanzimaitacha, ari rareetaiyakani Antioquía-ki, kemisantaatsiri poñaachari Chipre-ki eejatzzi Cirene-ki. Ikenkithatakaapaakeri kaari isheninkata, ikenkithatakeniri Kameethari Ñaantsi tsika ikantakota Jesús, Awinkatharite. <sup>21</sup> Okantakaaperotanakari ishintsinka Awinkatharite jirikapaini, ripakaakagairi itsipasatzzi atziri ramewaitashitari. Osheki kemisantanairiri Awinkatharite. <sup>22</sup> Ikanta kemisantanaintsiri Jerusalén-ki, ikemakotaiyakerini, rotyaantakeri Bernabé janta Antioquía-ki. <sup>23</sup> Aretaka Bernabé, iñaapaakeri tsika ikanta Pawa ineshironkayetakeri jirikapaini, antawoite ikimoshiretapaake. Ikaminaayetapaakeri maawoini ompoñaantyaari roisokeroshireyetyaariri Awinkatharite. <sup>24</sup> Tema jirika Bernabé neshironkatantaneri rinatzzi, rawentaashiretari Awinkatharite, risaikashiretantari Tasorenkantsi. Irootake isheniperotantanakari kemisantanairiri Awinkatharite. <sup>25</sup> Ikanta Bernabé, jatake Tarso-ki iñeeri Saulo. <sup>26</sup> Ikanta iñaapairi, ramairi Antioquía-ki. Ari risaikimowaitakeri riyotaanewo apaani osarentsi, riyotaayetai osheki atziri. Ari etanakawo janta Antioquía-ki iitaitziri kemisantanzinkari “Cristo-weripaini”.

<sup>27</sup> Okanta apaani kiteesheri, rareetaiyakani Antioquía-ki kamantantaneripaini ipoñaanakawo Jerusalén-ki. <sup>28</sup> Ikanta apaani kamantantaneri jitachari Agabo, ikatziyanaka ipiyotaiyanira, ikantanake: “Ari iñagaitake antawoite tashetsi maawoiniki nampitsi.” Iri Tasorenkantsi ñaanashiretakeriri riyotantakawori.

Iroowa monkaatainchari pairani ipinkathariwetantakari Claudio. <sup>29</sup> Irootake ikenkithashiryaaantaiyakarini Antioquía-satzi ineshironkateri Judea-satzi rotyaanteniri iyekiite okaatzi rimayetziri. <sup>30</sup> Iro rantaiyakerini, rowaitakeri Bernabé itsipatakari Saulo iri aminakaanterone. Rotyaantakeniri itzinkampaini janta Judea-ki.

## 12

### *Rowamagaitantakariri Jacobo, romonkyagaitakeri Pedro*

<sup>1</sup> Ikanta pinkathari Herodes royaakyaatakeri kemisantzinkari. <sup>2</sup> Ikantakaantakeri rithatzinkaiteri Jacobo, irirentzi Juan. <sup>3</sup> Ikanta iñaakero Herodes kameetha inimotakeri Judá-ite, rotaiyakaantakeri Pedro. Aripaite imonkaatakari jiroka roimoshirenkantawori rowantapiintawori tashirentsiponka. <sup>4</sup> Ari rotaiyakaantaitakeri Pedro, romonkyakaantakeri. Rowaitake 16 owayeripaini aminerine. Ikenkithashiryaaaka Herodes roñaaganterime atziripainiki onkaatakerika roimoshirenkaita kiteesheriki Anonkoryagaantsi. <sup>5</sup> Romonkyaaminthaitziri Pedro, amanaiyachani kemisantzinkaripaini ipiyowentaiyarini Pawa.

### *Romishitowaitairi Pedro*

<sup>6</sup> Okanta imonkaatzimatapaaka raantyaariri Herodes jirika Pedro roñaaganteri atziripainiki. Maatsi Pedro tsireniriki rosatekakeri apite owayeri, roosotantakeri apite kotsirotha. Saikaiyatsini itsipa owayeripaini ikyaapiintaitzira aminiriri. <sup>7</sup> Ari romapokaka ripokake imaninkarite Awinkatharite, kiteeshaaniki ikantakapaakawo. Rotzinkamerekitapaakeri Pedro, rowakiryapaakeri, ikantziri: “¡Pinkatziye!” Oparyaashiwaitanaka kotsirotha roosotantaitakariri rakoki. <sup>8</sup> Rapiitakeri maninkari, ikantziri: “Pinkithaatya, pizapato-tya.” Ari ikantakero Pedro. Eekero ikantatzi maninkari: “Pinkithaatyaawo piwewiryakowo, poyaatena.” <sup>9</sup> Shitowanake Pedro royaatanakeri maninkari. Te riyotzi kyaaryooperorika okaatzi rantziri maninkari. Oshiyimowaitakeri iñaawyaatatyeeyaame. <sup>10</sup> Iro kantacha rawisanake apaani aminiriri, rawisanake itsipa. Iro rishitowimate, rareetapaakawo kotsirotakitatsiri ashitakowontsi, ashitaryaashiwaitanaka apaniroini. Shitowanake. Ikanta ranashitanaka, iro itaponeentanaka, ari rookanairi maninkari apaniroini. <sup>11</sup> Ari ikenkithashiryaaanakari Pedro, ikantanake: “Ari niyotzi iroñaaka imaperotatya rotyaantakeri Pinkathari imaninkarite, rookaawiritaantakena Herodes-ki, rookaawiritaantakena eejatzi tsikame inkantawaitename Judá-ite.”

<sup>12</sup> Ikanta riyotanakero Pedro jiroka, jatanake opankoki María, inaanate Juan, iitaitziri eejatzi Marcos, ari ipiyota ramana. <sup>13</sup> Kaimapaake ikyaapiintaitzira. Okanta ewankawo jitachari Rode, jatanake amineri iitarika. <sup>14</sup> Ari iyowaantetawairi Pedro rinatzi, antawoite okimoshiretanake, te ashitaryaananeniri inkyaantapaakyaari, piyanaka inthomoiki okamantantzi, okantapaake: “Pedro rinatzi kaimatsiri.” <sup>15</sup> Ari ikantaitawakero: “¡Te pishinkiwenta!” Eekero oshintsitzi iroori, okantzi: “Imaperotatya.” Ikantaiyini irirori: “Aamaaka ramanka Pedro.” <sup>16</sup> Eekero ishintsitzi Pedro ikaimi. Ikanta rashitaryagaitakeniri, iñagaitziiri Pedro rinatzi, riyokitziitaiyanakeni. <sup>17</sup> Rowaatzinkawakotanaka Pedro, imairetantyaari. Irojatziki ikenkithatakotantanakawori jimpe ikantakero Awinkatharite romishitowantaariri. Eekero ikantanakitzi Pedro: “Pinkamanteri jiroka Jacobo eejatzi itsipa iyekiite.” Ari rishitowanai, jatanake otsipaki nampitsi.

<sup>18</sup> Okanta okiteeshetamanai, osheki okantzimoshiretaiyakerini aminiriri, tema te riyotaiyini jimpe ikenake Pedro. <sup>19</sup> Inintakaantakero Herodes rithotyaakoitairi, iro kantacha te iñagaitairi. Irootake rookoitantanakariri aminiriri, rowamaakaantaitakeri. Okanta awisake jiroka, shitowai Herodes Judea-ki, jatake inampitapaintyaawo Cesarea-ki.

*Ikamantakari Herodes*

<sup>20</sup> Ari ikantatya Herodes ikoshekawaitakari nampitawori Tiro-ki eejatzi Sidón-ki. Ikanta ikenkithashiryagaiyakani ikoshekaminthatane raakameethayetairi, tema ari riyomparitaiyapiintani. Rotyaantaiyakeni jatashiyeterine Herodes raapatziyaiyaari. Ikanta saikawankotziriri Herodes, rawentaaperotanewo, jitachari Blasto, raakameethayetawakeri pokashitakeriri. Ikantakowentakeri Herodes-ki tsikapaiterika inkenkithatakaantyaariri. <sup>21</sup> Monkaatapaaka kiteesheri ikaimakaantakeri Herodes inkenkithawaitakairi. Ari ikithaatanakawo owaneenkari iithaare ikenkithawaitantapiintari, saikapaake risaikamentoki ipiyotaiyakanira, kenkithawaitanake. <sup>22</sup> Ari ikaimakotaiyirini atziripaini, ikantzi: “¡Jirinta kenkithawaitaintsiri, Pawaga rinatzi, kaari atziri!” <sup>23</sup> Te onkantzimotaatsikaityaari Herodes roshiyakaantaitakariri Pawa ithaamentaitakari. Irootakera romapokantanakari romantsiyaakeri imaninkarite Awinkatharite, chowiwaitanake, kamake.

<sup>24</sup> Iro kantacha, eekero iyaatakotanakitzi riñaane Awinkatharite, eekero isheniperotanakitzi kemisantzinkaripaini.

<sup>25</sup> Ikanta Bernabé eejatzi Saulo rimonkaatakero rantakero rotyaantantaitakariri Jerusalén-ki, piyaiyaani Antioquía-ki, ari itsipataari Juan iitaitziri eejatzi Marcos.

**13***Retanakawo ikenkithatakaantzi Bernabé eejatzi Saulo*

<sup>1</sup> Tzimatsi kamantantaneriite janta Antioquía-ki rapatotapiintaiyanira kemisantzinkaripaini, tzimatsi eejatzi yotaantaneriite. Jirika ikaataiyini: Bernabé, Simón iitaitziri eejatzi Kisaakiri, Lucio poñaachari Cirene-ki, Manaén iyempiyane pairani Herodes roimonkaiyakanira, ipoñaapaaka Saulo. \* <sup>2</sup> Ikanta ipiyowentaiyarini Awinkatharite, ritziwentaiyani, riñaanashiretakeri Tasorenkantsi, ikantakeri: “Powenari Bernabé pintsipataakenari Saulo nantawaitakaantyaariri.” <sup>3</sup> Ikanta rithonkakeri ramanaiyani, ritziwentaiyani, rotzimikapatziitoitantakariri rako jirikapaini, rotyaantaiyakerini.

*Ikenkithataiyini Otyaantaperoriite Chipre-ki*

<sup>4</sup> Ikanta rotyaantanewo Tasorenkantsi, jataiyakeni Seleucia-ki, ari rotetaiyanakani riyaaero Chipre-ki. <sup>5</sup> Aatakotaiyapaakeni Salamina-ki. Retapaakawo ikamantantapaakero riñaane Pawa rapatotapiintaiyanira Judá-ite. Ari riyaaatziyanakari irirori Juan ramitakoteri. <sup>6</sup> Ranonkanakero eentamentare, irojatzi rareetantakariri Pafos-ki. Ari iñaake kamantantaneri sheripiyari Judá-ite, thairi rinatzi, iita Barjesús. <sup>7</sup> Jirika sheripiyari raapatziyanewo rinatzi pinkathari Sergio Paulo. Osheki riyorenka jirika pinkathari, ikaimakaantakeri Bernabé eejatzi Saulo, ikowi inkemero riñaane Pawa. <sup>8</sup> Iri kantacha jirika sheripiyari jitachari Elimas riñaaneki Grecia-thato, ikowake rotzikawakeri pinkathari eero ikemisantanta. <sup>9</sup> Ikanta Saulo, iitaitziri eejatzi Pablo, ipampoyaanakeri jirika, ikantakaaperotanakari Tasorenkantsi, <sup>10</sup> ikantanakeri: “¡Thairí! Kaariperori, itomi kamaari pinatzi. Pimanintakero kameethari. ¿Eeroma pipakairo potzikayetziro tampatzikatzimotziriri Nowinkatharite? <sup>11</sup> Iroñaaka rowasanketaitemi, osamani pinkantya pimawityaakite.” Apathakero ikantanaka, te ikowichaatanai. Rithotyakowaiweta akathawakotairine. <sup>12</sup> Ikanta iñaakero pinkathari awisaintsiri, ikemisantana. Riyokitziwentaitanakero ikenkithatakoitziri Awinkatharite.

*Areetaka Pablo eejatzi Bernabé Antioquía-ki saikatsiri Pisidia-ki*

<sup>13</sup> Ikanta rishitowanai Pablo janta Pafos-ki itsipatakari ikaataiyinira otetanaka riyaaero Perge-ki saikatsiri janta Panfilia-ki. Iri kantacha Juan, te royaatanairi, piyanaka irirori Jerusalén-ki. <sup>14</sup> Ikanta rareetaka Perge-ki awisanake otsipaki nampitsi

\* **13:1** Jirika “Herodes” iriitake pinkathariwentantatsiri pairani Galilea-ki.

Antioquía-ki saikatsiri janta Pisidia-ki. Ikanta ikyagaiyakeni rapatotapiintaga Judá-ite kiteesheriki rimakoryaantaitari, saikapaake. <sup>15</sup> Tema rithonkaitakero riñaanaitziro rosankenare Kamantantaneriite, Inintakaantaitanewo eejatzi, ikantake jewatakaantatsiri rapatotapiintaitaga: “Iyekiite, eenitatsi pinkanteri ompoñaantyaari inthaamentantyaari atziripaini.” <sup>16</sup> Irojatzzi ikatziyantanakari Pablo, rowaatzinkawakotanaka imairetantaityaari, ikantanake: “¡Shiramparipaini! ¡Israel-iite! ¡Maawoini pinkathatairiri Pawa!

<sup>17</sup> Iriitake Pawa yoyaakeriri pairani etakaantawori acharineeteni, Israel-iite. Iriitake oshekyaaakeriri. Irojatzzi roñaagantantakawori ishintsinka rookaawiritaantairi Egipto-ki. <sup>18</sup> Irojatzzi ripiyathawaitantakariri Pawa janta ochempiki okaatzi 40 osarentsi. Iri kantacha Pawa ikisashitakawo ripiyathayetakari. <sup>19</sup> Irojatzzi rithonkantakariri Pawa sheninkatawakaachari janta Canaán-ki ikaatzi 7, irootake iipatsitetakaayetaariri acharineeteni. <sup>20</sup> Maawoini jiroka nokenkithatakotakemiri awisake 450 osarentsi okaatzi osamanitake. Irojatzzi rowantakariri jewaripaini aminakoterine, irojatzzi riweyaantantapaakawori Samuel-ni, Kamantantaneri. <sup>21</sup> Iro kantzimaitacha ikowawetaka apaani iwinkathariteperotyaari. Iroowa rowantakariri Pawa jitachari Saúl, itomi Cis, icharinetari Benjamín. Iri pinkathariwentakeriri okaatzi 40 osarentsi. <sup>22</sup> Iri kantacha Pawa rowinkatharyaakeri Saúl-ni, ripoyaantantaari David-ni. Tema iri David-ni ikenkithatakotake pairani Pawa, ikantzi:

Noñaakeri David itomi Isaí, rinimotakena,

Iriitake materone nokowiri naaka.

<sup>23</sup> Ikanta itzimake Jesús, icharinetakari David-ni. Iriitake ikashaakaakeri Pawa rotyaanteri rowawisaakoyetai aakapaini Israel-iite. <sup>24</sup> Tekeraata ripokeeta Jesús, ikenkithatakotzitikari Juan-ni, ikantake: ‘Ontzimatye pipiyashireyetai, pomitsitsiyaawentaiyaari Pawa.’ <sup>25</sup> Ikanta Juan-ni rithonkimatakeri rantawaitanewo, ikantanake: ‘¿Piñaakityaanama naakatake jirika? Te naaka. Awotsikitake nopinkathaperotziri naaka, te onkantaatsikaitya roshiyakayena rimperatanewo nozapato-ryaantyaariri.’

<sup>26</sup> ¡Iyekiite! ¡Isheninkapaini Abraham! ¡Maawoini eerokapaini ikaatzi pinkathatairiri Pawa! Aakatakera rotyaantaitakai jiroka Ñaantsi awisakoyetantaiyaari. <sup>27</sup> Tema ikaatzi nampitawori Jerusalén-ki eejatzi reewarepaini, te riyotawakeri Jesús riyakowentaiyakerini. Iro opoñaantari kaari riyotantawo rimonkaatero okaatzira rosankenatakotakeriri Kamantantaneriite, okantaweta reshiwentapiintawetawo riñaanawetawo ipiyotaiyanira kiteesheriki rimakoryaantaitari. <sup>28</sup> Irojatzzi ikowakotantakariri Pilato ritsitokaiteri Jesús, okantawetaka tekaatsi inkenakaashitya irirori. <sup>29</sup> Ikanta rithonkakero rantayetakero okaatzi rimonkaatakaakari rosankenatakoitakeriri pairani, inowikyaakotakeri ikentakoitakerira, ikitakeri. <sup>30</sup> Iri kantacha Pawa rowiriintairi. <sup>31</sup> Ari retanakawo Jesús roñaagapanaantari ikaatzi tsipatakariri pairani ipoñaantakari Galilea-ki irojatzzi Jerusalén-ki. Osheki okaatzi kiteesheri roñaagapanaantari. Iriitajaantakera kenkithatakoyetairiri iroñaaka tsikarikapaini risaikayetzi atziri. <sup>32</sup> Irijatziita nokenkithatakotzimiri iroñaaka eerokapaini, nokenkithatakotzimiro Kameethari Ñaantsi jimpe okantakota ikashaakaakeriri Pawa acharineeteni. <sup>33</sup> Ari rimonkaatakero Pawa okaatzi ikashaakaakeriri, tema rowiriintairi Jesús roñaagayetai aakapaini, tema icharine anaiyini. Irootake osankenatakotachari Salmo-ki, okantzi:

Notomi nowimi eeroka.

Naaka pipaapatetanaa iroñaaka. †

† 13:33 Kantakotachari jaka “Salmo”, irojatzzi ikantaitziri “Salmo 2”. Omampagaantsi inayetzi iitaitziri Salmo. Osheki okaatzi, iro apitetanaintsiri rosankenaitakero pairani jiroka.



<sup>34</sup> Ari ikenkithatakotzitakari Pawa rowiriintairi Jesús, eero oshitziwaitanta iwatha. Ikantake ikenkithawaitake:

Okaatzi nokashaakaakeririri David-ni, iroowa nantemiri eeroka.

<sup>35</sup> Otsipaki Salmo okoñaatakoperotzira jiroka, okantzi:

Eero pishinetziri ishitzywaite iwatha pitasorentsita.

<sup>36</sup> Imaperotatya, kaari David-ni onkenkithatakote jaka, tema rañaakaakeri Pawa jirika David-ni, rimakoryaagai eejatzi, itsipataari icharineete jimpe ikitayetaa, ari ishitzwairi iwatha. <sup>37</sup> Irooma iwatha jirika rowiriintairi Pawa, te ishitzywaite iwatha irirori. <sup>38</sup> Iyekiite, ontzimatye piyoyetai eerokapaini, iri nokenkithatakotzi Jesús, tema iri matzirori ipeyakotakagaimiro piyaariperonka. <sup>39</sup> Eekerorika poyaatayeero In-intakaantaitakeri rosankenatakeri Moisés-ni, eero ipeyakotaitzimiro piyaariperonka. Irooma arika pinkemisantanairi Jesús, ari impeyakotaimiro irirori. <sup>40</sup> Paamaawentaiya eerokapaini, patsipetawokari rosankenatakotakeri Kamantantaneriite, ikantake:

<sup>41</sup> Pinkemaiyeni manintzirori kyaaryooperori,

Ari pinkitakitziitapainte, irojatzi pimpeyantakyaari.

Tzimawetakaga oita nantzimotaimiri,

Eeromaita pikemisantziro, intzimawetakya ooñaawontemirone.”

<sup>42</sup> Ikanta rishitowimatani Pablo rapatotapiintaitaga, ikowakotaiyakerini kaari isheninkata, ikantziri: “Pipiyai otsipaki kiteesheri rimakoryaantaitari, papiitero pinkenkithatakayenawo jiroka ñaantsi.” <sup>43</sup> Ikanta riyaataiyaini Judá-ite eejatzi kaari isheninkata ipiyotaiyani, eenitatsi osheki oyaatanakeriri Pablo eejatzi Bernabé. Ari ikaminaathayetakeri roisokerotantyaawori ineshironkayetairiri Pawa.

<sup>44</sup> Okanta imonkaatapaawo kiteesheri rimakoryaantapiintaitari, ipiyotaiyakani osheki atziri inkemisantero riñaane Pawa. <sup>45</sup> Ikanta iñaakerira Judá-ite ipiyotaiyapaakani atziripaini, ikisashiretaiyanakani, retanakawo ikoshekawaitakari Pablo, rithainkimawaitanakeri. <sup>46</sup> Te ithaawanake Pablo itsipatakari Bernabé, ikantakeri irirori: “Iro kameethawetachari netawakemi nonkamantayetemirome eerokapaini riñaane Pawa, tema Judá-ite pinayetzi. Irooma pimanintaiyakeronira, eero piñagairo rañaashiretakagaitaimi. Iroowa nonkenkithatakaantyaariri iroñaaka kaari asheninkata.

<sup>47</sup> Iroowa rotyaantantanari Nowinkatharite, ikantakena:

Eeroka nowake poitesheetyaakotairi kaari pisheninkata,

Pinkenkithatakotainiri awisakotaantsi.

Pithotyagairo maawoiniki kipatsi.”

<sup>48</sup> Ikanta ikemaiyawakeni kaari isheninkata, ikimoshiretaiyanakeni, ikan-taiyanakeni: “Osheki okameethatzi riñaane Pinkathari.” Rithonka ikemisantaiyaini ikaatzi riyoyagaitakeri rañaashireyetai. <sup>49</sup> Ithonka ikenkithatakoitanakero riñaane Awinkatharite nampitsikipaini. <sup>50</sup> Iri kantacha Judá-ite, ikenkithawaitakaake iriiperoripaini jewatakaantatsiri nampitsiki, tsinanepaini iyemakoitane, tsipatapiintariri Judá-ite ipiyotaiyanira, rakakaayetakeri royaakyaateri Pablo eejatzi Bernabé, romishitowairi inampitsiteki. <sup>51</sup> Ikanta Pablo itsipatakari Bernabé rotekanairo iipatsiyitzite riyotantaityaari te ikemisantaitziri Pawa janta. Irojatzi ikenaiyantanakarini otsipaki nampitsi Iconio-ki. <sup>52</sup> Iro kantacha kimoshire ikantaiyani riyotaanewopaini, risaikashireperotantanakari Tasorenkantsi.

## 14

### *Riyaatake Pablo itsipatakari Bernabé Iconio-ki*

<sup>1</sup> Ikanta Pablo itsipatakari Bernabé, ikyagaiyakeni rapatotapiintaiyanira Judá-ite janta Iconio-ki. Ikenkithatakaapaakeri, ari ikemisantaiyanakeni osheki Judá-ite eejatzi kaari isheninkata. <sup>2</sup> Iro kantzimaitacha, eeniyetatsi kisoshireri Judá-ite, ikaminaakeri kaari isheninkata inkoshekyaaari kemisantakaantapaintsiri. <sup>3</sup> Iroowa

risaikantapaakari osamani janta. Eekero ikenkithatakotanakitziiri Awinkatharite te ithaawaiyini. Ritasonkawentantayetake, iroowa riyotantaitari imaperotatya ikenkithatakotziro ineshironka Awinkatharite. <sup>4</sup> Iro kantacha ikoshekawakaanaka ikaatzi nampitawori janta. Eenitatsi aapatziyanakariri Judá-ite, tzimatsi itsipapaini aapatziyanakariri Otyaantaperoriite. <sup>5</sup> Ikanta Judá-ite itsipayetakari kaari isheninkata, ikenkithawaitakaakeri jewaripaini rowasankewaiteri, rishemyaantyaari eejatzi mapi. <sup>6</sup> Iri kantacha iriroripaini, riyotake oitarika rantaiteri, shiyaka ikenaiyanakeni Listra-ki eejatzi Derbe-ki, iro nampitsipaini saikatsiri janta Licaonia-ki. Irojatzzi raayetantanakari eejatzi otsipaki nampitsi okaatzi tzimayetatsiri janta. <sup>7</sup> Arira ikenkithayetakero Kameethari Ñaantsi janta.

*Rishemyaaweetakari Pablo Listra-ki*

<sup>8</sup> Okanta janta Listra-ki tzimatsi atziri kisopookiri, te ranashiwaita, tema rashi rowiro owakera itzimapaake. Ari risaikiri jirika atziri, <sup>9</sup> ikemisantziri Pablo. Ikanta Pablo rotzikanatanakari atziri, riyotake osheki rawentaashiretakari, kantacha retsiyatakotakagairi. <sup>10</sup> Riñaanatanakeri shintsiini, ikantanakeri: “¡Pinkatziye, potampatzikatero pititzi!” Apathakero rimitaanake katziyanaka, anashitanaa. <sup>11</sup> Ikanta ñagaitakero rantakeri Pablo, ikaimaiyanakeni atziripaini riñaaneke Licaonia-satzi, ikantaiyini: “¡Rayi-itzimotakai pawa roshiyapaakari atziriwé!” <sup>12</sup> Roshiyakagaitanakeri Bernabé iriime jitachari “Júpiter”, iriima Pablo roshiyakagaitanakeri iriime jitachari “Mercurio”, tema iriitake Pablo ñaawaitatsiri. <sup>13</sup> Janta ikyaapiintaitzira nampitsiki, ari isaikiri iyaapapankote sheripiyariwentziriri Júpiter. Jirika sheripiyari, ramake iroñaaka ipirapaini, inchatyakipaini. Itsipayetakari atziripaini ikowawetaiyani impinkathateri Bernabé eejatzi Pablo. Ikowi rowamayenirime ipirapaini, ritayeniri. \* <sup>14</sup> Iri kantacha Bernabé itsipatakari Pablo, Otyaantaperori rini, riyotake irirori oita ikenkithashiryari ranteniriri atziripaini. Weshiryaperotanaka, risaperyaanakero iithaare. Rosatekantanakari atziripaini, ikaimanake, <sup>15</sup> ikantzi: “¿Oitaka pantantyaawori jiroka? Atziri ninayetatzzi naaka, ari noshiyimi eerokapaini. Irootake nipokantakari nonkamantayetaimi pipakaayetairo pametashitapiintari. Ontzimatyepinkemisantairi Pawa Kañaanetatsiri, wetsikakerori inkite, kipatsi, inkaare, maawoini tzimantayetawori. <sup>16</sup> Irijatzzi shine-takeriri pairani picharinepaini rantapiintantakawori ñaamatashiyetari iriroripaini. <sup>17</sup> Iro kantzimaitacha te rimanapithawetari kaari riyotantaatsikaitari ñaatsira irirori. Tema iri Pawa neshironkatapiintakairi aakapaini, rowariiro inkani, okithokiyetan-tari awankirepaini, iri payetairori maawoini owayetari, iro opoñaantari akimoshiretai.” <sup>18</sup> Okantawetaka ikantayewetakari atziripaini jiroka, osheki opomeentsitaka ripakaakaantyaariri rowamayeniri ipirapaini ritayeniri.

<sup>19</sup> Ari rareetaiyapaakani Judá-ite poñagainchari Antioquía-ki eejatzi Iconio-ki. Ikaminaayetapaakeri atziripaini. Irootake rishemyaantawetakariri Pablo. Inoshikaitanakeri rookakeri nampitsithapiki, roshiyakaaminthaitzi ari rowamaakeri. <sup>20</sup> Ikanta riyotaanepaini Pablo ipiyowentapaakari, ari ipiriintanaari eejatzi ripiyanaawo nampitsiki. Okanta okiteeshetamanake jatake Derbe-ki itsipatanaari Bernabé. <sup>21</sup> Ikanta ikamantantapaakero Kameethari Ñaantsi janta Derbe-ki, ikemisantakaake osheki atziri. Irojatzzi ripiyantanaawori Listra-ki, Iconio-ki irojatzzi Antioquía-ki. <sup>22</sup> Ari ikenkithatakaayetanairi riyotaanepaini, ikaminaayetanairi onkantya roisokerotantyaariri rawentaashiretanakari, ikantayetziri: “Ontzimatyepañero osheki ankemaatsiwaityaari ompoñaantyaari ankyaantaiyaari jimpe ipinkathariwentantai Pawa.” <sup>23</sup> Raminake apawopaini itzinkampaini jewaterine kemisantzinkaripaini tsika rapatotapiintaiyani. Ramanakotanaari, ritziwentanaari, ikantapiintake: “Nowinkatharité, pinkempoyagairi jirikapaini awentaayetanaimiri.”

\* **14:13** Kantakotachari jaka “ipirapaini”, iriira toro-paini.

*Piyaawo Antioquía-ki saikatsiri Siria-ki*

<sup>24</sup> Ikanta ikenapairo Pablo janta Pisidia-ki, irojatzi Panfilia-ki. <sup>25</sup> Ikenkithatakaantanake janta Perge-ki, rawisanake irojatzi janta Atalia-ki. <sup>26</sup> Ari rotetanaa irojatzi Antioquía-ki, tsika janta rowaitakeri pairani riyaatantyaari inkamantantero ineshironka Pawa. Irootake rimatakeri rantayetakeri. <sup>27</sup> Ikanta rareetaa Antioquía-ki, ipiyoyetapairi kemisantzinkaripaini, ikamantapairi okaatzi rantakaayetakeriri Pawa, jimpe ikanta Awinkatharite rawentaashiretakaayetaari kaari isheninkata. <sup>28</sup> Ari risaikapairi Pablo itsipatakari Bernabé itsipayetapaari riyotaanewo.

**15***Rapatotaita Jerusalén-ki*

<sup>1</sup> Ari rareetaka Antioquía-ki, apawopaini atziri ipoñaayetakawo Judea-ki, riyotaantayetapaake, ikantantapaake: “Iyekiite, eerorika pimonkaayetziro Inintakaantaitanewo rosankenatakeri Moisés-ni, pitomeshaanitya, eero paw-isakoshireyetai.” <sup>2</sup> Ikanta Pablo itsipatakari Bernabé osheki riñaanaminthatakeri jirikapaini areetapainchari. Irootake ikowantaitakari rotyaantaiteri Pablo, Bernabé eejatzi itsipapaini, riyate Jerusalén-ki iñeeri Otyaantaperoriite eejatzi itzinkamipaini, impiyowentyaawo awisaintsiri. <sup>3</sup> Ari rotyaantaitakeri ikenanake Fenicia-ki irojatzi Samaria-ki, ikamantantayetanaake jimpe ikantayetaa ikemisantayetai kaari isheninkata. Ikimoshiretaiyanakeni iyekiite ikemawakera. <sup>4</sup> Irojatzi rareetantakari Jerusalén-ki. Kameetha raawakeri kemisantzinkaripaini, Otyaantaperoriite eejatzi itzinkamipaini. Ikamantapaakeri iriroripaini rantakaayetakeriri Pawa. <sup>5</sup> Iri kantacha apawopaini Fariseo kemisantaatsiri, ikatziyanaka iriroripaini, ikantanake: “Ikaatzi kemisantayetaatsiri kaari asheninkata, okowaperotatya rimonkaayetairo Inintakaantaitanewo rosankenatakeri Moisés-ni, ritomeshaanitya.”

<sup>6</sup> Ari ipiyotaiyakani Otyaantaperoriite itsipayetakari itzinkamipaini raminakotantyaawori tsika okantakota jiroka. <sup>7</sup> Okanta osamanitake riñaanatawakaawentakawo, ikatziyanaka Pedro, ikantanake: “Iyekiite, pinkenkithashireero eerokapaini eenitatsi rantzimoyetakairi Pawa pairani. Rotyaantakena naaka nokenkithatakaayetairi Kameethari Ñaantsi kaari asheninkata, ari okantaawo ikemisantantaari iriroripaini. <sup>8</sup> Tema Pawa riyotake jimpe ikanta ishireki, ari roñaagayetairo ikowiri irirori risaikashiretantaiyaari Tasorenkantsi kaari asheninkata ikemetaakaira pairani aakapaini. <sup>9</sup> Tema raakameethatairi Pawa jirikapaini ikemetaakaira eejatzi aakapaini, roiteshireyetairi rawentaashiretaarira. <sup>10</sup> ¿Kameethatatsima piñaantawaityaari Pawa? ¿Iitaka pinkematenatakaantyaariri ayotaanewo? Tema potsiwakakaakari kaari amataatsikaitzi aakapaini, kaari rimataatsikaitzi eejatzi acharineete. <sup>11</sup> Iroowa ineshironka Awinkatharite Jesús owawisaakoshireyetairi aakapaini. Ari ikantayetaari eejatzi iriroripaini.”

<sup>12</sup> Ari imairetaiyanakeni maawoini, ikemisantakeri Bernabé eejatzi Pablo ikenkithatakotziro okaatzi rantakaayetakeriri Pawa janta itsipasatziki atziripaini, ritasonkawentantayetake. <sup>13</sup> Ikanta rithonkakeri ikamantantake, ikantanake Jacobo: “Iyekiite, pinkemisantawakena: <sup>14</sup> Ikamantakairo Simón jimpe ikanta Pawa retantanakawori riyoyayetairi itsipasatzipaini, opoñaantari ikemisantairi, raakoyetairi iwairo. <sup>15</sup> Ari imonkaatari iroñaaka rosankenatakotakeri pairani Kamantantaneriite, ikantake:

<sup>16</sup> Arika onkaatapaake jiroka, ari nipiye.

Nompiriintairo ipanko David tyagaintsiri.

Nompinkatharitakagairi incharinetyaari ari roshiyaiyaari jimpe ikanta irirori nopinkatharitakaakeri.

17 Iro ompoñaantyaari rithotyaakoyetaina itsipasatzipaini, inkantayetaina: ‘Nowinkatharite’,

Iro ompoñaantyaari nashitaiyaari kaari pisheninkata, raakoyetaina nowairo.

18 Ari ikantake ikenkithawaitake Awinkatharite, oñaagantzirori ikenkithashiretzitakari owakera retantanakawori.

19 Irootake nonkantantyaari naaka, eero okanta omerencheeri kaari asheninkata ikaatzi kemisantayetairiri Pawa. 20 Apatziro otyaanteniri osankenarentsi eero rowantari wathatsi rashitakagaitariri iwawanetashiyeetari, eero imayempiwaiyetanta, eero rowakoyetantawo riraa piratsipaini. 21 Tema irootake jiroka rosankenare Moisésni ikenkithatakoitapiintziri tsikarikapaini rapatotapiintayeta Judá-ite kiteesheriki rimakoryaantaitari. Irootake retanakari pairani. Irootake ripakaantyaawori jirokapaini eero ikantzimoshiretakaantari asheninkapaini.”

22 Ikanta Otyaantaperoriite eejatzi itzinkamipaini, itsipayetakari kemisantzinkarpaini, riyoyaake rotyaanteri Antioquía-ki intsipatyaari Pablo eejatzi Bernabé. Jirika ikaatzi riyoyaakeri: Judas iitaitziri Barsabás, eejatzi Silas. Iriitake jewatakaayetak-eriri iyekiite janta. 23 Iriitake aanakerone osankenarentsi. Jiroka okantzi osanke-nataka: “Iyekiite, naakatake Otyaantaperoriite, itzinkamipaini. Niwethataiyimini eerokapaini kaari nosheninkata nampiyetawori Antioquía-ki, Siria, eejatzi Cilicia-ki.

24 Niyotaiyakeni tzimatsi poñaayetanainchari jaka, iri omerenchaakemiri janta, ikowi pimonkaayetairo Inintakaantaitanewo, pitomeshaanitaiya. Kaarira jirika notyaan-tanewo naaka. 25 Irootake nokenkithawaitantakariki jaka, ari niyoyaake apawopaini akaataiyinira, jatatsine iñeemi intsipatanakyaari etakokitanewo Pablo eejatzi Bernabé.

26 Iriiyetake atsipewentakariri Awinkatharite Jesucristo. 27 Jirika notyaantakemiri: Judas eejatzi Silas. Iriira kenkithawaitakaapaakemine janta inkamantapaakemiro maawoini jiroka. 28 Te onkameethate nonkematenatakaawaitemi eerokapaini, tema iro kameethatzimotakeriri Tasorenkantzi, eejatzi naakapaini. Apatziro pantayetairo okaatzi kowaperotachari. Jiroka okantzi: 29 Eero powayetari wathatsi rashitaka-gaitariri iwawanetashiyeetari. Eero powakoyetawo riraa piratsi. Eero pimayempi-waitzi. Arika pimonkaayetanakero jiroka, kameethatake. Ari okaatzi.”

30 Ikanta rotyaantaitakeri, jatake Antioquía-ki. Ari ipiyotapaakeri kemisantzinkaripaini, ipapaakeri osankenarentsi. 31 Ikanta riñaanatawakero, ikimoshireperotaiyanakeni. 32 Tema kamantantneri rinayetzi Judas eejatzi Silas, ithaamentakaapaakeri iyekiite roisokerotyaari Pawa, ikenkithawaitakaapaakeri.

33 Okanta osamanitake risaikimowaitakeri kameetha, rotyaantairi jimpe ipoñaakawo pairani. 34 Iri kantacha Silas okameethatzimotakeri irirori risaikanake. 35 Eejatzi Pablo itsipatakari Bernabé irojatzzi risaikanake iriroripaini Antioquía-ki, itsipayetakari itsipapaini, eekero riyotaantanakitzi, ikamantantziro riñaane Awinkatharite.

### *Rontsiparyaari Pablo jirika Bernabé rapiitairowa riyaatzi ikenkithatzi*

36 Okanta osamanitake, ikantairi Pablo jirika Bernabé: “Jame apiitero areetyaari inampipainiki iyekiite tsika akamantantakero riñaane Awinkatharite. Aminairi jimpe ikantayeta.” 37 Ari ikowawetaka Bernabé raanakerime Juan, iitaitzitari Marcos.

38 Iro kantacha te inimoteri Pablo raanairi, tema Marcos rookanawentakari janta Panfilia-ki, te rithotyiro intsipatyaari jimpe ikenayetake ikenkithatakantzi. 39 Ari riñaanaminthatawakaiyakani. Aripaite rontsiparyaawakaiyanakani. Raanakeri Bernabé jirika Marcos, otetanaka ikenanake Chipre-ki. 40 Iriima Pablo, raanakeri Silas. Ramanakotawaari iyekiite, ikantaiyini: “Nowinkatharité, nawentaimi eeroka, pineshi-ronkateri jirika.” Ari riyataiyananeni. 41 Ikanta ikenanake Siria-ki, irojatzzi Cilicia-ki, rominthashiretakaayetakari ikaatzi kemisantayetaatsiri.

## 16

### *Timoteo itsipatari Pablo eejatzi Silas*

<sup>1</sup> Ikanta rareetaka Pablo janta Derbe-ki itsipatari Silas irojatzi rareetantakari Listra-ki. Ari iñaake riyotaanewo Awinkatharite iita Timoteo, otomi osheninka Judá-ite rinatzi, kemisantatsiri, riñaawaitziro Grecia-thato ipaapate. <sup>2</sup> Jirikapaini kemisantzinkaripaini nampitawori Listra-ki eejatzi Iconio-ki kameetha ikenkithatakotakeri jirika Timoteo. <sup>3</sup> Kowanake Pablo intsipatyaari Timoteo. Iro kantacha retawakari ritomeshaanitziri eero ikisawaitanta Judá-ite nampitawori janta, tema riyotaiyini maawoini Grecia-thato rinatzi ipaapate Timoteo. <sup>4</sup> Ikanta ikenayetanake nampitsipainiki, ikamantayetanakeri kemisantzinkaripaini rimonkaayetairo rosankenatakeri pairani Otyaan-taperori itsipatakari itzinkamipaini janta Jerusalén-ki. <sup>5</sup> Iroowa ikyaaryooyetan-tanakari kemisantzinkaripaini rawentaayetanaka, eeke riyaatanakitzi kiteesheriki isheniperotanake.

### *Romishimpyaakeri Pablo Macedonia-satzi*

<sup>6</sup> Ikanta Pablo roshinampitanakawo Frigia eejatzi Galacia, tema te rishinetziri Tasorenkantsi inkenkithatakaante Asia-ki. <sup>7</sup> Irojatzi rareetantakari Misia-ki. Ari ikenkithashiryaawetakari riyaatero Bitinia-ki, iro kantacha te rishinetziri Itasorenka Jesús. <sup>8</sup> Awisanake janta Misia-ki, oirinkaiyapaakani nampitsiki Troas. <sup>9</sup> Ari janta rimishiwaitake Pablo tsireniriki, rimishitake apaani Macedonia-satzi, ikantziri: “Pareetena nonampiki, pineshironkayetaina naakapaini.” <sup>10</sup> Ikanta rimishiwaitakera Pablo, ari niwetsikaiyanakani niyaataiyeni Macedonia-ki, tema niyotanake iri Pawa kaimashireyetenari janta nonkenkithatakotero Kameethari Ñaantsi.

### *Romonkyagaitanakeri Filipos-ki*

<sup>11</sup> Ari notetaiyanakani Troas-ki, apatziro nowanakero niyaatziro Samotracia-ki. Okanta okiteeshetamanake naatakotapaake nampitsiki Neápolis-ki. <sup>12</sup> Okanta nawisanake irojatzi Filipos-ki, inampiyetawowa poñaayetainchari Roma-ki, otzinkami nampitsi inatzi janta Macedonia-ki. Ari nisaikawaitapaakeri janta. <sup>13</sup> Okanta apaani kiteesheri rimakoryaantapiintari Judá-ite, niyaatake ñaacheraaki, nokantashiretzi ari ramanapiintaiyani. Ari noñaapaake tsinane opiyotaiyani, nisaikaiyapaakeni nonkenkithatakairo Kameethari Ñaantsi. <sup>14</sup> Okanta apaani tsinane piyotainchari oita Lidia, opoñaawo iroori nampitsiki Tiatira. Ipoki iyompariwaita kithaarentsi anashirikimawotatsiri. Tema opinkathatapiintziri Pawa jiroka tsinane, okemaminthatakeri ikenkithatzi Pablo, rominhashiretakaanakawo Awinkatharite. <sup>15</sup> Omitsitsiyaataka, ot-sipatakari ikaatzi saikawankotzirori. Ari okantaiyanakenani: “Piyotanarika nokyaaryoowentairi Awinkatharite, pipokaiyeni pimaye nopankoki.” Ari nimataiyakeroni, tema irootake kantakenari.

<sup>16</sup> Okanta apaani kiteesheri, niyaataiyini namaña, nitonkyotaka apaani mainawo imperataarewo. Riyoshiretakairo peyari oitarika awishimoterine atziri. Iroowa ripinatantaitariri imperatawori osheki. <sup>17</sup> Jiroka mainawo oyaatanakeri Pablo, oyaataiyanakenani eejatzi naakapaini, okantzi okaimi: “Jirika shiramparipaini rimperatanewo rinatzi Pawa Jenokisatzi, iriira kamantemirone pawisakoshiretantaiyaari!” <sup>18</sup> Ari okantapiintatya kiteesheriki, irojatzi owatsimaashiretantakariri Pablo, ripithokashitanakawo, riñaanatanakeri peyari iyoshiretakairori, ikantziri: “Piyaatapi-thatairo mainawo, iri Jesucristo matemirone naakotakerira iwairo.” Apathakero riyaatapithatanairo peyari.

<sup>19</sup> Ikanta iñaakero imperatawori, riyotanake eero raantaawo osheki koriki. Rotaiyakeri Pablo itsipataakeri Silas, raanakeri jewaripainiki, irojatzi janta ipiyowentantapiintaitaga. <sup>20</sup> Ikantapaakeri yakowentantaneri: “Jirikapaini Judá-ite rinatzi. Rochapishiryaakeri atziripaini jaka anampiki, <sup>21</sup> riyotaayetakeri kaari ashineyetzi



rantaitero, tema asheninkapaini rinatzi Roma-satzi.” <sup>22</sup> Ari ripithokashitaitanakari Pablo eejatzi Silas, ikantake yakowentantaneri: “Paatonkoreeri, pipasateri.” <sup>23</sup> Ikanta ripasatakeri, romonkyaaakantakeri. Ikantanake: “Pinkempoyaaperoterira.” <sup>24</sup> Ikemake kempoyaantaneri ikantaitakeri, romonkyaaaperotakeri inthomointa, rawitsinayitzitantakari inchakota.

<sup>25</sup> Okanta niyanki tsireniri, ramanaiyani Pablo itsipatari Silas romampagaiyani eejatzi, kemaiyatsini itsipa omonkyagaarewo. <sup>26</sup> Omapokashitanaka omoyekanaka, eewokapaakero pankotsi romonkyagaitakerira. Ashitaryaashiwaitanaka rashitakotantaitariri, itzintaryaakowaitashitanaka omonkyagaarewo roosotakowe-tantakarira kotsirotha. <sup>27</sup> Ari ikakitanake kempoyiiriri, iñaatziro ashitaryaaka rashitakowetakarira, inowikyaanakero rosataamento rishinetya rosataya, roshiyakaatzi shiyaka maawoini omonkyagaarewo. <sup>28</sup> Ikaimotanakeri Pablo, ikantziri: “¡Eero pishinewaitashita, irojatzzi nisaikaiyini maawoini jaka!” <sup>29</sup> Ikanta jirika kempoyaantaneri ikaimakaantake ootamentotsi, rishiyaperotanakitya ikyaapaake, okawaitanaka ithaawanakera, rotziwerowashitapaakari Pablo eejatzi Silas. <sup>30</sup> Ari romishitowanakeri, rosampitakeri, ikantziri: “Pinkathari, ¿litaka nanteri nawisakotantaiyaari?” <sup>31</sup> Ikantanakeri: “Pinkemisantairi Pinkathari Jesús, aritake pawisakotai eeroka eejatzi ikaatzi saikawankotzimiri.” <sup>32</sup> Ikenkithatakanakeri tsika ikantakota Awinkatharite eejatzi ikaatzi saikawankotakeriri. <sup>33</sup> Niyankira tsireniri jirika kempoyaantaneri ikiwainiri aawyaakerira pasataantsi. Irojatzzi romitsitsiyaatantakariri itsipataakeri isheninkapaini. <sup>34</sup> Raanakeri ipankoki, ipapaakeri rowanawo. Kimoshire ikantanaka jirika ikemisantairi Pawa itsipayetaari ikaatzi saikawankotziriri.

<sup>35</sup> Okanta okiteeshetamanai, jirikaga yakowentantaneri ikantakaantakeri kempoy-aantaneri, ikantake: “Pomishitowairi jirikapaini.” <sup>36</sup> Ikanta kempoyaantaneri, ikan-takeri Pablo: “Inintakaantakena yakowentantaneri nomishitowayetaimi. Kantacha piyaayetai iroñaaka kameetha.” <sup>37</sup> Ikantanake Pablo: “Rosankenatakotane Roma-satzi nini naaka, iro kantacha ripasawaitaitakena janta ipiyowentantapiintaitaga, te ram-inawakero tzimatsirika nokenakaashitanewo. Romonkyaaakantakena. ¿Iroñaakama ikowi rimanakaina romishitowaina? ¡Te nokowi! Pinkanteri ripokanake irirori romishitowaina.” <sup>38</sup> Ikanta jirika kempoyaantaneri, ikamantakeri yakowentanta-neri. Ikemawake rosankenatakotane rinatzi Roma-satzi, antawoite ithaawaiyanakeni. <sup>39</sup> Jatanake yakowentantaneri, ikantapaakeri Pablo eejatzi Silas: “Pimpeyakotainawo nowasanketakaantakemira.” Romishitowakaantairi, ikantawairi: “Piyaatai.” <sup>40</sup> Ari riyaaatayaini opankoki Lidia. Ikenkithatakaayetanaari kemisantzinkaripaini, ithaa-mentashireyetakaanaari, jataiyaini.

## 17

### *Ikoshekantaitaka Tesalónica-ki*

<sup>1</sup> Ikanta rareetantayetaka Pablo eejatzi Silas ikenayetanake Anfípolis-ki, Apolonia-ki irojatzzi rareetantakariri Tesalónica-ki, ari isaikiri janta rapatotapiintaga Judá-ite. <sup>2</sup> Iro rametapiintari Pablo arika rareetya otsipaki nampitsi, ikyaapiintzi rapatotapiintaga Judá-ite, ikenkithatzi. Iroowa rantapaakeri iroñaaka. Irojatzzi rapiitantaawori otsipaki kiteesheri rimakoryaantaitari, rapiitairo eejatzi. Ari riñaanaminthatapiintakeri Judá-ite. <sup>3</sup> Rookoyetziniri Osankenarentsiperi tsika ikenkithatakota Cristo inkamimotante, rañagai eejatzi. Ikantayetziri: “Jirika Jesús nokenkithatakotakemiri, iriitake Cristo.” <sup>4</sup> Ari ikemisantanake apawopaini Judá-ite, itsipatanakari Pablo eejatzi Silas. Ikemisan-taiyanakeni osheki Grecia-thato pinkathatasorentsitaneri, ari okantanakari eejatzi tsinanepaini irooperori. <sup>5</sup> Iri kantacha Judá-ite kaari kemisantatsine, te inimoshire-tanakeri. Ipiyotakeri kaariperoshireri. Rotyaantakeri inkoshekantya nampitsiki.

ikoshekawankotakari eejatzi Jasón, rithotyaakotziri Pablo eejatzi Silas. <sup>6</sup> Te iñaashitari, raanakeri Jasón itsipataanakeri itsipa kemisantzinkaripaini, raanakeri risaikira jew-atakaantzirori nampitsi, ikantaiyapaakeni: “¡Tzimatsi shiramparipaini ochapishiryaa-taintsiri nampitsiki, pokake iroñaaka jaka. <sup>7</sup> Jirika Jasón oisaikawakeriri ipankoki! Rithainkayetakero jirika ikantakaanewo pinkatharitatsiri Roma-ki, ikantaiyakeni: ‘Eenitatsi itsipa pinkathari, iita Jesús.’ ” <sup>8</sup> Ikanta ikemaitawakero, te inimotanakeri atziripaini eejatzi jewaripaini. <sup>9</sup> Ikwakoitakeri Jasón ripinawentya itsipayetakarira itsipapaini, ompoñaantyaari ripakagaitairi.

### *Jatake Pablo Berea-ki itsipatakari Silas*

<sup>10</sup> Ikanta kemisantzinkaripaini, rotyaantairi tsireniriki Pablo eejatzi Silas, riyatai Berea-ki. Ikanta rareetaiyakani janta, jataiyakeni rapatotapiintaiyanira Judá-ite. <sup>11</sup> Jirikapaini Judá-ite, neshironkatantaneri rinaiyini te roshiyari Tesalónica-satzi, kameetha ikemisantawakero ñaantsi. Ikamaitanakawo kiteesheriki riñaanatanairo Os-ankenarentsipero iñaantyaawori kyaaryooperorika ikamantaitziriri. <sup>12</sup> Osheki Judá-ite kemisanantaintsiri, ari ikantakari Grecia-thato iriiperotatsiri, eejatzi tsinanepaini. <sup>13</sup> Iri kantacha Judá-ite nampitawori Tesalónica-ki, ikemakotakeri ikenkithatakantatzi Pablo janta Berea-ki, pokaiyanakeni, ikoshekawaitapaakari atziripaini. <sup>14</sup> Iri kantacha kemisantzinkaripaini raanakeri Pablo inkaarecheraaki. Iriima Silas itsipatakari Timoteo ari risaikanake irirori. <sup>15</sup> Ari rawisakaitanakeri Pablo irojatziri rareetantakariki Atenas-ki. Ikanta ripiyaiyaani Berea-ki, ikantapairi Silas itsipatakari Timoteo: “Ikaimakaanaimi Pablo, piyaate intsipaite.”

### *Risaiki Pablo Atenas-ki*

<sup>16</sup> Ikanta Pablo royaawentziri Silas itsipatakari Timoteo janta Atenas-ki, te inimo-teri irirori iñaayetzirira Atenas-satzi ipinkathayetziro oshiyakaawontsi. \* <sup>17</sup> Iroowa ikenkithatakantakariri Judá-ite, eejatzi itsipapaini pinkathatasorentsitaneri janta rapatotapiintaitaga. Osheki ikenkithatapiintake eejatzi kiteesheriki ipiyotapiintaiyanira atziripaini nampitsiki. <sup>18</sup> Riñaanaminthatakeri eejatzi yotaneriite nampitsiki. Eenitatsi kantayetatsiri: “¿Iitamatsitaka ikenkithatakotziri kenkithawaitashitachari?” Ikantaiyini itsipa: “Ikenkithatakotatziiri itsipasatzi Pawa.” Iro ikantantari jirikapaini tema Pablo ikamantantatziro Kameethari Ñaantsi jimpe ikantakota Jesús, rañaantaari. † <sup>19</sup> Ikanta romiñaanakeri otzishiki jitachari “Areópago”, ari ipiyotapiintaiyani. Rosampitakeri: “Janjaatya pinkenkithatakotenawo owakeratatsiri piyotaantziri nonampiki. <sup>20</sup> Tema pikenkithatakaakenawo kaari nokemapiintaiyini. Nokowaiyini niyote oita kantakotachari.” <sup>21</sup> (Tema okaatzi itzimawentziri Atenas-satzipaini itsipatakari areetzinkaripaini, ikemisantayetziro owakerayetatsiri ñaantsi, rowaayimaitawo.)

<sup>22</sup> Ikatziyanaka Pablo ipiyowentaitakarira, ikantanake: “Atenas-satzipaini, noñaakemi tzimatsi osheki piwawaneyetari, pipinkathatapiintziri. <sup>23</sup> Nokenayetake pinampiki, noñaayetakero pitaapokimento. Eenitatsi apaani osankenataka, okantzi: ‘PAWA KAARI RIYOYEETZI.’ Irijatzira nokenkithatakotzimiri naaka. <sup>24</sup> Iri wetsikakerori kipatsi eejatzi maawoini tzimantayetawori, irijatziri Pinkathariwentzirori inkite eejatzi kipatsi. Te risaikantawo tasorentsipanko riwetsikanewo atziripaini. <sup>25</sup> Te ikoityiuro irirori riwetsikaiteniri tsikarika oitya. Tema iriitake añaakaayetairi maawoini aakapaini, irijatziri owiñeenkatakaayetairi, ipayetairo maawoini tsikarika oiyeta. <sup>26</sup> Iriitake wetsikakerori etakawori atziri, ishenitakagairi, roiwawagairi inampitantaawori

\* **17:16** Jiroka nampitsi Atenas otzinkami inatzi nampitsi, ari inampitawori osheki yotzinkaripaini Grecia-thato.

† **17:18** Iitaitziri jaka “yotaneriite” iriyyetake kemisantayetzirori okaatzi riyotaantayetziri jitachari “Epicuro”, ikantzi: “Iro kowaperotacha ankimoshirewaite.” Eenitatsi itsipa iitaitziri jaka “yotaneriite” iita “Stoa-satzipaini”. Ikemisantaiyironi iriroripaini okaatzi riyotaantakeri pairani jitachari “Zenón”, ikantake: “Ontzimatyee añaakoperoty.” Iroowa iyyetantari “Stoa-satzipaini”, ipiyotapiintaiyani iitaitziro riñaaneke iriroripaini “Stoa”, owaankiityagaantsi inatzi, porthopooki ikantayetziro.

maawoini kipatsi. Ikenkithashiretzitaka tsikarika onkaate osamanite inampiyetyaawo tsikarikapaini. <sup>27</sup> Iro rantantayetakawori jiroka, rithotyaakoitantaiyaariri. Oshiyawaitakawo impampipookiwaitatyeeme rithotyaakoitziri. Ari iñaayeetairi. Tema te intaina risaiki Pawa, ari itsipayetai maawoini aakapaini. <sup>28</sup> Iriira añaakaayetai iroñaaka, ranashitakaayetai, iri tzimakaayetai. Irojatziki kantayetzitari pisheninkapaini, kenkithayantzi, ikantake: ‘Rashiyetai Pawa.’ <sup>29</sup> Tema rashitaira Pawa, ontzimatye ayote te okameethatzi oshiyakayeri oshiyakaawontsi riwetsikanewo atziripaini, riwetsikayetziri ooro, koriki, mapi. <sup>30</sup> Tema pairani osheki ikisashitakawo Pawa okaatzi rantashiwaitakari imasontzinkakiini atziripaini. Iro kantacha iroñaaka ikantayetai maawoini tsikarikapaini inampiyeetawo, ikantzi: ‘Pipakagairo kaariperori pametashiyetari.’ <sup>31</sup> Tema Pawa riyoyaake apaani atziri, iriitake rotyaantairi raminakoyetairo okaatzi antayetakeri. Tema riyotairo Pawa tsikapaiteka rantero. Tema roñaagantairi atziri rowiriintairi ikamawetakaga.”

<sup>32</sup> Ikanta ikemawakera ikenkithatakotakeri ipiriintaaga kaminkari, ishirontaiyanakarini. Tzimatsi itsipa kantanaintsiri: “Apiitero paata nonkememi pinkenkithatakotero jiroka.” <sup>33</sup> Riyaatapithatanairi Pablo. <sup>34</sup> Iri kantacha eenitatsi oyaatanakeriri, kemisantayetai irirori. Jirika ikaatzi kemisantanaatsiri: Dionisio, iri tsipatapiintawetariri ipiyotapiintaga Areópago-ki. Opoñaapaaka tsinane jitachari Dámaris, tzimatsi otsipapaini.

## 18

### *Areetaka Pablo Corinto-ki*

<sup>1</sup> Okanta okaatapaake jiroka, rishitowanake Pablo janta Atenas-ki, jatake Corinto-ki. <sup>2</sup> Ari iñaake apaani Judá-ite jitachari Aquila, Ponto-satzi rinatzi jirika. Owakera rareetaka Aquila itsipatakawo iina jitachari Priscila ipoñaakawo Italia-ki, tema pinkathari Claudio ikantakaantake janta Roma-ki rishitowayete maawoini Judá-ite. Jatake Pablo rareetari Aquila. <sup>3</sup> Ari risaikapaake Pablo itsipatapaakari. Tema iro rantawaire jirika, rishirikayetziro tontamawotatsiri, ipankoitawo. Irojatziki rantawaire pairani Pablo irirori. <sup>4</sup> Ari ikantapiintatya Pablo riyaatzi rapatotapiintaitaga kiteesheriki rimakoryaantaitari, ikenkithatakaantayetake ompoñaantyaari roitsinampaantyaariri Judá-ite inkemisantakaayetairi, eejatzi Grecia-thatotatsiri.

<sup>5</sup> Ikanta Silas eejatzi Timoteo areetaiyapaakani ipoñagaawo Macedonia-ki. Ari ikamaitanakawo Pablo ikenkithatakaantanaake. Ikantayetakeri Judá-ite: “Jirika Jesús, Cristo rinatzi.” <sup>6</sup> Iri kantacha te inimoteri Judá-ite, kisaneentanaka, ikaweyawaitanakeri. Ari rotekanairo iithaare Pablo riyotantaityaari te ikemisantaiyini, ikantanakeri: “Eerokaga kantakaanterone pimpeyawaitantaiyaari, te naaka kantakaanterone. Iri nipithokashite iroñaaka kaari asheninkata.” <sup>7</sup> Shitowanake rapatotapiintaitaga. Jatake ipankoki apaani atziri jitachari Justo, pinkathatasorentsitaneri rinatzi. Risaikanampitziro irirori rapatotapiintaiyanira Judá-ite. <sup>8</sup> Ikanta Crispo, jewatatsiri rapatotapiintaga Judá-ite, ikemisantanakeri Awinkatharite, rimatanakero eejatzi ikaatzi saikapankotziriri. Iro rantanakeri eejatzi osheki Corinto-satzi, ikemayetakero ñaantsi, kemisantayetanake, romitsitsiyaataitakeri. <sup>9</sup> Ikanta Pablo, romishimpyaakeri Awinkatharite tsireniriki, ikantakeri: “Eero pithaawi. Piyaatakaairo pinkamantantero ñaantsi jaka, eero pimairetzi. <sup>10</sup> Tema ari notsipatzimi naaka, eero rowatsinaawaitaitzimi jaka, tema tzimatsi osheki nashiyetaari naaka jaka nampitsiki.” <sup>11</sup> Iro risaikantanakeri Pablo Corinto-ki, anaaneentakero apaani osarentsi risaikawaitake. Riyotaantayetziro riñaane Pawa. \*

\* **18:11** Kantakotachari jaka “anaaneentakero apaani osarentsi”, irojatziki ikantaitziri apaani osarentsi eejatzi 6 kashiri.

<sup>12</sup> Ikanta reewaritantari Galión janta Acaya-ki, retanakawo Judá-ite itzimawentanakeri Pablo. Irojatzí raantanakariri jewariki. <sup>13</sup> Ikantapaakeri: “Jirika atziri ikenakaashitakawo riyotaayetziri atziripaini impinkathatairi Pawa, ripiyathatakawo inintakaantaitziri.” <sup>14</sup> Iro riñaawaitanakeme Pablo, akanake Galión ikantanakeri Judá-ite: “Iroorika pikenkithatakotzi ritsitokante jirika atziri, aritake nonkemisantakemi pikantanari. <sup>15</sup> Iro kantacha, aamaaka pikantakotawakaashitawo okaatzi piñaawaitashitari eeroka, paakowaitashitari, piitashiwaitari: ‘Inintakaantaitanewo.’ Piyotaiyeroni eerokapaini tsika pinkanero, te nimerawentawaitziro naaka.” <sup>16</sup> Romishitowawetaari jirikapaini. <sup>17</sup> Ikanta Grecia-thato, rotaiyanakeri jitachari Sóstenes, iri jewatzitachari rapatotapiintaga Judá-ite. Ripasawaitanakeri. Iri kantzimaitacha Galión, te rimatzimaitawo irirori.

<sup>18</sup> Osheki kiteesheri risaikawaitanai Pablo janta Corinto-ki. Irojatzí riyaatantaari itsipatanaawo Priscila eejatzí Aquila, riyatairo Siria-ki. Okanta janta Cencrea-ki, tekera rotetanaiyaata, rameetanakero iishi, rimonkaatantyaawori ikashaakaanakeri. <sup>19</sup> Ikanta rareetaka Efeso-ki, jatake Pablo rapatotapiintaitaga, ari ikenkithatakaayeta-paakeri Judá-ite. Ari rookanairi Aquila eejatzí Priscila. <sup>20</sup> Ikowakowetawaari Judá-ite osamani risaikanake, iri kantacha Pablo te ikowi. <sup>21</sup> Ikantanairi riyaatzimatanaira: “Ontzimatyé nareetaiya Jerusalén-ki roimoshirenkaitaga. Iriirika Pawa kowatsine, aritake nipiye noñaayetaatemi.” Irojatzí rotetantanaari Pablo, jatai.

### *Piyaawo Pablo Antioquía-ki, ikenkithatanai eejatzí*

<sup>22</sup> Ikanta rareeta Cesarea-ki, awisapai Jerusalén-ki riwethatapaiyaari kemisantzinkaripaini. Irojatzí rawisantanaari Antioquía-ki. <sup>23</sup> Okanta osamanitake, rapiitairo rareetantayeta apawopainiki nampitsi janta Galacia-ki eejatzí Frigia-ki, raawyaashiretakaayetairi riyotaanewo.

### *Ikenkithatzi Apolos Efeso-ki*

<sup>24</sup> Okanta janta Efeso-ki, areetaka apaani Judá-ite jitachari Apolos, Alejandríasatzi rinatzi. Kameetha ikenkithatzi, riyotakotziro kameethaini Osankenarentsipero. <sup>25</sup> Eenitatsi kenkithatakotakeniriri Juan-ni omitsitsiyaatanteneri, ikenkithatakoitakeniri eejatzí ikamantantakeri Juan-ni ikantakota Jesús. Ari iweyaa riyotakotziro irirori. Iro kantacha, kameetha ikanta rooñaawontawetawowa ikenkithatakotziri Jesús. <sup>26</sup> Ari ikenkithatakaantapaake Apolos rapatotapiintaitaga. Ikanta okemakeri Priscila eejatzí Aquila, raanakeri Apolos, riyotaakeri tsika ikantakoperota Jesús. <sup>27</sup> Ikowake Apolos rawishe Acaya-ki. Ari ipawakeri kemisantzinkaripaini Efeso-satzi apaani osankenarentsi raakameethatantawakyaariri Acaya-satzi. Ikanta rareetaka Acaya-ki, osheki ithaamentakaapaakari kemisantzinkaripaini ikaatzi ineshironkayetairi Pawa. <sup>28</sup> Rimatziro Apolos roitsinampaayetakeri Judá-ite, roñaagayetziri Osankenarentsipero ikenkithatakotziri Cristo, iro opoñaantari riyotakoitantanakariri Jesús, iriitake Cristo.

## 19

### *Areetaawo Pablo Efeso-ki*

<sup>1</sup> Ikanta Apolos risaiki Corinto-ki, anonkanake Pablo ochempiki, areetaka Efeso-ki. Iñaapaake kemisantawetaachari. <sup>2</sup> Rosampitapaakeri: “¿Risaikashiretantakemi Tasorenkantsi owakera ikemisantakagaitakemi?” Ari ikantaiyanakeni jirikapaini: “Te. ¿Oitaka kantakotachari jiroka? ¿Iitaka ikantaitziri Tasorenkantsi?” <sup>3</sup> Rakanake Pablo, ikantzi: “¿Iitaka pomitsitsiyaawentakari pikemisantawetaga?” Ikantaiyini jirikapaini: “Iro nomitsitsiyaawentari riyotaantakeri Juan-ni.” <sup>4</sup> Ikanta Pablo riyotaanakeri,



ikantziri: “Romitsitsiyaatantzi Juan-ni, roshiyakaawentatziiro ripakagaitairo kaariperori. Iro ikantzitakari Juan-ni: ‘Pinkemisantairi awotsikitaantsiri, iri poyaatapaaakenane.’ Iriitake Jesucristo ikenkithatakotakeri jaka.” <sup>5</sup> Ikanta ikemaiyawakeni jirikapaini, romitsitsiyaawentanakari Awinkatharite Jesús, raakotainiri iwairo jirikapaini. <sup>6</sup> Ikanta Pablo rotzimikapatziitoyetantakarirako, ari risaikashiretantanakari eejatzi iriroripaini Tasorenkantsi. Riñaawaiyetanakero otsipasato ñaantsi. Ikamantantanakero ñaantsi riyotakaayetanaairiri Pawa. <sup>7</sup> Ikaataiyini 12.

<sup>8</sup> Irojatzi rawisantakarir Pablo rapatotapiintaiyanira Judá-ite, ari ikenkithatakaantapaake ikaatzi mawa kashiri. Tekaatsi inthaawakaiya, ikowi riyotakaayetairi atziripaini jimpe ikanta Pawa ipinkathariwentantai. <sup>9</sup> Iro kantacha tzimatsi apawopaini kisoshirewaitatsiri, te ikowi inkemisantaiyeni, ikishimawaitakeri tsipatanairiri iitaitziri “Awotsiweri”. Ikanta Pablo, rintainaryaanakeri jirikapaini. Romiñaanakeri riyotaanewopaini iyaapapankoteki iitaitziro “Tiranno”. Ari riyotaapiintakeri maawoiniki kiteesheri. <sup>10</sup> Ari ikantapiintanakitziro, tzimakotake apite osarentsi. Ikemakoyetairo riñaane Pawa nampiyetawori Asia-ki, Judá-ite, Grecia-thato, maawoini.

<sup>11</sup> Osheki ritasonkawentantayetake Pablo, ikantakaakari Pawa. <sup>12</sup> Etsiyatakotakaantzita imanthaki. Arika ragaitero tsikarikapaini, riterotantaityaari mantsiyari, aritake retsiyatakotai. Imatziri eejatzi etsiyatakotakagairi raaganewo peyari. <sup>13</sup> Eenitatsi apanipaini Judá-ite kenawaitatsiri janta retsiyatakotakayitari eejatzi irirori raaganewo peyari. Ikowake iroñaaka raakotairi iwairo Jesús, retsiyatakotakaantyaairiri. Ikantawetapaakari peyari, ikantziri: “¡Pintainaryaapithateri, naakotziro iwairo Jesús, ikenkithatakotziri Pablo!” <sup>14</sup> Iroowa rantawetakari <sup>7</sup> itomipaini Judá-ite jitachari Esceva, jewawetariri imperatasorentsitaneri janta. <sup>15</sup> Iro kantacha rakanake peyari, ikantziri: “Noñiiri Jesús, niyotziri Pablo. Eeroka, te niyotzimi.” <sup>16</sup> Ikanta raayiri peyari rotaiyanakeri jirikapaini, antawoite iñaashintsitanakari roitsinampaakeri maawoini, romishiyairi ipankoki raatonkoryaamerekitakeri, antawo rowatsinawaitakeri iwathaki. <sup>17</sup> Ikemaiyakeni nampitawori Efeso-ki, ikemake Judá-ite eejatzi Grecia-thato, maawoini. Osheki ithaawaiyanakeni. Iro opoñaantari ipinkathaitantanakariri Awinkatharite Jesús. <sup>18</sup> Ari ripokapaake osheki kemisantanaatsine, ithawetakoyetapaakero iyaariperonka. <sup>19</sup> Ikanta sheripiyariwetachari, ramayetapaakero tsika riñaanatakotapiintziro isheripiyarinka, ritaapaakero. Ikanta raminakoitakeri tsika okaatzi ipinata ritagaitakeri, areetaka ikaatzi: 50,000 ikithoki koriki. <sup>20</sup> Eeke ikemakoperoitankitziiri Awinkatharite.

<sup>21</sup> Okanta ithonkapaaka jiroka, rominthatanakawo Pablo rareetantya Macedonia-ki eejatzi Acaya-ki. Irojatzi rawisantakyaari janta Jerusalén-ki. Ikantzitaka eejatzi: “Arika niyaatake Jerusalén-ki irojatzi nawisantakyaari Roma-ki.” <sup>22</sup> Rotyaantake Macedonia-ki apite amitakotapiintakeriri, Timoteo eejatzi Erasto, eenitatsi risaikanake irirori Asia-ki.

### *Ikoshekantaita Efeso-ki*

<sup>23</sup> Okanta janta Efeso-ki antawoite riñaanatawakaawentaitakariri iitaitziri “Awotsiweri”. <sup>24</sup> Iri poñaakaantakawori jitachari Demetrio, kotsiropakoimpeki. Eenitatsi oshiyakariri irirori riwetsikayetziro oryaani oshiyakaawontsi iyaapapankote iwawanetashitaitari iitaitziro “Diana”. Iriira raantayetari osheki koriki. <sup>25</sup> Ipiyotaiyakani maawoini kotsiropakoimpeki. Ikantake Demetrio: “¡Shiramparipaini! Iroowa añaantaiyarini aakapaini jiroka antawaire. <sup>26</sup> Pikemakotaiyakerini iitaitziri Pablo, roitsinampaakeri osheki atziri, ikantayetziro: ‘Riwetsikanewo atziripaini te roshiyari Pawa.’ Te apatziro ikantakeri anampiki Efeso-ki, rimatzitakawo maawoini jaka Asia-ki. <sup>27</sup> Te apatziro onkantzimoshiretai eerowa ramanantayeetairi awetsikanewo, iroowa kantzimoshireperotairi ompeya inkemakoitero maawoini awawane Diana jaka Asia-ki, ari ripakagaitanakero ripokaitzi oyaapapankoteki.”



<sup>28</sup> Ikanta ikemaiyawakeni, antawo ikisaiyanakani, ikaimaiyanakeni: “¡Irooperori inatzi Diana, awawanetari jaka Efeso-ki!” <sup>29</sup> Eeke rakisheenkatanakitzi jirikapaini. Irojatzzi rotaiyaitantanakariri Gayo eejatzzi Aristarco, raanakeri ipiyotaiyapiintanira atziripaini. Jirika ragaitanakeri iriitake itsipatapiintari Pablo rareetantayeta, Macedonia-satzi rinaiyini. <sup>30</sup> Ikowawetaka Pablo inkyaapaakeme irirori, temaita rishineteri riyotaanewo. <sup>31</sup> Ari ikantakariri eejatzzi ikaatzzi jewaripaini raapatziyanewo Pablo, ikantakaantakeri: “Eerowa pimatziyawo eeroka janta.” <sup>32</sup> Ikanta janta ipiyotaiyakanira, eeke richeraacheraataiyatziini, te oshiyawakaa okaatzzi richeragaiyirini. Tema jirika atziripaini te riyoperotaiyini oita ipiyowentaiyarini, ikaimaminthawaitashitaiyani. <sup>33</sup> Iri kantacha apawopaini Judá-ite, iñaakeri Alejandro rosatekaka ipiyotaiyakanira, ishintsineentanakeri riñaawaite. Ikanta Alejandro rowaatzinkawakotanaka imairetantyaarime, kenkithawetanaawo. <sup>34</sup> Iro kantacha riyotake atziripaini Judá-ite rinatzzi jirika Alejandro, eekero rapiitanakitziiro ikaimaiyini, osamani ikantaka ikaimi, ikantaiyini: “¡Irooperori inatzi Diana, awawanetari jaka Efeso-ki!” \* <sup>35</sup> Irojatzzi ikatziyantanakari osankenawairentzi, romairyaakeri, ikantakeri: “Efeso-satzi, riyotaitzi aakapaini kempoyaawentziirori oyaapapanokote awawane Diana, eejatzzi oshiyakaawo poñainchari inkiteki. <sup>36</sup> Ontzimatyepinkenkishiryawakya kameetha, eero pikoshekantashiwaita. <sup>37</sup> Tema jirika pamayetakeri, te rowaariperotziro yaapanoko, te ikishimaminthatziro awawane. <sup>38</sup> Ikwirika riyakowentante Demetrio itsipayetakari ikaataiyinira, raanakeri ajewariteki raminakoteri, iri wetsikerone okaatzzi kantzimoshiretariri. <sup>39</sup> Okowarika ayotakotero maawoini aakapaini, kantacha apatoteri maawoini jewari, raminakotantyaawori. <sup>40</sup> Okaatzzi awisaintsiri iroñaaka, aritake rowasankewentaitakairo akoshekantaga. Eero otzimi oita ankanteri apiyakowentantyaari.” <sup>41</sup> Ikanta rithonkakeri ikenkithawaitakeri jiroka, rotyaantairi atziripaini.

## 20

### *Riyaatzzi Pablo Macedonia-ki eejatzzi Grecia-ki*

<sup>1</sup> Ikanta reshitanakeri rakisheenkataiyini, ipiyotakeri Pablo riyotaanewo ikaminaayetanairi. Ari riwethatanaari, jatake Macedonia-ki. <sup>2</sup> Ikanta ikenayetanairo nampitsiki risaikayetzira iyekiite, ikaminaayetanairi. Irojatzzi rareetantakariri Grecia-ki. <sup>3</sup> Ari risaikawaitapaake ikaatzzi mawa kashiri. Iro rotetanaiyaame riyaatantyaari Siria-ki, ari ikemake rowamaatyeeeri Judá-ite rareetakyaaarika janta. Iroowa ripiyan-tanaari Macedonia-ki. <sup>4</sup> Ari itsipatanaari Sópater, Berea-satzi rinatzzi irirori, itomi Pirro. Ipoñaapaaka Aristarco, eejatzzi Segundo, Tesalónica-satzi rinatzzi. Eejatzzi Gayo, Derbe-satzi rinatzzi. Eejatzzi Timoteo, Tíquico, Trófimo, Asia-satzi rinayetatzzi jirika. <sup>5</sup> Ari reewataiyananeni jirikapaini iyeki, royaawentapaakena Troas-ki notsipatakari Pablo. <sup>6</sup> Okanta awisanake kiteesheri rowapiintantaitawori tashirentsiponka, ari notetanaari Filipos-ki. Awisake 5 kiteesheri, noñaayetaipairi janta Troas-ki, ari nisaikaiyapaakeni okaatzzi 7 kiteesheri.

### *Rareetantaka Pablo Troas-ki*

<sup>7</sup> Okanta imonkaatapaa kiteesheri rapatotantapiintaitari, ari nopiyotaiyakani nontzipetowero pan, ikenkithatakaantake Pablo. Tema nawisatyepitekesheta-manairika, eekero riyataakanakitziiro ikenkithatzi niyankiityaakotakena. \*†  
<sup>8</sup> Ari nopiyotaiyakani jenoki pankotsiki, osheki ootamentotsi roonthotaitake.

\* **19:34** Kantakotachari jaka “osamani ikantaka ikaimi”, apite hora osamanitake. \* **20:7** Kantakotachari jaka “rapatotantapiintaitari”, irojatzzi ikantaizitari “etapiintawori kiteesheri otsipaki tominko”. † **20:7** Kantakotachari jaka “intzipetowaitero pan”, iro rantayetanairi kemisantzinkaripaini arika inkenkishiryaaoteri Jesucristo ikamimotantakera. Ari ikantziro rakiyootawakagaiyanira, itzipetowiro pan, rowaiyani, riraiyini eejatzzi imere. Tema roshiyakotatyaari Jesús jimpe ikantanairo riweyaantanaawo rowakaanaari riyotaanewopaini. Iroowa ikenkithatakotapiintaitakeri, ikantaitzi “intzipetowaitero pan.”

<sup>9</sup> Ikanta apaani mainari jitachari Eutico risaikake omooki pankotsi. Tema osamanitake ikenkithatake Pablo, ayimatakeri iwochokine mainari, paryaake isaawiki, kamapaake. † <sup>10</sup> Ayiitanake Pablo, roiyotashitapaakari mainari, ithomaapaakeri. Ikantanake: “Eero pithaawaiyini, añagai.” <sup>11</sup> Eejatzi ripiyanaawo Pablo jenoki, itzipetowapaakero pan, owaiyakani. Eekero ikenkithatanakitzi, irojatzki okiteeshetantanakari. Ari nawisaiyanakeni. <sup>12</sup> Iriima mainari, ragaitanairi rañagaira. Iroowa thaamentashiretakaaperotanakariri.

*Rawisanake Troas-ki irojatzki Mileto-ki*

<sup>13</sup> Ari neewatanake naakapaini, notetaiyanakani irojatzki Asón-ki, ari nokenkithashiryaka naanairi Pablo, tema ikowatzki irirori inkenanake awotsiki. <sup>14</sup> Ikanta noñaapairi Pablo janta Asón-ki, ari rotetanaawo, jataiyakenani Mitilene-ki. <sup>15</sup> Irojatzki nawisantanakari janta, nokiteeshetakotapaake Quío-ki, okanta namaatakotanai apaani kiteesheri areetakena Samos-ki, naatakotapaintzi Trogilio-ki. Irojatzki nawisantanakari otsipaki kiteesheri, areetaiyakenani Mileto-ki. <sup>16</sup> Irojatzki nawisantanakawori Efeso te naatapaintzi, tema te ikowi Pablo raatapainte janta, eero rosamanitanta Asia-ki. Ikwatzki rareetaiya intsipaite Jerusalén-ki, roimoshirenkapairo kiteesheri “Owiitaantsi”. §

*Inkenkithatakairi Pablo rantarite Efeso-satzki*

<sup>17</sup> Ikanta naretaka Mileto-ki, ikaimakaantapaakeri Pablo itzinkamipaini kemisantzinkari Efeso-satzki. <sup>18</sup> Ikanta ripokaiyakeni, ikantawakeri: “Piyotzi eerokapaini jimpe nokanta nisaikimotaiyakemini owakera naretantakari Asia-ki. <sup>19</sup> Ari nokantapiintatya nantawaitziniri Awinkatharite, tsinampashire nokanta, osheki niraawaitaka noñaakerowa inkoshekename Judá-ite. <sup>20</sup> Iro kantacha te nipakaanakero nokenkithatakaayetzimiro onkaate pinintagaiyaari, niyotaapiintakemi pipankopainiki, eejatzki ipiyotapiintaga atziripaini. <sup>21</sup> Nokenkithatakaayetziri nosheninkapaini Judá-ite eejatzki Grecia-thato, nokantayetziri: ‘Pipiyashitairi Pawa, pawentagaiyaari Awinkatharite Jesucristo.’ <sup>22</sup> Iroñaaka niyaatatye Jerusalén-ki, Tasorenkantsira thaamentashiretakaanari, te niyotzimaitya oitarika awishimotenane janta. <sup>23</sup> Iro kantacha tsikarika niyaayetzi, riyoshiretakaana Tasorenkantsi, ikantana: ‘Osheki pinkemaatsiwaityaawo romonkyagaitemi.’ <sup>24</sup> Iro kantzimaitacha naaka, tekaatsi oitzimotena onkaate nonkemaatsiwaityaari, te netakoneta. Iro kowaperotacha nonkimoshirewentero noshiyakaanakero irootaintsime nanaakotante nareetya jimpe iweyaa nishiye. Tema irootaintsi nithotyero ikantakenari Awinkatharite Jesús nonkamantantairo Kameethari Ñaantsi okantakota ineshironkayetaira Pawa. <sup>25</sup> Nokenkithatakaayetakemi eejatzki eerokapaini tsika okantakota ipinkathariwentantai Pawa. Eero papiitairo piñaayetaina. <sup>26</sup> Irootake nokowantari nonkantemi, te naaka kantakaashityaawone intzimantaiyaari peyashitaachane, <sup>27</sup> tema nokenkithatakotakemiro maawoini ikenkithashiriitakari Pawa ranteri, tekaatsi apaani nimanimotemi. <sup>28</sup> Pinkempoyaayetaiya, ari pinkantakaayetaiyaari apatotapiintachari tsika rowayetakeri Tasorenkantsi. Poshiyaiyaari kempoyaantaneri pinkempoyaayetairi kemisantnairiri Awinkatharite, tema iriitake ikapathainkawentake ripinawentairi. <sup>29</sup> Niyotzi naaka arika niyaatai, ripokapaake itsipapaini, roshiyapaakyaari koweenkari owantaneri, inkowapaake rithonkeri kemisantzinkaripaini. <sup>30</sup> Ari intzimanake pikaataiyinira eerokapaini amatawitanakerine kemisantzinkaripaini, ripakaakaanakeri ikemisantzi, inkantakaakyaari riyotaanewo rashi irirori. <sup>31</sup> Pinkenkithashireero eerokapaini, mawa

‡ **20:9** Kantakotachari jaka “paryaake isaawiki”, iroowa ikantakoitziri pankotsi riwetsikaitziri, opewiryaa okaatzki mawa. Ari ipoñaanaaka iparyaake mainari irojatzki isaawikinta. § **20:16** Kantakotachari jaka “Owiitaantsi”, irojatzki ikantaitzitari “Pentecostés”.

osarentsi nisaikimowaitapaintzimi, te nipakaapainteru nokaminaayetzimi maawoini, niraakowaitakemi. <sup>32</sup> Nawentaari naaka Pawa iyekiite, iriira aminawentemine, iriitake neshironkatemine, tema irootake ikantayetakairi. Ari inthaamentakaayetaimi, aritake iñaakaayetaimiro okaatzi ikowakaakeriri maawoini oiteshiretaarewo. <sup>33</sup> Te niyotziro naaka noñaamatakotantyaari, koriki, ooro, eejatzi ikithaataitari. <sup>34</sup> Piyotaiyini eerokapaini, naakatake antawaitaintsiri nakoki naantari koityiimoyetanari, ari nonkantzitakari eejatzi naayiniri koityiimoyetariri ikaatzi tsipayetakenari. <sup>35</sup> Ari nokenakairo niyotaantakemirori jimpe ankantero antawaiperotai, aneshironkayetairi koityaawaitatsiri. Iroowa pinkenkithashiretantaiyaawori ikenkithatakotapaintziri Awinkatharite Jesús, ikantake: ‘Osheki ikimoshirewentaitziri neshironkatantaneri, anaanakero okaatzi ikimoshirewetanakaga ipaitakeri.’ ”

<sup>36</sup> Ikanta ikaatanakero Pablo ikantakero jiroka, rotziwerowanaka ramanakaanaari maawoini, piyotainchari. <sup>37</sup> Maawoini riragaiyanakani, rawithakitaiyakerinira Pablo, riwethatawaari riyaataira. <sup>38</sup> Owashire ikantaiyanakani, tema ikantakerira eero iñagairi. Ari royaataiyanakerini irojatzzi rotetantanaari Pablo.

## 21

### *Riyaatantaari Pablo Jerusalén-ki*

<sup>1</sup> Ikanta nookanairi iyekiite, otetaiyanaanani, tampatzika nowanakero niyaatake Cos-ki, okanta okiteeshetamanai areetakena Roda-ki, nawisanake irojatzzi Pátara-ki.

<sup>2</sup> Ari noñaapaakero antawo pitotsi jatatsine Fenicia-ki, ari notetaiyanakani. <sup>3</sup> Okanta namaatakotzi, naminakotanakero othampishi Chipre nampateki, nokenakotanake nakoperoki irojatzzi Siria-ki. Eenitatsi owaagawontsi rookaitanakeri Tiro-ki, ari naatakotaiyapaakeni. <sup>4</sup> Noñaapaatziiri kemisantzinkaripaini, ari nisaikimowaitanakeri okaatzi 7 kiteesheri. Ikantawakeri Pablo: “Eero piyaatzi Jerusalén-ki.” Iro ikantan-tari, riyoshiretakaatziiri Tasorenkantsi. <sup>5</sup> Okanta imonkaataka 7 kiteesheri, naw-isantanaiyaari, ari royaataiyakenani iyekipaini, itsipayetakawo iina, eejatzi reentsite. Irojatzzi othapiki nampitsi, ari notziwerokaiyapaakani impanekiiteki, namanaiyani. <sup>6</sup> Ari niwethatawakaanaa, otetanaana naakapaini, piyaiyanaani irirori ipankokipaini.

<sup>7</sup> Irojatzzi namaatakotantanaari areetakena Tolemaida-ki, ari niwethatapaari iyekipaini, apaani kiteesheri nisaikimowaitanakeri irirori. <sup>8</sup> Okanta okiteeshetamanai awisakotanakena, areetakena Cesarea-ki. Irojatzzi nokenantanakari ipankoki Felipe kenkithatakaantaneri, ari nisaikapaake. Jirika Felipe iriitake apaani kaatatsi pairani 7 rowaitakeri ramitakoyeteri Otyaantaperori. <sup>9</sup> Eenitatsi Felipe rishinto mainawo okaatzi 4, kamantantanewo inaiyini. <sup>10</sup> Shekitake kiteesheri nisaikapaake janta, ari rareetakari kamantantaneri ipoñaakawo Judea-ki, iita Agabo. <sup>11</sup> Ikanta iñaayetapaakena raapaakero romathakiro Pablo, roosotapaakawo rakoki eejatzi iitziki ikenkithawaitanake, ikantzi: “Ari inkantyaari ashitakawori jiroka omathakirontsi, roosoteri Judá-ite janta Jerusalén-ki, raanakeniri kaari asheninkata. Iroowa riyotakaanari Tasorenkantsi.” <sup>12</sup> Ikanta nokemaiyawakeni, nokantakantawetanakari Pablo: “Eero piyaatzi Jerusalén-ki.” Ari ikantawetakariri eejatzi Cesarea-satzi. <sup>13</sup> Iro kantacha ikantanake irirori: “¿Iitaka piraantaiyarini, antawowa powashiretakaakena? Kowakena naaka. Arika roosoitakena irojatzzi nonkamawentantakyaariri Awinkatharite Jesús janta Jerusalén-ki, imawaityaata.” <sup>14</sup> Tera noitsinampaatyeeeri, apatziro nokantanake: “Imatyaata ikowiri Awinkatharite.”

<sup>15</sup> Okanta okaatapaake jiroka, wetsikaiyanaanani, jataiyakenani Jerusalén-ki. <sup>16</sup> Ari royaataiyanakenani Cesarea-satzi yotaarewopaini rinatzi. Iriira aanakenari ipankoki Chipre-satzi jitachari Mnasón, pairanitake riyotaarewotzi jirika, iriitake nimayimo-taiyakerini.

### *Rotaiyaitakeri Pablo tasorentsipankoki*

<sup>17</sup> Ikanta nareetaiyapaakani Jerusalén-ki, kimoshire ikantaiyani iyekiite iñaawakenaga.

<sup>18</sup> Okanta okiteeshetamanai, raanakena Pablo nareetyaari Jacobo, ari risaikitakari eejatzi maawoini itzinkamipaini. <sup>19</sup> Riwehatapaakari Pablo, ikamantapaakeri maawoini oita rantakaayetakeriri Pawa janta inampipainiki itsipasatzi atziripaini. <sup>20</sup> Ikanta ikemaiyawakeni, ithaamentanakari Pawa. Irojatziki ikantaitantanakariri Pablo: “Iyekí, imapero ishenitake jaka asheninka Judá-ite kemisantantantsiri, tzimimaitacha rot-siwakakagaitari kemisantanzinkaripaini rimonkaatero Inintakaantaitanewo rosanke-natakeri Moisés-ni. <sup>21</sup> Ikemakotakemi piyotayetakeri asheninkapaini nampiyetawori otsipaki nampitsi, pinkantayeterime: ‘Te okowaawo pinkemisantero Inintakaantaitanewo rosankenatakeri Moisés-ni, te okowaawo pitomeshaanitairi pitomipaini, te okowaawo eejatzi antayetairo ameyetari pairani.’ <sup>22</sup> ¿Tsika ankantyaaka? Yoyetake iroñaaka asheninka, areetaimi jaka. <sup>23</sup> Jiroka kameethatatsiri panteri: Eenitatsi akaataiyinira jaka, ikaatzi 4 atziri monkaaterone ikowakaantziri. <sup>24</sup> Pintsipatanakyaari jirikapaini, pantero onkaate kitewathatakagaimine. Arika rameetaitakeniri iishi, eeroka pinakowenterine ritagaiteri. Iroowa riyoitantyaari thaiyaantsi ikantakoitzimiri, tema pimonkaatzitawo eeroka Inintakaantaitanewo. <sup>25</sup> Irooma naakapaini, niyotzi ikenakaashitakawo asheninkapaini shintsiwaiwetachari rimonkaatakanterome Inintakaantaitanewo. Tema ikaatzi kaari asheninkayeta kemisantayetaatsiri, notyaantakeniri pairani osankenarentsi okaatzi nokenkithashiretaiyakarini jaka, nokantakeri: ‘Eero powayetari wathatsi ritagaitziniriri iwawanetashiyeetari. Eero powakoyetawo riraa piratsi. Eero pimayempiwaitzi.’ Apatziro rantayetairo jiroka.”

<sup>26</sup> Ikanta Pablo raanakeri 4 atziri. Okanta okiteeshetamanai itsipatakari ikite-wathatakagaitairi, ikyaake tasorentsipankoki inkamantante jimpe onkaate kiteesh-eri ithonkantyaari ikowakaantakeri, ikenkithatakotakero tsikapaite ramantyaari apawopaini rashitakayaariri Pawa.

<sup>27</sup> Okanta imonkaatzimatapaaka 7 kiteesheri, eenitatsi Judá-ite poñaayetachari Asia-ki, iñaakeri Pablo janta tasorentsipankoki. Rapatotake atziripaini, ripokashiteri Pablo rotaiyeri, <sup>28</sup> ikaimaiyini, ikantzi: “¡Shiramparipaini! ¡Israel-iite! ¡Pamitakotena! Jirika atziri kenakenayetatsiri tsikarikapaini riyotayetziri atziripaini pithokashitariri asheninkapaini, pithokashitawori Inintakaantaitanewo rosankenatakeri Moisés-ni, pithokashitzitawori tasorentsipanko. Iro maperotaincha, ikyaakaakeri kaari asheninkata tasorentsipankoki, rithainkatasorentsiwaitakero.” <sup>29</sup> Iro ikantantawori jiroka tema iñaakitziiri Pablo janta Jerusalén-ki itsipatakari Trófimo poñaachari Efeso-ki, roshiyakaatzi ikyaakaatziiri tasorentsipankoki. <sup>30</sup> Piyotaiyapaakani osheki atziri, shiyaiyapaakani, rotaiyapaakeri Pablo, inoshikanakeri romishitowakeri jekokeroini tasorentsipankoki, rashitanakero. <sup>31</sup> Iroowetaincha ritsitokerime, ari ikamantaitakeri reeware owayeripaini poñaachari Roma-ki, ikantaitakeri: “Ikoshekawakagaitya janta.” <sup>32</sup> Ikanta reewarite raanake rowayerite, riyaatashitanakeri ipiyotaiyakanira atziri. Ikanta iñagaiyawakerini ripokake, ripakaanakeri ripasataitziri Pablo. <sup>33</sup> Rotaiyaitapaakeri Pablo, ikantanakeri rowayerite: “Poosotantyaari apite kotsirotha.” Rosampitanakeri atziripaini: “¿Iitaka jirika, iitaka rantakeri?” <sup>34</sup> Eenitatsi cheraanantsiri, temaita oshiyawakaa okaatzi richeraawetaiyakarini. Te riyotero jewari oita awisatsiri. Rotyaantakeri rowayerite raanakeri Pablo rimaapiintaiyinira. <sup>35</sup> Ikanta roirinkakaawetari Pablo, eekero ishintsitatzi atziripaini ikowi ripasawaiteri, iroowa inatantanakariri owayeripaini rookaakowenteriri. <sup>36</sup> Maawoini atziri royaatakowentanakeri, ikaimaiyini: “¡Powamayeriwé!”

### *Ikenkithatakota Pablo*

<sup>37</sup> Iroowetaincha romonkyagaiteri rimaapiintzira owayeri, rosampitanakeri Pablo jewari, ikantziri: “¿Kantachama nonkenkithawaitakaimi eepichokiini?” Ari ikantanake jewari: “¡Jimpe piyotziroka niñaane! <sup>38</sup> ¿Tema Egipto-satzi pinatzi eeroka poñaakaantakawori chapinkipaite koshekaantsi? Pikenapaakero ochempiki, pamake 4000 owayeri.” <sup>39</sup> Ikantanake Pablo: “Judá-ite ninatzi naaka, nopoñaawo Tarso-ki saikatsiri Cilicia-ki. Otzinkami inatzi nonampi. Nokowi pishinetena nonkenkithawaitakairi nosheninka.” <sup>40</sup> Rishinetakeri. Katziyanaka Pablo pawitsiki, rowaatzinkawakotanaka imairetantaari isheninkapaini. Mairetaiyanakeni. Kenkithawaitanake Heber-thato riñaaneki irirori, ikantanakeri:

## 22

<sup>1</sup> “Iyekí, Ashitantanerí, pinkeme nonkenkithatakotya.”

<sup>2</sup> Ikanta ikemaiyawakerini riñaaneki irirori Heber-thato, imaireperotaiyanakeni. Eeke ikantanakitzi Pablo:

<sup>3</sup> “Judá-ite ninatzi naaka. Notzimake Tarso-ki saikatsiri Cilicia-ki, nokimotatake jaka Jerusalén-ki, riyotaanewo Gamaliel ninatzi, niyotakoperotziro Inintakaantanewo acharinepaini. Nokowake naaka noshireperotyaari Pawa, pikantakaga eerokapaini iroñaaka. <sup>4</sup> Pairani nopatzimaminthatakeri iitaitziri ‘Awotsiweri’ nowamaayeteri. Osheki nonoshikayetake atziri, ari nokantakero eejatzi tsinane, maawoini, nomonkyakaantayetakeri. <sup>5</sup> Iñaakena maawoini reeware Imperatasorentsitaarewo eejatzi Itzinkamipaini nantayetakeri jiroka. Iriitake pakenawori osankenarentsi ipakaantziri asheninka Judá-ite janta Damasco-ki. Irojatziri niyaatantakari janta nithotyakoyetziri jirikapaini, namayeteri jaka Jerusalén-ki rowasankeeteri.”

*Ikenkithatakota Pablo ikemisantantaari*  
(Hch. 9.1-19; 26.12-18)

<sup>6</sup> “Okanta nanashita awotsiki, irootaintsi nareetya Damasco-ki, ikaatake tampatzika ooryaa, ari romapokakenari morekanaintsiri inkiteki, roorentapaakena nokatziyakaga, <sup>7</sup> tyaanakena kipatsiki. Nokematzi riñaanaitana, ikantziri: ‘¡Saulo! ¡Saulo! ¿Iitaka poyaakyaaminthatanari?’ <sup>8</sup> Nosampitanakeri naaka: ¿Piitaka Pinkathari? Ari rakaitanakena: ‘Naakatake Jesús Nazaret-satzi poyaakyaaminthatakeri.’ <sup>9</sup> Ikaatzi tsipatakenari iñagaiyakerini oorentapainchari, antawoite ithaawaiyanakeni, temaita ikemathatawakeri iriroripaini riñaanaitakenaga naaka. <sup>10</sup> Ari nosampitanakeri, nokantziri: ‘Pinkatharí. ¿Iitaka pikowiri nanteri naaka?’ Ikantanakena Pinkathari: ‘Pinkatziye, piyaate nampitsiki Damasco-ki. Ari inkamantaitemi oita panteri.’ <sup>11</sup> Imawityaakitakaanakena oorentakenari, rakathatashitaana notsipayetakari irojatziri Damasco-ki.

<sup>12</sup> Ari risaikiri janta atziri iita Ananías, pinkathatasorentsitane rinatzi, rimonkaayetziro Inintakaantaitanewo rosankenatakeri Moisés-ni. Pinkatha rowiri maawoini Judá-ite nampiyetawori Damasco-ki. <sup>13</sup> Pokake Ananías iñeena. Ikanta rareetapaaka, ikantapaakena: ‘Iyeki Saulo, pokiryagai.’ Apathakero nokiryaaanai, aminawaitanaana. <sup>14</sup> Eeke ikantanakityaana Ananías: ‘Eeroka riyoyaaake Iwawane acharinepaini. Riyoyaaakemi piyotantaiyaawori ikowakaimiri irirori, piñagairi Cristo tampatzikatatsiri, pikemawaantetairi eejatzi. <sup>15</sup> Eerokatake kenkithatakotairine maawoiniki atziri. Pinkamantairi okaatzi piñaakeri, okaatzi pikemakeri. <sup>16</sup> Tekaatsi poyaawentanake. Pinkatziye iroñaaka, pomitsitsiyaatya, paakotairi iwairo Awinkatharite pinkowakotairi impeyakotaimiro piyaariperonka.’”

*Ikenkithatakotziro Pablo ipatzimaitziri inkenkithatakagairira itsipatsatzi atziri*

<sup>17</sup> “Okanta nipiypaawo Jerusalén-ki, niyaatake tasorentsipankoki namaña, ari noñaawyaatakari janta. <sup>18</sup> Noñaakeri Awinkatharite, ikantakena: ‘Intsipaita pishitowanake Jerusalén-ki, tema eero ikemisantaitzimi pinkenkithatakotena jaka.’ <sup>19</sup> Ari



nokantanakeri naaka: ‘Pinkatharí, riyotaiyini maawoini niyaatapiintzi tsika rapatotapiintaita, nomonkyaakaantayetakeri ikaatzi kemisantayetzimiri, osheki nipasatakaantawaitakeri. <sup>20</sup> Tema rowamagaitakeri pairani pimperatanewo Esteban, kenkithatakotzimiri eeroka, ari nokaatzitakeri naaka janta, naapatziyakotakeri owa-makeriri, nokempoyaakeniri iithaarepaini.’ <sup>21</sup> Iro kantacha ikantanakena Pawa: ‘Piyaate, naakatake otyaantemine intaina risaikayetzira kaari pisheninkata.’ ”

### *Risaikimotakeri Pablo reewarite owayeripaini*

<sup>22</sup> Ikanta ikemawakero atziripaini jiroka, rapiitaiyanakeroni ikaimaiyini ikantzi: “¡Jirika atziri te onkameethate rañe! ¡Pashireeyaari!” <sup>23</sup> Eeke ishintsitatzi ikaimaiyini, rotekakotaiyani iithaareki. \* <sup>24</sup> Ikanta jewari, ikantakeri rowayerite: “Paanakeri inthomoikinta jirika, apasatawakeriita inkamantantairori oita ikenkithawaitakeri rowat-simaantakariri isheninkapaini.” <sup>25</sup> Ari rosoitanakeri ripasatantaityaariri, rosampitanakeri Pablo itsipa jewari, ikantziri: “Rosankenatakotanewo Roma-satzi ninatzi naaka. ¿Shinetaantsitatsima ripasawaitaitena, te raminakoitawakenawo oitarika noke-nakaashitakeri?” <sup>26</sup> Ikanta ikemawake jirika, ripiyashitanakeri reewarepero, ikantapairi: “Nowinkatharité, ¿Piyotakema oita antakeri? Iriitake jirika, rosankenatakotanewo awinkathariperote saikatsiri Roma-ki.” <sup>27</sup> Ikanta ikemawake, ripokashitapaakeri Pablo, rosampitapaakeri: “¿Pimaperotatyaama posankenatakoperota eeroka?” Ari rakanake Pablo, ikantzi: “Jee.” <sup>28</sup> Ikantzi jewari: “Osheki nipinakowentakari naaka nosankenatakotantyaari.” Ikantzi Pablo: “Te naaka, rosankenatakotizitakena owakera notzimapaake.” <sup>29</sup> Ikemaiyakeni ikantake, roosoryaakotanakeri. Ithaawakaanakawo jewari, roosotakaantakeri osankenatakotachari Roma-ki.

### *Ragaitanairi Pablo rapatotapiintaiyanira reeware Judá-ite*

<sup>30</sup> Okanta okiteeshetamanai, ikowi riyote jewari oita ikoshekaminthatantariri Judá-ite Pablo. Ipiyotakaantakeri reeware Imperatasorentsitaarewo, eejatzi reewarepero Judá-ite. Romishitowakaantakeri Pablo, roisaiakeri ipiyotaiyanira.

## 23

<sup>1</sup> Rotzikanaminthatapaakeri Pablo jewaperori piyotainchari, ikantanakeri: “Iyeki-ite, nokempoyaapiintaka naaka eero otzimanta nantzimoteriri Pawa.” <sup>2</sup> Ikanta Ananías, Imperatasorentsiperori, ripasawaantetakaantakeri Pablo. <sup>3</sup> Ikantanakeri Pablo: “¡Thaiyawairentzi! Pawa pasatemine eeroka! Saikawetatsimi jaka paminakoterome Inintakaantaitanewo, ¿Tema pipiyathatakawo eeroka pipasatakaantakenaga?” \* <sup>4</sup> Ikanta piyotainchari, ikantanakeri Pablo: “¿Arima pinkanteri pinkaweyeri Rimperatasorentsiperotaarewote Pawa?” <sup>5</sup> Ikantzi Pablo: “Iyekiite, te niyoweta naaka Imperatasorentsiperotaarewo rinatzi, tema okantzi Osankenarentsiperoro: ‘Eero pikaweyiri jewatakaantatsiri.’ ”

<sup>6</sup> Riyotakotakeri Pablo ikaatzi jewaperori piyotainchari, apaanipaini Sadoc-iite rini, iriima itsipapaini Fariseo rinatzi. Ikantzi Pablo: “Iyekiite, Fariseo ninatzi naaka, eejatzi maawoini nosheninkapaini. Iroowa riyakowentantaitanari iroñaaka tema niyotakotaatziiro rañagaira kamaintsiri.” <sup>7</sup> Ikantakera Pablo, ari riñaanaminthatawakaanakeri Fariseo-paini eejatzi Sadoc-iite. <sup>8</sup> Tema ikantapiintzi Sadoc-iite: “Eero rañaayetai kamayetaintsiri, tera otzimi shiretsi, tera itzimita maninkari.” Iriima Fariseo-paini, riyoyetzi irirori imaperotatya jirokapaini. <sup>9</sup> Ari richeraanake maawoini. Ikanta yotzinkaripaini Fariseo, ikatziyanaka, ikantanake: “Jirika atziri te otzimi iye-nakaashitanewo. Aamaaya maninkari ñaanashiretakeriri, kaaririka shiretsi.” <sup>10</sup> Eeke

\* **22:23** Ikantaitzi eejatzi, rookawanetzitaka kipatsi tsika ipiyotaiyakani, tema ikisaiyatyaani. \* **23:3** Kantakotachari jaka “thaiyawairentzi”, iriyyetakeri Imperatasorentsitaarewo. Iriitake roshiyakaawentziri Pablo okitamaaweta rowantaitariri kaminkari. Paminero Mt. 23.27.

ishintsitatzi richeragaiyini. Ikenkithashiryaanaka reeware owayeripaini, ikantzi: “Naanairiita Pablo, rowaariperotaitzirikari.” Ikaimakaantake rowayerite romishitowairi, raanairi rimaapiintaiyinira.

<sup>11</sup> Okanta otsirenitanai, eejatzi roñaaganaari Awinkatharite, ikantairi: “Pablo, eero pithaawi, arira pinkenkithatakotakena Roma-ki poshiyakairo jaka Jerusalén-ki.”

### *Ikenkithashiretaita ritsitokaiteri Pablo*

<sup>12</sup> Okanta okiteeshetamanai, ikenkithawaitake Judá-ite, ikantawakaiyani: “Jame atziwentashityaari Pablo irojatzi atsitokantakyaariri. Eerorika nimonkaatziro, rowasanketainaata Pawa.” <sup>13</sup> Aamaaka ranaanakeri 40 atziri ikaataiyini kantaintsiri. <sup>14</sup> Irojatzi riyaaatashitantakariri reeware Imperatasorentsitaarewo, eejatzi Itzinkamipaini, ikantaiyakerini: “Nitziwentaiyarini Pablo irojatzi nitsitokantakyaariri. Eerorika nimonkaatziro, rowasanketainaata Pawa. <sup>15</sup> Janjaatya paapatziyawakaiya eerokapaini pikaatzi papatotapiinta, pinkowakotairi reeware owayeripaini, pinkantairi: ‘Pamainari Pablo onkiteeshetamanairika naminakoperotainiri iyenakaashitane.’ Aamaawenta nonkantaiyaani naaka nitsitokawakeriita tekera rareetapaakaata jaka.”

<sup>16</sup> Kemake itzineri Pablo, jatanake rimaapiintaiyinira owayeri ikamantapaakeri. <sup>17</sup> Ikanta Pablo ikaimake apaani owayeri, ikantakeri: “Paanakeniri pitzinkami jirika mainari, eenitatsi oita inkamanteriri.” <sup>18</sup> Ikanta owayerika raanakeniri itzinkami, ikantapaakeri: “¡Itzinkami! Ikowakotakena Pablo namakemiri jirika mainari, eenitatsi inkamantemiri.” <sup>19</sup> Ikanta jewarika, raanakeri mainari jantyaatsikaini, rosampitakeri: “¿Oitaka pinkamantenari?” <sup>20</sup> Ikantanake mainari: “Ikenkithashiretaiyakani Judá-ite inkowakotemi onkiteeshetamanairika paanairi Pablo janta rapatotapiintaiyanira jewaripero, raminakoperotero iyenakaashitanewo. <sup>21</sup> Eero pikemisantziri, tema manaiyakani 40 atziri. Ikantaiyakeni: ‘Jame atziwentashityaari Pablo irojatzi atsitokantakyaariri. Eero owashitari, eero arita amere. Eerorika nimonkaatziro, rowasanketainaata Pawa.’ Wetsikaiyakani iroñaaka, royaawentaiyani tsika pinkante eeroka.” <sup>22</sup> Ikanta jewari rotyaantairi mainari, ikantawairi: “Eero pikamantantziro jiroka.”

### *Rowawisagaitakeri Pablo pinkathariki Félix*

<sup>23</sup> Ikanta jewari ikaimake apite reeware owayeripaini, ikantakeri: “Pimpiyote 200 powayerite, pintsipataakeri 70 owayeri kyaakayaarine kawayo, eejatzi itsipa 200 aatsine rowathaamento. Paanakeri tsireniriki Cesarea-ki. <sup>24</sup> Piwetsike kawayo inkyaakaanakyaari Pablo, pinkempoyeeri kameethaini. Paanakeri pinkathariki Félix.”

<sup>25</sup> Ari rosankenatakeri rotyaanteniriri pinkathari, okantzi:

<sup>26</sup> “Rosankenare Claudio Lisias rotyaantziniri pinkathari Félix: Osheki niwethatemi. <sup>27</sup> Jirika atziri notyaantakemiri, rotaiyakaantawetakari Judá-ite jaka, iroowetaincha ritsitokerime. Ikanta niyotake rosankenatakotanewo itzinkamipero Roma-satzi, naanake nowayerite, nookakaawentakeri. <sup>28</sup> Nokowawetaka niyote oitarika ikenakaashitari jirika ikoshekantaitakariri, irootake naantanakariri rapatotapiintaiyanira itzinkami. <sup>29</sup> Noñaakero ikoshekawentashitari Inintakaantaitanewo rashiyetari irirori. Tekaatsi ompoñaantyaari ritsitokaiteri, te okameethatzi romonkyaakaantaiteri eejatzi. <sup>30</sup> Tema nokemake ikowaiyatziini Judá-ite ritsitokeri, irootake notyaantantakemiriri eeroka. Nokantzitakari eejatzi jirikapaini koshekawaitariri inkamantemiro eeroka oitarika ikoshekantariri.”

<sup>31</sup> Rimatakeri owayeripaini. Raanakeri tsireniriki Pablo janta Antípatris-ki. <sup>32</sup> Okanta okiteeshetamanai, piyaiyaani owayeri anashitaiyanaincharini. Iriima ikaatzi kyaakaanainchari eekero royaatatziiri Pablo. <sup>33</sup> Ikanta rareetakaakari Cesarea-ki, ipapaakeri osankenarentsi pinkathari, ikantapaakeri: “Pinkathari, jirika Pablo.” <sup>34</sup> Ikanta rithonkanakero pinkathari riñaanatawakero osankenarentsi, rosampitanakeri Pablo, ikantziri: “¿Tsika pipoñaaka?” Rakanake Pablo: “Nopoñaawo Cilicia-ki.”

<sup>35</sup> Ikantanake pinkathari: “Ari nonkemakemi paata arika rareetapaakya ikaatzi koshekawaitzimiri.” Irojatzzi inintakaantantanakariri ragaitanakeri ipankoki Herodes, ari inkempoyagaiteri.

## 24

### *Ikenkithatakota Pablo janta Félix-ki*

<sup>1</sup> Okanta awisanake 5 kiteesheri, areetapaaka Cesarea-ki, Ananías Imperata-sorentsiperori itsipayetakari Itzinkamipaini eejatzi yakowentantaneri iita Tértulo. Rawisashitapaakeri pinkathari inkoshekakaantyaariri Pablo. <sup>2</sup> Ikanta ramaitapaakeri Pablo, kenkithawaitanake Tértulo, ikantanakeri Félix: “Ariwé Pinkatharí, noñaakero kameetha nisaiki, osheki piyotanetzi pantakeniri kameethatsiri nosheninka. <sup>3</sup> Okaatake jiroka nowinkathariperote Félix, osheki riwetharyaapiintaiyakemini maawoini nosheninka. <sup>4</sup> Eero osamanitanta, nokowatzi pinkemisantawakena eepichokiini nonkantemiri. <sup>5</sup> Noñaakeri naaka, jirika atziri owaariperotantaneri rinatzi. Rithonka ikenayetake nampitsiki, te apatziro ikoshekakari nosheninka nokaatzira no-judá-itetzi, irijatzi jewatakaanairiri jitashiwaitachari ‘Oshiretanaariri Nazaret-satzi’. <sup>6</sup> Ikowake eejatzi rowaariperoterome notasorentsipankote, iroowa notaiyakaantantakariri, nokowaiyawetakani naminakotantyaarime Inintakaan-taitanari naaka. <sup>7</sup> Iro kantacha, ripokapaake jewari Lisias, raapithatakenari, richeraimowaitakena. <sup>8</sup> Ikantanakena: ‘Ontzimatyé piyaataiyeni pinkathariki riwetsikemiro awisaintsiri.’ Janjaatya posampiperoteri eeroka ayotantyaawori imaperotatyaarika nokoshekaminthatantari.”

<sup>9</sup> Irojatzzi ikantaiyakerini eejatzi Judá-ite ikaatzi pokaintsiri.

<sup>10</sup> Ari rowaatzinkawakotanaka pinkathari ompoñaantyaari riñaawaite Pablo. Irojatzzi ikantantanakariri Pablo: “Osheki nokimoshirewentakemi eerokatake kemenane nonkenkithatakotya, tema niyotzi eerokatake wetsikapiintakeniriri nosheninkapaini inkoshekawakaiyaani.

<sup>11</sup> Kantacha posampikowentero eeroka, owakera nareetaa naaka Jerusalén-ki okaatzi 12 kiteesheri, nokowaweta nompinkathatapairome Pawa. <sup>12</sup> Te niñaanaminthatantawaite, te nokoshekanetari atziripaini tasorentsipankoki, eejatzi nokantakariri jantapaini nampitsiki, tekaatsi nonkoshekya ipiyotaitapiintaitaga. <sup>13</sup> Jirikapaini thawetakotakenari iroñaaka jaka, eero iñagaitziro imaperotatya ikantakotanari. <sup>14</sup> Ari okantaka, notsipataari naaka ikaatzi iitaitziri ‘Awotsiweri.’ Iroowa ikantakeri jirikapaini yakowentantaneri nokemisantashiwaitane inatzi. Ari nokenakairo naaka nopinkathatziri Pawa ikemisantziri pairani nocharinepaini. Nokemisantziro Inintakaanewo, eejatzi rosankenarepaini Kamantaneri. <sup>15</sup> Ari noshiyayetari irirori, royaawentziri Pawa rowañaayetairi kamayetaintsiri, te apatziro rañaayetai kameethashireri, eejatzi inkantzitaiya kaariperoshireripaini. <sup>16</sup> Iroowa nokowantapiintari eero otzimi oita nantzimoteriri Pawa, eejatzi atziripaini. <sup>17</sup> Awisake osheki osarentsi nokenakenawaitake, nipiyaawo nonampiki namai nompashitapaiyaariri nosheninka koityaawaitatsiri, nokowawetapaa eejatzi nashitakaapaiyaarime Pawa. <sup>18</sup> Irootake nantziri tasorentsipankoki. Ari nameetziro noishi ompoñaantyaari nonkitewathatai. Te osheki nonkaataiyeni, tekaatsi nonkoshekawaitya janta. Ari iñaapaakena Judá-ite poñainchari Asia-ki. <sup>19</sup> Iriitakeme pokatsine jaka inkenkithatakotena oitarika iñaakotakenari. <sup>20</sup> Tera ripokaiyatziini irirori. Jirika pokaintsiri jaka piyowentakenari, janjaatya inkantemi eenitatsirika iñaakotakenari rokiki nokenakaashitakari. <sup>21</sup> Aamaa iro ikantakotanari nokantakeriri ipiyowentantakenari ketziroini, nokantakeri: ‘Iroowa riyakowentantaitanari nokemisantaatziro rañaayetai kamayetatsiri.’ ”

<sup>22</sup> Tema pinkathari Félix riyotakotziri iitaitziri “Awotsiweri”, iro ripakaanatanakariri, ikantanakeri: “Arika ripokake jewari Lisias, ari inkamantaperotapaakenawo jiroka.”

<sup>23</sup> Irojatzi ikantantakariri reeware owayeripaini: “Pinkempoyeeri Pablo, pishineteri rareetyaari raapatziyanewo impantyaariri koitziimotariri.”

<sup>24</sup> Okanta otsipa kiteesheri, piyaawo Félix, itsipatakawo iina Drusila, Judá-ite inatzi iroori. Ikanta ikaimakaantapairi Pablo inkemawakeri inkenkithatakoteniri tsika okantakota rawentaashiretantaariri Jesucristo. <sup>25</sup> Iri kantacha Pablo retanakawo ikenkithatakotanakeniri tampatzikashiretaantsi, ñaakoshiretaantsi, rowasanketantayetai paata. Ari ithaawanakeri Félix, ikantanakeri: “¡Ataama, piyaatai! Ari napiitairo nonkaimakaantaimi paata arika nisaikashiwaitya.” <sup>26</sup> Tema royaawentawetatya Félix ripinaterime Pablo, ripakaantaiyaariri. Iroowa rapiitantawetakariri ikaimakaantziri inkenkithawaitakairi. <sup>27</sup> Awisake okaatzi apite osarentsi. Ari okaatapaake ipinkatharitzitzi Félix. Ikowake raapatziyapiintyaari Judá-ite, irootake kaari ripakaakaantantariri Pablo. Ikanta ripoyaatapaari itsipa pinkathari jitachari Porcio Festo.

## 25

### *Ikowake Pablo iri aminakoterine César*

<sup>1</sup> Pinkathariwentantake Festo. Iro awisanake mawa kiteesheri jatake Jerusalén-ki ipoñaanakawo Cesarea-ki. <sup>2</sup> Ikanta reeware Imperatasorentsitaarewo itsipayetakari iriiperori Judá-ite, ithawetakotawakeri Pablo. <sup>3</sup> Ikowakotakeri rotyaantairi Pablo Jerusalén-ki. Ikenkithashiryagaiyakani ritsitokakaanteri niyankithakineki awotsi. <sup>4</sup> Ari ikantanake Festo: “Tema romonkyagaitakeri Pablo Cesarea-ki, irootaintsi niyaatai janta. <sup>5</sup> Royaanakena itzinkami, tzimatsirika iyenakaashitane jirika atziri, ari piyakowentereri janta.”

<sup>6</sup> Te osamanitzi risaikawaitapaintzi Festo janta Jerusalén-ki, piyaawo Cesarea-ki. Okanta risaikamanai risaikamentoki ipinkathariwentantzira, ikaimakaantakeri Pablo. \* <sup>7</sup> Ikanta ikyaapaake Pablo, ari ripokaiyapaakeni Judá-ite poñayetainchari Jerusalén-ki, ikantakowaitapaakeri osheki kaariperori, okantaweta te iñayewetawo imaperotatyaarika ikantakoitziriri. <sup>8</sup> Kenkithatakotanaka Pablo, ikantake: “Tekaaitsi kaariperori nante naaka, te nipiayathatawo Inintakaanaitakeniriri nosheninkapaini, te nowaariperotero tasorentsipanko, te nokaweyawaitziri César reewariperote Roma-satzi.” <sup>9</sup> Iriima pinkathari Festo ikowira raapatziyapiintyaari Judá-ite, rosampitanakeri Pablo: “¿Pikowima piyaate Jerusalén-ki, nonkemantyaariri yakowentemine janta?” <sup>10</sup> Ikantanake Pablo: “Iro kameethatatsi nisaika jaka paminakotena, tema eerokatake rowakeri César reewariperote Roma-satzi. Piyotaiyakeni tekaatsi kaariperori nantzimoteriri nosheninkapaini Judá-ite. <sup>11</sup> Ontzimatyeeeme noyenakaashiperotane, kameethatakeme ritsitokaitena. Tema tekaatsi nonkenakaashitya, te okameethatzi potyaantena janta. Nokowaperotzi iri pinkathari César aminakoperotenane.” <sup>12</sup> Ikanta Festo ikenkithawaitakaakeri ikaataiyini ipinkatharitzitzi. Ari ikantanakeri: “Iroorika pikowi raminakotemi César, ari nosankenatakotakemi, piyaatantyaari janta.”

### *Ragaitanakeri Pablo pinkathariki Agripa*

<sup>13</sup> Ikanta pinkathari Agripa itsipatakawo iina Berenice pokaiyakeni Cesarea-ki, riwethatyaari Festo. † <sup>14</sup> Ikanta risaikawaitapaintzi janta, ikenkithawaitakaakeri Festo tsika ikantakota Pablo, ikantakeri: “Eenitatsi apaani atziri rookanairi pinkathari Félix romonkyagaitziri. <sup>15</sup> Niyaatake chapinkipaiteki Jerusalén-ki, osheki ikantakowaitawakeri reeware Imperatasorentsitaarewo itsipayetakari Itzinkampaini, ikowakotakena nitsitokakaanteri. <sup>16</sup> Nokantanakeri naaka: ‘Jiroka nametaiyarini No-roma-satzitzira: Ontzimatyee impiyotaiyaani ikaatzi koshekawakaachari,

\* **25:6** Kantakotachari jaka “te osamanitzi”, irojatzi ikantakoitziri 8 aamaakarika 10 kiteesheri risaikawaitapaintzi.

† **25:13** Jirika Agripa, iitaitziri eejatzi Herodes.

ompoñaantyaari inkenkithatakotantyaariri riyakowentanewo. Kyaaryooperorika otzimi iyenakaashitane, aritake ritsitokaitakeri.’<sup>17</sup> Irootake nantakeri ripokaiyakenira irirori, te nishenkaanaka, jatakena nisaikamentoki, nokaimakaantakeri atzirika.<sup>18</sup> Iro kantzimaitacha okaatzi ikantapaakeri yakowentziriri, te noñiuro onkantaperotya okaatzi nokenkithashiryaaakowetakariri.<sup>19</sup> Apatziro ikenkithatakotashitakawo ikemisantashiwaiyetari, ikenkithatakotakeri eejatzi iitaitziri Jesús rowamagaitakeri, iriitake ikantziri Pablo eeniro rañi.<sup>20</sup> Temaita niyotzi jimpe nonkantero jiroka, nosampitakeri Pablo ikowirika riyaate Jerusalén-ki raminakoitantyaariri janta.<sup>21</sup> Ikowaperotake Pablo iriitake aminakoperoterine César Augusto awinkathariperote Roma-ki. Irootake nokantantakeri riyaatatziira romonkyagaiteri irojatzi notyaantantakyaariri.”<sup>22</sup> Ikanta Agripa, ikantanakeri Festo: “Nokowi nonkemeru naaka jirika atziri.” Ikantanake Festo: “Aritake pinkemakeri onkiteeshetamanai.”

<sup>23</sup> Okanta okiteeshetamanai, ikyaake Agripa itsipatakawo Berenice, owaneenka ikan-tayetaka. Itsipayetakari reeware owayeripaini, eejatzi iriiperoripaini atziri saikayetat-siri janta. Ikantake Festo ramaiteniri Pablo.<sup>24</sup> Ari ikenkithawaitanakeri Festo, ikantzi: “Pinkathari Agripa, pinkatharipaini ikaatzi piyotainchari jaka, jirika atziri. Osheki riyakowentakeri Judá-ite janta Jerusalén-ki eejatzi jaka Cesarea-ki. Richeraapi-intaiyini ikowi ritsitokaiteri.<sup>25</sup> Noñimaitakawo naaka tekaatsi inkenakaashitya jirika ritsitokantaityaariri. Iri kantzimaitacha, iri kowanaintsiri raminakoperoteri Augusto, iri kameethatatsi notyaanteri janta.<sup>26</sup> Temaita noñe naaka oita nosankenateniriri pinkathariperori ikantakota jirika, iroowa namantzimiriri eerokapaini piñeeri, eerokaga pinkathari Agripa namakeniri, posampitawakeri, ari ontzimeri nosankenateri.<sup>27</sup> Te onkameethatzimotena notyaante apaani romonkyagaitziri, eerorika otzimi tsika osankenatakota iyenakaashitane.”

## 26

### *Ikenkithatakota Pablo Agripa-ki*

<sup>1</sup> Ikantanakeri Agripa jirika Pablo: “Kantacha pinkenkithawaitapai eeroka.” Ari rowaatzinkawakotanaka Pablo, kenkithawaitanake, ikantzi: <sup>2</sup> “Pinkathari Agripa, osheki nokimoshiretake nonkenkithawaitakaakemira eeroka, nokowi nonkenkithatakotero okaatzi ikantakowaitakenari Judá-ite. <sup>3</sup> Piyotakoperotziro eeroka okaatzi rameyeteri asheninkapaini Judá-ite. Irootake nokowantari pinkemisantawakena nonkantemiri.”

### *Rañamento Pablo tekeri ikemisantanakeeta*

<sup>4</sup> “Riyotaiyini nosheninkapaini Judá-ite tsika nokanta eeniro nomainaritapaake, nisaikimotantakariri Jerusalén-ki. <sup>5</sup> Naakatake Fariseo monkaawarentzi, te nipiyanetanetawo Inintakaantaitziri. Ikowirika, kantacha inkenkithatakotena. <sup>6</sup> Iroowa nisaikantari iroñaaka jaka, tema nokenkithatakotaatziro okaatzi pairani ikowakaakeriri Pawa acharinepaini, oyaakoneentaiyirini aakapaini. <sup>7</sup> Pinkathari Agripa, irojatzi noyaakotzitakari naaka, irootake ikantakotakenari asheninkapaini. Irojatzi roy-aakoneentakeri maawoini asheninka icharineyetaari 12 itomipaini Israel-ni. Irootake iñaashintsiwaitashitantakari rantawaitainiri Pawa iñaantayetaiyaaworime. <sup>8</sup> ¿Iitaka kaari pikemisantanta eerokapaini rowañagairi Pawa kamawetainchari?”

### *Royaakyaaminthawetakari Pablo kemisantzinkaripaini*

<sup>9</sup> “Nimatziwetakawo naaka pairani noñaashintsiwaitashita, nokenkithashiryaaaweta nanteme osheki oitarika nonkoshekantantyaariri aakotanairiri iwairo Jesús Nazaret-satzi. <sup>10</sup> Iro nantakeri Jerusalén-ki. Rishinetakenawo reeware Imperatasorentsitaarewo, osheki nomonkyaaakaantake ikiteshoretakagaitairi. Okanta noñaakowentayetzirira ritsitokaitziri, inimotana. <sup>11</sup> Tzimatsi osheki nowasankewetakari



ripakaantyaaworime ikemisantzi. Nimatzitari tsika rapatotapiintaita. Osheki nokisaneentakeri jirikapaini, noyaakyaaminthawaitakeri, eejatzi nokantzitakeri saikayetatsiri otsipaki nampitsi.”

*Rapiitziro Pablo ikenkithatakota ikemisantantaari*  
(Hch. 9.1-19; 22.6-16)

<sup>12</sup> “Iro niyaatantakeri nampitsiki Damasco, rotyaantakena reeware Imperata-sorentsitaarewo. <sup>13</sup> Iro kantacha niyankithakineki awotsi, ikaatake tampatzika ooryaa noñaake shipakiryaaanaintsiri inkiteki, ranaanakeri ooryaa, roorentakotapaak-ena nokatziyakaga, eejatzi ikaatzi tsipatakenari. <sup>14</sup> Nityeeyanakeni maawoini kipat-siki. Nokematzi riñaanaitanakena niñaaneki Heber-thato, ikantana: ‘¡Saulo! ¡Saulo! ¿litaka poyaakyaaminthatanari? Eerokatake owasankewaitacha apaniroini, oshiyawaitakawo pipaikayitziatyeeyaawome thoyempithowari.’ <sup>15</sup> Ari nakanakeri naaka: ‘¿Piitaka eeroka Pinkathari?’ Rakanakena Nowinkatharite: ‘Naakatake Jesús, poyaakyaaminthatakeri. <sup>16</sup> ¡Pinkatziye! Iroowa noñaagantzimiri pantawaitaina naaka. Pinkenkithatakotairo okaatzi piñaakeri, onkaate piñagairi eejatzi paata nantakagaimiri. <sup>17</sup> Aritake piñagairo nookaakowentaimi pisheninkaki, eejatzi janta kaari pisheninkata tsika notyaantemi iroñaaka. <sup>18</sup> Oshiyawaitaiyaawo pokiryaaakagaatyeeerime. Aritapaake ikenashiwaitaka otsirenikitziira ranashiyetaiya kiteesheriki. Aritapaake ipinkathari-wentakeri Satanás, iri Pawa pinkathariwentairine. Iro ompoñaantyaari nompeyakotan-taiyaanariri iyaariperonka, nonkiteshoretakaayetairi awentaashiretainane naaka. Iroowa ikowakagaitakeriri.’ ”

*Te ripiyathawaitanaka Pablo roñaagaitakarira*

<sup>19</sup> “Pinkathari Agripa, te nipiyathanaka roñaagaitakenawowa inkite, <sup>20</sup> netanakawo nokenkithatakanakeri Damasco-satzi, Jerusalén-satzi, maawoini nampiyetawori Judea-ki, nokenkithatakayitanakari ikaatzi kaari asheninkata, nokantayetziri: ‘Pipiyashitairi Pawa, pantayetairo oñaaganterone pipakagairo piyaariperonka.’ <sup>21</sup> Iroowa kantakaantziro, rotaiyantakenari nosheninkapaini tasorentsipankoki, ikowawetaiyakani ritsitokena. <sup>22</sup> Iro kantacha ineshironkatakana Pawa eekero niyaatakaatziro nokenkithatakotziro iroñaaka. Nokenkithatakotainiri maawoini, iriiperoripaini eejatzi kaari iriiperotatsine. Okaatzi nokenkithatapiintakeri, te noipiyiro okaatzi rosankenayetakeri Moisés-ni, eejatzi Kamantantaneripaini. Tema rosankenatakoitakeri awisayetatsine, ikantaitake pairani: <sup>23</sup> Ontzimatyee inkame Cristo, iriitake etaiyaawone rañagai. Iro ompoñaantyaari inkenkithatakoiteniri awisakotaantsi asheninkapaini, inkenkithatakoiteniri eejatzi kaari asheninkata.”

*Ikowi Pablo inkemisantakairi Agripa*

<sup>24</sup> Ikantayetakeri Pablo jiroka, ikaimanake Festo: “¡Pablo, pishinkiwentatya! Okantakaimi pikamaitakawowa piñaanawaitzi.” <sup>25</sup> Rakanakeri Pablo: “Pinkathari Festo, te noshinkiwenta, okaatzi nokantayetakeri imaperotatya. <sup>26</sup> Riyotakotziro pinkathari Agripa jiroka, iroowa nokamantantakemirori jirokapaini. Niyotzi naaka riyotakotziro maawoini, te imanakoyeta jiroka. <sup>27</sup> Pinkathari Agripa, ¿tema pikemisantziro rosankenayetakeri Kamantantaneriite? Niyotzi naaka pikemisantziro.” <sup>28</sup> Rakanake Agripa: “Eepichokiini piyotaawetakana, ¿Piñaawetaka ari pinkemisantakaakana, noshiyakotan-taiyaariri ‘Cristo-weri?’ ” <sup>29</sup> Ikantzi Pablo: “Okantawetaka eepichokiini nokantakemiri, aamaakarika, osheki nokantakemiri, onkamintha iri Pawa kanyakayaawone, te apatziro eeroka pinkathari, eejatzi maawoini pikaatzi pikemaiyakenani iroñaaka, poshiyakotainawo nokantakaga naaka, onkantawetya eero roosotantaitzimiro kot-sirotha.”

<sup>30</sup> Irojatzii ikatziyantananakari pinkathari Agripa itsipatakawo Berenice, rimatzitanakawo eejatzi itsipa pinkathari Festo, eejatzi maawoini ikaatzi saikaintsiri,

<sup>31</sup> jataiyanakeni jantyaatsikaini ikenkithawaitakotziro jiroka. Ikantawakagaiyani: “Iitakakya romonkyagaitantakariri jirika atziri, tekaatsi inkenakaashityaari ritsitokantaityaariri.” <sup>32</sup> Ikanta Agripa ikantanakeri Festo: “Aritakeme apankagairime naaweta jirika atziri, eerome ikowakotakemime posankenatakoteri Pinkathariki César iñaantyaawori oitarika awisatsiri.”

## 27

### *Rotyaantaitakeri Pablo Roma-ki*

<sup>1</sup> Ari ikowaiyakeni rotyaanteri Pablo janta Italia-ki, intsipatanakyaari itsipapaini romonkyagaitziri, ari niyaatzitanakyaari eejatzi naaka. Raminaitakeniri jitachari Julio jewatziriri owayeripaini pinkathariki Augusto, iriitake aanakerine. <sup>2</sup> Notetakotanakeri Adramitio-satzi niyaatero Asia-ki. Notsipatanakeri Aristarco Tesalónica-satzi saikat-siri Macedonia-ki. <sup>3</sup> Okanta okiteeshetamanai areetakena Sidón-ki, ari raripero-tapaakari Julio jirika Pablo, inintakaakeri rareetapaintyaari raapatziyanepaini impantawakyaariri koityiimotariri. <sup>4</sup> Irojatzzi nawisantanakeri Sidón-ki, ari itonkyotakena tampyaa, te onkantanaia namaatakote, iro nokenakotantanakeri othampishiki iitaitziro Chipre. <sup>5</sup> Naathakiryaaanakeri inkaare irojatzzi Cilicia-ki eejatzi Panfilia-ki. Areetakena Mira-ki, nampitsi saikatsiri Licia-ki. <sup>6</sup> Ari noñaapaake otsipa notetantanaiaari poñaachari Alejandría-ki iyaatero Italia-ki, ari rotetakenari jewari. <sup>7</sup> Osheki kiteesheri namaatakotake neetsikeroini. Osheki nopomeentsiwaitaka nareetantakeri Gnido-ki. Eekero itonkyotakotatyaana tampyaa, nimontyaakotanaka Salmón-ki, noshinampitapithatanakawo othampishi Creta. <sup>8</sup> Osheki opomeentsitaka namaatakotzi, irojatzzi nareetantakeri nampitsiki iitaitziro “Awochaaki”, eekaatapaira nampitsi Lasea.

<sup>9</sup> Awisake osheki kiteesheri namaatakotake, kyaawontsitai, koweenkatanake namaatakote. Irootake ikantantanakeri Pablo: \* <sup>10</sup> “Pinkemisantawakena, akoweenkatakotatziira amaatakotzi, aritake ampeyakero amaatakomentotsi, powaagawopaini, aritake ankamagaantake eejatzi.” <sup>11</sup> Iri kantacha reeware owayeripaini te ikemisantziri Pablo, iri ikemisantake ashitawori amaatakomentotsi eejatzi antakotzirori. <sup>12</sup> Te opantawo tsika raatakowetaka rowawisaantyaaworime kyaawontsi, ikowaiyakeni riyaaneenteme Fenice-ki saikatsiri eejatzi Creta-ki, eero oñaashirenkantari tampyaa kenayetatsiri kirinka eejatzi katonko. Ari ikowaiyakeni rowawisairome kyaawontsi.

### *Itampyaatakotzi inkaareki*

<sup>13</sup> Ikenkithashiryagaiyakani ari onkantakya ramaatakote tema owakera etapaakawo otampyaatzi eepichokiini. Ari nokenakotaiyanakeni othapyaaki Creta. <sup>14</sup> Iro osamanitake eepichokiini antawotapaake tampyaa, iitapiintaiyironi irirori “Euroclidón”, ookantapaakawo amaatakomentotsi, <sup>15</sup> otainkakotanakena. Te riyotzi jimpe inkantanairo ramaatakomento, rishinetanakeri otainkakotena tampyaa. <sup>16</sup> Osheki nopomeentsitakawo pitotsi thatainchari amaatakomentotsiki. Nokenakotanake othampishiki jitachari Clauda te otampyaaperotzi janta. <sup>17</sup> Ari noteyetakeri pitotsi amaatakomentotsiki. Tema ithaawantatyaawo rawikakotya impanekiki eentaatzira inkaare iitaitziro “Sirte”, rosoitanakeri omerekiki amaatakomentotsi eero ikotaanta. Rishinetanakeri otainkakotena tampyaa. <sup>18</sup> Okanta okiteeshetamanai, eekero oshintsitatzi otampyaatzi, ari retanakawo rowiinkakaantanake rowaagawo. <sup>19</sup> Okanta otsipa kiteesheri, rowiinkakeri tzimatsiri amaatakomentotsiki. <sup>20</sup> Osheki kiteesheri awisaintsiri te noñaayetairi ooryaa eejatzi impokiro. Antawoite notampyaatakotake te niyotaiyeni arika nawisakoyetai.

\* 27:9 Kantakotachari jaka “kyaawontsitai”, irojatzzi ikantakoitziri “ikaatapiintakeri ritziwentaiyani”.

<sup>21</sup> Awisake osheki kiteesheri te nowaawo, ikantanake Pablo: “Pinkemisantawakena, kameethawetaka arika pinkemisantakename irojatzi asaikeme Creta-ki. Eerome añaaetztiro okaatzi owaariperotakairi. <sup>22</sup> Iro kantzimaitacha, eero okantzimoneentzimi, tema eero pikamagaantawaitzi apaani, onkantawetya ompeya jiroka amaatakomentotsi. <sup>23</sup> Inkaaganki tsireniriki, noñaake maninkari, rotyaantanewo Pawa Ashitanari, nantawaitziniri, <sup>24</sup> ikantanake: ‘Pablo, eero pithaawi, ontzimatye pareetya iñeemi César itzinkamiperori Roma-ki. Ineshironkatemi Pawa eeroka powawisaakotantyaariri pitsipatakari jaka amaatakomentotsiki.’ <sup>25</sup> Ari ikantakenari. Iroowa pinthaamentashiretantyaari, tema nawentaashiretakari naaka Pawa, niyotake ari imatakya okaatzi ikamantakenari maninkari. <sup>26</sup> Iro kantacha ontzimatye otzitatoty othampishiki.”

<sup>27</sup> Okanta apaani tsireniri, tzimake 14 kiteesheri, areetakena inkaareki Adriático-ki otainkakotakena tampyaa. Niyankipaite tsireniri, ari ikaimaiyanakeni antakotzirori amaatakomentotsi ikenkithashiryagaiyani iro nareetaiya kipatsiki. <sup>28</sup> Rimonkaataiyakeroni jimpe iweyaa osaanaatzi, iñaatziro te osaanaaperotzi, rapiitakero eejatzi, iñaatziro eepichokiini osaanaatanai. † <sup>29</sup> Ithaawaiyini notzitatoty, rowiinkanake 4 owaatzinkerone amaatakomentotsi opataki, ari ramanaiyanakani onkiteeshetantyaari intsipaite. <sup>30</sup> Iri kantacha ikaatzi antakotzirori ikenkithashiryagaiyakani rishiye, rotetantanakyaawome pitotsi thatayetainchari, ramawenatanakawo rowiinkaiyeroni owaatzinkerone othowaki amaatakomentotsi. <sup>31</sup> Iri kantacha Pablo ikamantakeri jewari, eejatzi rowayerite, ikantakeri: “Arika rishiyake jirikapaini, eerowa pawisakoyetai eeroka.” <sup>32</sup> Ari ritotakotanakero owayeripaini pitotsi, rowamaatakero.

<sup>33</sup> Irootaintsi onkiteeshetzimate, ikantantake Pablo: “Tzimake 14 kiteesheri oyaawenta oita awisatsine, te powaiya eerokapaini. <sup>34</sup> Ontzimatye poya pañaantyaari, tema tekaatsi kamagaantatsine apaani.” ‡ <sup>35</sup> Riñaawaitakera Pablo, rayimotakeri pan, riwetharyaakari Pawa. Itzipetowakero, owanaka. <sup>36</sup> Irojatzi ithaamentantanakawori maawoini, owaiyanakani eejatzi. <sup>37</sup> Jiroka nokaataiyini notetaiyani 276 atziri. <sup>38</sup> Ikanta ikaatakerowa rowaiyani, rowiinkakoyetanakero owanawontsi othomakaneentantyaari tenari.

### *Tsitsiyakotake*

<sup>39</sup> Okanta okiteeshetamanai, jirikapaini antakotzirori, ikompitzimotapaakari kipatsi, iñaapaake eejatzi impaneki. Ari ikowanake raatakote janta. <sup>40</sup> Ritotakotanakero oosotantari owaatzinkirori amaatakomentotsi, rookanakero, itzinaayetanairo antawoite manthakintsi, riwetsikanairo iyomaro rikomatantyaari onkene raatakote impanekiiteki. § <sup>41</sup> Iro kantacha awikakotaiyapaakani othowaki eentaatzira inkaare, te onkantanaiya nishewatakote. Tankanake opataki ookantapaakawowa otamakaare inkaare. <sup>42</sup> Ari ikowawetanaka owayeripaini ritsitokanakerime omonkyagaarewo, eero rimaatantanaka rishiye. <sup>43</sup> Iri kantacha reeware owayeripaini, ikowake irirori rowawisaakoteri Pablo, te rishinetziri rowamagaiteri, apatziro ikantanake: “Ikaatzi yotzirori rimaare, rimaateeta riyaate kipatsikinta. <sup>44</sup> Iriima itsipapaini rontarekayetya inchakaakiki inkene rimaate.” Iroowa opoñaantari nawisakotantaari maawoini.

† 27:28 Kantakotachari jaka “te osaanaaperotzi”, irojatzi iitaitziri pairani 20 apishempate ashempa, ikantaitziri iroñaaka 36 metro. Kantakotachari eejatzi “eepichokiini osaanaatanai”, irojatzi iitaitziri pairani 15 apishempate ashempa, ikantaitziri iroñaaka 27 metro. ‡ 27:34 Kantakotachari jaka “tekaatsi kamagaantatsine apaani”, iro oshiyawori ikantaitziri eejatzi “eero opeyagaantawaita apaani kishitsi”. § 27:40 Kantakotachari jaka “itzi-naakotanairo antawoite manthakintsi”, iroowa ookantari tampyaa inkene rishiyakoyete otetantawori amaatakomentotsi.

## 28

### *Risaikake Pablo othampishiki jitachari Malta*

<sup>1</sup> Okanta nawisakoyetai maawoini, ari niyotaiyakeni jiroka othampishi oita Malta. <sup>2</sup> Ari raakameethatawakena maawoini nampiyetawori janta. Tema oparyaatzi inkani, katsinkaite okantaka, oishitapaaka, ikaimaiyakenani. <sup>3</sup> Jatanake eejatzi Pablo raye irirori tsitsi, iro ripiyawetapaaka rowapaakerome ritsima, shiyapaaka maanke, ratsikakeri rakoki. <sup>4</sup> Ikanta iñaayetakeri nampitawori janta rowikantapaakari, ikantawakaiyanakani: “Jirika atziri tsitokantaneri rinatzi. Okantawetaka rawisakowe-taawo ripiinkeme, temaita rishinetaitziri rañe.” \* <sup>5</sup> Iri kantacha Pablo rotekanakeri maanke paampariki. Tekaatzi awishimoterine. <sup>6</sup> Ikanta royaawentawetari raawaakayerime irojatzi inkamantyaari. Okanta osamanitake iñaitatziiri tekaatsi awishimoterine, ikantayetanai: “Pawa rinatzi jirika atziri.”

<sup>7</sup> Eenitatsi janta jewari nampitawori othampishiki jitachari Publio. Eenitatsi okaakiini rowane. Raakameethatakena maawoini raanakena janta. Mawa kiteesheri nisaikimowaitakeri. <sup>8</sup> Ari nokemakotakeri ipaapate Publio isaawakiwaitzi, ishi-waita. Ikyashitanakeri Pablo. Ikanta ramanakotakari, riterotantakariki rako, apathakero ikantanaka, retsiyatakotanai. <sup>9</sup> Rantakerowa jiroka, pokayetanake maawoini mantsiyari ikaatzi nampitawori janta othampishiki, retsiyatakotakaayetakeri. <sup>10</sup> Ari ipashitanakena osheki oitarika. Okanta notetanaa niyaatantaiyaari, ipayetawaana naayetanaari.

### *Areetaawo Pablo Roma-ki*

<sup>11</sup> Okanta nisaikanake mawa kashiri janta othampishiki, ari notetanaari otsipaki amaatakomentotsi, owawisaakerori kyaawontsi janta. Opoñaawo jiroka amaatakomentotsi Alejandría-ki. Riwetsikaitakeniro iwawanetashitaitari othowaki roshiyakaawo “Tsipari”. † <sup>12</sup> Ari nareetaiyakani Siracusa-ki, mawa kiteesheri nisaikanake janta. <sup>13</sup> Irojatzi nawisantanakariki janta irojatzi nareetantakariki Regio-ki. Okanta okiteeshetamanai, okamintha itasonkakotakena tampyaa kenatsiri katonko, irojatzi nareetantakariki Puteoli-ki otsipa kiteesheri. <sup>14</sup> Ari noñaapaake iyekipaini, ikantawakena nisaikawaitanake. Iro nisaikimowaitantanakariki okaatzi 7 kiteesheri. Ari nompoñaanaiyaari irojatzi nareetantyaari Roma-ki. <sup>15</sup> Ikanta ikemakotaiyakenani iyekipaini nampitawori Roma-ki, ritonkyotawakena awotsiki iitaitziro “Apio” tsika riyomparitaitapiinta. Okanta janta iitaitziri “Mawapanko”, ari royaawentakena itsipa. Ikanta Pablo iñaayetapaakeri iyekipaini, riwetharyaanakariki Pawa, thaamentashire ikantanaka. <sup>16</sup> Areetapaakena Roma-ki. Ikanta reeware owayeripaini rowawisaapaakeniriki itsipa reeware maawoini omonkyagaarewo. Iriima Pablo rishinetakeri risaikawaitapaake tsikarika ikowiro, apaani owayeri kempoyiiriri.

### *Ikenkithatakaantzi Pablo janta Roma-ki*

<sup>17</sup> Okanta awisake mawa kiteesheri nareetapaaka, rapatotapaakeri Pablo iriiperoripaini Judá-ite nampitawori Roma-ki. Ikantakeri: “Iyekiite, pairanitake raakaantawaitakena asheninkapaini janta Jerusalén-ki, rowawisaakena reewareki Roma-satzi. Iroowa rantakeri, okantawetaka tekaatsi nantzimowetyaari, te nokoshekawetawo okaatzi rameyeteri pairani acharinepaini. <sup>18</sup> Osheki rosampiwetakenari reewarepaini Roma-satzi janta, te iñaashitawo nonkenakaashityaari ompoñaantyaari ripasatakaantantenari. Ikowawetaka rapankaakaantainame. <sup>19</sup> Temaita ikowaiyini asheninkapaini Judá-ite. Irootake nokowakotantakariki pinkathari janta rotyaantena jaka, iriitakera

\* 28:4 Irootake ikantakeri, tema roshiyakaatzi atziripaini iri Pawa otyaantakeniriki maanke, rowasanketeri.

† 28:11 Ikantaitziri jaka “Tsipari”, iroowa iwairo apite itomipaini iwawanetashitaitari jitachari Júpiter, Cástor eejatzi Pólux.

wetsikakotenane pinkathari César. Iro kantacha te iro nipokantari jaka niyakowentero asheninkapaini Jerusalén-satzi. <sup>20</sup> Iroowa napatotantzimiri eerokapaini nonkamantemiro. Nonkenkithatakotairi oyaakoneentanewo iyeetaira Israel-iite, iroowa piñaantakenari jaka roosotantaitanawo kotsirotha.” <sup>21</sup> Ari ikantaiyanakeni irirori: “Te noñi naaka rosankenatakotemi poñaachane Judea-ki. Tekaatsi nonkemakotemiri rareeyewetaga asheninkapaini jaka. <sup>22</sup> Apatziro nokemakowentakeri ikenkithatakoitziri kemisantashiwaitachari. Nokowi nonkememi jimpe pikantzi eeroka.”

<sup>23</sup> Ikenkithashiryagaiyanakani rapatotya otsipaki kiteesheri. Ari ipiyowentaiyakarini osheki atziri rimaapiintzira Pablo. Ikenkithatakotakeniri tsika ikanta Pawa ipinkathariwentantai, roñaagakeri rosankenatakotaga Jesús, retanakawo rosankenareki Moisés-ni irojatzi rosankenayetakeri Kamantantaneriite. Tema retanakawo okiteeshetamanaira irojatzi ishaawiiteeni. <sup>24</sup> Eenitatsi kemisantawakeriri, iriima itsipapaini, te. <sup>25</sup> Te raapatziyawakaiyani, apawopaini riyaaayanai. Riweyaantawaari Pablo ikantawairi: “Jiroka ikantaitakeriri pairani picharinepaini, ikenkithawaitakaakeri Tasorenkantsi Kamantantaneri Isaías-ni, ikantakeri:

<sup>26</sup> Piyaate, pinkanteri jirika atziripaini:  
Pinkemaiyawetyaani, eeromaita pikemathatziro.

Paminaiyawetyaani, eeromaita piñiuro.

<sup>27</sup> Tema kisoshire ikantaiyakani jirikapaini.

Witakempitari rinaiyakeni.

Mawityaakiri rinaiyakeni eejatzi.

Irootake kaari iñaantaiyawoni.

Kaari ikemantaiyani,

Kaari ikenkithashiretantaiyani,

Te inkemisantaiyeni, eero nowawisaakotairi.

<sup>28</sup> Piyotaiyeroni eeroka jiroka, aritake rowawisaakoyetairi Pawa kaari asheninkata. Aritake inkemisantayetai irirori.” <sup>29</sup> Ikantakerowa Pablo jiroka ñaantsi, jataiyanakeni isheninkapaini Judá-ite, osheki riñaanaminthatawakaanaka.

<sup>30</sup> Ari risaikapairi Pablo okaatzi apite osarentsi. Ari raakameethatapiintakeri ikaatzi areeyetariri. <sup>31</sup> Ari ikenkithatakotapiintakero ipinkathariwentantai Pawa, riyotaan-tapiintakotairi eejatzi Awinkatharite Jesucristo. Tekaatsi oñaashirenkawaiterine.



## ROSANKENARE PABLO ROTYAANTZINIRI ROMA-SATZI

### *Wethataantsi*

<sup>1</sup> Naaka Pablo osankenatzimirori, rimperatanewo Jesucristo nini, tema iri kaimashiretakenari notyaantaperorite, irijatzi owakenari nonkamantantero Kameethari Ñaantsi kenkithatakotziriri Pawa. <sup>2</sup> Jiroka Kameethari Ñaantsi iroowa ikowakaantakeri Pawa, ikenkithatakotakeri pairani Kamantantaneri Osankenatasorentsiki, <sup>3</sup> jimpe ikantakota Itomi, Awinkatharite Jesucristo, roshiyapaakari eenchaaniki itzimapaake icharinetawakari David-ni. <sup>4</sup> Ikanta rañagaira pairani, ari iñagaitairi Itomi Pawa rini oshekitzimotziri ishintsinka, tasorentsishireri rini. <sup>5</sup> Ikamintha Cristo opoñaantaari ineshironkataana Pawa. Iriitake owakenari notyaantaperoritai, nonkamantayetairi itsipasatzi atziri kaari asheninkata, inkemisantayetai iriroripaini. <sup>6</sup> Eejatzi eerokapaini Roma-satzi, ari akaatzitaka ikaimashiretai Jesucristo. <sup>7</sup> Ikaimashireyetaimi pinkiteshireyetai pikaatzira pinampitawo Roma-ki. Retakotanewo Pawa pinayetzi. Onkamintha ineshironkataimi Ashitairi Pawa, eejatzi Awinkatharite Jesucristo, piñaayetairo kameetha pisaikayetai.

### *Ikowi Pablo rareetyaari Roma-satzi*

<sup>8</sup> Jiroka netawakyaari nonkante: Niwetharyaari Pawa, okantakaantziro okaatziri rantakeri Jesucristo. Niwetharyaakowentzimi eerokapaini, tema ithonka ikemakoitakemi tsika pikantayetanaa pikemisantayetaira. <sup>9</sup> Ari nokantapiintatya namanakotapiintzimi. Iriira Pawa yotatsi, nantawaiperotainiri nokenkithatakotanairo Kameethari Ñaantsi ikenkithatakotaga Itomi. <sup>10</sup> Arika namañaari, nokowakotziri rishinetena niyaate pisaikaiyinira eerokapaini, iroorika inkowakaakenari. <sup>11</sup> Tema nokowakitake noñaayetemi. Nokowi noneshironkatemi ompoñaantyaari paawyaashirewaitantyaari. <sup>12</sup> Iroowa nonthaamentakantemiri eeroka, piñaakenarika jimpe nokanta nawentaashiretari Cristo. Ari pinthaamentakainari naaka, noñaakemirika eerokapaini tsika pikanta pawentaashiretaarira.

<sup>13</sup> Iyekiite, nokowi piyotaiyeni iro nokenkithashiretapiintaka niyaate pisaikaiyinira eeroka noñeemi pinthaamentayetaiya, noshiyakaakeri itsipasatzi atziri. Iro kantacha, osheki otzikatzikatapiintakenari. <sup>14</sup> Iro kantacha ontzimatye niyaatashiyetairi Grecia-thatotatsiri, kaari Grecia-thatotatsine, yowaiyetatsiri, eejatzi kaari yowaitatsine. <sup>15</sup> Irootake nokowantari nonkenkithatakotairo Kameethari Ñaantsi janta pinampiki eerokapaini Roma-satzi.

### *Ishintsinka Pawa owawisaakotantatsiri*

<sup>16</sup> Te nokaaniwentziro naaka nonkenkithakotero Kameethari Ñaantsi. Tema iro oshiyawori ishintsinka Pawa, iro owawisaakoshiretairine maawoini kemisan-tayetaatsine. Ari nokantakero naaka no-judá-iteyetzira, naakatake etakawo nokemisan-tanake, irojatziri rimpoitantapaakari Grecia-thatotatsiri. <sup>17</sup> Tema iro Kameethari Ñaantsi kenkithatakotziriri Pawa tsika ikanta ikameethashiretakagairi atziripaini. Ari ikan-takaanta irirori rawentaashiretitanakyaaririka. Tema iro rosankenaitantakawori, kantatsiri:

Kameethashireri inkantya awentaashireri, ari iñagairo rañaantaiyaawo.

### *Kaariperoshireri rini atziripaini*

<sup>18</sup> Iriima atziripaini kaari tampatzikashireyetatsine, thainkatasorentsitsatsiri, ikisaneentaperotakeri Pawa, roñaagantakero imashirenkaa inkiteki. Tema jirikapaini

kaariperoshiretapiintatsiri, oshiyawaitakawo rotzikayetatyeeerome irooperori eero riyotakoitawo. <sup>19</sup> Tema riyotakowetari iriroripaini Pawa. Iriira Pawa kantakaawori riyotakowetantakariri. <sup>20</sup> Tema owakera retanakawo Pawa riwetsikakero kipatsi, ari riyoteme atziripaini eenitatsi Pawa, iñaayewetakawo riwetsikanewo. Ompoñaantyaarime inkenkithashiretyaame oshekitzimotziri Pawa ishintsinka, kañaaneri rini irirori. Tekaatsira otekañaanetachane iroñaaka, inkantayetai: “Te niyotero.” <sup>21</sup> Riyotakowetaiyarini Pawa, temaita ipinkathatapiintairi, te riwetharyaapiintaari eejatzi. Apatziro ikenkithashiretakotashitapiintawo kaariperotatsiri, iro kaari inkenkithashiretantawo kameethatatsiri. <sup>22</sup> Ikantawetaiyani: “Yotaneri nini,” iro kantacha masontzishireri rinayetzi. <sup>23</sup> Iro opoñaantari ripakairo ipinkathawetari Pawa, Kañaanetatsiri. Ari retanakawo ipinkathayetziro wetsikaantsi roshiyakaawo atziri, tsimeryaani, tsimeripaini, eejatzi ikaatzira anashiyetachari kipatsiki.

<sup>24</sup> Iro rishinetantakariri Pawa jirikapaini ayimaneenteri iyaariperonka. Iro rantantapiintawori onkaate inkaaniwenterime. <sup>25</sup> Ripakaashitanakawo ikemisantawetawo riñaane Pawa irooperotatsiri, apatziro ikemisantanakero thaiyaantsi. Ipinkathayetanakero riwetsikaitane, oshiyawaitakawo iroome imperatyaarineme. Temaita ipinkathatanairi Pawa wetsikayetakerori maawoini jiroka, tsika itzimi apinkathatapiintziri aakapaini. Ari onkantaitatyeeyaani.

<sup>26</sup> Iroowa rishinetantakariri Pawa jirikapaini ayimawaiteri iñaamatashiwaitanewo. Iro rantantapiintakawori okaatzi inkaaniwenterime. Tzimanake tsinane pankenatawakaachari otsinanenkakiini. <sup>27</sup> Tzimanake eejatzi shirampari pankenatawakaachari, iro iñaamakiperoyetaka impankenatawakaiya ishiramparinkakiini, rantayetanakero inkaaniwenterime. Irijatzira owasankewaitainchari okantakaantziro ikenakaashiwaitakari.

<sup>28</sup> Iroowa rishinetantakariri Pawa jirikapaini ayimawaiteri iyaariperonka, iro rantantayetakawori kaari kameethatatsine. Tema te inkenkithashiretakotairi Pawa. <sup>29</sup> Iroowa rantapiintanake kaari tampatzikatatsine, imayempiwaitzi, ipankenawaitanta, iñaamakiperowaitari koriki, rantayetziro koweenkayetatsiri, iñaamatakotantawaita, ritsitokantawaitake, ikoshekawakaawaita, ramatawitantawaitzi, ikaweyantawaitzi, <sup>30</sup> ikishimatantawaitzi, ithaiyakotawakaawaita, ikisaneentawaitziri Pawa, ikaweyawootantawaitzi, ishamewaitzi, iñaaperowaita, riyotashiwaitawo kaariperotatsiri, ripiyathatari ashitariri, <sup>31</sup> imasontzishirewaitzi, te rimonkaawainetzi, te inethaantanetzi, te rariperotantzi, te ineshironkatantzi. <sup>32</sup> Riyowetaiyawoni jirikapaini Inintakaantakeri Pawa, ikantake: “Inkaate antakerone jirokapaini, inkamayetai.” Iro kantacha, eekero rantapiintanakitziro, iñaamatakaayetakari itsipapaini rantayetero.

## 2

### *Tampatzikashireri rini Pawa arika riyakowentante*

<sup>1</sup> Aamaa pinkantashirewaite eeroka, pinkante: “Ontzimatyee rowasanketaiteri jirikapaini ikaariperotakera.” Eero pikantantawaitzi. Tema arika piyakowentawaiteri itsipa atziri, eerokatake yakowentaincha. Tema pantapiintzitawo eeroka kaariperori. <sup>2</sup> Iro kantacha ayotaiyini aaka tampatzikashireri rini Pawa arika riyakowentante. Iri owasanketerine ikaatzi antakerori jiroka. <sup>3</sup> Eerokapaini patzirinkakiini, pikantapiintaiyini, “Rowasanketaiteri jirikapaini kaariperotatsiri,” ¿Piñaajaantakema eero rowasanketaimi eeroka Pawa? <sup>4</sup> ¿Pimanintatziirima jirika neshironkakitakemiri, oyaakoneentzimiriri, amatsinkawentzimiriri eejatzi? ¿Tema piyotakotero iro ramatsinkawentantzimiriri ripakaakaantemirori piyaariperonka? <sup>5</sup> Eerome pipakagairome piyaariperonka, ari patsipetaiyaawome iyatsimanka Pawa. Tema paata, arika roñaagantairo

iyatsimanka, riyakowentairorika maawoini, tampatzika inkantaiya rowasanketan-tayetai. <sup>6</sup> Oshiyawaityaawo ripinaitaateerome maawoini rantaitakeri. <sup>7</sup> Iri Pawa añaakaayetairine ikaatzi kamaitanaawori kameethari, iro iñaashiretantakawori rowaneenkawo, iñaashiretakero impinkathaitairi, iñaashiretakero ashi rowaatyeero rañaayetai. <sup>8</sup> Iro kantacha, katsimaki inkantaiya Pawa rowasanketairi ikaatzi kamaitapiintakawori iñaamatashiwaitari, piyathawaitakariri, manintawaitakerori irooperotatsiri. <sup>9</sup> Inkemaatsiwaitaiya, rowashirekitaiya maawoini kamaitapiintakawori kaariperori. Iri etanakyaawone nosheninkapaini Judá-ite, rimpoitapaake Grecia-thatotatsiri. <sup>10</sup> Iriima kamaitapiintakawori kameethari, rowaneenkayetaiya, impinkathaitairi, kameetha risaikayetai. Iri etanakyaawone nosheninkapaini Judá-ite, rimpoitapaake Grecia-thatotatsiri. <sup>11</sup> Tema tekaatsi atziri ramaakite Pawa.

<sup>12</sup> Maawoini kaari kemakoterone Inintakaantaitanewo, ari ompeyakaashitaiyaari iyaariperonka, tema eero raminakoitairi rimonkaatakerorika Inintakaantaitanewo. Iriima ikaatzi kemakowetakawori, ari raminakoitairi rimonkaatakerorika. <sup>13</sup> Tema ikaatzira kemakowetakawori Inintakaantaitanewo, kaarira jirika tampatzikashiretzimoterine Pawa. Iri tampatzikashiretzimotakerori monkaayetakerori. <sup>14</sup> Jirikapaini kaari nosheninkaweta, kaari kemakowetyaawone Inintakaantaitakeri rosankenatakeri Moisés-ni, kaari ñeerone tsika osankenata, iro kantacha rimonkaaminthawaitashitakawo. Oshiyawaitakawo ontzimatyeeeme otsipa Inintakaantaitanewo rashityaarime irirori. <sup>15</sup> Oshiyawaitakawo osankenashiretantatyeeaarime jiroka Inintakaantaitanewo, tema riyoyetziro oita rantayeteri. Arika rimonkaatairo, kimoshire inkantaiya. Eerorika rimonkaatziro, oshiyawaitakawo apaniroinime riyakowentawaitaka, tema riyotaka ikaariperowaitake. <sup>16</sup> Iroowa rantaiteri paata arika inkantairi Pawa jirika Jesucristo: “Paminakotairo maawoini rantayetakeri rimananeekiini atziripaini.” Iro nokantapiintakeri nokenkithatakotzirowa Kameethari Ñaantsi.

### *Judá-ite eejatzi Inintakaantaitanewo*

<sup>17</sup> Pinkeme nosheninkaite Judá-ite. Aamaaka pinkantaiyawetakyaani eerokapaini, pinkante: “Niyotakotziro Inintakaantaitanewo. Niyotzitari Pawa. <sup>18</sup> Niyotziro okaatzi ikowiri. Niyotziro tampatzikatatsiri, tema riyotagaitakenawo Inintakaantaitanewo. <sup>19</sup> Ari niyotaakeri kaari yoterone, oshiyakariri mawityaakiri, noshiyakairo noitesheenkatakotaateerime saikayetatsiri otsirenikitziro. <sup>20</sup> Ari niyotaakeri masontzishireri. Kantacha niyotairi kaari yowaitatsine, oshiyawaitakariri eenchaaniki. Tema oshekitzimotana Inintakaantaitanewo. Iro yotanetakaantachari.” <sup>21</sup> Imaperotatyeeyaame piyotayerime itsipasatzi, ¿iyomatsitakemima eeroka? Pikantapiintake: “Eero pikoshitzi.” ¿Tema pikoshitzi eeroka? <sup>22</sup> Pikantapiintake: “Eero pimayempitzi.” ¿Tema pimayempitzi eeroka? Pikantapiintake: “Eero pipinkathatziri oshiyakaawontsi.” ¿Tema pikoshitziri eeroka rashitakagaitariri tasorentsi? <sup>23</sup> Pishamewaitake eeroka piyotakotziro Inintakaantaitanewo. ¿Tema pipiyathatawo eeroka? Pithainkakeri Pawa. <sup>24</sup> Jiroka rosankenaitakeri, kantatsiri: Eerokapaini kantakaantakawori rithainkatasorentsitantakari itsipasatzi atziripaini, raakowaitashitawo iwairo Pawa.

<sup>25</sup> Ikaatzi monkaatairori Inintakaantaitanewo, kameethawetaka ritomeshaanitya, iro oshiyakaawentzirori rashiyetaari Pawa. Iro kantacha terika rimonkaayetairo Inintakaantaitanewo, aminaashiwaitaka ritomeshaanita. <sup>26</sup> Iriima itsipasatzi kaari asheninkata, kaari tomeshaanitachane, arika rimonkaaminthataashityaawo Inintakaantaitanewo, iriitake oshiyaperotanaariri tomeshaaniri, rashiperotaari Pawa. <sup>27</sup> Jirika kaari tomeshaaniri monkaaminthataashitakawori Inintakaantaitanewo, iri aminakotaimine paata imaperorika pimonkaatziro piyotakotziri, pipiyathatakaworika, iri yakowentemine, rowasanketakaanemi, okantawetaka tomeshaaniri pinawetaka

eeroka. <sup>28</sup> Tsika akantayeta koñaawoini awathaki, te iro kantakaanterone aitaga “Judá-ite”. Ari oshiyakawo atominthawaitashitapiintakawo awatha, te iro kantakaanterone aitantakari “tomeshaaniri”. <sup>29</sup> Opoñaantari a-judá-iteyetzira iro kantakaantzirori tsika akantayeta ashireki. Ari oshiyawo eejatzi añaantakawori atomeshaanita, iroowa kantakaantzirori oshiretari. Te iro amonkaaminthawaitashitanyawori osankenatachari, rasagaawentantairi asheninkapaini. Tema oshiretaarira Pawa, ari rasagaawentairi irirori.

### 3

<sup>1</sup> Aamaaka pinkante eerokapaini: ¿Tekaatsima pantyaawone a-judá-itetzira? ¿Iitakakya atomeshaanitantari? <sup>2</sup> Nokantzi naaka: Oshekira akameethatzi aakapaini. Jiroka etanakawori: iri acharineete retakari Pawa riñaanatakeri. <sup>3</sup> Iro kantacha tzimatsi acharineete kaari oisokerotariri Pawa. ¿Irooma ompoñaantyaari Pawa ripakayero roisokerotante? <sup>4</sup> Te ari onkantya. Okantawetaka ithaiyanewetaka maawoini atziripaini, Pawa irirori te ithaiyaneta. Ari okantzi rosankenaitakeri, kantatsiri:

Ari pikantatya eeroka, tampatzikañaaneri pini,  
Tzimatsirika raminakoitemiri, ari pawisantakeme eeroka.

<sup>5</sup> Tema antapiintzirowa kaariperori, oñaagantziro tampatzikashireri rini Pawa. Aamaaka ankante: Iro noyaariperonka oñaagantziro ikameethaperotake Pawa, ¿Oitakama rowasankewentantenawori oñaagantziro itampatzikashiretzi irirori? Kaariitsikya tampatzikashireri. (Irootake akenkithashirewaitari aakapaini atziritzira.) <sup>6</sup> Te ari onkantzimaitya. Eerome itampatzikashiretzime Pawa, eero riyotzime raminakotairi isaawikisatzipaini. <sup>7</sup> Ari ankantanakeme: ¿Oitaka rowasanketantenari Pawa nothaiyaga, tema nothaiyapiintaga iro ipinkathataitantariri Pawa te ithaiyaneta irirori? <sup>8</sup> Ankantanakeme eejatzi: ¡Thame ankaariperote! tema iro oñaaganterone kameethari. (Iro riyakowentaitakenari naaka nokenkithatakotakerowa oshiyakawori jiroka, imaperotatya.) Iro kantzimaitacha kameethatzi rowasanketaiteri ikaatzi kenkithatakotzirori jiroka.

#### *Tekaatsi tampatzikashireri*

<sup>9</sup> ¿Irooma kantakotachari jaka, a-judá-iteyetzira aakapaini te opantaperotai, eero okanta awisayeteri itsipasatzipaini? Te ari onkantya. Aritake nokamantzitakemi ketziroini. Maawoini akaataiyakenira, oshiyawaitakawo ompeyakaashitaima ayaariperonka, okantawetaka a-judá-itetzira eejatzi kaari Judá-itetatsine. <sup>10</sup> Ari osankenatakotaka, kantatsiri:

Tekaatsi tampatzikashireri,  
Tekaachaatsikaini apaani.

<sup>11</sup> Tekaatsi kemathawaitaneri.  
Tekaatsi kowatsine riyotairi Pawa.

<sup>12</sup> Rithonka ripiyashiretaiyakani, tekaatsi pantaiyaarine.  
Tekaatsi matairone inkameethashiretai.

Tekaachaatsikaini apaani.

<sup>13</sup> Kaariperoñaanewaitake, oshiyawaitakawo ithano omoonaki ikitaitzirira kaminkari.  
Amenenetaka ithaiyawaita,

Kepiyawaantewaitake roshiyawaitakari maanke.

<sup>14</sup> Tema ikishimawaitantzi, ikaweyantayetzira.

<sup>15</sup> Ameyitzitaka riyayetzira ritsitokante, inkapathainkatakaante.

<sup>16</sup> Ipampithawokitapiintziro tsika ikenaitzi rithonkaatantaitzi,  
Ikowi inkemaatsitakaantawaitya.

<sup>17</sup> Te ipampithatziro jatachari isaikayetzira kameethari.

<sup>18</sup> Te ipinkathaakitziro Pawa.

<sup>19</sup> Ayotzi ari riyakowentairi Pawa maawoini pankenawaitakawori Inintakaan-taitakeri pairani. Eero rotekañaaneta inkante: “Te namaakiwaitziro.” <sup>20</sup> Tekaatsi materone rimonkaatero Inintakaan-taitakeri pairani, iro inkantantyaariri Pawa: “Tampatzikashireri nini.” Arika riyotakoperoitairo Inintakaan-taitakeri pairani, ari riyotakoitairo osheki akaariperotake.

### *Pawa otampatzikashiretairi arika awentaashiretaiyaari*

<sup>21</sup> Iro kantacha, owakera roñaagairo Pawa antampatzikashiretantaiyaari. Te oshiyawo pairani, apankenawaitashitakawo Inintakaan-taitakeri pairani antampatzikashiretantaiyaarime. Iro rosankenayetakeri Kamantantanneriite, irojatzi rosankenaitakeri Inintakaan-taitakeri pairani. <sup>22</sup> Iri Pawa otampatzikashiretaine, arika awentaashiretanaiyaari Jesucristo, ankemisantanairi irirori. Te apashiniyetzi eejatzi oshiyari itsipapaini, <sup>23</sup> maawoini akaariperoshireyetzi. Eero añaayetairo rowaneenkawo Pawa. <sup>24</sup> Iri kantacha Pawa, rotampatzikashireyetai, ineshironkakitai irirori rotyaantairi Cristo Jesús ripinawentayetai aakapaini. <sup>25</sup> Rotyaantakairi Cristo ikapathainkawentakai rowamagaitakerira, roitsimaryagairi Pawa awentaashiretaari. Iroowa rantantakawori Pawa jiroka, iñaantaityaariri rashi rowatziro itampatzikashiretzi irirori. Pairani Pawa osheki ikisashiwetakawo iyaariperonka atziripaini, amaaki ikantapiintawetakawo. <sup>26</sup> Iroowa iroñaaka, oshiyawaitakawo roshetapithatakityairome ayaariperonka, rotampatzikashireyetai. Tema tampatzikashireri rini irirori, iroowa intampatzikashiretakaantyaariri eejatzi ikaatzi awentaashiretaariri Jesús.

<sup>27</sup> ¿Eenitatsima ashamewentairi? Tekaatsi. ¿Oitakama? ¿Iroowa kantakaawori te itzimi monkaaterone Inintakaan-taitakeri pairani? Te, iroowa kantakaantzirori awentaashirenka. <sup>28</sup> Eero okanta ishamewaite tampatzikashireri, tema te roitsinampairo ipankenawaitakawowa Inintakaan-taitakeri pairani. Apatziro rimataitziro rawentaashiretairi Cristo. <sup>29</sup> ¿Apatziroma aakapaini a-judá-iteyetzira rantzimotairo Pawa? Te. Ari akaatzitari kaari asheninkayeta, rantzimoyetairo maawoini. <sup>30</sup> Tema Pawa apaani ikanta, rotampatzikashireyetai aakapaini, ari inkantayetairi eejatzi kaari tomeshaan-itachane. <sup>31</sup> ¿Nomanintatziroma Inintakaan-taitakeri pairani nokenkithatakotakerowa awentaashirenkantsi? ¡Te ari onkantya! Irooperowa jiroka.

## 4

### *Roshiyakaawentantzi Abraham*

<sup>1</sup> Thame ankenkithashiretakoteri acharine Abraham-ni. ¿Tsika ikantaitakerika irirori itampatzikashiretantaari? <sup>2</sup> Iroome impankenatakyaame Abraham-ni tampatzikashiretakairineme, ari ishamewaitakeme. Eeromaita ishamewentairime Pawa irirori. <sup>3</sup> Jiroka okantzi Osankenarentsiperor:

Rawentaakari Abraham Pawa, iro roshiyakaantakariri rotampatzikashiretanewo.

<sup>4</sup> Thame oshiyakaawentawakero: Ripinaitziri apaani atziri rantawaite. Te ineshironkatashitaitari ripinaitziri, rireewetaitatziiri rantawaitakera. <sup>5</sup> Iriima kaari antawai-tatsine, arika ripinatashitaityaari, apatziro ineshironkatashitaitari jirika. Ari ikantzitari atziri thainkatasorentsiwaitatsiri pairani, rawentaashiretaari Pawa, ari rotampatzikashiretairi. Ari ineshironkatairi rawentaashiretaarira, te impankenawentyaawo rimatantaawori. <sup>6</sup> Rimatakeror David-ni ikenkithatakotzitakawo inkimoshiretakairi Pawa rotampatzikashiretanewo, kaari ñaashintsiwentyaawone, ikantake:

<sup>7</sup> Kimoshire inkantaiya atziri ipeyakoitairi ikaariperowetakaga, Oshiyawaitaawo rimanakoitatyeenirime iyaariperonka.

<sup>8</sup> Kimoshire inkantaiya atziri, rariperotairi Pawa ikaariperowetakaga.



<sup>9</sup> Jirikapaini kimoshiretaatsine, ¿Apatziroma aakapaini akaatzira iyeetai “tomeshaanitzinkari?” Te, ari roshiyayetai eejatzi kaari tomeshaanitachane. Pinkenkithashiretero akantakeri:

Rawentaanaka Abraham, iro roshiyakaantakariri rotampatzikashiretanewo.

<sup>10</sup> ¿Tsikapaiteka roshiyakagairi Pawa jirika Abraham-ni rotampatzikashiretanewo? ¿Aripaitema rimatakero ritomeshaanitakaga? ¡Tera! <sup>11</sup> Owakeraga rimpoitairo Abraham-ni ritomeshaanita. Arika ompirotanake ritomeshaanitakaga riyotaitzi rawentaitari Pawa. Iri kantacha Abraham-ni rawentaitzitakari ketziroini Pawa, rotampatzikashiret-zitakari tekera ritomeshaanitaata. Ari ikantaka Abraham-ni retantakawori rotampatzikashiretaitziri. Iro roshiyakagaitantakariri iriime charinetyaaririme maawoini tampatzikashireripaini, te onkowiya ritomeshaanitaitya. <sup>12</sup> Imaperowetatya iyeetai aakapaini “ritomeshaanitaitane” aakatake icharineperotane Abraham-ni, akaatzira eejatzi ritomeshaanitaitai. Iro kantacha te oshiyakotari ikanta ritomeshaanitaitane. Tema oshiyakotatyaari awentaashiretanaariri Pawa, tsika ikanta irirori Abraham-ni rawentaashiretakari tekera ritomeshaanitaitziriita.

*Iro awentaashirenka añaaantaiyaawori ikashaakaakairi*

<sup>13</sup> Ikantakeri Pawa pairani Abraham-ni rashitakayaari maawoini kipatsi. Irootake ikashaakaakeriri charinetyaarine. Tema ikantzitakawo Pawa tekera osankenatyaata Inintakaantaitakeri. Apatziro rawentaashiretaka Abraham-ni. <sup>14</sup> Inkaate ñaayetairone ikashaakaantane Pawa, kaari jirikapaini pankenawaitashitawori rimonkaatero Inintakaantaitakeri pairani. Arime onkantyaame, aminaashiwaityaame awentaashiretarira Pawa, tekaatsi pantyaawoneme okaatzi ikashaakaakairi. <sup>15</sup> Itzimirika tzi-mawentzirori rimonkaatero Inintakaantaitakeri pairani, apatziro iñeero rowatsimairi Pawa tera rimatziro. Eerome otzimakeme Inintakaantaitakeri pairani, eero otzimime eejatzi iyenakaashitanewo.

<sup>16</sup> Iri ñaayetairone ikashaakaantziri Pawa, ikaatzi awentaashiretaariri ineshironkakitantzi irirori. Ari onkantya iñaaantaiyaawori maawoini icharineyetai, te apatziro añaaayetairo aakapaini a-judá-itetzira, ipaitakeri Inintakaantaitakeri pairani, tema maawoini inkaate awentaashiretaiyaarine Pawa, oshiyakotaariri Abraham-ni. Oshiyawaitaawo incharineyetaiyame Abraham-ni maawoini aakapaini. <sup>17</sup> Iro rosankenaitantakawori, kantatsiri:

Ari noshekyagaimiri charinetemine, eero okantaawo riyoyetairi isheninkapaini, tema ripookaiyanakenira.

Irootake ikashaakaantziri Pawa. Iro rawentaashiretantakariri Abraham-ni. Imaperotatya rimonkaatairo Pawa jiroka, tema kantacha irirori rañaakaayetairi kamayetatsiri, irijatzi wetsikayetakerori kaari tzi-mawetachane pairani. <sup>18</sup> Jiroka ikantakeri Abraham-ni: “Ari noshekyagaimiri charinetemine.” Iro ikemisantantakariri Abraham-ni, okantawetaka osheki ikompitzimotakariri inkemisantantyaariri. <sup>19</sup> Te ripakaaneentziro eepichokiini rawentaashiretanaka. Eekero ikenkithashiretakotapiintatziro jiroka, ikantzi: “¿Tsika onkantyaaka jiroka? Tzimake 100 nosarentsite, irootaintsi nonkame. Jiroka noina Sara, te owaiyaneta.” <sup>20</sup> Ari okanta ikenkithashirewetaka, te ikisoshirewentziro ikantakeriri Pawa, te okantzimoneentawaitari rawentaashiretakarira. Eekero riyataakanakitziro rawentaaperotanakariri, ari ikantapiintanakitziro ithaamentapiintanaka. <sup>21</sup> Riyoperotake Abraham-ni ari rimatakero Pawa okaatzi ikantakeriri. <sup>22</sup> Iro roshiyakaantaariri rotampatzikashiretanewo. <sup>23</sup> Rosankenatantaakawori Pawa tsika okantakota jiroka. Te rosankenatashityaawo ampinkathatantyaariri Abraham-ni. <sup>24</sup> Iroowa rosankenatantakawori ompoñaantyaari riyotantaityaari roshiyakagairi rotampatzikashiretanewo eejatzi aakapaini, arika awentaashiretanaiyaari owañagairiri Awinkatharite Jesucristo ikamawetakaga. <sup>25</sup> Tema iri Cristo

kamawentakairi aakapaini, okantakaantziro akaariperowaitake. Irijatzi Cristo añagaatsi rotampatzikashireyetantakairi.

## 5

### *Itampatzikashiretantaitari*

<sup>1</sup> Jiroka okantaka. Iroowa awentaashirenka tampatzikashiretakaayetairi. Irootake ariperotantaariri Pawa. Irijatzi Jesucristo matakaayetairori jiroka. <sup>2</sup> Tema awentaashiretaarira Jesucristo, riyotakagairo ineshironkatanewo Pawa anayetai. Kimoshire ankantya añaaayetairo paata rowaneenkawo Pawa. <sup>3</sup> Iro kantzimaitacha te apatziro ankimoshirewentero jiroka, ankimoshirewentzityaawo eejatzi awishimoyetaine. Tema ayotaiyini arika añaaayetero ankemaatsiwaitya, iro ompoñaantyaari ankamaitanetya. <sup>4</sup> Arika ankamaitapiintanete, ari aawyaashirewaitake. Arika aawyaashirewaitanete ari awentaaperotaiyaari oyaakoneentanewo. <sup>5</sup> Eero rami-naakaashiwaitai oyaakoneentanewo. Añaakero retakoperotakai Pawa, rotyaantakairi Itasorenka oshiyawaitakawo risakoperoitatyainirime.

<sup>6</sup> Okanta ikowapaitetake Pawa, aripaite ikamawentakai Cristo, okantawetaka athainkatasorentsiwaiwetaka, te aawyaawainete. <sup>7</sup> Tekaatsi matapiinterone inkamawenteri itsipa atziri. Tzimawetacha kamawenterine apaani atziri kameethashireri. <sup>8</sup> Okantawetaka aakapaini kaariperoshireri anawetaka, ikamawentakai Cristo. Osheki retakotakai Pawa, rotyaantakeri Cristo inkamawentayetai. <sup>9</sup> Rotyaantakeri Cristo inkapathainkawentai intampatzikashiretakaayetai. Ari ikantakero jiroka eeniro akaariperoshiretaiyini, ¿Anthaawantyaarima Cristo rotampatzikashireyetaira? <sup>10</sup> Tema pairani eeniro akisaneentawetari Pawa, rotyaantakairi Itomi inkamawentayetai, ariperotantaariri. Ari okanta eejatzi ayoperotantaari aritake awisakoshireyetai, tema roshiyakaawentai Cristo rañagai. <sup>11</sup> Ari okantari, ikimoshirekitakaayetai Pawa, tema iri Awinkatharite Jesucristo ariperotakaayetairiri.

### *Adán eejatzi Cristo*

<sup>12</sup> Pairani apaani ikanta atziri etakaantanakawori ikaariperotake. Owasanke-taantsira iñaakeri, kaamanetai. Irojatzi rantetanakari maawoini icharinepaini, kaariperotanake maawoini isaawikisatzipaini, kaamaneyetairo. <sup>13</sup> Iroowa awisaintsiri tekera rosankenaitziroota Inintakaantaitakeri pairani. Tema jirikapaini atziri tzi-maintsiri ketziroini tekera rosankenaitziroota Inintakaantaitakeri pairani, inashitaiya riyakowentayeetairi. Iriima atziripaini impoiyetaatsiri itzimayetai piyathatakawori Inintakaantaitakeri pairani inashitaiya riyakowentayeetairi. <sup>14</sup> Ikanta ikamaira Adán, ikamitaawo eejatzi icharinepaini okantawetaka inashiyetaka iyaariperonka. Iroowa jatakotanaintsiri irojatzi itzimantakariri pairani Moisés-ni. Iri Adán oshiyakaawentakeriri itsipa atziri pokaintsiri, <sup>15</sup> iriitakera Jesucristo. Jiroka okanta roshiyakaawentakeriri: Atziri rinatzi Adán, kaariperowaitake, iri kantakaantakerori ikamayetantakariri osheki atziripaini. Ari ikantakariri eejatzi Jesucristo, atziri rinake irirori, ikamawentantake, iri kantakaantakerori rañaashiretantaari osheki atziripaini, ikantakaakawo Pawa ineshironkatantzira. <sup>16</sup> Iri kantacha Pawa rinashitakawo ineshironkatantake irirori, te roshiyakotari etakaantanakawori ikaariperowaitake. Iyaariperonkaga apaani atziri kantakaantakerori rowasanketaitantakariri osheki atziri. Irooma ineshironkamento Pawa, iro kantakaantakerori itampatzikashiretantaari osheki kaariperowaiwetainchari. <sup>17</sup> Ikanta ikaariperotakera pairani Adán, oshiyanakawo “Kaamane-taantsi” atziritatyeeme, iro onampitanakyaarineme atziripaini. Irooma ineshironkamento Jesucristo, oshiyaawo “Añagaantsi” atziritatyeeme, iro onampitaiyaarineme tampatzikashireyetaatsiri.

<sup>18</sup> Iri noshiyakaawentziri: Apaani atziri kaariperotaintsiri kantakaantakerori rowasanketaitantakariri osheki atziri. Ipoñaapaaka itsipa apaani atziri kameethashireri

kantakaantairori rawisakoshiretantaari osheki atziri, rañaashireyetai. <sup>19</sup> Apaani atziri piyathari, iri kantakaantakerori ikaariperoshiretantakari osheki atziri. Ipoñaapaaka itsipa apaani atziri kaari piyathatachane, iri kantakaantairori itampatzikashiretantaari osheki atziri. <sup>20</sup> Iro opoñaantari rosankenatakaantaitziro Inintakaantaitakeri pairani, riyotantaiyaari atziripaini kaariperoshireri rinayetzi. Okantawetaka antawoite ripiyathawetaka, antawoite ineshironkatairi Pawa. <sup>21</sup> Pairani oshiyawaitakawo atziritatyeeme “Kaariperonkantsi”, iro onampitanakyaarineme atziripaini, iroowa owamaantayetakariri. Iro kantacha iroñaaka oshiyawaitaawo atziritatyeeme “Neshironkataantsi”, iro pinkathariwentantaatsineme. Tema ineshironkayetai Awinkatharite Jesucristo, itampatzikashiretakaayetai onkantaitatyeeyaani añaayetai.

## 6

### *Ikamapithaitakero kaariperonkantsi*

<sup>1</sup> ¿Kameethama ankante: Thame ankaariperote ineshironkatantairi Pawa? <sup>2</sup> ¡Te ari onkantya! Oshiyawaitaawo ankamapithatatyeeerome aakapaini ayaariperonka. ¿Kantachama kaminkari riyaatakaairo inkaariperote iyamankakiini? <sup>3</sup> Aamaaka pimaisantakero eerokapaini omitsitsiyaawentari Cristo Jesús, oshiyakotaatyaarira irirori tsika ikanta rowamagaitakerira. <sup>4</sup> Iro oshiyakaawentacha ankamakityeeme atzirkinkaki tsika akantawetaka pairani. Ikitaitakai. Irojatzí apiriintantaari eejatzí, oshiyakotaari Cristo. Tema rowaneenkawo Pawa owiriintairiri Cristo, ari roshiyakaayetai aakapaini owakerarime atziri añaayetaatsineme.

<sup>5</sup> Oshiyakotakarira irirori, oshiyawaitakawowa ankamakityeeme, ari ampiriintai eejatzí ikantakaga irirori. <sup>6</sup> Oshiyawaitakawo arime intsipatagaitakairime Cristo inkentakoitakaimé atzirkinkaki tsika akantaweta pairani. Akamapithaitakero akaariperowaiwetaka. Eero oshiyakagairo onampitaime “Kaariperonkantsi”. <sup>7</sup> Tema tekaatsi rantayetai kaminkari iyaamanenkakiini, te ikaariperotai. <sup>8</sup> Tema atsipataari Cristo rowamagaitaira, awentaashire akanta antsipataiyaari rañaakaashireyetai eejatzí. <sup>9</sup> Tema ayotaiyini eero rapiitairo Cristo inkamawentantai. Apawosatzi ikamake, añaagai. Te onampitaari irirori “Kaamanetaantsi”. <sup>10</sup> Apawosatzi ikamawentakeri irirori kaariperoshireripaini. Rañiimotairi Pawa. <sup>11</sup> Ari pikantaari eerokapaini, poshiyakagairo pinkamapithatatyeeerome piyaariperonka, iri Cristo Jesús kantakaawori pañiimotantaariri Pawa.

<sup>12</sup> Iroowa eero pishinetanta ompeyakaashiwaitemi piyaariperonka. Poitsinampagairo piñaamatanewo. <sup>13</sup> Poshiyakairo pinkamatyeeme, piriintaimi eejatzí, jatakemime Pawaki, pinkantapairime: “Jiroka nowatha, nantantapiintaawori kameethatatsiri.” Ataama poshiyakaawaitakero piwatha iroome piyaariperomento. <sup>14</sup> Ataama poshiyakaakero atziritatyeeme “Kaariperonkantsi” imperawaitzimiri. Tera pañiimotairo Inintakaantaitakeri pairani, iroowa pañiimotai neshironkataantsi.

### *Onampiyetaari tampatzikashiretaantsi*

<sup>15</sup> ¿Kameethama ankante: “Jame ankaariperoshirete, eero añaimotantaawo Inintakaantaitakeri pairani, iro añaimotai neshironkataantsi?” ¡Te ari onkantya! <sup>16</sup> ¿Tema piyotzi arika ronampitaitemi, ontzimatye pinkemisantapiinteri onampitzimiri? Poshiyakayero atziritatyeeme piyaariperonka iro onampiwaitemine, ari pinkamashiretai. Iro kantacha iriirika Pawa pinkemisantapiintairi, aritake pintampatzikashiretai. <sup>17</sup> Tema pairani poshiyakaakero iroome “Piyaariperonka” onampitemine. Irooma iroñaaka poisokerotanaawowa, pikemisantanairo okaatzi riyotagaitakemiri. <sup>18</sup> Iroñaaka te onampitaimi “Piyaariperonka”, iroowa “tampatzikashirenkantsi” onampitaimiri. <sup>19</sup> Noshiyakaawentatziimiro ronampiyetaaira, iro ankemathatantyaawori okaatzi kompitzimotairi aakapaini. Tema pairani

poshiyakaakero atziritatyeeme “Koweenkayetsiri” iro onampiwaitakemiri, ari okantakemi eejatzí “Piyathataantsi”. Iro kantzimaitacha onampitaimi iroñaaka “Tampatzikashirenkantsi”, iro piñaantaiyaawori pintasorentsishireyetai.

<sup>20</sup> Pairani oshiyawaitawo iroome onampitemine “Koweenkatatsiri”, pisaikashiwaita, tekaatsi shintsineentemine pintampatzikashirete. <sup>21</sup> Piyotai iroñaaka tekaatsi pantyaawone jiroka. Pinkaaniwentairo jimpe pikantaweta pairani. Piyotzi eejatzí antayet-zirori jirokapaini aritake inkamashireyetai. <sup>22</sup> Iro kantzimaitacha te oshiyakagaimi eerokame onampitane “Piyaariperonka”. Iri Pawa onampitaimiri. Iroowa panta-perotaawori. Aritake pintasorentsishireyetai, ari pinkantaitaateero pinkañaanetai. <sup>23</sup> Jiroka “Kaamanetaantsi” oshiyawaitakawo iroome ripinaiteriri antakerori kaariperotaantsi, oshiyakaakerori rantawaire. Oshiyakaakeri iriime onampitanewo. Irooma “Kaañaanetaantsi” oshiyawaitakawo iroome ineshironkamento Pawa impashitaiyaaririme ikaatzí tsipashiretaariri Awinkatharite Jesucristo.

## 7

### *Roshiyakaawentaitziro aawakagaantsi*

<sup>1</sup> Iyekiite, eerokapaini niñaanayetzi pikaatzí piyotakoyetziro Inintakaantaitakeri pairani. ¿Piyotaiyini arika inkame atziri, ikamapithatatziiro Inintakaantaitakeri pairani? <sup>2</sup> Roshiyawaitakawo tsinane tzimatsiri oime. Eeniro rañiimotziro oime, otsipaminthatari. Irooma arika inkamapithatakero, aripaite isaikawaitashitaiya. <sup>3</sup> Arika oñeeri itsipa shirampari eeniro rañi oime, omayempitake. Irooma inkamakerika, ari isaikawaitashitaiya, kantacha oimentaiya itsipa, eero ikantantaitawo mayempiro.

<sup>4</sup> Iyekiite, oshiyakaawentachari jaka oshiyakawo atziritatyeeme “Inintakaantaitakeri” pairani, iroome piimentakyaarime. Iro kantacha pikamapithatakero jiroka, pitsipataari Cristo rowamagaitakerira pairani. Oshiyawaitaawo pisaikashiwaitaiyaame iroñaaka piimentaari itsipa rañaakagaitairi pairani. Iri pantawaitainiri eerokapaini Pawa iroñaaka. <sup>5</sup> Tekera añiuroota oshiyakaawentainchari “Kaamanetaantsi”, osheki apiyathatakawo Inintakaantaitakeri pairani, antapiintakero koweenkatatsiri. Iroowa owamaashiretaine. <sup>6</sup> Oshiyawaitakawo iroñaaka ankamapithatatyeeerome, asaikashiwaitaawo. Añaayetairi owakerari Tasorenkantsi, kantakaantakerori antawaitantaa-nariri Pawa. Te oshiyaawo pairani apankenatawowa etanakawori rosankenaitakeri.

### *Kaariperonkantsi saikashiretantanari*

<sup>7</sup> ¿Kameethama ankante: “Tekaaatsi pantyaawone Inintakaantaitakeri pairani?” ¡Te! Iro niyotantawori nokaariperotzi. Tema jiroka Inintakaantaitakeri pairani, kantatsiri:

Eero piñaamashirewaineta.

Eerome niyotakotairo jiroka, eero niyotaatsikaitaime tzimatsira nokenakaashitakari noñaamashirewaitapiintaga. <sup>8</sup> Irooma niyotakotairowa Inintakaantaitakeri pairani, te okanta nonkishashiwaitaiya, osheki noñaamawaitapiintaka. Eerome niyotakotairo Inintakaantaitakeri pairani, eero niyotakotzitawome okaariperowaitzira nantayet-ziri. <sup>9</sup> Pairani te niyotawetya kaariperori inatzi arika noñaamashirewaitiyo no-kenkithashiretaneki. Nisaikashiwaitapiinta, tekaatsi shintsineentenane. Irooma niyotakotairowa Inintakaantaitakeri pairani, ari niyotai nokaariperotake. Niyotai eejatzí ari nonkamashiretai. <sup>10</sup> Iro owamimaashiretanari Inintakaantaitakeri pairani. Iro opoñaantawetari rosankenaitziro Inintakaantaitakeri pairani, iro kantakaanteroneme inkañaanetantaityaarime. <sup>11</sup> Noshiyakaakero atziritatyeeme “noyaariperonka”, iro amashitanari netanakawo niyotakotanakero Inintakaantaitakeri pairani. Amataw-itakena, owamaakena. <sup>12</sup> Iro kantzimaitacha, tasorentsi ini Inintakaantaitakeri pairani, tampatzika ini, kameetha.

<sup>13</sup> ¿Irooma owameethanka kantakaawori nonkamantaiyaari? ¡Te ari onkantya! Kaari Inintakaantaitakeri pairani owamainane, tema noyaariperonka owamaanari. Ap- atziro iyotaamatsitakenawo noyaariperonka Inintakaantaitakeri pairani. <sup>14</sup> Ayotaiyini iro ashire okenkithatakotzi Inintakaantaitakeri pairani. Iro kantzimaitacha, oshiyawaitawo impimantaitatyeerome awatha rimperawaitaityaawo, iro “Kaariperonkantsi” oshiyariri onampitantaneri. <sup>15</sup> Irootake kaari niyotanta oita nokaariperoshiretantari. Te naaka kowashitachane. Owatsimaashirewaitana. <sup>16</sup> Te inimotena okaatzi nantapiintziri, ari niyotziri kameetha ini Inintakaantaitakeri pairani. <sup>17</sup> Te naaka antashiwaityaawone, iro “kaariperonkantsi” atzirintakenari, iro shintsineentakenari nantantawori. <sup>18</sup> Okantawetaka nokowi nanterome kameethari, te nimatziro. Oshiyawaitakawo irootakeme nowatha kaari kameethatatsine. <sup>19</sup> Te nimatziro kameethatatsiri nokowawetari. Iro nimatapiintake kaariperori kaari noñaamata. <sup>20</sup> Iro oshiyantakawori atziritatyeeme “Kaariperonkantsi” iro atzirintakenari, iro antakaapiintakenawori kaariperori.

<sup>21</sup> Iro shintsineentakenari nonkaariperoshirewaite, nokowawetaka nanterome kameethari. <sup>22</sup> Noshireki nokantashiretzi: “Imapero Inintakaantakeri pairani Pawa.” <sup>23</sup> Irooma nowatha koñaawoini, oshiyakawo oñaashintsitatyeeyaawome noshire. Oshiyakawo eejatzi nowatha omonkyakaantatyeerome noshire, ari oshintsineenterome onkaariperoshirewaite. <sup>24</sup> ¡Ikantamatsitaitana! ¿litaka matairone romishitowakaantairo noshire omonkyakaantawaitzirowa nowatha? <sup>25</sup> Iri Awinkatharite Jesucristo matairone. Niwetharyagaari Pawa otyaantakeriri rimatantakawori. Ari okantari. Iro noshire nithotyaantawori nokemisantziro Inintakaantanewo Pawa. Iro nowatha koñaawoini nantantapiintantawori okantakaantanewo “Kaariperonkantsi”.

## 8

### *Ikenkithashiretakotapiintaitziri Tasorenkantsi*

<sup>1</sup> Atsipashiretaarira Cristo Jesús, eero añagairo rowasankeyetai. <sup>2</sup> Te añiimotairo Inintakaantaitane kenkithatakotzirori kaariperonkantsi, kantakaantzirori eejatzi akamashireyentantari. Tema añiimotaatziro iroñaaka otsipa inintakaantaitane kenkithatakotzirori añashiretai antsipataiyaari Cristo Jesús. <sup>3</sup> Tekaatsi tampatzikashiretatsine ipankenawaiwetawowa Inintakaantaitakeri pairani, tema maawoini aakapaini atziritzira eenitatsi awatha kaari aawyaawaitatsine. Iri Pawa matzirori otampatzikashiretairiri atziripaini, rotyaantakeri Itomipero ratziritzimotante, eenitatsi eejatzi iwatha irirori oshiyawo awatha aaka. Iriitake rowasankewentantakari Pawa iyaariperonka atziripaini. <sup>4</sup> Iro amatantaawori atampatzikashiretai, tema iroopero ini Inintakaantaitakeri pairani. Iro antapiintairi okaatzi rantakagairi Tasorenkantsi. Te antapiintashitaawo iñaamatashiwaitari aakapaini. <sup>5</sup> Ikaatzi kenkithashirewaitachari rantero iñaamatashiwaitari, oshiyawaitakawo atziritatyeeme “Ñaamataantsi”, iro imperawaityaarineme. Iriima kenkithashiretakotawori inkemisanteri Tasorenkantsi, iriitake reewatakeri. <sup>6</sup> Ikaatzi kenkithashiretakotawori rantayetero iñaamatashiwaitari, eero rishenkaa iñaantyaawori inkaamaneshiretai. Iriima kenkithashiretakotakariri Tasorenkantsi, kameetha rañaayetai. <sup>7</sup> Ikaatzi kenkithashiretakotawori rantero iñaamatashiwaitari, eero rishenkaa iñaantyaawori inkisaneenteri Pawa, eero ikemisantairo inintakaantziri, eero rimataatsikaitziro inkemisantairi. <sup>8</sup> Ikaatzi anterone jiroka eero rinimotakagairi Pawa.

<sup>9</sup> Te pimatairo eerokapaini jiroka, iro pikenkithashiretapiinta ikowakaimiri Tasorenkantsi, tema iri saikashiretantaimiri. Kaari yotairine Itasorenka Cristo, temaita rashitaari Cristo. <sup>10</sup> Kaamane pikantawetaka okantakaimi piyaariperonka, arika



risaikashiretantaimi Cristo, añaashiretaimi, okantakaimi rotampatzikashiretaira.  
 11 Ari risaikashiretantaimi Tasorenkantsi, irijatzi añaawathatakagaimine, ari roshiyakagairiri Cristo Jesús, rowañaawathatairi.

12 Ari okantari iyekiite, te onkameethate antairo añaamatashiwaitari. 13 Arika pan-takero jiroka, aritake pinkamashiretai. Irooma arika pinkenkithashiretakotapiintairo ikowakaimiri Tasorenkantsi, oshiyawaitanakawowa atzirityeeme “Piñaamanka”, powamaakerome, aritake pañaashiretai. 14 Antanairori ikowiri Tasorenkantsi, ari intomintaiyaari Pawa. 15 Jirika Tasorenkantsi rotyaantakeri Pawa, eero rookanawentaimi, eero papiitantaawo poshiyakotaiyaari onampirentsi ithaawawaitzi. Iri kantakaanterone intomintantemiri Pawa. Iroowa ariperotantaiyaariri Pawa, ankantairi: “Papá, Ashitanarí.” 16 Iri Tasorenkantsi yotakagairi aakapaini itomi Pawa anatzí. 17 Tema itomi Pawa anayetai, ari atsipataari Cristo ashitaawo rashitari irirori. Tema atsipatakari Cristo akemaatsiwaitaga, ari antsipatai yaari eejatzi rowaneenkawoki.

18 Nokenkithashireta naaka eepichokiini akemaatsiwaita iroñaaka, tekaatsimaita oitya jiroka, arira añagairo paata rowaneenkawo. 19 Maawoini riwetsikanewo Pawa royaakoneenta impiyotairi itomipaini. 20 Raminaashiwaitaka riwetsikanewo, te raawi-iro ikowawetari, tema Pawa kantakaawori. Iro kantacha oyaawentacha jirikapaini 21 iñaayetairo rowaneenkawo, arika risaikashiwaitaiya itomiyetaari Pawa. Ari onkaat-apaake oshiyawaitakawo atzirityeeme “Shitzitaantsi”, iro onampitantachaneme. 22 Ratekawaitaiyini maawoini riwetsikaitakeri, roshiyakawo arika ontzimaanite tsi-nane. 23 Eejatzi aakapaini, añaawetakari Tasorenkantsi itsipashireyetai, oshiyakawo atekawaitaiyini akowi awisakote eero akemaatsiwaitanta, athotyaaakotziro tsikapaita intomiperoyetai Pawa. 24 Jiroka oyaakoneentane, irootake opoñaantari awisakoshire-tantaari. Iro kantacha tekera añaayeteroota. Arime añaaperoterome, ¿Eekeroma oy-aakoneentatyero? 25 Ari okantari oyaakoneentane, ontzimatye amatsinkashiretya, oyaakotero kaari añiiri.

26 Te aawyaashirenete, Tasorenkantsi neshironkayetairi. Te ayote amanayetya. Iri Tasorenkantsi amanakowentaine, oshiyawaitakawo ratekawentatyaima. 27 Ikemathatziri Pawa jirika Tasorenkantsi ramanakotaira. Iri yotakoperotziriri okaatzi ikowakaakeriri Pawa roiteshiretanewo.

### *Oitsinampaakero maawoini*

28 Ayotzi eejatzi oitarika awishimotaine, ari inkantakayaawo Pawa onkameethatz-imoyetai. Iro ikaimashiretantairi anteniri ikowakagairi. 29 Ikaatzi riyotzitakari Pawa kemisantairine paata, iriitake roshiyakagairi itomipero. Jirika roshiyanaari reewatanewo itomi, irojatzi rimpoitantapaaka itsipapaini iyekiite. 30 Jirika ikaatzi itomintaari Pawa, iriitake ikaimashireyetairi, rotampatzikashiretairi, iñaantaiyaawori rowaneenkawo.

31 ¿Tsikama ankantakoteroka jiroka? Antawoite ineshironkatai Pawa, ¿arima intzimai iita oitsinampagaine? 32 Te rithañaari Pawa itomipero rishinetakeri ritsitokaiteri ikamawentantakairi aakapaini. Rantakerowa Pawa jiroka, ¿eeroma rantairo otsipa oitarika koityiimotaine? 33 Añaayetairowa rotampatzikashiretai, ¿arima intzimai iita yakowentaine riyoyaakaira Pawa? 34 Iriitake Jesucristo kamawentakairi, ipiriintaawo eejatzi, risaikai rakoperoki Pawa itsipataari ipinkathariwentantzi, iri kankawentakairi aakapaini. Ari okantari, ¿arima intzimai iita owasanketaine? 35 ¿Tzimatsima iita materone rontsiparyaakagairi Cristo ripakaantyaawori retakoyetaira? Okantawetaka añaayetziro ompomeentsitzimotai, eekero riyaatatzi retakoyetai. Ari inkantero eejatzi tsikarika oita awishimoyetaine: owashironkaawaitaine, inkowaite inkoshekaitai, atasheneentawaite, ankoityaawaite

ankithaatyaaari, ankoweenkatakowaite, rapathakeroryaitai. <sup>36</sup> Ari okanta osankenatakotaka, kantatsiri:

Ari ashi owaatyero rowamaakaantaitena nawentagaimira eeroka.

Roshiyakagaitena piratsi rowamagaitziri. \*

<sup>37</sup> Onkantawetya añaayetero jirokapaini, aritake oitsinampaakero maawoini, tema retakoyetai Pawa, ari rimatakagairo oitsinampaantaiyaawori. <sup>38</sup> Jiroka nawentaakari naaka: Onkantawetya añaawetakyaawo oitarika: kaamanetaantsi, añaamentotsi, maninkariite, pinkatharipaini, awishimotantatsiri iroñaaka, awishimotantatsine paata, tzimatsiri ishintsinka, <sup>39</sup> jenokisato, isaawikisato, oiyetarika riwetsikaitziri, tekaatsi iita pakaakairine Pawa retakoyetai okantakaantziro rantzimoyetakairi Awinkatharite Jesucristo.

## 9

### *Riyoyagaitakeri Israel-iite*

<sup>1</sup> Riyotziro Cristo irooperori nonkantemiri. Iri Tasorenkantsi pinkathariwentashiretanari, iri yotakaanari te nothaiyawaineta nonkantemiri iroñaaka:

<sup>2</sup> Nowashiretakoperowaitakari nosheninkapaini Judá-ite kaari kemisantatsine, osheki okatsitzimoshiretakena. <sup>3</sup> Osheki nokowawetaka rawisakoshireyetaime nosheninkapaini, nokowawetaka nishinewentyaarime rawisakotantaiyaari. Nokowataawetakaga ripakagainame Cristo, niyotatyeeerome iroowa rawisakoshiretantaiyaarime nosheninkapaini, <sup>4</sup> icharineyeteri Israel-ni. Iri itomiwetakari Pawa jirikapaini, roñaagayewetakari rowaneenkawo, tzimatsi raapatziyawakayaari, rosankenayewetakanari Inintakaantaitakeri pairani, inintaawaiwetaka, ithaamentapiintakari, tzimatsi ikowakaawetakariri. <sup>5</sup> Irimirinka isheninkapaini acharineete. Irijatzi isheninkapaini Cristo, irijatzi Pawatatsiri, anaayetziriri maawoini. Ari inkantaitatyeeyaani inthaamentaityaari. Ari okantari.

<sup>6</sup> Okantaweta te ikemisantaiyini jirikapaini, ¿kameethama ankante eero imonkaata ikowakaakeriri Pawa? ¡Te ari onkantya! Tema inkaate iyeetairi iroñaaka “Israel-iite”, itsipasatzi rinatzi, kaari icharinepero Israel-ni. <sup>7</sup> Ari oshiyaawo awishimotakeriri Abraham-ni. Te roshiyakaiteri isheninkaani okaakiini apitetatsiri itomi, apatziro apaani. Iri ikenkithatakoitzi jaka, ikantaitake:  
Iri Isaac itomiperotari.

<sup>8</sup> Ari ikantakari Pawa te roshiyakairi iriime itomipero maawoini rowaiyakaantakeri Abraham-ni, apatziro itomintaari ikowakaakeriri incharinetyaari. <sup>9</sup> Jiroka ikowakaakeriri, ikantakeri:

Otsipaki osarentsi, ari napiitero nareetaimi, ari intzimake otomi Sara.

<sup>10</sup> Ari oshiyawo awishimotakerori Rebeca, itsipaanitakaantakawori acharineni Isaac. <sup>11</sup> Tekera itzimiita jirikapaini, tera rantayetziroota kameethari eejatzi kaariperori, tzimake ikowakeri Pawa ranteri. Ari imonkaatari rantayeteri. Te iri kowashiwaityaawone rantero, tema Pawa kantakaawori rantantawori jiroka, iriira kaimashireyetairiri. <sup>12</sup> Jiroka ikantaitakerori Rebeca:

Iri iyaapitsi imperatyaarine rantarite.

<sup>13</sup> Jiroka rosankenaitakeri eejatzi:

Netakotakari Jacob, iriima Esaú nokisaneentakeri.

<sup>14</sup> ¿Irooma ankantantyaari: “Tema Pawa apatziro ikowiri iyaapitsi, iriima reeware, ikisaneentakeri, teetsikya itampatzikashiretzi?” ¡Tera ari onkene! <sup>15</sup> Tema Pawa ikantakeri Moisés-ni:

Itzimirika nokowiri noneshironkateri, aritake noneshironkatakakeri.

Itzimirika nokowiri netakotyaari, aritake netakotakyaari.

\* **8:36** Ikantakoitzi “piratsi”, iriira oweja.

<sup>16</sup> ¡Piñaakero! Kaari atziri antashityaawone oiyetarika, iriira Pawa kantakaawori rantantawori oiyetarika ikaatzi ineshironkayetairi irirori. <sup>17</sup> Ari ikantaitakeri eejatzi Faraón, jiroka rosankenatakoitakeri kantatsiri:

Iroomacheetaka nowantakemiri pimpinkathariwentantai jaka, iñagaitantyaawori noshintsinka, natsipetakagaimiri eeroka. Iro inkenkithatakoitantenari maawoiniki kipatsi, raakoitaina nowairo.

<sup>18</sup> Ari ikanta Pawa, ineshironkatziri ikowiri irirori. Irijatzi kantakaawori ikisoshiretantari ikowiri irirori.

<sup>19</sup> Aamaaka ari pinkantayetaina: “¿Oitaka rowasanketantariri Pawa ikaariperotakairi, eeroma rimatziro rowashiñagairo ikowakeri Pawa rantero?” <sup>20</sup> Nonkantemi naaka: Tekaatsi piyote eeroka patzirinkakiini pinkantantyaari. Te pimpinkathateri Pawa. Pinkenkithashiretakoteri wetsikirori chomo. ¿Kantachama iñaanateri ichomone, onkanteri: “Te opantaatsikaitana piwetsikakenaga?” <sup>21</sup> ¿Tema onkameethate riwetsike owaneenkatachane, riwetsike otsipa kaari pantaperotawori? Atake. Tema iri ashitawori ichomone. <sup>22</sup> Ari ikantakari eejatzi Pawa, riwetsikayetakeri oshiyakawori chomo. Eenitatsi riwetsikakeri atsipetaiyaawone iyatsimanka, ratsipetaiyaawo ishintsinka rithonkantaiyaari. Kisashire Pawa ikantawentapaintari jirikapaini. <sup>23</sup> Ikisashiwentapaintari Pawa jirikapaini kaari pantyaarine, iro rimonkatziyantaiyaariri itsipapaini ikowakeri ineshironkayetairi, riyoyiitakariki ketziroini iñaaayetairo rowaneenkawo. <sup>24</sup> Aakapaini riyoyaayetake ikaimashireyetai. Te apatziro aaka a-judá-itetzira, ari akaatairi itsipasatzipaini kaari asheninkayeta. <sup>25</sup> Irojatziki ikenkithawaitakaakeriri Pawa pairani Oseas-ni, ikantakeri:

Jirika atziri kaari nosheninkaweta, noshiyakagairi “Nosheninka”.

Kaari netakoyeweta pairani, noshiyakagairi “Netakotanewo”.

<sup>26</sup> Irooma janta ikantaweetaka, “Te pisheninkatena eerokapaini,”

Ari inkantaite, “Itomipaini pinayetzi Pawa, Kañaaneri”.

<sup>27</sup> Jiroka ikantzitakariki Isaías-ni ikenkithatakotziri isheninkapaini Israel-ni: Osheki incharinetyaari, roshiyawaiwetakawo oshekitzi impaneki ñaacheraki, Eepichokiini awisakotaatsine.

<sup>28</sup> Tema romapokairi Pinkathari maawoini kipatsisatzipaini, tampatzika inkantya rowasanketakaantayetairi.

<sup>29</sup> Ikantake eejatzi Isaías-ni:

Eerome ikyaaryootakeme acharineete, ikempoyaawentakeri pinkathariperotatsiri,

Ari añaaayetairome iñaakeri pairani Sodoma-satzi eejatzi Gomorra-satzi.

### *Rotampatzikashiretaiiri rawentagaarira*

<sup>30</sup> ¿Irooma ankantantyaari: “Te rithotyaakotziro kaari asheninkata, rimatzimaitaawo rotampatzikashiretaitairi rawentagaarira irirori?” <sup>31</sup> Irooma aakapaini isheninkataira icharineni Israel, te añaaayetero, okantawetaka apankenawetakawo Inintakaantaitakeri pairani.” <sup>32</sup> ¿Itaka kaari amatantawo? Iro kaari rimatantawo ikenkithashirewaitakotawo ipankenawaitakariki irirori. Te ikenkithashiretakotziro ikowakairiri Pawa rawentaashiretari. Oshiyawaitakawo rontziwatatyeyeeame mapiki. <sup>33</sup> Ari oshiyawo rosankenaitakeri, kantatsiri:

Nowakero mapi ikowaperoitanewo janta otzishiki Sion.

Owaryaantzi jiroka mapi arika rontziwaityaawo.

Inkaate awentaashiretaiyaarine oshiyakawori mapi, eero raminaashiwaitaawo paata.

## 10

<sup>1</sup> Iyekiite, nokowi rawisakoshireyetai nosheninkapaini Israel-iite. Iro namanantaiyaariri Pawa. <sup>2</sup> Niyotzi ithaamentashiwaitari Pawa, rantashiwaitawo te ikemathaperotzimaitawo. <sup>3</sup> Te riyotaiyini ikowatzi Pawa rotampatzikashiretaiiri,

te ikemisantzi, tema rithotyaakotashitawo intampatzikashiretantyaari apaniroini.  
<sup>4</sup> Tema rithotyaakero Cristo Inintakaantaitakeri pairani, iri tampatzikashiretakagairiri ikaatzi awentaashiretaariri.

<sup>5</sup> Iriitake Moisés-ni osankenatakotakeriri rimonkaaterome Inintakaantaitakeri pairani intampatzikashiretantaityaarime. Jiroka ikantake:

Inkaate monkaatairone, iri ñagairone rañaashireyetai.

<sup>6</sup> Te imonkatziyawo awentaashirenkantsi otampatzikashiretantatsiri. Te okowaperota impankenawaityaawo rimonkaatairo tsikarika oita. ¿Kantachama riyaate inkiteki pankenawaitachari ishintsineenteri Cristo rayiitantaari isaawiki rowawisaakoshiretantairi? <sup>7</sup> ¿Kantachama riyaate sarinkaweniki rowiriintairi Cristo ikamawetapaintaga?

<sup>8</sup> Jiroka ikantaitake, rakaite:

Piyoshiretakero ñaantsi, piyowaantetakero eejatzi.

Kantakotachari jaka “ñaantsi”, irojatzzi nokenkithatakotapiintziri awentaashiretaarira Cristo. Jiroka okanta: <sup>9</sup> Arika piñaawaitero pinkante, “Nowinkatharite rini Jesús,” arika pawentaashiretanakyaari Pawa, iriira owiriintairiri ikamawetakaga, ari pawisakoshiretai. <sup>10</sup> Awentaashiretaari, iro rotampatzikashireyetaantairi. Añaawaitairo, iro rowawisaakoshireyetaantairi. <sup>11</sup> Ari okantzi Osankenarentsipero:

Inkaate awentaashiretaiyaarine, eero raminaashiwaitaawo.

<sup>12</sup> Onkantawetakya aakarika Judá-ite, aakarika Grecia-thatotatsiri, iri Cristo Awinkathariteta maawoini. Itzimirika amanaiyaarine, iriitake ineshironkatairi.

<sup>13</sup> Tema jiroka ikantaitake:

Itzimirika amanaiyaarine Pinkathari, raakotairi iwairo, aritake rawisakotai.

<sup>14</sup> ¿Kantachama ramanaiyaari Pawa terika rawentaashiretairi? ¿Kantachama rawentaashiretaityaari Pawa, terika ikemakoitziri? ¿Kantachama inkemakoiteri, tekaatsirika kenkithatakaantatsine? <sup>15</sup> ¿Kantachama inkenkithakoiiteri, tekaatsirika otyaantantatsine? Iro rosankenatantaitakawori, kantatsiri:

¡Osheki inkameethayitzite amerone kameethari ñaantsi risaikantaitari kameetha!

<sup>16</sup> Iro kantzimaitacha, te maawoini inkemisantaaitero Kameethari Ñaantsi. Iro ikantan-takari Isaías-ni:

Pinkathari, te ikemisantaitziro nokenkithatziri.

<sup>17</sup> Ari okantari. Ontzimatyete inkemaitawakero riñaane Pawa ompoñaantyaari rawentaashiretaityaari. <sup>18</sup> Nokantzi naaka, “¿Ikemaitakeroma?” Mataka, tema rosankenaitake kantatsiri:

Ikenkithatakoitakero nampitsikipaini,

Ikemaitakero maawoini kipatsiki tsikarika risaikaitzi.

<sup>19</sup> Napiitero nonkante, “Jirika isheninkapaini Israel-ni, ¿Ikemathaperotakeroma?” Iri Moisés-ni ooñaawontakerori rosankenareki, ikantake:

Ari nonkantakaakyaawo pisamaneentyaari itsipasatzipaini atziri kaari sheninkatawakaachane.

Osheki pinkisaneentashireteri piyetziri “masontzishireripaini”.

<sup>20</sup> Irojatzzi ikantakeri Isaías-ni irirori:

Iñaayetaana kaari kowakowatenane.

Noñaagaari kaari aminaminatenane.

<sup>21</sup> Iro kantzimaitacha, ikantzitaka eejatzi Isaías-ni, ikenkithatakotakeri Israel-iite, ikan-take:

Nowaankawakowetashitapiintakari, temaita ikemisantaiyanani, piyathari rinaiyak-  
eni.

## 11

*Tzimagaantatsi Israel-iite oitsinampaakerori*

<sup>1</sup> ¿Nokantatziima imanintziri Pawa Israel-iite rashiyetari? ¡Te ari nonkante! Tema naakatztitaka Israel-iite, icharine Abraham nini, icharine eejatzi Benjamín. <sup>2</sup> Te imanintana Pawa, iri yoyaakenari. Pinkenkithashiretero Osankenarentsipero, tsika ikenkithatakota Elías-ni ramanakotari isheninkapaini, ikantake:

<sup>3</sup> Pinkathari, rowamaitakeri Kamantantaneriite,  
Itzimpookaitakero taapokimentotsi.

Naaka yotapaincha, ikowatziira rowamagaitena naaka.

<sup>4</sup> Rakanakeri Pawa ikantziri:

Te eeroka yotapainchane. Nokempoyaawentakeri itsipa ikaatzi 7,000 atziripaini eenitatsi kaari otziwerowashityaarine Baal.

<sup>5</sup> Ari okantakari, tzimayetatsira nosheninka iroñaaka riyoyaakeri Pawa ineshironkateri.

<sup>6</sup> Te iro kantakaanterone ishintsiwentakaanewo ineshironkayetantaariri Pawa, tema ineshironkatashitaari irirori. Arira okantakota neshironkataantsi.

<sup>7</sup> Ari okanta, te maawoini Israel-iite roitsinampairo ikowawetaiyarini. Iro kantacha tzimatsi apawopaini oitsinampaakerori, roshiyakari riyoyaatyeeerime Pawa. Iriima itsipa ikisoshiretakaakeri Pawa. <sup>8</sup> Iro rosankenaitantakawori, kantatsiri:

Iri Pawa kantakaawori riyampashiretantaitari.

Tzimawetacha rooki temaita iñaantzi.

Tzimawetacha ikempita temaita ikemi.

Irojatziki ikantzimaitawo iroñaaka.

<sup>9</sup> Jiroka rosankenatakeri David-ni, ikantake:

¡Onkamintha roretaiteri ragaitantyaari!

¡Onkamintha rontziwataitya!

¡Onkamintha rowasanketaiteri!

<sup>10</sup> ¡Onkamintha ramashookitya!

¡Onkamintha ritsinkamitzite!

### *Rawisakoshiretai itsipasatzi atziri*

<sup>11</sup> Tema ikantaitzi “Onkamintha rontziwatya” nosheninkapaini, ¿irooma oshiyakaawentacha rithonkaitairi? ¡Kaari! Iro oshiyakaawentacha ikenakaashitapaintari, rowawisaakotantapaintariri Pawa itsipasatzipaini atziri. Iroowa rantantawori Pawa iñaantyaawori nosheninkapaini rawisakoyetai jirika itsipasatzipaini. Arika iñaakeri, inkowayetanai irirori rawisakotzitaiya. <sup>12</sup> Ikenashiwaitaka okantakaanterone ineshironkazitirira itsipasatzi atziri nampitawori maawoiniki kipatsi. Iro kameethaperotatsine ineshironkazitairi paata nosheninkapaini.

<sup>13</sup> Nonkantemi eerokapaini kaari nosheninkayeta. Naakatake rowaitake Notyaantaperorite nonkenkithatakaayetaimi eerokapaini kaari nosheninkata itsipasatzipaini. Shiretha nonkantawentanakyaawo nantawaire. <sup>14</sup> Iro nokowakowatziri inkowakoshiryaaantaimiri nosheninkapaini, iro ompoñaantaiyaari rawisakoshireyetai apawopaini irirori. <sup>15</sup> Imanintaiyakerini irirori Pawa, iro rariperotantaiyaariri Pawa maawoini isaawikisatzi. Irooma paata arika rariperoshiretaiyaari Pawa nosheninkapaini, oshiyawaitaiyaawo impiriintatyeeyaame ikamawetakaga. <sup>16</sup> Thame noshiyakaawentawakemiro: Tsika okanta shirepatha, ari okantzitari eejatzi opatha. Jiroka oshiyakaawentachari: Iri etawetakawori nocharinepaini itasorentsishiretake, ari inkantaiyaari eejatzi paata incharinetaiyaari kemisantanaatsine. Roshiyakotyaawo inchararitha, ari oshiyaiyaawo eejatzi otewa.

<sup>17</sup> Oshiyakaawentakeri inchararitha, iriira nocharineete etakawori pairani. Oshiyakaawentakeri otewa, iri nosheninkapaini Judá-ite saikatsiri iroñaaka. Oshiyawaitakawo richekaitatyeerome otewa, ishookeatwatantyaari otsipa otewa rontarekaitakeri, kameetha onkantya ishooke okantakaawo oparitha. Ikaatzi oshiyakaawentziri



otewa rontarekaitakeri, iriitake atziripaini kaari nosheninkata. \* 18 Iro eero pasagaawaitanta, otewa inchato pini, eeroa añaakaayetzi oparitha. 19 Aamaashitya pinkantaiyeni eerokapaini: “Richekaitakero otewa nishookatewatantaari naaka.” 20 Ari okantawetari. Iro kantzimaitacha ontzimatye piyoshirete iri oshiyawaitakawo nosheninkapaini Judá-ite richekaitakeri te ikemisantzi. Irooma eerokapaini kaari nosheninkata, eeroa poyaataari pawentaashiretaa. Te onkameethate piriiperowaitashitya pimpinkathateri Pawa. 21 Iri Pawa chekakerori etawori otewa, paamaawentya rimataimikari eeroa. 22 Ari piñiuro katsima rini Pawa, neshironkatantaneri rini eejatzi. Ikaatzi ontziwashiretainchari iñaayetakeri osheki iyatsimanka Pawa. Irooma eerokapaini, ari piñaapiintairo ineshironkatemi poisokerotaarira Pawa. Irooma eeorika poisokerotari, ari roshiyakagaitakemi otewa richekaitakeri. 23 Ikaatzi richekatewaitakeri pairani, arika ripakagairo rithainkawaitziri Pawa, aritake rontarekaitairi eejatzi. Tema Pawa riyotziro tsikarika inkantairo. 24 Eerokapaini oshiyakawori otewa pankirentsiniro rontarekaitakeri pankirentsiperoriki. Osheki okameethaperotake iroorika rontarekaitai otewapero oponkitziperoriki iroori. †

### *Ripiyashiretakaitairi Israel-iite*

25 Iyeekiite, nokowi piyotero kaari ikemathaitzi pairani onkaate ranteri Pawa. Eero pikenkithashirewaitashita piyotakero maawoini. Añaayetakeri nosheninka Israel-iite, tzimatsi kisoshiretakaayetakeriri. Iro kantzimaitacha, inapaintatzi jiroka irojatzii monkaatantaiyaari rawisakoshireyetai kaari nosheninkata. 26 Ari onkantaiya paata, rawisakoshireyetai eejatzi Israel-iite. Ari okanta rosankenataitakeri, kantatsiri:

Impoñeeya Sion-ki jokaawiritaantaneri,

Iri kantakayaawone ripakaantyaawori icharinepaini Jacob rithainkatasorentsiwaitzi.

27 Ari onkantya imonkaatantyaari aapatziyawakagaantsi,  
Naakatake thonkairone iyaariperonka.

28 Tema jirikapaini nosheninka Judá-ite imanintakero Kameethari Ñaantsi, roshiyakaakeri Pawa iriime iisaneentanewo, iro opoñaantari ineshironkataimi Pawa eerokapaini. Iri kantacha Pawa riyoyiitakari ketziroini nosheninkapaini, eekero riyaatatye retakoyetari, iro iñaantyaawori ikashaakaakeriri etanakawori nocharinepaini. 29 Arika inkaimashiretante Pawa, ineshironkayetantzi. Eero ripakagairo. 30 Pipiyathatzitakari pairani eerokapaini Pawa. Ikanta ripiyathanakari nosheninkapaini, iroowa ineshironkatantaimiri eerokapaini. 31 Jirikapaini piyathawaiwetachari iroñaaka, ari iñaayetairo paata ineshironkaitairi roshiyakagaitakemira eerokapaini iroñaaka. 32 Ari okantari, roñaagantakero Pawa maawoini apiyathawaitakaga, roñaagantairo eejatzi ineshironkayetai maawoini.

33 Niyokitashitanakeri Pawa rimaperotatya riyotanekitake, ikemathatziro maawoini. Tekaaitsi materone riyotero rantayeteri irirori, tsikarika inkantero. 34 Jiroka rosankenatakoitakeri, ikantaitake:

¿Eenitatsima yotziro ikenkithashiretari Pinkathari?

¿Eenitatsima iita materine inkaminairi?

35 ¿Eenitatsima omapokerine imperi oitarika?

Iri etakawo ipayetantake.

36 Iri Pawa kantakawori otzimantari oiyetarika, iri poñaakaawori, iri ashitawori. Rashi rowatyero impinkathaitairi. Ari onkantaitatyeeyaani.

## 12

### *Onkaate rantairi kemisantzinkaripaini*

\* 11:17 Kenkithatakotachari jaka “pankirentsi”, iroowa iitaitziri Olivo. † 11:24 Roshiyakaawentaitziri jaka “pankirentsiniro”, iriitake kaari Judá-itetatsine. Iriima “otewapero” iriitake Judá-ite.

<sup>1</sup> Iyekiite, ineshironkataimi Pawa, nokowi pishinewentaiyaari eeroka, poshiyaari ratsipetakagaitane piratsi ritagaitziri. Temaita eeroka iroñaaka poshiyari piratsi, tema eeroka añaayetaatsiri, kiteshire pinayetzi, iro inimotziriri Pawa. Iroowa ikowiri ampinkathayetairi. <sup>2</sup> Eero poshiyakowaitashitari isaawikisatzipaini. Iri pishinete Pawa rowakerashiretakagaimi. Iro piyotantaiyaawori ikowakagaimiri, kameethatzimotziriri, inimotziriri, tekaatsi kowimotyaarine.

<sup>3</sup> Iri Pawa neshironkataanari naaka niyotaantaimiri, iroowa nokantantzimiri: Eero poshiyakaawaitashita eerokame iriiperori. Pinkenkithashiretakoty kameetha pini eeroka. Iro pimatantyaawori ikowakaimiri Pawa eekero piyaataye pawentaanakyaari. <sup>4</sup> Pinkenkithashiretero akantayetaga awathaki. Tema tsika akantawathayeta, iro antakaayetairori oitarika. \* <sup>5</sup> Aakatake roshiyakaawentaitzi awentaashiretaarira Cristo. Oshiyawaitaawo aakame iwatha Cristo. Okantawetaka apashinitaiyini, iro kantacha apaani akantaa, oshiyawaitaawo awithaawaka-gaatyeeyaame. <sup>6</sup> Ritasonkawentayetai maawoini aakapaini amonkaatantyaawori antayetairi. Tzimatsirika kamantantanaatsine, rantero ikowakairiri Pawa, rawentaaperotanakyaari. <sup>7</sup> Tzimatsirika amitakotantanaatsiri, rimonkaatero irirori. Tzimatsirika yotaantanaatsine, rimonkaatero irirori. <sup>8</sup> Tzimatsirika ominthatakaantachari, rimonkaatero irirori. Tzimatsirika pashitantachari, ipantaperote osheki. Tzimatsirika jewatakaantanaatsiri, ishirehawentyaawo rantawaire. Tzimatsirika neshironkatantatsiri, kimoshire inkantya rimonkaayetairo.

<sup>9</sup> Ontzimatye petakotantaiya kameetha, eero pamawenawaita. Samaneenta powairo kaariperori, kisokero powanairo kameethari. <sup>10</sup> Pinkamaityaawo petakotante, poshiyakairo petakotari pirentzi okaakiini. Pimpinkathateri itsipapaini. <sup>11</sup> Shiretha pinkantya, eero piperawaita pantawaitainirira Awinkatharite. <sup>12</sup> Kimoshire pinkantya poyaakotairi Cristo. Kisashiwaine pinkantya arika piñaayetero pomeentsitzimotemine. Pamanapiintaiya. <sup>13</sup> Pimpashitaiyaari okoityiimowaitari roiteshiretaitairi. Poimaan-tapiintai pipankoki.

<sup>14</sup> Pamanakotaiyaari owatsinaawaitzimiri, ineshironkatantaityaariri irirori. Eero pipiyatari. <sup>15</sup> Pintsipatyaari kimoshirewaitatsiri, pinkimoshirewentzityaari eeroka. Pintsipatyaari eejatzi irawaitachari, pirayitya eeroka. <sup>16</sup> Aapatziya pinkantawakaayetaiya. Eero pimanintantawaitzi, pintsipayetyaari koityaawaitatsiri. Eero poshiyakaashiwaita yowarentzi pini. <sup>17</sup> Tzimatsirika owaariperowaitemine, eero pipiyatari. Poñaagantero tampatzikatzimoterine atziripaini. <sup>18</sup> Pinkamaiwentanaiyaawo pisaikantaiyaari kameethaini. <sup>19</sup> Netakotané, eero pipiyakowentawaita eeroka. Iriitake piyakowentaimine Pawa irirori. Jiroka rosankenaitakeri, ikantaitake: Ikantzi Awinkatharite: Naakatake owasanketantatsine, Naakatake piyakowentantatsine.

<sup>20</sup> Arika ritasheneente kisaneentzimiri, pimperi rowanawo. Arika imereneente, pimperi imere. Arika iñaakero pantakeri, osheki inkaaniwaite jirika. † <sup>21</sup> Paamaawentya oitsinampaimikari kaariperonkantsi. Iro kameethatatsi pantapiintairo kameethari poitsinampaantyaawori kaariperori.

## 13

<sup>1</sup> Ontzimatye pinkemisantairi pinkathariwentzimiri pinampiki. Te ipinkatharentsi-waitashita irirori, Pawa kantakaawori ipinkatharentsitantari. <sup>2</sup> Itzimirika kowatsine

\* **12:4** Jiroka ikantaitziri “tsika akantawathayeta”: Iro oki aminantari, iro akempita akemantari, iro apaante owantari, iro ako otaiyantari, iro aitzini anashitantari. † **12:20** Kantakotachari jaka “osheki inkaaniwaite” iro oshiyawori ikantaitziri eejatzi “paampatake iitoki.”

inkoshekawaityaari pinkatharentsitatsiri, oshiyakawo iriime Pawa inkoshekawaityaame, iroowa rowasanketantaityaariri. <sup>3</sup> Ikaatzi antayetziroori kameethari, eero ithaawantawaitari jewaripaini. Iriima antayetziroori kaariperori, iri thaawantyaarine. Ari okanta, pantziroori kameethari eero pithaawantawaitari jewaripaini, tema iriitake thaamentawentemine. <sup>4</sup> Iri Pawa kantakaawori ipinkatharitantari jirikapaini inkempoyaawentantemiri. Arika pantero kaariperori, pinthaawe, tema te aminaashiwaita otzimimotziri rosataamento. Iri Pawa kantakaawori ipinkatharitantari jirikapaini, irijatzi Pawa kantakaawori rowasanketantaityaariri kaariperoripaini. <sup>5</sup> Iroowa pinkemisantantyaariri jirikapaini. Te apatziro pinthaawantyaawo imashirenka. Iroowa tampatzikashiretatsiri pantairo jiroka. <sup>6</sup> Pipinayetero ikowakoyeetzimiri pinampiki, irootake rañaantari jewaripaini, tema rimonkaatatziro ikowiri Pawa. <sup>7</sup> Ontzimatyepipinayetairi maawoini pinkatharentsitatsiri, eejatzi kempoyaawentantatsiri nampitsiki. Pinkemisantayetairi, pinkatha poweri.

<sup>8</sup> Eero pikowakotantashita koriki impaitemi pireewetantyaari. Iroowa kameethatatsi petakotawakagaiya. Poshiyakayero etakotaantsi iroome pireewetanteri. Itzimirika etakotantachane, rimonkaatatziro Inintakaantaitakeri pairani. <sup>9</sup> Jiroka rosanke-naitakeri, kantatsiri:

Eero pimayempitzi.

Eero pitsitokantzi.

Eero pikoshitzi.

Eero pithaiyakotanta.

Eero piñaamashirewaineta.

Eenitatsi eejatzi osheki otsipa Inintakaantaitakeri. Iro kantacha jiroka irooperotatsiri Inintakaantaitakeri, kantatsiri:

Petakotaiyaari pisheninka poshiyakairo petakotapiintaga eero.

<sup>10</sup> Irooperotantari jiroka Inintakaantaitanewo, iroowa apatotziroori maawoini Inintakaantaitakeri. Itzimirika etakotaariri isheninka, eero rowaariperowaitziri.

<sup>11</sup> Ontzimatyepipinayetairo jiroka, tema irootaintsi awisakoshireyetai. Oshiyawaitakawo amaatyeeeme, iro kantacha ontzimatyepipinayetai. <sup>12</sup> Tema irootaintsi ithonkaiya tsirenikiri, iro onkitesheenkatai. Iro apakaantyaawori antayetziro kaariperori rantaitapiintziri tsireniriki. Oshiyakagairo ankithaataatyeeyaawome ripiyakowentantaitari, <sup>13</sup> antantaiyaawori kameethari rantapiintaitziri okitesheenkatzira. Eero osomiyawaitanta, eero ashinkiwaitanta, eero amayempiwaitanta, eero antantawo koweenkayetatsiri, eero akoshekawakaanta, eero asamawakaanta. <sup>14</sup> Poshiyakotaiyaari Awinkatharite Jesucristo, poshiyakagairi iriime pinkithaatakotaiya. Eero pantashiwaitawo okaatzi piñaamatashiwaitari.

## 14

### *Jentashireri*

<sup>1</sup> Paakameethatairi jentashireri. Eero pamawenatari ompoñaantyaari piñaanaminthateri. <sup>2</sup> Eenitatsi kemisantzinkari kenkithashiretachari kameetha rowayetawo oitarika. Tzimatsi itsipa jentashireri, apatziro rowayetawo pankirentsi. <sup>3</sup> Jirika kemisantzinkari owayetawori oitarika, eero imanintawaitziri itsipa kaari owayetyaawone. Ari inkantyaari kaari oyaawone eero imanintziri itsipa owayetawori, tema Pawa te imanintziri irirori. <sup>4</sup> ¿Kantachama inkisathaiteri ashinentzi onampirentsi? Eero, tema iri kisathaterine onampitariri, irijatzi kimoshirewenterine. Ari okanta, tema Pawa iri onampitariri maawoini owayetawori oitarika, irijatzi kimoshirewenterine.

<sup>5</sup> Jiroka otsipa: tzi mayetatsi kemisantzinkari omairetantawori kiteesheri. Tzimitcha itsipa kaari opashinitzimotzi kiteesheri. Ontzimatyen inkenkithashiretakotaiya, te onkameethate rotzikatzikatairi itsipa oitarika ikenkithashiretari. <sup>6</sup> Itzimirika pinkathatzirowori kiteesheri, iri Awinkatharite ipinkathatzi. Ari okantari eejatzi, itzimirika owayetawori maawoini oitarika, iri Awinkatharite ipinkathatzi rowantayetawori, tema riwetharyaapiintari. Ari ikantari pinkayetzirori owanawontsi, iriira Awinkatharite ipinkathatzirowori riwetharyaapiintari. <sup>7</sup> Te añaaaminthawaitashitya aakapaini, te akamaminthawaitashita eejatzi. <sup>8</sup> Eeniro añaa yetzi, iri Awinkatharite añaimotzirowori. Arika ankamake, iri Awinkatharite akamimotzi eejatzi. Ari okanta, iri Awinkatharite ashitairi eeniro añaa yetzi, ari okantzita eejatzi arika ankamayetake. <sup>9</sup> Iroomacheetaka itzimantakari Cristo, ikamimotakai, rashitai eeniro añaa yetzira, arika ankamayete eejatzi.

<sup>10</sup> ¿Oitaka pikishimatantariri pisheninka? ¿Oitaka pimanintantariri? Iriira Cristo yakowentantaatsine paata. <sup>11</sup> Iroowa rosankenatakoitakeri, kantatsiri:

Jiroka ikantake Awinkatharite: “Maawoini rotziwerowayetaiya impinkathaitaina. Imaperotatya.

Ari inthaamentaiyaari maawoini Pawa.”

<sup>12</sup> Ari ankenkithatakotaiyaari maawoini Pawaki.

<sup>13</sup> Iro apakaantyaawori akisaneentawakaiyani. Ankantashireyete: “Eero nokantzimoneentakaari itsipa ‘iyeki,’ notzikashirewaitzirikari.” <sup>14</sup> Niyotzi, te rithañaaawo Awinkatharite Jesús owayetyaawo oitarika. Iro kantzimaitacha, tzi matsirika kenkithashirewaitachane impinkero owanawontsi, impinkawaiteroota irirori. <sup>15</sup> Arika poñaayaari itsipa kemisantzinkari powayetyaawo ipinkiri irirori, te petakoshiretari. ¿Kameethama pinkantzimoneentakayaari itsipa powawowa owanawontsi? ¿Pikowima powaariperoshireteri jirika? Irijatzi kemisantzinkari jirika, ikamawentakeri eejatzi Cristo. <sup>16</sup> Ari okanta, te onkameethate poñaayaari powayetari eeroka kameethatzimotzimiri, iro inkantantaitemiri: “Rantakero kaariperori jirika.”

<sup>17</sup> Akaatzira ipinkathariwentai Pawa, te okowaperota owanawo eejatzi amere. Iro kowaperotacha antampatzikashiretai, asaikai kameetha, ankimoshiretai. Iriira kantakaawori Tasorenkantsi. <sup>18</sup> Itzimirika matanairone rantawaitainiri Cristo, rinimotakairi Pawa, ari raakameethatairi eejatzi atziripaini. <sup>19</sup> Ari okanta, pantairo risaikantaitari kameetha, ithaamentashiretawakaantaitari. <sup>20</sup> Arika pithotyero powayetyaawo oitarika, paamaawentya papaatzirokari rimonkaatziniriri Pawa itsipa kemisantzinkari. Te ithañaaantsiweta owayetari. Iro kantzimaitacha, itzimirika owayetawori oitarika iro inkantzimoneentakaantyaariri itsipa, rantakero kaariperori jirika. <sup>21</sup> Te opantawo pinkantzimoneentakayaari “iyekiite”, powayetarira wathatsi, pirowo kachori, pantayetzirowo oiyetarika. <sup>22</sup> Iro pantaperotawori piyotairo apatziro Pawa riyotakotaimiro jiroka. Tzi matsirika kaari jentashirewentairone jiroka, ari inkimoshireyetai. <sup>23</sup> Intzimerika jentashirewaitatsiri, arika rowakyaawo oiyetarika, ari oshiyimotaiyaari rantakero kaariperori. Tema te rantzirowo riyotakowetaari, kaariperori ini jiroka.

## 15

<sup>1</sup> Aakapaini kemisantzinkari aawyaashirewairontzi, antsinampashiretzirowotairi jentashiretatsiri, te apatziro antayetero inimoyetairi aakapaini. <sup>2</sup> Antayetairo inimotairine asheninka, ominthashiretakaantaiyaariri rantairo irirori kameethari. <sup>3</sup> Iroowa rantakeri Cristo te apatziro inimowaiteri irirori. Iro rosankenaitantakawori, kantatsiri: Itzimirika kaweyawaitzimiri eeroka, irijatzi kaweyawaitzikenari naaka.

<sup>4</sup> Okaatzi osankenatakotainchari pairani, rosankenaitakero riyotagaitantairi, rosankenaitakero ompoñaantyaari ankamaityaawo. Tema Osankenarentsirowo

oñaagairori tzimatsira oyaakoneentane, iro athaamentashiretantaari. <sup>5</sup> Iri Pawa kantakaawori akamaitantaari, thaamentashire akantaawo. Osheki nokowakotapiintakeri paakameethatawakaantyaari, poshiyakotaiyaari Cristo Jesús. <sup>6</sup> Oshiyawaityaawo arime pintsipatawakaiya maawoini pomampaawentaiyaari Pawa, ashitariri Awinkatharite Jesucristo.

*Ikenkithatakaitairi Kameethari Ñaantsi kaari Judá-itetatsine*

<sup>7</sup> Osheki raakameethatai Cristo aakapaini, ari pinkantaiya eerokapaini, paakameethatairi itsipa atziri, impinkathatantaiyaariri Pawa. <sup>8</sup> Iroowa nokantapiintakeri: Iri Cristo rotyaantaitake rantawaiwentero nosheninkapaini Judá-ite. Iro rantantakawori jiroka iñaantaityaawori imapero Pawa ikashaakaakeriri pairani nocharineete. \* <sup>9</sup> Irojatzu rantakeniriri kaari nosheninkata, iro ipinkathatantaariri iriroripaini, ineshironkatarira Pawa. Jiroka rosankenaitakeri, kantatsiri: Nothaamentawentaimi risaikayetzira kaari nosheninkata. Naakoyetaimi piwairo, nomampaawentaimi.

<sup>10</sup> Jiroka ikantzitaitakari eejatzu:

¡Itsipasatziité! Pinthaamentayena eerokapaini pintsipatai yaari rashitaari Pawa.

<sup>11</sup> Ikantaitake eejatzu:

¡Itsipasatziité! Pinthaamentaiyaari Awinkatharite.

¡Maawoini atziripaini, pinthaamentaiyaari!

<sup>12</sup> Irojatzu ikantakeri Isaías-ni:

Ari intzimake incharinetyaari Isaí.

Iri pinkathariwentairine itsipasatzi atziripaini.

Iriitakera royaakoneentairi kaari asheninkata.

<sup>13</sup> ¡Iri Pawa thaamentakagaimine, iri saikakaayetaimine kameetha pikemisantairira! ¡Iri kantakaawori oyaakoneentantaariri, iriira Tasorenkantsi kantakayaawone!

<sup>14</sup> Iyekiite. Niyotzi imapero pineshironkatawaka eerokapaini, yotaneri pinayetzi, pimatakeri piyotaawakaayetaka. <sup>15</sup> Iro kantacha noshintsineentatziimiro jiroka eero pipeyakotantawo. Tema ineshironkaperotaimi Pawa, <sup>16</sup> rotyaantaana nonkenkithatakotainiri Jesucristo kaari nosheninkata. Nokenkithatainiri Kameethari Ñaantsi kenkithatakotziriri Pawa, oshiyaawo naakame Imperasorentsitaarewo. Iriima kaari nosheninkata, iriiyetake oshiyawaitakawori rashitakaitariri Pawa, namainiri Pawa iro kameethatziimotairiri. Iri Tasorenkantsi materone rotampatzikashiretairi. <sup>17</sup> Okaatzi rantakaanari Cristo Jesús, kantawetacha noshamewenterome naaka, nonkenkithatakotero nantawaitainirira Pawa. <sup>18</sup> Iro kantzimaitacha, apatziro nokenkithatakotairo rantakaakenari Cristo. Tema noñaakeri kaari nosheninkata ikemisantairo nokenkithatakotakeri, okaatzi nantawaitzimotakeri. <sup>19</sup> Iri Tasorenkantsi pakenawori shintsinkantsi nitasonkawentantakari, nimayetakero kaari iñaapiintaitzi pairani. Iroowa nokenkithatantakawori Kameethari Ñaantsi kenkithatakotziriri Cristo netanakawo Jerusalén-ki, nokenanake irojatzu Ilírico-ki. <sup>20</sup> Iro opoñaantari nokenkithatakotairo Kameethari Ñaantsi tsika te ikemakoitziri Cristo. Te apatziro niyaate tsika ikenkithatakantaitake. <sup>21</sup> Tema iro rosankenaitake, ikantaitake:

Ari iñeeri nampiyetawori tsika te ikenkithatakotziriri jirika.

Ikaatzi kaari kemakotairine, ari inkemathatakotairi.

*Kowake Pablo riyate Roma-ki*

\* **15:8** Iri ikantakoitzu jaka “Judá-ite” itaitziriri “tomeshaanitaarewo”.



<sup>22</sup> Iro kaari okantanta niyaate pisaikaiyinira eeroka, osheki noshirewetakawo. <sup>23</sup> Iro kantacha ari nimatakeru, tema tekaatsi nantanairi jaka nampitsiki, shekitake osarentsi nokowapiintaweta nareetemi. <sup>24</sup> Arika niyaaminthatake España-ki, ari nareetanakemi pinampiki. Arika nisaikimowaitanakemi janta, nokowi pamitakotena potyaantaina España-ki. <sup>25</sup> Iro kantacha, netapaintyaawo niyaate Jerusalén-ki namitakoyeteri oiteshiretaarewo. <sup>26</sup> Tema jirikapaini Macedonia-satzi, Acaya-satzi, rotyaantaiyakenani iriroripaini koriki nompayeriri kemisantzinkaripaini ashironkainkari nampiyetawori janta Jerusalén-ki. <sup>27</sup> Iri kowashitaincha impashitantayetya, tekaatsi shintsineenterine. Oshiyawaitakawo ripinakowentaatyeeename ikemisantakaakeri kaari isheninkata. <sup>28</sup> Arika nimonkaatakeru nompayeri Jerusalén-satzi rotyaantaitakeniriri, aripaite nawisanake pinampitawowa eerokapaini niyaate España-ki. <sup>29</sup> Niyotzi iri Cristo tasonkawentaperotaine arika nareetakya janta.

<sup>30</sup> Iyekiite, nokowakotzimi pamanakotapiintaina, poshiyakotainawo nokantapiintzirowa naaka. Iro nokowakotzimiri, niyotzi pipinkathatziri eerokapaini Awinkatharite Jesucristo, iri Tasorenkantsi kantakaakemirori petakotantakenari. <sup>31</sup> Pamanakotaina eero raakaanantana thainkashireri nampiyetawori Judea-ki. Pamanakotaina ompoñaantyaari raawakoitantenawori kameethaini ipakaantaitakeriri oiteshiretaarewo Jerusalén-satzi, iro inimotantyaariri iriroripaini. <sup>32</sup> Iro ompoñaantyaari nonkimoshirete niyaate pisaikaiyinira, iriirika Pawa kowakaakenawone. Ari nimakoriimowaitanakemi eerokapaini. <sup>33</sup> ¡Onkamintha iri Pawa tsipashiretemine, iriira kameetha saikakagaimine! Ari onkantaitaatyeeanyi.

## 16

### *Riwethaitari atziripaini*

<sup>1</sup> Iroowa Febe aanakerone osankenarentsi. Iro noshiyakagairi iroome choini. Osheki antawaitake iroori rapatotapiintaitaga Cencrea-ki. <sup>2</sup> Paakameethatawakero, iro rashitaari eejatzi Awinkatharite, okameethatzi paakameethatero poshiyakaapiintziri paakameethatziri itsipa oiteshiretaarewo. Pamitakotero oitarika onkoweri. Tema osheki amitakotantake iroori. Ari okantakenari naaka osheki amitakoyetakena.

<sup>3</sup> Piwethatenawo Priscila eejatzi Aquila. Iro tsipatakenari nantawaitziniri Cristo Jesús, <sup>4</sup> iro atsipewentakenari owawisaakotantaanari. Osheki niwetharyaakawo jirokapaini, ari ikantakero itsipasatzi kaari nosheninkayeta apatotapiintachari otsipaki nampitsi. <sup>5</sup> Piwethatenari eejatzi apatotapiintachari opankoki. Piwethatenari eejatzi netakotanewo Epeneto, iri etanakawori nokemisantakagairi Cristo janta Acaya-ki. <sup>6</sup> Piwethatenawo María, antawaiwentakemiri osheki eerokapaini. <sup>7</sup> Piwethatenari Andrónico, eejatzi Junias nosheninkapaini rini, iri tsipayetakenari romonkyaawee-takenaga. Iri etakawori ikemisantake, tekeraataga naaka nokemisantziita. Iri-jatzi ipinkathayetakeri Otyaantaperoriite. <sup>8</sup> Piwethatenari netakotanewo Amplias, rashitaari Awinkatharite. <sup>9</sup> Piwethatenari Urbano, tsipatapiintakenari nantawaitziniri Cristo Jesús. Piwethatenari netakotanewo Estaquis. <sup>10</sup> Piwethatenari Apelles, raakameethatakeri Cristo. Piwethatenari maawoini saikawankotziriri Aristóbulo. <sup>11</sup> Piwethatenari nosheninka Herodión. Piwethatenari saikawankotziriri Narciso, risaikashiretantaari Awinkatharite. <sup>12</sup> Piwethatenawo Trifena, eejatzi Trifosa. Iro tsipatakenari nantawaitainiri Awinkatharite. Piwethatenawo netakotanewo Pérsida. Iro notsipatakari nantawaitainiri Awinkatharite. <sup>13</sup> Piwethatenari Rufo, riyoyairi Awinkatharite. Piwethatenawo eejatzi inaanate, noshiyakagairi iroome nonaanate naaka. <sup>14</sup> Piwethatenari Asíncrito, Flegonte, Hermas, Patrobas, Hermes, eejatzi it-sipatapiintari irirori, aitairi iyekiite. <sup>15</sup> Piwethatenari Filólogo, Julia, Nereo eejatzi iritsiro, Olimpás, eejatzi maawoini tsipatariri irirori aitairi oiteshiretaarewo. <sup>16</sup> Etako

pinkantya piwethatawakagaiya. Riwethatzimi eerokapaini maawoini apatowentapiintariri Cristo jaka.

<sup>17</sup> Iyekiite, jiroka nokowakotzimiri: Paamaawentyaari ñaanaminthatawakaachari otzikatzikatzirori riyotagaitakemiri pairani. Eero pitsipatari eerokapaini.

<sup>18</sup> Oshiyawaitakawo atziritatyeeeme “Íñaamawaitashitanewo”, iro imperatanakyaarineme. Kaari Awinkatharite Jesucristo imperataiyaarine. Iri nintathatziriri jentashireripaini ramatawiwaitziri. <sup>19</sup> Nokemake naakapaini kameetha pikantaiyani eerokapaini, te pipiyathawaita, iro oimoshirenkakenari. Nokowi pinkameethashireperote, oshiyawaityaawome te piyoterome kaariperori. <sup>20</sup> Iri Pawa saikakaayetaimine kameetha, irootaintsi inkantakagaiyaawo poitsinampaantaiyariri Satanás, oshiyawaityaawo powichoryagaatyeeerime paatzikeri. ¡Onkamintha ineshironkataimi Awinkatharite Jesucristo!

<sup>21</sup> Riwethatzimi Timoteo tsipatakenari nantawaitzi. Riwethatzitzi nosheninkapaini Lucio, Jasón, eejatzi Sosípater.

<sup>22</sup> Naakatake Tercio osankenatziniriri Pablo. Naakatake wethatzimiri eejatzi, naaka rashiyeta Awinkatharite.

<sup>23</sup> Riwethatzimi Gayo. Ari nisaikiri ipankoki. Riwethatzimi eejatzi ikaatzi nampiyetawori jaka. Riwethatzimi Erasto, apatotziriri koriki ashi nampitsi. Riwethatzimi eejatzi Cuarto, aitairi iyeki.

<sup>24</sup> ¡Onkamintha ineshironkataimi maawoini Awinkatharite Jesucristo! Ari onkantaitaateyeyaani.

### *Weyaantawori thaamentaantsi*

<sup>25</sup> Jame anthaamentaiyaari matzirori inkempoyaawentante, iro ompoñaantyaari pinkyaaryoowentapiintantyaawori Kameethari Ñaantsi okaatzi kenkithatakotziriri Jesucristo, kaari ikemathaitzi pairani. <sup>26</sup> Iro kantacha roñaagantaitairo iroñaaka, ipookakotantaari maawoiniki nampitsi, inkemisantantaityaari eejatzi janta. Iroomacheetaka rosankenatakagaitakeriri Kamantantaneriite, iriira Pawa Kañaneri kantakaantzirori. <sup>27</sup> Jame anthaamentaiyaari Pawa, Yotaneri, Apaanitatsiri. Tema iri Jesucristo kantakaawori ashi owaitaateyeroni anthaamentaiyaari. ¡Ari onkantaitaateyeyaani!

## RETAKARI ROSANKENATZINIRI PABLO CORINTO-SATZI

### *Wethataantsi*

<sup>1</sup> Naaka Pablo otyaantzimiro jiroka osankenarentsi. Rotyaantaperore Jesucristo ni-natzi, tema iri Pawa kowakaakenawori, ikaimashiretakena. Ari notsipatakari Sóstenes nosankenatzimiro. Iriitake noshiyakagairi iyeki. <sup>2</sup> Eeroka nosankenayetzini pikaatzira pipiyowentaari Pawa janta Corinto-ki, rotampatzikashireyetaimi Cristo Jesús. Iri kaimashireyetaimiri pikiteshoretantaari, poshiyakotaari nampiyetawori tsikarika-paini, aakotapiintairori iwairo Awinkatharite Jesucristo, tema irijatzi Pinkathari-wentairiri irirori. <sup>3</sup> Onkamintha ineshironkayetaimi Ashitairi Pawa, kameetha ri-saikakaayetaimi, ari inkantzitemiri eejatzi Awinkatharite Jesucristo.

### *Riwetharya Pablo ritasonkawentantaitzira*

<sup>4</sup> Niwetharyaapiintari naaka Pawa, tema antawoite ineshironkayetaimi, itsipashire-takagaimiri Cristo. <sup>5</sup> Irijatzi kantakaawori pikenkithatakotantariri, piyotakoperotanta-riri eejatzi. <sup>6</sup> Irootake poisokerotantakawori netakarira nokenkithatakotzimiri Cristo. <sup>7</sup> Pikanta poyaawentziri ripiye Awinkatharite Jesucristo, tekaatsi kowimotemine ri-tasonkawentzimi pantawaitantaanariri irirori. <sup>8</sup> Iriira kantakayaawone pinkyaary-oowentantyaariri irojatzi ripiyantaiyaari, iro eero otzimanta oita riyakowentapaimiri irirori. <sup>9</sup> Kisokero rowimi Pawa, iriitake kaimashiretairiri paapatziyantaariri Itomi Awinkatharite Jesucristo.

### *¿Ishekitzima pairani irirori Cristo?*

<sup>10</sup> Iyekiite, naakotemiri iwairo Awinkatharite Jesucristo noshintsithatemi, nonkante: Paapatziyawakaayetaiya, oshiyawaitaiyaawo apanime onkantya pikenkithashiret-ziri, eero pipankenatawakaantawo oitarika. <sup>11</sup> Tema nokemakeri isheninkapaini Cloé ikantapaakena te paapatziyawaka kameetha. <sup>12</sup> Eenitatsi pitsipayetari janta kantatsiri: “Nokemisantziri naaka Pablo.” Itsipa kantayetatsiri: “Iri nokemisantziri naaka Apolos.” Itsipa kantatsiri: “Iri nokemisantziri naaka Pedro.” Eenitatsi itsipa kantayetanaintsiri: “Nokemisantziri naaka Cristo.” <sup>13</sup> ¿Ishekitzima pairani irirori Cristo? ¿Naakama kentakowentakemiri? ¿Naakama raakotaitake romitsi-siyaatantaitakemiri? <sup>14</sup> Iroowa niwetharyaantariri Pawa, ikamintha te naaka omit-sitsiyaatemine. Apatzirowa nomitsitsiyaamatsitakeri Crispo, notsipataakeri Gayo. <sup>15</sup> Arira ontzimakeme ñaantsipooki iroñaaka, inkantaiteme: “Nomitsitsiyaawentakari naaka Pablo.” <sup>16</sup> ¡Jaa! Irijatzira nomitsitsiyaatzitakeri Estéfanos, notsipataakeri isheninkapaini. Te nokenkithatziro tzimatsirika itsipa nomitsitsiyaatakeri. <sup>17</sup> Te iro rotyaantantenari Cristo nomitsitsiyaatante, iroowa rotyaantantakenari nonka-mantantairo Kameethari Ñaantsi. Te noshiyakotapaakeri tzimatsiri riyorenka no-kenkithatakotzirowa Kameethari Ñaantsi. Tema te nokowi aminaashiwaitya irooper-otzira ikentakoitantakariri Cristo.

### *Iri Cristo, ishintsinka Pawa, riyorenka eejatzi*

<sup>18</sup> Arika ankenkithatakaawetyaari kaari oshiretyaawone tsika ikanta ikentakoitakeri Cristo, roshiyakaantai masontzi anatyeme. Irooma aakapaini awisakoshiretai, ayotai imaperotatyaaga roñaagantakero ishintsinka. <sup>19</sup> Tema rosankenatakotzitaitakari kaari oshiretachane, ikantaitake: Naapithateri riyorenka ikaatzi yotanewetachari. Nompeyapithateri ikenkithashiretanewo ikaatzi kenkithashiryawetachari.

<sup>20</sup> ¿Tsika inkantaiyaaka yotaneri? ¿Tsika inkantaiyaaka yotzinkari ikaatzi yotaantawaitzirori irooperotzimotziriri iriroripaini? Pawaga omasontyaayetairiri isaawikisatzipaini, ikaatzi yotanewetachari pairani. <sup>21</sup> Tema jirikapaini yotanewaitashitachari, te riyotziri Pawa. Iriima Pawa rimatziro riyotanetzi, inimotakeri rowawisaakoshiretairi kemisantañaanetairiri, inkantawetya intzimayete oshiyimowetari masontzishirenkantsi inatzi riñaane Pawa. <sup>22</sup> Arika iñeero nosheninkapaini Judá-ite ritasonkawentantaite, iro inkemisantantyaari iriroripaini. Iriima Grecia-thatori, arika inkemeri roshiyakaantziri iriroripaini yotaneri rinatzi, iriitake inkemisantayeteri. <sup>23</sup> Irooma naaka, nokenkithatakotanairi Cristo tsika ikanta ikentakowentantaka. Irootake ikompitzimotantakariri nosheninkapaini. Iriima Grecia-thatori roshiyakaakena nomasontzishirewaitatyeeme. <sup>24</sup> Iro kantzimaitacha aakapaini, ayotaiyini roñaagantairo Cristo Itasorenka Pawa, eejatzi riyorenka. Irojatziri riyoyetairi maawoini ikaimashireyetairi Pawa, onkantawetakya Judá-ite rinatzi, kaaririka Judá-ite, maawoini. <sup>25</sup> Tema Pawa ranairi yotanewaitashitachari atziripaini, okantawetaka jirika atziripaini oshiyimowetakari masontzitaantsi inatzi ikantayetakeri Pawa. Tema Pawa ranairi atziripaini oshekitzimotziri ishintsinka, okantawetaka jirika atziripaini oshiyimotakariri te aawyaantanete okaatzi rantawetakari Pawa.

<sup>26</sup> Iyekiite, ontzimatyepinkenkishiryakotawakero tsikarika pikantaiyani eeroka pairani, tekera ikaimashiretazitimiita. Te itzimaperotzi yotaneri pikaataiyinira, te itzimaperotzi peewarite, te itzimaperotzi iriiperori pinkathariwentzimiri. <sup>27</sup> Iri kantacha Pawa riyoyaayetairi roshiyakaawetakari atziripaini masontzi rinatzi, iro rowaañaantaiyaariri paata yotanewaitashitaneri. Riyoyaayetairi eejatzi roshiyakaawetakari kaari aawyaawaitaneri, iro rowaañaantaiyaariri paata iriiperoripaini. <sup>28</sup> Ari ikenakairori Pawa riyoyaantariri imanintanewo atziripaini kaari iriiperotzimoyeterine. Iro opoñaantaari opantzimotaari okaatzi imanintawetakari. <sup>29</sup> Ari ikenakairori Pawa eero itzimanta iita asagaawentawaitachane. <sup>30</sup> Iriira Pawa tsipashiretagaimiriri Cristo Jesús, rotyaantairi riyotanetakaayetaimi, rotampatzikashireyetaimi, rowameethashireyetaimi. Iri pinakowentaimiri pisaikashiwaitantaari kameetha. <sup>31</sup> Irootake rosankenatzitaitantakawori pairani, kantatsiri: Tema tekaatsi pantyaawone rasagaawentaitya apaniroini. Iroowa pantaperotawori asagaawentaiyaawo rantayetziri Awinkatharite.

## 2

### *Ikenkithatakoitairi Cristo ikentakoitakerira*

<sup>1</sup> Iyekiite, niyaatake pairani nareetzimi nokenkithatakotakemiri Pawa, te noshiyakotapaakari yotanewaitashitaneri, te nonintathawaitashitapaakemi. <sup>2</sup> Apatziro nokowaperotanakero nokenkithatakotaimiri Jesucristo, ikentakoitakerira. <sup>3</sup> Te noñiuro inimotena kameetha nisaikimotemi thaawashireri nokantaka. <sup>4</sup> Iro kaari oitsinampaantzimi niñaaneyetakari, te oshiyawo riñaane yotanewaitashitachari. Iro kantacha okaatzi niñaaneyetakari, oñaagantakeri Tasorenkantsi, oñaagantakero ishintsinka. <sup>5</sup> Ari okantakariri, iro ishintsinka Pawa ikemisantakotakemiri, kaari riyorenka atziripaini matakayemirone.

### *Itasorenka Pawa oñaagantakerori*

<sup>6</sup> Iro kantzimaitacha, arika ankenkithatakaayeteri antakishireri, iro kameethatatsi ankenkithatakoteniri yotanetaantsi. Iro kantacha jiroka yotanetaantsi, te oshiyawo okaatzi riyotanewaitashitari isaawikisatzi, okaatzira riyotanewaitashitari pinkathariwetachari iroñaaka. Eerowa rashi rowaatyeero jirikapaini. <sup>7</sup> Jiroka yotanetaantsi nokenkithatakotziri naaka, te riyotakoperoitziro pairani. Oshiyawaitakawo rimanaitatyeerome. Irootake ikowitakariri Pawa, iro añaantaiyaawori paata rowaneenkawo.

<sup>8</sup> Jirikapaini pinkathariwetachari iroñaaka, tekaatsi apaani yotakoperoterone jiroka yotanetaantsi. Arime riyoterome, eeromachee ikentakotakaantzirime Awinkatharite, oshekitzimoperotziri rowaneenkawo. <sup>9</sup> Iro kantzimaitacha, rosankenatakoitakero pairani, ikantaitake:

Okaatzi ikashaakaakeriri Pawa nintayetairiri irirori,  
Anaaperotziro iñaapiintaitziri, ikemapiintaitziri,  
Anaaperotzitawo okaatzi anewiyatakari.

<sup>10</sup> Irooma aakapaini, rotyaantakairi Itasorenka Pawa riyotakaantairori. Ari ikantari Tasorenkantsi, riyotakaaperotairi Pawa. <sup>11</sup> Tekaaatsi materone riyotakotero ikenkithashiretari itsipa atziri, apatziro riyotziro ishireki irirori. Ari ikantari eejatzi Pawa, tekaatsi yotakoterine ikenkithashiretari apatziro riyotziro irirori ishireki. Jirika Tasorenkantsi, ishire Pawa rinatzi. <sup>12</sup> Irootake añaantawori inampishiretakagairi Pawa Itasorenka ashireki, iro ayoperotantaiyaawori okaatzi ikashaakaakairi aakapaini akemisantayetaira. Iroowa kaari riyomatsitai isaawikisatzipaini, <sup>13</sup> yotaantapiintakerori riyotashiwaitari irirori. Okaatzira akenkithatakotakeri aakapaini iroowa riyotakaayetairi Tasorenkantsi. Iroowa akenkithatakaayetairiri antakishireri tsika okantakotajaanta ashire.

<sup>14</sup> Iriima ikaatzi kaari antakishireri, te ikemisantziro iriroripaini riyotaantawetari Tasorenkantsi, oshiyimowaitakari masontzishirenkantsi. Te onkantaatsikaitya riyotakotairo irirori, tema te inampishiretantari Tasorenkantsi riyotakaantyaariri. <sup>15</sup> Irooma aakapaini antakishireri, aritake ayotairo maawoini tsikarika oiyeta. Aritake okanta, okantawetaka te ikemathatai isaawikisatzipaini jimpe akantayetanaa aakapaini. <sup>16</sup> Irootake rosankenatakoitakeri jaka, kantatsiri:

¿Tzimatsima yotakoperotairine ikenkithashiretanewo Awinkatharite?

¿Tzimatsima materine riyotairi?

Irooma aakapaini, riyotakaayeetairo ikenkithashiretanewo Cristo.

### 3

#### *Antawaitainiriri Pawa*

<sup>1</sup> Iyeekiite, te nimatero nonkenkithatakayaetemi nokemetzirira nokenkithatakairi antakishireri. Oshiyawaitakawo owakerame pawentagaiyaari Cristo. Oshiyawaitakawo eejatzi eenirome pinkaatziinite, <sup>2</sup> eenirome inthotagaitemi, te ipaitzimiro kisotatsiri owanawontsi. Tema te okanta pinkemathatairo niyotaawetakemiri, irojatzi pikan-tayeta iroñaaka. <sup>3</sup> Tekeraata pantakishiretziita. Tema okaatzi piñaanatawakaapiinta, pikisaneentawakaayetaga. ¿Kaarima jiroka rantapiintziri thainkantzinkaripaini? <sup>4</sup> Tema eenitatsi, kantatsiri: “Nokemisantziri Pablo.” Itsipa kantayetatsiri: “Nokemisantziri naaka Apolos.” ¿Kaarima jiroka oshiyawori riñaanaminthatawakaayetari thainkantzinkaripaini?

<sup>5</sup> ¿Noitaka naaka? ¿Iitaka Apolos? Naakawetaka apitepaini rimperatanewo Pawa, rotyaantakena nonkenkithatakayaetaimi, pinkemisantantaiyaari eerokapaini.

<sup>6</sup> Tema naaka noshiyakari pankiwaitatsineme. Iriima Apolos roshiyakari oyaatapaakenaneme rithamaitakotero nompankiterime. Iriima Pawa iriitakeme antakitakaironeme pankirentsi. <sup>7</sup> Te ririiperotzi pankitakerori, ari roshiyari thamaitakotakerori. Iriira iriiperotatsi Pawa, rantakishiretakaayetaimi.

<sup>8</sup> Oshiyawaitakawo intzimatyeeeme rantawaitakanewo. Rotyaantaitakeri impankiwaite, rotyaantaitake itsipa rithamaitaantero. Apatziro ripinamatsitakeri okaatzira rantawaitake, roipiyaitairi inampiki, tema te ikowaperota irirori. <sup>9</sup> Ari nokantakari naakapaini, oshiyawaitakawo naakame antawaitziniriri Pawa. Irooma eerokapaini, poshiyawaitakawo eerokame pankirentsimashi. Poshiyawaitakawo eejatzi eerokame pankotsi.



<sup>10</sup> Naaka oshiyakariri yotzirori riwetsikawaitzi. Naaka etakaanakawo niwetsikakero pankotsi, Pawa neshironkatakanari niwetsikantawori. Irojatzri ripokantapaakari itsipa thonkaterone riwetsikero. Iro kantacha ontzimatye ramatsinkawentyaawo rithonkantaawori kameethaini. <sup>11</sup> Iriitakera Jesucristo oshiyawori retapiintaitari raayeetziro riwetsikantaityaawori pankotsi. Eerowa okanta ripoyaayeetairi. <sup>12</sup> Arika rowatzikaitakero retapiintaitari, aritake rithonkaitairo pankotsi. Kantacha riwetsikantaityaawo ooro, koriki, mapipaini poreryaayetatsiri. Ari imatakya eejatzri riwetsikantaityaawo inchapanke, kompiroshi, sawooshi. <sup>13</sup> Iro kantacha, arika itaiya pankotsi, ari ñagaitero oitarika riwetsikantaitakawori pankotsi. <sup>14</sup> Irooma riwetsikantaityaaworika mapipaini, eero itaayeta, imaperotatya okisonetzi riwetsikantaitakawori. Osheki ripinaperoitari wetsikakerori pankotsi. Ari inkantaiyaari eejatzri roshiyakaawentaitakeri wetsikiro pankotsi, ripinaperoitairi eejatzri. <sup>15</sup> Irooma riwetsikantaityaaworika pankotsi kaari shenkaatsine itaya, eepichokiinira ripinayeetairi jirika. Ari inkantaiyaari eejatzri roshiyakaawentaitakeri wetsikakerori pankotsi, eepichokiini inkantaiya rawisakoshiretantaiyaari, roshiyaiyaari awisakotatsiri ritaawetyaame.

<sup>16</sup> ¿Tema piyotaiyini eerokapaini, eeroka oshiyakaawentzi pankotsi? Tema oshiyawaitakemi eerokame itasorentsipankote Pawa, eerokatake risaikashiretantaka Tasorenkantsi. <sup>17</sup> Arika intzime owaariperoterine oshiyawori itasorentsipankote Pawa, ari rowaariperoitairi irirori, tema tasorentsi inatzi ipanko. Iro roshiyakaawentaitzimiri eejatzri eerokapaini.

<sup>18</sup> Paamaiya ramatawitaitzimikari. Eenitatsi janta kantatsiri: “Yotaneri ninatzi.” Iri kameethawetacha jirikapaini inkenkithashiretakotairome oshiyimowetakariri isaawikisatzi masontzishirenkantsi inatzi. Tema jiroka, irootake kantakayaawone riyotanetantaiyaari. <sup>19</sup> Tema Pawa te opantzimotari roshiyakaantapiintakeri isaawikisatzi yotanetaantsi inatzi. Iroowa rosankenatakoitakeri pairani, ikantaitake: Iriira Pawa otaiyakeriri yotanewaitashitachari riyoshirenkakiini.

<sup>20</sup> Rosankenaitake eejatzri kantatsiri:

Riyotzitakawo Pawa ikenkithashirewaitari yotanewaitashitachari.

<sup>21</sup> Iroowa eero rasagaawentantawo atziripaini riyomatsiwetari iriroripaini. Irooma eerokapaini piyotakoyetairo maawoini: <sup>22</sup> Okaatzri niyotaayetakeri naaka, irojatzri riyotayitakeri Apolos, irojatzri riyotayitakeri Pedro, tsika okantakota isaawikisato, añamentotsi, kaamanetaantsi, awisayetatsirika iroñaaka, awisayetaatsine eejatzri paata. Arira piyotakoyetairo maawoini jiroka, oshiyawaitakawo eerokame ashityaawoneme maawoini, \* <sup>23</sup> tema eerokapaini rashiyetaa Cristo, iriima Cristo rashitaari irirori Pawa.

## 4

### *Rantawaire Otyaantaperoriite*

<sup>1</sup> Ari okantari, ontzimatye roshiyakaayeetaina rimperatanewo Cristo, naakapaini rowake niyotaantayetairo kaari riyotakoweeta pairani. <sup>2</sup> Iro kantacha itzimirika rowaitakeri rantayetairo oitarika, ontzimatye inkyaaryoowentairo rimatantaiyaawori kameethaini. <sup>3</sup> Niyotzi naaka piyomaatakaatyaanari nokaataiyinira. Tekaaitsi oitya pikowirika paminakotenawo nantakerorika kameethari. Tekaaitsi oitzimaitya inkowerika raminakotenawo jewayetatsiri nampitsiki. Tema te nokenkithashiretawo naaka nimonkatziyaari nokaataiyinira. <sup>4</sup> Arikame naminakotya naaka, aamaa tekaaitsi noyenakaashitane. Iro kantacha tera naaka aminakowaitachane, iriitakera Awinkatharite aminakoperotainane. <sup>5</sup> Eero pimatziro eerokapaini piyomaatyaari iitarika. Iriira Awinkatharite aminakoyetairine maawoini ripiyairika. Iriitake

\* **3:22** Iitaitziri jaka “Pedro”, irijatzi iitaitziri “Cefas”.

ooñaawontapairone okaatzi rantaitakeri manaantsikiini. Ari rooñaawontapairo eejatzi okaatzi akenkithashirewetari antayeterime. Ari inkantaiyaari Awinkatharite thaa-mentakotaimine paata.

<sup>6</sup> Okaatzi nokenkithatakotakemiri jaka, naaka oshiyakaawentacha notsipatakarira Apolos. Iroowa nokantantzimiroi poisokerotantyaawori Osankenarentsipero, tema irootake ikantaitapiintziri: “Eero panaakairo osankenatainchari.” Pipakagairo okaatzi pimonkatziyapiintakena, pasagaawentapiintana pikantaiyini, “Jirika anairiri itsipa.” <sup>7</sup> Okaatzi pikantakeri ¿Piñaakama eeroaka panayiri itsipapaini? ¿Piyotashitawoma apaniroini kaari riyotagaitzimiri? ¿litaka pasagaawentantari, apaniroinima piyotane-tashita?

<sup>8</sup> Pasagaawentawaitaka eerokapaini poshiyakotakari pinkatharipaini, ashaagantzinkaripaini, aashiryaaneentziri rowanawo. Oshiyawaitakawo te niyotaimi naakapaini. Pimpinkathariteetatya iroñaaka nontsipatantemiri naaka pimpinkathariwentante.

<sup>9</sup> Tema naakapaini Otyaantaperoriite te noshiyari pinkatharipaini, te niriiperowaite. Oshiyawaitakawo rowamaakaantatyeename Pawa, maawoini raminakowentaitakena rowamagaitanaga, raminakotakena atziripaini eejatzi maninkariite. <sup>10</sup> Ikenkithashiretakoitakena tekaatsi pantenane nokenkithatakotzirira Cristo. Irooma eerokapaini pikenkithashireta yotaneri pinatzi pikenkithatakotairi irirori. Irooma naaka ikenkithashiretakoitana te naawyaashireperowaite. Irooma eerokapaini ikenkithashiretakoitakemi aawyaashirewaitaneri pinatzi. Osheki ipinkathaitakemi eerokapaini, irooma naaka, temacheeni. <sup>11</sup> Eekero nokemaatsiwaitatyaawo, irojatzi nokanta iroñaaka, nitashe-neentawaitzi, nomereneentawaitzi, thonkatakowaitakena, rowatsinaawaitaitakena, te otzimi nopanko, <sup>12</sup> osheki nantawaitake, naakatake antawaiwentacha. Itzimirika kisaneeentawaitenane, noneshironkatziiri naaka. Arika rowatsinaapookiwaitaitakena, kishaiwaitaneri nokanta. <sup>13</sup> Arika inkaweyawaitaitena, noitsimaryaayetzi. Roshiyakagaitakena kaagashi tekaatsi pantenane. Irojatzi ikantaitana iroñaaka.

<sup>14</sup> Te iro nosankenatantawori jiroka nokowi nowaañaashireyetemi, tema nokowatzi nonkaminaayetemi, noshiyakotari ipaapateetari ikaminayiri retakotanewo itomi. <sup>15</sup> Tzimawetacha osheki kowawetachari riyotagaimime eerokapaini, iro kantacha te niyote tzimawetacharika kowawetachane raakameethatemi roshiyaari ashitzimiri. Irootake noshiyakaawentakeri naaka, oshiyawaitakawo iriime Jesucristo matakaakenawone noshiyakotyaari ashitzimiri, nokenkithatakaapaakemiro pairani Kameethari Ñaantsi. \* <sup>16</sup> Irootake nosankenatantzimiroi jiroka: Poshiyakotaina naaka.

<sup>17</sup> Irootake notyaantantzimiriri iroñaaka Timoteo, noshiyakaakeri iriime netakotanewo notomi, iriitake kyaaryoowentakeriri Awinkatharite. Iriitake kenkithatakaapaimirone jimpe ikantakagaana Cristo, niyotaaayetairi kemisantzinkaripaini tsikarika risaikayetzi.

<sup>18</sup> Tzimatsira pikaataiyini janta asagaawentachari, ikowaiyini pinkemisanteri irirori. Roshiyakaatzi eero napiitairo nareetaimi. <sup>19</sup> Iro kantacha intsipaite nipiypaake, iriirika Pawa kowatsine. Iro noñaantyaawori kyaaryoorika raawyaashirewaitzi ikaatzi asagaawaitainchari janta. Aamaashitya riñaawaipookitashitarika. <sup>20</sup> Tema ikaatzi ipinkathariwentairi Pawa, iriitake oñaaganterone raawyaashirenka. Te riñaawaipookitashita. <sup>21</sup> ¿Arima inimitakemi nareetemi nowasankewaitapaakemirika? Iroowa pikowiri noneshironkatapaakemi, eero noshintsineentawaitapaakemi.

## 5

### *Riyakowentaitziri antayetziirori koweenkatatsiri*

<sup>1</sup> Tema nokemake eenitatsi pitsipatari janta, imayempiwaitake. Rantakero koweenkatatsiri kaari ikemakoitziri rantero thainkantzinkari. Tema rathataakawo

\* **4:15** Kantakotachari jaka “osheki”, aamaaka ikaatzi 10,000 atziri.

irinirothori, iinantari ipaapate. <sup>2</sup> ¿Litaka pasagaawaitantari pitsipatari antakerori jiroka? Te powashiretakotyari piñaakerira rantakero. Tema iro kameethawetachari pomishitowakaanterime jirika atziri.

<sup>3</sup> Okantawetaka te nisaikimotemi pinampiki, iro kantacha nokenkithashiretakotapiintakemi oshiyawaitakawo arime antsipatawakaya pinampiki. Irootake poshiyakaantyaawori iroñaaka arime antsipatawakaiya, niyakowenteri jirika atziri.

<sup>4</sup> Ontzimatye pimpiyotaiyaani, paakoteri iwairo Awinkatharite Jesús, poshiyakayero arime antsipatawakaya janta. Pantero ikantakemiri Awinkatharite, <sup>5</sup> pomishitoweri atziri, rowasanketeriita Satanás. Aamaiya arika rawisakoshiretai paata ripiyairika Awinkatharite Jesús.

<sup>6</sup> Te opantawo pasagaawentawaitya. ¿Tema piyotero ikantaitakeri: “Eepichokiini inawetaka kachopathari, iro kantacha okachotakairo maawoini oshe?” <sup>7</sup> Poshiyakayero posokatyeeerome kachopathatakairori oshe, pinkiwairo kameetha. Irootake pantayeteri, poimishitoweri antapiintzirori koweenkatatsiri, rantetawokari. Ontzimatye poshiyaawo oshe kaari kachotatsine, rowapiintaitari roimoshirenkaitzirowa kiteesheri “Anonkoryagaantsi”. Tema ratsipewentakai Cristo roshiyakari oweja rowaitari roimoshirenkaitzirowa Anonkoryagaantsi. <sup>8</sup> Iroowa antantyaawori roshiyakaawentaitakeri. Ontzimatye pipakaayetairo koweenkatatsiri, kaariperotatsiri, oshiyakaawentakeri kachotakairori oshe. Ontzimatye ankameethashiretai, ankenkithayetairo irooperotatsiri, oshiyakaawentziri oshe kaari kachotatsine.

<sup>9</sup> Nosankenatzitakemiro ketziroini, nokantakemi: “Eero paapatziyari antapiintakerori koweenkayetatsiri.” <sup>10</sup> Nokantayetzirowa jiroka, te iri nonkantakote kaari kemisantatsine, antayetzirori koweenkayetatsiri, kisakowairentzi, kamatawireri, pinkathatashiwaitariri oshiyakaawontsi. Iriime nonkantakoteme, eero okantaatsikaitame pisaikayetaime isaawiki. <sup>11</sup> Iriira nokantakotziri jitashiwaitachari “Iyekiite”. Eero paapatziyari, iriira antapiintakerori koweenkayetatsiri, kisakowairentzi, ipinkathawaitashitari oshiyakaawontsi, ikaweyantawaitzi, ishinkiwaita, ramatawitantzi. Tera okameethatzi pakiyooteri jirikapaini. <sup>12</sup> Tera rowayeetai aakapaini ayakowenteri kaari kemisantatsine. Iri kameethatzi ayakowenteri kemisantatsiri atsipatapiintari, rantakerorika kaariperotatsiri. <sup>13</sup> Iroowa pookantyaariri jirika atziri antapiintakerori kaariperori. Iriima Pawa iri aminakoyetairine kaari kemisantayetatsine.

## 6

### *Te okameethatzi raminkotairo apankenataiyarini kaari kemisantatsine*

<sup>1</sup> Arika pinkoshekawakagaiya pikaatzira pikemisantaiyini, te onkameethate raminkotemiro jewatakantatsiri nampitsiki, kaari kemisantatsine. Iroowa kameethatzi piyaatashitawakaiya pikaataiyinira ikiteshoretakagaitaimi. <sup>2</sup> ¿Tema paata eeroka aminakotairine maawoini isaawikisatzipaini? ¿Eeroma pimatziro piwetsikayetairo pomeentsitzimotzimiri eepichokiini eerokapaini? <sup>3</sup> Tema aakapaini aminakoyetairine eejatzi maninkariite. ¿Eeroma okanta aminakotantero okaatzi añaakotantziri iroñaaka? <sup>4</sup> ¿Litaka pishinetantariri raminkotaimi atziripaini kaari pitsipatapiinta pipiyowentari Pawa? <sup>5</sup> Ontzimatye pinkaaniwentairo jiroka. ¿Tekaatsima tzimatsine riyorenka, wet-sikemirone? <sup>6</sup> Jiroka pikantapiintaiyani: Piyaatashitakeri jewari kaari kemisantatsine, pikowakotakeri riwetsikemiro pikoshekawakaaga, pikantawakaapiintaga “Iyekiite”.

<sup>7</sup> Ari iñagaitzimiri eenitatsi piyenakaashitanewo, piyakowentawaitakeri pitsipatapiintari pinampiki. ¿Litaka kaari pikisashitantawo ikaweyawaitaitzimi, ramatawiwaitaitakemi? <sup>8</sup> Iroowa pantayetakeri. Eerokatake kantzimoshireneentawakaachari, pamatawitawakaiyakani okantawetaka pikantawaka “Iyekiite”.

<sup>9</sup> ¿Tema piyotaiyeni, paata eero ipinkathariwentairi Pawa kaariperotatsiri? Paamaawentaiya, otzimikari piyenakaashitanewo. Arira ikanta antapiiintzirori koweenkayetatsiri, pinkathayetziriri oshiyakaawontsi, mayempiriite, panke-natawakaachari ishiramparinkaki, <sup>10</sup> koshintzipaini, kisakowaitaneri, shinkiyantzi, kaweyantaneri, kamatawireri. Eerowa iñaayetairo impinkathariwentairira Pawa jirikapaini. <sup>11</sup> Pairani, ari pikantawetakari eerokapaini. Irooma iroñaaka oshiyawaitaawo intzimatyeme kiwakemiri, ikiteshoretakaitaimi, rotampatzikashiretaimi, tema paakotapiintairi iwairo Awinkatharite Jesucristo. Iriitake Tasorenkantsi kantakaayetaimiri.

*Pimpinkathatantaiyaariri Pawa, oitarika pantayetairi*

<sup>12</sup> Eenitatsi kantayetatsiri: “Rishinetaitanawo nantayetero oitarika.” Iro kantacha te opantawo rantaitero maawoini. Aritake okantaweta, rishineyetairo antayetero oitarika. Iro kantacha te akowirowa awathatakotyaaawo oitarika rishineyetairi. <sup>13</sup> Eenitatsi kantayetatsiri eejatzi: “Iro otzimantari owanawontsi inimoneentantairi amotziki. Iro otzimantari amotzi, ankemaneentantyaawo owanawontsi.” Ari okantaweta, iri kantacha Pawa rapitekeroryagairo jiroka, rithonkairo. Iro eero pikantawaitanta eeroka: “Iro otzimantari awatha, añaathatawakaantyaari.” Te ari onkantya. Iro otzimantari awatha ampinkathatantaiyaariri Awinkatharite. Iro itzimantari Awinkatharite animotakaantaiyaariri awatha. <sup>14</sup> Tema Pawa, eero raperaatzirowa awatha, aritake rowiriintayetai, roñaagantayetairo ishintsinka, oshiyaiyaari tsika ikanta ipiriinta pairani irirori Awinkatharite. <sup>15</sup> ¿Tema piyotaiyini iri Cristo ashiyetaawo piwatha? ¿Kantachama aapithatairi rashitari irirori? ¿Ashinewaitziroma awatha amayempiwaitantyaawo? ¿Tera ari onkantya! <sup>16</sup> ¿Tema piyotaiyini ikaatzi mayempiyetatsiri, oshiyawaitanakawo riwithaatyeyaaawome jiroka, apaani ikantanaa iwathaki? Iro okantziri rosankenaitakeri: Apaani ikantanaa iwathaki raawakaanaaga.

<sup>17</sup> Iriima tsipatanariri Awinkatharite, riwithaashiretanaatyaarira, oshiyawaitanaawo apaanime ikantanaawo. <sup>18</sup> Ontzimatyepinkokitapithatero ñaathataantsi. Okaatzi ot-sipa kaariperoyetatsiri rantaitziri, te iri atziri owashironkaachane arika rantakero, itsipaga atziri rowashironkagaitakeri. Irooma iroorika rantake ñaathataantsi, iri-ira owashironkaawaitaincha apaniroini iwathaki. <sup>19</sup> ¿Tema piyotaiyini iroowa piwatha oshiyakawori pankotsi risaikantari Tasorenkantsi? Iri Pawa imperayetzimiri. Tera eeroka añaashiwaitachane apaniroini, <sup>20</sup> iri Pawa pinakowentaimiri opoñaantari rashiyetaimi. Pimpinkathatantaiyaari Pawa oitarika pantayetairi, eejatzi okaatzi pikenkithashiretari.

## 7

*Ikoshekawakaa aawakaachari*

<sup>1</sup> Iroñaaka nakemiro okaatzi posampitanari posankenareki: Iro kameethawetacha eero rayi iina atziri. <sup>2</sup> Iro kantacha, ontzimatyepiinantayetaiya, pimayempitzikari. Eejatzi tsinanepaini, ontzimatyepimentayetaiya. <sup>3</sup> Ari okameethatzi piñaawakaapiintaiya paawakaayetaga. <sup>4</sup> Okaatzi iinantaitari, te apaniroini ashitawo owatha iriira ashitawori oime. Ari ikantzitari eejatzi iimentaitari, te apaniroini rashitawo iwatha iroowa ashitawo iina. <sup>5</sup> Iro kaari okameethatanta poshitayero piñaawakaapiintaiya paawakaayetaga. Iro kantacha ontzimatyepinkenkithawaitawakaya pitziwentantyaawori pamananewo. Pimatakerorika pitziwentawo pamananewo, ari petanaiyaawo piñaawakaanaiya, iroowa eero rowaariperotantzimi Satanás, tema te piñaakoneta eerokapaini. <sup>6</sup> Irootakera jiroka nishinetaantziri, iro kantacha te noshintsineentemiro maawoini pimonkaayetairo jirokapaini. <sup>7</sup> Nokowaweta naaka maawoini atziri roshiyakotewnawo naaka. Iro kantacha eero rimataitzirowa jiroka. Tema Pawa rinashitakawo

ritasonkawentayetakai maawoini aakapaini. Ritasonkawentake apanipaini kaari otzimitanta iina, iriima itsipapaini otzimayetzi.

<sup>8</sup> Niñaanatziiri mainaripaini, nokantziri: Iro kameethatatsi pisaikashiwaitaiya eero otzimi piina, poshiyena naaka. Irojatziri nokantzitariri kamayetatsiri iina. <sup>9</sup> Irooma terika piñaakonetya, ontzimatye piinantayetaiya. Tema iro kameethatatsiri piinantayetaiya, eero piñaantawo ayimawaitemi.

<sup>10</sup> Niñaanatziro tsinane, aawakaachari, nokantziro: Te onkameethate pookawakaayetaiya. Te naaka ashityaawone niñaane jiroka iriitakera Awinkatharite. <sup>11</sup> Arika pookawakaiya, iro kameethatatsi pisaikashiwaitaiya apaniroini eero pagai itsipa piime. Irooma eerorika, kantacha pipiyashitairi piime. Niñaanatziimi eerokapaini iimentaitari, te onkameethate pookero piina.

<sup>12</sup> Niñaanatziiri itsipapaini, nokantziri: Iyekiite, arika piinantyaawo kaari kemisantatsine, ontzimatye poisokerotyaawo, aapatziyakotzimirrorika iroori pikemisantziiri. Ari nokantziri naaka, tera iri nintakaanterone Awinkatharite jiroka. <sup>13</sup> Ari onkantziyaari eejatzi tsinane jimentariri kaari kemisantatsine, raapatziyakotaworika okemisantziiri, ontzimatye oisokerotyaari. <sup>14</sup> Okantawetaka te ikemisantzinkaritzi oime, tasorentsishire ikantanaawo irirori, okantakaakawo iina. Ari ikantzitari eejatzi jinantawori kaari kemisantatsine, tasorentsishire okantanaawo iroori, ikantakaanaawo oime. Irooma arika rookawakaiya, aamaa eero rawisakoshiretai rowaiyanewo. Irooma raawakaana, itasorentsishiretakagairi rowaiyanewo. <sup>15</sup> Iro kantzimaitacha, inkowerika rookawakaiya kaari kemisantatsine, kantacha rimatero. Eejatzi okemetzimaita, tekaatsi shintsithaterine eero rookawakaanta, akantayetairi “Iyekiite”, akantayetairi eejatzi “Choiñaaye”, aayetziriri kaari kemisantatsine. Irooma arika raapatziyawakaiya kameethaini, iroowa ikowiri Pawa. <sup>16</sup> Nokantziimi iinantaitari, te piyotzi aamaa eeroka kantakaantairone rawisakoshiretantaiyaari piime. Eejatzi eeroka iimentaitari, te piyotzi aamaa eeroka kantakaantairone awisakoshiretantaiyaari piina.

<sup>17</sup> Ari okantari. Tsika akantayeta asaikayetzi, eero athawaawo owashiñeero jimpe akantapiinta. Iroowa ikowakagairi Awinkatharite, tema ari akantari ketziroini ikaimashiretantakairi Pawa. Irootake nokantapiintziiri rantaitero nareeyetarira kemisantzinkaripaini tsika ipiyotaiyani. <sup>18</sup> Thame oshiyakaawentawakero, apaani shirampari tomeshaanitainchari, rashi rowatyeero tsika ikanta. Terika ritomeshaanita ikemisantantakari, tekaatsi oitya ritomeshaanitantaiyaari. <sup>19</sup> Tekaaitsi oitya aakarika tomeshaaniri, terika atomeshaanita. Iroowa kowaperotachari antayetairo ikowakagairi Pawa. <sup>20</sup> Ari ankantaiyaari maawoini, eero athawaawaitawo owashiñeero tsikarika akantayeta ketziroini ikaimashiretantakairi Pawa. <sup>21</sup> Ari okantari eejatzi. Eerokarika noshikaarewo ikaimashiretantaimiri Pawa, eero okantzimoshirewaitzimi. Irooma rothatairorika imperatziimiri ikowi pishitowai, pimatero. <sup>22</sup> Eerokarika ronampitaitanewo ikaimashiretantaimiri Awinkatharite, ontzimatye pinkenkithashiretya risaikakaashiwaitaimi. Eerokarika kaari rimperaitanewo ikaimashiretantaimiri Cristo, oshiyawaitaiyaawo rimperataneme pinatye Cristo. <sup>23</sup> Tema Pawa pinakowentaperotaimiri rashitantaimiri, iro kameethatatsiri eero poshiyakotaari inoshikaitanewo, ishintsineentaitziiri rimonkaatero ikowakairiri itsipa atziri. <sup>24</sup> Iyekiite, eero athawaawaitawo tsika akantayeta maawoini ikaimashiretantairi Pawa atsipashirentaariri.

<sup>25</sup> Iroñaaka nakayeteri osampikowentziroori mainawopaini. Te otzimi inintakaan-tairi Awinkatharite tsika okantakota jiroka, iro kantacha nonkantemi okaatzi nokenkithashiretakotawori naaka. Iri Awinkatharite neshironkataanari opoñaantari pawentagaana naaka. <sup>26</sup> Jiroka okaatzi nokenkithashiretakotawori: Tema asaikan-tatyaawo iroñaaka jimpe rashironkagaita, iro kameethatatsiri pashi powairo tsika



pikantayeta pisaiki iroñaaka. <sup>27</sup> Thame oshiyakaawentawakero: tzimatsirika eeroka piina, te okameethatzi pookero. Terika otzimi piina, eero pikowakowatzi piinantyaari. <sup>28</sup> Irooma arika piinantakya, tera pantziro kaariperori. Ari okantzitari mainawo jimentachari rakotagaitakeri shirampari, tera antziro kaariperori. Iro kantacha ikaatzi aawakaayetachari, aritake iñaayetakero oita ratsipetyaari. Nokantashitzimira naaka eero piñaantawo oita patsipewaityaari eerokapaini. <sup>29</sup> Iyekiite, irootaintsi imonkaapaitetya. Ari etanakawo iroñaaka, ikaatzi tzimayetatsiri iinapaini, ontzimatye roshiyakagairo terikame otzimayetzi iina. <sup>30</sup> Ikaatzi irawaiyetachari, ontzimatye roshiyakagairo tekaatsime oita riraawaitantari. Ikaatzi kimoshirewaitatsiri, ontzimatye roshiyakagairo tekaatsime oita ikimoshirewaitantari. Ikaayetzi amanantayetatsiri oitarika, ontzimatye roshiyakagairo te iri ashityaawoneme. <sup>31</sup> Tzimatsirika oshek-itzimoyetziri oitarika, ontzimatye roshiyakagairo, te opantaperotawo. Tema irootaintsi ompeyashiwaitaiya okaatzi tzimayetatsiri kipatsiki, okaatzi antapiintawetari.

<sup>32</sup> Iroowa nokowakagaimiri eerokapaini eero okantzimoshirewaitantzimi mawoini jiroka. Ikaatzi mainaritatsiri, inkamaityaawo rantairo ikowiri Awinkatharite, rinimotakaantyaariri. <sup>33</sup> Iriima aawakainchari, ontzimatye rinimotakaayetairo iina, inkenkithashiretakotapiintairo rantawaire jaka isaawiki. <sup>34</sup> Piñaakero, apite onkantya roshiretakotapiintaiyaari. Ari onkantyaari mainawotatsiri eejatzi ewankawotatsiri, onkamaityaawo ikowiri Awinkatharite, tsikarika oiyeta antayetzi eejatzi okaatzi okenkithashiretari. Irooma aawakainchari, ontzimatye inimotakairi oime, onkenkithashiretakotairo eejatzi antawaire jaka isaawiki. <sup>35</sup> Tera noshintsineentatyeemi nokantantzimiro jiroka. Iro kameethatatsiri nonkantayetemi nominthatakaantemiri pantayetairo kameethatzimotemine, pinkamaitantaiyaariri Awinkatharite.

<sup>36</sup> Tzimatsirika ashityaawone rewankawote antawokitaintsine, iñaakerorika kowake aye oime, ontzimatye raakairo, tera okaariperotzi aawakaiya. \* <sup>37</sup> Iriima ashitawori ewankawo, kaari kowatsine aawakaiya, kameethatake, tema iro ikowakeri ranteri irirori. <sup>38</sup> Ari okantari. Arika aawakaakya rewankawote, kameethatake. Irooma eerorika rakotairo, iro kameethaperotatsiri rantero.

<sup>39</sup> Jiroka antairi iinantaitari: okowaperotatya ontsipatapiintaiyaari oime eeniro aawakaaga. Irooma arika inkamapithatakero, isaikashiwaitanaiyaarika iroori, kantacha agai itsipa shirampari, iro kantacha ontzimatye inkemisantzinkarite irirori. <sup>40</sup> Iro kantacha eenitatsi nokenkithashiretari naaka, ari onkimoshireperoteri tsinane isaikashiwaitaiyaarika, eerorika agai itsipa oime. Iriira Itasorenka Pawa ñaawaitakaanawori jiroka.

## 8

### *Owanawontsi rashitakagaitariri oshiyakaawontsi*

<sup>1</sup> Iroñaaka nakayeteri osampikowentzirori owanawontsi rashitakagaitariri oshiyakaawontsi. Eenitatsi ayotakotzirori jirokapaini, kaari riyoyetzi itsipa kemisantzinkaripaini, kantachama asagaawentyaawo. Eeromaita amatziro jiroka, iro kameethatatsiri etakotaiyaari kemisantzinkaripaini kaari yotakoterone, athotyaakotairo anthaamentashiretakaantaiyaariri. <sup>2</sup> Iro itzimantari asagaawentawaitachari, kantatsiri: “Naaka yoperotzinkari.” Iro kantacha tera riyonetzi ikaatzi kantayetatsiri. <sup>3</sup> Iriima Pawa riyoyetzi irirori ikaatzi nintziriri.

<sup>4</sup> Nakawakeri ikaatzi osampikowentzirori owanawontsi rashitakagaitariri oshiyakaawontsi. Tema ayotaiyini aakapaini iita ikantaitziri oshiyakaawontsi, tekaatsi rañaamento. Apaani ikanta Pawaperori tekaatsi itsipa pawatatsine. <sup>5</sup> Niyotzi

\* **7:36** Kantakotachari jaka “ashityaawone rewankawote”, irijatzi kantakotachari rakotagaitakeri iinantyaawo ewankawo.

eenitatsi oshiyakaawontsi jaka isaawiki iwawanetashiitaitari, eejatzi jenoki eenitatsi itasorentsitashitaitari. Iriitake iitashitapiintaitari: “pawa”, iitzitaitari eejatzi “nowinkatharite”. <sup>6</sup> Irooma aakapaini, apaani ikanta aitziri “Pawa”. Iriitake ashitairi wetsikayetakerori maawoini. Iri kantakaawori atzimayetantari. Ari roshiyari aitziri “Nowinkatharite”. Iriitakera Jesucristo, riwetsikakagaitakeri maawoini. Iriira kantakaawori añaantaari aakapaini.

<sup>7</sup> Iro kantacha tzimatsi osheki kaari yotakoterone jiroka. Iroowa itzimantaari ametashitapiintawori rashitakaari rowanawo oshiyakaawontsi, rowimaitawo owanawontsi. Jirika atziripaini antapiintashitakawori, kemisantzinkari rinaweta, jentashireri ikantayetaka iroñaaka. Arika rowayetyaawo owanawontsi oshiyawaitakawo rantaitziro kaariperori. <sup>8</sup> Iro kantacha, tera iro owanawo kankayawone raakameethatantairi Pawa. Arika ontzime owanawontsi apinkapiintanewo, te antero kaariperori. Arika atziwaiwetakyaawo jiroka, te owameethashiretai eejatzi. <sup>9</sup> Iro kantacha ontzimatyepaamaawentaiya, potzishirewaitzirikari jentashireriite, pinkantayete: “Nisaikashiwaita naaka, kantacha nowayetyaari iiyetarika.” <sup>10</sup> Pinkenkithashiretakotero oitarika awisatsine raminemirika jirikapaini jentashireri, arika iñeemi poyaawo owanawontsi rashitakaitariri oshiyakaawontsi. Okantawetaka pikantapiintzi eerokapaini: “Niyotzi naaka, te otzimi rañaamento oshiyakaawontsi,” aamaa ari rimatanakero royaari irirori. <sup>11</sup> Iroowa rantantanakawori jentashireri kaariperotzimotziriri. Eerokaga kantakaashitakawori. ¿Tema piwetari “Iyekiite?” ¿Tema ikamawentayetairi irirori Cristo? <sup>12</sup> Pimatakerowa eeroka pikaariperotakairi jirikapaini. Powatsiperotakeri, peentashiretakaakeri. Pikaariperotzimotakeri eejatzi eeroka Cristo. <sup>13</sup> Irootake eero nowapiintantaarime naaka tsimeri, eero noitzipinaashiretantari ikaatzi noiyetairi “Iyekiite”.

## 9

### *Rimonkaataiteniriri Otyaantaperoriite*

<sup>1</sup> ¿Eeroma okanta naaka nisaikashiwaitya? ¿Kaarima naaka Otyaantaperori ñaakeriri Jesús, Awinkatharite? ¿Kaarima naaka kemisantakagaimiriri Awinkatharite? <sup>2</sup> Eenitatsi itsipa kaari yotenane naaka Otyaantaperori. Irooma eerokapaini piyotaiyini, tema eeroka ikemisantakayetai Awinkatharite nokenkithatakoyetaimiri, ari piyotairi naakatake Otyaantaperori.

<sup>3</sup> Jiroka nonkanteriri ikaatzi kenkithatakowaitashitanari: <sup>4</sup> ¿Tema okameethatzi nakiyootantakowaite naaka? <sup>5</sup> ¿Tema okameethatzi ontzime noina kemisantatsiri? Arikame ontzime, ¿eeroma okameethatzi naanakero pisaikaiyinira eerokapaini? Iroowa rantapiintziri itsipa Otyaantaperoriite, irojatzira rantapiintakeri irirentzitari Awinkatharite, eejatzi Cefas. \* <sup>6</sup> Piyotaiyini eeroka, osheki nokamaitakawo nantawaitzi naaka nañaantyaari, irojatziri rantziri Bernabé. ¿Intama naakaite te rishinetaitanawo nipakairo nantawaire nonkenkithatakaantantyaari? <sup>7</sup> Pinkenkithashiretakotero tsika ikanta owayeri tzimatsiri reewarite. ¿Kameethatatsima ripinateri reewarite impantyaariri rowanawo? Arira ikantzitari pankiwaitatsiri, ¿tema okameethatzi rowaiyaawo iwankire? Eejatzi ikantzita pirawaitachari, ¿tema okameethatzi inintagaiyaari ipira? †

<sup>8</sup> ¿Pikenkithashiretama eerokapaini okaatzi nokantayetakemiri iro rametaiyarini atziripaini? Irojatziri ikenkithatakoitzitakeri Inintakaantaitanewoki. <sup>9</sup> Tema rosankenatzitaka pairani Moisés-ni, kantatsiri: Arika pantawaitakairi pipira, te okameethatzi ritasheneentawaite.

\* **9:5** Ikantaitziri jaka “Cefas”, iriitake Pedro. † **9:7** Kantakotachari jaka “ipira”, iri cabra-paini, riraitapiintziri iteni.

¿Pikenkithashiretama apatziro pipira roshiretakotari Pawa ikantantakari? <sup>10</sup> ¡Te! Aakayetakera roshiyakaawentaitakeri. Jiroka otsipa roshiyakaawentaitakai ikantaitzi: Eenitatsirika pankiwaitzinkari, tzimatsirika otekakiwaitatsiri, iroowa rantawaitanta-wori jiroka rowantaiyaari.

<sup>11</sup> Arira okanta eejatzi, naakaga awentaashiretakaayetaimiri, ¿tema okameethatzi pimpayetaina nañaantyaari? <sup>12</sup> Iroowa pantapiintakeniriri itsipapaini janta. ¿Tema okameethatzi pimatzitena naaka? Tera notsiwakakaapiintemiro nonkowakotemi, osheki nokisashitakawo nonkantemirome. Te nokowi neshitakaimiro petanakawo pikemisantairo Kameethari Ñaantsi, nokenkithatakoyetaimiri Cristo.

<sup>13</sup> ¿Tema piyotzi eerokapaini rowapiintawo Imperatasorentsitaarewo tzimagaantat-siri rashitakagaitawori tasorentsipanko? ¿Tema piyotaiyini, ikaatzi piratsi rashitak-agaitariri Pawa taapokimentotsiki rowapiintari Imperatasorentsitaarewo? <sup>14</sup> Ari okantari eejatzi okaatzi ikantanari Awinkatharite, nokaatzira nokenkithayetairo Kameethari Ñaantsi ontzimatye ripinayeetaina nantantyaawori.

<sup>15</sup> Te noshintsineentzimi pairani nisaikimotantzimiri pantayetenawowa. Tera noshintsineentzimi iroñaaka okaatzi nosankenatakemiri. Iroowa nokowaperotake nonkameme naaka, tekera itzimanakeeta iita kantatsine: “Tera iroopero inatzi rasagaawentawaitakari Pablo.” <sup>16</sup> Te nasagaawentawaityaawo nokenkithatakaayetaimiro Kameethari Ñaantsi. Oshiyawaitaawo iriime Pawa shintsineentanawori nantairo, okantawetaka te naaka kowashiwaityaawone. Eerorika nimatairo jiroka, ¡kantamatsitaitana naaka!

<sup>17</sup> Naakame kowashityaawone nantero, ari nithotyaakotakerome ripinaitena. Te ari onkantya, tema Pawa owakenari nantairo jiroka. <sup>18</sup> Arira okantakari, tekaatsi oitya noyaawentantyaari pipinayetaina eerokapaini. Tema noshiyakaakero iroome ripinaitenarime okaatzi noñirowa nokimoshirewaitai. Tema iro nokimoshiretanta-ari iroñaaka, tera nonkowakotaimiro nokenkithatakaayetaimiro Kameethari Ñaantsi. <sup>19</sup> Iroowa nisaikashiwaitantaari, tera intzime iita pinatenane. Iro kantacha naakatake oshiyakaawentachari noshikaarewo. Iroowa nawisakoshiretakaantaariri osheki atziri. <sup>20</sup> Ari nokantzitawo eejatzi nontsipatyaaririka nosheninkapaini Judá-ite, nantz-itawo okaatzi rametari iriroripaini, rawisakoshiretantaiyaari. Irojatzit nantzitari nontsipatyaaririka pankenatawori Inintakaantaitanewo, nimonkaatziro naaka eejatzi, okantawetaka niyotzi tekaatsi otsiwakakaawaitenawone nompokenatyaawo, iroowa rawisakoshiretantaiyaari iriroripaini. <sup>21</sup> Ari okantzitari, arika nontsipatyaari kaari kemakoterone Inintakaantaitanewo, noshiyakotari iriroripaini, iroowa rawisakoshiretantaiyaari. Iro kantacha tera nipiyathatari Pawa, tema ontzimatye nimonkaatero ikantanari Cristo nantero. <sup>22</sup> Ari okantzitari, arika nontsipatyaari jentashireri, noshiyakotari rantayetziri iriroripaini, iroowa rawisakoshiretantaiyaari. Ari nokantzitariri maawoini inashiyetachari atziripaini, iroowa rawisakoshiretantaiyaari apaanipaini irirori. <sup>23</sup> Iroowa nantantawori maawoini jiroka ompoñaantyaari nonkenkithatakaantairo Kameethari Ñaantsi, iroowa nontsipatantaiyaariri eejatzi naaka, ritasonkawentantainari.

<sup>24</sup> ¿Tema pikenkithashiretziro jimpe ikanta monkatziyawakaachari rishiyaiyani iñaantaityaariri jimpe itzimi etyaawone rareetya? Apaani inkantya etyaawone rareetya, iriitake ripinaiteri. Arira pinkantaiyaari eerokapaini. <sup>25</sup> Ikaatzi ñaantapiintakawori rimonkatziyawakaantyaari, ontzimatye inkempoyeeya, inkisashityaawo ritziyetyaawo iñaamayetari. Irootake rantantapiintawori jiroka ompoñaantyaari ripinaiteri, ramanthaitantaiyaari shiwithatapo. Iro kantzimaitacha sampianero inatzi jiroka. Irooma okaatzi oshiyakaawentachari ripinaitairi aakapaini, eero ithonkaawo. <sup>26</sup> Irootake noshiyakaawentantapiintawori naaka oshiyawaitawo nishiyatyeeme, te nitempaawaitzi. Noshiyakaakero noñaashintsiwaityaawome nonkaposante,

te nonkaposashiwaityaawo tampyainka. <sup>27</sup> Okaatzi nokemaatsiwaitakawo nitziwentawaitaka, noshiyakaawaitakero nimperatatyeyyaawome nowatha. Irootake nantantayetakawori, eero roshiyakagaitantana ranaakoitziri, iroowa eero aminaashiwaitanta nokenkithatakaantapiintakera.

## 10

### *Ikaminaawentaitantziro okaatzi ipinkathatashiyeetari*

<sup>1</sup> Iyekiite, eero apeyakotziro iñaayetakeri acharineete. Iroowa ipampithatakeri menkori janta ochempiki. Rimontyaakawo inkaare rowiryaaaitapaintziri. <sup>2</sup> Ari roñaagantakero rawentaashiretari Moisés-ni, ipampithatakeri menkori, rimontyaakawo inkaare. \* <sup>3</sup> Rowaiyakawoni eejatzi acharineete okaatzi ritasonkawentakeri. <sup>4</sup> Riraiyakeroni ñaa ritasonkawentaitakeri shitowaatzimotakeriri shirantaaki. Tema iriitake Cristo tsipashiretakariri, iri oñaagakeriri ñaa shirantaaki. Iri Cristo oshiyakawori shirantaa eejatzi. <sup>5</sup> Iro kantacha, osheki ikaataiyini kaari inimoterine Pawa, irootake ikamagaantantakari ochempiki.

<sup>6</sup> Okaatzi awisaintsiri, eenitatsi oshiyakaawentakairi, eero oshiyantari iriroripaini, añaamayetyaawo antero kaariperori. <sup>7</sup> Te okameethatzi antsipatyaari itsipapaini thaa-mentariri oshiyakaawontsi. Tema iro rantayetakeri acharineeteni pairani, jiroka ikenkithatakoitakeriri:

Saikaiyakeni atziri, rowawaitaiyani, rirawaitaiyini.

Ari ikatziyaiyanakani ithaamentawaitaiyani. †

<sup>8</sup> Te onkameethate eejatzi antayetero koweenkatatsiri. Iro rantayetakeri achari-neete, iroowa iñaantakawori ikamagaantake apaani kiteesheri ikaatzi 23,000 atziri.

‡ <sup>9</sup> Te okameethatzi eejatzi owatsimairi Pawa. Iro rantakeri pairani achari-neete, iroowa iñaantakawori ratsikayetakeri maanke. § <sup>10</sup> Te okameethatzi eejatzi añaawaipookite. Iro rantayetakeri pairani acharineete, iroowa iñaantakawori raperaatakeri iitaitziri “Thonkaatanteneri”. \* <sup>11</sup> Maawoini jirokapaini awisaintsiri, irootake roshiyakaawentaitakairi, rosankenatakoitakero ayotantaawori iroñaaka aakapaini, tema asaikantatyaawo ithonkimataawowa kipatsi. <sup>12</sup> Paamaawentaiya eerokapaini. Eero pikantawaitzi, “Eero nimatziro naaka jiroka,” omapokimikari pantanakero eeroka. <sup>13</sup> Iro kantacha piñaakerorika piñaamashirewaityaawo, pinkenkithashiretya tera apaniroini pikanta eeroka rimatakeri itsipapaini atziri roitsinampaakero. Kempoyaa rowakai Pawa, eero rishinetzimi iñaamashireperotakaitemiro kaari poitsinampairi. Arika piñaamashirewaitya, iriitake Pawa oñaayemirone tsika pinkantya poitsinampaantyaawori, oshiyawaitanakyaawo pishiyapithatatyeeerome.

<sup>14</sup> Netakotane, piñeeririka itsipapaini ipinkathawaitziro oshiyakaawontsi, poshiyakayero pishiyapithatatyeeerome. <sup>15</sup> Tzimatsi iroñaaka nonkantayetemiri, noshiyakaatyeeemi yotaneri pinatyeeeme nonkamantemiro. Pinkenkithashiretakotero.

<sup>16</sup> Tema apatotapiintaiyani irawaitaiyini, akenkithashiretakotziro ramanamanaatakotari pairani Cristo, riraiyakeroni riyotaanewo, ¿Kaarima jiroka withaawakagaantsi, apiyoyetaga oimoshirenkiri Cristo ikapathainkawentakaira? Arika apatotaiyaani akiyootawakaya, ¿Kaarima jiroka withaawakagaantsi, oimoshirenkiro iwatha Cristo, akenkithashiretakotziro ikamawentayetakaira? <sup>17</sup> Arika owayetakyaawo,

\* **10:2** Rimatakeri oshiyawori omitsitsiyaataantsi, tema arika romitsitsiyaataitya, roñaagantairo eenitatsi rawentaashiretanaari. † **10:7** Okaatzi ikantakoitziri jaka “ithaamentawaitaiyani”, iro rantakeri pairani icharineete Judá-ite riwetsikake oshiyakaawontsi roshiyakaakeri iryaani waaka, iri ikimoshirewentakeri, ipinkathawaitziri oshiyakaawontsi. Paminero eejatzi “Tsika Ikantaitziro Ñaantsipaini” tsika okantakota “Inintakaantaitanewo”.

‡ **10:8** Paminero eejatzi “Tsika Ikantaitziro Ñaantsipaini” tsika ikantakota “Balaam”. § **10:9** Paminero eejatzi “Tsika Ikantaitziro Ñaantsipaini” tsika ikantakota “Moisés”. \* **10:10** Paminero eejatzi “Tsika Ikantaitziro Ñaantsipaini” tsika ikantakota “Coré”.

intzimawetya osheki atsipatari apiyotaiyani, maawoini owaiyakawoni riwetsikaitakeri apapathawoini. Ari akantayetaari aakapaini, oshiyakawo apapathatatsiri. <sup>18</sup> Ari ikantayetari eejatzi nosheninkapaini Israel-iite, riwithaawakaayeta eejatzi iriroripaini, ritaayetairiri rashitakaariri Pawa janta taapokimentotsiki. <sup>19</sup> Irootake oshiyawori rantapiintziri itsipasatzi atziripaini ritaayetziniri iwawanewaitashitari. ¿Poshiyakaatzi nokantatzi añaatsi iwawanewaitashitakari? <sup>20</sup> ¡Te! Iro kantzimaitacha eenitatsi peyari amawenawaitachari, iri roshiyakairi iwawane, iriitake rashitakaapiintakari rowanawo. Kaari Pawa rashitakaiya rowanawo. Iro kaari nokowakaayetzimi eerokapaini pintsipatyaari powayetaiyaawo rashitakaitariri peyariite, piwithagaarikari iriroripaini. <sup>21</sup> Pirakerorika rashitakaitariri peyari, te okameethatzi pirawaitashityaawo arapiintziri oshiretakotari Awinkatharite. Powakaworika rashitakagaitariri peyari, te okameethatzi eejatzi powashiwaityaawo owapiintari oshiretakotari Awinkatharite <sup>22</sup> ¿Akowatziima owatsimairi Awinkatharite? ¿Anairima irirori otzimi ishintsinka?

*¿Notzikashiretairima pinkathatairiri Pawa?*

<sup>23</sup> Jiroka ikantaitzi: “Ishinetaantsitzi nantayetero oitarika.” Iro kantacha te opantawo maawoini rantaitero. Imaperowetatya ishinetaantsiweta antayetero oitarika. Iro kantacha eenitatsi oita antayetziri kaari ominthashiretakayaarine itsipapaini rantayetairo kameethatatsiri. <sup>24</sup> Te okameethatzi ankenkithashiretakowaityaawo akowayetziri aakapaini, iro kameethatatsiri añaashintsiwentaiyaawo kameethatzimotziriri itsipapaini. <sup>25</sup> Arika pinkowimate pamanante wathatsi, eero posampikowentziri, pinkante: “¿Ipoñaatyaawoma jirika wathatsi ritagaitzirira oshiyakaawontsi?” te ari onkene, pamanantatyeeri, poyaari. <sup>26</sup> Tema iri Awinkatharite, ashitari ikaatzi tzimayetat-siri kipatsiki. <sup>27</sup> Ari okantzitari, arika inkaimemi pakiyooteri kaari kemisantat-sine, pakiyooteri pikowirika. Eero posampitantzi pinkante: “¿Ipoñaatyaawoma jirika wathatsi ritagaitzinirira oshiyakaawontsi?” Poyaari. <sup>28</sup> Irooma eenitatsirika kaman-temine, inkantemi: “Jirika wathatsi ipoñaawo tsika ritagaitziniri oshiyakaawontsi,” eero powari. Iroowa pantantakawori jiroka pikenkithashiretakotanakarika kaman-takemiri, pikenkithashiretanaka eejatzi kantacha rowaariperoshiretante. <sup>29</sup> Tema nokantakemira: “kantacha rowaariperoshiretante,” te iro nonkantakote rowaariper-oshiretemi eero, iri nokantakotzi kamantakemiri, kantacha rowaariperoshireteri irirori. Aamaaka arika posampitakena naaka, pinkantena: “¿Oitaka nitzitanta-waityaariri ikenkithashiretakomatsitana itsipa atziri? <sup>30</sup> Tema niwetharyaawen-tari Pawa noñaayetziro nowanawo, ¿oitaka nonkenkithashiretakotantyaawori onkaate inkiñaanewentakoitenari?”

<sup>31</sup> Jirokaga nonkantemiri: Arika powawaitya, pinkantashirete: “Eenitatsirika ñeenane nowawaitya, ¿notzikashirewaitzirima eero ipinkathatantaari Pawa?” Ari pinkantzityaawo pirawaiterika, eejatzi pantayetairorika oitarika. <sup>32</sup> Ontzimatye paamaawentaiya eero poitzipinaashiretantari Judá-itetatsiri, kaari Judá-itetatsine, pitsipatapiintari pipiyowentari Pawa, maawoini. <sup>33</sup> Iroowa nantairi naaka, nopankenatawo ninimotakaantyaariri atziripaini okaatzira nantziri. Te apatziro nantero kameethatzimotanari naaka, nantzitawo kameethatzimotziriri itsipapaini, ompoñaantaiyaari rawisakoshiretai.

## 11

<sup>1</sup> Poshiyakotainawo naaka. Iroowa nimatairi naaka noshiyakotaari Cristo.

*Owashikayinawo tsinane*

<sup>2</sup> Nothaamentaimi iroñaaka, tema pikamaitakawo okaatzi nametakaakemiri, okaatzi niyotaakemiri. <sup>3</sup> Iro kantacha, jiroka nokowiri piyotero: Iriira Cristo reewaritari shiramparipaini. Iriima shiramparipaini iriira ewaritari tsinane. Iriima Pawa iriira



reewaritari Cristo. \* <sup>4</sup> Okaatzi ametapiintari ashiramparinkaki, te apashikayinata arika amaña, eejatzi arika ankenkithatakaante. Arikame ampashikayinatyaame, te apinkathatziro aito. † <sup>5</sup> Irooma tsinane kaari pashikayinatachane amaña, arika onkenkithatakaante eejatzi, tera opinkathatantzi. Oshiyakotakawo tsinane ameezirori oishi. <sup>6</sup> Apaani tsinane kaari kowatsine ompashikayinatya, iweperetyakityaatatya. Te ari onkene, eero iweperetyakita, tema riyotaitzi kaaniwentaantsi inatzi, ontzimatyete ompashikayinatya. <sup>7</sup> Iriima shirampari eero ipashikayinawaita irirori, tema roshiyakari Pawa, iri Pawa owaneenkatakaariri. Irooma tsinane, iri shirampari owaneenkatakaawori. <sup>8</sup> Tema pairani owakera riwetsikantakawori Pawa etakawori tsinane, iro raake iwatha shirampari riwetsikantakawori. Irooma owakera riwetsikantakariri Pawa etanakawori shirampari, te rayiro owatha tsinane. <sup>9</sup> Ari okanta, owakera riwetsikantawori Pawa tsinane iri riwetsikakeniri shirampari, tema tekaatsi intsi-patya. Te iro tsinane riwetsikaiteni shirampari. <sup>10</sup> Irootake ompashikayinatantyaari tsinane riyotaitantyaawori eenitatsi opinkathatanewo iroori, ompoñaantyaari inimotakairi maninkariite. <sup>11</sup> Te otzimashita tsinane, te itzimashita shirampari eejatzi, apitekeroini rashitari Awinkatharite, ikoityaawakaa apitekeroini. <sup>12</sup> Tema etanakawori tsinane iwatha shirampari riwetsikaitake. Iro kantacha eejatzi, ikaatzi shirampariyetatsiri iroñaaka, iroowa tsinane owaiyayetairiri. Tema jirika apitekeroini, iriira Pawa kantakaawori itzimayetantari. <sup>13</sup> ¿Oitaka pikenkithashiretakotawori okaatzi nokantakemiri? ¿Kameethatatsima tsinanepaini amañaari Pawa eero opashikayinatanta? <sup>14</sup> Aakapaini ashiramparitzika iroñaaka, te ametawo osanthairo aishi, aritake ankaantake. <sup>15</sup> Irooma tsinanepaini, iro owaneenkatakaawori oishi. Oshiyawaitanakawo iroome oishi ompashikayinatyaarime. <sup>16</sup> Tzimatsirika kowatsine inkisakowaityaawo, jiroka nonkanteriri: Irootake nametapiintakari naaka niyotaantziro. Irojatziki kantapiintakeri piyowentariri Pawa tsikarikapaini janta.

*Aminaashiwaita roimoshirenkaitziro rakiyootanewo Awinkatharite*

<sup>17</sup> Iro kantzimaitacha, eenitatsi otsipa nonkantakotemiri, eero nasagaawentzimi. Tema te okameethatzimotana pantapiintakeri pipiyotaiyanira. Onkaateme kameethatzimotemine, irojatziki rowasankewentaitemiri. <sup>18</sup> Tema nokemake ikamantaitakena pinashiyetawakaaka janta papatotapiintaiyanira. Iro nonkemisanterime, <sup>19</sup> tema iro awisapiintatsine jiroka. Eenitatsi kowashiwaitachari inkantaiteri: “Iriiperori jirika.” <sup>20</sup> Ari okantapiinta papatotaiyani eerokapaini pakiyootawakaiyani, aminaashiwaita poimoshirenkiro aitziri “Rakiyootane Awinkatharite.” <sup>21</sup> Tema powapiintakawo intsipaita pashitari. Tasheneenta ikantayeta itsipapaini. Tzimatsi itsipa shinkiwaiyetachari. <sup>22</sup> ¿Arima onkantya? ¿Tekaatsima pipankopaini tsika powapiintyaawo pashitari, jimpe pirawaitapiinte? ¿Pimanintatziirima apatotapiintachari ipinkathatziro Pawa? ¿Pithainkatziirima koityaawaitatsiri? ¿Pikenkithashiretama ari nasagaawentakemiro? Eerowa.

*Etantanakawori rakiyootane Awinkatharite*

(Mt. 26.26-29; Mr. 14.22-25; Lc. 22.14-20)

<sup>23</sup> Okaatzi niyotaakemiri pairani tsika okantakota etantanakawori “Rakiyootane Awinkatharite,” iriitake Awinkatharite yotaakenawori. Jirokaga: Okanta pairani tsireniri tekera ripithokashitaitariita Awinkatharite Jesús, raakero pan,

\* **11:3** Kantakotachari jaka “reewaritari”, irojatziki kantakotachari “iitoitari”. Tema ariwaitake okaatzi saikantairi aitoki otzimi kenkithashiretakagairi, akowantari antayetero akowayetziri, oshiyawaitakawo iroome aito jewataineme antayetero oitarika. Kantacha ankante: “Noitotari Cristo.” Irojatziki oshiyakawori arika ankante: “Reewaritaana Cristo.” † **11:4** Kantakotachari jaka “te apinkathatziro aito,” te ayotakoperotziro oita kantakotachari “aito”. Tema tzimatsi kantayetatsiri, iri Cristo oshiyakaawentziri “aito”, oshiyawaitakawo ankanteme “te apinkathatziro Cristo.” Eenitatsi itsipa kantatsiri iro ikantakoitziri “aito”. Tema arika ampashikayinatya amaña, oshiyakotakawowa tsinane. Tera apinkathatziro itsipapaini atsipatakari apiyoiyani.

<sup>24</sup> riwetharyaawentakawo, itzipetowakero, ikantake: “Poyaawo, nowatha inatzi, tema iro kamawentemine. Irootake pinkenkithashiryaaantapiintinari.” <sup>25</sup> Ikanta ikaatakero rowaiyani, raakotakero riraiziri, ikantzi: “Niraa inatzi, irootake shitowaatsine rawisakoshiretantaiyaari osheki atziri. Irootake pantapiintairi arika pirero, arika pinkenkithashiryaaakotaina.” <sup>26</sup> Arika powapiintaiyaawoni, pirapiintairo eejatzi, iro piyotakaantaiyaariri atziripaini ikamawentayetakai Awinkatharite. Irootake pantapiintairi irojatzi ripiyantaiyaari Awinkatharite.

### *Owaminthawaitashitawori rakiyootane Awinkatharite*

<sup>27</sup> Tzimatsirika owaminthawaitashitawori, iraminthawaitashitawori eejatzi, oshiyawaitakawowa iriime Awinkatharite rithainkawathatakeme, rithainkakero eejatzi riraa. <sup>28</sup> Tema iro kameethatatsi, tekera oyaawoota, tekera ireroota, ontzimatyé ankenkithashiretakotawakya kameethashiretakairika. <sup>29</sup> Tzimatsirika owaminthawaitashitakyaawone, iraminthawaitashitakyaawone eejatzi kaari kenkithashiretakoperoterone oshiyakaawentachari “iwatha”, ari rowasanketakeri. <sup>30</sup> Irootake itzimantayetari makowaitatsiri, mansiyawaitatsiri, eenitatsi eejatzi makoryaayetaintsiri. <sup>31</sup> Irooma akenkithashireperotanakarika tekera owanakyaawoota, eero añirowasanketai Pawa. <sup>32</sup> Iro kantacha arika rowasankewaitakai, iñaantatyaira roshiyakagai aakarikame itomipero. Omponaantyaari eero rowasanketantai paata, roshiyakagairikari tsika inkantairi isaawikisatzipaini.

<sup>33</sup> Iyekiite, irootake okowantari poyaakotawakaiya eerokapaini, eero posatekasatekawaita arika pimpiyotaiyaani pakiyootawakaiya. <sup>34</sup> Pitasheyatziirika, powanakya pipankoki tekera piyaatanakeeta, eero otzimanta patsipewaityaari papatotaga. Arika nareetakya pinampiki, ari nithotyeemiro niyotaimiro jirokapaini.

## 12

### *Tasonkawentashiretaantsi*

<sup>1</sup> Iroñaaka nonkantemiro tsika okantakota tasonkawentashiretaantsi. Iyekiite, te nokowi ikompitzimotemi. <sup>2</sup> Piyotaiyini eeroka, pairani tekera pikemisantayetana-keeta, eenitatsi piyenakaashitanewo, rominthashiretakaapiintaitzimi piyaatashiteri oshiyakaawontsi kaari ñaawaitatsine. <sup>3</sup> Irootake nonkamantantemirori jiroka: Tzimatsirika kenkithatakantatsine, inkantapaake “Kamaari rini Jesús,” kaari Itasorenka Pawa ñaawaitakairine jirika. Irooma arika inkante: “Awinkatharite rinatzi Jesús,” iriira Tasorenkantsi ñaawaitakairiri.

<sup>4</sup> Tema apaani ikanta Tasorenkantsi, iro kantacha tzimatsi osheki jimpe ikenakairo ritasonkawentayetakai antantakawori. <sup>5</sup> Apaani ikanta Awinkatharite, iro kantacha tzimatsi osheki jimpe ikenakairo antawaitantaanariri irirori. <sup>6</sup> Apaani ikanta Pawa, iro kantacha tzimatsi osheki jimpe ikenakairo opoñaantari antayetairo oitarikapaini. <sup>7</sup> Maawoini aakapaini, eenitatsi oita rantakaayetakairi Tasorenkantsi opoñaantari athaamentakaayetari itsipa kemisantzinkaripaini rantayetairo irirori kameethatatsiri. Ari ikenakairori Tasorenkantsi roñaaganta, rimatakaayetairo oitarika. <sup>8</sup> Thame oshiyakaawentawakero, tzimayetatsira ritasonkawentakeri Tasorenkantsi riyotanetantari. Tzimatsi itsipa ritasonkawentakeri Tasorenkantsi ikenkithatakotantawori okaatzi ikenkithashiretanaari. <sup>9</sup> Tzimatsi itsipa ritasonkawentaperotakeri Tasorenkantsi rawentaashireperontantaari. Tzimatsi itsipa ritasonkawentakeri Tasorenkantsi rowashinchaantantari. <sup>10</sup> Tzimatsi itsipa rimatakaakeri ritasonkawentante, itsipa rimatakaakeri inkamantantanerite, itsipa rimatakaakeri rapiitairo okaatzi ikamantantakeri Kamantantanerite, iroowa iñaantyaawori iriirika Tasorenkantsi matakaakeriri inkamantantero. Tzimatsi itsipa rimatakaake riñaawaiyetero otsipasato ñaantsi, tzimatsi itsipa rimatakaake rowaagañaanetairo okaatzi ikenkithatakoitakeri. <sup>11</sup> Maawoini jiroka irootake

ritasonkawentantayetakeri Tasorenkantsi, rantakaantakero oiyetarika. Apaani ikanta Tasorenkantsi. Iriitake matzirori ritasonkawentayetakai aakapaini, rantakaayetairo okaatzi ikowiri irirori.

<sup>12</sup> Iroowa awithaawakaantayetaari, roshiyakaayetai aakame iwatha Cristo. Tema tsika akantawathayeta, irootake matakaayetairori oitarika. Ari akantayetaari eejatzi aakapaini, inashiyeta antayetairo oitarika. <sup>13</sup> Tema apaani ikanta Tasorenkantsi omitsitsiyaatakaayetairi, iro opoñaantari awithaawakaantaari, okantawetaka aakarika Judá-ite, Grecia-thato, noshikaarewo, saikashiwaitachari, maawoini. Oshiyawaitaawo antsipatawakagaiyaame maawoini irapiintairo ñaa kañaanetakaantatsiri, oshiyakaawentakerira Tasorenkantsi.

<sup>14</sup> Pinkenkithashiretakotero tsika okanta awatha. Apaani akanta awathaki, iro kantacha tzimatsi osheki inashitachari antayetziri. <sup>15</sup> ¿Kantachama iñaawaite aitzhi, iñaanatero ako, onkantero: “Te opantana naaka, te noshiyimi eeroka potaiyayetziro oitarika?” ¿Tema opantzitawo aitzhi? <sup>16</sup> ¿Kantachama iñaawaite akempita, iñaanatero oki, onkantero: “Te opantana naaka, te noshiyimi eeroka piñaayetziro oitarika?” ¿Tema opantzitawo eejatzi akempita? <sup>17</sup> Iroome yoshiitachaneme oki awathaki, ¿arima ankemakeme? Iroome yoshiitachaneme akempita, ¿arima ankemasankatantakyaawo? <sup>18</sup> Ari okantari awatha. Tema Pawa matzirori riwetsikakero, jimpe okantajaanta ikowakeri irirori riwetsikero, iroowa inashitantari oitarika antayeteri. <sup>19</sup> Arime oshiyawakayaame maawoini tsika okantayeta awatha, eero awathatawome. <sup>20</sup> Ari okanta, apaani inaweta awatha, iro kantacha tzimatsi osheki inashiyeta oita antantayetawori. <sup>21</sup> ¿Kantachama iñaawaite oki, iñaanatero ako, onkantero: “Naaka pantaperotawori, irooma eeroka, te?” ¿Kantachama iñaawaite aito, oshiyakotyaawo okaatzi iñaawaitakeri aitzhi? <sup>22</sup> ¡Eero imatziro! Tema okaatzi tzimatsiri awathaki kaari pantaperotzimotaine, iroowa pantaperotawori. <sup>23</sup> Iro akithaatantapiintari, amaniro awathapaini, oshiyakaakero pinkatharentsi inatye janta. Okaatzi rimanakoitziri awathaki, oshiyakaakero iroome pantaperotyaawoneme. <sup>24</sup> Irooma okaatzi kaari rimanaitapiintzi awathaki iñaayetapiintaitziri, tera oshekiperotzi oita antenirori iroori. Piñaakero, iroowa rantakeri Pawa riwetsikantakairori maawoini awatha, okaatzi oshiyimowetakairi kaari pantaperotyaawone, irootake oshiyakairi pantaperori inatzi. <sup>25</sup> Eero okanta antzipithareero okaatzi awathatari. Tema iro kameethatatsiri, anethaperotairo maawoini awathatari. <sup>26</sup> Arika owatsinaawaitya eepichokiini awathaki, oshiyawaitakawo owatsinaawaityaame maawoini awathaki. Arika owaneenkawaitya eepichokiini awathaki, kimoshire ankantya maawoiniki awatha.

<sup>27</sup> Ari akantayetaari aakapaini akaatzira awentaashireyetaari Cristo, oshiyawaitakawo aakapaini iwathame Cristo. <sup>28</sup> Jiroka ikantakaayetaari Pawa ikaatzi kemisantayetaatsiri: Etanakawori, tzimatsi Otyaantaperori. Apitetanaintsiri, eenitatsi kamantantaneriite. Mawatanaintsiri, tzimatsi yotaantaneriite. Ipoñaapaaka itzimayetanake tasonkawentantaneri, owashinchaantaneri, amitakotantaneri, jewatakaantaneri, kenkithawaiyetzirori otsipasato ñaantsi. <sup>29</sup> ¿Maawoinima Otyaantaperoritzi? ¿Maawoinima akamantantaneritzi? ¿Maawoinima ayotaantaneritzi? ¿Maawoinima atasonkawentantaneritzi? <sup>30</sup> ¿Maawoinima owashinchaantaneritzi? ¿Maawoinima añaawaiyetziro otsipasato ñaantsi? ¿Maawoinima owaagañaanewartzi? <sup>31</sup> Iro kameethatatsiri, pinkowaperotai ritasonkawentaitaimi pantantyaawori kowaperotachari. Iro kantzimaitacha, eenitatsi oita anairori jiroka. Ari nonkamantemiro iroñaaka.

## 13

*Iro kowaperotacha etakotantya*

<sup>1</sup> Thame ankantashitawakya, kantacha naaka niñaawaitero otsipasato ñaantsi riñaawaiyetziri itsipa atziri, nimatzitakyaawome eejatzi riñaawaitziri maninkariite. ¿Tema kameethawaiwetaka jiroka? Iro kantacha terika nimatziro netakotantya nantantawori jiroka, nokameniminthawaitashitakaga. <sup>2</sup> Ari okantari eejatzi, thame ankantashitawakya, Kamantantaneri ninatzi naaka, niyotakotziro kaari riyotakowetaita pairani, nawentaakitari Pawa, ari onkantakyaame roshirinkenawo otzishi rowairo tsikarika janta. ¿Tema kameethawaiwetaka jiroka? Iro kantacha terika netakotantya nantantakawori jiroka, tekaachaajaini nimonkaate. <sup>3</sup> Ari okantari eejatzi, thame ankantashitawakya, arime nompashitanyawo maawoini shekitzimotanari royaari koityaawaitatsiri. Ankantashitawakya, osheki natsipewentakari itsipa, nitaawentawaitakari. ¿Tema kameethawaiwetaka jiroka? Iro kantacha terika netakotantya nimatantakawori jiroka, tekaatsi nonintagaiya.

<sup>4</sup> Ikaatzi etakotantachari, tsinampari rinatzi, neshironkatantaneri, te ikisakowaitaneta, te rasagaawaineta, te iñaaperowaineta. <sup>5</sup> Ikaatzi etakotantachari, te ikaariperowaantetzi, te rithañaawaineta, te ikisaneta, te rowapithaantawo imashirenka. <sup>6</sup> Ikaatzi etakotantachari te ikimoshirewentziro rantakerorika kaariperori, iro ikimoshirewentzi riyotakotairo irooperori. <sup>7</sup> Ikaatzi etakotantachari kisashiwaitaneri rinatzi, ikemisantapiintanetzi, oyaakotane ikanta, roisokerotantapiintzi.

<sup>8</sup> Eero ithonkaawo etakonka. Irooma otsipapaini, aritake ithonkaiya, oshiyawori jiroka: kamantaantsi, riñaawaitantaitawo otsipasato ñaantsi, riyoyeetairo oitarika. <sup>9</sup> Tema tekera riyotaitziroota maawoini, tekera ikamantantaitziroota tsika okantakota maawoini tzimayetatsiri. <sup>10</sup> Irooma arika onkaatapaake monkaatachane, eero akowanairo onkaate peyayetaachane. <sup>11</sup> Ariwaitake akanta atziritzika. Eenirorika eentsitzi, antayetziro okaatzi rantayetziro eentsi, jimpe ikantziro riñaawaitzi, jimpe ikantziro ikenkithashireta, jimpe okanta ipampithashiryaa. Irooma arika antaritanake, eero oshiyakotanaari tsika ikantayeta irirori. <sup>12</sup> Kantacha oshiyakairo eejatzi tsika okanta aminaatyawo kotsirotaki. Eero akoñaatzi kameethaperoini, eero ayotzi jimpe akantawaita. Irooma paata ari ayoperotairi jimpe ikanta Pawa, ari oshiyaiyaari irirori riyoyetai aakapaini. <sup>13</sup> Eenitatsi kaatatsiri mawa onkantaityaani isaike eero ithonkanetaawo. Jirokaga mawatatsiri: awentaashirenka, oyaakoneentanka, etakonka. Iroowa kowaperotajaantachari jiroka etakonka.

## 14

### *Riñaawaitantaitawo otsipasato ñaantsi*

<sup>1</sup> Pinkyaaryoote petakoyetantya. Pithotyaakotairo ritasonkawentaitemi ompoñaantyaari pantayetairo oitarika. Iroowa pithotyaakoperotajaantai pinkamantantaneritai. <sup>2</sup> Arika apatotaiyaani antsipatyaari kemisantzinkaripaini, tzimatsirika ritasonkawentaitake riñaawaitantyaawo otsipasato ñaantsi, eero akemathatziri, eero ayotziro oita ikantziro. Te iro riñaawaitantari jirika ankemathateri aakapaini, iriira Pawa kemathaterine. <sup>3</sup> Tzimatsirika ritasonkawentaitakeri inkamantantanerite, iri kenkithatakaine maawoini aakapaini, riwetsikashiretakaan-tayetairi, inthaamentakaan-tayetairi, roimoshirenkantairi. <sup>4</sup> Ikaatzi ñaawaitziro otsipasato ñaantsi, apaniironi ithaamentashirewaita. Iriima kamantantaneritatsiri, iriira thaamentashiretakaan-tayetairi kemisantzinkaripaini ikaatzi piyoyetachari. <sup>5</sup> Osheki inimotename maawoinime piñaawaitantyaawo otsipasato ñaantsi. Iroowa inimoperotainane maawoinime pinkamantantaneritai eerokapaini. Iroowa anairori otsipa. Iro kantacha tzimatsirika owaagakoñaaneterine ñaawaitziro otsipasato ñaantsi, iriitake thaamentakayaarine kemisantzinkaripaini ikaatzi piyoyetachari.

<sup>6</sup> Iyekiite, thame ankantashitawakya, jatakena nareetemi pinampiki, apatziro niñaawaitantapaakawo otsipasato ñaantsi. ¿Nothaamentashiretakaakemima? Thame ankan-tashitawakya eejatzi jatakena pinampiki, niyotaakemiro ikemathatakagaanari Pawa, nokenkithashiretakagaimi, nokamantayetaimiro, niyotaayetaimiro eejatzi. Iroowa opoñaantanakari pithaamentashiretanaa. <sup>7</sup> Piña noshiyakaawentawakemiro eejatzi, oshiyakawo arika ashowiwaite, arika ampiyompiwaite. Eerorika anashitawo oya-meninka, irojatzzi apiipiinte, tekaatsi yoterone oitarika akowiri omampayaari. <sup>8</sup> Ari okantari eejatzi arika atyoote. Eerorika ikamenitzi kameethaini, tekaatsi yotat-sine akaimatziira aate omanatya. <sup>9</sup> Ari pikantaari eejatzi eerokapaini. Eerorika piñaawaitantawo inkemathaitemiri, piñaawaiminthawaitashitaka. <sup>10</sup> Jaka kipatsiki osheki otsipasato ñaantsi riñaawaitaitziri. Eenitatsi osheki oitarika riñaawaitaitziri. <sup>11</sup> Tzimatsirika ñaanatantawori otsipasato ñaantsi kaari nokemathatzi, noshiyakaakeri itsipasatzi rinatzi, ari ikantanari eejatzi irirori. Te nosheninkatari kameethaini. <sup>12</sup> Niyotzi naaka, pikowaperotakero eerokapaini ritasonkawentaitemi pinampiki. Iro kantacha ontzimatyepithotyero pinthaamentashiretakayaari maawoini apatotapiintachari pinampiki.

<sup>13</sup> Tzimatsirika ñaawaitzirori otsipasato ñaantsi, ontzimatyepinkowakotairi Pawa rimatakantaiyaariri rowaagakoñaanetairo riñaawaitziri. <sup>14</sup> Arika niwetharyaantyaawo otsipasato ñaantsi kaari nokemathatzi niñaawaitziro, oshiyakawo nothaamentawaitashitaka, okantawetaka te nokemathatziro okaatzi niwetharyaari. <sup>15</sup> Iro kameethatzi niwetharyaantyaawo ñaantsi niyotziri, thaamentakaanari eejatzi. Ari nonkantero eejatzi nomampaawentyaari Pawa. <sup>16</sup> Thame ankantashitawakya, eenitatsi piyotainchari rapatotapiintaiyaanira, ari petanakawo eeroka piwetharyaari Pawa, apanirowa pithaamentawaitaka eeroka. Iriima pikaataiyinira te ritasonkawentaitziri inkemantyaawori piñaawaitziri. ¿Arima inintaakyaawo irirori pikantayetakeri eeroka? Te riyotaatsikaitzi kameetharika inkantaiyeni “¡Ari onkantaitaateyeyaani!” <sup>17</sup> Ariwetaka piwetharyaaka eeroka. Iriima itsipapaini temacheeni piwetsikashiretakayaari. <sup>18</sup> Osheki niwetharyaapiintakari naaka Pawa namanantawo otsipasato ñaantsi, oshiyawaitakawo nanaakotemime pantapiintzirowa eerokapaini. <sup>19</sup> Irooma arika nontsi-patyaari nompipyotya itsipapaini kemisantzinkari, te nimatziro. Iro nonkowaperote niñaawaiteme eepichokiini inkemathaitenari, ero nokowaatsikaitzi niñaawaiteperotero kaari inkemathaitenari. Irootake nantairi niyotaantantyaari kameethaini. \*

<sup>20</sup> Iyekiite, ero poshiyari ikenkithashireta eentsi, iro kameethatzi poshiyaari ikenkithashireta antari. Ariwetaka poshiyakotyaari eentsi ero pantantayetawo kaariperori. <sup>21</sup> Pinkenkithashiretakotero Inintakaanaitanewo rosankenaitakeri, kantatsiri:

Jiroka ikantakeri Awinkatharite:

Tzimatsi nokowiri nonkanteriri jirika atziripaini,

Inkaate notyaanteri, itsipasatzi rinatye ñaawaitairone otsipasato ñaantsi, iriira kaman-taine jirika.

Iro kantacha ero ikemisantaitawakeri.

<sup>22</sup> Jiroka oshiyakaawentachari. Matakaga ritasonkawentayetakai añaawaitantyaawori otsipasato ñaantsi, irootake roñaagaitziriri kaari kemisantatsine. Iro imatantakari ritasonkawentayetakai ompoñaantyaari ankamantantannerite, iroowa roñaagaitairi aakapaini akemisantzira. <sup>23</sup> Thame ankantashitawakya, papatotaiyani maawoini eeroka, maawoini piñaawaitantawo otsipasato ñaantsi. Ari inkyaapaake kaari kemisantatsine, kaari ritasonkawentaitzi. ¿Eeroma ikantapaake: “¡Ishinkiwentatya jirika!”? <sup>24</sup> Thame ankantashitawakya, papatotaiyani eerokapaini pikamantantzi. Ari inkyaapaake kaari

\* **14:19** Ikantakotakeri jaka Pablo “niñaawaiteme eepichokiini,” iro oshiyawori inkante “nonkowaperote niñaawaiteme 5 ñaantsi inkemathaiteri, te nokowaatsikaitzi niñaawaite 10,000 ñaantsi kaari inkemathaitenari.”



ritasonkawentaitzi, kaari kemisantatsine. Ari pooñaawonteniri ikenkithashirewaitashitari irirori, iro inkenkithashiretakotantaiyaari, <sup>25</sup> iro ompoñaantyaari inkamantantairo okaatzi ikenkithashirewaitashitakari rimananeke, ari rotziwerowanakya impinkathatanairi Pawa, inkante: “Imapero itsipashiretzimi Pawa eerokapaini jaka.”

<sup>26</sup> Iyekiite, jiroka onkaate pantayetairi arika papatotapiintaiyaani. Kantacha romampaitaiyaawo Salmo, itsipa riyotaante, itsipa kamantakotairone okaatzi ikemathatakagairiri Pawa, itsipa riñaawaitakaayetairi otsipasato ñaantsi, intzimayetai owaa-gakoñaanetairone. Tema maawoini pantayetairi ontzimatye piwetsikashiretakagaiyaari itsipapaini. <sup>27</sup> Tzimatsirika ñaawaitantawori otsipasato ñaantsi, eero ishekiperotzi, apatziro inkaate apite, aamaa inkaate mawa. Eero okanta rakisheenkataiyeni jirikapaini, ontzimatye royaawentya rimatantyaawori itsipa. Intzimitya itsipa iita owaa-gakoñaaneterine. <sup>28</sup> Tekaatsirika owaagakoñaaneterine, ontzimatye imairete tsika papatotaiyakani. Apatziro ramanashiretyaari Pawa, ari onkaate. <sup>29</sup> Ishinetaantsita inkamantante apite, terika mawa. Iriima itsipapaini ontzimatye inkenkithashiretakotero kameethatatsirika okaatzi ikamantantziri. <sup>30</sup> Irooma intzimerika inkemathatakaanairi Pawa, eenirorika ikamantantzi itsipa, kameethatatsi imairetawake inkamantantantyaawori otsipa. <sup>31</sup> Tema te onkameethate riñaawaitaiyeni apitekeroini. Retawakyaawo apaani, impoñaapaakya itsipa. Ari onkantya riyotantaiyaari maawoini, thaamentashire inkantayetaiya. <sup>32</sup> Tzimatsirika matakeroori ikamantantaperotantani, iriitake materone iñaakotanetya inkamantante. <sup>33</sup> Arika rakisheenkataiyeni, kaari Pawa kantakaanterone. Iri Pawa santzikoityaakaantatsiri.

Iroñaaka nonkamantemiro otsipa rametaari roiteshiretaitairi rapatotaiyaani tsikarikapaini: <sup>34</sup> Maire onkantapiintaiya tsinanepaini, eero ishinetaantsitai iñaawaitaiyeni. Iro kameethatatsi onkemisantayetai, tema iro iyotaantziri Inintakaantaitanewo. <sup>35</sup> Tzimatsirika oita onkoweri iyotero, osampiteri oime opankoki. Te okameethatzi iñaawaite tsinane arika rapatotaitya. <sup>36</sup> ¿Poshiyakaatziima eeroka omapokakerori pikenkithatakaantziro riñaane Pawa? ¿Eeroma inimotzimi pantairo rantapiintziro itsipa kemisantzinkaripaini tsikarika janta?

<sup>37</sup> Tzimatsirika janta kantatsiri, “naaka kamantantaneri, antakishireri nokanta naaka,” ontzimatye riyote jirika, iri Awinkatharite kantakaawori nosankenatantzimirori jiroka. <sup>38</sup> Terika ikemisantayetzi jirika, eero pikemisantzitari eejatzi irirori. <sup>39</sup> Iyekiite, ontzimatye pithotyakoperotairo pinkamantantayetai. Eeromaita potzikatzikayetairi ñaawaitzirori otsipasato ñaantsi. <sup>40</sup> Pimayetairorika jirokapaini, ñaakotane pinkantawentyaawo, santzikoiteeni pinkantya.

## 15

### *Rañoantaiyaari kamayetatsiri*

<sup>1</sup> Iyekiite, nokowi nonkenkithashiretakaimiro tsika okantakoweta Kameethari Ñaantsi okaatzi nonkenkithatakotakemiri, poisokerotanaari pikemisantaira.

<sup>2</sup> Iro owawisaakoshiretaimine, eekerorika poisokerotanakityeeyaawo nonkenkithatakaakemiri. ¿Aminaashiwaitakama pikemisantayetanairi?

<sup>3</sup> Jiroka kowaperoyetachari, iro ikamantaitakenari naaka, irojatzi nokamantantzimiri eerokapaini: Ikamawentai Cristo okantakaantziro akaariperowaitake, rimatakero rimonkaatakaawo okaatzi ikenkithatakoitakeriri Osankenarentsiperoki. <sup>4</sup> Ikanta ikitaitakeri pairani, iro awisawetaka mawa kiteesheri, añagai. Irojatzi ikenkithatakoitakeriri Osankenarentsiperoki. <sup>5</sup> Irojatzi roñaagantaari Cefas, roñaagaari eejatzi maawoini 12 riyotaanewo. \* <sup>6</sup> Irojatzi roñaagantapanaantariri aiyetairi “Iyekiite”, 500 ikaataiyini. Eeniro rañaayetzi jirikapaini, tema makoryaayetake apawopaini. <sup>7</sup> Irojatzi

\* 15:5 Ikantaitziri “Cefas”, irootake otsipa iwairo Pedro.

roñaagantaari Jacobo, roñaagaari eejatzi maawoini Otyaantaperori. † <sup>8</sup> Naaka weyaan-tapaakawo roñaagaana, oshiyawaitakawo naakame impoitatsineme nontzime. <sup>9</sup> Tema naakawetaka Otyaantaperori, ranaayetana maawoini itsipa. Te ompantaatsikaityaawo noitya “Otyaantaperori”, tema nowasankewaitakeri kemisantanairiri Pawa, apatowentanaariri tsikarikapaini. <sup>10</sup> Iro kantzimaitacha, te aminaashiwaita ineshironkataana Pawa, tema iriitake kantakaakawori Notyaantaperoritantaari naaka. Naakaga antawaiperotaatsi iroñaaka nanairi itsipapaini, iro kantakaantzirori nantashiwaitakari pairani. Te naaka matashityaawone jirokapaini, Pawa neshironkataanari nimatantaawori. <sup>11</sup> Irootake nosankenatantakemirori okaatzi nokenkithatapiintakeri, irojatzi ikenkithatapiintakeri eejatzi itsipa Otyaantaperoriite. Iroowa pikemisantairi eerokapaini.

<sup>12</sup> Tema nokenkithataimiro rowañagaitairi Cristo, rowamaaweetakarira, ¿Oitaka pikantantari: “Eero añaa yetai ankamakerika?” <sup>13</sup> ¿Poshiyakaatziima te rowañagaitairi Cristo? <sup>14</sup> Arika onkantyaame, naminaashiwaitaka nokenkithatake, paminaashiwaitaka eerokapaini pikemisantaiyakeni. <sup>15</sup> Tema oshiyawaitakawo nonthaiyatyeeyaame nokenkithatakotapiintakeri Pawa, nokantantapiintake: “Pawa owañagairi Cristo, ari inkantayetai eejatzi aakapaini.” <sup>16</sup> Pikenkithashiryaaaweta eerokapaini eero okanta rañaayetai kamayetaintsiri. Arikame onkantyaame, tetya rañaatsikaitaime Cristo irirori. <sup>17</sup> Terikame rowañagaitairi Cristo, paminaashiwaitaka pikemisantayetai. Eekero pinkaariperoyetayeeme, tekaatsi peyakotaimine. <sup>18</sup> Peyaperowaitakame eejatzi ikaatzi makoryaayetaintsiri, aminaashiwaiwetaka rawentaanaari Cristo. <sup>19</sup> ¡Inkantamatsitaitai aakapaini! Aminaashiwaityaame awentaawetaari Cristo, aminaashiwaityaame oyaakoneentairi, añaa minthawaitashitaka eepichokiini iroñaaka. Maperokiwaitakaime.

<sup>20</sup> Temaita ari onkantya. Rowañagaitairi Cristo ikamawetaka. Iriitake etaawori rañagai tsika inkantayetaiya paata ikaatzi makoryaayetaintsiri. <sup>21</sup> Jiroka okantakota: Pairani, eenitatsi rantakeri apaani atziri, iroowa poñaakaantakawori akaamaneyetantari maawoini. Iro kantacha eenitatsi eejatzi apaani atziri poñaakaantaawori añaa yetantaari maawoini akamayewetakaga. <sup>22</sup> Iro akaamaneyetantaari maawoini okantakaantziro asheninkayetaarira Adán-ni. Iro kantacha, aritake añaa yetai maawoini okantakaantziro asheninkashiretaari Cristo. <sup>23</sup> Jiroka okantakota: Iri Cristo etaawori rañagai. Arika ripiyai paata, rowañaa yetapairi ikaatzi rashiyetari irirori. <sup>24</sup> Ari ithonkaiya maawoini, rithonkairi Cristo ikaatzi pinkathariwaitashitachari, ikaatzi otzimimowaitashitari ishintsinka. Iri Cristo kantakayaawone rashitantairi Pawa paata, matzirori Ipinkathariperoritziri. <sup>25</sup> Tema retaironkatakawo iroñaaka Cristo ipinkathariwentantzi, irojatzi paata imonkaatantapaakyaari roitsinampaaperotairi iisaneentanewo, rimakoryaayitizantaiyaari. <sup>26</sup> Weyaantapaakyaawone iisaneentanewo roitsinampagairi, iroowa “Kaamanetaantsi”, rithonkairo roshiyakagairo atzirime ine. <sup>27</sup> Tema ikenkithatakoitzitakariri Cristo, ikantaitake:

Jirika matakakerori roitsinampagairi maawoini, rimatairi rimakoryaayitizantaaari. Iro kantzimaitacha ikaatzi ikantakoitziri jaka “maawoini”, te inkantaite irijatzi Pawa roitsinampaite. Iri Pawa kantakayaawone rimatantyaawori maawoini. <sup>28</sup> Arika impinkathariwentantai Itomi maawoini, iri Pawa pinkathariwentairine eejatzi irirori, tema ari ikenakairo Pawa impinkathariwentantaiyaawori maawoini tzimayetatsiri.

<sup>29</sup> Eerome rañaayetaime ikaatzi kamayetaintsiri, ¿oitaka romitsitsiyaawentaitantariri kamaintsiri? <sup>30</sup> Ari okantari eejatzi, eerome rañagaitaime, ¿tsika oitaka añaa ntapiintawori ipankenaminthaitai? <sup>31</sup> Iyekiite, ¿Pithainkanama? ¿Kaarima naaka thaamentawentaimiri nokemisantakaayetaimiri Awinkatharite Jesucristo? Kyaaryooperowa jiroka, ashi

† 15:7 Ikantaitziri “Jacobo”, irootake otsipa iwairo Santiago, irirentzi Jesús.

owaatyero kiteesheriki ikowaitzi ritsitokaitena. <sup>32</sup> Ari okantakari eejatzi nisaiki Efeso-ki, ikoshekawaitakena katsimawaitatsiri. Eerome añaaayetame, nontsipataiyaarime iriroripaini, nonkantawaitashitakyaame:

Thame anintaawaitawakya, owawaitya, irawaite, oimoshirenkawaitya. Aamaashitya iroowa ankame.

<sup>33</sup> Iroowa paamaantyaawori jiroka otzimikari piyenakaashitanewo. “Eero pitsipaminthatari kaariperori, pimatzirokari eeroka.” <sup>34</sup> Pinkenkithashiretaiyaani kameethaini. Eero pitzipinawaitashita. Aamaaka eenitatsi tsika pikaataiyini kaari yotakoperotairine Pawa. ¡Kaaniwentaantsi inatzi!

<sup>35</sup> Aamaaka eenitatsi janta kantashiretatsine: “¿Tsikama inkeneka impiriintai tonkit-sipooki? ¿Tsikama onkantaiyaaka iñagaitairo iwatha?” <sup>36</sup> ¡Masontzí! Kantacha oshiyakaawentero jimpe okantaganki okithoki pankirentsi. Ipathaakitzi okithoki inki-takiitakerorika, ari ishokairi. <sup>37</sup> Jiroka okithoki pipankitapiintziri apakithowoini okantaweta, iro kantacha ishokanakerika, inashiwaitanakya. Tema te pipankitapi-intziro ishokimaterika pankirentsi. ‡ <sup>38</sup> Iri Pawa shokakaayetzirori, otzimayetan-tari owatha ikowiri irirori. Iriitake inashitakaayetawori rishokakaayetziro, okaatzi tzimatsiri otsipapaini pankirentsi. <sup>39</sup> Maawoini akaatzira otzimayetzi awatha, te ari oshiyawakaiyani. Thame oshiyakaawentawakero: Aakapaini atziritzira anashiyeta awathaki, inashita iwatha piratsi, shiwankiri, eejatzi ñaaweri. <sup>40</sup> Eejatzi ikantayeta inkiteweri te roshiyayetai akantayetaga aakapaini asaawikiweritzira. Otzimimotziri inkiteweri rowaneenkawo, te roshiyawo owaneenkawo aakapaini. <sup>41</sup> Tema inashita eejatzi rowaneenkawo ooryaa, rowaneenkawo kashiri, eejatzi rashi impokiropaini. Eenitatsi apawopaini impokiro kaari oshiyayetyaarine itsipa.

<sup>42</sup> Ari ankantaiyaari aakapaini añaaayetairika. Tema ikitatapiintaitziro awatha, ari oshitziziri, iro kantacha arika rowañagaitai, inashitaiya awatha eero oshitziwaitai. <sup>43</sup> Arika inkitaitero awatha manintaarewo inatzi. Iro kantacha, arika rowañagaitai paata, owaneenkataiya awatha. Te aawyaawainete iroñaaka awatha, iro kantacha arika rowañagaitai paata ontzimai oshintsinka awatha. <sup>44</sup> Okaatzi ikitaitziri awatha tzimawetacha ashire. Iro kantacha arika rowañagaitairo awatha, ari ontzimayetai atasorenka. Ari ikantayetari maawoini añaaayetziri iroñaaka otzimi ishire, iro ayotantayetari eenitatsi otsipa awatha tasorentsitaatsine. <sup>45</sup> Ari okanta rosankenatakoitziri Adán, etanakawori atziri, ikantaitzi:

Iri etanakawori rañaanake, ikanta otzimanake ishire. Iriima jirika oyaatapaakerine oshiyapaakyaarine, otzimimotziri irirori itasorenka, iriitake añashiretakaanatsine. <sup>46</sup> Ari akantayetari. Te otzimimowetai atasorenka ket-ziroini. Iro etanakawo otzimawetaka ashire, iro kantzimaitacha paata ontzimayetai atasorenka. <sup>47</sup> Tema jirika etanakawori atziri, kipatsi ragaitake, riwetsikapithaitakeri. Iriima apitetanaintsiri atziri, inkiteki ipoñaakawo irirori. <sup>48</sup> Tsika ikanta riwetsikaitakeri kipatsipitha jirika etakawori, iri oshiyayetaari aakapaini. Iriima inkiteweriite, iri oshiyakariri jirika poñagainchari inkiteki. <sup>49</sup> Ari akantayetaari eejatzi aakapaini. Tema oshiyawetakari atzimayetake jirika riwetsikapithaitakeri kipatsi, aritake oshiyayetaiyaari eejatzi jirika poñagainchari inkiteki. <sup>50</sup> Iyekiite, jiroka okantakota okaatzi nokantakeri: Eero okanta risaikayetai tsika ipinkathariwentantzi Pawa ikaatzi tzi-mayetatsiri iwatha, riraa, shitzitaatsine iwatha. Iriira saikayetaatsine janta inkaate kaari shitziyetaatsine iwatha.

<sup>51</sup> Pinkeme, nonkamantemiro kaari riyotakoyeetzi pairani. Jiroka: Ari impashini-takaayeetai maawoini aakapaini. Iro kantacha eero añaaayetziro maawoini aakapaini

‡ 15:37 Kantakotachari jaka “pankirentsi”, irootake trigo, eejatzi okaatzi oshiyayetawori.

amakoryaayete. <sup>52</sup> Paata weyaantapaakyaawone kiteesheri, omapokashitaiya rityootaitapai. Apa onkantapaintya ariwaitake amachookapainte. Ari rañaayetairi kamayetaintsiri, rañaantaiyaawo wathatsi kaari shitzinetsine. Irooma maawoini aakapaini añaayetzika, ari impashinitakaayeetai. <sup>53</sup> Okaatzi awathatari iroñaaka shitzitatsiri, impashinitakaitairo eero oshitziwaitantaawo. Akaatzi akaamanewaitzi iroñaaka ari impashinitakagaitai, kañaane ankantayetaiya. <sup>54</sup> Arika imonkaatakya paata jiroka, arira imonkaataiya eejatzi roshiyakaawentaitakero “Kaamanetaantsi”, ikantaitake: Thonkaawowa iitaitziri “Kaamanetaantsi”, roitsinampagaitairo.

<sup>55</sup> ¡Kaamanetaantsi! ¿Kantachama poitsinampaantai eeroka iroñaaka?

¡Kaamanetaantsi! ¿Tzimatsima iroñaaka pithoyeni?

<sup>56</sup> Okaatzi oshiyakaawentachari jaka othoyeni, irootakera kaariperotaantsi. Irootake Inintakaantaitanewo iyotakairi eenitatsi ayenakaashitanewo. <sup>57</sup> Iroowa niwetharyaantaariri Pawa, tema iri matakagairori aakapaini oitsinampaantaawori, rotyaantakairi Jesucristo roitsinampaantaawori “Kaamanetaantsi”.

<sup>58</sup> Iyekiite, ontzimatye pinkyaaryootapiintayetai, pantawaitapiintainiri Awinkatharite. Tema piyotaira te paminaashiwaita, iriira Awinkatharite matakagaimirori.

## 16

### *Koriki rotyaantaitziniriri roiteshiretairi*

<sup>1</sup> Iroñaaka nosankenatakoteri apiyotziri koriki otyaanteniriri ikaatzi roiteshiretairi. Nonkamantemiro okaatzi nokamantakeriri Galacia-satzi. <sup>2</sup> Arika papatotapiintaiyaani, ontzimatye pookayete eepichokiini tzimimotzimiri. Eero nopankenantapaakawo naaka, nareetapaakemirika pinampiki. \* <sup>3</sup> Arika nareetakemi kantacha pamine aanakerine koriki janta Jerusalén-ki intsipataanakero nosankenarepaini. <sup>4</sup> Ari nontsipatanakyaari niyaate naaka janta, añaawakero ari nimatakero.

### *Ikenkithashiretari ranteri Pablo*

<sup>5</sup> Eerowa nareetzitimi, tema netapaintatyeyaaawo niyaate Macedonia-ki, irojatzi nimpoitantapaakyaawo pinampiki. <sup>6</sup> Arika nareetapaakemi, aamaaka osamani nisaikimotanakemi, ari nonkyaawontsitakote. Irojatzi potyaantantainari tsikarika nokowiro niyaate. <sup>7</sup> Te nokowiro naaka eepichokiini onkantya nareetemi. Iriirika Awinkatharite shinetenawone, osamani nisaikimowaitapaintemi. <sup>8</sup> Ari nisaikawake jaka Efeso-ki, irojatzi areetantakyaari kiteesheri roimoshirenkaitzirowa “Owiitaantsi”. † <sup>9</sup> Iroowa nimatantyaawori jiroka, tema tzimatsi jaka osheki nantawaitainiri Awinkatharite, kameetha okanta noñaakero. Tzimake osheki koshekaminthatakenari.

<sup>10</sup> Arika rareetakyaame Timoteo, paakameethatawakeri, tema irijatzi antawaitainiriri Awinkatharite, ari roshiyana naaka. <sup>11</sup> Te onkameethate intzimayete janta manintawaiterine. Iro kameethatatsi paapatziyawakyaari, irojatzi ripiyantaiyaari naakaki. Tema oyaawenta nowakeri ripoke intsipayetakyaari itsipapaini Iyekiite.

<sup>12</sup> Iriima iyeki Apolos, nokantakeri intsipatanakyaari ikaatzi notyaantaimiri eerokapaini. Iro kantacha te ikowi riyaate irirori. Añaawakeroota arika rimatakero paata.

### *Weyaantawori wethataantsi*

<sup>13</sup> Paamaawentaiya eerokapaini, poisokerotyaawo pikemisantanakeri, shirampari pinkantanakya, pishintsishireyete. <sup>14</sup> Etakotanewo pinkantawakaiya, paapatziyawakaantaiyaawo oitarika.

\* **16:2** Kantakotachari jaka “papatotapiintaiyaani”, irojatzi ikantaitzitari “etapiintawori kiteesheri awisayetzira tominko.” † **16:8** Kantakotachari jaka “Owiitaantsi”, irojatzi ikantaitzitari “Pentecostés”.

<sup>15</sup> Iyekiite, piyotziri eerokapaini saikapankotziriri Estéfanos, iriiyetake etanaka-  
wori ikemisantanake pinampiki Acaya. Ikamaitanaawo iriroripaini rantawaiwen-  
tanairi roiteshiretairi. <sup>16</sup> Noshintsineentemi eerokapaini pinkemisantairi irirori-  
paini, ari poshiyaari eejatzi itsipatakari rantawaitaiyini, kamaitanaawori. <sup>17</sup> Osheki  
nokimoshiretake noñaakero rareetakena Estéfanos, itsipatapaakari Fortunato, eejatzi  
Acaico. Iriitake owakowentapaakemiri eerokapaini tera onkantya pareetaina jaka,  
<sup>18</sup> potapishiretantenari. Iriiyetake otapishiretapaakemine eejatzi eerokapaini janta.  
Pimpinkathayetawairi.

<sup>19</sup> Riwehathayezimi apatowentapiintakariri Pawa jaka Asia-ki. Riwehathayezimi ee-  
jatzi Aquila eejatzi Priscila. Riwehathayezimi eejatzi ikaatzi piyowentapiintakariri  
Pawa ipankoki. <sup>20</sup> Riwehathayezimi eejatzi itsipa iyekiite. Etako pinkantya pi-  
wethatawakaayetaiya.

<sup>21</sup> Jiroka, naakaga osankenatajaantakerori nakoki, niwehathayezimi. Naakatake  
Pablo. <sup>22</sup> Rowasankeetairi kaari nintayetairine Awinkatharite. Ripiyitaiya intsi-  
paite Awinkatharite. <sup>23</sup> ¡Onkamintha ineshironkayetaimi Awinkatharite Jesucristo!  
<sup>24</sup> Netakotzimi maawoini eerokapaini, iri Cristo Jesús matakainawone. Ari onkan-  
taitaatyeyyaani.



## APITETATSIRI ROSANKENATZINIRI PABLO CORINTO-SATZI

### *Wethataantsi*

<sup>1</sup> Naaka Pablo osankenatzimirori jiroka, Rotyaantaperotane Jesucristo ninatzi, iro ikowakaakenari Pawa. Ari notsipatari iyeki Timoteo nosankenatzimiro. Eerokatake nosankenatzini pikaatzira pipiyowentari Pawa janta nampitsiki Corinto-ki, irijatzi nosankenatzini ikaatzi roiteshoretaitairi janta Acaya-ki. <sup>2</sup> Inkamintha ineshironkataimi Ashitairi Pawa, kameetha risaikakaayetaimi, ari inkantzitaimiri eejatzi Awinkatharite Jesucristo.

### *Ikemaatsitari Pablo*

<sup>3</sup> Thame anthaamentaiyaari Pawa, ipapatetari Awinkatharite Jesucristo. Iri Ashitairi, neshironkatantaneri. Iri Pawa, oimoshirenkantanneri rinatzi. <sup>4</sup> Arika ratsipetakagaitai, iri Pawa oimoshirenkaine, iro amatantaawori aaka oimoshirenkairi itsipapaini ratsipetakagaitari. Irojatzira anteri aakapaini okaatzira rantzimotakairi Pawa. <sup>5</sup> Iroowa awisatsine, arika añaaayetero ankemaatsiperowaitya ikantapaintaga Cristo, ari añiitaiyaawo roimoshirenkaperoitai. <sup>6</sup> Ari okantari, iroowa nokemaatsiwaitantakarini naaka, iroowa niyotantaawori noimoshirenkayetaimi eerokapaini, pawisakoshiretantaiyaari. Iroowa roimoshirenkantakenari eejatzi naaka, niyotantyaawori noimoshirenkayetaimi eerokapaini arika piñaaayetairo okaatzi nokemaatsiwaitakarini naaka. <sup>7</sup> Iroowa niyotantakarini tema roimoshirenkaitaimi eerokapaini ikantaitak-enaga naaka, arika poshiyakotainawo pinkemaatsiwaitya nokemetaakaga naaka.

<sup>8</sup> Iyekiite, nokowi piyotero okaatzi natsipetakari nisaikantapaintari Asia-ki. Osheki rowatsinaawaitaitakena noshiyakaatzi ari nonkamake. <sup>9</sup> Nokenkithashireta, iro rishinetantakenawori Pawa noñiuro nokamimawetaka, nawentaashiretantaiyaariri, te okameethatzi nawentaashiwaitya naaka. <sup>10</sup> Rimatakeroni Pawa rowawisaakotaana nokamawetakaga, eekero riyaaatakaatyero. Awentaashire nowakeri eekero inkempoyaaawentatyeeena paata. <sup>11</sup> Ari pinkantanaiyaari eerokapaini poshiyaina naaka, pamanamanaataiyaari Pawa inkempoyaaawentanteneri. Iro ompoñaantyaari riwetharyaaperotaiyaari Pawa inkaate kemakotainane rimatakerowa Pawa ikempoyaaawentaana.

### *Pablo rareetyaari Corinto-satzi*

<sup>12</sup> Niyotzi naaka kameethashireri ninatzi tsikarika nisaikimoyetantake. Iriira Pawa yotatsi tekaatsi namatawite, tekaatsi nonkaaniwentakowaite. Tsika nokanta niyotaayetakemi eerokapaini, te nonkenkithatakotero roshiyakaawetari isaawikisatzi yorenkantsi, apatziro nokenkithatakotziro tsika ikanta Pawa ineshironkatantzi. <sup>13</sup> Tema okaatzi nosankenatakemiri tekaatsi nimanapithatemiri, tekaatsi kompiyaaawone inkemathatero. Onkamintha pinkemathatairo okaatzi nosankenayetakemiri. <sup>14</sup> Pikemathatakenaga eepichokiini, kantacha pinkimoshirewentaina paata ripiyairika Awinkatharite Jesús. Ari nonkantyaari eejatzi naaka, kimoshire nonkantawentaimi eerokapaini paata.

<sup>15</sup> Iroowa nominthatantakawori napiitairo nareetaimi janta, iroowa oimoshirenkaperotemine arika nareetaimi. <sup>16</sup> Ari nokowawetaka nareetanakemime niyaatantyaari Macedonia-ki, ari napiitanairome eejatzi nipiyyairika. Iro pamitakotanteneri potyaantaina Judea-ki. <sup>17</sup> Iro kantacha noipithokakero noyenkishiryamento. ¿Poshiyakaatzi-ima osheki namatawitapiintakemi? ¿Pikenkithashiryama niñaawaitashiwaitaka nonintakaanekiini, nokantapiintake “¡Ari! Nareetakemi?” ¿Poshiyakaatziima niyowetakawo eero nimatziro nareetemi? <sup>18</sup> Tema Pawa te ithaiyaneta, riyotzi irirori te nothaiyawaita

naaka nokantzira “¡Ari!” <sup>19</sup> Ari ikantari eejatzi Itomi, Jesucristo, nokenkithatako-tapaakemiri notsipatantakariri Silvano eejatzi Timoteo. Tema riyotakerika Jesucristo eero rantziro oitarika, te ikantanetzi irirori “¡Ari!”. Tema okaatzi rantapiintakeri Jesucristo oshiyawaitakawo iriime Pawa kantapiintatsine “¡Ari!” <sup>20</sup> Iriira Jesucristo yotakaayetairi ari imonkaataiya ikashaakaanakeri Pawa. Iroowa ankan-tantayetaiyaari “¡Ariwé!” aakapaini awentaashireyetaarira. Iroowa impinkathaitan-taiyaariri Pawa. <sup>21</sup> Oshiyawaitakawo iriime Pawa withaakagairineme Cristo, iri-jatzi saipatziitoyetaime, <sup>22</sup> oshiyawaitakawo impothoyetaatyaima rashiyetaira. Tema añaakeri rotyaantakairi Tasorenkantsi risaikashiretantai, ari ayotzi imapero Pawa rithotyiro ikashaakagairi.

<sup>23</sup> Imaperotatya, riyotzi Pawa te namatawitzimi nokantzimi: Kantakaawori kaari nareetantzimi Corinto-ki, eero noshintsineentantapaakemi. <sup>24</sup> Te nonkantatye naakaga ashitzimiri pinkemisantantenari. Tema kisokero pikantawentanakawo okaatzi pikemisanantairi. Iro kantacha kameethatatsi nonkaminaayetaimi pantantaiyaawori oimoshirenkayetaimine.

## 2

<sup>1</sup> Jiroka nokenkithashiretakari: Eerowa napiitairo nareetemi, iroorika owashire-takaawaitemine. <sup>2</sup> Arika nowashiretakaawaitemi janta, ¿iitakama thaamentashire-takainane naaka? <sup>3</sup> Iroowa notyaantantakemiri pairani nosankenare, te nokowi niyaatashitemi powashiretakaanakari. Eerokawetaka thaamentakainane. Iroowa nokantashiretantakari: “Eero niyaatzita, nonkemakotawairiita tzimatsirika thaamentakagainane naaka. Iroowa nonkimoshiretakaantyaariri iriroripaini eejatzi.” <sup>4</sup> Notyaantakemiro pairani nosankenare, nowashirewaitatyaaga nosankenatantakemirori. Tera iro notyaantantemirori nonkantzimoneentakaimi. Nokowawetatyaga piyotai osheki netakotaimi.

### *Rariperotziri Pablo kantzimoneentakaantaneri*

<sup>5</sup> Nokowi nonkenkithatakoteri atziri owashiretakaakenari. Te naaka inkantzimoneentakaiya, aamaaka, maawoini eerokapaini ikantzimoneentakaimi. (Nokantantari “aamaaka”, te nokowi nosheñeero.) <sup>6</sup> Tema osheki pikaatake eerokapaini, arira powasanketakeri. Iro kantacha ataama powasanketakeri. <sup>7</sup> Pariperotairi, poimoshirenkairi, ayimawaitzirikari rowashirenka. <sup>8</sup> Nokowakotzimi pinkantairi jirika atziri: “Netakotaimi”. <sup>9</sup> Pairani, nosankenatakemi ketziroini nokantakemi: “Powasanketeri”. Noñaantatziimi noñaantemiri kyaaryooperorika pikemisantana. <sup>10</sup> Iro kantacha iroñaaka ikowi Cristo pariperotairi jirika atziri. Iroowa nantairi naaka kameethatzimotaimine maawoini eeroka. Tzimatsirika pariperotairi eerokapaini, ari nariperotantai eejatzi naaka. <sup>11</sup> Iroowa antayetairi eero roitsinampaantai Satanás. Ayotaiyironi okaatzi ikowiri ranteri Satanás.

### *Kantzimoshirewaitakariri Pablo Troas-ki*

<sup>12</sup> Chapinki, areetakena naaka nampitsiki Troas-ki niyaatantakari nokenkithatakaantziro Kameethari Ñaantsi tsika ikantakota Cristo. Noñaakero nokemisantakaantake ikantakaantziro Awinkatharite. <sup>13</sup> Iro kantacha te inimotena janta, tema te noñaapaakeri iyeki Tito. Iroowa nawisantanakari Macedonia-ki.

### *Iriira Cristo oitsinampaakaanantatsiri*

<sup>14</sup> Onkantawetya tsikarika ankenayete, ontzimatyete awethareeyaari Pawa. Tema oshiyawaitakawo oyaampoyeretatyeeerime Cristo, ripiyaawo irirori nampitsiki rithonkaatantakera romanata. Oshiyakoyetatyawa eejatzi ipookainkatzi kasankari maawoiniki nampitsi. Ari ankantayetaiyaari aaka aayete tsikarikapaini ankamantayetairi atziri tsika ikantakota Cristo. <sup>15</sup> Oshiyawaitakawo kasankari ritayiri Cristo rinimotakaanantairi Pawa. Jiroka kasankari kantacha inkemainkayetairo

awisakoshiyetaatsine, eejatzi peyashiwaitaachane. <sup>16</sup> Tema tzimayetatsi atziri, oshiyimotari jiroka kasankari owamaantanero inatzi. Iriima itsipapaini oshiyimotari kasankari iro owañaashiretairine. ¿Itakama kameethashiretatsiri roshiyakaawentaitziri jiroka kasankari? <sup>17</sup> Kaarira jirikapaini kenkithatashiwaitawori riñaane Pawa ikowi raantashiwaityaawo koriki. Te ari onkantya, jirikatajaantake maperotanairori ikenkithayantzitzi. Iroowa nantairi naaka eejatzi. Iriira Pawa otyaantakenari nonkenkithatakaante, nantawaitainiri Cristo, iriira Pawa kempoyaanari nantayetzirowa.

### 3

#### *Antawaiwentzirori owakerari aapatziyawakagaantsi*

<sup>1</sup> ¿Pikenkithashiretama nasagaawentatya naaka? ¿Noshiyakotarima amayetzimirori rosankenare, ikantzi: “Paakameethatawakena?” ¿Noshiyakotakarima kowirori posankenare, rayiro tsika ikenayetzi? <sup>2</sup> Eerokapaini oshiyakawori osankenarentsi raakameethatantaitari, iroowa rosankenashiretantaitakenari naaka. Tema arika iñaayetaimi atziripaini tsika pikantayeta pisaikayetanai, ari riyotero okaatzi nantzimoyetakemiri, oshiyawaitanakawo riñaanayetateerome okaatzi rosankenatakoitakenari. <sup>3</sup> Ari añiuro eerokatake oshiyakawori osankenarentsi rosankenatakeri Cristo. Te iro nonkenkithatakote osankenarentsi koñaatatsiri, oshiyaworira rosankenaitziro mapikota, tema nokenkithatakotatziro rowakerashiretakaayetaimi Itasorenka Pawa Kañaaneri.

<sup>4</sup> Nokenkithatakotantawori jiroka, tema iri Cristo kantakaakawori awentaashirenta-  
taariri Pawa. <sup>5</sup> Te aaka aawyaashityaawone apaniroini iriira Pawa matakaayetairori.  
<sup>6</sup> Iri Pawa matakaakenawori nonkenkithatakotairo owakerari aapatziyawakagaantsi.  
Jiroka owakerari aapatziyawakagaantsi kaarira osankenarentsi oshiyawori etawori  
aapatziyawakagaantsi kaamanetakaantatsiri. Iriira kantakotachari tasorenkantsi  
añashiretakaantatsiri.

<sup>7</sup> Pairani rosankenatantaitakawori Inintakaantaitakeri mapikotaki, okoñaatapaintzi  
rowaneenkawo Pawa, intsipaite opeyanaka. Ikanta iñaakerowa Moisés-ni, shipakiryaa-  
woo ikantanaka, te ikanta raminawootairi isheninkapaini Israel-iite. Iro kantzi-  
maitacha jiroka Osankenarentsi iro poñaakaantawori akaamaneyetantari, okantawe-  
taka otzimawetaka owaneenkawo. <sup>8</sup> Irooma okaatzi rantairi Tasorenkantsi, iroowa  
owaneenkaperotachari. <sup>9</sup> Tema owaneenka okantawetaka owasanketakaantantat-  
siri, irooma tampatzikashiretakaantatsiri iroowa owaneenkaperotaachane. <sup>10</sup> Jiroka  
owaneenkaperotaachari anaanakero tzimawetachari ketziroini owaneenkawo. <sup>11</sup> Ari  
okaatapaake owaneenkawetachari ketziroini. Iroowa owaneenkaperotaachari kan-  
taitaachane iroñaaka.

<sup>12</sup> Tzimake iroñaaka ominthashiretakagaanari, tontashireri nonkantanaiya  
nonkenkithatakaantai. <sup>13</sup> Te noshiyawetyaari Moisés-ni ipashikawootaka eero  
raminantari isheninkapaini Israel-iite, irojatzi opeyantaari rishipakiryaaowoowetaka.  
<sup>14</sup> Tema pairani kisoshire rinaiyakeni Israel-iite, irojatzi ikantayeta iroñaaka ikaatzira  
icharinepaini. Tema arika inkemero riñaanaitero etawori aapatziyawakagaantsi,  
eero ikemathatziro oshiyawaitakawo impashikaitateerome iyenkishiryaaamento,  
apatzirowa Cristo inkemathatakayetairi oshiyawaitaawo impashikaryaakotaaty-  
eerome iyenkishiryaaamento. <sup>15</sup> Tzimayetatsi iroñaaka, arika inkemero riñaanaitero  
Inintakaantakeri pairani Moisés-ni, pashikashireri ikantayetaka. <sup>16</sup> Irooma  
inkaate piyashiretashitairine Awinkatharite, ari impashikaryaakoshiretaiya.  
<sup>17</sup> Ikantakoitziri jaka “Awinkatharite” irijatzi Tasorenkantsi, saikashiwaitakaantatsiri.  
<sup>18</sup> Irooma aakapaini awentaashiretaari Cristo, oshiyayetanaari Awinkatharite.  
Tema oshiyawaitaawo aminaatakotatyeeerime Awinkatharite kotsirotakiki. Tema  
aminawootairi kotsirotakiki iroñaaka, te oshiyari Moisés-ni ipashikawootaka pairani

irirori. Irooma paata arika añaperotairo rowaneenkawo, arira oshiyaiyaari ikantaga Cristo. Iriira matakagairone Awinkatharite, Tasorenkantsi.

#### 4

<sup>1</sup> Iriira Pawa neshironkataanari nantawaitantaanariri irirori. Iro kaari okantzimoneentawaitantana. <sup>2</sup> Nipakagairo owaañaawaitenaneme, te nimanakaawaitawo niyotaante namatawitantantyaari, te nothaiyakowaitawo riñaane Pawa. Okaatzi nokenkithatakotairi irooperori ini, iro iñaantawori Pawa kameetha okantzimotari atziri nokenkithatakaayetairiri. <sup>3</sup> Tzimatsirika kaari kemathaterone okantakota Kameethari Ñaantsi nokenkithatziri, te naaka manapithawaiterine, tzimatsi itsipa kantakaawori kaari ikemathatantawo oshiyawaitakawo impashikapithataitayeerime iyenkishiryaamento, iriira peyashiwaitaachane. <sup>4</sup> Oshiyawaitakawo imawityaakitayeeme jirikapaini kisoshireri. Iriitakera Kamaari iitaitziri eejatzi “iwawane isaawikisatzi”, mawityaakitakaakeriri kisoshireri, iroowa kaari ikemathatantawo Kameethari Ñaantsi. Oshiyawaitakawo te iñaayetairome kiteesheenkari oshiyakawori rowaneenkawo Cristo, oshiyajaantakariri Pawa. <sup>5</sup> Iriira Jesucristo nokenkithatakotairi, nokantzi: “Awinkatharite rinatzi.” Te naaka kenkithatakowaitachane. Apatziro rowakena naaka Jesús pimperawaitena eerokapaini. <sup>6</sup> Tema ikantake pairani Pawa: “Onkiteesheenkatai tsirenikiri.” Iro oshiyakawori roiteenkashiretaana naaka, noiteenkatakotairi eejatzi itsipapaini riyotairira Pawa, oshiyimotaiyaari iñagaatyeerome rowaneenkawo Pawa rishipakire ipooki Cristo.

#### *Awentaashire ankantayetaiya*

<sup>7</sup> Oshiyawaitakawo owatyeerime pinaperotachari chomoki. Iriira oshiyakaawentachari Pawa ripasawyaayetairowa itasorenka awathaki, iroowa awatha oshiyakaawentakeri chomo. Iroowa rantantawori iñagaitantyaawori iri otzimimoperotziri itasorenka, tera otzimimotai aakapaini. <sup>8</sup> Nokemaatsiwaiweta nowathaki, temaita nowashireneentawaita. Nothaankewaiweta, temaita ayimawaitana. <sup>9</sup> Ipatzimawaitaitakena, temaita rookanawentaitana. Rowatsinaawaitaitakena, temaita rashiryagaitana. <sup>10</sup> Osheki rowamayimawaitaitakena roshiyakagaitakenari pairani Jesús, arira iñagaitairo rañaantari Jesús. <sup>11</sup> Jiroka kankotachari, osheki noñaakero nonkamawenterome nokenkithatakotairi Jesús, iro iñaayetakeri atziri, riyoyetai tsika ikanta Jesús rañi irirori. <sup>12</sup> Iroowa nokamimatantakari naaka, ompoñaantyaari pañaashiretantaiyaari eerokapaini.

<sup>13</sup> Iroowa nantakeri naaka okaatzi rosankenatakoitakeri pairani, kantatsiri: Nokemisantanai naaka, iro niñaawaitantari. Iroowa nantanairi naaka, nokemisantanai, irootake niñaawaitantari. <sup>14</sup> Niyotzi naaka rowiriintairi Pawa Awinkatharite Jesús, aritake rowiriintaina eejatzi naaka, intsipatagainari Jesús, pintsipatztaina eejatzi eerokapaini. <sup>15</sup> Nokamantantzimirori jiroka iroowa pinintaawaitantaiyaari eerokapaini. Arika pisheniperotanake eerokapaini ineshironkayetairi Pawa, ari isheniperotai wetharyaapiintaiyaarine, impinkathatairi.

<sup>16</sup> Iro kaari okantzimotantana naaka, okantawetaka rowamayimaweetakena. Thaa-mentashire nokantapiintaka. <sup>17</sup> Okaatzi nokemaatsiwaitaka eepichokiini inatzi, eero ashi owaatyeero. Iroowa noñaantaiyaawori paata antawoite owaneenkatachari kaari thonkaachane. Iro anagairone nokemaatsiwaiwetakari, eero nimonkatziyantaawo oitarika. <sup>18</sup> Tema nonewiyatakawo naaka kaari iñagaitzi iroñaaka, tera ithonkanetaa jiroka. Te onkowaperotaiya koñaayetatsiri iroñaaka kaari kisonetaatsine.

#### 5

<sup>1</sup> Onkantawetya rowaariperotaitero apanko jaka kipatsiki, iro kantacha ayotzi tzimatsi otsipa apanko kaari thonkanetachane janta inkiteki, iriira Pawa wetsikakerori,

kaari atziri wetsikerone. <sup>2</sup> Ari okantari eejatzi awatha, osheki okemaatsitakaawaitakai. Akowaike ontzimimotai otsipa awatha añaantaiyaari inkiteki. <sup>3</sup> Ari onkantaiyaari paata ashire ontzimai owakerari owatha. <sup>4</sup> Eenirowa añaantayetawo awatha iroñaaka, atekawaitake akemaatsiwaita. Iro kantacha te ankwairo ampeyashiwaitaiya. Akowatzi ontzimimotai otsipa awatha, akowiro kantaitaachane añaamentotsi poyaataiyaawone kaari kisonetatsine. <sup>5</sup> Iri Pawa matakagairone jimpe ankantayetaiya. Tema rotyaantakairi Tasorenkantsi risaikashiretantai, ari ayotzi rimonkaatairo Pawa ikashaakaakairi pairani.

<sup>6</sup> Iroowa shintsishiretakagairi. Tema ayotaiyini eenirowa añaayetzi awathaki, tekera atsipatajaantaariita Awinkatharite. <sup>7</sup> Awentaashire ankanteri eeniro añaika, okantawetaka te añaawetyaari. <sup>8</sup> Ari nokantake, shintsishire akantaka, akowayetake ookairo awatha, antsipatantaiyaariri Awinkatharite. <sup>9</sup> Akowapiintairo antayetairo inimotziriri irirori, etanakyaawo iroñaaka, ari onkantaiyaari paata arika antsipataiyaari. <sup>10</sup> Tema maawoini aakapaini ankatziyimotairi paata irirori, arika raminakoyeetairi maawoini antayetakerori kaariperori eeniro rañaawetaga, iri rowasankeyeetairi. Raminakoyeetairi eejatzi antayetakerori kameethari, iri roshiyakagairi ripinayetaatyeeime.

### *Imatakaayetairi otsipa rariperotantairi Pawa*

<sup>11</sup> Nokenkithatapiintzi naaka, ari nokenakairo iñaantaitawori imapero nopinkathatairi Pawa. Riyotzi irirori, onkamintha piyotaiyeroni eejatzi eerokapaini. <sup>12</sup> ¿Pikenkithashiretama nasagaawentatya napiipiintantawori? Tera ari onkantya. Nokowatzi piyote tsika nokanta naaka, iro piyotantyaawori eeroka jimpe pinkante pakayeteri asagaawentachari janta, kantashiwaitachari: “Kameetha ninatzi naaka,” temaita ikameethashiretaiyini. <sup>13</sup> ¿Noshiyatyaarima shinkiwentachari nokantayetantzimiri? Tekaatsi oitya, tema nokamaiperowentanaatyaari naaka Pawa. Iriirika noshiyimotzimi atziri ñaaperori, nokowatziira nonintaashiretakaayetaimi nokantantzimiri. <sup>14</sup> Iroowa nantantawori oitarikapaini retakotaanaga Cristo. Tema ikamawentai maawoini aaka, oshiyawaitanakawo maawoini aakapaini ankamayetakityeeme eejatzi. <sup>15</sup> Jiroka opoñaantari ikamawentayetai maawoini, rañagai eejatzi, iro antapiintantaiyaawori ikowiri irirori, eero antashiwaitawo añaamatashiwaitari aakapaini.

<sup>16</sup> Iroowa eero okantzimowaitantari atziri tsika ikanta iñagaitziri iwathaki. Imaperotatya otzimake iwatha Cristo risaikimotantapaintairi. Iro kantacha te añaaimaitawo iroñaaka. <sup>17</sup> Iro nokantantzimiri, ikaatzi withaashiretanaariri Cristo, owakerashireri ikantanaa, te roshiyanaa ikantawetaga pairani ithonkaga owakeratzimotairi maawoini. <sup>18</sup> Iriira Pawa kantakaantzirori maawoini jiroka. Irijatzi kantakaakawo okanta ariperotantaariri irirori okantakaantziro rantzimoyetairi Cristo. Irojatz antayetairi aakapaini, antakaayetairi itsipapaini rariperotairi Pawa. <sup>19</sup> Iroowa rotyaantantakariri Pawa jaka kipatsiki jirika Cristo, rariperotantaiyaariri isaawikisatzi, eero rowasankewentantari iyaariperonka. Iro rotyaantantakenari naakapaini nonkenkithatakaayetairi atziripaini rariperotairi Pawa. <sup>20</sup> Irootake nantairi naaka, rotyaantaitakena nonkenkithatakotairi Cristo. Oshiyawaitakawo iriitakeme Pawa apiipiintakainawone, nokantzi: “Pariperotairi Pawa. Iro ikowairi Cristo.” <sup>21</sup> Te rantawetawo Cristo kaariperori. Iri kantacha Pawa ikemaatsitakaawaitakari oshiyawaitakawo rantatyeerome kaariperori. Ari ikenakaakero Cristo rotampatzikashireyetantairi, roshiyakaayetairi ikantaga irirori.

## 6

<sup>1</sup> Naaka tsipataimiri antawaitainiri Pawa, noshintsithatemi eero pimanintawaitziro ineshironkataimira Pawa, aminaashiwaitakari. <sup>2</sup> Tema jiroka ikantake irirori: Niyotakera kameetha onkantya, aripaite nokemakemiro pikowakotanari.



Imonkaatapaakaga “Kiteesheri Awisakotaantsi”, aripaitera noneshironkataimi. Iroowa apiitaachari iroñaaka “Kiteesheri Awisakotaantsi”. <sup>3</sup> Te nokowi intzime iita notzikatzikawaiteri rawisakoshiretai, iro eero rithainkitantaitanawo nantawaitanewo. <sup>4</sup> Nokowi noñaagantairo kameetha ronampitana Pawa, kimoshire nonkantya, awishimotenarika oitarika, oshiyawori jiroka: inkemaatsitakaitena, impomeentsitakagaitena, rowasanketaitena, <sup>5</sup> ripasataitena, romonkyagaitena, rowatsinaawaitaitena, nantawaiperote, ayimawaitena nowochokine, ayimawaitena nitashe. <sup>6</sup> Okantawetaka awishimotakena jirokapaini: Kiteshire nonkantya, yotane nonkantaiya, aakameetha nonkantantai, nethaantane nonkantantai, saikashire rowaina Tasorenkantsi, etakoperotane nonkantantai, <sup>7</sup> niñaawaitairo irooperori, ritasonkawentaana Pawa, nantapiintairo kameethashiretakainane noshiyakaanakero nomanatyaame, notzikaaka, nipiyakowentaka eejatzi. <sup>8</sup> Onkantawetakya rithainkimawaitaitena, pinkathataarewo ninatye. Onkantawetakya inkaweyawaitaitena, ari inthaamentawentaitaina. Onkantawetya niñaawaitapiintairo irooperori, iitapiintaitena “thairi”. <sup>9</sup> Onkantawetakya eero itzimi kaari ñaayetenane naaka, tzimimaitacha itsipa yotaperotanari. Nonkamimawetakya, eekero nañaatye. Rowasankewetaitakena, te rowamagaitana. <sup>10</sup> Owashire nonkantawetakya, eekero nonthaamentatyeeya. Nonkoityaawaiwetakya naaka, nonintaakayimaitaari itsipapaini. Okantawetaka tekaatsi tzimimotenane naaka, nonintayimaitaawo kowaperotachari.

<sup>11</sup> Corinto-satzi, nokantaperotatziiiro jirokapaini, tekaatsi nimanimotemiri. <sup>12</sup> Tekerarika awentaawakaata, eerokapainira kantashitawo, tera naaka. <sup>13</sup> Janjaatya paakameethatana naaka noshiyakaakemira eeroka, tekaatsi nimanimowaitemi. (Nokantzimiro jiroka, oshiyawaitakawo iriime eentsi niñaanate.)

### *Oshiyaiyaawo itasorentsipankote Pawa Kañaaneri*

<sup>14</sup> Eero piwithaari kaari kemisantatsine. ¿Kantachama kameethashireri raapatziyaari rantawaite kaariperoshireri? ¿Kantachama eejatzi ontsirenite tsika okiteesheenkatzzi? <sup>15</sup> ¿Kantachama Cristo rakakoteri ikowiri Kamaari? ¿Kantachama kemisanzinkari intsi-patyaari kaari kemisantatsine rashityaawo oitarika? \* <sup>16</sup> ¿Kantachama oshiyakayero itasorentsipankote Pawa tsikarika ipinkathataitziri oshiyakaawontsi? Tema akaatzira akemisanzinkaritari oshiyayetaawo aakame tasorentsipanko risaikira Pawa Kañaaneri. Jiroka ikantake Pawa:

Ari nisaikashiretantaiyaari, nontsipataiyaari nanashiyetaiya  
Naakatake roshiyakaagai Iwawane,  
Iriira nashitaiyaari Naaka.

<sup>17</sup> Iro ikantantari eejatzi Awinkatharite:  
Pintainaryaapithateri itsipasatzi atziri, eero pikempiyaminthatari jirikapaini.  
Eero pantairo nopinkakayimiri.

Ari naapatziyaimi,

<sup>18</sup> Poshiyakagaina naakame pipaapate,  
Noshiyakagaimi eerokayetakeme notomipaini, eerokayetakeme nishintoite.  
Arira ikantzi Awinkatharite, Shintsiperotatsiri.

## 7

<sup>1</sup> Netakotané, irootakera ikashaakaakairi Pawa, ontzimatye ankiteshiretai, apakagairo maawoini kaariperori, okaatzi antayetziri, okaatzi akenkithashireyeteri eejatzi. Ontzimatye oñaagantairo apinkathatziri Pawa, ikiteshiretakagai.

### *Ikimoshiretake Pablo ripakagairowa Corinto-satzi kaariperori*

\* 6:15 Kantakotachari jaka “Kamaari” irijatzi iitaitzitari “Belial”.

<sup>2</sup> Paakameethataina naaka. Te nokantzimoneentakaimi eerokapaini, te nowaariperotakaantawaitemi, te namashiwaitzimi eejatzi. <sup>3</sup> Te iro nokantantawori jiroka nothawetakotatziimi. Napiitawaimiro nokantzitakemiri: “Netakoperotaimi”. Iro nonkantapiintemiri eeniro añaayetzira, ari nonkantzityaawo eejatzi ankamawetakyaaarika. <sup>4</sup> Osheki nawentaayetakemi eerokapaini. Nasagaawentaimi. Arika nonkenkithashiretakotemi, pithaamentashiretakaana, kimoshireri nokanta, okantawetaka osheki ikoshekawetaaitakena jaka.

<sup>5</sup> Tema nareetakaga Macedonia-ki, te okanta nimakoryaapaake tema osheki pomeentsitzimotakenari. Eenitatsi ñaanaminthawaitakenari, irootake kantzimoshirewaitakenari. <sup>6</sup> Iri kantacha Pawa roimoshirenkapiintziri okantzimoshirewaitari, ari ikantakenari naaka, rareetapaakaga Tito nisaikira. <sup>7</sup> Osheki nothaamentashiretanaka noñaawakerira. Iro nothaamentaperotantanakari ikamantapaakena jimpe pikantaiyani eerokapaini. Ikantapaakena: “Raakameethatawakena Corinto-satzi, ikowaiyakeni iñeemi, osheki okatsitzimoshiretakari rantzimotakemiri, antawoite retakoyetaimi.” Ari ikantapaakenari, iro oimoshirenkaperotakenari. <sup>8</sup> Pairani, nosankenatantakemiri ketziroini, noshiyakaaminthaitzi osheki owashiretakaawaitemi nokantayetakemiri. Pairani notyaantantakemirori, nokantashirewaitanake: “Eero notyaantzinirime.” Niyotai iroñaaka eepichokiini powashirewaitapainta eerokapaini. <sup>9</sup> Iro nokimoshiretantari notyaantaimiro. Te nonkante iro nokimoshirewentziri nowashiretakaawaitemi. Iroowa nokimoshirewentairi pipakaayetairowa kaariperori. Ari pikenakaakero pinimotakaantaariri Pawa poitsinampagairo powashiretanewo, tera nowaariperowaitemi naaka. <sup>10</sup> Arika rowashiretakaantya Pawa, ikowatzi ripakaakaantairo kaariperori, rawisakoshiretantaityaari. Eero okantzimoshirewaitai jiroka. Iroowa rowashiretakaantashiwaityaarika isaawikisatzipaini, iñagaitero inkamashiretaite. <sup>11</sup> Opoñaantari rowashiretakaawaitzimi Pawa, iroowa kenkithashiretakagaimine kameethaperoini, pinkisawentina, owatsimaanakemi, thaawashire pikantanaka, petakoperotaina, powasanketakeri kantakaantzirori. Ari pikenakaakero poñaagantantakawori kiteshire pikantayetanaawo. <sup>12</sup> Iro opoñaantari nosankenatantzimiri pairani, nokowake riyotakagaimi Pawa tsika pinkantya piñaashintsiwentaina naaka. Te iro nosankenatantyaawori rowasanketantaityaariri kantakaashitawori, te nonkisawentantyaawo ramashitaitakeri.

<sup>13</sup> Iro nothaamentantanakari. Osheki okimoshiretakaakena nokemawakera paakameethatakeri Tito, powawisaitakeri okantzimowaiwetarira irirori. <sup>14</sup> Nokamantzitakari Tito tsika pikantaiyani eerokapaini, nokantakeri: “Kameetha rinaiyini Corinto-satzi.” Te powaañaantanawo okaatzi pantakeri, imaperotatya nokantzitariri Tito. Ari oshiyawo eejatzi nokantzimiri eeroka. <sup>15</sup> Retakoperotaimi iroñaaka Tito, arika inkenkithashiretakotemi tsika pikantaiyani paakameethatawakeri, pikemisananakeri, pipinkathatanakeri. <sup>16</sup> Antawoite nokimoshiretztika naaka, kantacha iroñaaka nawentaaperotaimi.

## 8

### *Koriki rashitakagaitariri rashitakagaitariri*

<sup>1</sup> Iyekiite, nokowi piyotakotairi piyowentaariri Pawa jaka Macedonia-ki, ineshironkayetairi. <sup>2</sup> Okantaweta iñaayewetakawo osheki ratsipewaitakeri, kimoshire ikantaiyani. Okantawetaka ikoityaawaiwetaka, osheki koriki rashitakagaitakariri. <sup>3</sup> Ikwakaanekiini rantayetakeri jiroka, ipantayetake okaatzi raawyaayetziri, ranaantake ipashitanta. <sup>4</sup> Ari ikantakena naaka: “Jame ashitakayaari koriki itsipasatzi kemisantzinkaripaini, ikaatzi koityaawaitatsiri.” <sup>5</sup> Rimaperotakeri rantakeri anaanakeri nokenkithashiretakowetakariri. Iri ikamaiwentanaka Awinkatharite, ari ikantakenari eejatzi naaka. Tema iro ikowakaakeriri Pawa. <sup>6</sup> Iroowa

noshintsithatantakariri Tito ripiyanai inthamentashiretakaantemiri pantayetairo eejatzi eerokapaini. Iri tsipatapaakemiri petantanakawori pipantayetake. <sup>7</sup> Eeroka anaantanaintsiri pantayetanakero oitarika. Kameetha pikemisantayetanai, kameetha pikenkithatakaantayetanai, kameetha piyoyetanai, thaamenta pikantayeta, antawoite petakotakena. Nokowi iroñaaka panaante pimpantayete.

<sup>8</sup> Eero noshintsithatzimi pimayetantyaawori. Apatziro nonkenkithatakotemiri tsika ikantayetaka jaka rominthayetaa ineshironkatante. Ari okanta eejatzi onkameethawaiteme poñaagantairo petakoperotantayeta. <sup>9</sup> Kameethawaitake pantayetairo rantapaintziri Awinkatharite Jesucristo, ineshironkaperotantapaintzi. Otzimimowetari irirori maawoini, roshiyakari ashaagantaperotachari, iro kantacha roshiyakotapaintari koityaawaitzinkari. Iroowa rantanakawori jiroka pinintaawaitantaiyaari oshiyawaitaiyaawome pashaagantatyeyeeame inkiteki. <sup>10</sup> Jiroka nokenkithashiretari naaka: Irootake kameethatsiri pithotyagairo okaatzi petanakari. Eerokapaini etanakawori awisanaintsiri osarentsi pikenkithashiretaka pimpantayete. Pimatakeri petanakawo. <sup>11</sup> Janjaatya pithotyagairo. Poshiyakagairo owakera pithaamentaiyanakani petantanakawori. Janjaatya pithotyaaantyaawo okaatzi tzimimotzimiri. <sup>12</sup> Te inkowakagairo Pawa anaakairo ampantayetero okaatzi tzimimotairi. Apatziro ampantero okaatzi aawiiri. Ari inimotakeri Pawa. <sup>13</sup> Te nokowakotatziimi pimpante inintaawaitantaityaari, iro pinkoityaawaitantyaari eerokapaini okantakaantziro pipantayetake. <sup>14</sup> Tema otzimimotaimira eeroka, iroowa kameethatsiri pimpashitaiyaari ikaatzi okoityiimowaitziri. Aritakera impashitaimi eeroka paata arika onkoityiimotaimi. Iroowa poshiyawakaantaiyaari. <sup>15</sup> Oshiyakawo okaatzi rosankenatakoitakeri pairani, kantatsiri:

Ikaatzi aaperotaintsiri, te otzimagaantawaitzi.

Iriima againtsiri eepichokiini, te okoityiimowaitari.

<sup>16</sup> Niwetharyaari Pawa, tema iri kantakaakawori retakotantzimiri Tito, ari nokantzi-tari naaka netakotzimi. <sup>17</sup> Nokantakeri: “Tito, pipiyanai Corinto-ki.” Oiminthawaitaka ketziroini. Iro riyaate iroñaaka. <sup>18</sup> Nontsipataimiri Tito itsipa iyeki. Kameethari kenkithayantzi rinatzi. Pinkatha rowayetziri itsipa kemisantzinkaripaini tsikarika-paini, ikemayetakeri ikenkithatakotairo Kameethari Ñaantsi. <sup>19</sup> Irijatzi yoyaakeriri jaka kemisantzinkaripaini, rowakeri intsipatanakena paata naanakeniri koriki itsipa kemisantzinkaripaini koityaawaitatsiri. Iroowa oñaaganterone imaperotatya etakoyetari, iroowa ompoñaantyaari impinkathaitairi Pawa. <sup>20</sup> Iroowa eero ikantakoitantanari koriki arika nantetaanteri rashitakagaitariri kemisantzinkari. <sup>21</sup> Te apatziro nokowi onkameethatzimoteri Pawa, eejatzi onkantzityaari atziripaini onkameethatzimoteri irirori. <sup>22</sup> Notyaanteri eejatzi itsipa iyeki intsipatanakyaari. Iriitake nokikitapiintakari, rominthakitakawo ramitakotante. Nokenkithatakotakeniri tsika pikantaiyani eerokapaini, rominthaperotanaka ramitakoyetemi, rawentaaperotanewo rowayetanakemi. <sup>23</sup> Jirika Tito, notsipaminthare rinatzi, ari notsipatapiintakari nantawaiwentakemi. Iriima itsipa apite iyeki intsipatanakyaari, rotyaan-tanewo rinatzi kemisantzinkaripaini saikayetatsiri jaka, ipinkathaperotziri Cristo. <sup>24</sup> Ontzimatyepaakameethatawakeri arika rareetakya janta. Iro riyotantyaari iyekiite kemisantatsiri jaka imaperotatya okaatzi nokenkithatakotakemiri eerokapaini.

## 9

<sup>1</sup> Niyotzi te okowa nosankenatakotemiri piyorikite inkaate potyaanteniriri itsipasatzipaini roiteshiretairi. <sup>2</sup> Tema niyotake ayimatapiintakemi pantero. Ari

nokenkithatakotakemi jaka Macedonia-ki, nokantantake: “Ikowitaka Acaya-satzi impante awisanaintsiriranki osarentsi.” Nokenkithatakotakemira eerokapaini thaamentayetanaka iriroripaini. \* <sup>3</sup> Iro notyaantantemiriri iyekiite inkamantantemiri, iri eta-paakyaawone rowiiteri koriki. Te nokowi aminaashiwaitya okaatzi nokenkithatakotakemiri eerokapaini jaka. <sup>4</sup> Nokowatzi intsipaite nareetanakemi nawisanakerika janta. Ari royaatanakena Macedonia-satzi. Arika noñaapaakero tekera powiiteriita koriki, osheki nonkaaniwaite, tema nokenkithatakotakemi jaka. Ari pinkantakyaari eejatzi eerokapaini pinkaaniwentawaitya. <sup>5</sup> Iro notyaantantemiriri jirika iyekiite, iri etapaakyaawone rareetemi janta tekera niyaateeta naaka. Iriitake owiitakotapaakerine koriki ikaatzi pikowakaantakeri eerokapaini. Wetsika pinkantakeri maawoini koriki arika nareetapaakya, ero notsiwakakaantapaakemiro pantayetero.

<sup>6</sup> Apatziro pinkenkithashiretero jiroka:

Ikaatzi pankitatsiri eepichoki, eepichokiini rowiitai.

Iriima pankiperotaintsiri, osheki rowiitai.

<sup>7</sup> Maawoini eerokapaini ontzimatyepimpantai okaatzi pikowiri. Eero pishintsineentawaitzi impantaite osheki terika ikowaitzi, iro ero okantzimoshirewaitantari ipantake. Apaani atziri kimoshirewentzirori ipantake, iriira retakotari Pawa. <sup>8</sup> Iri Pawa oshekyagaimirone koityiimowaitzimiri. Ari ontzimagantake onkaate pimpantayeteri kameethaperoini eeroka. <sup>9</sup> Oshiyawaityaawo kenkithatakotachari Osankenarentsiperoki, kantatsiri:

Okaatzi tzimimotziriri Pawa, iro rantetaakeniriri koityaawaitatsiri.

Tema tampatzikashireri rinatzi irirori, ari rashi rowaatziiro.

<sup>10</sup> Iri Pawa kithokitakairori pankiyetachari, irijatzi shookakairori, iro rowiitaitantawori okaatzi rowaitari. Ari inkantemiri eejatzi eerokapaini impayetaimiro koityiimotzimiri, ontzimimotantaimiri pimpayeteriri itsipapaini, tampatzikashire pinkantya.

<sup>11</sup> Iro impaperotantemiri Pawa pimpantapiinterika eeroka. Iro riwetharyaan-taiyaariri Pawa, aayetzirori apantayetziri. <sup>12</sup> Ari okanta, okaatzi pipantayetziri te apatziro pineshironkateri koityaawaitatsiri, iro riwetharyaan-taiyaariri eejatzi Pawa.

<sup>13</sup> Arika iñagaitakero okaatzi pipantayetziri, ari pikantayetakeri eejatzi itsipapaini, osheki impinkathatanakeri Pawa. Tema iñaakero te apatziro piñaawaitashita, pikantzi: “Nokemisantairi Cristo okenkithatakotziriri Kameethari Ñaantsi.” Iñaakero eejatzi pantayetziro oñaagantairori imaperotatya pikemisantanai. <sup>14</sup> Iro retakoperotantemiri, ramanakotaimi, okantakaantziro ineshironkataimira Pawa. <sup>15</sup> Ari ankantanaiyaari eejatzi aakapaini awetharyaanaiyaari Pawa, tema ineshironkaperotai aaka, iro maperotakerori okameethatzi, ero okanta athotyagairo ankenkithatakotairo.

## 10

### *Ikenkithatakotziro Pablo okaatzi rantayetziri*

<sup>1</sup> Naaka Pablo, tzimatsi nokowakotzimiri. Tsinampashireri nonkantya ero nokisathawaitzimi, noshiyakotaari Cristo. Niyotzi eenitatsi kenkithatakotakenari, ikantzi: “Risaikimotairika Pablo jaka tsinampashireri rinatzi, irooma risaikerika intaina kat-sima ikanta.” <sup>2</sup> Nokowakotzimi, ero piyaatakaairo powatsimaawaitena. Iro ero niyakowentantapaakemi arika nareetapaakemi. Tema niyotake ari nonkantayeta-paakeri ikaatzi saikimoyetakemiri janta kantayetaintsiri: “Tekaatzi iitya Pablo, ari roshiyari itsipapaini atziri te otzimi ishintsinka.” <sup>3</sup> Imaperowetatya ari noshiyari itsipapaini atziri, iro kantacha tzimatsirika kaari nakakotzi naaka, tera oshiyawo

\* **9:2** Iitaitziri “Acaya”, iroowa kipatsi tsika isaiki nampitsi Corinto.

arika nonkoshekyaari atziri. <sup>4</sup> Tema arika nonkoshekantya naaka te notaiyiro omanamentotsi, itasorenkaga Pawa nokoshekantariri atziripaini. Iroowa noitsinampaantaariri ikaatzi ishintsitakaayewetakari noisaneentanewo. <sup>5</sup> Noitsinampagairi naaka koshekantaneri, noitsinampaayetairi asagaawaitzinkari otzikatzikatantatsiri kaari riyotakoitanti Pawa. Noshiyakaakero notaiyatyeerome noyenkishiryaamento, noshintsineentaiyaame nonkemisantairi Cristo. <sup>6</sup> Arika nonkemakowentaimi eerokapaini pipiyashitaari pikemisantairi Cristo, aripaite niwetsikya nowasanketeri ikaatzira piyathatachari.

<sup>7</sup> Paamagaiya rowapeyimotzimikari. Tema tzimayetatsi pikaataiyinira kantayetatsiri: “Rashitana naaka Cristo.” ¿Ikenkithashiretama te rashitzitana eejatzi naaka? Iroorika ikenkithashiretari, ikenakaashitakawo, tema naaka rashiperota Cristo. <sup>8</sup> Aamaa ari pinkantanake eerokapaini: “Rasagaawentakawowa Pablo okaatzi ikenkithatakotziri.” Te nokaaniwentziro, tema iri Awinkatharite owakenari niyotaantayetai, tera rowana nowaariperotante. <sup>9</sup> Iro kaari nokowanta pinkenkithashiryaawaitya nokowatziira nominthaaawantemiro okaatzi nosankenatakemiri. <sup>10</sup> Aamaa tzimatsi kantatsine: “Rotyaantapiintairo Pablo rosankenare, osheki ishintsinaanetapiintakai, ikenkithatakotapiintairo pomeentsitzimotairi antayetero. Irooma risaikimoyetairika jaka, te ishintsinaanetantzi. Arika inkenkithayete manintaarewo rinake.” <sup>11</sup> Jiroka nakayeteriri ikaatzi kantayetatsiri, nonkanteri: “Tsika okanta piñaayetziro nosankenayetzimiri, ari nokantzitari eejatzi naaka nisaikimoyetemirika.” <sup>12</sup> Te naapatziyari naaka asagaawentawaitachari pikaatzira pisaikaiyini janta. Tera riyotaiyini irirori. Tema eenitatsi monkaatawakaapiintachari, ikenkithashireweta ranaawakaantyaawo okaatzi kameethatzimowaitashitariri iriroripaini. <sup>13</sup> Irooma naaka te nasagaawentawaitawo nimonkaatero kameethatzimowaitashitanari, apatziro nokenkithatakotairo nimonkaatero ikantakenari Pawa nanteniri. Jiroka ikowakeri nanteniri, ontzimatyete niweyeero nantawaiteniri janta tsika pisaikaiyini eerokapaini. <sup>14</sup> Irootake noñaashintsitakowentantzimiri eerokapaini, te nanaakairo ikantakenari Pawa. Tema naaka etakawori nokenkithatakaakemiro Kameethari Naantsi tsika ikantakota Cristo. <sup>15</sup> Iro kaari noshiyantari asagaawentawaitawori rimonkaatanewo, tema tzimatsi itsipa etajaantanakawori rimonkaatakero. Iro kantacha, eekerorika pantakishiretanakitye, eero nopankenawaitaimi eerokapaini, <sup>16</sup> kantacha niyaayete otsipaki nampitsi nonkenkithatakaantairo Kameethari Naantsi. Iroowa nanteri, eero nokenanake tsika retanakawo ikenkithatakaantzi itsipa atziri, nasagaawentawaitawokari rimonkaatanewo itsipa. <sup>17</sup> Tekaatsi pantyaawone asagaawentawaitya apaniroini. Iro pantaperotawori asagaawentaiyaawo rantayetziro Awinkatharite. <sup>18</sup> Tema tekaatsi oitya anthaamentawaitya apaniroini. Iroowa kowaperotacha inthaamentakiperotai Awinkatharite.

## 11

<sup>1</sup> Nokowi pinkisashityaawo okaatzira nosankenatzimiri jaka, onkantawetakya oshiyimotemi rantziri masontzi. Nokowi eekero piyaatatyete piñaanatero. <sup>2</sup> Osheki naamaakotakemi eerokapaini, iri Pawa kantakaawori. Tema naaka etakawo nokenkithatakaakemi rashitantaaimiri Cristo. Noshiyakagaimi eerokame nishinto, eenitatsi nokashaakaakemiri pintsipatyaari, aamaakopero nowaimi eero pikaariperowaitanta irojatzi paawakaantakyaari. Iriira oshiyakaawentacha Cristo, oshiyakariri iriime paayetairi paata. <sup>3</sup> Tema nothaawakaakemi ripokera iita amatawitemine, roshiyakota-paakyaari maanke amatawiterori pairani Eva. Aritake roitzipinaakemi, ripakaakagaimiro pawentagaarira Cristo, pikinatari. <sup>4</sup> Te pishenkaashitawo eerokapaini pakayetziro itsipa kenkithatakotemirine Jesús, ari pakakeri inashitapaakyaawone okaatzi no-



kenkithatakotakemirira ketziroini Jesús, nokenkithatakaakemiro Kameethari Ñaantsi, nokenkithatakotakemiri Tasorenkantsi. <sup>5</sup> ¿Pikenkithashiretama eerokapaini ranaakena Rotyaantaperoritz jirikapaini? <sup>6</sup> Aamaa terika nokenkithatzi kameethaini naaka, tzimimaitacha niyorenka. Iroowa piñaakotapiintakenari. <sup>7</sup> Pairani nokenkithatakan-takemirori Kameethari Ñaantsi kenkithatakotziriri Pawa, ¿nokenakaashitakawoma te nap-atotziriri koriki? Tsinampashire nokantaka nantawaiwentakemi niyotaantakemirori, te nokowakowaitzimi. Iroowa roshiyakagaitantaimiri iriiperori pinayetzi. <sup>8</sup> Okanta nokenkithatakaapaakemi pairani, iri itsipasatzi kemisantzinkaripaini payetakenari koriki nañaantari. Oshiyawaitakawo nonkoshitatyeerime iriroripaini nantawai-wentantakemiri eerokapaini. <sup>9</sup> Pairani eeniro nisaikimotzimi eerokapaini, os-heki nokoityaawaitake. Te noñiimi pimpena oita nañaantyaari. Ikamintha ra-reetaiyakani iyekiite Macedonia-satzi, iri payetapaakenari. Iro kaari noñaantawo pimpayetena koriki eerokapaini. Ari nonkantapiintaatyero eero nokowakotzimi. <sup>10</sup> Antawoite nokimoshirewentakero te nokowakoyetzimi, ari nonkantapiintatyero maawoiniki nampitsi saikatsiri Acaya-ki. Riyotziro Cristo irooperori nokantakeri. <sup>11</sup> ¿Pikenkithashiretama eerokapaini te netakotzimi nokantantawori jiroka? Riyotzi Pawa netakotzimi.

<sup>12</sup> Eekerowa niyaatakaatyero, eero riñaawaitanta pasagaawentawaitakari ikenkithatakaimi, inkante: “Ari noshiyari Pablo.” <sup>13</sup> Jirikapaini kenkithatakaashi-waitakemiri kaarira Otyaantaperori, amatawitantaneri rinayetzi, apaniroini roshiyakaashiwaitaka iriime Rotyaantaperore Cristo. <sup>14</sup> Tekaatsi oitya romapokakaan-tairori jiroka. Tema rimatzitawo Satanás roshiyakotari maninkari rishipakiri ramatawitantatyaari. <sup>15</sup> Iroowa eero romapokantai antawaiyetziniriri Satanás, irojatzi rimatzitari irirori. Roshiyakaatzi rantatziro kameethashiretakagairine atziripaini. Ari rowasankewentaitairi okaatzi rantayetziri.

### *Ikemaatsiwaitaka Pablo Rotyaantaperotzira*

<sup>16</sup> Napiitawakero nonkantemi, onkamintha eero noshiyimotzimiri masontzi. Arika noshiyimotemiri, pishinetena nasagaawentawakya eepichokiini. <sup>17</sup> Okaatzi niñaawaitziri iroñaaka, tera oshiyaawo riñaawaiterime Awinkatharite. Noshiyakotatyaarira masontzi rasagaawentashiwaita. <sup>18</sup> Arira ikantapiintaka itsipapaini atziri, ari nonkantya eejatzi naaka. <sup>19</sup> Poshiyakaantapiintaka eerokapaini yorenkari pinayetzi, ¿oitakama pikowantari iroñaaka pinkemisanteri masontzi? <sup>20</sup> Iroowa pantayetakeri eerokapaini, pikemisantapiintakeri oshiyakaakemiri rimperatanewo, aapithawaitzimirori oshekitzimotzimiri, awentaawaitzimiri, asagaawentawaitachari, pasawoowaitzimiri eejatzi. <sup>21</sup> ¿Pikenkithashiretama te naawyaawainetzi noitsinampaantyaawori oshiyakawori jirokapaini? ¿Kantachama nonkaaniwentero te naawyaashityaawo? Eero. Iro kantacha tema nantake oshiyaawone rantawetakari iriroripaini, nasagaawentawaitya, onkantawetakya noshiyakowetyaari masontzi.

<sup>22</sup> Iroorika rasagaawentawaitaka riñaawaitziro Heber-thato, nimatzitawo naaka. Iroorika rasagaawentawaitaka icharineyetari Israel-ni, nimatzitawo naaka. Iroorika rasagaawentawaitaka icharineyetari Abraham-ni, nimatzitawo naaka. <sup>23</sup> Iroorika rasagaawentawaitaka rantawaitainiri Cristo, nimatzitawo naaka. (Aama noshiyakari naaka ikenkithawaitzi masontzi.) Iro kantacha nasagaawentakawo nanairi jirikapaini nantawaitzi, nanayiri eejatzi noñaapiintakerowa romonkyaaawaitaitakena, ripasawaitaitakena, rowamayimawaitaitakena. <sup>24</sup> Noñaakero okaatzi 5 rapiitakero nosheninka-

paini raakena ripasawaitana janta ipiyotaitapiintaga. \* 25 Mawa okaatzi romposawaitaitakena. Apaani okaatzi rishemyagaitakena. Mawa okaatzi nipitamenkakatoka. Apaani tsireniri nisaikakotake niyankyaaneki inkaare, ari nokiteeshetakotake. 26 Osheki nareetantayetaka. Nokenakotake okoweenkayetzira ñaa. Nosatekantakari ipiyotaga koshintzipaini. Ikowawetaka nosheninkapaini rowaariperotename, eejatzi ikantakari kaari nosheninkata. Nokoweenkatakotake nampitsiki eejatzi tonkaariki. Nokoweenkatakotzitaka inkaareki. Osheki riñaantsipookitakotakena jitashiwaitachari “iyeki”, kaarimaita. 27 Osheki nantawaitake, ayimawaitakena nomakone. Ayimawaitakena nowochokine, nitashe, nomere, noyatsinkare. Tasheneenta nokantaka. Ni-maawaitake tsikarikapaini. 28 Tzimatsi osheki awishimoyetakenari. Iro kantzimoperotakenari risaikayetai kameetha ikaatzi kemisantayetaatsiri tsikarikapaini. 29 Arika noñeeri mantsiyari, noshiyakaaka naakame mantsiyatatsine. Tzimatsirika inkaariperotakagaiteri, osheki nonkisawenteri. † 30 Nasagaawentawaita naaka, nokenkithatakotakero tsika nokantaka kaari naawyaawaitanta. 31 Iita yotatsiri te namatawitantzi, iri-ira Pawa, Ashitariri Awinkatharite Jesucristo. ¡Thaamenta inkantawentaityaari! 32 Tema pairani nisaikantapaintari Damasco-ki, ithonka ikempoyaawetakawo reewarite Aretas maawoini nampitsi, eero nishitowanta, iro raakaantantenarime. 33 Iro kantacha rote-taitakena kantziriki, rowayiitakotaitakena jantakeronta nampitsi, irojatzi nishiyan-taari.

## 12

### *Oshiyawaitawori arika owathagaim kitochee*

1 Te okameethatzi nasagaawentawaitya. Iro kantacha eekero nonkenkithatakotatyero noñaawyaatakari, roñaagakenari Awinkatharite. 2 Niyotakotziri jirika atziri rashitaari Cristo. Tzimake 14 osarentsi ragaitairi jirika atziri inkiteki, riyaaperotaatzi jenoki inkiteki. Aamaaka riyaashirenkatatzi, te niyotzimaita. Aamaaka, riyaatatziirika koñaawoini iwathaki, te niyoperotzi. \* 3 Iri Pawa yotatsi riyaashirenkatatziirika, riyaatatziirika koñaawoini iwathaki. Piña netapanaantyaawo nonkenkithatakoteri jirika atziri. 4 Ragaitairi janta ikimoshiretaitapaira. Ikemayetairo kaari rishinetaitziniri atziri inkenkithatairo. 5 Ari rasagaawentyaawome jirika atziri okaatzi iñaakeri. Iro kantacha eero nasagaawentawaita. Apatziro nokenkithatakotakero tsika nokantaka kaari naawyaawaitanta. 6 Arime nasagaawentyaawome okaatzi noñaayetakeri, eerome nomasontzishirewaitzime. Ari nonkenkithawaitakerome irooperori. Iro kantacha te nokowi rasagaawentashiwaitaitena. Apatziro impinkathawentaitenawo okaatzi nantayetakeri, ikemakoitakenari. 7 Okaatzi noñaawyaatakari owaneenka okantaka, riyotake Pawa ari nasagaawentawaitakyaame. Iro ikowakaakenari namashiwaitya nowathaki eero nasagaawentawaitanta. Jiroka namashiwaitakaga nowathaki oshiyawaitakawo owathaawaitatyeename kitochee. Iriira Kamaari kantakaawori ikemaatsiwaitakaantakenari. 8 Mawa napiipiintakero nokowakotakeri Awinkatharite rookawentainawo namashiwaitaka nowathaki.

\* **11:24** Okenkithatakota rosankenareki Moisés-ni, kantacha rowasanketaiteri atziri arika rowaariperotakeri itsipa. Ontzimatyete ragaiteri tsika rapatotapiintaita, ripasawaitaiteri. Eerorika okaariperotzi ikenakaashitakari, eero ripasaperotziri. Irooma imaperotyaarika onkaariperote ikenakaashitakari, ontzimatyete rowasankeperoitari. Iro kantacha te ishinetaantsite ranaakaitero onkaate 40 ripasawaitaiteri. Iroowa rametaitari pairani ripasaiteri onkaate 39 iitarika kaariperotaintsine. Iro ompoñaantyaari eero ranaakairo Inintakaantaitakeri pairani onkaate 40 ripasatantaite. Iro ikantaitziri “Yotapaaka apaani imonkaatantyaari 40.” Okaatzi kenkithatakotainchari jaka, arira ikantaitakeri Pablo, ripasawaitaitakeri irirori. † **11:29** Ikantakoitziri jaka “mantsiyari”, eenitatsi kenkithashiretakotawori, iriira ikantakoitziri jentashirewaitatsiri ikemisantairi Cristo. \* **12:2** Kantakotachari jaka “jenoki inkiteki”, irojatzi ikantaitziri “mawataintsiri inkite”. Ari ikantayetziri Judá-ite inkenkithatakotziro. Ikantaiyini: “Etawori inkite, ari isaikayetziri menkori. Apitetanaintsiri inkite, ari risaiki: kashiri, ooryaa, impokiropaini, maawoini. Irooma mawatapaintsiri inkite, ari risaikiri Pawa.”

<sup>9</sup> Rakanakena irirori, ikantana: “Eero, tekaatsi otsipa kowimotemine, tema noneshironkatakemi. Iroowa inantyaari noñaagantairo noshintsinka naawyaashire-takaantaiyaariri atziripaini kaari inimoshireyetzsi tsika ikantayetaga.” Okanta nokemawake, kimoshire nokantanaka, nothaamentanakawo nokenkithatakoyetairo tsika nokantayetaga, iroowa aawyaashiretakagaanari ishintsinka Cristo. <sup>10</sup> Iro inimoshiretakagaanari iroñaaka kaari inimoshiretaana tsika nokantayetaga. Inimoshiretakagaana ikaweyawaitaitana, nokemaatsiwaitaka, rowatsinaawaitaitana, riñaantsipookiwentaitakena. Osheki awishimotakenari nantawaitainirira Cristo. Okanta niyotairowa te apaniroini naawyaawainetzsi, ari noñiirori rimatakagaanawo naawyaashiretanetai.

<sup>11</sup> Aamaaka masontzi ninake noñiirori nasagaawentawaitaka. Eeroka kantakaawori nimatantakawori. Iro kameethawetachari pinkenkithatakoyetainame kameethaini. Okantawetaka te niriiperotzi naaka, te ranayimaitana jitashiwaitachari “Iriiperori Otyaantaperori”. <sup>12</sup> Nisaikimowaitakemi pairani eerokapaini, noñaagakemiro imapero naaka Notyaantaperoritzi. Osheki namatsinkawentakemi. Osheki nitasonkawentantake, te piñaapiintaiyeroni, iro piyokitziwentantakawori. <sup>13</sup> ¿Litakama pikenkithashirewaitantari nomanintawaitatziimi? ¿Tema naakameethatemi noshiyakagairi itsipa kemisantzinkaripaini? ¿Iroowa kantakaantzirori te noñi oita pimpashitenari? Tzimatsirika nokenakaashitakari, pimpeyakotzitenawo.

### *Ikenkithatakotziro Pablo mawatatsine rareetantya*

<sup>14</sup> Nokenkithashiretaka napiitero niyaatashitemi, iro mawatatsine nareetemi. Eerowa nayiri pipinatenari. Kaari piyorikite nonkoweri nashityaari, tema eeroka nokowaperotake nashiyetaimi. ¿Kantachama ripinakowentero eenchaaniki ikoityiiri ipaapate? Tema iri ipaapate pinakowentantatsiri. <sup>15</sup> Iroowa nantziri naaka, oshiyawaityaawo naakame pipaapateta. Ari nimatakero natsipetakowentemi pawisakoshiretantaiyaari. Antawoite netakotakemi. ¿Litaka kaari petakotantana naaka? <sup>16</sup> Eenitatsi pikaataiyinira kantatsiri: “Aama te ikowayetai Pablo aakapaini, owana riyotzi, ari ikantziro ramatawitantairi.” <sup>17</sup> ¿Pikenkithashiretama ramatawiwaitakemi ikaatzi notyaantakemiri? <sup>18</sup> Notyaantakemiri Tito, eejatzi itsipa iyeki. ¿Ramatawitakemima Tito? ¿Tema nimonkaashiretawakaiyani naaka, naakameethayetaimi eerokapaini? <sup>19</sup> ¿Pikenkithashiretama eerokapaini iro nokantantari nokowatzi nookaakowentya? Te ari onkantya netakotanepaini. Iri Cristo ñaawaitakaanari, iro niwetsikashiretakaanaimiri. Iriira Pawa yotatsiri. <sup>20</sup> Okantzimowaitakena ankantaneentawakaawaitya arika nareetapaakemi. Okantzimowaitakena eejatzi noñaapaakemi pintzimawentawakaawaitya, pinkisawakaawaitya, pinkisaneentawakaawaitya, pinkishimatawakaawaitya, pishamewaite, pikoshekawakaawaitya. <sup>21</sup> Okantzimowaitakena nonkaaniwentaimi Pawaki. Aamaa ari nonkantakoneentawaitapaakemi pantayetakerowa kaariperori, te pipakairo pantayetziro koweenkayetatsiri, pimayempiwaitzi, piñaathatantashiwaita eejatzi.

## 13

<sup>1</sup> Iroowa mawatatsiri nareetemi. Ari naminakotantapaakemiro, ikantaitakeri:

Inkaaterika apaani ñaakotakemirone pantakero kaariperori, tera okameethatzi rowasanketaitemi. Iroowa inkaaterika apite, eerorika inkaate mawa ñaakotakemirone pantakero kaariperori, iroowa ompoñaantyaari rowasanketaitemi.

<sup>2</sup> Ari nonkantapaakeri nowasanketeri antakerori ketziroini kaariperori pisaikinta, ari nonkantapaakeri itsipapaini antakerori iroñaaka. Tema nokamantzitakemi napiitan-takawori pairani nareetzimi. Irojatzira nosankenat zimiri iroñaaka. <sup>3</sup> Aamaa pikan-taiyatziini eerokapaini: “Kaarira Cristo otyaanterine Pablo inkenkithatakaante, aamashitya kaari iriiperori Pablo.” Paamaawentya, jirika Cristo kaari atziri saikimotan-tatsine, otzimimotziri ishintsinka irirori, kantacha roñaagayetemiro tsikarika oiyeta. <sup>4</sup> Okantawetaka, te raawyaawainetzi ikentakoitantakariri. Iro kantacha añaakagairi Ishintsinka Pawa. Ari nokantakari eejatzi naaka, te naawyaawainetzi, iro kantacha irijatzi Pawa shintsitakagaanari, kantacha noñaagayetaimiro oiyetarika.

<sup>5</sup> Eero pikenkithashiretakotana naaka te niriiperotzi, pinkenkithashiretakotya eeroka. ¿Irooperoma pikantaka eeroka pikemisantai? ¿Tema piyotaiyini risaikashiretantaimi Cristo? Ari okanta, aamaa te piriiperotzi eeroka. <sup>6</sup> Niyotzi, arika piñaawakena janta, eero poshiyakaawakena te niriiperoteme naaka. <sup>7</sup> Nokowakotziri Pawa, eero noñaakotantapaakemiro piyenakaashitanewo. Tera iro nonkantantemirori jiroka nonkowe noshiyakotapaakyaari iriiperori. Iro nokowaperotzi pantayetairo tam-patzikatatsiri. Irootake nokowakeri, onkantawetakya ontzime otzikawakenaneme, eero noñaagantziro noshintsinka nowasanketapaakemi, iro niyotakaaperotantemiri naakatake iriiperori. <sup>8</sup> Te nokowiro naaka noñaagantashiwaityaawo noshintsinka, iro maperotachari nonkoweme namatawitante. Apatziro nokowi noñaagantairo riyotakotantaityaawori irooperori. <sup>9</sup> Ari nonthaamentakya arika noñaakemi paawyaashirewaitanai, onkantawetakya eekero roshiyakagaitatyeename kaari aawyaawaitzinkari. Irootake namanakotapiintakari, piñaantaiyaawori pithotyagairo paawyaashireperowaitai. <sup>10</sup> Iro notyaantantzimiroi osankenarentsi, tera nisaikimotatyeemi eerokapaini janta, eero nowatsimaantapaakemi paata. Tema iri Awinkatharite owakenari niwetsikashiretakaante, tera rowana nowaariperoshirewaitante.

### *Weyaantawori wethataantsi*

<sup>11</sup> Iyekiite, jiroka weyaantawori nonkantemiri: Pinkimoshiretaiyeni. Pithotyaayetairo paawyaashirewaitai. Pinthaamentashiretaiya. Paapatziyawakaayetaiya. Kameetha pisaikayetai. ¡Iriira Pawa saikashiretantemine, etakotantaneri rinatzi, iriira kameetha saikakaantatsiri! <sup>12</sup> Etako pinkantya pi-wethatawakaanaiya janta. <sup>13</sup> Riwehatzimi eejatzi roiteshiretaitairi nampitawori jaka. <sup>14</sup> ¡Onkamintha ineshironkataimi Awinkatharite Jesucristo! ¡Onkamintha retakotaimi Pawa! ¡Onkamintha inkantakayaawo Tasorenkantsi paapatziyawakaantaiyaari! Ari onkantaitaatyeeyaani.

## ROSANKENARE PABLO ROTYAANTZINIRI GALACIA-SATZIITE

### *Wethataantsi*

<sup>1</sup> Naakatake Pablo otyaantzimirori jiroka osankenarentsi. Otyaantaperori nini naaka. Kaari atziripaini otyaantenane, Jesucristo otyaantakenari itsipatakari Ashitairi Pawa owiriintairiri pairani ikamawetakaga Jesucristo. <sup>2</sup> Ari notsipatari maawoini iyekiite kemisantanaatsiri jaka nosankenatzimirowa jiroka. Eerokapaini notyaantzini pikaatzi pikemisantai janta Galacia-ki. <sup>3</sup> Onkamintha ineshironkayetaimi Ashitairi Pawa, kameetha risaikakaayetaimi, ari inkantzitemiri eejatzi Awinkatharite Jesucristo. <sup>4</sup> Tema iro ikowakeri Ashitairi Pawa rishinewentai Cristo, ikamawentayetakai akaariperoshirewetakaga, ari onkantya eero oshiyakotantari ikaatzi kaariperowaitatsiri iroñaaka, oshiyawaitakawo rontsiparyaakowentaatyame. <sup>5</sup> Onkamintha impinkathatapiintaiteri Pawa. Ari ashi owaatyero.

### *Tekaatsi otsipa Kameethari Ñaantsi owawisaakoshiretantatsine*

<sup>6</sup> Pomapokantakenawo intsipaite pipakaanakero pikemisantawetarira Pawa. Tema iriitake yoyaawetaimiri, antawoite retakoyetzimi, irootake rotyaantantakemiriri Cristo. ¿Oitaka pikemisantantawori otsipa kaari oshiyaawone Kameethari Ñaantsi? <sup>7</sup> Tema kyaaryoo nonkante naaka, tekaatsi otsipa ñaantsi owawisaakoshiretantatsine. Tzimatsi pakaakaakemirori, ikowatzi roitzipinaashiretemi, irootake rowashiñaantayetakawori ikenkithatakoyetziri Cristo. <sup>8</sup> Arime nowashiñaayetaimirome nokenkithatakaakemiri pairani, rowasanketaitenaata naaka. Ari oshiyawo eejatzi, arime ripokeme maninkariite poñaachari inkiteki, inkenkithatakotapaakerorika otsipa ñaantsi kaari oshiyaawone nokamantakemiri pairani, rowasanketaiteriita irirori. <sup>9</sup> Ari nokantzitakemi pairani, irootake napiitemiri nonkantemi: Tzimatsirika owashiñaakerone nokenkithatakotakeriri Cristo pairani, rowasanketaiteriita.

<sup>10</sup> ¿Irooma nithotyaakotzi kameethatzimotziriri atziripaini? ¡Te! Nithotyaakotatziro kameethatzimotziriri Pawa. Iroorikame nithotyaakote kameethatzimotziriri atziripaini, te rimperatana Jesucristo naaka.

### *Rantawaire Pablo*

<sup>11</sup> Pinkeme iyekiite, okaatzi nokamantakemiri Kameethari Ñaantsi, kaari atziri yotakainawone. <sup>12</sup> Iri Jesucristo yotaakenawori maawoini, tema kaari atziri ashityaawone. <sup>13</sup> Pikemakotaiyakenani tsika nokantaweta pairani eeniro nimonkaayewetawo rameyeteri nosheninkapaini Judá-ite. Pikemakotaiyakenani eejatzi osheki nokisaneentayewetakari ikaatzi kemisantziriri Pawa, nowasanketakaantake osheki, nokowaweta nipakaakairime ikemisantziri. <sup>14</sup> Tema nimaperowetanakityaawo naaka nimonkaawetawo rameyeteri pairani nosheninkapaini, tekaatsi anayenane nokantawetakaga. <sup>15</sup> Iro kantzimitacha pairani tekera notzimiita naaka, riyoyiitakena Pawa. Antawoite retakotakena irootake rowawisaakoshiretantakenari. <sup>16</sup> Roñaagaanari Itomi, niyotakotairi. Ikowake nonkenkithatakairi kaari Judá-itetatsine tsika okantakota rawisakoshiretantaitari. Tekaaitsi atziri nosampitanake nonkanteri: “¿Oitaka nanteri?” <sup>17</sup> Te nishiyashitapaintari Jerusalén-satzi etayetakawori rotyaantaperoritzi. Apatziro nowanakero niyaatanake Arabia-ki, irojatzi nipiyantapaaka Damasco-ki.

<sup>18</sup> Okanta awisake mawa osarentsi, ari niyaatashitakeri Pedro risaiki irirori Jerusalén-ki, apatziro nisaikimowaitapaintziri okaatzi 15 kiteesheri. <sup>19</sup> Iro kantacha te noñaapaake itsipa Otyaantaperori, apatziro noñaapaakeri Jacobo irirentzi Awinkatharite.



\* <sup>20</sup> Imaperotatya okaatzi nosankenatzimiri, te namatawitzimi, riyotzi irirori Pawa. <sup>21</sup> Irojatzni niyaatantaka nampitsiki Siria eejatzi Cilicia-ki. <sup>22</sup> Tekera iñaayetanaata Judea-satzi ikaatzira kemisantziriri Cristo, <sup>23</sup> apatziro ikemakotashitana ikantaitzi: “Jirintaganki koshekairi pairani ikisaneentai, kowawetachari rithonkai, ikenkithatakotairo iroñaaka irirori tsika ikantaita ikemisantaitzi.” <sup>24</sup> Irootake ipinkathatantakariri iroñaaka Pawa ikemakotakenaga.

## 2

<sup>1</sup> Okanta awisake 14 osarentsi, ari niyaatake eejatzi Jerusalén-ki notsipatanakari Bernabé eejatzi Tito. <sup>2</sup> Iro niyaatantakariri tema Pawa ominthashiryaakaakenari. Okanta nareetaka janta, niyoyaapaakeri jewayetziriri kemisantzinkari, nokenkithatakotapaakero okaatzi nokamantayetairiri Kameethari Ñaantsi kaari nosheninkata. Iro niyoyaantapaakariri ompoñaantyaari eero aminaashiwaitanta okaatzi nantayetakeri. <sup>3</sup> Te ishintsineentaitawakeri notsipatakari Tito ritomeshaanitakaityaari, okantaweta Grecia-thato riñaanetari irirori, kaari nosheninka. <sup>4</sup> Ari rosatekawaitakari kashaawaitawori inkemisanteme, iri kowawetachari ritomeshaanitakaantyaame. Te inimotziri irirori risaikashiwaitaiya kemisantayetatsiri rontsiparyaakowentayetairi Jesucristo. Iro ikowaperotaiyini roshiyakotyaari imperataarewo. <sup>5</sup> Iro kantacha te nishinetakaantero roshiyakoityaari, iro nokowaperotake riyotakoperotero Kameethari Ñaantsi awisakoshiretantaiyaari. <sup>6</sup> Ikanta nokenkithawaitakaapaakeri itzinkami kemisantzinkari, inimotanakeri, tekaatsi otsipa ñaantsi inkantanakeri. (Nokenakaashineentakawo nokantake “itzinkami kemisantzinkari”, tema tekaatsi atziri oshiyakotyaarine Pawa iriiperori rini.) <sup>7</sup> Iro kaari otzimanta inkantawakenari, tema riyotanake imaperotatya rotyaantakena Pawa nonkenkithatakotainiri Kameethari Ñaantsi kaari tomeshaanitachane. Ari roshiyakaakeri irirori Pedro rotyaantakeri inkenkithatakaayetairi nokaatzira nitomeshaaninyeta. <sup>8</sup> Tema iriitake Pawa otyaantakeriri Pedro inkenkithatakaayetairi tomeshaanitzinkari. Irijatzi otyaantakenari naaka nonkenkithatakaayetairi kaari nosheninkata. <sup>9</sup> Ikanta Jacobo, Pedro eejatzi Juan, etayetakawori reewatziri kemisantzinkari, riyotanake iri Pawa etakotaanari, iri nintakaakenawori nantayetakeri. Aripaite raakameethatanakena, ari ikantawakeri eejatzi Bernabé, iro ompoñaantyaari niyaatakaantyaawori nonkenkithatakaayetairi kaari nosheninkata. Ari inkantanakyaari irirori inkenkithatakaayetairi ikaatzi tomeshaanitachari. \* <sup>10</sup> Irojatzni ikantantanakenari: “Arika piyaatake tsikarika, ontzimatyete petakoyetaiyaari ashironkainkaripaini.” Aritake netakotzitakari, irootake nantapiintakeri.

### *Ikisathaitziri Pedro Antioquía-ki*

<sup>11</sup> Ikanta riyatake Pedro Antioquía-ki, eenitatsi ikenakaashitakariri irirori, ari nokisathatakeri. <sup>12</sup> Tema owakera riyatake Antioquía-ki, rimawetapaakawo kameethari, rakiyootapaakeri kaari isheninkata. Iro kantacha rareetaiyakani rotyaantanewo Jacobo, ari otzimanake iyenashitanewo Pedro, ripakaanakero rakiyoowetari kaari isheninkata. Antawoite ithaawakaari areeyetapainchari ametawori ritomeshaanita. <sup>13</sup> Rimatzitanakawo itsipa Judá-ite kemisantawetachari, ari ikantzitanakari eejatzi Bernabé irirori, roshiyakotanakari jirikapaini. <sup>14</sup> Ikanta noñaakeri Pedro te rimonkaatziro irooperori Kameethari Ñaantsi, ari nopiyotakeri ikaatzi kemisantatsiri, iñagaiyakenani maawoini nokantakeri Pedro: “Judá-ite pini eeroka, tema pipakaakero ameyetari pairani poshiyakotari kaari asheninkata. ¿Oitaka pishintsineentantariri atziripaini kaari Judá-itetatsine roshiyakotairo akantayetaga aakapaini? <sup>15</sup> Imaperowetatya a-judá-itetzi aakapaini, te oshiyakowetari kaari

\* **1:19** Jacobo, irijatzni iitizitairi eejatzi Santiago.

\* **2:9** Pedro, irijatzni iitizitairi Cefas.

asheninkata ikantaitapiintawetari 'kaariperoshireri.' <sup>16</sup> Iro kantacha, ayotzi iroñaaka tekaatsi materone intampatzikashirete rimonkaaterome Inintakaantaitanewo, tema apatziro rimatziro Jesucristo itampatzikashiretakai awentaashiretarira. Irootake awentaantaariri aaka, antampatzikashiretaira. Tema te imatero otampatzikashiretante Inintakaantaitanewo." <sup>17</sup> Aamashitya tzimatsi kantaine: "Pithotyakotanakero rotampatzikashiretemi Jesucristo, iro kantacha eekero pantatziro kaariperori. Iriira Jesucristo kaariperoshiretakaimiri." Nokantzi naaka: ¡Te ari onkene! <sup>18</sup> Iro aminaashiwaitachari ashintsineentawakaiya, ankante: "Jame amonkaayetairo maawoini Inintakaantaitanewo." Iro oshiyawaitakawori nipookero oitarika kaari wetsikachane kameetha, irojatzi napiitantaiyaawome niwetsikairo tsika okanta ketziroini. <sup>19</sup> Tema oshiyawaitakawo nonkamapithatakityeerome naaka Inintakaantaitanewo, ari okaatapaake nopankenawetawo nimonkaayetairo. Apatziro noñiira nañagai nantayetaiñiri okaatzi inintakaanari Pawa. <sup>20</sup> Noshiyakaanakero nontsipatatyeyearime Cristo ikemaatsitakagaitakarira pairani ikentakoitakeri. Tema noshiyanaatyaaari ikanta kaminkari, tekaatsi rantanai, okaatzi nantanairi te naaka nintakaashityaawone, Cristo antakaanawori. Nawentaanaari Itomi Pawa, tema antawoite retakotaana, ikamawentaana. <sup>21</sup> Te nokowi napaatero ineshironkataanaga Pawa. Irootake kaari nokantanta: "Jame amonkaatero Inintakaantaitanewo añantaayawori awisakoshireyetai." Arime onkantyaame niñaawaite, aminaashiwaitaga ikamawentayetakaira Cristo.

### 3

#### *Risaikashiretantai Tasorenkantsi awentaashiretyaaririka Cristo*

<sup>1</sup> Iyekiite nampiyetawori Galacia-ki, ¿tsika okenakeka piyorenka? ¿Itaka am-atawitakemiri? Pairani osheki nokenkithatakaakemiro tsika ikantaitakeri Jesucristo ikentakoitakeri. <sup>2</sup> Apatziro nokowi nosampitemi tsika ikanta risaikashiretantakemi Tasorenkantsi. ¿Irooma risaikashiretantzimiri pimonkaayetziro Inintakaantaitanewo? ¡Te! Iro kantakaawori pawentaashiretanaarira Cristo. <sup>3</sup> ¿Pipeyakotakeroma rotampatzikashiretakemira Tasorenkantsi? ¿Irooma pikenkithashiryaari piñaashintsiwaitya apaniroini piwathaki iro thotyagaimine otampatzikashiretairi? <sup>4</sup> ¿Aminaashitama okaatzi pikemaatsiwentakari pairani? Te aminaashiwaita. <sup>5</sup> Tema Pawa otyaan-takemiriri Tasorenkantsi, ritasonkawentayetakemi, piñaayetairo kaari piñaapiintaweta. ¿Irooma piñaantayetakawori okantakaantziro pimonkaayetziro Inintakaantaitanewo? Te. Iroowa piñaantakawori pawentaanaarira Jesucristo.

#### *Raapatziyawaka Pawa itsipitari Abraham*

<sup>6</sup> Tema pairani Abraham-ni rawentaanakari Pawa, irootake roshiyakaantaariri rotampatzikashiretanewo. <sup>7</sup> Iro piyotaiyerini eeroka, inkaate awentaashiretaachane, iriitake matakeroi roshiyakotaari Abraham-ni. <sup>8</sup> Jiroka Osankenarentsipero ikenkithawaitakeri Pawa pairani riñaanatziro Abraham-ni, tema riyotzitaka aritake rotampatzikashiretairi itsipasatzi atziripaini kaari Judá-itetatsine arika rawentaashiretaiyaari. Ikantake:

Tasonkawentaarewo pini eeroka pawentaashiretaana,  
Ari nonkantairiri eejatzi itsipasatzi atziripaini.

<sup>9</sup> Ari ikantzimaitaka Pawa tasonkawenta rowayetairi awentaashiretzinkari, roshiyak-agairi tsika ikantakeri pairani Abraham-ni rawentaashiretakarira.

<sup>10</sup> Tema ikaatzi awentaawori rimonkaayetairome Inintakaantaitanewo, te okanta rimonkaayetero, ari rashironkaayetaiya. Tema rosankenaitake kantatsiri:  
Ari rashironkaayetaiya kaari monkaaterone Inintakaantaitanewo.

<sup>11</sup> Ari okantzimaita, tema tekaatsi materone intampatzikashiretzimoteri Pawa rimonkaataiterome Inintakaantaitanewo. Irootake ikantantaitari osankenarentsiki: Tampatzikashireri rinatye awentaashireri, ari iñagairo rañaantaiyaawo.

<sup>12</sup> Irooma Inintakaantaitanewo te ari onkantya, tema rosankenaitake kantatsiri: Inkaaterika monkaatairone, iriitake ñagairone rañaashireyetai.

<sup>13</sup> Ikamintha Cristo rontsiparyaakowentai rowasankewentaiterome Inintakaantaitanewo iri rashitakagaitaka apaniroini rowasankeetakeri. (Iriitake okantakotakeri osankenarentsi, ikantaitake pairani:

Owasanketaarewo rini ithataitziri inchakotaki.)

<sup>14</sup> Iro rantantakawori jiroka Jesucristo, tema irootake ikashaakagaitakeriri pairani Abraham-ni. Iro opoñaantaari iñaantayetaawori kaari Judá-itetatsi ritasonkawentayee-tairi, itsipashireyetai maawoini Tasorenkantsi awentaashiretaarira.

<sup>15</sup> Pinkeme iyekiite nonkenkithatakotemiro ameyetari aaka. Ontzimerika oita aapatziyawakayaari, osankenatakotziro riyotantaityaari tzimatsi akashaakaakeriri asheninka. Arika osankenatakotakya, tekaatsi materone rowashiñagairo okaatzi osankenatainchari. <sup>16</sup> Iro rantakeri pairani Pawa, eenitatsi ikashaakaakeriri Abraham-ni intsipataakeri icharinetari. Piñaakero iyekiite, te ikenkithatakoitziri jaka inkaate incharineyetyaari Abraham-ni, apatziro ikenkithatakota apaani incharinetyaari, iriitake Cristo. <sup>17</sup> Piñaakero, iriitake retaka Pawa pairani Abraham-ni ikashaakaakeri, ikantakeri: “Abraham, tzimatsi aapatziyawakayaari.” Irojatzzi awisantakari okaatzi 430 osarentsi, ari rimpoitairi Moisés-ni rosankenayetairo Inintakaantanewo Pawa. Iro kantzimaitacha okaatzi rosankenayetakeri Moisés-ni, te owashiñiio ikashaakaakeriri Pawa pairani Abraham-ni. <sup>18</sup> Tema iroome kowaperotachane amonkaayetairome Inintakaantaitanewo añaantyaawori impayetairi Pawa, aminaashityaame ikashaakaakeriri pairani Abraham-ni. Tema pairani te otzimaweta Inintakaantaitanewo rimonkaaterime Abraham-ni, apatziro rawentaashiretakari Pawa, irootake ikashaakaantakariri rowawisaakoshiretairi.

### *Iitaka otzimantari Inintakaantaitanewo*

<sup>19</sup> ¿Iitaka otzimantari Inintakaantaitanewo? Iro otzimantari oñaagantero iwiyathanka atziripaini, irojatzzi rareetantakya icharinetari Abraham-ni ikantaitakeriri pairani. Iri rotyaantake Pawa maninkariite rosankenatakairi Moisés-ni Inintakaantaitanewo. Iri Moisés kankowentakeriri atziripaini. <sup>20</sup> Tema tzimatsi osheki kankowentantaneri. Iriima Pawa apaani ikanta irirori.

<sup>21</sup> ¿Owashiñaakeroma Inintakaantaitanewo ikashaakaakeriri Pawa pairani Abraham-ni? Te owashiñiio. Iroome owawisaakoshiretantatsine Inintakaantaitanewo, aritake imatakerome ontsiparyaakowentaima antampatzikashireyetai arika amonkaayetanairo. <sup>22</sup> Iro kantacha, ooñaawontakairo osankenarentsi imapero akaariperoshirewetaka. Ontzimatye awentaashiretaiyaari Jesucristo, añaantaiyaawori ikashaakaakairi pairani Pawa.

<sup>23</sup> Tema pairani tekera awentaashiretaiyaata, oshiyawaitakawo omonkyaatyaima Inintakaantaitanewo, oyaawenta akanta imonkaatya awentaashiretantyaari, te añaawetawo asaikashiwaitya antayetairo anintakaanekiini aakapaini. <sup>24</sup> Pairani iyotaane owayetai Inintakaantaitanewo, oshiyakaakai riyotagaitziri eentsi riyotantyaawori oita ranteri. Irootake yotakagairori eejatzi awentaashiretantaariri

Cristo, iro opoñaantaari rotampatzikashiretantairi awentaashiretaarira. <sup>25</sup> Arira ayoyetairi awentaashiretaari, te okowanaa iyotagai Inintakaantaitanewo oita antayetairi. <sup>26</sup> Tema awentaashireri powayetanairi Cristo, itomi rowayetanaimi Pawa.

<sup>27</sup> Pikaatzira pomitsitsiyaawentaari Cristo, oshiyanaawo iriime pinkithaatakotaiya.

<sup>28</sup> Tema pikaatzi pawentaashiretanaari Jesucristo, tekaatsi ramaakitanairi irirori, okantaweta: aakarika Judá-ite, terika a-judá-itete, aakarika imperataarewo, terika

amperataarewotzi, aakarika shirampari, iroorika tsinane, tema tekaatsi oiyetya jiroka, awithaawakagaiya maawoini. <sup>29</sup> Tema awentaashire powayetanairi Cristo, oshiyawaitanaawo eerokame incharinentayetyaame Abraham-ni, eerokatake ñagairone okaatzi ikashaakagaitakeriri irirori.

#### 4

<sup>1</sup> Pinkeme nonkante eejatzi. Roshiyakoitakari apaani eenchaaniki rashitakaari ipaapate rowaagawo ikashaakairiri paata arika rantaritake. Okantawetaka iriiwetaka ashitawo rowaagawo, eeniro reentsitzi, roshiyakotakari apaani imperataarewo, <sup>2</sup> tema eenitatsi kempoyiiniriri rowaagawo rashitakaariri ipaapate. Arika rantaritake paata, imonkaataiya ikantakeriri ipaapate, aripaite impaitairi rashitakagaitariri pairani. <sup>3</sup> Ari akantawetari pairani aakapaini, oshiyakotari ikantaga eenchaaniki, oshiyakotzitawetakari imperataarewo, amonkaatashitakawo rametapiintaitari jaka isaawiki. <sup>4</sup> Iri kantacha Pawa imonkaapaitetapaakaga, rotyaantakeri Itomi, itzimantapaakawo apaani tsinane, ari rimonkaatapaintziro eejatzi irirori Inintakaantaitanewo. <sup>5</sup> Iro rotyaantantaitakariri ompoñaantyaari risaikashiwaitantaiyaari monkaawetawori Inintakaantaitanewo. Iroowa añaantaawori itomiyetai Pawa. <sup>6</sup> Tema itomi pinayetatzi Pawa, rotyaantakemiri Tasorenkantsi inampishiretantaimi. Iriitake ñaawaitakagairi arika amanayetya, akantzi: “¡Nopaapaté, Ashitanarí!” <sup>7</sup> Piñaakero, tera eeroka imperataarewo, itomira Pawa pinayetai. Tema itomi rowayetaimi, ikowake piñaayetairo okaatzi ikashaakagaimiri.

#### *Ampankenatyaaworika Inintakaantaitanewo oshiyakari pimantaarewo*

<sup>8</sup> Tema pairani te piyowetari Pawa, apatziro piwawanetashitawo riwetsikanepaini atziri, irootake imperayetakemiri. Te opawaweta jirokapaini. <sup>9</sup> Iroñaaka piyotairi Pawaperotatsiri. Ankante, iriitakera Pawa yotzimiri eeroka, raakameethataimi. ¿Oitaka pikowantari papiitairo pikantaga pairani? Te opantawo. ¿Pikowatziima poshiyakotaiyaari imperataarewo? <sup>10</sup> Tema pomairentantapiintakawo kiteesherepaini, kashiripaini, eejatzi osarentsipaini. <sup>11</sup> Te pinimotakainawo iroñaaka. Aminaashitaka okaatzi niyotaawetakemiri.

<sup>12</sup> Iyekiité, pinkeme nonkantemi: Ontzimatyé poshiyaina naaka, tema nipakagairo nokantawetaga pairani, noshiyakotaimiro pikantaiyanira eerokapaini pairani. Te pimanintashiretawakena <sup>13</sup> nomantsiyawaiwetaga, nisaikimotakemi, ari opoñaanaka nentanakawo nokenkithatakagaimiro Kameethari Ñaantsi. <sup>14</sup> Tera pimanintashiretawakena piñaawakenaga nomantsiyawaitake, poshiyakaawakena naakame imaninkarite Pawa, paakameethaiyawakenani. Poshiyakaakena eejatzi iriime paakameethatake Jesucristo. <sup>15</sup> Pairani owakera piñaawakena antawoite pikimoshirewentawakena. Ari pantakenawome nonkantemime: “Iyekiite, pinkithoreenawo poki, pimpenawo.” Iroowa pantantyaawori tema antawoite petakotakena. ¿Oitaka kaari pikimoshirewentantana iroñaaka? <sup>16</sup> ¿Poshiyakaatzi nokisaneentatziimi nokenkithatakotzirowa irooperori? <sup>17</sup> Iyekiite, ikaatzi kowayetatsiri intzipinashiretakaimi, ikowatziira pinkenkithashiretakoteri kameethashireri rinayetzi. Tera ikameethashiretzi ikowashita pithainkashiretaina naaka, irootake paakameethatantyaariri irirori. <sup>18</sup> Ari onkantaitaateyeeanyi iyekiite paakameethatapiintaina, te okowajaanta nisaikimotemi janta. <sup>19</sup> Notomipaini, antawoite okatsitzimotana nokenkithashiryakotaimira, oshiyawaitakawo okatsitakotzi tsinane. Eekero onkatsitzimotatyeeena irojatzi pimonkaatantakyaawori inintakaakemiri Cristo. <sup>20</sup> Tsika nonkantyaaka nisaikimotantemiri janta nonkenkithawaitakaantemiri kameethaini. Tema te niyote oita awishimotakemiri.

#### *Oshiyakaawentantzi Sara eejatzi Agar*

<sup>21</sup> Nokowi rakena ikaatzi kowatsiri rimonkaatairo Inintakaantaitanewo. ¿Tema ikemakotziro tsika okantakota? <sup>22</sup> Jiroka okantakota: Pairani itzimake apite itomi

Abraham-ni. Etakawori itomi, iro owaiyakeriri rimperatanewo, iriima itsipa, iro owaiyakeriri iinapero, kaari rimperatanewo. <sup>23</sup> Tema inintakaanekiini Abraham-ni rowaiyakaantakawori rimperatanewo, irootake tasonkaachari iroñaaka rowaiyantaitariri eentsipaini. Iriima owaiyane iinapero, rinashitaka irirori, iriitake ikashaakayitakawori Pawa. <sup>24</sup> Tzimatsi iita oshiyakaawentakeri jiroka apite tsinane, tema apite okaatzi aapatziyawakagaantsi. Tsinane jitachari Agar imperataarewo, iroowa oshiyakariri ikaatzi pankenawaitawori rimonkaaterome Inintakaanaitanewo rosanke-natakaantakeri pairani Pawa ochempiki Sinaí. <sup>25</sup> Jiroka ochempi Sinaí saikatsiri Arabia-ki, ari iitaitziro eejatzi Agar. Ikaatzi otomintari Agar, roshiyakotakawo tsika okanta rimperaitawo iroori. Iriira oshiyakaawentacha Jerusalén-satzi pankenatawori Inintakaanaitanewo. <sup>26</sup> Irooma otsipa tsinane iinapero Abraham-ni kaari rimperatanewo, iroowa oshiyakaawentziriri nintaayetaachane otsipaki nampitsi jitachari eejatzi Jerusalén saikatsiri inkiteki. <sup>27</sup> Jiroka rosankenatakoitakerori pairani ikantaitake: Okantawetaka te powaiyaneta, maaniromanthaki pinaweta, iro kantzimaitacha antawoite pinkimoshiretai.

Te piñaawetawo pinkemaatsityaari powaiyane, pinthaamentawentya.

Tema osheki powaiyane, okantawetaka imanintaweetakemi, ari panagairo tzimawetachari oime.

<sup>28</sup> Iyekiite, oshiyaari aakapaini Isaac otomi iinapero Abraham-ni, tema eenitatsi ikashaakagaitakairi eejatzi aakapaini. <sup>29</sup> Pairani otomi tsinane imperataarewo tzi-maintsiri inintakaanekiini Abraham-ni, antawoite ikisaneentakeri otomi iinapero tzi-maintsiri inintakaanekiini Tasorenkantsi. Irootake tasonkakotaachari eejatzi iroñaaka.

<sup>30</sup> Iro kantzimaitacha ¿Oitaka ikantaitakeriri Abraham-ni osankenarentsiki? Tema ikantaitake:

Ontzimatye pomishitowero pimperatanewo, iyaaita, aanairi otomi. Tema iri otomi piinapero ashitaiyaawone okaatzi shekitzimotzimiri.

<sup>31</sup> Ari okantzimaita iyekiite, te otomintayetai imperataarewo, oshiyaari iroñaaka otomipaini kaari imperataarewo.

## 5

### *Pinkyaryoowentairo piñero pisaikashiwaitaiya*

<sup>1</sup> Tema iriitake Cristo ontsiparyaakowentairi, irootake añaantaawori asaikashiwaitaawo. Ontzimatye ankyaaryoowentero, tema te onkameethate apiitairo oshiyakotaiyaari imperataarewo. <sup>2</sup> Pinkeme nonkante. Naakatake Pablo kamantzimirori jiroka ñaantsi. Arika pinkowe pimonkaatero ritomeshaanitamemi, aminaashiwaitakaga pikemisantairi Cristo. <sup>3</sup> Nokowi napiitero nonkanteri kowatsiri ritomeshaaniyetya, ontzimatye rithotyagairo maawoini Inintakaanaitanewo. <sup>4</sup> Tema ikaatzi kowatsiri rimonkaaterome Inintakaanaitanewo ompoñaantyaari rotampatzikashiretantaityaaririme, rontsiparyaapithaitakeniri Cristo, te iñiuro neshironkataantsi. <sup>5</sup> Irooma aakapaini, ikantakaakawo Tasorenkantsi akemisantairira Cristo, oyaakowentashireri owiri rotampatzikashiretai. <sup>6</sup> Eenitatsi tomeshaanitachari, iriima itsipa te ritomeshaanita irirori. Tera okowanaa antairo jiroka rashitaira Cristo. Iroowa kowap-erotacha ankemisantaperotairi ompoñaantyaari etakotawakaantaiyaari. <sup>7</sup> Pairani kameetha pikanta pikemisantayetanake. ¿Iitaka pakaakaakemirori irooperori? <sup>8</sup> Te iri pakaakaimirone etanakawori riyoyaawetakemi. <sup>9</sup> Tema ikantaitake pairani: “Eepichokiini inaweta kachopathari, aritake imatakero ishimowakairo maawoini opatha.” <sup>10</sup> Nawentaakari naaka Awinkatharite, iri kenkithashiretakaimine eero



poshoretantawo inashiyetachari. Iro kantzimaitacha, ari rowasanketaikeri kowatsiri intzipinashiretakaimi, inkantawetakya iitarikapaini. <sup>11</sup> Iyekiite, te noshintsineentzimi pitomeshaniyetya. Ari nonkantaame, ¿Arima inkisaneentawentaitakenawome nokenkithatakotzirowa ikentakoitakeriri Cristo? <sup>12</sup> Iro kantzimaitacha, ikaatzi kowayetatsiri intzipinashiretakaimi, nokowake naaka iri pithokashitachaneme rito-taanikitya irirori.

<sup>13</sup> Pinkeme nonkante iyekiite. Riyoyaayeetaimi eeroka piñaantaiyaawori pisaikashiwaitaiya. Iro kantzimaitacha, te onkameethate pantayetanaero okaatzi pinintakaashiwaitari eeroka. Iroowa kameethatatsi petakotawakaayetaiya. <sup>14</sup> Osheki inaweta ñaantsi rosankenaitakeri Inintakaantaitaneki, iro kantzimaitacha apaani okanta kowaperotachari ayotairi, okantzi:

Petakotaiyaari pisheninka, poshiyakagairo petakotawo piwatha eeroka.

<sup>15</sup> Iroowa arika powatsimaawakagaiya, pinkisawakagaiya eejatzi, ari piñaakero pimpeyashiretawakagaiya.

### *Iñaamatashitairi, eejatzi ikowakaantziri Tasorenkantsi*

<sup>16</sup> Pinkeme nonkante: Arika pantapiintairo ikowakaimiri Tasorenkantsi, ari pipakagairo piñaamatashitari. <sup>17</sup> Tema tzimatsi piñaamatashiyetari eeroka, tzimitacha ikowakaimiri Tasorenkantsi. Te oshiyawakaa jiroka, inashiyeta. Ari okanta eero pantapiintantawo piñaamatashiyetari. <sup>18</sup> Tema iriirika Tasorenkantsi antakaanaimirone inintakaimiri, te pañiimotairo Inintakaantaitanewo. <sup>19</sup> Te romaanta antapiintzirori iñaamatashiyetari, jiroka ikantayeta: Te ikinatawo itsipatari, imayempiwaitzi, ipankenatawakaawaita, ñaathatashiwaitaneri rini, <sup>20</sup> ramanayetari riwetsikaitanewo, isheryaayeta, ikisaneentawakaawaita, riñaanaminthatawakaiyani, te rawentaawakaa, ikatsimatawakaa, ikoshekawakaa, te rariperotawakaa, te raapatziyawakaa, <sup>21</sup> ikisaneentakotawakaawo rashiyetari, ritsitokawakaa, ishinkiwaiyeta, iñaamakitakawo roimoshirenkawaitya rantantyaawori kaariperori, rantayetziro tsikarika oiyeta. Tema irootake noshintsineentakemiri pairani eero pantantayetawo jiroka. Arika pantayetakero, eero piñiuro impinkathariwentaimi Pawa. <sup>22</sup> Iroowa okaatzi rantakaantziri Tasorenkantsi, ari añiuro etakotantya, thaamenta ankantya, kameetha asaikanai, eero athaawakowaita, neshironka ankantante, aakameetha ankantante, oshiretanaiya kameetha, <sup>23</sup> tsinampashire ankantya, eero añaamawaitashitawo oitarika. Te ithañaapithatairo Inintakaantaitanewo antairo jirokapaini. <sup>24</sup> Iro kantacha, ikaatzi pakagairori kaariperori rashiyetaari Cristo, oshiyawaitakawo inkentakotaatyeeerome okaatzi iñaamatapiintashitari rantashiyetyaarime irirori.

<sup>25</sup> Tema risaikashiretantaira Tasorenkantsi, ontzimatye antayetairo okaatzi ikowakaayetairi. <sup>26</sup> Te okameethatzi asagaawentawaitya, te okameethatzi ankantzimoneentakaawaityaari asheninkapaini, te okameethatzi ankisaneentakowaiteri rashiyetari itsipa.

## 6

<sup>1</sup> Iyekiite, arika piñe tzimatsiri iyenakaashitanewo, tema antakishireri pikantaka eeroka, pinkaminairi. Paamaawentya pikishirikari, otzimikari piyenakaashitanewo eeroka. <sup>2</sup> Pamitakotawakaayetanaiya, poshiyakagairo petsinaryaakotawakagaatyeeyaame arika inataitero tenari. Iro ompoñaantyaari pimonkaatairo pantayetanaero ikowakaimiri Cristo. <sup>3</sup> Tzimatsirika kenkithashirewaitachari, inkante: “Iriiperori nini naaka.” Apaniirini ramatawiwaitaka tema tekaatsi iimatsitya irirori. <sup>4</sup> Thame ankenkithashiretakotya maawoini, onkene ankimoshirewentawaitya. Eero akan-tashirewaitzi: “Nanairi jirinta.” <sup>5</sup> Tema maawoini antayetziro oitarikapaini.

<sup>6</sup> Ikaatzi ikenkithatakaapiintaitziri riñaane Pawa, ontzimatye ripinaiteri kenkithatakaantatsiri, tema eenitatsi koityiimotariri irirori.

<sup>7</sup> Tekaatsi materone ramatawiteri Pawa. Ikaatzi kowawetachari ramatawiterime, apaniroini ramatawiwaitaka. Oshiyawaitakawo oitarika impankitaiterime, arika onkithokitanake eero opashinitzi okithoki irojatzu rowiitaite tsika okanta ipankitaitakeri ketziroini. <sup>8</sup> Ari ikantari ikaatzi antapiintakerori iñaamatashiyetari, oshiyawaitakawo rowiitaatyeerome owasanketaantsi. Iriima ikaatzi antayetanaairori ikowakaantziri Tasorenkantsi, oshiyawaitakawo iri owiitaironeme kañaanetaantsi. <sup>9</sup> Ontzimatye aamaawentya eero aperawentantawo antayetairo kameethayetatsiri. Eekero aataakaanakityeero eero okantzimoneentawaitai, iro añaantaiyaawori oshiyawetakawori rowiitaitakeri. <sup>10</sup> Irootake okowaperotantari aneshironkayetairi maawoini, aaka kyaaryoowentaperotawakaachane akaatzira akemisantayetai.

*Ithaamentawo Pablo ikentakowentakari Cristo*

<sup>11</sup> Iyekiite, naakaga osankenatzimirori jiroka, antawopaini nokantayetakemiro. <sup>12</sup> Tema ikaatzi shintsineentakemiri pitomeshaaniyetya, inintakaashiwaitawo irirori, rinimotakaantyaaririme ikaataiyinira. Iro ompoñaantyaari eero ikoshekawentaitantari inkenkithatakoteririka Cristo ikentakotaitakeri. <sup>13</sup> Tema ikaatzi tomeshaanitainchari, te rimonkaamatsitziro Inintakaantaitanewo. Iro kantacha ishintsineentakemi eerokapaini pitomeshaanitaiyaani, iroowa ompoñaantyaari rasagaawentantyaari arika rimatakaakemiro ishintsineentzimiri. <sup>14</sup> Irooma naaka te nokowi nasagaawentawaitya iro nokowataike nonthaamentaiyaawo ikentakoitakerira Awinkatharite Jesucristo. Tema ikentakowentakena naaka Cristo, oshiyawaitanakawo onkamapithatakityeenname isaawikisato, ari nokantzimotakawo eejatzi naaka nokamapithatakero isaawikisato. <sup>15</sup> Tekaatsi aitzimotanaiyaari Cristo aakarika tomeshaanitaarewo, terika atomeshaanita. Iro kowaperotanaachari roshiyakaayetai owakerame riwetsikayeetai. <sup>16</sup> Inkaate kemisantayetairone nokantayetakeri, ari risaikayetai kameetha, neshironka rowayeetairi. Ari inkantayetaiyaari ikaatzi rashiperotaari Pawa iroñaaka, ikantawetakarira pairani Israel-iite.

<sup>17</sup> Ari okaatapaake iyekiite, te nokowi inkoshekawaitaitena. Tema osheki rowirontawentaitakenari Awinkatharite Jesús.

*Weyaantawori wethataantsi*

<sup>18</sup> Iyekiite, onkamintha ineshironkayetaimi Awinkatharite Jesucristo. Ari onkantaitaatyeeyaani.

## ROSANKENARE PABLO ROTYAANTZINIRI EFESO-SATZIITE

### *Wethataantsi*

<sup>1</sup> Naaka Pablo, rotyaantaperore Jesucristo nini, irootake ikowakaakenari Pawa. Eerokapaini nosankenayetzi pikaatzira rashiyetaimi Pawa, pikinatanaari eejatzi Jesucristo pawentagaari janta Efeso-ki. <sup>2</sup> Onkamintha ineshironkayetaimi Ashitairi Pawa, kameethaini risaikakaayetaimi, ari inkantaimiri eejatzi Awinkatharite Jesucristo.

### *Ritasonkawentantzi Cristo*

<sup>3</sup> Thame anthaamentaiyaari Pawa, ipaapatetari Awinkatharite Jesucristo, iri tasonkawentashiretairi rotyaantakairi Cristo ipoñaakawo inkiteki. <sup>4</sup> Iri yoyaayetakairi pairani tekera riwetsikiroota kipatsi, riyotzitaka ari rashiyetai Itomi, kiteshiryaa ankantzimotaiyaari, tekaatsi inkantakoitai. <sup>5</sup> Antawoite retakoyetakai. Iro opoñaantari rotyaantakairi Jesucristo intomintayetai, tema ikowitakai pairani ineshironkayetai. <sup>6</sup> Irootake anthaamentantapiintyaariri Pawa, tema antawoite ineshironkayetai, raapatziyayetai, iro opoñaantari rotyaantakairi retakoperotanewo. <sup>7</sup> Tema antawoite retakoyetai, ripinakowentayetai ikapathainkawentakai Itomi. Iro opoñaantari ipeyakotantairori antayewetakawowa kaariperori. <sup>8</sup> Ari ikenakairo Pawa, tema yotaneri rini, irooperori ikenkithashiretanewo irirori. <sup>9</sup> Riyotakaayeetairo okaatzi ikenkithashiretzitakari irirori, tekaatsi yowetyaawone onkaate rantairi. <sup>10</sup> Tema okaatzi ikenkithashiretzitakari, ari ithotyagaiya imonkaataiya. Arika ripiyai Cristo, ari impinkathariwentapairi maawoini saikayetatsiri inkiteki, eejatzi kipatsiki.

<sup>11</sup> Ikenkithashiretzitakawo okaatzi riyotakaayetairi. Irootake riyoyaantairi, tema ikashaakayitakairi rotyaantainiri Itomi. Tema okaatzi rantayetakeri, iro ikenkithashiretzitakari irirori. <sup>12</sup> Irootake rantantakawori jiroka Pawa, ompoñaantyaari nonthaamentaiyaani nokaataiyinira netakawo nawentaari Cristo. <sup>13</sup> Ari pikantakari eejatzi eerokapaini, owakera pikemakotawakeri Cristo, ikenkithatakotaitapaakero Kameethari Naantsi, pikemisantanaake. Tema ikashaakaitakemiri pairani rotyaantemiri Tasorenkantsi, iri yotakaimirone rashiyetaimira, ari rashi rowaatyeero inampishiretantemi. <sup>14</sup> Añaakero te rookawentai Tasorenkantsi, ari ayotziri imapero Pawa rithotyaaakero okaatzi ikashaakaakairi. Ari ashi owaatyero irojatzi rontsiparyaakowentantairi akaatzira ripinakowentairi irirori rashiyetai. Irootake anthaamentawentantyaariri.

### *Yotashiretakaantzirori eejatzi oñaagaantzirori*

<sup>15</sup> Tema nokemakotakemi jimpe pikanta pikemisantanaari Awinkatharite Jesús, tsika pikanta petakoyetanaari ikaatzi itasorentsitakagaitairi, <sup>16</sup> te nipakairo niwetharyaakotzimi, namanakotapiintzimi. <sup>17</sup> Namanamanaatari Iwawane Awinkatharite Jesucristo, ashitawori owaneenkawontsi. Iro nokowakotantariri riyoshiretakagaimi, roñaagantaperotaimiro jimpe ikantakota irirori, <sup>18</sup> inkenkithashiretakaimi ompoñaantyaari piyotakotantyaawori royaakoneentziri ikaimashireyetairi, piyotakotantyaawori eejatzi owaneenkakitaka roñaagayetairiri Pawa rashiyetaari, <sup>19</sup> piyotakotantyaawori eejatzi antawoite ishintsinka tekaatsi oshiyaarine. Osheki antakaayetairi ishintsinka akaatzira akemisantayetairi. Tema irojatzi ishintsinka <sup>20</sup> rowiriintantaariri pairani Cristo ikamawetakaga, raanairi inkiteki, roisaikapairi rakoperoki. <sup>21</sup> Ari itsipatapaari Pawa ipinkathariwentairi maawoini pinkathariwetachari. Te apatziro impinkathariwentairi tzimayetatsiri

iroñaaka, ari ikaatzita impinkathariwentairi tzi mayetaatsine paata. Imaperotatya ranaantake, tema pinkathariperori rini irirori. <sup>22</sup> Tema iri Cristo inintakagairi Pawa reewatairo maawoini, roshiyakotaiyaari makoryaayitizitariri iisaneentanewo. Iri Cristo roshiyakaake Pawa iriime iitoyetaiyaarime ikaatzira kemisantaatsiri. <sup>23</sup> Iriima ikaatzira kemisantayetaatsiri, roshiyawaitakawo iroome iwatha Cristo, risaikashireyetantaari. Rithotyagairo eejatzi Cristo risaikayetake tsikarika jantapaini.

## 2

### *Retakotai Pawa iroowa awisakoshiretantaari*

<sup>1</sup> Iriitake Pawa owañaayetaimiri eerokapaini, tema pairani oshiyawaitakawo owamaayetatyeemime piyaariperoshirenka, <sup>2</sup> iroowa pantapiintakeri jimpe ikanta piñaayetziri isaawikisatzipaini, pantashitakawo ikantakaantziri shintsitakairori tampyainka, irijatzi kantakaawori ishekitantaari piyathariite. <sup>3</sup> Ari akantawetakari maawoini aakapaini, antawetawo anintakaashiyetari, añaamatashiyetari eejatzi, iro akenkithashiretapiintakeri. Oshiyakowetakari inkaate rowasanketaitari. <sup>4</sup> Iri kanzimaitacha Pawa neshironkatantaneri, retakoyetai antawoite, <sup>5</sup> rañaakaayetai owamayimawetakaira kaariperotaantsi, rowañaagairira pairani Cristo. (Tema antawoite ineshironkayetaimi Pawa, irootake rowawisaakoshiretantaimiri eejatzi eeroka.) <sup>6</sup> Tema rañaakagairi Cristo, ari roshiyakagai eejatzi aakapaini. Iri kantakaawori atsipashiretantaariri Cristo Jesús inkiteki. <sup>7</sup> Iro rantayetantakawori maawoini jirokapaini riyoitantyaariri antawoite ineshironkatantake, rotyaantakairi Cristo Jesús rowawisaakoshireyetai. <sup>8</sup> Irootake piñaantaawori pawisakoshireyetai poshreyetaarira. Iri Pawa oshiyakagairori impashitaimirome awisakoshiretaantsi, <sup>9</sup> te eeroka materone powawisaakoshiretya apaniroini. Iroowa ero pasagaawentashiwaitanta. <sup>10</sup> Tema iro riwetsikantakairi ankemisantairira Cristo Jesús antayetainiri kameethayetatsiri, irootake ikowakaayetakairi pairani antayetainiri.

### *Aakameethatairi Cristo ikentakoitakerira*

<sup>11</sup> Tema maawoini eerokapaini te pi-judá-itetzi, iiyetzimi nosheninkapaini “Kaari tomeshaaniri”. Iriima iriroripaini iitawakaayeta “Tomeshaaniri”. Tekaatsi oitzimaitya, tema rantashiyetakawo koñaatatsiri awathaki. <sup>12</sup> Pinkenkithashiretakotya tekera pikemisantziriita Cristo, te pitsipawetari isheninkapaini Israel, pinashitaiyakani. Te piyotakowetawo ketziroini raapatziyawakagaitari, eejatzi ikashaakaayeetairi. Okantawetaka pisaiki kipatsiki, te piyotakotziri Pawa, tekaatsi poyaakoneente. <sup>13</sup> Iroowa iroñaaka pikemisantairira Cristo Jesús, paapatziyaarira Pawa. Okantawetaka intaina powawetakari pairani, iro kantacha ikapathainkawentakemi pairani Cristo, aripaite paapatziyaari Pawa. <sup>14</sup> Iri kantakagaawori Cristo asaikantaari kameetha. Irijatzi kantakagaariri Judá-ite isheninkatantaariri kaari Judá-itetatsine, raakameethatawakagaawo. Tema pairani antawoite ikisaneentawakagaiyani. Iroowa iroñaaka oshiyawaitakawo rotantoryagaatyeerome otantotsi otzikawetakariri. <sup>15</sup> Tema pairani nosheninkapaini ikisaneentakeri maawoini kaari nosheninkata, kaari yotakoterone Inintakaantaitanewo. Iro kantacha ikemaatsiwaitapaintaga iwathaki Cristo, ipeyapithatairi kantakaawori ikisaneentawakaaantari, ari opoñaagaawo raakameethatawakayaawo, oshiyawaitaawo apaanime atziri ikantaawo iroñaaka. <sup>16</sup> Tema ikamawentakaira pairani Cristo ikentakoitakeri, ari okaatapaake akisaneentawakaapiintaka, oshiyakaanakero owamaakityeerome. Tema apaani akantanaa awathaki ariperoyetairi Pawa. <sup>17</sup> Iroowa ikantaitakeri ketziroini: Ripokake, ikamantayetaimiro Kameethari Ñaantsi ompoñaantaiyaari pisaikai kameetha, tema intaina pisaikawetaka. Ari ikantakari saikayetatsiri okaakiini.

\* 18 Tema iri Cristo kankagaawori añaantaawori atsipataari awentagaari Pawa, tema apaani rini Tasorenkantsi antakagairori. 19 Te piyotakowetari pairani Pawa, te pisheninkawetari eejatzi. Iro kantzimaitacha poshiyayetaari iroñaaka ikaatzi kemisantairiri, te pinashitzimotaari, tema pisheninkayetaari Pawa. 20 Poshiyawaitanaawo eerokame mapipanko riwetsikaitakeme. Iriima Kamantantaneriite eejatzi Otyaan-taperoriite, iri oshiyakyaawoneme owatziterone. Iriima Cristo Jesús iri oshiyawoneme mapi rowaitakeri omerekiki pankotsi kisotakairone. 21 Tema okaatzi riwetsikantaitawori mapipanko, kameethaga opewiryayeta irojatzi iwetsikantakari itasorentsipankote Awinkatharite. 22 Ari pikantanaari eerokapaini, poshiyawaitakawo pewiryayetainchari, ari risaikashiretantaimi Pawa.

### 3

#### *Inkenkithatakairi Pablo kaari Judá-itetatsine*

1 Jiroka okanta, naaka Pablo, romonkyagaitakeri nokenkithatakotairira Jesucristo eerokaki kaari nosheninkata, 2 piyotaiyini iri Pawa owakena nonkenkithatakaayetaimi, tema antawoite ineshironkayetaimi. 3 Tema nosankenatakemiro eepichokiini tsika okanta iñaawyaatakagaitakenawo kaari riyotakoweeta pairani. 4 Arika piñaanatakeri, ari piyotairo okaatzi niyotakotairiri Cristo kaari riyotakoweeta ketziroini. 5 Tema pairani tekaatsi atziri yotakoperowetyaawone ranteri Pawa. Iro kantzimaitacha, riyotakagaana Tasorenkantsi nokaatzi Notyaantaperoritzi eejatzi Kamantantaneriite. 6 Jiroka kaari riyotakoweeta: Rawisakoshiyetai kaari nosheninkaweta arika inkamantaitairi Kameethari Ñaantsi tsika ikantakota Cristo Jesús. Ari roñaagaitairi ikashaakagaitakeriri Judá-ite, tema isheninkatawakaayetaaga. 7 Irootake nokenkithatantaawori, iriitake Pawa tasonkawentashiretaanari nantantawori, tema osheki ineshironkataana, oshekitzimotziri ishintsinka irirori. 8 Naaka rawisanewo maawoini oiteshiretaarewo Pawa. Iri kantzimaitacha ineshironkataana naaka, ikowakaakenawo nonkenkithatakotainiri Kameethari Ñaantsi kaari Judá-itetatsine, iro riyoyetantaiyaari antawoite ritasonkawentairi Cristo. 9 Ikowakaakenawo noñaawontainiri okaatzi manakowetainchari ketziroini rantairi Pawa. Tema irijatzi wetsikayetakerori maawoini añaayetaari iroñaaka. 10 Iro rantantakawori maawoini jiroka, ompoñaantyaari riyotantyaari inkiteweriite pinkathariyetsiri, yotane ikanta Pawa, arika iñaayetai akaatzira akemisantairi. 11 Tema iro ikenkithashiretapiintakari ranteri, irootake rotyaantantakairiri Awinkatharite Cristo Jesús. 12 Tema awentagaarira iroñaaka Cristo, raakameethatai Pawa, eero athaawashiretantaari. 13 Iroowa nokantanzimiri: Kyaa okantzimoneentz-imikarira okaatzi nokemaatsitakowentakemiri. Iro inimoshiyetaimine eerokapaini.

#### *Antawoite etakotaantsi kaari rithotyagaite riyotakoitero*

14 Irootake opoñaantari notziwerowashitari Ashitariri Awinkatharite Jesucristo, 15 tema iri apaapateta Pawa, roshiyakayetai aakapaini isheninka, okantaweta aakarika inkitesatzi, aakarika kipatsisatzi. 16 Nokowakotapiintakeri Ashitairi, oshekitzimotziri owaneenkayetachari, antawoite ritasonkawentayetemi, raawyaashiretakaimiro Itasorenka. 17 Nokowakotapiintakeri eejatzi Cristo inampishiretantemi, tema pawentagaari eerokapaini. Poshiyakotyaawo pankirentsi parithatatsiri kameethaini, iroowa pinkiwintantyaari retakonka. 18 Iro inkemathaperotantaiyaawori ikaatzi oiteshiretaarewo, oshiyawaitakawo antawoite inatyeeme retakonka Cristo, santhari onkaateme, jenoki onkantyaame, inthomoi inatyeeme. 19 Irootake namanakotantapiintzimiri pinkemathaperotairo antawoite

\* 2:17 Kantakotachari jaka "saikaintsiri intaina", iriitake kaari Judá-itetatsine. Iriima kantakotachari "saikayetsiri okaakiini", iriitake Judá-ite. Jiroka añaakeri osankenatainchari, irootake poñaachari rosankenareki Kamantantaneri Isaías.



retakotai Cristo, anairo maawoini riyotakoweetari, iro piñaantaiyaawori rithotyagaimi Pawa risaikashireperotantaimi.

<sup>20</sup> Thame anthaamentaiyaari Pawa, tzimatsiri ishintsinka, iriitake ñaakaayetairone osheki anaanakero okaatzi akowakoyetziriri. Eero athotyiro ankenkithashiretakotero ishintsinka arika ñaayetero rantzimoshiretairi. <sup>21</sup> Thame anthaamentaiyaawo okaatzi rantakagaitakeriri Cristo Jesús, eejatzi okaatzi rantzimotziriri awentaayetaariri. Ari inkantaiyaari inkaate ancharinetaiyaari ari rashi rowaatyeero eejatzi inthaamentaiyaari irirori. Ari onkantaitaateyeeyani.

## 4

### *Withaga ikantakaayetai Tasorenkantsi*

<sup>1</sup> Ari okantakari, tema romonkyagaitakena nokenkithatakotzirira Awinkatharite. Irootake nonkantantemiri: Pantapiintainiri ikowakaayetaimiri, tema iyaimashiretanewo pinayetatzi. <sup>2</sup> Tsinampashireri pinkantaiya, aakameethashireri pikantantai. Eero pisamawakaawaita. Ontzimatyete petakotawakagaiya. <sup>3</sup> Piñaashintsitaiyaawo pi-saikai kameetha, tema iri Tasorenkantsi withaawakagaimiri. <sup>4</sup> Oshiyawaitanaawo apawathame akantanaawo, tema apaani ikanta Tasorenkantsi. Ari okantari eejatzi apaani okanta ikashaakagaimiri Pawa poyaakotairira. <sup>5</sup> Apaani ikanta Awinkatharite, apaani ikanta akemisantairi, apaani ikanta omitsitsiyaawentaari. <sup>6</sup> Apaani ikanta Pawa, iriitake Ashiyetairi maawoini. Iri pinkathariwentairi maawoini, rithotyiro risaikashiretantai maawoini. <sup>7</sup> Iro kantacha, inashiyetaka rantakaayetairi Cristo ritasonkawentayetakai. Oshiyawaitakawo oitame impashitakairime. <sup>8</sup> Irootake rosanke-natakoitakeri pairani kantatsiri:

Owenonkaawo, reewatairi roitsinampagairira omanawetakariri.

Okaatzi raapithatantakeri, ipashiyetaarira rowayerite irirori.

<sup>9</sup> ¿Oitaka ikantantaitari: “Owenonkaawo?” Iro ikantantaitari, tema ripokapaintzi isaawiki jaka kipatsiki. <sup>10</sup> Jirika ayiitaintsiri kipatsiki, irijatzi owenonkaachari ranaaperotairo inkite, iroowa rithotyantaawori risaikantaawo tsikarikapaini

<sup>11</sup> Iri tasonkawentantataatsiri aitantaari Otyaantaperoriite tsika akaayetzi. Eenitatsi itsipa rowaitakeri kamantantaneri. Itsipa kenkithatakaantairori ñaantsi rawisakoshiretantaitari. Itsipa jewayetanairiri kemisantzinkari, eejatzi yotaantaneriite. <sup>12</sup> Ari ikantayetaari maawoini jirikapaini, iriyyetake yotaayetairine inkaate oshireyetaachane tsika inkantya rantawaitainiri Cristo, inkene riwetsikashiretakaayetai yaari, roshiyantyaawori iwatha Cristo ineme. <sup>13</sup> Irojatzii ñaantaiyaawori riyoperotakotairi Itomi Pawa, oshiyawaitaiyaawo riwithaawakagaateyeeyame ikemisantayetaira. Iroowa roshiyakotantaiyaariri Cristo, rantakishiretai. <sup>14</sup> Aritapaake oshiyari ikantaganki eentsi, owanaa ipashinitzi eekerorika riyaataye inkimotate. Ari ikantari kaari shenkaatsine ramatawitaite, riyotagaiteririka kaari tampatzikatatsine. Iriitake oshiyakawori apanatakairi tampyaa, okenayetzi tsikarikapaini. <sup>15</sup> Iro ankenkithatakoyetai kyaaryooperotatsiri okantakaakai etakonka. Ontzimatyete antakishireyetai, oshiyaiyaari ikantaga Cristo. Tema iri Cristo oshiyanaawori aito,

<sup>16</sup> irooma aakapaini oshiyanaawo iroorikame iwatha. Apaani eentsi kimotatatsiri iwathaki kameetha iwathaawakaa rowawitonkiyetaga, tema kameetha itekatsitzi iwathaki. Ari ankantaiyaari aakapaini iwathayetaira Cristo, antawaitainiri kameetha irirori, amitakotawakaanaiya, etakotawakaanaiya eejatzi.

### *Owakeratai ñaamento ikantakaayetaawo Cristo*

<sup>17</sup> Pinkeme nonkantemiro okaatzi riyotakaakenari Awinkatharite: Tema poshiyakotakari isaawikisatzi, aminaashitaka rantayetziro okaatzi ikenkithashiretari,

<sup>18</sup> oshiyawaitakawo ikenkithashiretane tsirenikiri. Kisoshire ikantayetaka, te

ikowaiyini riyotakotairi Pawa, te inintagaiyaawo ikowakaawetakariri irirori. <sup>19</sup> Te inkaaniwentya, ayimatakeri imayempinka, iyaariperoshirenka rametapiintari, eejatzi ishampitsinka. <sup>20</sup> Irooma eerokapaini piyotakotairira Cristo, te onkameethatai pantayetairo jiroka. <sup>21</sup> Tema kyaaryooperorika pikemisantairi, piyotanairo irooperori ini okaatzi riyotaantapaintziri irirori. <sup>22</sup> Tsikarika pikantaweta pikaariperotzi ketziroini, pipakaayetairo, amatawitakemi okaatzi piñaamawaitari eeroka. <sup>23</sup> Ontzimatyē poshiyakagairo owakerataatyeeme pikenkithashiretane. <sup>24</sup> Powakerashiretai, iroowa riwetsikantakemiri Pawa pairani poshiyaiyaari irirori, kiteshirepero pinaatye, tasorentsishireperori pinkantya.

<sup>25</sup> Te okameethatzi pamatawitanairi pisheninkapaini, iro kameethatatsi piñaanetaiyaawo irooperori. Tema oshiyanaatyaawo awithaawakagaatyeeyaame. <sup>26</sup> Eejatzi oshiyawo, arika pinkisha, pinkyaaryoote pikaariperoshiretzikari. Ontzimatyē piñaashintsityaawo powawisaantyaawori intsipaite pimashirenka, eero pimaakotziro irojatzī otsipaki kiteesheri, <sup>27</sup> pishinetaarikari Kamaari rantakaimiro kaariperori. <sup>28</sup> Koshintzirika pini, pipakagairo, ontzimatyē pantawaitai. Patsipewentyaawo pantawaiwentero pikowayetziri, ompoñaantyaari oshekitzimotemi oitarika, iro inantyaari pimpashiyetyaari ashironkaayetachari. <sup>29</sup> Eejatzi oshiyawo, te okameethatzi piñaawaitashityaawo kaariperori ñaantsi. Iroowa piñaawaitapiinteri Kameethari Ñaantsi, ompoñaantyaari piwetsikashiretakayaari kemayetzimiri. <sup>30</sup> Eerorika pantayetanairo kameethatatsiri, ari rowashiretakotakemi Tasorenkantsi poñaachari Pawaki. Tema iriitake kempoyaawentapiintakemiri irojatzī paata pawisakoshiretantaiyaari. <sup>31</sup> Pipakairo pikisashireta, pikisa, piñaakatsimatantzi, piñaanaminthatantzi, pikishimatantzi. Ontzimatyē pipakagairo pantayetakero kaariperotatsiri. <sup>32</sup> Ontzimatyē pinkameethashiretai, pineshironkatawakaayetaiya. Pimpeyakotairi ikaatzi owaariperoshiretakemiri, ipeyakotaimira Pawa irirori ikamawentaimira Cristo.

## 5

### *Tsika inkantaiya rashitaari kiteesheenkari*

<sup>1</sup> Tema retakotanewo pini Pawa itomiyetaimi, ontzimatyē poshiyakotaiyaari ikan-taga irirori. <sup>2</sup> Etakoshire pinkantante, poshiyakotyaari Cristo retakoyetai, rishinewentakai inkentakoiteri. Irootake oshiyakawori okasankainkatzi ritagaitziniriri Pawa, osheki okameethatzimotakeri.

<sup>3</sup> Tema iri oiteshiretaimiri Pawa eerokapaini, te okameethatzi pimayempite, imapero okoweenkatzi. Te apa onkameethate pinkenkithatakoyetairo. Ari oshiyawo otsipa kaariperoyetatsiri, eejatzi oshiyawo arika piñaamayetyaawo ashaagawontsi. <sup>4</sup> Te onkameethate pinkenkithawaitakotero kaariperori, pinkantawentawakaayetya, tera opantawo jirokapaini. Iroowa kameethatatsiri piwetharyagaiyaari Pawa. <sup>5</sup> Tema piyotake eerokapaini eero ragaitairi mayempiwaitatsiri tsika ipinkathariwentantai Cristo itsipatarira Pawa. Ari ikantari eejatzi ikaatzi kaariperoshiretatsiri, ikaatzi ñaamatawori ashaagawontsi roshiyakaakero iwawane inatyeeme. <sup>6</sup> Eenitatsi kaminaayetemine inkowe ramatawitemi, iroowa ompoñaantyaari roitzipinaashiretemi. Arira rowasanketairi Pawa inkaate piyathataachane. <sup>7</sup> Te opantawo eejatzi pintsipaminthatyaari jirikapaini. <sup>8</sup> Tema pairani tekera pikemisantziri Awinkatharite, oshiyawaitakawo pisaikatyeeme otsirenikitzi, pantapiintakero kaariperori. Iro kantacha rashiyetaimira Pawa, oshiyawaitaawo pisaikaatyeeme okitesheenkatzira. Irootake pisaikantaiyaari kameetha poshiyakagairo risaikaitzi okitesheenkatzira. <sup>9</sup> Tema risaikashiretantaimi Tasorenkantsi, ari piñaayetairo pineshironkatantai, pintampatzikashiretai, piñaawaitapiintairo irooperori. <sup>10</sup> Ontzimatyē pantapiintairo kameethatzimotziriri Awinkatharite. <sup>11</sup> Ero pitsipatari saikayetatsiri otsirenikitzi.

Pinkaminaante, tema te okameethatzi rantayetziri, aminaashiwaitaantsi ini. <sup>12</sup> Tema antawoite owaañaantzi arika ankenkithatakotero okaatzi rantayetziri rimananeekiini. <sup>13</sup> Arika pinkaminaathateri, oshiyawaitanaawo pootaayeenirime iyaariperonka. Ari inkenkithashiretanaiya, inkowanake irirori inkameethashiretai, tema oshiyanaatyaawo risaikaatyeeme okiteesheenkatzira. <sup>14</sup> Iroowa rosankenaitantakari pairani, ikantaitzi:

Ataama pimaake, pinkakite,  
Pintzinagaiya pitsipawetakarira kaminkari,  
Iriira ootaimine Cristo.

<sup>15</sup> Aamaawenta pinkantawentaiyaawo onkaate pantayeteri, eero poshiyakotari masontzishireri, iri poshiyakotaiya yotaneri. <sup>16</sup> Eero pisaikawaitashita, tzimatsi osheki kaariperoshireripaini iroñaaka. <sup>17</sup> Eero pimasontzishirewaitzi, pithotyakotairo pinkemathatairo ikowakaimiri Awinkatharite. <sup>18</sup> Eero pishinkiwaita, tema osheki okoweenkatzi. Iroowa kowaperotacha risaikashiretantaimi Tasorenkantsi. <sup>19</sup> Piyotaawakaayetaiwaawo Salmo, pomampaayetyaawo ikowashiretakaimiri Tasorenkantsi, thaamenta pinkantawentyaari Awinkatharite. <sup>20</sup> Wethaga powapiintairi Ashitairi Pawa piñaayetzirowa maawoini tsikarika oiyeta, paakotanairi iwairo Awinkatharite Jesucristo.

### *Pimpinkathatawakaayetaiya*

<sup>21</sup> Ontzimatyepimpinkathatawakaayetaiya, tema pinkatha powairi Pawa. <sup>22</sup> Iinantaitari, pipinkathatairi piimepaini, poshiyakagairi pipinkathatziri Awinkatharite. <sup>23</sup> Tema ikaatzi iimentaitari iriira jewatzirori iina, roshiyakari Cristo reewatziri kemisantzinkaripaini. Tema Cristo roshiyakaakeri kemisantzinkaripaini iriime iwatha, iriima Cristo itotanaiyaarime iriroripaini. Irijatzi owawisaakoshiretairine. <sup>24</sup> Tema maawoini kemisantzinkaripaini pinkatha rowairi Cristo, ari onkantzityaari tsinanepaini ompinkathatapiintairi oimepaini. <sup>25</sup> Iimentaitari, petakotaiyaawo piinapaini, poshiyakotyaari Cristo retakoyetari kemisantzinkaripaini, iriitakera shinewentakariri ikamawentayetairi. <sup>26</sup> Iro rantantakawori jiroka ompoñaantyaari inkiteshiretakaantaiyaariri. Ari okanta arika romitsitsiyaataitya ikantaitzi: “Nokemisantairo Riñaane.” <sup>27</sup> Tema ikowatzi Cristo kiteshire inkantayetaiya ikaatzi kemisantairiri, oshiyawaitakawo te inkaariperoshireteme eepichokiini. Roshiyakotari Cristo ikanta aatsine iina, te ikowi iñeero iina ontzimetsiwaite, ompitsipookiwaite, owaneenka onkantya. <sup>28</sup> Iroowa rantayetairi iimentaitari, retakotaiyaawo iinapaini. Roshiyakayero retakotawo iwatha irirori, ari inkantairori eejatzi iinapaini retakotaiyaawo. <sup>29</sup> Te iñagaitzi apaani atziri kemaatsitakaawaityaawone iwatha etakoki ikanta irirori. Ari ikantairi Cristo ikaatzi kemisantairiri. <sup>30</sup> Roshiyakaayetairi iriirikame imashi, itonki, irijatzime maawoini iwathaki. <sup>31</sup> Tema ikantaitzi:

Ari rookanakeri atziri ipaapate, ragairika iina, apaani inkantaiya iwathaki raawakaanaga.

<sup>32</sup> Osheki ikompiwetaka ketziroini inkemathaiterome jiroka. Iriira Cristo oshiyakaawentacha jaka, eejatzi ikaatzi kemisantayetairiri. <sup>33</sup> Ari okantari, ontzimatyepetakotaiyaawo piinapaini, poshiyakaiya petakota eero. Ari onkantaniyaari eejatzi iinantaitari, ompinkathayetairi oime.

## 6

<sup>1</sup> Eentsipaini, pinkemisantairi ashitzimiri, tema irootake kameethatatsiri ikowakaimiri Awinkatharite. <sup>2</sup> Osheki Inintakaantakeri pairani Pawa. Iro kantacha ari osatekakari apaani Inintakaantaitanewo etanakawori okenkithatakotziro ikashaakagairi Pawa, ikantake:

Pimpinkathatairi ashitzimiri,

<sup>3</sup> Aritake piñaakero osamani paminawaite jaka kipatsiki.

<sup>4</sup> Iroowa eerokapaini ipaapateetari, te onkameethate pinkisakaawaityaari powaiyane, iroowa kameethatatsi potampatzikayetairi, pinkaminagairi tsika okanta ikowiri Awinkatharite.

<sup>5</sup> Imperataarewó, pinkemisantairi inkaate imperatemine. Eero pamatawiwaitziri. Pinkatha poweri, poshiyakayeri pipinkathatziri Cristo. <sup>6</sup> Eero powakowentawaita pantawaite arika raminemi, ompoñaantyaari pinimotakairi. Pashi powero pantawaitainiri, tema rimperatanewo rowaimi Cristo, pantero ikowiri Pawa. <sup>7</sup> Shiretha pinkantawentyaawo rimperayetzimiri, poshiyakayeri iriime Awinkatharite pantawaitaini, kaarira atziri. <sup>8</sup> Tema ayotaiyakeni, iri Awinkatharite pinataine okaatzira antayetakero kameethari, onkantawetakya aakarika imperataarewo, terika rimperaitai. <sup>9</sup> Ari pinkantyaari eeroka imperatantanerité, ontzimatyepaakameethatairi pimperatanewo, eero pasariimawaitari. Tema rimperatzitari Inkitesatzi pimperatanewo eeroka, ari ikantzizimi eejatzi eeroka rimperatzimi, tekaatsira ramaakinete irirori.

### *Ripiyawentashiretantari kemisantanaatsiri*

<sup>10</sup> Iyekiite, piñaashintsishiretya, tema iri Awinkatharite otapishiretantakemirori ishintsinka. <sup>11</sup> Poshiyakayero pinkithaatatyeyyaawome rashitari Pawa ripiyakowentantaitari. Iroowa piñaantyaawori pipiyatyaari Kamaari. <sup>12</sup> Kaarira atziri antaminthataine koñaawoini, iriira antaminthatairi kaari koñaatatsiri. Iriira pinkathariwentashiwaitachari, tzimawetacha ishintsinka, tsireniriweri rinatzi imperaminthatariri isaawikisatziite, iriira antakerori ketziroini kaariperori inkiteki. <sup>13</sup> Poshiyaiyaari owayeri rawentaawo iithaare kotsirotaki, ari pinkantanaiyaari eeroka pawentaanaiyaari Pawa. Aritake piñagairo pipiyakowentaiya. Tema arika piñaashintsishireperotanakya, tekaatsi eewokashiretemine. <sup>14</sup> Pinkyaaryooyetai, poshiyakotaiyaari ikantaganki riwetsikaanta owayeripaini. Tema iro retapiintari romathakitziro iithaare eero ipakoowaitantawo. Ari pinkantapiintaiyaari eerokapaini, pinkenkithashiretakotanairo irooperori, iro ompoñaantyaari eero pipakooshirewaitanta. Ikithaatapiintawo owayeripaini kotsirotaki ishianeeki, onkene otzikaawenteri. Ari pinkantaiyaari eerokapaini tampatzikashire pinkantanaiya, iroowa otzikaawentashiretaimine. <sup>15</sup> Ikyantapiintari owayeripaini i-zapato-te, inkene riyate tsikarika. Ari pinkantanaiyaari eerokapaini aamaawenta pinkantanaiya onkene piyaate tsikarika pikenkithatakotairo Kameethari Ñaantsi risaikantaitari kameetha. <sup>16</sup> Rawentaapiintawo owayeripaini rotzikaawentamento rotaiyayetziri eero okentantari morekashithakeerekitaantsiri chekopi. Ari pinkantaiyaari eerokapaini pawentaaperotanaiyaari Pawa onkene potzikaawentashiretanaiya pipiyatantyaariri Kamaari. <sup>17</sup> Rawentaapiintawo owayeripaini ramathaitawo kotsiromoko. Ari pinkantaiyaari eerokapaini pawentaayetaiyaawo rowawisaakoshiretaimira Pawa. Ripiyakowentantapiintawo rowathaamento owayeripaini. Ari pinkantaiyaari eerokapaini pipiyakowentantyaawo Riñaane Pawa ikenkithashiretakaimiri Tasorenkantsi. <sup>18</sup> Pamanapiintaiya, tema Itasorenka Pawa kenkithashiretakaimine pinkowakoteriri. Iriipero pinkantanaiya onkene pamanakotapiintaiyaari maawoini oiteshiretaarewo. <sup>19</sup> Pamanakoyetaina eejatzi naaka, iñaaperotakaantenari Pawa, niyotantyaawori nonkenkithatakotanairo Kameethari Ñaantsi kaari riyotakoweeta pairani. <sup>20</sup> Tema iro kameethatatsi noñaaperowentyaawo nonkenkithatakaante. Irootake romonkyaawentaitakenari. Iro kantacha eekero niyaatakaatyero nonkenkithatakaante.

### *Weyaantawori wethataantsi*

<sup>21</sup> Arika rareetapaakya Tíquico janta pisaikaiyinira, iriitake kamantapaakemine tsikarika nokantaka, tsikarika oita nantayetakeri jaka. Tema jirika Tíquico iyeki rini, ne-takoperotanewo. Iri kyaaryootaintsiri ramitakotakena nokenkithatakaantakera. <sup>22</sup> Iro notyaantantyaariri, piyotantyaari tsika nokanta nisaikaiyini jaka. Ari onkantyaari pinthaamentashiretantaiyaari.

<sup>23</sup> Ari okantzimaita iyekiite. Onkamintha risaikakaayetaimi kameetha Ashitairi Pawa, ari inkantemiri eejatzi Awinkatharite Jesucristo. Iroowa ompoñaantyaari petakotawakagaiya, awentaashire powanairi. <sup>24</sup> ¡Onkamintha ineshironkataimi Awinkatharite Jesucristo, pikaatzira petakoyetaari! Ari onkantaitaatyeyaani.



## ROSANKENARE PABLO ROTYAANTZINIRI FILIPOS-SATZIITE

### *Wethataantsi*

<sup>1</sup> Naaka Pablo otyaantzimirori jiroka osankenarentsi, iriira notsipatari Timoteo nosankenatzimiro. Tema rimperatanewo Jesucristo nini. Eeroka nosankenatzini janta Filipos-ki pikaatzira ikiteshiretakagaimi Cristo Jesús. Irijatzi nosankenatzini ikaatzira jewatzimiri pinkemisantayetaira. <sup>2</sup> Onkamintha ineshironkataimi Ashitairi Pawa, kameetha risaikakaayetaimi. Ari inkantemiri eejatzi Awinkatharite Jesucristo.

### *Ramanakotari Pablo kemisantzinkariite*

<sup>3</sup> Arika nonkenkithashiretakotapiintemi, osheki niwetharyaari Pawa. <sup>4</sup> Kimoshire nokantapiintaka arika namanakotemi, <sup>5</sup> tema ari akaatzi akenkithatakotairo Kameethari Ñaantsi. Irojatziki pikantanakero pairani owakera pikemawakena nokamantapaakemiro ñaantsi, te pipakaanakero irojatziki iroñaaka. <sup>6</sup> Niyotzi naaka, osheki okameethatzi pawentaashiretaarira Pawa, tema iriitake kameethashiretakagaimine irojatziki ripiyantaiyaari Jesucristo. <sup>7</sup> Tema kameetha okanta nonkenkithashiretakotaimira, netakotanewo pini. Okantawetaka romonkyagaitakena naaka, ari akaatzi ineshironkayetai Pawa. Ari oshiyakawo eejatzi ragaitanakenaga pinkatharentsiki, nokenkithatakotakerowa Kameethari Ñaantsi janta. <sup>8</sup> Iriira yotatsi Pawa osheki nokoityaakemi noñagaimi. Iroowa retakotanka Jesucristo kantakaawori. <sup>9</sup> Namanakotapiintakemi petakoperotantantyaari, yotaneri pinkantya, pinkemathatairo maawoini, <sup>10</sup> inantyaari pantapiintairo kameethatatsiri. Iro ompoñaantyaari pinkiteshiretantyaari eero otzimanta inthawetakoitemiri paata ripiyairika Cristo. <sup>11</sup> Okamintha rotampatzikashiretaimi Jesucristo opoñaantari pantayetairo kameethari. Iroowa impinkathaitantyaariri Pawa, inthaamentapiintantyaari.

### *Nañaantaari Cristo*

<sup>12</sup> Iyeekiite, nokowi piyotakotero awishimotakenari. Te othataashiwaitya awishimotena jirokapaini iroowa oiwawaantaiyaari Kameethari Ñaantsi rawisakoitantari. <sup>13</sup> Ari okantzimaitaka, tema ikaatzi saikawankotziriri pinkathari, owayeripaini kempoyaawankotziriri, riyotaiyini irirori romonkyaaawentaitashitakenari Cristo. <sup>14</sup> Ikanta iñaayetakena iyeekiite romonkyaaawentaitakenarira Cristo, te ithaawaiyanakeni, eekero ikenkithayetanakitzi, rawentaaperotanakari Awinkatharite.

<sup>15</sup> Tzimatsi jaka oshiyakaawaitatsiri inkenkithatakotero Cristo, osheki ikowake ranaina impinkathaiteri, iro inkisaneentantaitenari naaka. Iro kantacha eenitatsi itsipa etakotanari, kameethaperoini ikenkithayetana ke irirori. <sup>16</sup> Jirikapaini ikaatzi kisaneentakenari, te rishinetziri atziripaini inkemisantena, apa ikowi inkemisantaiteri irirori ranaantenari naaka, irootake roshiyakaawaitantari ikenkithatakotziriri Cristo. Ikowatzi jirikapaini inkemaatsitakaaperoitena romonkyagaitakenaga. <sup>17</sup> Iriima ikaatzi etakotakenari, riyotaiyini irirori Pawaga kantakaawori romonkyagaitantakenari nokenkithatakotzirowa Kameethari Ñaantsi janta. <sup>18</sup> Tekaatzi oitya itzimirika kisaneentanari, iro kowaperotacha iriira Cristo ikenkithatakotzi irirori. Iroowa oimoshirenkakenari. Arira imaperotya nonkimoshirete, <sup>19</sup> niyoterika irootaintsi roimishitowaitaina. Okantakaantziro pamanakotapiintakena, oneshironkatapiintakena Itasorenka Jesucristo. <sup>20</sup> Iro nokowaperotai nokenkithatakotairi Jesucristo, tekaatsi nonthaawantya. Te nokowi rowaañaagaitena paata. Arika rowamagaitakena, irooma

eerorika, ari nonkantaatyeyya nantayetero kameethari, iroowa impinkathataitanta-piintyaariri Cristo. <sup>21</sup> Tema iri Cristo nañaantaari naaka. Irooma arika rowamagaitakena kameethatake eejatzi. <sup>22</sup> Irojatzirika nañe eekero niyaatakaatyeyero nantainiri Awinkatharite ikowakaayetanari. Te niyotzimaita iroñaaka oita nokowiri. <sup>23</sup> Apitekeroini nokowiro. Kameethawaitake rowamagaitena niyaataita nontsipat-apaiyaari Cristo. Iroowa kameethaperotzimotakenari naaka. <sup>24</sup> Iro kantacha, onkowaperotyaga eekero nañaatyey, nisaikimotantemiri eerokapaini. <sup>25</sup> Niyotake eero nokamita, osamani nisaikimoyetanaimi eerokapaini, nonthaamentakaantemiri pawentaanaiyaaririka Cristo. <sup>26</sup> Tema arika nareetaimi eerokapaini, osheki pinkimoshirewentawaina, piyotanake iriira kantakaawori Jesucristo imatantaari.

<sup>27</sup> Jiroka pinkantayetanaiyaari: Pantapiintanairo kameethatzimoterine Cristo. Irootake pantapiintanairi, tema arika nareetakemi, kameetha noñaapaakemi pisaikaiyeni. Irooma eerorika nimatziro nareetemi, nokowi nonkemakotemi kameetha paapatziyawakaayetaawo, piñaashintsishirewentanaiyaawo Kameethari Ñaantsi akemisantairi. <sup>28</sup> Eero pithaawantashiwaitari kisaneentzimiri. Tema jirikapaini ari inkenkithashiretakagaiyaari Pawa rithonkaitaatyeyeri. Ari roshiyaimi eerokapaini pikemisantairira, riyotakaayetaimi imapero pawisakoshireyetai. <sup>29</sup> Te apatziro ikowakaakemi Cristo pinkemisantairi, ontzimatyey patsipewentaiyaari eejatzi. <sup>30</sup> Ari akaataiyakeni iroñaaka atsipewentari. Tema piñaakena pairani osheki nokemaatsitakowentakari pinampiki. Irojatziri nokantziro iroñaaka pikemakowentana osheki natsipetakowentakari jaka.

## 2

### *Itsinampashirenka eejatzi ririiperonka Cristo*

<sup>1</sup> Iri Cristo oimoshirenkaimiri, tema retakotakemi, risaikashiretantakemi Itasorenka, piyotairo pineshironkatawakagaawo, <sup>2</sup> paapatziyawakaayetaiya, petakotawakaayetaiya, oshiyawaityaawo apaanime onkantaiya pikenkithashiretanewo. Iroowa oimoshirenkaanari. <sup>3</sup> Arika ontzime oita panteri, eero pikisawakaawentawo, tsinampashireri pinkantya, eero pasagaawentawaitawo. Te opantawo pinkantante: “Naaka kameethaperotatsi, te ompantyaari jirinta.” Iroowa kameethatatsi pinkante: “Iri kameethaperotatsi jirinta, ranaakena naaka.” <sup>4</sup> Te apatziro onkameethate pineshironkatya eeroka, ontzimatyey pineshironkayetairi eejatzi itsipapaini. <sup>5</sup> Poshiyakotyaari tsika ikantapainta Jesucristo, <sup>6</sup> Pawapero rini irirori, temaita roisokerotawo roshiyakotyaari Pawa. <sup>7</sup> Ripakaanakero ipinkatharitziri, roshiyakotanakari imperataarewo, itzimapaintzi, roshiyakotapaakari ikantayetaga atziripaini. <sup>8</sup> Roshiyapaakari atziripaini, te ipinkatharitanai. Shiretha ikantapainta irojatziri ikamantakari ikentakoitakeri. <sup>9</sup> Iroowa opoñaantari Pawa ririiperokitakagairi Cristo, ipinkathariwentantaperotzi, ranaanakeri ikaatziri riwetsikaitakeri. <sup>10</sup> Ikowi Pawa maawoini impinkathaperotaiteri Jesús, onkantawetya tsikarika janta inampitaityaawo, inkiteki, kipatsiki, eejatzi otapinaki kipatsi. <sup>11</sup> Inkantayeetai maawoini: “¡Pinkathariperori rini Jesucristo!” Aripaitera ipinkathaitairi Pawa Ashitairi.

### *Roshiyari ootamentotsi kemisantzinkaripaini*

<sup>12</sup> Ari onkantyaari netakotanewo iyekiite. Tema pairani nisaikimotakemi janta, osheki pikemisantapiintakena. Ari pinkantairo eejatzi nisaikira intaina, pantapiintairo okaatziri nonkantemiri. Pinkamaiwentaiyaari Pawa rowawisaakoshiretantemiri, panteniri okaatziri ikowakaayetakemiri. <sup>13</sup> Tema Pawa iriitake kowashiretakaantatsiri, pantapiintantawori kameethari. Irijatziri Pawa antakaimirone.

<sup>14</sup> Pantainiri Pawa maawoini kameethatatsiri, eero pikisawakaawentawo, <sup>15</sup> iro ompoñaantyaari eero itzimanta iita yakowentemine. Tema itomi Pawa pinayetzi, pipakagairo kaariperori, kameetha pisaikimotairi kenashiwaitainchari. Poshiyakotyaari kiteesheenkatakairori tsireniri. <sup>16</sup> Pinkyaaryoowentanairo pikemakotakerowa ñaantsi, iroowa pañaashiretantaiyaari. Arika pinkyaaryoowentero, antawo nonthaamentemi ripiyairika Cristo, tema te natsipetashiwaityaawo nokenkithatakotakemirowa riñaane Pawa. <sup>17</sup> Onkantawetya rowamaawentaitenawo nokemisantakagaimira, osheki nonkimoshirete. Ari pinkantaiyaari eerokapaini, pinkimoshirewentaina. Arika rowa-magaitakena, oshiyaiyaawo nañaamento rapaataitziro riraitziri risaitaitziniriri piratsi ritagaitziniriri Pawa. <sup>18</sup> Iroowa pinkimoshirewentantenari eerokapaini iroñaaka.

### *Timoteo eejatzi Epafrodito*

<sup>19</sup> Iriirika kowaintsine Awinkatharite Jesús, ari piñaakero intsipaite notyaantemiri Timoteo. Tema arika ripiyake, inkamantapaina tsika pikanta pisaikaiyini janta, iroowa nonkimoshiretantyaari. <sup>20</sup> Tekaatsi itsipa oshiyaraine Timoteo, osheki ikowake ineshironkatemi ikemetaakenaga naaka. <sup>21</sup> Tzimawetacha itsipa, apatziro roshiretawo oitarika ikowiri irirori, te roshiretakotawo ikowakaantziri Cristo Jesús. <sup>22</sup> Iro kantacha, piyotaiyini eeroka kameetha ikanta risaikimotakena Timoteo, iri kyaaryootaintsi itsipatakena nokenkithatakotzirowa Kameethari Ñaantsi. Osheki ramitakotakena, oshiyawaitakawo iriime notomi. <sup>23</sup> Arika niyotake jimpe inkantaitena, iriira notyaantemiri janta. <sup>24</sup> Aamaane nokantakeri Awinkatharite intsipaiteerika inkantakayaawo, naakaga jatashitemine janta.

<sup>25</sup> Iri netawakya notyaantaimiri iyeki Epafrodito, potyaantakenari pairani. Osheki ineshironkatapaakena. Roshiyari irirori owayeri, iriitake tsipatapiintakenari nokenkithatakaantzi. <sup>26</sup> Jirika Epafrodito, osheki ikenkithashiretakotakemi, antawoite ikowake iñaapaimi, tema riyotake pikemakotakeri imantsiyawaitake. <sup>27</sup> Ari ikantawetaka imantsiyatzi, iroowetaincha inkameme. Iro kantacha ineshironkatakakeri Pawa, retsiyatakotakagairi. Te apatziro ineshironkatakakeri irirori rimatzitakena eejatzi naaka, te ikowakaanawo nimaperotya nowashiretakoperotyaari arika inkamimotakena. <sup>28</sup> Irootake notyaantantaimiriri intsipaite janta, ompoñaantyaari pinkimoshireperotantyaari arika piñaawairi, eero nowashireperotanta naaka eejatzi. <sup>29</sup> Kimoshire pinkantawentawaiyaari, tema pirentzitawakaanaatya pikemisantairira Awinkatharite. Pimpinkathatapiintairi ikaatzi oshiyariri irirori. <sup>30</sup> Tema kamawetaka irirori, ikamaitanakawo rantayetziro ikowakairiri Cristo. Rishinewentakawo ramitakowaitakena, te retakowaita irirori, oshiyawaitakawo eerokame amitakotenane jaka.

## 3

### *Kowaperotachari*

<sup>1</sup> Ari okantzimaita iyekiite, thaamenta pinkantawentaiyaari Awinkatharite. Tema eero nisamawo naaka napiipiintemiro okaatzi nosankenatakemiri pairani. Iroowa kameethatatsi piyoperotantyaari.

<sup>2</sup> Ontzimatyee paamagaiyaari manintantaneriite oshiyariri otsitzi, kaariperoshireripaini, kowatsiri ritomeshaanitakaimi. <sup>3</sup> Tema tomeshaaniperori anayetai aakapaini, risaikantashireyetai Tasorenkantsi, riyotakaayetairo tsika ankantya ampinkathatairi Pawa. Eero awentaashirewaitashitawo añaayetziri awathaki, iroowa anthaamentawentya rashiyetaira Cristo Jesús. <sup>4</sup> Imatatyeeyaame owawisaakoshiretai añaayetziri awathaki, nimatakerome naaka nawisante. <sup>5</sup> Tema pairani owakera notzimapaake, okaatzi 8 kiteesheri nimaakotapaake, ari ritomeshaanitaitakena. Naakatake isheninkapaini Israel, icharinetanakari Benjamín-ni, Judá-itepero

nini, niñaawaitziro kameethaini riñaane nosheninkapaini, nimonkaatziro okaatzi Inintakaantaitanewo, tema Fariseo ninaweta. <sup>6</sup> Noñaawetaka nokemisantaperotatziiri Pawa, irootake nokisaneentantawetakariri kemisantanaairiri Jesucristo. Tema nithotyaawetanakityaawo nimonkaatziro Inintakaantaitanewo, te namaakitapaintzi apaani. <sup>7</sup> Iro kantacha maawoini jiroka, okaatzi nasagaawentawaitakari pairani, tekaatsi pantaiyaawone iroñaaka niyotakotairira Cristo. <sup>8</sup> Imaperotaty, tekaatsira pantaperotyaawone jirokapaini niyoperotairira Cristo. Nipakaanairo maawoini, noshiyakaanakero rookapiintaitziro kaagashi. Iriira nokowaperotanairi niyotairi Awinkatharite Cristo Jesús, tema irootake kameethaperotatsiri. <sup>9</sup> Iriira tsipashiretanari iroñaaka. Te nopankenatanaawo nimonkaayetairo Inintakaantaitanewo, tema te otampatzikashiretana. Irooma nawentaanaarira iroñaaka Cristo, iriira Pawa otampatzikashiretanari. <sup>10</sup> Iriira nokowaperotanairi niyoperotairi Cristo, tema iriitake ashitawori ishintsinka ipiriintantaari ikamawetakaga. Iroowa ompoñaantyaari noshiyakotaiyaari tsika ikanta ikemaatsitakowentantaka, tsika ikanta eejatzi ikamimotantake, <sup>11</sup> irootake rowiriintantainari naaka arika nonkamawetakya.

<sup>12</sup> Tekera nithotyeeroota nokantayetakemiri, tekeramintha noñeeroota nonkameethashireperote. Iro kantacha eekero niyaataye nithotyaakotero irojatzi nithotyaaperotantakyaawori, tema niyotzi iri etapaintawori Cristo Jesús rowawisaakoshiretaana. <sup>13</sup> Iyekiite, te nokantzi naaka: Nithotyaakerowa nokameethashireperotzi. Jiroka nokanta: Maisanta nowairo nantayetakeri pairani te noshiretakotaawo, apatziro nokenkithashiretakotawo noñaayetairi paata, <sup>14</sup> iro ompoñaantyaari nanaakotantai, irojatzi noñaantaiyaawori paata ripinataina Pawa inkaimashiretantenari nontsipashiretyaari Cristo Jesús. \* <sup>15</sup> Jirokapaini nokantayetakemiri, ontzimatye oshiretakotyaawo maawoini akaatzira antakishireyetai. Terika poshiretakotyaawo, Pawa oñaayemirone poshiyakotantainari naaka. <sup>16</sup> Iro kantacha, ontzimatye ankyaaryoowentairo antayetantyaawori okaatzi ayotakotairi.

<sup>17</sup> Iyekiite, ontzimatye poshiyena naaka. Ontzimatye eejatzi paminayetairi it-sipa arika roshiyakotakenawo naaka jimpe nokanta piñaayetakenaga. <sup>18</sup> Tema napiipiintakemiro pairani nokenkithatakotzimiro, irojatzi napiitemiri iroñaaka nirayimankakiini nonkantemi: Tzimatsi osheki saikimotakemiri janta kisaneentziriri ikaatzi kenkithatakotzirori ikentakoitakerira Cristo. <sup>19</sup> Irootaintsi iñaayetero rithonkayeetairi. Ithaamentashiwaitakawo okaatzi rowayetari roshiyakaakero iroome iwawanetyaame. Osheki ishamewentakero okaatzi rantayetakeri, te ikaaniwentziro. Roshirewaitashitawo isaawikisato. <sup>20</sup> Irooma aakapaini, iro akowaperotanai anampitaiyaawo risaikinta Pawa. Oyaawenta akanta ripiye Owawisaakotantaineri Awinkatharite Jesucristo, <sup>21</sup> iriitakera pashinitakaapaine awathaki akaamanewaitzira, ari oshiyakotaiyaari irirori otzimi rowaneenkawo. Aritakera rimatapairo, otzimi ishintsinka ipinkathariwentantawori maawoini oitarika.

## 4

### *Pinkimoshirewentapiintairi Awinkatharite*

<sup>1</sup> Iyekiite, nokowake naaka poisokerotanaiyaari eerokapaini Awinkatharite. Tema netakotanewo pinayetzi, osheki nokowake noñaapaimi. Eerokayetake oimoshirenkanari, eerokatake kantakaanterone ripinaitantenari paata, poshiyawaitawo namanthaireme pinayetai.

\* **3:14** Kantakotachari jaka “nanaakotantai”, ari ikanta pairani apaani atziri ranaakotantzi rishiya tsika ipiyota aminaminthatziriri, ipaitziri owinawo ranaakotantakera.

<sup>2</sup> Nonkantemiro Evodia eejatzi Síntique: Ontzimatye ariperotawakagaiya awentaashiretaarira Awinkatharite. <sup>3</sup> Nonkantemi eejatzi eeroa notsipaminthare, pinkamainairo jiroka apite tsinane ariperotawakaantaiyaari. Tema otsipatakana pairani natsipewentakawowa Kameethari Ñaantsi nokenkithatakotziro, ari otsipatakari Clemente eejatzi itsipapaini ikaatzi tsipayetakenari pairani. Tema maawoini jirikapaini, osanke-natakoyetaka rañaashireyetai paata.

<sup>4</sup> Kimoshirera pinkantawentaiyaari Awinkatharite. Napiitawaimiroota: ¡Pinkimoshiretapiintaiyeni! <sup>5</sup> Ontzimatye riyotaitemi maawoini neshironkatanteneri pinayetai. Tema ari ripiyai Awinkatharite. <sup>6</sup> Eero okantzimoshirewaitzimi, pamanapiintaiyaari Pawa pinkowakotairi koityiimotzimiri. Piwetharyaapiintaiyaari eejatzi. <sup>7</sup> Iroowa ompoñaantyaari piñagairo risaikakaayetaimi kameethaini Pawa, kameethapero inatzi jiroka, anairo okaatzi oshireyetai aakapaini. Tema jiroka, saikaantsi kameetha, iro inimoshiretakagaimine, eero okantzimoshirewaitantzimi tema itsipashiretaimi Cristo Jesús.

### *Poshoretapiintaiyaawo irooperori*

<sup>8</sup> Jiroka nonkantemiri iyekiite. Poshoretapiintaiyaawo irooperori, pinkathataantsi, tampatzikashirenkantsi, kiteshirenkantsi, inimotaantsi, kameethatzimotaantsi, kameethashirenkantsi, thaamentaantsi. <sup>9</sup> Pantanairo okaatzi piyoyetakeri, okaatzi nokamantakemiri. Piñaantayetyaawo okaatzi niyotaakemiri, okaatzi kameethari piñaakotakenari naaka nantayetakeri. Arika pantayetanairo jiroka, ari inimowaitaimi risaikakagaimi Pawa.

### *Rowayetziri Filipos-satzi rashitakaariri Pablo*

<sup>10</sup> Antawoite roimoshirenkakena Awinkatharite, noñaakerowa papiitairo pineshironkataana. Niyotzi naaka te pimaisantana iro kantacha tekaatsi pinkenakairo pineshironkatantenari. <sup>11</sup> Tera iro nonkantantyaari nokoityaaneentawaitatziira. Tema nametakawo nokimoshirewaitzi okantawetaka tekaatsi oshekitzimotenane. <sup>12</sup> Niyotakero jimpe okantawaita arika ankoityaaneentawaite, arika oshekitzimoyetai. Nithotyaaakero nametawo maawoini, arika nowaperoty, arika nitasheneente. Nametawo arika oshekitzimotena, nametzitawo eejatzi nokoityaawaitzi tekaatsirika oshekitzimotenane. <sup>13</sup> Ari noitsinampagairo maawoini oiyetakarika, tema iri Cristo aawyaashiretakagaanawori iroñaaka.

<sup>14</sup> Iro kantacha, oshekira okameethatake okaatzi pipashitakenari, tema piyotaiyakeni tzimatsi antawo owaatepookyaatakenari. <sup>15</sup> Pairani nokenantanakari Macedonia-ki, netantanakawori nokenkithatakotziro Kameethari Ñaantsi, tekaatsira neshironkatene, apatziro eerokapaini Filipos-satziite, potyaantakenari pashitakaanari. <sup>16</sup> Ari pikantakero eejatzi nisaikantakari Tesalónica-ki, papiipiintakero potyaantakenari pashitakaakenari, iriira naantakari okaatzi koityiimotapiintakenari. <sup>17</sup> Te apa noshiretyaawo naaka pipashitapiintakenari koityiimotanari, nokowatziira pantayetanairo eerokapaini kameethari, onkene impashitaitaimi paata eeroa. <sup>18</sup> Naakero maawoini potyaantakenari, ipapaakenawo Epafrodito, oshenitzimotapaakena, tekaatsi koityiimotainane. Okaatzi pantakeri osheki okameethatzimotakeri Pawa, oshiyimowaitakari kasankainkari. Oshiyawaitakawowa inimotziri arika ritagaiteniri piratsi. <sup>19</sup> Iri Pawa payetemine onkaate koityiimoyetemine eeroa, tema oshekitzimotziri rowaneenkawo Cristo Jesús. <sup>20</sup> ¡Ashi owaatyeero ampinkathatairi Ashitairi Pawa! Ari onkantaitaatyeyaaani.

### *Weyaantawori wethataantsi*

<sup>21</sup> Piwethatenari janta ikiteshiretakaanewo Cristo Jesús. Riwehatzimi eejatzi iyekiite ikaatzi tsipatakeneri naaka jaka. <sup>22</sup> Riwehatzimi eejatzi ikiteshiretakaanewo jaka, iriira wethatzimiri ikaatzi saikapankotziriri Pinkathari César.



<sup>23</sup> Onkamintha ineshironkaperotaimi Awinkatharite Jesucristo. Ari onkantaitaateeyaani.

## ROSANKENARE PABLO ROTYAANTZINIRI COLOSAS-SATZI

### *Wethataantsi*

<sup>1</sup> Naaka Pablo otyaantzimiro jiroka osankenarentsi. Tema rotyaantaperore Jesucristo nini, irootake ikowakeri Pawa. Iri notsipata iyeki Timoteo nosankenatzimiro. <sup>2</sup> Eeroka nosankenatzini pikaatzira ikiteshoretakagaitakemi janta Colosas-ki, tema eerokapaini iyekiite oisokerotanakariri Cristo pikemisantanairi. Onkamintha ineshironkataimi Ashitairi Pawa, kameetha risaikakaayetaimi, ari inkantaimiri eejatzi Awinkatharite Jesucristo.

### *Ramana Pablo ontzimantyaari riyorenka kemisantzinkaripaini*

<sup>3</sup> Ari nokantapiintatya namanari Pawa Ashitariri Awinkatharite Jesucristo, nokantziri: ¡Ariwé Pawa! <sup>4</sup> Iroowa namanantariri, tema nokemakotakemi jimpe pikanta pawentaashiretaarira Jesucristo, etakotanewo pikantanairi ikiteshoretakaanewo, <sup>5</sup> okantakaimi pikemisantanairo irooperori Kameethari Ñaantsi, piyotanairo tzimatsira poyaakoneentziri inkitekinta. <sup>6</sup> Okaatzira pikemakeri eerokapaini, jatakotakera maawoiniki nampitsi. Ikemisantayetanai eejatzi itsipasatzi atziri. Roshiyakemi eerokapaini owakera pikemawakero ñaantsi, pikemathanakero imaperi ineshironkayetaimi Pawa. <sup>7</sup> Tema iriitake iyeki Epafra yotaakemirori pairani janta. Netakotanewo rini Epafra, iri oisokerotakariri Cristo rantawaitziniri. <sup>8</sup> Irijatzi kamantapaakenari osheki petakoyetanta ikantakaakemi Tasorenkantsi.

<sup>9</sup> Tema owakera nokemakowentawakemi tsika pikantanaa, ari nokantapiintanakitya namanakoyetzimi pinkemathatantyaawori ikowiri Pawa. Yotashire pinkantayetaiya. <sup>10</sup> Namanakotzimi eejatzi pantapiintantyaawori kameethatzimotziriri Awinkatharite, tema irootake ikowiri pantairi, iroowa piyaatakaantyaawori piyoperotanairi Pawa. <sup>11</sup> Namanakotzimi otapishiretantemiri ishintsinka. Iro kyaaryootakaimine rowaneenkawo, intsinampashiretakagaimi eejatzi. <sup>12</sup> Iroowa pinthaamentantyaari piwetharyaayetaiyaari Ashitairi. Tema iriitake kantakaawori añaantaawori rashiyetai, anintaantaiyaawori okaatzi ikashaakagairi roitesheenkatokotairi ikiteshoretakaanewo. <sup>13</sup> Tema pairani oshiyawaitakawo asaikatyeeme otsirenikitzira. Iro kantacha rowawisaakoshiretai Pawa, ipinkathariwentai iroñaaka retakotanewo Itomi, <sup>14</sup> kapathainkawentakairi. Oshiyawaitakawo ripinakowentatyaime rontsiparyaakowentai, opoñaantaari ipeyakotantairori ayaariperonka.

### *Ikamawentaira Cristo arira rariperoyetai Pawa*

<sup>15</sup> Te ikoñaanetzi Pawa, iri kantacha roñaagantapainta etakawori Itomi, etawori rañaake tekera riwetsikaitziroota tzimayetatsiri iroñaaka. <sup>16</sup> Iri Itomi wetsikakaantakeriri tzimayetatsiri inkiteki eejatzi kipatsiki. Riwetsikake aminayetziriri, eejatzi kaari koñaayetatsine. Riwetsikakeri maawoini maninkariite pinkathariwentzirori tsikarika oiyeta. Iriitake riwetsikakagaitakeri maawoini rashitantaiyaawori irirori. <sup>17</sup> Iri etanakawori Cristo itzimi pairani. Irijatzi kantakaawori iroñaaka kaari inashiyetanta okaatzi riwetsikayetakeri. <sup>18</sup> Irijatzi Cristo oshiyakawori iriime aitotyaame akemisantzinkaritzira. Irooma aakapaini iwatha anayetai. Iriitake etaawori ipiriinta ikamawetakaga. Iriitake retaitaiyaari ipinkathaitairi iroñaaka. <sup>19</sup> Tema Ashitairi ikowakaakeri Itomi risaikashireperotantyaari ipawatzira irirori. <sup>20</sup> Iriitake kamimotakairi, kapathainka ikantapainta ikentakoitakeri. Aripaitera rariperoyetai, onkantawetya tsikarika asaiki, kipatsikirika terika inkiteki.

<sup>21</sup> Pairani kisaneenta powiri Pawa, te poshoretakotyaawo ikowakaayetzimiri, iro pantapiintashitaka kaariperori. Iri kantacha Pawa rariperoyetaimi. <sup>22</sup> Tema atziripero rinapaintzi Jesucristo, iroowa ikamimoyetantakairi maawoini. Iriitakera aayetaine Pawaki, inkantapairi: Jirika, notasorentsitakaanewo, kiteshirepero ikan-taawo, tekaatsi ñaawaipookitakotairine. <sup>23</sup> Arira imataiya arika poisokerotanakyaawo pawentaashiretyaari. Tema pairani owakera pikemawakero Kameethari Ñaantsi, piyotanake eenitatsi poyaakotairi. Ithonka ikemakoitanakeri maawoiniki nampitsi. Naakaga Pablo ikenkithatakagaitake eejatzi.

### *Riyotairi Pablo itsipasatzi atziri*

<sup>24</sup> Antawoite nokimoshiretzi iroñaaka noñirowa nokemaatsitakowentzimi. Tema nimonkaatatziiro ikemaatsitakagaitakari Cristo. Iriira nokemaatsitakowenta kemisantzinkaripaini, oshiyanaawori iroome iwatha Jesucristo. <sup>25</sup> Iro nantawaire naaka nimonkaayetairo, tema iri Pawa kantakenari: “Pinkenkithatakotainiri atziripaini niñaane, ontzimatye pithotyagairo maawoini.” <sup>26</sup> Tekaaitsi yotaatsikaitatsine pairani oita ranteri Pawa, irojatzi okantzimaita iroñaaka. Iro kantacha riyotakaayetairo aakapaini, tema ikiteshiretakaanewo anatzzi. <sup>27</sup> Tema iro ikowakeri Pawa ayoyetairo. Jiroka riyotakagairi: Ineshironkayetaimi eerokapaini te nosheninkawetzimi, itsipashiretairi Cristo. Iro poyaakotantaawori piñagairo rowaneenkawo. <sup>28</sup> Iroowa nokenkithatakotantaariri naaka Cristo. Nokantziri atziripaini: “Ataama pikaariperoshirewaitake.” Niyotaayetairi kameethaperoini, oshiyawaitakawo naayetaateyerime Pawakinta, nonkantairi Pawa: “Jirika kemisantairiri Cristo, iriitake thotyagairori.” <sup>29</sup> Iroowa noshintsineentantariri iroñaaka. Tema ishintsinka Cristo aawyaashiretakaakenawori nantantaawori maawoini.

## 2

<sup>1</sup> Tema nokowatzi piyotai antawoite noñaashintsiwentakemi, eejatzi Laodicea-satzi ikaatzi kemisantairiri Cristo, noñaashintsiwentakari. Ari nokantakeri maawoini kaari ñaawootenane. <sup>2</sup> Iro noñaashintsiwentantzimiri pinthaamentashiretantyaari, petakotawakaantyaari, piyorenkakitantyaari, pinkemathatantyaawori rantayetairi Ashitairi Pawa kaari riyotakowetaita pairani Cristo. <sup>3</sup> Tema iriitake Cristo kantakaawori ikemathatakaantairori kaari riyotakowetaita, oshiyawaitakawo ashaagawontsi rimanaweetari. <sup>4</sup> Nokamantzizimiro iroñaaka jiroka, eero piñaantawo ramatawiitemi. <sup>5</sup> Okantaweta te nisaikimotzimi pinampiki, antawoite nonkenkithashiretapiintakemi oshiyawaitakawo arime ankaate asaike pinampiki. Iro nokimoshireperotantakari nokemakowentakemi aripero pikantawakaanaa, kisokero powanairi Cristo pawentaanaarira.

<sup>6</sup> Tema tsika pikantanaka pairani pikemisantanakeri Awinkatharite Jesucristo, piyaatakaairo pintsipashiretyaari. <sup>7</sup> Kisokero powanakeri petanakari pikemisantziri, poshiyakotyaawo parithatatsiri kameethaini, poshiyakotyaawo eejatzi pankotsi riwet-sikaitziro, iroowa riyotakaakemiri. Piwetharyaapiintaiyaari iroñaaka Pawa.

### *Risaikaperoshiretantairi Cristo*

<sup>8</sup> Pinkyaaryoote, eenitatsi kowatsiri ramatawiitemi, paamaawentya. Rimatakaashitzimirokari okaatzi riyoyetziri, riyotairiri pairani icharineete, iroowa rametaitari jaka kipatsiki. Tema kaari rashi Cristo. <sup>9</sup> Tema Pawa, iri thotyaaperotzirori inampiwathatantari Jesucristo. <sup>10</sup> Irijatzi thotyaaperotzirori inampishiretantairi eerokapaini, pawentaashiretanaarira Pawa. Pinkathariperori rini irirori, ranairi ikaatzi pinkathariwetachari. <sup>11</sup> Tema pawentaashiretanaarira Pawa, oshiyawaitanaawo pitomeshaanitatyeeyaame. Tera koñaawoini pitomeshaanitya, iroowa oshiyakaawentacha ripakaakagaimiro Jesucristo piyaariperoshirenka, rowañaashiretairi eejatzi. Oshiyawaitanakawo ritomeshaanitaitaateemime.

<sup>12</sup> Tema pomitsitsiyaayetaka pairani, poshiyakotaari Cristo Jesús tsika ikanta ikamawetapaintaga irirori. Oshiyawaitanakawo ari pinkaateme pinkitaty, ikitaitakerira irirori. Irojatz pañaantaari, rañagaira irirori. Tema pawentagaari iroñaaka Pawa ashitawori ishintsinka owañagaimiri. <sup>13</sup> Pairani, oshiyawaitakawo pinkamakityeeme okantakaantziro piyaariperonka. Iri kantacha Pawa ineshironkataimi, okantawetaka te pitomeshaanita. Tema rowañagairira Cristo, ari ikantaimiri eejatzi eeroka rowañashiretairi ipeyakotaimiro piyaariperonka. <sup>14</sup> Pairani osheki ikowawetaka nosheninkapaini rantakaimirome Inintakaantaitanewo, temaita pimonkaantziro. Iroowa rowasanketantawetaimiri Pawa. Tema oshiyawaitakawo Pawa rosankenatakotaatyeeerome ayaariperonka. Ikanta ikentakoitakerira Jesucristo, ari ashiryagaari rosankenatakowetakairi Pawa, oshiyawaitanakawo arime intsipatanakyaawome Cristo ikentakoitakerira. <sup>15</sup> Aripaite roitsinampagairi pinkathariwentashiwaitairi, te oshekitzimotanairi ishintsinka irirori. Te rantziro rimananeekiini jirokapaini, roñaagantaperotakero riyotakoperoitanyaaawori.

<sup>16</sup> Te ompantyaawo pinkantakotawakayaawo owanawontsi, eejatzi riraitziri. Te ompantyaawo eejatzi pinkantakotawakayaawo roimoshirenkayetari nosheninka: osarentsi, kashiri owakeracheeri, kiteesheri rimakoryaantaitari. <sup>17</sup> Tema maawoini Inintakaantaitanewo rantayetakeri pairani nosheninkapaini, oshiyawaitakawo aamparentsi. Iriitakera kantakotacha Cristo. \* <sup>18</sup> Paamaawentyaari kowatsine riyotaimi, ikowatz poshiyakotyaari jimpe ikantayeta iriroripaini. Iroowa inkantantemiri: “Jame antsinampashiretai, ampinkathatantaiyaariri maninkariite.” Temaita iñaawootziri maninkariite, apatziro riyotziro ikenkithashiretakowaitawo iñaamatashiyetari irirori, ishamewentawaitziro. <sup>19</sup> Te riwithaatsikaitari jirikapaini aitotanaarika aakapaini. Jirika aitotanaari, iriitake thaamentakaawori akimotatantari awathaki, irojatz awithaawakaantayetari. Tema Pawa kantakaakawori. †

<sup>20</sup> Apaani kaminkari tekaatsi rante, eero okanta ritziwaitaiyaawo oitarika. Ari pikantayetanaari eerokapaini pitsipashiretanaarira Cristo, oshiyawaitakawo pinkamatyeeme. Te onkowaatsikaitya pitziwaitaiya. ¿Oitaka paminaashiwaitantari pantayetairo inintakaantayetziro atziripaini? <sup>21</sup> Ikantzimi: “Eero powayetawo jiroka, eero pantayetziro, eero potaiyayetziro eejatzi jiroka.” <sup>22</sup> Riyotaashiwaitakemiro Inintakaantaitanewo. Tema arika oyaawo tsikarika oita, tekaatsi onkantai, ari ithonkaiya. <sup>23</sup> Tema arika atziwentawaitya, oshiyakaatzi ashironkaawentatyaari Pawa akemisantanairira. Tera ari onkantya, aminaashiwaitaga jiroka, tema te ipakaakaantero antashiyetari.

### 3

<sup>1</sup> Rañagaira Cristo, risaikimotapairi Pawa rakoperoki, ari itsipatapaari ipinkathariwentantapai. Ari pikantanaari eerokapaini pitsipashiretaarira Cristo, awisakoshiretairi. Pinkowairo rashitari irirori. <sup>2</sup> Eero poshiretaawo isaawikisato iro poshiretaiya inkitesato. <sup>3</sup> Oshiyawaitaawo iroñaaka pinkamakityeeme, pisaikimoshiretairi Pawa pitsipashiretaarira Cristo, okantawetaka jiroka te okoñaatzi. <sup>4</sup> Iro kantacha, arika ripiyai Cristo, aripaite rañaakaayetairi maawoini, owaneenkaki ankantaiya antsipatapaiyaari.

#### *Te ompantyaawo apiitairo antayewetakari pairani*

\* **2:17** Tema apaani aamparentsi te okoñaawaitashita. Arika añeero, ayotzi eenitatsi ashitawori raampare. Ari okanta eejatzi Inintakaantaitanewo rantaitakeri pairani, aampare inatzi ikashaakagairi Cristo. † **2:19** Jiroka oshiyakaawentachari jaka: Te riyotaatsikaitzi iriira Cristo jewayetairi aaka, roshiyawaitakawo iriime aito. Irooma aakapaini oshiyakawo iroorikame iwatha. Tema arika anthaamentya ankimotate awathaki, maawoini awatha othaamenta okimotayetzi, kameetha okanta iwithaawakaayeta, irojatz antariwathatantakyaari. Iroowa aito jewatakaantatsiri othaamentantari okimotayetzi kameethaini awatha. Ari ikantari eejatzi Cristo, iri jewayetanairiri kemisantzinkaripaini, irojatz rantashireperotantakyaari kameethaini.

<sup>5</sup> Te ompantyaawo papiitairo pantayewetakari pairani. Poshiyaari kaminkari, te rantayetairo kaariperori. Te onkameethate pimayempiwaite, pinkaariperoshiretanai, pinkamaarishiretanai, piñaamashirewaitanaiya, piñaamawaityaari koriki. Tema arika piñaamawaityaari, aritake piwawanetakyaari. <sup>6</sup> Irootake rantapiintakeri atziripaini, iroowa rowasanketantaiyaariri paata Pawa. <sup>7</sup> Ari pikantawetakari pairani eerokapaini, pameperowetakawo. <sup>8</sup> Iro kantacha, ontzimatye pipakagairo jirokaini: Pikisawakaawaita, piñaakatsimatawakaawaita, pikemaatsitawakaawaita, pikishimatawakaawaita, pikaweyawakaawaita, <sup>9</sup> pamatawiwaitantzi eejatzi. Tema pipakaayetairo tsika pikantaweta pairani. <sup>10</sup> Kameethashire pikantaawo iroñaaka, tema iri Pawa owameethashiretaimiri, poshiyaari ikantaga irirori, tema iriitake wet-sikakemiri pairani. Iroowa piyoperotantaiyaariri iroñaaka. <sup>11</sup> Rithonka risaikashiretantai Cristo maawoini: Grecia-thato, Judá-ite, tomeshaanitaarewo, kaari tomeshaanitaarewo, itsipasatzi, kaari yowaitatsine, noshikaarewo, kaari noshikaarewo, iitarikaini.

<sup>12</sup> Ineshironkatanewo Pawa pinayetzi, irootake riyoyaantakemiri rashiperotaimi. Ikowi pinkiteshireperotai. Pineshironkatante, pinethaante, tsinampashireri pinkantya, eero pisamawaitanta. <sup>13</sup> Kisashi pinkantawakaanaiya, pimpeyakoteri owariperoshiretzimiri. Tema ipeyakotaimiro eeroka Cristo piyaariperonka. Irootake pantanairi eeroka. <sup>14</sup> Iroowa kowaperotacha petakotawakaanaiya, inantyaari pariperotawakagaiya. <sup>15</sup> Tema apaani akantanaa oshiyaawo aakame iwatha Cristo, iro añaantyaawori kameetha asaikayetani, ariperotawakaanaiya. Ontzimatye awetharyaayetyaari Pawa. <sup>16</sup> Poshiretapiintaiyaawo pikemakotakeriri Cristo. Jiroka piyotanetyaari piyotaawakaanyaari: Ontzimatye pomampaayetanaiaawo riyotakaakemiri Tasorenkantsi, pomampayaawo Salmo, piwetharyagaiyaari Pawa, pinthaamentashiretawakaanyaari. <sup>17</sup> Ari pinkantyaari ontzimerika pantayeteri, oitarika piñaawaiteri, pipairyaapiintairi Awinkatharite Jesucristo, piwetharyagaiyaari Ashitairi Pawa.

#### *Antayetairi akemisantaira*

<sup>18</sup> Iinantaitari, pipinkathatairi piimepaini, iro pantanairi pikemisantairira Awinkatharite. <sup>19</sup> Iimentaitari, petakoyetaiaawo piinapaini, eero piñaakatsimawaitziro. <sup>20</sup> Itomintaitari, pinkemisantairi ashitzimiri, irootake kameethatzimotziriri Awinkatharite. <sup>21</sup> Ipaapateetari, te onkameethate pinkisakaashiwaityaari pitomi, eero okantzimoneentawaitantari. <sup>22</sup> Imperataarewó, pinkemisanteri imperatzimiri jaka kipatsiki. Eero powakowentzimotari arika raminemi pinimotakaanyaariri. Kameetha pantawaiteniri, tema pipinkathatairi eeroka Pawa. <sup>23</sup> Ari pinkantairo maawoini pantayetanairi kameetha pishirethawentyaawo. Poshiyakayeri iriime imperatemine Awinkatharite Jesucristo, kaarira atziri imperatemine. <sup>24</sup> Piyotake eerokapaini, Awinkatharite pinayetaimine paata. Tema iri Cristo imperataimiri iroñaaka. <sup>25</sup> Iriima antayetapiintanairori kaariperori, rowasanketaitairi irirori. Tema Pawa, tekaatsi manimotyaarine irirori.

## 4

<sup>1</sup> Imperatantanerí, paakameethateri pimperatanewo, pinethainiri okaatzira tampatzikatatsiri. Pinkenkithashiretya, eenitatsira inkiteki iita imperatzimiri eeroka.

<sup>2</sup> Pamanapiintya, aamaawentashire pinkantya pamanaiya piwetharyagaiya.

<sup>3</sup> Pamanakotzitená, rishinetaantaitenawori nonkenkithatakotairo kaari riyotakoweeta pairani. Tema irootake romonkyaawentaitakenari. <sup>4</sup> Pamanakotaina nimatantyaawori nonkenkithatakotero kameethaperoini, inkemathatantaityaawori.

<sup>5</sup> Ontzimatye pisaike kameetha pisaikimoyetzirira kaari kemisantatsine. Piyotairi, eero pitsipaminthawaitashitari. <sup>6</sup> Kameetha ookimotyaari okaatzi



pinkenkithatakairiri, oshiyaawo omposhinitzimotatyeeerime. Ontzimatyey piyoyete pakayeteri arika rosampiyetemi.

*Weyaantawori wethataantsi*

<sup>7</sup> Arika rareetakya iyeki Tíquico pinampiki, iriitake kamantapaakemine jimpe nokanta nisaikaiyini jaka. Tema jirika iyeki, iriitake amitakoperotakenari jaka nantawaitziniri Awinkatharite. <sup>8</sup> Iro notyaantantemiriri iñeemi tsika pikantaiyani eerokapaini janta, inkamantemiro tsika nokantaiyani jaka. Iro piñaantyaawori pinthaa-mentashiretaiyaani. <sup>9</sup> Ari notyaantemiri eejatzi iyeki Onésimo intsipatanakyaari Tíquico. Tema jirika Onésimo iriitake poñainchari pairani pinampiki. Imapero rawentaanakari irirori Awinkatharite, netakokitanewo rini. Apite inkaate kamantapaakemine okaatzi nantayetakeri jaka.

<sup>10</sup> Ari itsipatakana Aristarco rashitakoitakena jaka. Riwehathzитайimini eejatzi irirori. Riwehathzimi eejatzi Marcos itominthori Bernabé. Tema jirika Marcos, iriitake nokenkithatakotakemiri pairani nokantakemi: “Arika rareetakya pinampiki, paakameethatawakeri.” <sup>11</sup> Riwehathzizimi Jesús, iitaitziri eejatzi Justo. Iriitake tsipatakenari nokenkithatakotziro ipinkathariwentantaira Pawa. Osheki roimoshirenkena, tekaatsi itsipa nosheninka oshiyaarine jirikapaini tsipatakenari. \* <sup>12</sup> Riwehathzimi eejatzi Epafra, iriitake itsipa poñagainchari pairani pinampiki. Irijatzi rimperatanewo Cristo. Osheki ramanakotapiintakemi, pinkyaaryooshiretantyaari, piyotakotantyaawori pantanairo irooperori ikowiri Awinkatharite. <sup>13</sup> Naakatake ñaakeri Epafra osheki roshiretakemi. Ari ikantakari eejatzi Laodicea-satzi, eejatzi Hierápolis-satzi. <sup>14</sup> Riwehathzimi eejatzi Lucas aawintantaneri. Irijatzi netakotanewo. Riwehathzimi eejatzi Demas. <sup>15</sup> Nokowi naaka piwehathenari maawoini kemisantzinkaripaini janta Laodicea-ki. Piwehathenawo Ninfas, eejatzi maawoini kemisantzinkaripaini apatotapiintachari opankoki. <sup>16</sup> Piñaanateniri nosankenare kemisantzinkaripaini janta pisaikinta. Potyaanteniri eejatzi Laodicea-satzi riñaanateniri kemisantatsiri janta. Ari pinkantyaari eejatzi eerokapaini, piñaanatero nosankenatakeniriri iriroripaini. <sup>17</sup> Jiroka ñaantsi pinkanteriri Arquipo: Pantawaitainiri Awinkatharite tsikarika ikantakemi, pimonkaateniri.

<sup>18</sup> Naaka Pablo, osankenatzimirori nakoki niwehathzimi. Eero pipeyakotana romonkyagaitakenaga, pamanakotapiintaina. Onkamintha ineshironkataimi Pawa. Ari onkantaitaatyeyaani.

\* **4:11** Ikantakotziri Pablo jaka “nosheninka”, iriyetake iitaitziri tomeshaaniri, tema ari iitaitziri Judá-ite.

## RETAKARI ROSANKENATZINIRI PABLO TESALÓNICA-SATZI

### *Wethataantsi*

<sup>1</sup> Naaka Pablo osankenatzimirori jiroka notsipatari Silvano eejatzi Timoteo. Notyaantzimiro janta Tesalónica-ki pashiite pikaataiyinira rashiyetaimi Pawa eejatzi Awinkatharite Jesucristo. Onkamintha ineshironkayetaimi, risaikakaayetaimi kameetha.

### *Roshiyakoitari Tesalónica-satzi*

<sup>2</sup> Arika namanakotemi, antawoite niwetharyaari Pawa. <sup>3</sup> Osheki nonkenkithashiryaakotakero okaatzi pantanairi poshoretanaarira, iñagaitzimi petakoyetantzi, pikamaitanaawo poyaawentziri Awinkatharite Jesucristo. <sup>4</sup> Niyotzi iyekiite, retakotaimi Pawa iri iyoyaayetaimiri. <sup>5</sup> Piyotaiyini eerokapaini te nonkenkithatakaashitemiro Kameethari Ñaantsi nisaikimotantakemiri, Tasorenkantsi aawyaashiretakaakenari, niyotantawori kyaaryooperori nokamantayetzimiri. Piñaayetakena tsika nokanta nisaikimotakemi, osheki nokowaiyakemini. <sup>6</sup> Okantaweta pikemaatsiwetawo, iro kantzimaitacha kemisantaimi, tema Tasorenkantsi oimoshirenkaimiri. Pimatairo okaatzi nantziri naaka eejatzi okaatzi rantakeri Awinkatharite. <sup>7</sup> Iro opoñaantari roshiyantaimiri ikaatzi kemisantaatsiri Macedonia-ki eejatzi Acaya-ki. <sup>8</sup> Tera apaani kemakotaimine jimpe pikanta pikemisantairi Pawa, ithonka ikemakoitaimi tsikarikapaini. Nokowawetaka nonkamanterime jimpe pikanta pikemisantantari eerokapaini, <sup>9</sup> iri etawakawo ikamantawakena tsika pikantayetaka paakameethakena, tsika pikanta pipakaanairi piwawanewetari, pantanairo ikowiri Kañaaneri Pawa Kyaaryooperori. <sup>10</sup> Ikamantakenawo eejatzi jimpe pikanta poyaawentziri Jesús ripiye inkenapairo inkiteki, tema iri Pawa ashitariri rowañagairi ikamawetakaga. Iri owawisaakoshiretaine arika imonkaataiya rowasanketantai.

## 2

### *Rantayetakeri Pablo Tesalónica-ki*

<sup>1</sup> Iyekiite, piyotaiyini eeroka te aminaashita niyaatake nareetzimi. <sup>2</sup> Pairani tekera niyaatziita pisaikaiyinira eeroka, osheki ikisaneentaitakena Filipos-ki, rowasankewaitaitakena eejatzi. Iri kantzimaitacha iri Pawa shintsishiretakaakenari nokenkithatakaantzimirori Kameethari Ñaantsi, okantawetaka ikisaneentaitana. <sup>3</sup> Te nokenakaashitawo niñaaneyetari, te nokaariperoshiretzi nokenkithatakaakemiro, te namatawitzimi. <sup>4</sup> Tema Pawa ñaantashiretakenari naaka, rotyaantakena nonkenkithatakaaimiro Kameethari Ñaantsi, iro kaari nokenkithatantapaakawo inimotziriri atziri, apatziro nokenkithatakeri inimotziriri Pawa, iri yoshiretantatsiri. <sup>5</sup> Piyotaiyini te nonintathatantzimiro okaatzi nokenkithatakaakemiri, naantantyaawori osheki koriki. Iri yotzirori Pawa. <sup>6</sup> Te nokowiro pimpinkathatashitena. Okantawetaka naaka rotyaantaperotane Cristo, impinkathaitename. <sup>7</sup> Iro kantzimaitacha noneshironkatane nowimi noshiyakotawo irinirotaitari arika aamaakotyaari eenchaanikite. <sup>8</sup> Te apaani nonkenkithatakotemiro Kameethari Ñaantsi, antawoite netakotakemi, iro noñaashintsitakowentantzimiri.

<sup>9</sup> Tema pikenkithashiretairo netantanakawori nokenkithatzimiro riñaane Pawa, antawoite nantawaitake namanantantyaari nowanawo, kiteesheriki eejatzi tsireniriki nantawaitake. Irootake kaari pipashitantanawo eerokaite. <sup>10</sup> Piyotaiyini jimpe nokanta nisaikimotakemi, eejatzi Pawa riyotzi irirori, kameethashire nokantaka,

kiteshiretakena, tekaatsi itsipa kankotenenane. <sup>11</sup> Piyotzi eejatzi osheki netakotakemi, noshiyakotari ipaapateetari ikaminairi rowaiyane, ineshironkatziri, ishintsithatziri. <sup>12</sup> Ari nokantakemi eeroka, onkene pantayetainiri ikowakaimiri Pawa, tema iri yoyaimiri, ari piñero pisaikai ipinkathariwentantzira isaikira rowaneenkawo.

<sup>13</sup> Iro niyaatakaantawori niwetharyaanaari Pawa. Tema pairani owakera pike-mawakena nokamantapaakemiro ñaantsi, piyotanake kaari riñaane atziri, irootake irooperori riñaane Pawa. Pikemisantakero, antakaayetaimiro okaatzi ikowakaimiri. <sup>14</sup> Ari poshiyanaari ikaatzi kemisantanaairiri Jesucristo Judea-ki, tema antawoite rowasankeyetakeri Judá-ite isheninka. Ari ikantzitakemi pisheninka eeroka rowasan-ketakemi. <sup>15</sup> Judá-itera tsitokakeriri pairani Jesús, irijatzi tsitokitakariri pairani Kamantantaneri. Iri omishitowakenari eejatzi naakapaini. Antawoite ikisaneentakeri atziripaini. Iro kaari inimotziri Pawa. <sup>16</sup> Te ikowaiyini nonkenkithateniri ñaantsi kaari Judá-itetatsine, rawisakoshiretantaiyaari irirori. Iro ikaariperoshiretantakari Judá-ite, ari iñiimaitaiyaawo rowasanketairi Pawa paata.

### *Risaikantakari Pablo intaina*

<sup>17</sup> Iyekiite, osamani okantaka asaikimotawakaawetaka intaina, osheki nokenkithashiretakotapiintzimi. Iro kantzimaitacha nokowake napiitairo añaawakaayetaiya. <sup>18</sup> Nokowawetaka nareetemi, iri kantacha Satanás osheki rotzikatzikatakana. <sup>19</sup> Iro kantzimaitacha paata arika ripiye Awinkatharite Jesucristo, eeroka oimoshirenkainane noñaantaiyaawori nonkimoshiretai. Eeroka kantakaakawori ripinaitantainari naaka. <sup>20</sup> Eeroka kantakayaawone paata noñaantaiyaawori nasagaawentantaimiri nonkimoshirewentantaimiri.

## 3

<sup>1</sup> Iro nokenkithashiretakari pairani nisaikira Atenas-ki, <sup>2</sup> iri notyaantemiri Timoteo pisaikaiyinira eeroka. Tema jirika Timoteo iyeki rinatzi, tzimatsi osheki rantayetakeniriri Pawa. Ari notsipatakari noñaashintsitakawo nokenkithatakotziro Kameethari Ñaantsi tsika ikantakota Cristo. Tema arika rareetakya pisaikaiyinira, iri owatzinkashiretapaakemine, pinkimoshiretantyaari piyaatakaairo pinkemisante. <sup>3</sup> Te nokowi onkantzimoneentemi arika rowasanketaitemi. Ari okantari, iro awishimotaine. <sup>4</sup> Iro nokantzitakemiri nisaikimotantzimiri, iroowa piñaakeri awishimotakemiri. <sup>5</sup> Iro kantacha te nokisashitapaakawo naaka, nokowake niyote irojatzirika pikemisantaiyini. Kemetaka tzimatsi kowaintsiri inkaariperoshiretakaimi, ari aminaashiwaitaiyaani okaatzi nokamantawetakemiri pairani.

<sup>6</sup> Iro kantacha riyatake Timoteo rareetzimi, piyaawo nisaikira naaka. Ika-mantapaakena eekero piyaatatzi pikemisantaiyini, petakotawakaiyani. Ikamantakena osheki poshoretapiintakena, pikowi piñeena, ari nokantzitakari naaka, nokowi noñeemi eeroka. <sup>7</sup> Iyekiite, okantawetaka osheki rowasanketaitana jaka, thaamentashire nokanta, niyotake eekero piyaatatzi pikemisantaiyini eeroka. <sup>8</sup> Niyotzi eekero piyaatatzi piriiperowentairi Awinkatharite, kameetha inimotakena nisaikira jaka. <sup>9</sup> Antawoite niwetharyaari Pawa, eeroka matakero pikimoshiretakaaperotakena. <sup>10</sup> Eekero nokamaitatyaawo namana kiteesheriki eejatzi tsireniriki, noñaantyaawori napiitero nareetemi, ari niwetsikemiro tzimatsirika pikenakaashitari pikemisantzira.

<sup>11</sup> Iri nokowakotzi Ashitairi Pawa, eejatzi Awinkatharite Jesús, tampatzika nowanakero niyaate pisaikaiyinira eeroka. <sup>12</sup> Nokowakotziri eejatzi iri kantakayaawone piñaantyaawori petakotawakagaiya, ari poshiyanaiyaari itsipasatzi atziri. Nokowi poshiyakotenawo naaka netakotzimi eeroka. <sup>13</sup> Iro iñaantemiri Ashitairi Pawa, kiteshire pinkantanaiya, tekaatsi kantakowaitemine paata arika ripiye Awinkatharite Jesús, intsipatapaiyaari itasorentsitakagairi.

## 4

*Okaatzi inimotziriri Pawa*

<sup>1</sup> Ari okantari iyekiite. Iri kankakayaawone Awinkatharite Jesús, nimatantemirori jiroka, shintsi nonkantemiro nonkenkithate. Pairani niyotaakemiro pantayetairo inimotziriri Pawa. Pimatzimaitakawo. Iro kantacha nokowi piyaatakaairo irojatzii pithotyaperotantakayaawori. <sup>2</sup> Piyotzimaitaka eeroka, iriitake Awinkatharite Jesús matakaakenawori okaatzi niyotaakemiri. <sup>3</sup> Jiroka ikowiri Pawa rowameethashiretan-temiri: eero pimayempitzi. <sup>4</sup> Ontzimatyepinkinatantya, inkene impinkathataitemi pitasorentsishiretanaira eeroka. <sup>5</sup> Eero piñaawenatawo mayempitaantsi, iro rantapiiintziri kaari kemisantairine Pawa. <sup>6</sup> Paamaiya pikantzimoshiryaaakarikari iyeki kemisantanaatsiri. Nokamantzitakemi ketziroini, ari rowasanketakeri Pawa antakerone jiroka. <sup>7</sup> Te ikowi Pawa oshiyakotyaari mayempiri, ikowatzi rowameethashiretai. <sup>8</sup> Pithainkanarika naaka, Pawaga pithainkake. Tema Pawa otyaantakemiriri Tasorenkantsi.

<sup>9</sup> Iro nonkenkithatakaimiri tsika okantakota etakotaantsi. Okantawetaka te okowa napiitaimiro eerokapaini, tema pimatairo petakotawakagaiyani, <sup>10</sup> pimatakeri petakotaari iyekiite nampiyetawori piipatsiteki Macedonia-ki. Iro kantacha ontzimatyepiyaatakaairo irojatzii pithotyaperotantakayaawori. <sup>11</sup> Iro pinkowairi pisaikai kameetha. Kaari ikoshekantaita, pantairo pantawairetari eeroka. Iro niyotaayetakemiri pairani. <sup>12</sup> Iro iñaantemiri kaari kemisantatsine wetsikashire pikantayeta, tekaatsi koityiimotemine.

*Ripiyairika Awinkatharite*

<sup>13</sup> Iyekiite, nokowi nonkenkithatakoteri kamayetatsiri kemisantzinkari tsika inkantaiya paata. Iro piyotantyaari eeroka, eero poshiyakotantari kaari kemisantatsine, antawoite riraaneenta rowashirewaita eejatzi. <sup>14</sup> Ayotaiyini aaka ikamawetaka Jesús, iro kantzimaitacha rañagai eejatzi. Ari inkantairiri Pawa paata ikaatzi kemisantantsiri, ari rowañagairi arika ripiyai Jesús. <sup>15</sup> Jiroka riyotagairi Awinkatharite: Paata arika ripiyai, ikaatzi kamayetantsiri iri etaiyaawone iñaawairi, aaka impoitatsine añaayetzika. <sup>16</sup> Inkemaitawairo inkaimapaake reewarite maninkariite, rityootakaantapaake Pawa. Iri etanakyaawone impiriintanake ikaatzi kamayewetainchari, <sup>17</sup> ampoñaapaakya aakapaini añaayetzika, ari antsipatanaiyaari eethonkitashitawaiyaari Awinkatharite, atonkyotawaiyaari menkoriki. Ari onkantatyeyea antsipataiyaari Awinkatharite. <sup>18</sup> Iroowa jiroka ñaantsi poimoshirenkantawakayaari.

## 5

<sup>1</sup> Iro kantzimaitacha iyekiite, tera okowa nonkamantemiro tsikapaita iñagaitero jirokapaini. <sup>2</sup> Piyotzimaita eerokapaini, tera riyotakoitziro tsikapaiteka, tema omapokashitaiya, oshiyawo arika romapokaitai tsireniriki inkoshitaita. <sup>3</sup> Intzimawetya kantatsine: “Risaiikaite kameetha, inimowaitemi.” Iro kantacha ari romapokantaitake raperotantaite maawoini. Oshiyawaityaawome tsinane onkemaatsiwaitya ontzimaanite, tekaatsi inkenakaiteero awisashitantaari onkaate pokatsine. <sup>4</sup> Te ari pinkantzimaitya eerokapaini iyekiite, paamaiya romapokaitzimikari, roshiyakoitapaakyaari koshintzi. <sup>5</sup> Piyotakotziro eeroka, te poshiyakotari anashiyetachari tsireniriki, te inewenta. Iri poshiyakotya anashiyetachari kiteesheriki, okoñaatzimotziri. <sup>6</sup> Ari oshiyawo jiroka, te onkameethate oshiyakotyaari maatsiri tsireniriki, aamaawenta ankantya oshiyakotyaari kyoshireri. <sup>7</sup> Tema tsireniriki rimagaitzi, ari ishinkitaitari eejatzi. <sup>8</sup> Iro kantacha ayotaiyini aaka, oshiyakotyaari anashiyetachari kiteesheriki. Wetsikaanta ankantya, ankemisantantetai, etakowaitantya. Oshiyakotyaari riwetsikaanta owayeri, ikithaatawo kotsirotaki. Oshiyakotyaari eejatzi rawentaawo kotsiromokotatsiri

ramanthaire. Ari ankantyaari aakapaini awentaanaiyaawo awisakoshireyetaira. <sup>9</sup> Te ikowi Pawa rowasankeyetai, apatziro ikowi awisakoshireyetai akemisantairira Awinkatharite Jesucristo. <sup>10</sup> Iriitake kamawentakairi. Tekaatsi oitya ankamawetya, arika añaaeyetai, ari añaaeyetairo asaikimoyetairi paata arika ripiyai. <sup>11</sup> Jiroka poimoshirenkantyaariri itsipa, wetsikashire inkantayetya.

*Ishintsithatziri Pablo kemisantanaatsiri*

<sup>12</sup> Iyekiite, pimpinkathayetairi ikaatzi yotaayetzimiri janta, ari pinkanteri ikaatzi jewayetzimiri pikemisantairira Awinkatharite. Osheki iñaashintsitakowentakemi. <sup>13</sup> Petakotaiyaari piñiirowa okaatzi rantzimotzimiri. Ontzimatyepisaikayetai kameetha. <sup>14</sup> Pishintsithatairi perantziite, eejatzi pinkantairi makoshiretatsiri. Poimoshirenkairi, powatzinkashireyetairi jentashireri ikemisantzira. Eero pisamawaitari jirikapaini. <sup>15</sup> Te onkameethate pipiyatantya, pinkowaperotairo paakameethatawakagaiya, ari pinkantzitaiyaari kaari pisheninkata. <sup>16</sup> Pinkimoshiretapiintaiyeni. <sup>17</sup> Eero pipakairo pamaña. <sup>18</sup> Oitarika awishimotemine, piwetharyagaiyaari Pawa. Irootake ikowiri antayetairi akemisantairira Jesucristo. <sup>19</sup> Eero pomanonkiro rantakaimiri Tasorenkantsi. <sup>20</sup> Eero pimanintziro ikamantaitzimiri. <sup>21</sup> Ontzimatyepaminawakero kameetharika ikamantaitzimiri. Pinkyaaryoowentanakero owameethashiretantemiri. <sup>22</sup> Okaatzi ikenkithashiretairi kaariperori inatzi, eero pimatzitawo eerokapaini. <sup>23</sup> Nokowakotziri Pawa eekero riyataakatyero rowameethashiretemi eerokapaini, tema iriitake kantakaawori risaikantaitari kameetha. Nokowakotziri raamaakowentaimi maawoini, piwathaki, eejatzi pishireki. Iro ompoñaantyaari eero otzimanta oita inkantakoitemiri paata arika ripiyai Awinkatharite Jesucristo. <sup>24</sup> Tema iriiperoshireri rinatzi irirori, aritake rimatakaairo.

*Weyaantawori wethataantsi*

<sup>25</sup> Iyekiite, pamanakoyetaina naaka. <sup>26</sup> Piwethatenari maawoini kemisantanaatsiri janta. <sup>27</sup> Nokowi piñaanateniri eejatzi jiroka nosankenare, irootake ikowiri Awinkatharite. <sup>28</sup> Onkamintha ineshironkataimi Awinkatharite Jesucristo janta. Ari onkantaitatyeyaani.



## APITETANAINTSIRI ROSANKENATZINIRI PABLO TESALÓNICA-SATZI

### *Wethataantsi*

<sup>1</sup> Naaka Pablo osankenatzimirori jiroka notsipatari Silvano eejatzi Timoteo. Notyaantzimiro janta Tesalónica-ki pashiite pikaataiyinira rashiyetaimi Pawa eejatzi Awinkatharite Jesucristo. <sup>2</sup> Onkamintha ineshironkataimi Ashitairi Pawa, risaikakaayetaimi kameetha. Ari inkantemiri eejatzi Awinkatharite Jesucristo.

### *Raminakotairi paata Pawa kaariperoshireri ripiyairika Cristo*

<sup>3</sup> Iyekiite, okowaperotatya niwetharyaakotaimi Ashitairiki Pawa, tema eekero piyaataakaanakityeero pinkemisante. Eekero piyaataakaanakityeero petakotawakagaiya eejatzi. <sup>4</sup> Iro noshiretapiintantzimiri nopiyotaiyaani notsipatari itsipa iyekiite, nokantaiyini: “Eekero riyaatakaatziro ikemisantaiyini Tesalónica-satzi, okantawetaka antawoite ikemaatsiwaitaka rowasanketaitzirira.”

<sup>5</sup> Ari okoñaatakotzi tampatzika ikanta Pawa riyakowentantzi. Oshiyawaitakawo riwetsikaantyaame Pawa inkene impinkathariwentemi. Iroowa pikemaatsiwentantawori. <sup>6</sup> Iro irooperotatsiri inkemaatsitakayaari Pawa ikaatzira kemaatsitakaimiri eeroka. <sup>7</sup> Irooma maawoini aakapaini, akaatzi akemaatsiwentakawo, atake ripinayeetai paata arika ripiyai Awinkatharite Jesús, inkenapai inkiteki intsipatapaiyaari maninkariite tzimatsiri ishintsinka, <sup>8</sup> inkenantapaiyaawo opaampaporenthatzira paampari. Ari rowasanketaiteri kaari yotairine Pawa, kaari kemisantairori Kameethari Ñaantsi ikenkithatakotaga Awinkatharite Jesucristo. <sup>9</sup> Iri atsipetaiyaa-wone rithonkaitairi, rashi rowaatyeero impeyashitaiya, eero iñagairo ishintsinka Awinkatharite. <sup>10</sup> Tema paata arika ripiyai, impinkathatawairi kameethashiretaintsiri, inkempoyaaminthatawairi. Ari pinkantaiyaari eeroka, tema pikemisantairo nokamantakemiri. <sup>11</sup> Iro namanakotantaimi eerokapaini. Nokowakotziri pimonkaataiyaaari tsika ikantayeta riyoyaayetairi. Nokowakotziri raawyaashiretakaimiri pantantyaawori kameethatatsiri pikemisantaira. <sup>12</sup> Iro ompoñaantyaari raakoitairi iwairo Awinkatharite Jesucristo, eerokaga kantakaakawori ipinkathatantaitakariri. Impinkathatakagaimi eejatzi eeroka. Iri Pawa neshironkayetaine aaka, eejatzi Awinkatharite Jesucristo.

## 2

### *Iñagaitairi owaariperoshiretantaneri*

<sup>1</sup> Iyekiite, nonkenkithatakotemiro okantakota antsipataiyaaari Pinkathari Jesucristo, arika ripiyai paata. <sup>2</sup> Te nokowi pinkenkithashiryaawaitashitya pinkante: “Piyaawo Awinkatharite.” Aamaaka iro pikenkithashiryaakari, pikantzi: “Iroowa ikenkithatakotakeri Pablo.” Pikantzi eejatzi: “Iro rosankenatairi Pablo riyotakairiri Tasorenkantzi.” <sup>3</sup> Te ari onkantya, kyaa ramatawiitzimi. Tema arika ripiyai paata, etanakyaawo inkoshekaityaari Pawa, irojatzi iñaantaityaari owaariperoshiretantaneri, iñagaita eejatzi iitaitziri “Otomi peyawaitakagaantsi”. <sup>4</sup> Kisaneentantaneri rinatzi, inkowe rawisante roshiyakagaiteri Pawa impinkathaiteri tasorentsipankoki. Inkante: “Naakatake Pawa.” <sup>5</sup> Tema nokamantayetakemiro jiroka nisaikimotantapaintzimiri. <sup>6</sup> Piyotaiyini eeroka iita otzikakeriri kaari ikoñaatzitanta owaariperoshiretantaneri, apatziro inkoñaate paata arika imonkaapaitetapaakya. <sup>7</sup> Antawaitake rimananeekiini owaariperoshiretantaneri. Iro kantzimaitacha tzimatsi otzikapiintakeriri, irojatzi paata roñaagantantakyaari. <sup>8</sup> Aripaite iñagaiteri owaariperoshiretantaneri. Tema

arika ripiyai Awinkatharite, ishintsinka rithonkantaiyaariri rowamaapairi, apatziro ritasonkapaakeri. <sup>9</sup> Jirika koñaatatsine paata, roshiyakotapaakyaari Satanás. Ari ontzimake ishintsinka, osheki ramatawitante arika ritasonkawentantayetapaake. <sup>10</sup> Eenitatsi maninterone inkemisantairome irooperori ñaantsi, iroowetakaga rawisakoshiretantaiyaarinime. Iriira peyashitaachane ramatawitakeri owaariperotantaneri. <sup>11</sup> Iri kankakayaawone paata Pawa inkemisantantaityaariri owaariperotantaneri. <sup>12</sup> Irootake rowasanketantaityaariri ikaatzira thainkawaitziriri Pawa, tema osheki ithaamentakawo rantayetziro kaariperori.

### *Riyoyaitakeri awisakoshiretaatsine*

<sup>13</sup> Iyeikiite retakotane Awinkatharite, eeke niyaatatzi naaka namanakotaimi niwetharyaari Pawa. Pairani tepera riwetsikaitzimiita, riyoyaitzakemi pawisakoshiretai. Iroowa pikemisantantaawori irooperori, iro itasorentsishiretakaanaimiri Tasorenkantsi. <sup>14</sup> Iriitake otyaantakenari naaka nokenkithatakaantakemirori Kameethari Ñaantsi, piñaantaiyaawori paata rowaneenkawo Awinkatharite Jesucristo. <sup>15</sup> Ari okanta iyeikiite, ontzimatyepinkyaryoowentairo okaatzi niyotaakemiri nisaikimotantapaintzimiri. Ari pinkantero eejatzi okaatzi nosankenatakemiri.

<sup>16</sup> Onkamintha retakoyetai Awinkatharite Jesucristo, eejatzi Ashitairi Pawa. Iri oimoshirenkapiintairi, irijatzi etakotairi, ineshironkatantairori okaatzira kameethayetatsiri. <sup>17</sup> Onkamintha inthaamentashiretakaapiintaimi, irijatzi iriiperoshiretakagaimine, iroowa piyaatakaantyaawori pikenkithatakoyetanakero kameethari, irojatzipantayetanairi eeroka.

## 3

### *Impinkathataitero riñaane Pawa*

<sup>1</sup> Iyeikiite, pamanakotaina naaka niyaatakaantyaawori nonkenkithatakoteri Awinkatharite, iro ompoñaantyaari impinkathatantaiyaariri itsipasatzi atziripaini, roshiyaimi eeroka. <sup>2</sup> Pamanakotaina eejatzi ompoñaantyaari nawisakotantaiyaari jaka kaariperoshireriki, tema te roshiyai aakapaini akemisantayetzira. <sup>3</sup> Iro kantzimaitacha kyaaryoopero ikanta Awinkatharite, ari raawyaashiretakaayetaimi, iri kempoyaawentaimine eero rotsinampaantzimi owaariperoshiretantanerori. <sup>4</sup> Iri Awinkatharite yotakaakenari eeke piyaatakaatyero pantayetanairo niyotaayetakemiri, tema pikowaiyakeni pantero. <sup>5</sup> Nokowakotziri Awinkatharite inkenkithashiryakaaperotemiro tsika okanta retakotzimi Pawa. Inkyaaryooshiretakaimi poshiyakotantyaariri Cristo.

### *Ontzimatyepantawaiyetai*

<sup>6</sup> Iyeikiite, tziimatsira ikowiri Awinkatharite Jesucristo nonkantemiri: Te okameethatzi paapatziyaari perawaitachari kemisantawetachari. Te rimatziro okaatzi niyotaakemiri pairani. <sup>7</sup> Ontzimatyepantawaiyetai naaka, te noperawaita nisaikimotantapaintzimiri. <sup>8</sup> Tekaatsi nonkowakotemiri pimpashitenari nowanawo, nipinatzimiro maawoini pipayetanari. Antawoite nantawaitake, kiteesheriki eejatzi tsireniriki. Iro opoñaantari kaari pipashitantanawo nowanawo. <sup>9</sup> Iroowetaka pametapiintyaarime pimpayetename nowanawo. Iro kantacha antawoite nantawaitake naaka pimpampoyaantenari, iro poshiyakotantenawori jimpe nokanta naaka. <sup>10</sup> Iro nokantzimiri pairani nisaikimotantapaintzimiri janta, nokantzimi: “Kaari antawaitatsine, eero rowaa.” <sup>11</sup> Nokemake ikantaitzi tziimatsira pikaataiyinira janta perayetachari, te ikowi rantawaite, apatziro ikoshekantayeta. <sup>12</sup> Eenitatsi ikowakaanari Awinkatharite Jesucristo nonkanteri jirikapaini: “Eero pikoshekanta, santzikoiteeni pantawaiwentero powanawotetari.” <sup>13</sup> Iyeikiite, pashi powero eeroka pantayetairo okaatzi kameethayetatsiri.

<sup>14</sup> Tzimatsirika itsipa kaari kemisanterone jiroka nosankenatakemiri, eero paapatziyaari, iro inkaaniwaitantyaari. <sup>15</sup> Iro kantzimaitacha eero pikisaneentziri, pinkaminaayetairi poshiyakairi pirentzi.

*Weyaantawori tasonkawentaantsi*

<sup>16</sup> Iriira Pawa kantakaawori risaikantaityaari kameetha, nokowakotziri irijatzi inimotakaimirone pisaikaiyeni kameetha onkantawetakya piñaayetero awishimoyetemi. Nokowakotziri intsipatemi.

<sup>17</sup> Jirokaga nosankenatziri naaka nakoki: Naaka Pablo wethatzimiri. Ari nokantapiintziro arika notyaante nosankenare. <sup>18</sup> Onkamintha ineshironkataimi maawoini Awinkatharite Jesucristo janta. Ari onkantaitatyeeyaani.

## RETAKARI ROSANKENATZINIRI PABLO TIMOTEO

### *Wethataantsi*

<sup>1</sup> Naaka Pablo osankenatzimirori jiroka. Rotyaantaperotane Jesucristo nini, tema iro ikantakaantziri owawisaakotairi Pawa itsipataari Jesucristo oyaakotanewo. <sup>2</sup> Eeroka nosankenatzini Timoteo, noshiyakaakemi notomi nowimi akemisantanaira. Onkamintha ineshironkataimi Ashitairi Pawa eejatzi Awinkatharite Cristo Jesús, okamintha retakotemi, piñagairo pisaikai kameethaini.

### *Kenakaashitawori riyotaantzi*

<sup>3</sup> Pairani niyaatantakariki Macedonia-ki, nookanakemi pisaike Efeso-ki, ompoñaantyaari piyotayeri saikayetatsiri janta, ripakagairo ikenakaashitakawo riyotaantzi. <sup>4</sup> Ikenkithatakotashitawo kenkitharentsi, ikenkithatakotashitawo eejatzi jimpe ikanta pairani icharineni. Te oñaawontero jirokapaini rantakeri Pawa opoñaantari ankemisantairi, iroowa kantakaantzirori riñaanaminthatawakaantari atziripaini. <sup>5</sup> Irooma aaka arika ayotaante, akenkithatakotziro jimpe ikantaita retakotawakagaita. Tema arika ankiteshoretanai, arika ankenkithashiryaanairo tampatzikatatsiri, arika ankemisantaperotanai, ari amatakeri etakotantaiya. <sup>6</sup> Ari itzipinayetakeri jirikapaini, aminaashitaka okaatzi ikenkithatakantawetakari. <sup>7</sup> Ikwawaitashitakawo riyotaantero Inintakaantaitanewo. Okantawetaka rotsiwakakaanta riyotaantayetzi, temaita ikemathatziro irirori okaatzi ikenkithatakowetari.

<sup>8</sup> Irooma aakapaini ayotzi imapero okameethatzi Inintakaantaitanewo, ontzimatyankemathatero tsika oita otzimantari jiroka. <sup>9</sup> Te iri rosankenataiteni ikaatzi kameethashiretaintsiri, apatziro rosankenataitziniri jirika: koshekantaneri, piyathari, kaariperoshireri, tsimainkaantsiwari, thainkantaneri, manintashiryaantaneri, tsitokayetziriri ipaapate, omposantzinkari, <sup>10</sup> mayempiri, antaminthatawakaachari ishiramparinkaki, noshikantaneri, thiyawairentzi, kamatawireri, ikaatzi otzikatzikayetzirori ayotaantzirowa kameethari. <sup>11</sup> Tema inashita Kameethari Ñaantsi owaneenkatachari, iro ikantakenari Pawa Tasorentsitsiri nonkamantantairo.

### *Rantawaire Pablo*

<sup>12</sup> Iri Awinkatharite Jesucristo matakagaanawori. Iro niwetharyaantaariri, tema kyaaryootakena, riyotzi irirori, rotyaantakena nantawaiteniri. <sup>13</sup> Okantawetaka pairani osheki nithainkatasorentsiwaitakeri, noisaneentanewo nowiri, osheki nowasankeyetake rashiyetaari, iro kantzimaitacha retakotaana irirori. Tera niyowetawo okaatzi nantakeri, tekera nokemisantanakeeta. <sup>14</sup> Iri kantacha jirika Awinkatharite antawoite retakotakena, ari opoñaanakari nokemisantanairi Jesucristo, osheki netakotaari iroñaaka. <sup>15</sup> Jiroka nonkanteri irooperori ini, ontzimatyankemisantaiteero: Ripokake Jesucristo jaka kipatsiki rowawisaakoyetairi kaariperoshireripaini. Naakaga maperowetakawori maawoini nokaariperoshirewetaka. <sup>16</sup> Iro opoñaantari ineshironkataana Jesucristo, te risamaneentana okantawetaka naaka maperowetakawori nokaariperotzi. Ikantaanaga naaka, ari inkantayetaiyari itsipa inkaate kemisantayetairine, ari inkantaitaayeero rañaayetai. <sup>17</sup> Nokowi ari inkantaitaayeero impinkathaperoitairi kantaitachaneri, Impinkatharite, Kañaaneri, Kaari koñaanetatsine, Apintzi Pawa. Oztimimotziri rowaneenkawo kantaitaachane. Ari onkantaitaayeeyani.

<sup>18</sup> Notomí, Timoteo, eenitatsi nokowiri nonkamantemiri. Ari oshiyaawo okaatzi ikenkithatakotaitakemiri pairani. Iro nonkamantantemirori pinthaamentashiretantyaari piyaatakaairo piñaashintsiperotaiya kameetha, <sup>19</sup> eeke piyaatakaayeero

pinkemisantanake, eeke pinkenkithashiryaatyero tampatzikatatsiri. Tzimatsira pakaakerori. Okantawetaka ikemisantzi, oshiyawaitakawo ripitamenkakotatyeeyaame. <sup>20</sup> Ari ikantari Himeneo eejatzi Alejandro. Iriira nishinetakeri rowashironkagairi Satanás, iroowa riyotantyaari kaari rithainkatasorentsiwaitaitzi.

## 2

### *Ikenkithatakoitziro amanaantsi*

<sup>1</sup> Jiroka netawakyaari notsiwakakaimiro: Ontzimatye pamaña, pinkowakowentante, pinkantakowentante, piwetharyaakowentaiyaari maawoini. <sup>2</sup> Pamanakotaiyaari pinkatharipaini. Pamanakotaiyaari eejatzi maawoini jewaripaini pisaikantyaari kameetha, pinkathatasorentsi pinkantya, tampatzikashire pinkantya eejatzi. <sup>3</sup> Iro kameethatatsiri maawoini jiroka. Iro ikowiri Pawa owawisaakoshiretai. <sup>4</sup> Tema ikowatzi Pawa maawoini awisakoshireyetai, ikowi eejatzi ayotakotairo irooperori ñaantsi. <sup>5</sup> Jiroka irooperori ñaantsi: Apatziro ikantakaawo Pawa. Apatziro ikantakaawo kankakowentziriri atziri janta Pawaki. Iriitakera Cristo Jesús. <sup>6</sup> Iriira pinakowentakairi maawoini aakapaini ikamawentakaira, rookakaawentakai imonkaapaitetapaakaga inintakaapaakawowa Pawa. <sup>7</sup> Iro rowantakenari naaka Rotyaantaperorite, iri otyaantakenari nonkenkithatakaayetai atziri kaari asheninkata, niyotagairi inkemisantairo irooperori ñaantsi. Tema imaperotatya.

<sup>8</sup> Tsikarika rapatotapiintayeeta, nokowiri shiramparipaini ramanaiyani, kiteshire inkantaiyani intzinaawakotya, eero ikisawaita, eero riñaanaminthatawakaayeta. <sup>9</sup> Ari onkantanaiyaari tsinanepaini eero oñaawenawaita onkithaatyaawo owaneenkatachari, apaawaiteri koriki amanantayete othatane poreryaayetatsiri, oñaawenawaityaawo owaneenkatero oishi. <sup>10</sup> Ontzimatye ametaiyaawo antayetairo kameethayetatsiri. Jirokaga kameethatatsiri antayetziri tsinane kantatsiri: “Naaka, pinkathatasorentsi nini.” <sup>11</sup> Arika inkenkithataite, owayempita onkantayetya tsinane, onkemisantante. <sup>12</sup> Te nishinetakaantero iyotaante tsinane rapatotapiintaitaga, te nishinetakaantero eewateri shiramparipaini eejatzi. Apatziro owayempitayetya. <sup>13</sup> Tema iri Adán retaitaka pairani riwetsikaitakeri, iro impoitapaintsiri Eva. <sup>14</sup> Kaari Adán ramatawiitake pairani, tsinanera ramatawiitake, ari opoña antantawori kaariperotaantsi. <sup>15</sup> Irooma tsinanepaini, iroowa owaiyantaatsine, aritake awisakoshireyetai eekerorika iyaataakaanakityeero onkemisante, etakotantya, onkameethashirete.

## 3

### *Tsika inkantayetya jewaripaini*

<sup>1</sup> Iroopero ini nonkantemiri: Tzimatsirika kowatsine reewateri kemisantzinkaripaini, okameethatzi ikowiri ranteri. <sup>2</sup> Inkaate jewayetatsine ontzimatye inkameethashirete, eero itzimawaitzi kankakoyeterine, inkinayetyaawo iina, nethaawaine inkantya, rantayetairo kameethari, impinkathatakaantya, roimaantayete ipankoki, yotaantaneri inkantayetya. <sup>3</sup> Eero ishinkiwaita, eero ikisawaita, etakotane inkantya, tsinampashireri rine, eero iñaawenawaitashitari koriki. <sup>4</sup> Riyotero reewayetairi saikapankotziriri, pinkatha inkantante rowaiyaneete, eero ripiyathawaita. <sup>5</sup> Atziri kaari yoterone reewatakaante ipankoki, ¿kantachama reewawentairi kemisantairiri Pawa? <sup>6</sup> Ari ikantzitari owakeratatsiri ikemisantzi, eero okanta reewatakaante. Arika rimatero reewate, ari rasagaanakya, ari roshiyakotakyaari awishimotakeriri pairani Kamaari. <sup>7</sup> Arika poweri jewatziriri kemisantzinkari, pamine ipinkathatziri kaari kemisantatsine. Jirikarika powake ikantakowaitaitziri, iriira jirika kaari kisashityaawone ramatawiteri Kamaari.

### *Tsika inkantayetya amitakotziriri*



8 Ikaatzi amitakotziriri jewatziriri kemisantzinkaripaini, ontzimatye impinkathatakaantya, awentaane rowaiteri eejatzi, eero ishinkiwaita, eero iñaawenawaitashitari koriki rayitanteri rosheñeeri. 9 Okowaperota riyotakotairo okaatzi akemisantairi, kaari riyotakoitzi pairani. 10 Inantyaari atziri ramitakoteri jewaripaini, ontzimatye iñaantaitawakyaari kantacharika rimatero, arika iñaantaitakyaari kantacha riyaatakaairo. 11 Ari onkantyaari eejatzi tsinane ontzimatye ompinkathatakaantya, eero okenkithatakotantashiwaita, nethaawaine onkantya, onkyaaryoowentanairo maawoini. 12 Inkaate amitakotantatsine inkinayetyaawo iina, iñaapinkathateri rowaiyane, eejatzi ikaatzi saikapankotziriri. 13 Arika rimonkaatanairo jirokapaini, pinkathaga rowaiteri, awentaashirera inkenkithatakotairo tsika okanta ikemisantantaariri Cristo Jesús.

### *Imapero okameethatzi akemisantziri*

14 Nokowake niyaateme intsipaite noñeemi. Iro kantaincha netawakyaawoota nosankenatemiro jiroka, 15 aamaashitya eerorika niyaatzita, nonkamantzitemiro ketziroini jimpe ikantaita risaikaitzi rashiyetaira Pawa. Tema akaatzi rashiyetaira Kañaaneri Pawa, oshiyanaatyaawo okantaganki tzinkamitsipero, aakatake otzinkamita ikenkithaitairowa irooperori ñaantsi. 16 Imaperotatya irooperotzi okaatzi akemisantairi, te riyotakoweetawo pairani tsika ikantaita ipinkathatasorentsitaitzi. Jiroka akemisantziri:

Ratziritzimotantake Pawa,  
Iri oñaagantakeriri Tasorenkantsi iriiperori rini.  
Iri maninkariite kempoyaawentakeriri,  
Iri ikenkithatakoitairi itsipasatziki atziri.  
Iri ikemisantaitziri jaka kipatsiki,  
Iri owenonkaachari rowaneenkawoki.

## 4

### *Ikenkithatakoitziri eshitzirori ikemisantawetaga*

1 Jirokaga ikantairi Tasorenkantsi, ikantzi: Paata, ari iñagaitake eshiterone ikemisantawetaga, iro inkowanake inkemisantayetero riñaane Kamaari, ramatawitante. 2 Riyotaantashiwaityaawo owapeyimotantaneri kaari irooperotatsi, eero iñagairo rowashiretakotyaawo rantayetziri, jampashire ikantaka. Roshiyakyaawo okantaganki omataakagai ritagaita iyampawathatakaantzi eero akemairo katsiri. 3 Eero rishinetakaantziro raawakagaitya, ritzitakaantawo okaatzi rowaitari. Te onkameethate jiroka. Tema aakapaini akaatzi akemisantairi Pawa, ayotairo irooperori, riwetsikayetakinero owanawontsi. Ikwakagairo irirori owayetaiyaawo jirokapaini, awetharyaayetyaari. 4 Tema okaatzi riwetsikayetakeri Pawa, kameethari inayetzi. Tekaatzi oitya apaawaitantyaawori, ontzimatye awetharyaayetaiyaari añaayetzirowa okaatzi ipayetakairi. 5 Arika amatakero okantziri riñaane Pawa, amanakoyetyaawo okaatzi ipayetairi, ari ritasonkawentakairo.

### *Antawaitanainiri kameethari Jesucristo*

6 Iroorika piyotaantake jiroka, pimatanairowa pantawaitainiri kameetha Jesucristo. Pimonkaatanairo okaatzi pikemisantanairi, pimatanairo okaatzi riyotagaitakemiri. 7 Pipakagairo kenkitharentsipaini kaari irooperotatsine, iro ametapiintari antawoite okenkithayetziro jiroka. Ontzimatye piñaashintsitya piñaantyaawori pipinkathatasorentsitai. 8 Okameethatzimowetai eejatzi añaayetzirowa añaashintsita koñaawoini awathaki, iro kameethaperotatsi añaashintsishiretaiya añaantyaawori ankiteshireperotai. Te iro antantawori jiroka anintaawaitantyaari iroñaaka eeniro añaayetzika, iroatzi añaagairi paata anintagaiyaari arika añaagai. 9 Iroopero ini jiroka ñaantsi, ontzimatye

ankemisantairo maawoini. <sup>10</sup> Iro añnantawori añnaashintsiyeta, antawoite antawaiyetzi, tema oyaakoneentanewo owiri Pawa Kañaanetsiri. Arime rowawisaakoshiretai maawoini atziripaini, iriira rowawisaakoshiretai inkaate kemisantairine.

<sup>11</sup> Jiroka piyotaaneri, pishintsineenteri. <sup>12</sup> Te nokowi rithainkimawaitaitemi pimainarinkakiini. Ontzimatyepoñaagantero pikemisantziri, ompoñaantyaari roshiyakotantaitemiri. Pinkempoyaakotairo okaatzi pikenkithawaitziri, okaatzi pantayetziri eejatzi. Etakotane pinkantante, awentaashire pinkantya, kiteshireri pinkantya. <sup>13</sup> Piñaanatainiri Osankenarentsiperero atziripaini shintsini, pinkenkithatairo, piyotaantayetairo, irojatzi piñaanakyaawori nareetaimi janta. <sup>14</sup> Poshiretyaawo ikenkithatakotakemiri pairani jewaripaini, iro opoñaantari ritasonkawentantakemiri rotzimikapatziitotantakemiro rako. Kyaa peewanatawokari ritasonkawentaimira Pawa pimatantakawori jiroka. <sup>15</sup> Ñaashinti pinkantawentaiyaawo, ompoñaantyaari ñagaitemi eekero piyaatakanakitziro pantero. <sup>16</sup> Paamaawentaiya tsika pikantanaawo, poshoretakotyaawo kameethari onkaate piyotaaneri, onkaate pantayeteri eejatzi. Arika pimatakeropiriiperowentairo, aritake pawisakoshiretai, eejatzi roshiyaimi ikaatzi piyotaapiintziri.

## 5

### *Antayeteniriri itsipapaini*

<sup>1</sup> Te okameethatzi pinkisathateri antariite, kameetha pinkenkithawaitakayeri. Iro kameethatatsi pariperoteri poshiyakayeri iriime pipaapate. Eejatzi pinkantzityaari mainaripaini, pariperoteri poshiyakayeri iriime pirentzi. <sup>2</sup> Ontzimatyepariperotero antawokitatsiri, poshiyakayero iroome pinaanate eeroka. Eejatzi pinkantzityaawo mainawopaini, pariperotero, eero poshoretawo pimaimanewaitero poshiyakayero iroome pitsiro.

<sup>3</sup> Pineshironkatero kinankawo maperotzirori okoityaawaitzi. <sup>4</sup> Irooma kinankawo, eenitatsiri eentsite, osaripaini, iri amitakoterone. Ontzimatyepriyatayaawo inkempoyagairo okemetzirira pairani iroori rantaritantakari. Iro ikowiri Pawa antairi. <sup>5</sup> Irooma kinankawo matzirori isaikawaitzi apaniroini, awentagaari iroori Pawa, ashi owaatyero onkamaityaawo amanaiya onkowakoyetairi. <sup>6</sup> Irooma onkoityaawaitanakerika jirokapaini, te añi kameethaperoini, oshiyashitakawo onkamakityeeme. <sup>7</sup> Pishintsineentero imatantyaawori nokantakeri, eero otzimanta inkantakoiterori. <sup>8</sup> Eenitatsi kaari aminerine isheninkapaini. Iri maperotakerori kaari aminairine isheninkaani okaakiini. Roshiyawaitanakawo ripakaakityeerome ikemisantzi. Iri maperokitanakerori ranaanakeri ikanta kaari kemisantatsine.

<sup>9</sup> Kinankawopaini kowatsiri rosankenatakoitero antawaitantyaanariri Cristo, jiroka kowachari: Ontzimatyepoñaagantero onkaate osarentsite 60, kinatariri oimeni, <sup>10</sup> kameethashire okanta ikemakoitziro, kempoyaane owiri owaiyane, oimaantzi opankoki, ariperotapiintziri kemisantzinkari, oneshironkatapiintziri ashironkainkari, antayetapiintziro kameethatatsiri. <sup>11</sup> Irooma kinankawo kaari antawokitatsi, eero rosankenatakoitziro. Eero imatziro antawaitainiri Cristo, eeniro okowi aye oime. <sup>12</sup> Arika aake oime, osheki inkantakoitero, tema te imatero okantawetakari anterime. <sup>13</sup> Peranto onkantanyakya, onkenashiwaitya pankotsikipaini, onkantakotantayete, kaminaathatantantero ine. <sup>14</sup> Iro nokowantari aayetai itsipa oime kinankawo kaari antawokitatsine, intzimayetai eentsite, risaikeeta opankoki antawaite. Iro ompoñaantyaari eero itzimanta iita kishimawaiterone. <sup>15</sup> Tema tzimayetatsi matakakerori, antashitakawo ikowiri Satanás. <sup>16</sup> Kinankawo tzimatsiri osheninka okaakiini, iriitake amitakoyeterone. Irooma kinankawo kaari tzimatsi osheninka, saikatsiri apaniroini, tekaatsi amitakoterone, koityaawairento ini. Irootake kowajaantachari ramitakoyetero itsipa kemisantzinkari-paini.

<sup>17</sup> Kemisantzinkaripaini, ontzimatye rowayete ripinaiteriri jewatakaantatsiri, kyaaryooperorika rimonkaatziro kameethaini. Iri impaperoite kenkithatakaantatsiri, eejatzi ikaatzi yotaantatsiri. <sup>18</sup> Iro okantakotziri Osankenarentsiperero: Arika pantawaitakairi piratsi, te okameethatzi ritasheyaneentawaite. Jiroka okantziri eejatzi:

Ikaatzi antawaitatsiri, ripinaiziri.

<sup>19</sup> Apaanirika ikanta atziri kankotziriri jewari, eero pikemisantziri. Irooma inkaaterika apite, eerorika inkaate mawa ñaakotakerine rantakero kaariperori, ari okameethatzi inkemisantaiteri. <sup>20</sup> Eekerorika rantaitatyeero kaariperori, paanakeri tsika rapatotapiintaitaga pinkisathateri, iro ompoñaantyaari inthaawantyaari itsipapaini, eero rantantawo irirori. <sup>21</sup> Noshintsineentzimi pantero jiroka. Arika pantairo, eero potzikaakotashiwaitari, riyotzi Pawa nokantzimiri. Riyotzitawo eejatzi Jesucristo, riyotzitaka eejatzi maninkariite ikaatzi riyoyaakeri. <sup>22</sup> Te okameethatzi pathawaiyaawo potzimikapatziitotantyaawo pako reewatantaityaari. Tema arika riyoteri rantakero kaariperori, oshiyawaitakawo eerokame kantakaashiwaityaawone. Ontzimatye pinkiteshirete eeroka.

<sup>23</sup> Te okameethatzi apatziro pirapiintero ñaa, iro kameethatzi pirero eepichokiini kachori, ari piñagairo petsiyatakote pimantsiyawaiwetaga.

<sup>24</sup> Eenitatsi atziri, tekera riyakowentaiteriita rantakero kaariperori, ikemakoitakeri maawoini. Eenitatsi eejatzi itsipa kaari riyotakoitzi rantzirorika kaariperori, apatziro inkemakoiteri paata. <sup>25</sup> Ari oshiyawo eejatzi, te rimanakotapiintziro atziri rantayetero kameethari. Irooma arika rantakero kaariperori, ari inkowapiintakero rimanakotyia. Iro kantzimaitacha ari inkemakoitairi paata.

## 6

<sup>1</sup> Ikaatzi rimperaitari ontzimatye impinkathateri imperatariri. Iro nokantantari, ompoñaantyaari eero itzimanta kankowaitaine, rithainkantzirikari Pawa. <sup>2</sup> Rimperaitari kemisantaatsiri, arika rimperatemi itsipa kemisantzinkari, te okameethatzi pinkantashirewaite, pinkante: “Eero poshiyakaana pimperatane, tema iyeki nowimi.” Okowaperotatya jirika rimperaitari rantawaiperoteniri kameethaperoini, retakotanewo roweri, tema kemisantzinkari rini. Ontzimatye piyotaantairo jiroka, pishintsineentantairo.

### *Kiteshiretakaantaneri eejatzi inimotaantsi*

<sup>3</sup> Arika ripoke inashityaawone inkenkithatakaante, kaari oshiyaawone riñaanetakari Awinkatharite Jesucristo, rinashitapaakyaawo eejatzi inkenkithatakotero pinkathatasorentsitsiri, <sup>4</sup> shamewaineri rini, tekaatsi riyote. Apatziro ikowi irirori riñaanatawakaawentyaawo ñaantsi. Iro ompoñaantyaari asamawakaawaitya, ankoshekawakaawaitya, ankaweyawakaawaitya, ankantakotawakaawaitya, <sup>5</sup> ankisaneentawakaaperowaitya. Irootake rantapiintziri kaariperoshireri kaari yotakotaajaiterone irooperori ñaantsi. Ikenkithashiretakotawo raantyaawo koriki ramawenawaitawo ipinkathatasorentsitanaira. Te okameethatzi paapatziyaari eerokapaini. <sup>6</sup> Ari okantzimaitatya, antawo ripinawentaitairo paata apinkathatasorentsitaira. Iro kantacha añaantyaawori ripinaitai, ontzimatye inimoyetai okaatzi tzimimotairi iroñaaka. <sup>7</sup> Pairani owakera atzimapaake te amake tzimimotairi. Eejatzi okanta arika ankamai, okaatzi tzimimotairi eero, aanairo. <sup>8</sup> Eenitatsirika owanawo, tzimatsirika aithaare, ari onkaate. <sup>9</sup> Ikaatzi kowayetzirori rashaagantya, okaimashiretziri inkaariperoshirete. Roshiyakotari shirikachari iwirentsiki, rantziro ikowashiyetari owaariperotantatsiri, iro peyakaashitaiyaarine. <sup>10</sup> Arika iñaawenataityaawo rashaagantaitya, oshiyawaitakawo iro omparithatanakyaarine kaariperotatsiri. Tzimatsi ñaamatakawori rashaagantya,

ripakaanakero ikemisantzi, oshiyawaitanakawo iriime kemaatsitakaawaitachaneme apaniroidini rowathaawaitaka.

*Poshiyakairo pomanawentatyeeerome pikemisantanaira*

<sup>11</sup> Irooma eeroka, rashitaimira Pawa, pipakagairo jirokapaini, poshiyakairo pishiyapithatatyeeeyaawome. Iro pinkowaperotairi pinkameethashirete, neshironka pinkantante, pinkemisantairi Pawa, etakotantane pinkantya, eero pisamaneentanta, tsinampashire pinkantya. <sup>12</sup> Eekero pinkemisantanakitye, poshiyakairo pomanawentatyeeeyaawome kameethatatsiri. Poshiyakairo eejatzi piñaashintsitatyeeeyaawome irojatzi paantaiyaawori kantaitaachane añaakagaimine. Iro ikowakaitakemiri piñeero añaamentotsi, iro ikemantaimiri atziripaini pikantzi: “Nokemisantai.” <sup>13</sup> Eenitatsi noshintsineentemiri. Tema Pawa añaakairori tzimayetatsiri, riyotzi nokantzimiri. Riyotzita eejatzi Awinkatharite Jesucristo, ñaawaitapiintzirori irooperotatsiri, irojatzi ikantapaakeri pairani ragaitanakerira Poncio-ki Pilato. Jiroka onkaate noshintsineentemiri: <sup>14</sup> Eero pipiyathatawo ikantakaantaitziri, eero powashiñaawaitziro, itzimikari kenkithatakaantashiwaitachari. Piyataakaanairo eeroka irojatzi ripiyantaiyaari Awinkatharite Jesucristo. <sup>15</sup> Tema pokai irirori rimonkaapaitetakaapaakawowa Pawa. Apatziro ikantakaawo Pawa itasorentsitzi, reewatakaantairo maawoini tzimayetatsiri, impinkathariwentairi ikaatzi pinkathariwetachari, ari rimatairo reewawentairi eejatzi ikaatzi jewawetachari iroñaaka. <sup>16</sup> Iri ashitawori kantaitaachane añaamentotsi, ashi rowiro risaiki ishipakiryaperotzira, iro kaari rareetantaitari. Tekaatzi atziri materone iñeeri, eero rimataitziro eejatzi. Imapero ipinkathaitziri. Ashi rowaatyeero impinkathariwentantai. Ari onkantaitaatyeeyaani.

<sup>17</sup> Piyotagairi ashaagantachari, eero ishamewaitzi. Eero rawentaashiwaitawo rashaagawo, eero ashi owaatyero onkisotzimoteri. Ontzimatyee rawentagaiyaari Pawa, iri matzirori ithaamentakaaperotanta. <sup>18</sup> Piyotaantairo rantayeetairo kameethari. Oshiyaiyaari ashaagantzinkari oshekitzimotziri rowaagawo, ari pinkantanaiyaari eerokapaini oshekitzimotaimi irooperori pantapiintziri, iro poshiyakaanairi iroome powaagawo. Piyotaantairo ineshironkatantaite, ayimatairi impashitantya. <sup>19</sup> Iroorika rimatanai jiroka, oshiyanaatyeeeyaawowa iroome rashaagawo inkashaakagaiyaari paata. Ari inkantaitaatyeero iñagairo risaikai kameetha.

*Weyaantapaakawori ikantziriri Pablo Timoteo*

<sup>20</sup> Timoteo, kyaaryoo pine piyotaantairo okaatzi ineshironkaitakemiri. Eero pimatzitawo okaatzi ikenkithatakotashitari isaawikisatzi. Eero pimatzitawo riñaanatawakaawentaitawowa, jitashitawori “yorenkantsi”. <sup>21</sup> Tema eenitatsi matakero, ikenashiwaiyetaka, oshiyawaitakawo intzipinatatyeeeme. Onkamintha ineshironkaitaimi. Ari onkantaitaatyeeyaani.

## RAPIITAIRO PABLO ROSANKENATZINIRI TIMOTEO

### *Wethataantsi*

<sup>1</sup> Naaka Pablo osankenatakaantzirori jiroka. Rotyaantaperore Jesucristo ninatzi, iriira Pawa kowakaakenawori nonkenkithatakotairo ikantakairi pairani, rañaakagai Cristo Jesús. <sup>2</sup> Eeroka nosankenatzini Timoteo, nokemetakaakemi eerokame ne-takotane notomi. Onkamintha ineshironkataimi Ashitairi Pawa eejatzi Awinkatharite Jesucristo, onkamintha retakotemi, piñaantyaawori pisaike kameetha.

### *Pinkenkithatakotairi Cristo*

<sup>3</sup> Ari nokantapiintatya tsireniriki eejatzi kiteesheriki namanakotzimi, niwetharyaari Pawa, nantawaitainiri, noshiyakotaari ikantaga pairani nocharineeteni tampatzikashire rinake. <sup>4</sup> Arika noshiretyaawo piraawaitaganki, osheki nokowake napiitairo noñeemi, inantyaari nonkimoshirete. <sup>5</sup> Osheki nokenkithashiryaakotakemi poshireperotantanakari. Tema iro etanakawo pisawo Loida, opoñaanaka pinaanate Eunice. Niyotzi eejatzi ari pikantanakari eeroka. <sup>6</sup> Irootake napiitantemiri nonkantemi: Papiitairo powakeratairo okaatzi ritasonkawentakemi Pawa notzimikapatziitotantakemiro pairani nako. Poshiyakagairo roonthotaitziro paampari itsiwakimaterika. <sup>7</sup> Tema Pawa te ithaawashiretakaantzi. Apatziro ishintsishiretakaantzi, retakoshiretakaanta, iñaakoshiretakaanta.

<sup>8</sup> Irootake eero pikaaniwentantawo pinkenkithatakotairi Awinkatharite, poshiyena naaka, eero pikaaniwentana romonkyaawentaitanarira Pawa. Iriitakera shintsishire-takaimine poshiyena naaka, nokemaatsitakowentakawo Kameethari Ñaantsi. <sup>9</sup> Irijatzi owawisaakoshiretairi Pawa, iri yoyaayetairi tasorentsishire ankantaiya. Te aaka antashityaawone apaniroini, iriira kowashitakawo rantero. Rashi rowaatziro pairani Pawa ikowakaakeri ineshironkayetai Cristo Jesús. <sup>10</sup> Iroowa rantakeri ikoñaatakera pairani Owawisaakotantaneri, Cristo Jesús. Iriitake matakeroi roitsi-nampairo kaamanetaantsi, rookapaintairo Kameethari Ñaantsi, iro ayotantaari rashi rowaatyeero rañaakaayetai. <sup>11</sup> Irootake rowantakenari naaka Otyaantaperori, rotyaan-takena nonkenkithatakaante, onkene niyotaayetairi kaari nosheninkata. <sup>12</sup> Iro opoñaantari nokemaatsiwaitawo iroñaaka. Iro kantzimaitacha te nokaaniwenta. Niyotzi naaka iita noshiretaari, niyotzitaari oshekitzimotziri ishintsinka eero ripakaakaanawo ikowakaakenari nantainiri irojatzi paata kiteesheriki ripiyairika. <sup>13</sup> Arira pinkantaiyaari eeroka, poshiyakotenawo jimpe okanta pikemakena nonkenkithayetake, piyaatakayero poshiretya. Etakotane pinkantante, iroowa rantapi-intanairi rashiyetaari Cristo Jesús. <sup>14</sup> Tema risaikashiretantakemi Tasorenkantsi, iri kyaaryooshiretakaimine eero pipakaantawo irooperori ikowakaakemiri piyotaantero.

<sup>15</sup> Pikemakotakena eeroka tsika okanta rookanawentakena Asia-satzi. Jirikapaini: Figelo eejatzi Hermógenes. <sup>16</sup> Iri kantacha Onesíforo, osheki roimoshirenkapiintak-ena irirori, te ikaaniwentana roosoweetakenaga. Antawoite nokowi ineshironkatairi Pawa ikaatzi saikapankotziriri. <sup>17</sup> Tema iri kowakowatapaakenari rareetakaga Roma-ki, irojatzi iñaantapaakena. <sup>18</sup> Iri Awinkatharite neshironkatairine paata kiteesheriki ripiyairika. Tema piyotaiyini eeroka, osheki ramitakotakena Onesíforo nisaikantakari Efeso-ki.

## 2

### *Poshiyakayaame eerokame rowayerite Jesucristo*

<sup>1</sup> Notomí, tema iri neshironkataimi ketziroini Cristo Jesús, ontzimatye pintontashire-tai. <sup>2</sup> Pikemakena jimpe okanta niyotaantake atzirikipaini. Ontzimatye piyoyaayete



tsika inkaate iriiperoshiretatsine iri matanairone riyotagairi itsipa. <sup>3</sup> Aamaawenta pinkantya patsipewentaiyaari Jesucristo. Poshiyakayaame eerokame rowayerite. <sup>4</sup> Ikaatzi owayeritachari tera iñagaitziri rantayetanairo antawairentsi rantapiintaitziri kiteesheriki. Apatziro retapiintawo rantayetziro ikantziriri iyorakate. <sup>5</sup> Ontzimatyeye poshiyakotyaari eejatzi ripinataitzi anaakotawakaachari rishiyaiyani. Tema antawoite iñaashintsityaawo. Rimatantyaawori ranaakotante ontzimatyeeera iñaantzityaawo ketziroini. Irooma inthaiyawaitashitakyaarika ranaakotante, eeromaita ripinaiziri. <sup>6</sup> Ontzimatyeye poshiyakotyaari eejatzi pankiwairerenti. Tema iriitake etapiintawori rowawo iwankire. <sup>7</sup> Pinkenkithashiryaaakoterowa nokantayetakerimi. Tema iriitake Awinkatharite kemathatakaaperotemirone maawoini.

<sup>8</sup> Pinkenkithashiryaaakoteri Jesucristo icharinetakari David-ni. Tema añagai irirori ikamawetakaga. Iroowa Kameethari Ñaantsi nokenkithatakotairi. <sup>9</sup> Irootake nat-sipetantawori iroñaaka naaka, noñaantakawori roosowaitaitana romonkyagaitakena, roshiyakagaitakena naakame tsitokantzinkari. Irooma riñaane Pawa eero rimaitziro roosoitero iroori. <sup>10</sup> Irootake nokisashitantakawori maawoini jiroka, okantakaantziro netakotari ikaatzi riyoyaayetairi Cristo Jesús, rowawisaakoshiretairi iñaantaiyaawori kantaitaachane añaamentotsi, owaneenka onkantaiya. <sup>11</sup> Jirokaga irooperori ikantaitziri:

Arika ankamakotairi Cristo, ari antsipataiyaari rañaakaayetai.

<sup>12</sup> Arika ankisashiwainetakya, ari antsipataiyaari ampinkathariwentantai.

Irooma arika ankante: “Te niyotziri,” ari rimataitakai aaka.

<sup>13</sup> Iro kantacha, arikame añaawetyaawo te akamaiwentaari, iriima irirori ikamaiwentakai. Ari rashi rowatziro irirori, te ipashinitanetzi.

### *Poshiyakotyaari antawaiyantzi raakameethaitziri*

<sup>14</sup> Piyotaantairo jiroka. Pishintsineentakaantero ikowakaantziri Pawa: Eero riñaanatawakaantashiitawo ñaantsiyetatsiri kaari irooperotatsine, okantzimoneentarikari inkaatera kemerone. <sup>15</sup> Ontzimatyeye piñaashintsitya potampatzikatairo ñaantsi irooperori, onkene raakameethawentaimiro Pawa. Poshiyakotyaari ikantaganki antawairentzi kaari tzimatsine oitarika inkaaniwentakoteri. <sup>16</sup> Pipakagairo eeroka riñaanetashiyeetari kaariperori. Ari opoñaari rithainkatasorentsitantaitari. <sup>17</sup> Oshiyakotawo owawathatanta pathaawontsi. Iroowa awishimotakeriri Himeneo eejatzi Fileto. <sup>18</sup> Ikenakaashiwaitakawo irirori riyotaantziro irooperori, ikantake: “Tera aripero añaayetai arika ankamayetake. Roshiyakaawentashitaitawo ikantaitziri ‘añaagaantsi’. Okaatzi roshiyakaawentaitziri añagaira, irootake aimoshirenka akemakeri awentaanaarira Awinkatharite.” Tema okaatzi riyotaantashitari, ripakaakaakeri ikaatzi itsipawetari ikemisantaiyawetanira. <sup>19</sup> Iro kantzimaitacha, oshiyawaitakawo rowatzikatyeerome Pawa irooperori itzinkami, ari riwetsikakeme ipanko. Ari rontarekakotake apite osankenarentsi, okantzi etanakawori: “Riyoyetziro Awinkatharite ikaatzi rashiyetari.” Irooma apitetanaintsiri kantatsiri: “Inkaate aakotairine iwairo Cristo, ontzimatyeye ripakagairo kaariperotatsiri.”

<sup>20</sup> Iro kantacha janta antawoiteki ipanko, eenitatsi owaneenkatachari chomopaini, shipakiryaa okantayeta, kempoyaa rowayeeziri. Tzimayetatsi eejatzi chomo riwetsikayeetziro inchato, eejatzi kipatsinaki, te ikempoyaaaperotziro. <sup>21</sup> Arika ankiteshiretanai, oshiyakotanaawo chomo ikempoyaaaperotziro ashitawori, ikowapiintzi rotetantyaawo. Tasorentsishirera inkantakaanai Pawa, aamaawenta ankantya antainiri kameethayetatsiri. <sup>22</sup> Intaina powairo iñaamatashiwaitari mainaripaini, oshiyawaitakyaawome pishiyapithatatyeeerome. Iroowa piñaamatapiintanakya pinkameethashireyetai, oshiretane pinkantya, etakotane pinkantante, kameetha pisaikakaantayete, pintsipayetaiyaari kiteshireri aakoyetairiri iwairo Awinkatharite.

<sup>23</sup> Ontzimatyeye pipakaayetairo piñaawayetziro kaari pantyaawone, ari opoñaari

ikisawakaantaitari. <sup>24</sup> Irooma aakapaini rimperayetaira Pawa, te okameethatzi añaanaminthatawakagaiya. Tema ontzimatyte aneshironkatante, ayimaneentai ayotaante, tsinampashire ankantya, <sup>25</sup> jentashire ankantya ankaminaayeteri kisaneentairi, aamaa ari ripiyashiretakagairi Pawa, ari riyotakotairo irooperori. <sup>26</sup> Iro ompoñaantyaari roshiyakotantyaariri omaaminthaitari iwirentsi, tema Kamaari imperatariri, ishintsineentziri rantayeteniri ikowashiyetari irirori.

### 3

#### *Tsikaatika inkantaitya risaikaitai paata weyaantapaakyaawone kiteesheri*

<sup>1</sup> Ontzimatyte piyote, paata weyaantapaakyaawone kiteesheri antawoite ompomeentsitzimotai. <sup>2</sup> Jiroka inkantayetaiya atziripaini: Ineshironkakitya apaniroini, rosheñaashiwaityaari iyorikite, ishamewaite, thainkantzinkari rinatyte, kaweyawaitanteneri rinatyte, piyatha roweri ipaapate, te riyotziro riwetharyaanetya, thainkatasorentsitaneri rinatyte, <sup>3</sup> eero retakonetanta, eero ikowanetzi impeyakowaitante, thaiyakotantane rinatyte, eero romaantakaawo ikowashiwaitari, owatsinaanteneri rinatyte, inkisaneentero kameethayetatsiri, <sup>4</sup> pithokashitanteneri rinatyte, eero iñaakoneta, asagaawairentzi rinatyte, iro inkowaperoteri ikowashiyetari awisanakero ikowakaawetariri Pawa, <sup>5</sup> ari roshiyakotyaarime pinkathatasorentsitaneri, rithainkeri Pawa tzimatsiri ishintsinka. Eerowa pitsipayetari eeroka. <sup>6</sup> Rimatakerowa jirikapaini risaikapankotantzi, ramatawiyetakero tsinanepaini jentashireri, antawoite inkenkithashiryaaakawo onkaariperoshirewaite, awentaayetakariri jirikapaini, iro ayimawaitantakawori okowashirewaitziri iroori. <sup>7</sup> Irootake okowakowatapiintziri iyoperotero, te iyoperotzimaitawo okaatzi irooperotatsiri. <sup>8</sup> Iroowa rantakeri pairani Janes itsipatakari Jambres, te inimoteri rantakeri Moisés, ari roshiyakotakariri jirika atziripaini amatawitanteneri, te inimoshiretziri okaatzi irooperotatsiri. Kaariperoshireri rinaiyini, raminaashiwaitaka okaatzi ikemisantaweta. \* <sup>9</sup> Eeromaita rimatziro, ari riyoyeetairi aminaashiwaitaga okaatzi rantziri, arira roshiyakotakyaari akenkithatakotakeri.

<sup>10</sup> Irooma eeroka, poshiyakotainawo naaka, okaatzi niyotaantziri, tsika nokenakairo, oita nokowiri, oitarika noshiretari, namatsinkawentanta, etakotanteneri ninatzi, kinatanteneri nini, <sup>11</sup> owatsinagaarewo nini, ikemaatsitakaawaitaitakena, oshiyakawo okaatzi awishimotakenari Antioquía-ki, Iconio-ki, eejatzi Listra-ki. Tema osheki ikemaatsitakaaweetakena. Iri kantacha Awinkatharite rontsiparyaaakowentapiintaana. <sup>12</sup> Ari onkantaatyeyyaari, rowatsinayeetairi maawoini rashiyetaari Cristo Jesús kowanaatsiri impinkathatasorentsita. <sup>13</sup> Iriima kaariperori atziripaini amatawitanteneri eeke rimaperotatyeyya, rashiminthatyaawo ramatawitantapiinte, rimatzi itaitaiyaari irirori ramatawiiteri. <sup>14</sup> Irooma eeroka, kisokero powero okaatzi piyotakeri, tsika otzimi pawentaanaari. Tema piyotziro iita yotaakemirori. <sup>15</sup> Tema petanakawo eeni peentsitanake piyotakotairo Tasorentsitsatsiri Osankenarentsi. Ari opoñaari piyotai aritake pawisakoshiretai arika pawentagaiyaari Cristo Jesús. <sup>16</sup> Tema maawoini Osankenarentsipero, iri Pawa tasonkashiryaaakantakerori rosankenayee-tantakawori. Iro riyotaantantaityaari, iro ishintsineentantaityaari inkaminaantaite, iro rotampatzikatantaityaari, iro iñaantaityaawori inkameethashireete. <sup>17</sup> Ari iñagairo ikaatzira rashitaari Pawa riyoperotairo rantero maawoini kameethari.

### 4

#### *Pinkenkithatakotairo ñaantsi*

\* **3:8** Ikenkithashiryaaakoitziri “Janes itsipatakari Jambres”, sheripiyari rinaiyini, Egipto-satzi rinatzi. Tema pairani Moisés rontsiparyaaakowentantaariri isheninkapaini Israel-iite, jirika sheripiyariite ikowake roshiyakotyaari Moisés, riraantsitakairo ñaa, roñaagantake eejatzi osheki mashero.

<sup>1</sup>Jiroka okaatzi noshintsineentemiri pantero. Riyotzi Pawa nokantzimiri, riyotzitawo eejatzi Awinkatharite Jesucristo, yakowentairine maawoini añaaayetatsiri, ari ikantairi kamayetaintsiri eejatzi. Tema irootaintsi inkoñatai awinkatharitetaiyaari. <sup>2</sup>Pinkeme nonkantemi: Okowatya piwetsikya onkene pinkenkithatakotairo riñaane, te apatziro pinkenkithatakotairo arika onkameethatzimotemi, tema ontzimatyepimatero eejatzi arika pinkoweenkatakote. Arika piyotaante, ontzimatyepotampatzikatante, pishintsineentante pinkaminaante, piñaashintsitante. Kyaaryoowa pithaakyaawentzirokari arika pantanairo jiroka. <sup>3</sup>Tema paata, eero ikowaitai inkemisantaitero tampatzikari okaatzi piyotaantayetziri iroñaaka, tema impiyotapaakya itsipa yotairine, ari rami-naashiwaityaari inkantaite: “Kameethatatsi rantaitero ikowashitaitari.” <sup>4</sup>Iroowa ompoñaantyaari ripiyashitaitero inkemisantairo ikenkithashiryaayetari, ripakaanakero ikemisantziro irooperotatsiri. <sup>5</sup>Iroowa eeroka, ñaakotane pinkantya, pinkisashityaawo awishimotemine poiwawaayetzirowa Kameethari Ñaantsi, ontzimatyepimonkaatairo maawoini onkaate pantainiriri Awinkatharite.

<sup>6</sup>Tema naaka, aamaa irootaintsi nompeyaiya, noshiyakotaiyaawo risakoitapiintziro riraitziri arika ritagaiteniri Pawa, sakotzimatakaga riraitziri. <sup>7</sup>Kyaaryooshire nokantapiintaka, noshiyakaakero naawyaakityeerome antawoite nomankiyantapiintaga. Oshiyawaitakawo eejatzi ari nanaakotanteme nareetya tsika iweyaa nishiye. <sup>8</sup>Irootake oshiyantakawori iriime Awinkatharite oyaaneroneme amanthairentsi impairiri tampatzikashiretaintsiri. Tema Tampatzikashireri rinatzi irirori Awinkatharite, iri yotantapaatsine kyaaryooperorika itampatzikashireetzi, aripaite impainawo nashi naaka. Te apatziro naaka, ari inkantayetairi eejatzi inkaate kaari samaneentachane roy-aakoneentairi ripiyai.

### *Apatziro ikantaitziri Timoteo*

<sup>9</sup>Nokowaperotake pithotyaakotero tsika pinkantya pipokantyaari nisaikira naaka. <sup>10</sup>Tema rookawentanakena Demas, okaimashiretairi irirori isaawikisato. Jatake Tesalónica-ki. Iriima Crescente ikenakero Galacia-ki. Ari ikantakari Tito ikenake irirori Dalmacia-ki. <sup>11</sup>Apatziro Lucas iri saikanaintsi itsipatana jaka. Irootake nokowantari pipoke eeroka pintsipatyaari Marcos, aritake rimatakero irirori ramitakotena. <sup>12</sup>Tema notyaantakeri Tíquico janta Efeso-ki. <sup>13</sup>Arika pipokanake eeroka, pamainawo nowewiryaaakowo nookanakeri pairani janta Troas-ki isaikira ipanko Carpo. Nokowi pamainawo eejatzi maawoini nosankenatanewo saikatsiri janta. <sup>14</sup>Jirikaganki Alejandro, kotsiroimpeki oomerenchaapiintakenari, rowasanketaatyeerira Awinkatharite. <sup>15</sup>Irijatzi paamayaari eeroka, tema te inimotziri nokenkithatakoyetakeri, osheki ikisaneentakotakenawo. <sup>16</sup>Tema owakera ragaitanakenaganki naaka risaikira pinkathar-entsi nonthawetakotero okaatzi ikantakoitakenari, tekaatsi tsipatanakenane, rithonka rishiyapithatanakena. Tera nokowaatsikaitzi naaka rowasankewentaiteri jiroka. <sup>17</sup>Tema itsipashiretakena Nowinkatharite, iriitake ñaaperoshiretakaakenari. Iro nimatan-takawori nokenkithatakairi maawoini, iro opoñaantari ikemawaantetantakenari eejatzi kaari asheninkata. Irootake kaari rookaitantana manitzimooki rowena. <sup>18</sup>Iriitake Awinkatharite kempoyaawentakenari kaari rowashironkaitantana, eeke riyaatakaaty-eero irojatzi nareetantaiyaari ipinkathariwentantzira Inkitesatzi. Ari rashi rowaitaty-eero irirori impinkathayeetairi. Ari onkantaitaatyeeyaani.

### *Weyaantapaakawori ritasonkawentantaitzi eejatzi wethataantsi*

<sup>19</sup>Nokowi piwethatenari Prisca eejatzi Aquila, ari pinkantakeri Onesíforo, eejatzi ikaatzi saikawankoyetziriri. <sup>20</sup>Iriima Erasto, ari risaikapaake irirori Corinto-ki. Iri-ima Tróximo, naaka ookanakeriri Mileto-ki, imantsiyawaitapaakitzi. <sup>21</sup>Ontzimatyepinthaakyaate pareetantyaari nisaikira naaka tekera onkyaawontsitana. Maawoini

akantayetairi jaka “iyekiite”, riwethatzimi. Jirika ikaatzi wethatzimiri: Eubulo, Pudente, Lino, eejatzi Claudia.

<sup>22</sup> Nokowake risaikashiretantaimi Awinkatharite Jesucristo, ineshironkatanewo rowaimi. Ari onkantaitaatyeeyaani.

## ROSANKENARE PABLO ROTYAANTZINIRI TITO

### *Wethataantsi*

<sup>1</sup> Naakatake Pablo otyaantzimirori jiroka, rimperatanewo Pawa ninatzi. Naaka Rotyaantaperotane Jesucristo ompoñaantyaari nonkemisantakaantaiyaariri riyoyaayetairi Pawa, onkene riyotairo irooperotatsiri impinkathatasorentsitauro. <sup>2</sup> Ari riyoyetairi iriroripaini inkantaitatyeero rañaayetai. Irootake ikashaakaantakeri pairani Pawa tekera riwetsikeroota kipatsi. Te ramatawitantanziti Pawa. <sup>3</sup> Okanta imonkaapaitetaka, roñaagantaga Pawa Owawisaakotantaneri. Iriitake kantakaawori inkenkithatakoyeetauro riñaane. Rimatakena eejatzi naaka, rotyaantakena nonkenkithatakaante. <sup>4</sup> Eeroka Tito notyaantzini nosankenare. Nokemetakagaimo eerokame notomi, atsipatawakaga akemisantai. Onkamintha ineshironkataimi Ashitairi Pawa eejatzi Awinkatharite Jesucristo, Owawisaakotantaneri, onkamintha retakotaimi, piñagairo pisaikai kameetha.

### *Rantayeteri itzinkamipaini eejatzi jewaripaini*

<sup>5</sup> Iro nookantanakemiri Creta-ki potampatzikatantayete, piyoye itzinkamipaini jewaterine kemisantanaatsiri, iroowa nonintakaakemiri. <sup>6</sup> Inkaate jewayetatsine ontzimatye inkameethashirete, eero itzimawaitzi iita kenkithatakowaitashityaarine, kinatane rowero iina, kemisanta inkantya rowaiyanepaini itzimikari kantakowaiterine piyathari rinatzi, ñaathawaitantaneri rinatzi. <sup>7</sup> Tema Pawa rantawaitziniri jewatziriri kemisantanaatsiri, ontzimatye raamaawentya itzimikari kantakoterine shameyantzi rinatzi, kishinkari rinatzi, shinkiyantzi rinatzi, antantzinkari, oshekyiiriri iyorikite raapithatantziri. <sup>8</sup> Ontzimatye roimaantanete ipankoki, rantapiintairo kameethari, kameetha inkenkithashireeya, tampatzikashire inkantya, pinkathatasorentsitantaneri, iñaakotanetya, <sup>9</sup> kyaaryooshireri inkantya roshiretyaawo ñaantsi riyotagaitakeriri, inkene rimatanairo irirori riyotaanero kyaaryooperori, inkene eejatzi rimonkatziyaari kaari yotaanterone tampatzikari. <sup>10</sup> Tema osheki kowatsiri riñaanawentawakaashiwaityaawo, riñaawaitashiwaitya, ramatawitante. Iri antayetakerori jiroka, jitashiwaitachari “Tomeshaaniri”. <sup>11</sup> Ontzimatye pipakaakayeri eeroka riyotaantayetziri, tema osheki rikompitakaaka atziripaini ikaatzira risaikawankotawakaiyani. Riyotaantashitawo jirikapaini kaari irooperotatsiri, apatziro ikowashimatsita raantyaawo koriki. <sup>12</sup> Tema eenitatsi pairani Cretasatzi kamantantaneritaintsiri, ikantake: “Maawoini Creta-satzi, thairi ninayetzi, kaariperori, perantziite, osomiyawairentzi.” <sup>13</sup> Imaperotatya jiroka ikantakeri. Iroowa pishintsineentantyaariri eeroka antawoite, inkene inkemisantaaitero tampatzikari. <sup>14</sup> Iro ompoñaantyaari ripakagairo ikemisantziro inkenkithashiryaaawetari Judá-ite, tema ishintsineentantakari jirikapaini ripakagaitero irooperori. <sup>15</sup> Irootake akantapiintziri: Apaani kiteshiretaintsiri, tekaatsi iitya owariperoshireterine onkantawetakya eerorika ipinkawaitzi. Iriima thainkashireri, itzimi kaariperoshiretatsiri, tekaatsi iitya kiteshiretakairine onkantawetakya impinkawaiwetya. Tema owariperoshirewaitaka apaniroini. <sup>16</sup> Roshiyakaatziro riyotakotairi Pawa. Iro kantacha, okaatzi rantayetzi, iro ooñaawontzirori te riyotakotairi, tema Pawa osheki ipinkimatataikeri jirika. Tema ripiyathatapiintakari eejatzi jirika, tekachaatsikaini kameethari ranteri.

## 2

### *Riyotaantaitziro Kameethari Ñaantsi*

<sup>1</sup> Irooma eeroka, okowatya piyotaantairo okaatzi tampatzikatatsiri, jiroka okantakota: <sup>2</sup> Kempoyaaawaitane inkantaiya itzinkamipaini, impinkathatakaantya,



inkenkishiretakotero kameethaini rantayeteri, rithotyero inkemisantai, retakotantai, inkisashiwainetaiya. <sup>3</sup> Ari onkanyaari eejatzi tsinane antawoite, ompinkathatasorentsitantai, eero okenkithatakotantashiwaita, eero oshinkitawaita. Ontzimatyeyotaantayetairo okaatzi kameethayetsiri, <sup>4</sup> onkene ominthashiretakaayetaiyaawo mainawopaini aakameethatairi oime, eejatzi onkanteri owaiyanepaini, <sup>5</sup> onkenkishiretakotairo kameethaini antayeteri, kiteshireri onkanya, antawairyaanto, pinkatha oweri oimepaini. Arika imayetanairo jiroka, eero rithainkawaitaitziro riñaane Pawa. <sup>6</sup> Ari inkantayetaiyaari eejatzi mainaripaini, ontzimatyey inkenshishiretakoyetaiyaawo kameethaini rantayeteri. <sup>7</sup> Irooma eero, pinkenshishiretya piyotaantairo tampatzikari, iro piñaantyaawori impinkathawentaitemiro pantayetakeri, ari roshiyakoitaimiro. <sup>8</sup> Ari onkanya eero itzimanta kishimatantemirone pikantayetziri, kaaniwenta inkanya inkaate kenkishashiryaawaiwetachane inkantakowaitashitemime. <sup>9</sup> Ontzimatyepishintsineentairi imperataarewo eero ripiyathawaitari imperatariri, ontzimatyekowairo raakameethaperotairi, eero riñaanaminthatziri arika rimperatyaari, <sup>10</sup> eero ikoshineentzi eepichokiini, ontzimatyeroñaagantero kameethatatsi rameentaityaari. Iroowa iñagaitantyaawori owana okameethaperotzi riyotaantaitziro riñaane Owawisaakotairi Pawa.

<sup>11</sup> Tema Pawa roñaagayetakairo osheki ineshironkayetai, iriitake materone rowawisaakoshiretairi maawoini atziripaini. <sup>12</sup> Iriitake yotakagairori apakaantaawori athainkatasorentsiwaitzi, apakaantaawori eejatzi okaatzi añaamatashiyetari. Kempoyaawaitane ankanya iroñaaka, tampatzikashireri ane, ampinkathatasorentsitantai, <sup>13</sup> aminawooki owairi oyaakoneentane. Tema irootaintsi inkoñaatai Jesucristo, iriitake amairone rowaneenkawo Owawisaakotairi, Pawa. <sup>14</sup> Iriitake Jesucristo shinetashitainchari apaniroini rowamaiteri. Tema ikowatzi ripinawentairo okaatzira akaariperoshirewaitzi. Iro ikowairi inkiteshishiretakaayeetai, ompoñaantyaari rashiyetai irirori, ayimaneenta ankanya antayetairo kameethari.

<sup>15</sup> Irooyetake jiroka, piyotaantayetairi. Pishintsineentantero. Iro pishintsithatantyaari. Eerokatake rowaitake pithotyakaantero jiroka, ontzimatyerantayeetero onkaate pinkantanteri.

### 3

#### *Ineshironkare owameethashiretairi*

<sup>1</sup> Ontzimatyepinkenkishiretakairi janta kemisantzinkaripaini ipinkathayetairi pitzinkamitari pinampiki, ari ikantairiri pinkatharipaini. Eero ripiyathawaineta. Ayimaneenta inkantayetya rantayetanairo kameethari. <sup>2</sup> Eero ikishimatanaairi itsipa, eero riñaanaminthatantashiwaita. Etakotantaneri inkanya, tsinampashire rinatyeejatzi. <sup>3</sup> Pairani tzimatsi akantayeta aakapaini, amasantzishirewaitzi, apiyathawaita, tzipinashireri anayetake, antayetziro akowashitapiintari, okaatzi anintakaashiyetari, owariperotziriri itsipa asheninka, añaamatakoyetantawo oiyetarika, amanintashiretantzi, akisaneentantzi. <sup>4</sup> Okanta imatakaganki ineshironkatai Owawisaakotairi Pawa, retakotaari maawoini atziripaini, <sup>5</sup> ari rowawisaakoshireyetairi. Iro kantacha eenitatisira oita rantantakawori, te aaka antashityaawone apatziro akameethashiretai. Tema Pawa neshironkamatsitakairi irirori. Roshiyakaakero iri kiwaineme, oshiyawaitaawo owakerame intzimakaayetai Tasorenkantsi. <sup>6</sup> Tema okaatzi rantzimotakairi Owawisaakotairi Jesucristo, iriitake Pawa kantakaawori, rotyaantakairi Tasorenkantsi itsipashireperoyetai oshiyawaitanakawo risaiperotantairime. <sup>7</sup> Iro rantantakawori jiroka onkene añaayetero ikashaakagaitakairi, ari anewiyataawo iroñaaka ashi owaatyero añaayetai. Ari okanta, irootake roshiyakaantairi iroñaaka kameethashireri anatzi, tema neshironkatantaneri rinatzi irirori.

<sup>8</sup> Imaperotatyaaga okaatzi nokantakemiri. Irootake nokowantari piyotaayetairi ikaatzi awentaanaariri Pawa piyotakotanairo eeroka okowaperotatya jiroka, inkene rantapiintayeetairo kameethayetatsiri. Imaperotatyaaga okameethatake jiroka, osheki inintagaityaawo. <sup>9</sup> Irooma arika riñaanawentawakaashiwaityaawo okantakota itzimantayetakari pairani etakaantaworiite, eero pimatztawo eeroka posatekasatekawaitya, tekaatsi oitya, aminagaantsi inatzi. Ari pinkantyaari eejatzi arika riñaanawentawakaityaawo tsika okantakota Inintakaantaitanewo. <sup>10</sup> Intzimerika owashiñeerone riyotaantero irooperori ñaantsi okaatzi niyotaantakeri pairani, iro ompoñaanntyaari ripakaakairi oshirewetanainchari, pinkaminaathateri. Eekerorika riyataakaatyero, papiiteri pinkaminayeri. Eekerorika riyataakaatyero eerowa pishinetairi riyotaantai. <sup>11</sup> Tema riyotaitakeri jirika ripiyaaty, ikaariperoshirewaitaatzi. Apanirowni riyakowentawaita.

### *Ikantaitziri Tito*

<sup>12</sup> Notyaantatyemiri Artemas. Eerorika notyaantzimiri irirori, aamaaka iri notyaantemi Tíquico. Arika rareetakya pisaikira eeroka, nokowi pipoke eeroka pitonkyotena Nicópolis-ki. Ari nokowi naaka nonkyaawontsitakote janta. <sup>13</sup> Iriima Zenas yotakoperotzirori ikantakaantaitane, eejatzi Apolos, arika ripokimatanake iriroripaini, pim-pawakeri paawiiri eeroka, inkashaakayaari ripokanakerika. <sup>14</sup> Tema maawoini aakapaini, eero asaikashiwaitanta, ontzimatye aakameethatairi koityaawairentzi.

### *Weyaantawori wethataantsi eejatzi tasonkawentaantsi*

<sup>15</sup> Maawoini riwethatzimi tsipayetakenari jaka. Nokowi eejatzi naaka piwethatenari oshireyetchari janta ikaatzi etakotanari. ¡Inkamintha ineshironkayetaimi maawoini eerokapaini janta! Ari onkantaitaatyeyyaani.

## ROSANKENARE PABLO ROTYAANTZINIRI FILEMÓN

### *Wethataantsi*

<sup>1</sup> Naaka Pablo osankenatzimirori jiroka. Tema romonkyaawentaitakenari naaka Jesucristo jaka. Iri notsipatakari iyeki Timoteo nosankenatzimiro jiroka. Eerokatake notyaantzini, Filemón, netakotanewo nowimi, eeroka amitakotapiintanari. <sup>2</sup> Iro nosankenatzini Apia noshiyakaakeri “choini”, nosankenatziniri eejatzi Arquipo tsi-patakairi añashintsietaga. Irijatzi nosankenatzini kemisantzinkaripaini ikaatzi apatotapiintachari pipankoki. <sup>3</sup> Onkamintha ineshironkataimi Ashitairi Pawa, eejatzi Awinkatharite Jesucristo, kameetha risaikakaayetaimi.

### *Retakonka eejatzi roshirenka Filemón*

<sup>4</sup> Arika namanakoyetemi, antawoite niwetharyaari Pawa. <sup>5</sup> Tema nokemakotakemi etakotanewo pinatzi, kinatane powiri Awinkatharite Jesús, ari pikantziriri eejatzi ikaatzi rashiyetaari irirori. <sup>6</sup> Iro namanakotantzimiri onkene paapatziyawakaanaiya eerokapaini pikemisantanaira, pinkemathatanairo kameetha rantakaashiretaimiri Cristo Jesús pikemisantairira. <sup>7</sup> Iyekí, etako powanairi eeroka kemisantanaatsiri, iroowa iñaantakawori iriroripaini ithaamentaperota. Irojatzzi oimoshirekanari eejatzi naaka, thaamenta nokanta.

### *Pablo ikantakowentziri Onésimo*

<sup>8</sup> Niyotzi, naaka rowake Cristo nantakaimiro onkaate pantairi. <sup>9</sup> Apatziro nonkowakotemi eepichokiini, tema niyotake tsika pikanta petakotanta. Pablo ninatzi naaka, antarikitapaakena, romonkyaawentaitakenari Jesucristo. <sup>10</sup> Jirika Onésimo nokowake paakameethamatsitairi. Iriitake noshiyakaakeri naaka iriime notomi, tema naakatake oshiretakaakari Cristo romonkyagaitakenaga. \* <sup>11</sup> Tema te ompantawetyaari jirika, irooma iroñaaka ari impantzimotaimi eeroka, ari inkemetzimotaina naaka eejatzi. <sup>12</sup> Tema noipiyaimiri Onésimo, netakoneentari. <sup>13</sup> Osheki nokowawetaka intsipatename. Iri poyaatemineme eeroka ramitakoyetena jaka romonkyagaitakenaga okantakaantziro nokenkithatakotziro Kameethari Ñaantsi. <sup>14</sup> Iro kameethatatsi, te nokemi pinkantena eeroka oita pikowiri, te nokowi naaka notsiwakakaimiro pantero jiroka, iro nokowake eerokatakera kantatsine oitarika pikowiri panteri.

<sup>15</sup> Aamaashitya iro rishinetantaitakariri Onésimo rishiyapithatantakemiri pairani, ari onkantya inkemisantantaiyaari Cristo ripiyantaiyaari intsipatapaimi. <sup>16</sup> Iro kantacha, te apatziro poshiyakagairi pimperatanewo pikantawetari pairani, poshiyakagairi iriime pirentzi petakoperotanewo. Eejatzi nonkantairi naaka. Eeroka maperotairone petakotaiyaari pimperatari koñaawoini, irijatzi rimperatari eejatzi Awinkatharite. <sup>17</sup> Tema poshiyakaakena eeroka, naaka pitsipatanewo, ari pinkantairiri eejatzi Onésimo paakameethateri, poshiyakayeri naakame paakameethatzi. <sup>18</sup> Tzimatsirika iyenakaashitane kaari rinimotakaimi, rireewetzimirika eejatzi, poshiyakayenawo naakame ireewetemine. <sup>19</sup> Naaka, Pablo osankenatzirori jiroka. Imaperotatya, aritake nipinataimiro rireewetzimiri. Iro kantacha eerokaga ireeweperotakenari naaka nowawisaakoshiretaimira. <sup>20</sup> Ari okanta iyekí. Nokowataike iriira kantakayaawone Awinkatharite paakameethatairi Onésimo, tema iro kimoshiretakagaanari. † <sup>21</sup> Iro nosankenatantzimirori jiroka

\* **1:10** Jiroka wairontsi Onésimo riñaaneki iriroripaini oshiyawaitawo akantziri aaka: Pantariri. † **1:20** Kantakotachari jaka “paakameethatairi Onésimo,” ikantatzi: Nokowataike pipantzimotaina eeroka. Tema riñaaneki iriroripaini iwairo inatzi Onésimo jiroka Pantariri.

niyotzi ari pimatakenawo, tema pimatapiintakerowa ari panaakaanakero okaatzi nokowakotakemiri. <sup>22</sup> Nokowake eejatzi, paamagaina niyaatashitemi pisaikira eeroka, ari nimayimotapaakemi. Iroorika pinkowakotanteri pamanakotena, ari rishinetakero Pawa imatya.

*Weyaantawori riwethatanta eejatzi ritasonkawentantzi*

<sup>23</sup> Riwethatzimi Epafra, notsipatakari jaka romonkyaawentaitanarira Cristo Jesús. <sup>24</sup> Riwethatzimi eejatzi Marcos, Aristarco, Demas, Lucas, iriitake notsipatapiintakari jaka. <sup>25</sup> ¡Onkamintha ineshironkataimi Awinkatharite Jesucristo! Ari onkantaitaty-eeyaani.

## ROSANKENAITZINIRI HEBER-THATORI

### *Pawa rotyaantakeri Itomi inkenkithatakotairi*

<sup>1</sup> Pairani, inkowerika Pawa riyotakayeri acharineete oitarika, iriira Kamantantaneri amerone ñaantsi. Osheki rapiipiintakero Pawa, rantakaayetakeriri Kamantantaneriite. <sup>2</sup> Iro kantacha rotyaantakeri Itomi irirori inkenkithatakotairi. Tema iriitake Itomi riwetsikakaake pairani jiroka kipatsi, iriitake rashitakaayeta okaatzi riwetsikayetakeri. <sup>3</sup> Iri Itomi roshiyakaakeri iriime rowaneenkatanewo, shipakiryaa ikanta. Ari roshiyawaitari jimpe ikanta Ashitariri. Tema shintsinkantsi riñaanetakari, iro kaari inashiyetanta okaatzi riwetsikayetakeri jaka kipatsiki. Rimonkaatapaintzirowa pairani inkiteshiretakaantai, jatai inkiteki, saikapai rakoperoki Ashitariri itsipatapaari ipinkathariwentantapai. <sup>4</sup> Arira retanakawo rawisayetziri imaninkarite Pawa, antawoite ririiperotakagaitairi irirori.

### *Iriira Itomi anaayetairiri maninkariite*

<sup>5</sup> Tema Pawa kantawairi:

Notomi nowimi eeroka.

Naakatake pipaapateta iroñaaka.

Ikantawairi eejatzi:

Naakatake ashitzimiri.

Eerokatake notominta.

Tema Pawa tekaatsi apaani maninkari riñaanateri oshiyaarine jirika. <sup>6</sup> Paata arika rapiitairo rotyaantairi kipatsiki retakari itomintari, inkantaite:

Inthaamentawaiyaari maawoini imaninkarite Pawa.

<sup>7</sup> Jiroka inkenkithakaitziri maninkariite, ikantaitzi:

Iriira matakairine imaninkarite roshiyakotyaawo tampyainka.

Iriira matakairine rotyaantaneete roshiyakotyaawo paampari.

<sup>8</sup> Jiroka riñaawaitziri Itomi irirori, ikantzi:

Pawa, eeroka kantaitaachane pimpinkathariwentantai.

Ari poshiyakotaiyaari pinkatharipaini otzimimotziri rinchakiire rinantari ipinkathariwentantzi.

Iro kantacha eeroka matairone pintampatzikashiretai arika pimpinkathariwentantai.

<sup>9</sup> Eeroka kowirori kameethari, irooma kaariperori owanaa owatsimaimi.

Iroowa risaipatziitotantaimiri Pawa, pimpinkatharitantaiyaari. Iriitake piwawane nintakaakemirori.

Risaitantakemiri oyeenka pankirentsi ari pinkimoshiretai temi pawisayetairi pitsipatapiintawetari.

<sup>10</sup> Jiroka otsipa inkenkithakaitziriri Itomi, ikantaitake:

Pinkathari, owakera etantanakari pairani, eerokatake wetsikakerori kipatsi.

Eerokatake wetsikitakawori inkite.

<sup>11</sup> Okaatzira piwetsikakeri, aritake ithonkaiya paata, irooma eeroka ari pashi powaatyeero.

Oshiyaiyaawo piwetsikanewo paisatomawori kithaarentsi.

<sup>12</sup> Tema arika ompaisatomawotake piithaare, pankowimawotziro, paminai otsipa owakerari pinkithaatai yaari.

Ari pinkantairo paata eeroka piwetsikanewo kipatsi eejatzi inkite.

Irooma eeroka ari pashi powaatyeero eero pipashiniwaitzi.

Eero pithonkitaawo eejatzi.

<sup>13</sup> Ikenkithakaitakeri eejatzi, ikantaitzi:



Pisaikapai nakoperoriki, ampinkathariwentante, irojatzi paata nowasanketan-taiyaariri kisaneentakemiri, aripaite pimakoryaayitzitantaiyaari. Tema tekaatsi maninkari inkenkithawaitakairi Pawa roshiyakairi jirika. <sup>14</sup> Tema maawoini maninkariite, apatziro rotyaantaitziri irirori ramitakoyetairi atziripaini ikaatziz awisakoshireyetaatsine.

## 2

### *Antawoite owawisaakoshiretaantsi*

<sup>1</sup> Ontzimatyē ankemisantero okaatziz riyotagaitakairi, eero apakaantaawo. <sup>2</sup> Tekaaitsi materone rowashiñaagairo ikamantantakeri pairani maninkariite, rotyaantantaitakariri. Tema maawoini kaari owayempitayaaawone inkemisantairo, rowasanketaiteri ripiyathatakawowa. <sup>3</sup> Tema aaka rimaperoitai rowasankeetai, eerorika akemisantziro ikenkithatakoitziro antawoite awisakoshiretaantsi, retapaintari Awinkatharite Jesús ikenkithatakotapaintziro. Tema irootake ikamantayetairi aakapaini ikaatzizira kemaperotakerori. <sup>4</sup> Iriira Pawa yotakaayetakairori imaperokitayā okaatziz ikamantaitakairi, tema rimatakaantakero ritasonkawentantaitzi, roñaagakaantakero kaari iñagaitapiintzi, Tasorenkantsi antakaantakerori jiroka, arira antakari ikowiri Pawa.

### *Matakerori rowawisaakoshiretantzi*

<sup>5</sup> Okaatzizira nokenkithatakotakemiri, te iri maninkariite rimatakayeri Pawa impinkathariwentairo jimpe risaikayeetai paata. <sup>6</sup> Apa atziripaini matairone. Tema ikantaitake pairani:

¿Iriiperoma atziripaini pikenkithashiretakotantariri?

¿Oitaka pikowantari pineshironkayetairi jirika?

<sup>7</sup> Eepichoki iñiira iroñaaka atziripaini te ranaantzi, iriira maninkariite anaakeriri.

Iro kantacha, irootaintsi pamanthaitairi impinkatharentsitai, ontzimimotairi rowaneenkawo.

Irijatziz anagairone maawoini piwetsikanewo.

<sup>8</sup> Poshiyaiyaari ikanta pairani makoryaayitzitantariri iisaneentanewo, rimperayetaiyaari maawoini.

Ari inkantakaayetaiyaari Pawa atziripaini, eerowa itzimapai apaani anagairine. Temaita iñaayetziro iroñaaka atziripaini jiroka. <sup>9</sup> Eenitzimaitacha apaani atziri rotyaantaitakeri, irijatziz ñaapaintziro eepichokiini te rawisantzi, iri maninkariite anaakeriri. Iriira nokenkithatakotzi Jesús. Tema iri ñaapaintziro ikemaatsiwaita irojatzi ikamantakari. Okanta ramanthaitaitakeri ipinkathaitantaariri, otzimimotairi rowaneenkawo. Irootake ikamawentantayetakairi maawoini, tema antawoite ineshironkayetai Pawa.

<sup>10</sup> Tampatzika okanta tsika ikenakaakero Pawa, rishinetakeri Jesús inkemaatsiwaitya, ari rithonkakaakeri onkaate ranteri. Tema Jirika, ashiyetairi maawoini, iri kantakaantziro itzimantaari maawoini, iriira kemaatsitakowentairi onkene rowawisaakoshiretai, intsipatantaiyaariri maawoini itomipaini janta rowaneenkawoki. <sup>11</sup> Jirokaga okantakota, roshiyakagai Jesús irirentzi, tema ari akaatziziri apapatetari Pawa. Ipaapatetari irirori tasorentsishiretakaantatsiri, apapatetari eejatziz aakapaini itasorentsishiretakaayetaira Jesús. <sup>12</sup> Iro ikantantakari pairani:

Nonkenkithatakotaimi risaikayetzizira nirentziyetaari,

Tsikarika rapatotapiintayeta, ari nonthaamentaimi nomampagaiyani.

<sup>13</sup> Ikantake eejatziz:

Nawentaanewo nowairi Pawa.

Ikantake eejatziz:

Jirika Naaka, notsipayetaari itomipaini Pawa ikaatziz ikempoyaakaayetaanari.

<sup>14</sup> Akemetaga aakapaini atziritzizira, otzimi awatha, otzimi araa. Ari ikantakari eejatziz Jesús irirori, iroowa ikamantakari. Aripaite roitsinampaakeri Kamaari.

Tema otzimimowetatyaaari Kamaari ishintsinka ikoshekantakariri kaamaneriite. <sup>15</sup> Ari ikenakaakero Cristo rontsiparyaakowentantairi athaawantayetaawowa kaamanetaantsi, oshiyawaitakawo atziritatyeeme kaamanetaantsi iro noshikaineme. <sup>16</sup> Imaperotatya, te iri maninkariite ripokashitake Cristo ineshironkayetairi. Aakaga ripokashitake, icharineyetaira Abraham-ni. <sup>17</sup> Irootake ratziritantakariri roshiyayetai aaka irirentziyetai, ari rimonkaatakero ikowawetapiintakariri Imperatasorentsiperori rimonkaaterome ketziroini. Antawo ineshironkatantairi irirori, ikyaryootake rimonkaatantakawori, iriira kantakaantairori ipeyakotantairori Pawa akaariperoshirewetakaga. <sup>18</sup> Tema ratziritakera Jesús ikemaatsitakagaitakari, iñaamashiretakaaweetakari. Iroowa rimatantawori ineshironkatai aakaite iñaamashiretakaitairowa kaariperori.

### 3

#### *Iriira Jesús anairiri Moisés-ni*

<sup>1</sup> Iyeekiite oiteshiretaarewo, nonkantaiyemini pikaatzira ikaimashireyetaimi Inkitesatzi: Pinkenkithashiretakotaiyaari Cristo Jesús, iriitake oshiyakariri otyaantaarewo, irijatzi oshiyakariri apaani Imperatasorentsiperori. <sup>2</sup> Roshiyakari otyaantaarewo ikyaryoowentakero okaatzi ikantziriri otyaantziriri. Ari ikantakariri eejatzi Jesús. Roshiyakotakariri Moisés-ni, ikyaryoowentakeniri isheninkapaini rashiyetari Pawa. Tema iitaitakeri isheninkapaini “Inampipanko Pawa”. <sup>3</sup> Iri kantacha Jesús, iriiperori rinatzi, ranairi Moisés-ni, tema iriitake wetsikakeriri pairani. Oshiyawaitakawo ikantaitapiintzi: “Pimpinkathatero nopanko.” Tema kaari pankotsi impinkathaite, iriira impinkathaite ashitawori ipanko. Tema ikaatzi wetsikirori pankotsi iriitake iriiperotatsiri. \* <sup>4</sup> Tema iri ashitawo pankotsi wetsikakerori, ariwaitake ikantaka pairani Pawa riwetsikantakawori maawoini. <sup>5</sup> Ikantaitake: Moisés kyaaryoowentakeriri isheninkapaini iitaitziri “Inampipanko Pawa”. Iri kantacha roshiyamatsitakariri irirori apaani imperataarewo, ikenkithatakoyetairo onkaate awisatsine. <sup>6</sup> Iriima Cristo, iriitake tomintakariri ashitawori pankotsi, irijatzi jewatairi ikaatzi roshiyakagaitairi pankotsi. Aritake antsipataiyyaari aakapaini iitaitziri “Inampipanko Pawa”, arika ankyaaryoowentairi, kisokero owanairi irojatzi weyaanta-paakyaawone kiteesheri.

#### *Rimakoryaamento rashiyetaari Pawa*

<sup>7</sup> Jiroka ikantakeri Tasorenkantsi: Pinkemairi iroñaaka Pawa ikenkithawaitzi, ikantzi: <sup>8</sup> Eero pikisoshirewaitzi. Poshiyarikari pithokashitakenari pairani iñaantayetakena ochempiki. <sup>9</sup> Ari ikowakaawetakena picharineeteni nowasanketerime, iñaantashiretakena naaka, Okantawetaka iñagaiyawetakawoni noneshironkayetakari okaatzi 40 osarentsi. <sup>10</sup> Irootake nokisantanakariri, Nokantanake: Ari ikantapiintatya itzipinashirewaitzi, Te rantapiintziro nokowakairiri. <sup>11</sup> Noyatsimankakiini nokantanake: Eero nareetakagaari nimakoryaamentoki. <sup>12</sup> Iyeekiite, kyaa pipakagairi Pawa, Kañaanetatsiri. Eero pikaariperoshirewaitzi, eero pithainkashirewaitzi. <sup>13</sup> Iro kameethatatsi pominthashiretawakayaani poshreyetaiya. Panteroota iroñaaka eero ramatawitaitantzimi pantayetairo kaariperori, piñiirokari pinkisoshirewaite. <sup>14</sup> Kisokerorika oweri Cristo, irojatzi weyaantapaakyaawone kiteesheri, aritake añagairo intsipayetai. <sup>15</sup> Irootake ikantantaitari:

\* **3:3** Iri Moisés-ni oshiyawori pankotsi, tema irijatzi isheninkapaini Judá-ite iitaitziri “Inampipanko Pawa”.

Pinkemairi iroñaaka ikenkithawaitzi Pawa, ikantzi:  
Eero pikisoshirewaitzi.

Poshiyarikari pithokashitakenari pairani.

<sup>16</sup> ¿Itzimika pithokashitakariri Pawa, ikemawetakawowa riñaane? ¿Kaarima jirikapaini ramayewetakarira Moisés-ni ipoñagaawowa Egipto-ki? <sup>17</sup> ¿Itzimika ikisapiintakeri Pawa okaatzi 40 osarentsi? ¿Kaarima antapiintakerori kaariperori, aperaatainchari janta ochempiki? <sup>18</sup> ¿Itzimika ikenkithatakoitakeri ikantaitake:

Eero nareetakaayetaari nimakoryaamentoki?

¿Kaarima jirikapaini iitaitakeri piyathariite? <sup>19</sup> Ari añiuro kantakaawori kaari rareetaka-gaitantari, tema iro kantakaantzirori te ikemisantaiyini.

## 4

<sup>1</sup> Eenitatsi ikashaakaakairi aakapaini oshiyawaitakawori rareetakagaatyaima rimakoryaamentoki. Irootake pimpinkathatantaiyaariri, otzimikari otzikawakemine, eero pareetanta. \* <sup>2</sup> Tema akemayetairo aakapaini Kameethari Ñaantsi, ari oshiyayetaari acharinene pairani. Iri kantacha jirikapaini, te inintayimaityaawo ikemakotakeri, tema te rawentaashiretawo ikemayewetakari. <sup>3</sup> Irooma aakapaini awentaayetaarira, tema rareetakaayetai rimakoryaamentoki. Jiroka ikenkithatakoitakeri rimakoryaamento, ikantake:

Noyatsimankakiini nokantake:

Eero nareetakaayetaari nimakoryaamentoki.

Tema rithonkakeri pairani Pawa rantawaire riwetsikantakawori kipatsi. <sup>4</sup> Tzimatsi tsika okenkithatakota 7-tapaintsiri kiteesheri, ikantaitzi:

Jiroka kiteesheri 7-tapaintsiri, ari rithonkakeri rantawaire Pawa, rimakoryaake.

<sup>5</sup> Jiroka makoryagaantsi irojatzzi ikenkithatakoitziri, ikantaitzi:

Eero nareetakaayetaari nimakoryaamentoki.

<sup>6</sup> Ari okantari. Irootake intzimantyaari makoryaashireyetaatsine. Iriima itsipaini etayetakawori, te rareeyeta, tema te ikemisantziro ikenkithaweetakanarira Kameethari Ñaantsi. <sup>7</sup> Okanta awisake pairani osheki osarentsi, rapiitairo Pawa ikenkithatakotai otsipa rimakoryaamento, iitairo “iroñaaka”. Irootake rosankenatakotairi David-ni, ikantake pairani:

Pinkemairi “iroñaaka” Pawa ikenkithawaitzi, ikantzi:

Eero pikisoshirewaitzi.

<sup>8</sup> Arika rimatakerome Josué rimakoryaaperotakaayetairime pairani acharineeteni, eero rapiitairime Pawa inkenkithatakotaime otsipa rimakoryaamento. <sup>9</sup> Arira ayotzi eenitatsi oshiyakagainchari rimakoryaamentoperotaiyaari rashiyetaari Pawa. <sup>10</sup> Iro roshiyakaawentakeri pairani Pawa rimakoryaawentakeri rantawaire rithonkakerowa. Tema ari inkantayetai yaari makoryaashireyetaatsiri ithonkaiya rantawaire.

<sup>11</sup> Ontzimaty e ankyaaryooyetai areetantaiyaari amakoryaashireyetai, oshiyarikari piyathayetainchari pairani. <sup>12</sup> Tema riñaane Pawa, owañaantanero inatzi, shintsiñaane okanta. Oshiyawo osataamentotsi apitekeromeni othoyempitzi, te ishenkaakanta itoyerokitante irojatzzi inthomoiki aipathaki. Iro maperotzirori riñaane Pawa oshiyawaitakawo itoshiretatyaima, irootake yotakaantatsiri inkenkithashireetyaari,

\* **4:1** Jiroka rimakoryaamento, tzimayetatsi oshiyakagainchari jaka. Tema pairani rimakoryaawentakeri Pawa riwetsikantakawori kipatsi, roshiyakaakero “rimakoryaamento” jiroka kiteesheri 7-tapaintsiri rimakoryaantakeri. Okanta osamanitake pairani, rishitowayetai Judá-ite janta Egipto-ki, 40 osarentsi ikenawaitake, irojatzzi rareetantaari kipatsiki ikashaakaakeniriri Pawa. Irojatzzi iitaitakeri jiroka kipatsi “rimakoryaamento”. Jirokaga oshiyakagainchari “rimakoryaamento” kemisantzinkaripaini: Eenitatsi kantatsiri: “Iro inkite rimakoryaamento kemisantzinkaripaini.” Itsipa kantatsiri: “Iroowa ‘rimakoryaamento’ rawentaashirenka, rowawisaakoshiretairira Pawa, te okowaatsikaita iñaashintsiyetai ya rawisakoshiretantaiyaari.”

inkowashiryagaiteri eejatzi. <sup>13</sup> Tema ikaatzi riwetsikayetakeri Pawa tekaatsi apaani materone rimanapithatyaari eero iñaantaari. Pawa ari riyotakotairo maawoini antayetakeri, iriitake aminakoyetairone.

*Iri Jesús anairiri Imperatasorentsiperori*

<sup>14</sup> Jirika Jesús, Itomi Pawa, iriitake anairori inkite. Iriitake oshiyakagairi Imperatasorentsiperori. Irootake oisokerotantyaariri awentaashiretaari, tema ikemayeetai akantzi: “Nokemisantairi Jesús.” <sup>15</sup> Tema Jesús roshiyaari Imperatasorentsiperori, irootake ineshironkayetantairi ontzimerika añaantsipookite. Tema pairani irirori, tzi-mawetaka ikowashirewetakari, ari roshiyakotai añaayetzirowa awishimoyetairi aaka-paini. Iro kantacha, te ikaariperotapaintzi eepichokiini. <sup>16</sup> Irootake awentaantyaariri amanaiyaari Jesús oshiyawaitakawo aataashiretaatyeeeme tsika ipinkatharitari. Tema ineshironkayetai, aritake retakoyetai arika ankoityaashirewaite.

**5**

<sup>1</sup> Tema pairani Pawa owakeri atziri iitaitakeri Imperatasorentsiperori. Iriitake kantakowentairine atziripaini kaariperoshiretatsiri. Iri tagairone rashitakagaitariri Pawa. <sup>2</sup> Tema atziri rinatzi jirika Imperatasorentsitaarewo, oshekitzimotziri irirori ñaantsipooki. Irootake riyotantawori ramatsinkawentari tzipinashirewaitatsiri atziripaini ikaatzi pokashitziriri, masontzishireyetatsiri eejatzi. <sup>3</sup> Rimatzitawo irirori ritaawenta okaatzi rashitakaariri Pawa ompoñaantyaari impeyakoteniri ikaariperoshirewaitzira, rimatzitawo rantapiintziniriri atziripaini. <sup>4</sup> Tekaaitsira Imperatasorentsitaarewo jitashitachane apaniroini, Pawaga jitayetakeriri roshiyakaakerira pairani Aarón-ni iitantakariri Imperatasorentsitaarewo.

<sup>5</sup> Ari ikantakariri eejatzi Cristo, te iri jitashitachane apaniroini, roshiyakotari Imperatasorentsitaarewo ompoñaantyaari inthaamentaityaari. Ashitariri matakakeri, ikantziri:

Notomi nowimi eeroka,  
Naakatake pipaapatetanaa iroñaaka.

<sup>6</sup> Ikantakeri eejatzi:

Eeroka kantaitachane pimperatasorentsitaarewote,  
Ari poshiyaiyaari ikantaga pairani Melquisedec.

<sup>7</sup> Tema pairani ratziritapaintzi Cristo, riraaneentaka ramanamanaatari Pawa, ikaimakaimatake shintsiini ramanari Pawa, oshekitzimotziri ishintsinka, ari imatakyaame rowawisaakoterime eero rowamaantaitari. Tema Cristo pinkathatasorentsitane rinake, ikemisantakeri Pawa ikowakotakeriri. \* <sup>8</sup> Ikantawetaka Cristo iriiwetaka Itomi Pawa, ikemaatsitapainta, tema iñaakero jimpe okanta ikemisantaitzi. <sup>9</sup> Okanta rimonkaatakagaitakeri ranteri, ari imatakari rowawisaakoshiretairi maawoni kemisantairine, ari inkantaitaatyeeero rawisakotai. <sup>10</sup> Ari okantakariri, Pawaga Imperatasorentsitakaari, ari oshiyawo jimpe ikanta rimperatasorentsitakaari pairani Melquisedec.

*Ikamantantaitziro arika pipakayero awentaashiretari*

<sup>11</sup> Tzimatsi osheki nokowawetari niyotaimi tsika ikantakota jirika. Iro kantacha owanaa opomeentsita nimatemiro, tema kisoshire pikantayetaka, osamani onkantya pinkemathatantyaawori. <sup>12</sup> Tema osamanitake, noshiyakaaminthaitzi eerokatake yotaantayetanaatsineme. Iro kantacha eeniro okowa iita yotaayetemine eerokapaini, irojatziri rapiiyetaima etayetawori riyotaantaitziro riñaane Pawa. Poshiyawaitakari tsika

\* **5:7** Jiroka ikantakeri Jesús, ramanamanaatakari Pawa, ikantzi: “Ashitanari, pikowakaanaworika, pontsi-paryaakowentena onkaate nonkemaatsityaari. Iro kantacha eero pimatanaawo okaatzi nokowawetakari naaka, iroowa pimateri okaatzi pikowakaakenari eeroka.” Jiroka ikenakaakero Pawa ikemisantakeri Jesús ikowakotakeriri, ikisashitakaakari ikemaatsiyetakari, rishinetakeri inkamimotante rowañagairi eejatzi.

ikanta ithotagaitziri, te ipaitziri kisoni owanawontsi. <sup>13</sup> Ari pikantakari eerokapaini, ariityaakemi eenchaaniki ithotagaitziri, tekera piñaantapiintawoota kameethashiretakaantatsiri. <sup>14</sup> Iriima ikaatzi owayetawori kisoni owanawontsi, ariityaake ikaatzi ñaantapiintawori, te opomeentsitzimotari riyotero oita kameethatatsiri, eejatzi kaariperotatsiri.

## 6

<sup>1</sup> Ontzimaty nuyaatakaairo niyotaaperotemiro otsipa jimpe ikantakota Cristo. Te onkameethate napiipiintemiro okaatzi piyotzitakari eerokapaini. Tema riyotagaitz-itakemiro ripakagaitairowa kaariperori kaamaneshiretakaantatsiri. Riyotagaitz-itakemiro eejatzi rawentaashiretataarira Pawa. <sup>2</sup> Riyotagaitz-itakemiro omitsitsiyaataantsi, otzimikapatziiitotaantsi, rañaakagaitairi kamayetatsiri, rowasankeyeetairi kaariperoshireri. <sup>3</sup> Irootake aatakaantyaawori inashitachari, onkamintha iri kowatsine Pawa. <sup>4</sup> Onkamintha eero aminaashiwaita pikemathawetakari, ritasonkawentakemi, risaikashirewetantakemi Tasorenkantsi, <sup>5</sup> piñaawetakawo okameethatzimotzimi riñaane Pawa, piñaawetakawo eejatzi ishintsinka onkaate roñaagantairi paata. <sup>6</sup> Tema ikaatzi ñaawetakawori jiroka, ripakaanairo eejatzi, eero rimatairo ripiyashiretai rookawentantaiyaawori iyaariperonka. Oshiyawaitakawowa iriitakeme apiitairone inkentakotairi Itomi Pawa, oshiyawaitakawo eejatzi iriime thainkimawaitairine ipiyotaiyanira atziripaini. <sup>7</sup> Oshiyaawo owaantsi irenkaphatzi inkani arika impankiantaityaawo. Iroorika shookanaintsine pankirentsi pinatachari, iri Pawa tasonkawentakeriri pankitakerori. <sup>8</sup> Iroome yoshiitachane ishookanake kitochee, tsitamaishi onkantya, tekaatsi pantyaawone, katsimashire inkantya pankitakerori, ritagaitairowa paata.

<sup>9</sup> Irooma eerokapaini, netakotané, niyotzi naaka eero poshiyakotawo noshiyakaawentakeri, pantanairo kameethari owakeraga rowawisaakoshiretakitakemi. <sup>10</sup> Tema Pawa tampatzikashireri rinatzi, eero ipeyakotaimiro pantayetakeri eerokapaini, petakotaiyaari ikaatzi aakoyetairiri iwairo Irirori, eekero piyaatakaatyero petakotyaari. <sup>11</sup> Iroowa nokowakoyetaimiri, ari pinkantapiintatyeyeya poñaagantairo piriiperoshireyetai, irojatzi imonkaatantaiyaari okaatzi poyaakoshiretaiyarini. <sup>12</sup> Eero piperashirewaita eerokapaini, iro kameethatatsi poshiyakotyaari jatakairori ikemisantanai, kamaitanaawori. Tema iriitake aayetairone ikashaakagaitakairi.

<sup>13</sup> Tema pairani owakera Pawa ikashaakaakeniri Abraham-ni, tekaatsi anairine Pawa raakotakerowa iwairo, iri yoterone imaperotatya rimonkaawainete. Iriira aakotainchhari apaniroini iwairo Pawa, <sup>14</sup> ikantakeri Abraham:

Imapero nitasonkawentemi Naaka,  
Imapero noshekyeemiri Naaka pincharineyetyaari.

<sup>15</sup> Te rathawaawaineta Abraham-ni, amatsinka royaawentaka, iñagairo ikashaakagaitziriri. <sup>16</sup> Tema arika inkowapiinte atziripaini riyote kyaaryooperorika imatya ikashaakagaitziriri, raakotziri iwairo anayiriri, ari riyote imapero rimonkaawaitzi.

<sup>17</sup> Ari oshiyawetakawo okaatzi rantakeri Pawa, raakotaka iwairo irirori ompoñaantyaari riyotero imapero imatantyaari okaatzi ikashaakagaitakeriri. Tekaaitsi kanterone rowashiñagairo ikenkithashiretakari ranteri. <sup>18</sup> Iro otzimantanakari apite kaari rinashitakagaita. Iro ayotantaari te ithaiyaneta Pawa, iroowa thaamentashireperotakagairi awentaashitaarira Irirori, ayotzi ari imonkaataiya oyaakoneentziri. \*

<sup>19</sup> Iroowa oyaakoneentanka roshiyakagaitziri tenari owaatzinkirori antawoite pitotsi

\* **6:18** Tema tzimatsi apite kantakotachari kaari rinashitakagaityaari. Jiroka etawori: “Pawa te ithaiyaneta, aritake imonkaataakya okaatzi ikashaakagaitakeriri.” Jiroka apitetanaintsiri: “Tekaaitsi owashiñeerone raakotaaga apaniroini iwairo Pawa, tema tekaatsi anairine irirori.”



eero amaatanta. Ari oshiyawo oyaakoneentanka, owaatzinkashire owayetai. Irootake kantakaawori oshiyakotantyaariri kyaatsiri rotantotaitantawowa tontamawotatsiri. † <sup>20</sup> Ari anewiyataawo aakapaini kantacha ankyaayetai oshiyakawori jiroka, arika oyaatakotanairi Jesús roshiyakagaitakeri kyagaintsiri janta. Tema iri Jesús roshiyakagaitakeri pairani Melquisedec. Iriitake Jesús Imperatasorentsiperori iroñaaka, tema rashi rowatyeero irirori.

## 7

### *Rimperatasorentsinka Melquisedec*

<sup>1</sup> Tema Melquisedec, iriira pinkathariwentantaintsiri Salem-ki, rimperatasorentsire rinatzi Jenokisatzi Pawa. Iriitake aawairiri pairani Abraham-ni ripiyaawowa raper-aatakerira itsipa pinkatharipaini romanatziri, ritasonkawentawairi. \* <sup>2</sup> Irijatzi ipake pairani Abraham-ni owaagawontsi okaatzi raapithatantakeri romanatantzira. Tema Melquisedec, roshiyakagaitziro iwairo: “Pinkathari kameethaini”. Otsipa roshiyakagaitziro: “Pinkathari saikakaantatsiri kameethaini”. Tema jiroka jitachari “Salem”, wairontsi ini ikantaitziro “saikaantsi kameetha”. † <sup>3</sup> Te riyotzitaiziri iwairo ipaapatetari, te riyotaitzi eejatzi iitarika charinetanariri. Oshiyawaitakawo te ontzimeme tsikarika impoñeeyaame, tsikarika rithonka eejatzi, roshiyakotakari Itomi Pawa, ari rashi rowatziro rimperatasorentsitaarewotzi.

<sup>4</sup> Ari añiuro iriiperori rinake Melquisedec. Tema Abraham-ni, acharineyetanakari aakapaini, iri ipake pairani okaatzi raapithatiziri pinkatharipaini romanatakeri. <sup>5</sup> Iro oshiyakawori rantapiintakeri pairani Leví-ite. Ipayetziri apaani oshekitzimotziri isheninka ontzimerika 10, tema iro ishinetantziri Inintakaantaitanewo rantayeteri Imperatasorentsitaarewo. Iro rametayarini, tema isheninkapaini rinatzi icharineyeteri Abraham-ni. <sup>6</sup> Iriima Melquisedec, kaari isheninka Judá-ite. Te ayotziri iita charinetariri. Iri kantacha Abraham-ni, ikashaakaaperoitakeniri pairani, iriitakera ipake Melquisedec apaani kaatatsiri 10 raapithatantakeri romanataga. Ikanta Melquisedec ritasonkawentanakeri Abraham-ni. <sup>7</sup> Imaperotatya ikantapiintaitzi: “Itzimirika tasonkawentantatsiri, ranairira ritasonkawentziri.” <sup>8</sup> Itzimirika ipaitziri apaani oitarika kaatatsiri 10 jaka kipatsiki, atziri rinayetzi, kaamaneri. Iriima Melquisedec, roshiyakaatzi kañaaneri rini irirori. <sup>9</sup> Irojatziri rantakeri isheninkapaini Leví, ipashitapiintaitari. Oshiyawaitakawo iriitakeme pinakowentantatsine, tema irootake rantakeri Abraham-ni icharinetakari, <sup>10</sup> retanakawo ripinakowentantake pairani ipashitakari Melquisedec ritonkyotantawaariri romanataga. Tekera itzimiita Leví-ni, rantzitakawo ketziroini Abraham-ni jiroka.

<sup>11</sup> Pairani, ikaatzi Imperatasorentsitaarewo, icharineete Aarón-ni rinatzi, iitaitziri “Leví-ite”. Ari okanta Inintakaantaitakeri. Iri kantacha jirikapaini Imperatasorentsitaarewo, te rimatzimaitawo rowameethashiretante. Arime rimatakeri, eero rosankenatakotaima itsipa Imperatasorentsitaarewo oshiyariri Melquisedec, kaari charinetariri Aarón-ni. <sup>12</sup> Imaperotatya itzimai itsipa Imperatasorentsitaarewo kaari icharineta Aarón. Irootake inashitantaiyaari Inintakaantaitanewo, intziman-taiyaari itsipa Imperatasorentsitaarewo. <sup>13</sup> Tema jirika ikenkithatakoitakeri oshiyakariri Melquisedec, kaari icharinetari Leví-ni, itsipasatzi rinatzi, kaari tzimatsine

† **6:19** Iro ikenkithatakoitzi tontamawotatsiri rotantotaitawori tasorentsipanko, iro iitaitziri tasorentsina kinatzi janta. Apawosatzi inkye Imperatasorentsitaarewo, te ripiyapiyata inkye. Iroowa ikantaitziri: “Ari janta roñaaganta Pawa.” Iroowa roshiyakagaitziri inkite añagairira Pawa paata. \* **7:1** Jiroka “Salem”, owairo inatzi pairani nampitsi tekera inampitanakawoota Judá-ite janta, irootake iitaitziri iroñaaka Jerusalén. † **7:2** Jiroka kantakotachari ipakeriri Abraham-ni pairani Melquisedec: Arika raapithatante romanataga Abraham-ni onkaate 10, apaani rashitakaakyaari Melquisedec. Ari ikantakero maawoini raapithatantakeri, ontzimerika 10, apaani rashitakaakyaariri Melquisedec.

apaani icharine rimperatasorentsitaityaari. <sup>14</sup> Jirika oshiyakariri Melquisedec, iri Awinkatharite Jesucristo, icharinetakari Judá. Tema pairani rosankenareki Moisés-ni, te rishinetaantsite rimperatasorentsitaarewote charinetariri Judá.

<sup>15</sup> Ari okoñaaperotziri ontzimatye ripoke itsipa Imperatasorentsitaarewo oshiyaarine Melquisedec. <sup>16</sup> Jirika itsipa pokatsine paata, rinashitya, ontzime ishintsinka, eero ikaamanetai. Iriira anairiri itsipapaini Imperatasorentsitaarewo okenkithatakotakeriranki pairani Inintakaantaitanewo, icharineyetakari ketziroini Leví-ni. <sup>17</sup> Tema iri ikenkithakoitake, ikantaitzi:

Eeroka kantaitachane pimperatasorentsitai,  
Ari poshiyaari ikanta pairani Melquisedec.

<sup>18</sup> Ari okanta, tema okaatzi Inintakaantaweetakari, ontzimatye ripakagaitero, te imatero owameethashiretante, tzimatsira yotapainchari. <sup>19</sup> Tema tekaatsi apaani owameethashirete Inintakaantaitanewo. Iri kantacha tzimai itsipa poyaataawori, iriitake matakaayetairone okaakishiretaiyaari Pawa, tema iri oyaakoneentairi.

<sup>20</sup> Iroowa ikashaakagairi jiroka Pawa, tema pairani apaniroini raakotaka iwairo riyotaitantyaari imapero imonkaatya. <sup>21</sup> Tema ikaatzira Imperatasorentsitaintsiri pairani, te raakota iwairo Pawa rowantaitakariri jirika. Iriima itsipa raakotawentakari iwairo, tema ikantaitzi:

Pinkathari aakotaincha iwairo, te roipithokanetziro riñaane.

Pashi powaatyero eeroka pimperatasorentsitai,  
Ari poshiyaiyaari ikantaga pairani Melquisedec.

<sup>22</sup> Ari okanta, iriitake Jesús yotakagairori imapero imonkaataiya okaatzi raapatziyawakagaitakaga, irootake awisakerori otsipa etawetanakawori pairani raapatziyawakagaitakaga.

<sup>23</sup> Tema pairani ikaatzi Imperatasorentsiwetainchari, osheki poyaayetakariri iriroripaini. Ikamapiintayetake jirikapaini, te riyataakairo rantayeterime, ontzimatye intzime itsipa poyaatyaarine. <sup>24</sup> Iriima Jesús, kañaaneri rinatzi irirori, iri kantaitaachane rimperatasorentsite. <sup>25</sup> Iriira Jesús owawisaakoshiretapiintairine okaakishiretaiyaarine Pawa, inkantakowentapiintairi.

<sup>26</sup> Iriitake Imperatasorentsitaarewo akoityaaperotakeri. Jiroka ikanta irirori: Ita-sorentsishiretzi, ikameethashiretzi, ikiteshiretzi, te itsipayetari kaariperoshireri, rawisaperotairi inkitesatzi. <sup>27</sup> Jirika Jesús te roshiyari Imperatasorentsiwetainchari pairani. Tema arika ritagaiteniri atziripaini rashitakariri Pawa, retawo irirori ikowakotziri Pawa impeyakotawakeri ikaariperoshiretzi. Iriima Jesús rithotyakero maawoini, rimonkaatakero rishinetakaga pairani apaniroini roshiyakotakariri ratsipetakagaitanariri Pawa. <sup>28</sup> Ikaatzi Imperatasorentsitakaakeri pairani Inintakaantaitanewo, atziri rini, jentashireri, ikaamaneyetzi. Iriima Itomipero Pawa pokaintsiri, awisakeranki pairani osheki osarentsi, iri rimperatasorentsitakaakeri Pawa raakotaka iwairo pairani. Iri monkaatakerori kameethaini, ari ashi owatyero.

## 8

### *Iriira Jesús kantakowentantaatsiri owakeratantaari aapatziyawakagaantsi*

<sup>1</sup> Jiroka otzinkamiperotari ikantaitakeri: Iriira Cristo Imperatasorentsiwentairi, iri saikaatsiri rakoperoki Pinkatharipero, itsipataari ipinkathariwentantai inkiteki.

<sup>2</sup> Oshiyawaitakawo ari rantawaiteme tasorentsithaanteki, temaita rantawaite tasorentsithaanteki riwetsikakeri pairani atziripaini, inkiteki rantawaitzi, riwetsikakaantairi Pawa. <sup>3</sup> Tema ikaatzi Imperatasorentsitaintsiri pairani, eenitatsi rashitakariri Pawa, ritayiniri. Ari ikantakariri Jesucristo irirori, tzimatsi rashitakariri Pawa. <sup>4</sup> Tera ishinetaantsite rowaiteri Jesucristo rimperatasorentsitantyaari, risaikantawetapaintari kipatsiki. Te ishinetakaantziro Inintakaantaitanewo,

tema kaari isheninkapaini Leví-ni. <sup>5</sup> Tema jirikapaini Imperatasorentsitaarewo oshiyakaawontsi rinamatsitake, eenitatsi inewiyataitari jimpe onkantaiya inkiteki. Irootake ikantaitakeriri pairani Moisés, riwetsikero tasorentsithaante, ikantaitakeri: Piwetsikero poshiyakayero, tsika okanta piñaawyaatakawo otzishiki.

<sup>6</sup> Ari ikantaari Jesús Imperatasorentsitaarewo rinatzi, ranagairi rimperatasorentsitaitari atziri. Tema rowakeratai Pawa otsipa aapatziyawakagaantsi, iri ikashaakaakairi Cristo inkantakowentayetai, irootake anagairori okaatzi ikashaakaawetakariri pairani, anagairo etakawori aapatziyawakagaantsi. <sup>7</sup> Eenitatsi koityagainchari etakawori aapatziyawakagaantsi kaari rimonkaataite, irootake okowantakariri ontzimai otsipa owakerari, poyaataiwaawone. <sup>8</sup> Jiroka koityagainchari, tema ikantaitake pairani:

Ikantzi Awinkatharite:

Paminero onkaate awisatsine paata,

Ari napiitairo naapatziyaiyaari icharinepaini Israel-ni, icharinepaini Judá-ni.

<sup>9</sup> Arika nowakeratairo aapatziyawakagaantsi, eero oshiyawo naapatziyawetakarira icharinepaini.

Tema pairani noshiyakaakeri nakathataatyeerime,

Naakame amairine nomishitowantaariri Egipto-ki.

Te rimonkaatzimaitawo iriroripaini aapatziyawakagaantsi,

Iroowa nipakaantaawori nokempoyaawentziri.

Ari ikantake ikenkithawaitzi Pinkathari.

<sup>10</sup> Rapiitakero ikenkithawaitzi, ikantzi:

Jiroka owakerari aapatziyawakagaantsi iñagairi paata isheninkapaini Israel:

Ari niyoshiretakaayetairi kameethari rantayetairi.

Oshiyawaityaawo nosankenashiretantaatyaarime Nonintakaantanewo,

Naakatake Iwawanetaiya,

Iriiyetake nashitaiyaari Naaka.

<sup>11</sup> Te onkowiya riyotaawakagaiya,

Apatziro inkantairi isheninka: “Piyotairi Awinkatharite.”

Maawoini riyoyetaina.

Ari riyoyetaina iriiperoripaini eejatzi ashironkainkaripaini, maawoini.

<sup>12</sup> Osheki noneshironkatairi ikaariperoshiretakeri,

Arira nompeyakotainiri.

<sup>13</sup> Tema iitaitakero “owakerari aapatziyawakagaantsi”, ari riyoitziro jiroka etawetakawori, paisato inatzi. Tema okaatzi paisatotaintsiri, rookaitziro.

## 9

<sup>1</sup> Jiroka etakawori aapatziyawakagaantsi, iro Inintakaantakeri Pawa riyotantaitaari tsika inkantaitya impinkathaiteri. Ari okenkithatakotari tasorentsithaante tsika ipinkathaitakeri. <sup>2</sup> Jiroka tasorentsithaante, apite okanta rinashitaitakawo rotantotaitziro. Janta okimiinakitzi ikyaapiintaitzira, ari rowaitziri ootamentotsi, menkochoanikiki, itsipatagaitakero pan tasorentsitatsiri. Ari iitaitziro “tasorentsinaiki”. <sup>3</sup> Irooma inthomoikinta, ithatashiitakero tontamawori, oryaaninaki okanta. Ari iitaitziro “tasorentsinaikiperori”. <sup>4</sup> Ari isaikiri ritaantapiintaitawori kasankari, ari isaikiri eejatzi tasorentsimo. Iroowa riwetsikaitziri poreryaari jiroka. Ari owakotari inthomoiki eepichokiini “maná” riwetsikañakitashitakero poreryaari. Ari rowaitziro ikotzi Aarón-ni shookaintsiri pairani, ari isaikitari eejatzi mapikota rosankenaitakerowa aapatziyawakagaantsi. \* <sup>5</sup> Okanta jeñokiini tasorentsimo, ari rowaitake riwetsikaitake roshiyakaawo maninkari, iriitake tsimankantakawori ishiwanki itatawo tasorentsimo. Iro iitaitziri “Ineshironkamento”. Iro kantacha eero niyaatakaairo nonkenkithatakotemiro jimpe okantayeta apaanipaini.

\* 9:4 Ikantakoitziro “poreryaari”, iriitakera ooro.

<sup>6</sup> Ari riwetsikaitakero maawoini jiroka. Osheki rantapiintakeri Imperatasorentsi-taarewo antawoki tasorentsinakiki, ari rantayetziro inkene impinkathatasorentsise. <sup>7</sup> Irooma inthomoikiperonta tasorentsinakiperoriki, apa rishinetaitziri inkye Imperatasorentsi-perori. Apawosatzi ikyaapiintzi osarentsiki. Arika inkye janta, raanake riraa piratsi ritsikirisantyaawo iitaitziri “Ineshironkamento Pawa”. Ompoñaantyaari ineshironkateri Pawa, eero rowasankewentantari iyaariperoshirenka. Ari ikantaitziriri eejatzi atziripaini kaariperoshireyetatsiri. <sup>8</sup> Eenitatsira riyotakaayetairi Tasorenkantsi, jiroka okanta: Pairani otzimantawetari tasorentsithaante, te okanta inkye atziripaini janta otasorentsi-peronakitzi. <sup>9</sup> Jiroka okantakota: Apaani atziri amamat-siziriri ratsipetakaanewo rashitakayaariri Pawa, kaarira jiroka kantakayaarine impinkathashireperotantyaariri Pawa. <sup>10</sup> Apatziro ritzitaiyakawoni owanawontsi, riraitziri, inkiwayetapiintaiya eejatzi. Iro Inintakaantaitakeri koñaayetatsiri rantayetairo, irootake rantaitakeri irojatziri rowakeratakaantaawori Pawa aapatziyawakagaantsi.

<sup>11</sup> Ari ripokakeri Cristo, iriitake oshiyawetariri Imperatasorentsi-taarewo. Temaita inkye tasorentsi-peronakiki riwetsikanewoki atziripaini. Irooma ikyiira irirori, inkite inatzi, jimpe janta anintagaiyaaga paata. Oshiyakaapairo tasorentsinakiperori, kaarira atziri wetsikerone. <sup>12</sup> Tema Cristo te roshiyari atziri Imperatasorentsi-taarewo kyaapi-intatsiri tasorentsi-peronakiki raanakeri riraa piratsi. Iriira shinetainchari rowamaga-iteri risakotapaintziro riraa, inkene iñaayetairo maawoini rashi rowaatyeero rowawisaakoshireyetai. † <sup>13</sup> Roshiyakagaitziri okameethatziro Pawa riraa piratsi, ee-jatzi isamampote, oshiyawo iro kitewathatakairineme atziri rantakerowa ipinkaitziri. <sup>14</sup> Irooma riraa Cristo, iro maperotzirori okiteshiretakaantzi. Tekaatzi oita inke-nakaashityaari, irijatziita shinetaincha rowamaga-iteri, ikantakaakari Tasorenkantsi. Iriitake oshetapithataimiro kaariperori pikenkithashiretanewo, tema pantayetakero kaamanetakaantatsiri. Ontzimatyepantayetairo ikowakayimiri Pawa, Kañaaneri.

<sup>15</sup> Iriitake Cristo rotyaantakeri Pawa inkantakowentari atziripaini, opoñaantaari rowakeratairo aapatziyawakagaantsi. Tema okantakota owakerari aapatziyawakagaantsi, ontzimatyepantayetairo apaani, ompoñaantyaari rawisakoyetai piyathatakawori etawori aapatziyawakagaantsi. Ari iñagaitairo ikashaakagaitakairi pairani ankañaanetai. Jiroka aapatziyawakagaantsi, oshiyawaitakawo osankenarentsi okenkithatakota rashitaitari, okenkithatakotziri ashiyetaiyaawone arika inkamake ipaapateetari. <sup>16</sup> Iro kaari riyotanta aayerone okaatzi rashitakaantaitari, apa riyote arika inkamake ipaapate. <sup>17</sup> Eeniro rañi ipaapatetari, eero ipitaitari inintakagaitakeri rashitaiyaawo. Apa impaitairi arika inkamake. <sup>18</sup> Ari oshiyawo, retaitanakari etawori aapatziyawakagaantsi, tziimatsi iita kamatsiri, riraa retantaitanakari. <sup>19</sup> Tema pairani rithonkakeri Moisés riñaanatakeniri atziripaini Inintakaantanewo, raake riraa piratsi, itsipataakero ñaa, raake inchatewa, rankowitake kityonkamawotatsiri, ritsikirisantakawo osankenatainchari, eejatzi atziripaini. ‡ <sup>20</sup> Ikantakeri: Jiroka iraantsi iro ooñaawontaperoterone aapatziyawakagaantsi, iroowa Inintakaantakeri Pawa.

<sup>21</sup> Ritsikirisantakawo iraantsi tasorentsithaante, ari ikantakero okaatzi saikatsiri inthomoikinta. <sup>22</sup> Tema ritsikirisantaitakawo riraa piratsi, rimonkaatanairo Inintakaantaitziri, oshiyawaitanakawo iroome oitewathatantatsine. Tema eerorika otzimi iraantsi, eero ipeyakotantairome Pawa kaariperori.

### *Iri Cristo matakeroi rowawisaakoshiretantzi*

<sup>23</sup> Irootake rowamaga-iteri piratsi ritagaitziniri Pawa, oshiyawaitakawo inkite-wathatakagaantatyeeeme. Irooma awisaintsiri inkiteki, rotyaantakeri Pawa inkamawentante Cristo, inkiteshiretakaantayetai, anaanakero ikamawentantzira piratsi.

† 9:12 Ikenkithatakotaitziri jaka “piratsi”, iriira cabra-paini eejatzi waaka.

‡ 9:19 Kantakotachari jaka

“inchatewa”, irootake iitaitziri eejatzi “isopo”.

<sup>24</sup> Tema te ikyi Cristo tasorentsina kiperoriki riwetsikanewoki atziripaini. Iroowa oshiyakaawentacha inkiteki jimpe ikenai Cristo, ikantakowentai risaikira Pawa. <sup>25</sup> Tera rapiipiintapaintziro Cristo inkamimotante. Te oshiyawo rantziri Imperatasorentsitaarewo kyaawetapiintachari apawosatzi osarentsiki tasorentsina kiperoki. Te iri ashitakyaawone riraa risakoyetziri. <sup>26</sup> Iriime roshiyakyaame Cristo Imperatasorentsitaarewo, osheki rapiipiinterome inkamawentante. Ari retanakyaawome inke maatsiwentantya owakera iwetsikantanakari kipatsi. Te ari onkantya, tema apawosatzi ikamawentantapaintzi. Ari ikantaitanakitziro roitsinampaanakero kaariperori. <sup>27</sup> Oshiyawaitakawo ikantaitziri: “Maawoini atziri apawosatzi inkame, Pawaga yotairine arika rowasanketairi.” <sup>28</sup> Iro rantakeri Cristo, apawosatzi ikamake ikemaatsiwentakotari osheki kaariperoshireri. Iro kantacha ripiyai paata irirori, eero ikemaatsitakagaitawaari rowawisaakotairira ikaatzi oyaakoyetairiri.

## 10

<sup>1</sup> Iro oshiyakawori aamparentsi jiroka Inintakaantaitanewo. Okantaganki aamparentsi te otzimanetzi owatha, apatziro riyotaitziro eenitatsi iita ashitawori raampare. Ari okantari eejatzi Inintakaantaitanewo, riyoitzi tzimatsi paata kameethataatsine. Inintakaantaitake ritagaitapiinteniri Pawa maawoini osarentsiki, iro kantacha te owameethashireperoteri atziripaini antayetakerori. <sup>2</sup> Imaperotatyeeeyaame owameethashireperotante, ikaatzi antayetakerori ari ripakaakerome, tema oiteshoretakeri, eero okatsitzimoshirewaitzirime rantayetakerowa kaariperori. <sup>3</sup> Te ari onkantya, tema rantapiintashitakawo awisayetziro osarentsipaini, ritagaitapiintzinirira Pawa, ikenkithashiretakotawowa iyaariperoshirenka. <sup>4</sup> Tema rowamagaitapiintziri piratsi ikapathainkatakagaitziri, te imatzimaityaawo ompeyakoperotero iyaariperonka atziri. <sup>5</sup> Iroowa ripokakera pairani Cristo jaka kipatsiki, ikantakeri Pawa:

Te pikowaatsikaitairo ramayeetaimi ratsipetakagaitanewo rashitakagaitemiri.

Iroowa pikowaperotake potyaantena naaka natziritzimotante, noshiyakotyaari ratsipetakagaitanewo.

<sup>6</sup> Te apa inimotemi ritagaitzimiri piratsi okantakaantziro iyaariperoshirenka jirikapaini.

<sup>7</sup> Nonkante Naaka:

Pawá, nipokake naaka nantairo okaatzi pikowakaakenari eeroka,

Tema rosankenatakoitakena pairani onkaate nanteri.

<sup>8</sup> Pinkenkithashiretero kantatsiri jaka:

Te pikowajaantairi ramayeetemiri piratsi rashitakagaitemiri, ritagaitemiri.

Te inimotemi ritaawentemiro iyaariperoshirenka.

Iro kantacha, ¿kaarima Inintakaantaitanewo okaatzi añakeri? <sup>9</sup> Pinkenkithashireterotya otsipa kantatsiri:

Nipokake naaka nantairo okaatzi pikowakaakenari eeroka,

Jiroka apiitainchari ikantaitakeri, poyaataawori etanakawori pairani. <sup>10</sup> Ikowake Pawa oshiyaawo iwatha Cristo okaatzi ritagaitziniriri, opoñantari ikamawentapaintziri maawoini atziripaini. Arira opoñagaari rowameethashireyetai aakapaini.

<sup>11</sup> Pairani, maawoini Imperatasorentsitaarewo raminiri Pawa rashitakaariri, rapiipiintziro kiteesheriki ritayiniri piratsi. Temaita rimatziro ripakaaperotakaantero kaariperori. <sup>12</sup> Iriima Cristo, apawosatzi rishinetaka rowamaawentaiteri iyaariperonka atziripaini, saikai rakoperoki Pawa itsipataari ipinkathariwentantzi, <sup>13</sup> ari risaiki royaawenta irojatzi roitsinampaaperotantaiyaariri iisaneentane, roshiyakagairi rimakoryaayitzimento. <sup>14</sup> Irootake rantantakawori apawosatzi ikamawentakero iyaariperonka atziripaini, tema ari rashi rowatyeero rowameethashireperoyetai. <sup>15</sup> Ari



ikantakari Tasorenkantsi riyotakaakai imaperotatya. Tema iri etakawori rosan-  
natakaantake:

<sup>16</sup> Ikantake ikenkithawaitake Pinkathari, ikantzi:

Jiroka owakerari aapatziyawakagaantsi iñagaitairi paata:

Ari niyoshiretakaayetairi kameetha rantaiteri

Oshiyawaityaawo nosankenashiretatyeenirime Nonintakaanane.

<sup>17</sup> Eekero ikantatzi:

Ari nompeyakotainiri ripiyathatakaga, rantayetakerowa kaariperori.

<sup>18</sup> Tema ipeyakotakaanairo Pawa ikaariperoshiretazitira, te okameethatzi rita-  
gaitainiri iroñaaka.

<sup>19</sup> Iyekiite, tema kapathainka ikantaka Jesucristo rowamaantaitakariri,  
awentaashire antsipashiretaiyaari Pawa, oshiyawaityaawo ankyagaatyeeeme  
tasorentsinaakiperoriki. <sup>20</sup> Tema ratziritake Cristo, irootake okantantaari ankyaaayetai  
inkiteki, iro oshiyarime ankyagaatyeeeme ithataitakerowa tontamawotatsiri  
tasorentsinaakiperoriki. Aaka omapokayetairori jiroka kaari rimataitzi pairani,  
iroowa kañaanetakantaatsiri. <sup>21</sup> Roshiyakari iroñaaka Cristo iriime Imperatasorentsiper-  
owentaine akaatzira rashiyetai Pawa. <sup>22</sup> Ari okanta. Kyaaryooperoini ankantaiya  
antsipashiretaiyaari Pawa, imaperowa oshiretaiyaari. Kiteshirera ikantakaayetai,  
eero akenkithashiretakotaawo kaariperori. Oshiyawaitaawo inkiwantaatyeeerome  
ña kityaanikiri. <sup>23</sup> Kiso owanakeri awentaashiretaari, ikemayeetakai akantake:  
“Noyaakoneentanewo rinatzi Cristo.” Tema tsika itzimi kashaakagairori,  
kisokero rowakai irirori. <sup>24</sup> Ontzimatyee ankenkithashiretakotaairo tsika onkantya  
ominthashiretakantaayariri itsipa retakotane, rantayetairo kameethari. <sup>25</sup> Eero  
apakairo apatotapiintaiya, tema tzimayetatsi pakaayetakerori. Ontzimatyee  
ominthashiretakagaiyaari akaataiyinira. Eekero aatatyee antanairo ayotaira aritake  
ripiyai Cristo.

### *Ikamantaitziriri antzirori inintakaanekiini kaariperori*

<sup>26</sup> Ayowetaawowa irooperotatsiri, arika othatagairo antapiintanairo kaariperori,  
tera ipeyakoitairo ayaariperonka. <sup>27</sup> Ikamantaitakai anthaawashirete rowasanketaitai,  
tema Pawa rithonkaatyeeeri ritaayetairi ikaatzi kisaneentakeriri. <sup>28</sup> Pairani, iitarika  
piyathatakyaawone Inintakaanaitane rosankenatakeri Moisés, te ineshironkazitzi  
rowamagaitziri inkaaterika mawa thawetakoterine. Ari rowamagaitakeri eejatzi intzi-  
maatsikaaterika apite thawetakoterine. <sup>29</sup> ¿Tema imaperotatya rowasanketaiteri manin-  
terone rantzimotakairi Itomi Pawa? Tema roshiyakagaitakero raatzikashiwaitaitawo  
kaari pantyaawone, imanintashiwaitakyaawome ikapathainkataake ikamawentantake.  
Ari rithainkashiretakero raapatziyantzi Pawa ikashaakaawetakari intasorentsishire-  
takairi. Ikaweyawaitakeri Tasorenkantsi neshironkatantaneri. <sup>30</sup> Irooma aakapaini  
ayotziri kantaintsiri:

Naakataake owasanketantatsine,

Naaka piyakowentantatsine.

Iro ikantakeri Pinkathari.

Ikantaitzi eejatzi:

Rowasanketairi Pinkathari ikaatzi rashitari irirori.

<sup>31</sup> ¡Antawoitewé inthaawashiretaite riyotaite iriitakera owasanketantaatsine Pawa  
Kañaaneri!

<sup>32</sup> Pinkenkithashiretakotya. Tema eerokataake kemisantanaantsiri pairani,  
oshiyawaitakawo pinkiteesheenkatakotaatyeeeme. Irojatzzi piñaantakawori  
ikemaatsitakagaitakemi. <sup>33</sup> Piñaayetakero eejatzi ikisaitzimi, rowatsinagaitzimi  
tsika rapatoita. Poimoshirenkayetakeri awishimotziri okaatzi piñaakeri eeroka.

<sup>34</sup> Poimoshirenkayetakeri ikaatzi romonkyagaitakeri, piñaayetakero eejatzi

raapithaitakemiro oshekitzimotzimiri. Iro kantacha, eekero piyaatatzi pominthashiretanaka, tema piyotaiyironi onkaate piñagairi paata, osheki okameethaperotzi, eero ithonkaawo. <sup>35</sup> Irootake eero pipakaantawo okaatzi pawentaanaari, tema antawoite ripinaitaimi paata. <sup>36</sup> Kisashire pinkantya pantayetanaari ikowakaimiri Pawa, piñaantaiyaawori ikashaakaakemiri.

<sup>37</sup> Tema ikantzi Pawa:

Eero rishenkaa raretantyaari okaakitizimataintsiri,  
Eero osamani inkantya.

<sup>38</sup> Tampatzikashire rinatye awentaashireri, ari iñagairo rañaantaiyaawo.

Irooma arika ripiyashiretai, eero rinimotakaanawo.

<sup>39</sup> Irooma aakapaini, te oshiyari piyashiretachari, rithonkaitairi. Oshireyetaaga aakapaini, ari añaagairo añaashireyetai.

## 11

### *Awentaashirenkantsi*

<sup>1</sup> Jiroka okantakota awentaashirenkantsi. Oshiyatyaawo arika inkantashireete: “Ari imatakya nokowaperotanewo.” Riyoshiryaanake aritake imatakya ikowiri, okantawetaka te iñiuro. <sup>2</sup> Iroowa rawentaashirenka acharinepaini inimotakagairiri Pawa. <sup>3</sup> Iro awentaashirenkantsi kantakaawori amatantawori akemathatairo jimpe okantakota riwetsikantakawori Pawa kipatsi. Apatziro riñaawaitake, wetsikanaka. Ari opoñaanakari iwetsikanaka iñaayeetairi iroñaaka eejatzi kaari koñaayetatsine.

<sup>4</sup> Iro rawentaashirenka Abel kantakaawori ritaantanariri Pawa rashitakaariri, anaanakero rashitari Caín rashitakaawetariri Pawa. Iro kameethataintsiri ritaanewo Abel. Ikantanake Pawa: “Kameethashireri rinatzi Abel.” Okantawetaka ikamake Abel, eeniro akemakotapiintziri oshiyawaitakawo irojatziri inkenkithawaiteme irirori, tema iro kantakaantzirori ikemisantake. <sup>5</sup> Iroowa rawentaashirenka Enoc kantakaawori raantaitaariri. Te ikami. Te iñagaitairi, ragairira Pawa inkiteki. Pairani eeniro risaiki kipatsiki, ikantakeri Pawa: “Eeroka inimotakaaperotakenawori.” <sup>6</sup> Tema kaari tzimat-sine rawentaashirenka, te inimotziri Pawa. Arika inkowaite riyoperoitairi Pawa, ontzimatye inkemisantai, inkante: “Imaperotatyaaga itzimi Pawa.” Inkante eejatzi: “Arira rimatakaayetairi Pawa kowaperotaatsine riyotairi.” <sup>7</sup> Iroowa rawentaashirenka Noé kantakaawori riwetsikantakawori antawoite pitotsi rowawisaakotantaariri isheninkapaini. Imapero ipinkathatasorentsitake irirori. Tema iri Pawa kamantakeriri onkaate awisatsine, kaari iñagaitzi pairani. Iroowa kowaperotachari rowasanketaiteri isaawikisatzipaini. Arira rowameethashiretairiri Pawa jirika Noé, tema irojatziri ikashaakagaitairiri eejatzi kemisantzinkaripaini.

<sup>8</sup> Iro rawentaashirenka Abraham kantakaawori ikemisantantakariri Pawa ikantakeri pairani rishitowe inampiki riyatero otsipaki nampitsi ikowakaakeriri. Iro rantakeri Abraham, jatake okantawetaka te iñiuro jimpe riyate. <sup>9</sup> Iro rawentaashirenka Abraham kantakaawori rimatantawori inampitawo otsipaki kipatsi tsika te itzimapai isheninka irirori. Ari risaikakeri, ipankotari mashitsimashi. Ari ikantzitakariri Isaac, Jacob, tema irijatzi ikashaakagaitakeri eejatzi. <sup>10</sup> Iro rimatantakawori Abraham inampitaawo, tema riyotzi ari inkañaanetai inkiteki. Oshiyawaitakawo inewiyataatyeyaa-wome nampitsi riwetsikairi Pawa, tsika inampiperotaiyaawo paata. <sup>11</sup> Ari okantaka eejatzi Sara, owaiyaawo okantakaawo awentaashirenka. Antawokiwetaka, kaaweta-paaka oñaaga owaiyantaari. Iro kantacha, owaiyaawo, tema awentaashiretaari Pawa rimonkaatainero ikantakerori pairani. <sup>12</sup> Eejatzi ikantari oime Sara, ayimawetakari rantyashiparinka, rowaiyakagaawo iina, shekitai icharinepaini, roshiyaari ishekitzi impokiro, roshiyaawo impaneki oshekitzi ñaacheraaki. Imapero ishekiperotai, tekaatsi materone riyoitairi jimpe ikaatzi ishekitzi.

<sup>13</sup> Maawoini jirikapaini (Abraham, Isaac, Jacob, Sara), ikamakotakero rawentaashirenka, te rithotyimaitaawo iñagairo okaatzi ikashaakagaitakeriri. Apatziro inewiyatakawo. Intaina okantaka inkite ikowashiretakeri inampitantaiyaawo. Irootake ikantantakari: “Asaikashiwaiminthataka kipatsiki, kaari anampi, oshiyakowaitakari kaari tzimatsine isheninkapaini.” <sup>14</sup> Tema ikenkithawaitakotakero awisaintsiri, ari ayoperotziri imapero rithotyaakotzi otsipa nampitsi jimpe inampiperotaiyaawo kameethaini. <sup>15</sup> Iroome inkenkithatakoteri ripiyamatsitaimo inampipainiki ipoñaayetakawowa pairani, ari rimatakerome ripiyayetai. <sup>16</sup> Te ari okanta. Tema eenitatsi otsipa nampitsi ikowaperotakeri anaaperotzirori janta inkite. Irootakera riwetsikakeniriri Pawa rashiite jirikapaini, tema Pawa te ikaaniwentziri ikantapiintziri “Nowawané”.

<sup>17</sup> Iro rawentaashirenka Abraham kantakaawori ritaantyaanaririme Pawa rapintzite itomi Isaac, tema Pawa iñaantatyaawo rawentaashirenka Abraham. Iroowetainchame rapintzireerime itomi, <sup>18</sup> okantawetaka ikantakeri Pawa:

Iriira Isaac piñaantaiyaariri intzimai osheki pincharinetaiyaari.

<sup>19</sup> Tema Abraham rawentaashiretakari Pawa riyotzi arira rowañagairi kamatsiri. Iroowa ropiyantariri Pawa Isaac, tema iri oshiyakaawentakerori arika rañagaitai.

<sup>20</sup> Iro rawentaashirenka Isaac kantakaawori ritasonkawentantakariri Jacob itsipataakeri Esaú, iro oshiyakaawentacha awisayetaatsine paata. <sup>21</sup> Iro rawentaashirenka Jacob kantakaawori ritasonkawentantakariri apitepaini itomi José. Irojatziri rawentaashirenka Jacob-ni kantakaawori ithaamentantariri Pawa ikotzipookitakaga ikamimatakera. <sup>22</sup> Iro rawentaashirenka José kantakaawori riñaawaitantakari ikamimawetakaga, ikantzi: “Arika rishitowayetai Egipto-ki asheninkapaini icharineyetai Israel, raminai tsika inampitaiyaawo.” Ikantake eejatziri: “Ontzimatyete ragaitanairo paata notonkipooki.”

<sup>23</sup> Iro rawentaashirenka ipaapate Moisés kantakaawori rimanantakariri reenchaanikite owakera itzimapaake, irojatziri itzimakotantakari mawa kashiri. Tema kameethaini ikantaka eenchaaniki. Te ithaawantanakawo ipaapate Moisés inintakaantakeri pinkathari, rowamagaiteri maawoini eenchaaniki ikaatzira shiramparitatsine. <sup>24</sup> Iro rawentaashirenka Moisés kantakaawori kaari ikowanta incharinetyaari pinkathari Faraón, okantawetaka oimotantakeri rishinto pinkathari.

<sup>25</sup> Iro ikowaperotake intsipatyaari atziripaini rashitari Pawa, intsipatyaari isheninkapaini rowasankewaitaitziri, te ikowaatsikaitziro inintaawaityaawo eepichokiini iñaamatashiyetari irirori. <sup>26</sup> Tema riyotzitaka Moisés okowaperota rithainkateri Cristo, anairo oshekitzimotzirira rashaagawo Egipto-satzi. Iro inewiyatakari ripinaitairiri paata. <sup>27</sup> Iro rawentaashirenka Moisés kantakaawori rishiyantakari risaikawetaga Egipto-ki. Tera iro rishiyantakari inthaawantaperotyaari pinkathari rowasanketeri. Iroowa rishiyantakari, tema ikyaaryoowentatziro rantakairiri Pawa, oshiyawaitakawo iñaawootaatyeeerime Pawa kaari koñaanetatsine.

<sup>28</sup> Iro rawentaashirenka Moisés kantakaawori imonkaatziro inintakaantaitakeri anonkoryagaantsi, ritsikirisantakawo iraantsi eero rowamaantari maninkari thonkaatakeriri retanakari rowaiyanepaini.

<sup>29</sup> Iro rawentaashirenka kantakaawori rimontyagaiyantakaworini Inkaare Kityonkaari, ranashitantaiyanakawoni okisopathatanakera. Iroowa rimawetapaakawo Egipto-satzi, piinkaiyakeni. <sup>30</sup> Iro rawentaashirenka kantakaawori rimatantakawori rinkirinkitakero Jericó okaatzi 7 kiteesheri, irojatziri iñaantaitakawori ipookanake otantonampitaga nampitsi. <sup>31</sup> Iroowa awentaashirenka Rahab kantakaawori aakameethatantawakariri aminaantakitzirori romanatyaaga, iro opoñaantari kaari otsipatantari piyathariite raperaataitakeri. Okantawetaka jiroka Rahab mayempiro inaweta.

<sup>32</sup> ¿Nonkenkithatakoterima itsipa? Eero nithotyaakotziri. Jirika ikaatzi: Gedeón, Barac, Sansón, Jefté, David, Samuel, eejatzi Kamantantaneriite. \* <sup>33</sup> Iroowa rawentaashirenka jirikapaini kantakaayeririri oitarikapaini. Jiroka rantayetziri: Itzimayetzi oitsinampaayeririri pinkatharipaini, itsipa tampaatikashireyetaatsiri, itsipa ñaayeririri ikashaakagaitakeriri, itsipa rookaweetakari omoonakiki itzimira manitzi te ratsikiri, <sup>34</sup> itsipa rookaweetakari paampariki te ritaga, itsipa romaathaitakari rowathagaiterime, itsipa retsiyatakotakagaitairi, itsipa ririiperotakairi romanatantari, itsipa romishiyayetake owayeripaini poñaachari otsipaki nampitsi. <sup>35</sup> Tzimatsi tsinane ñaayeririri osheninkapaini rañaayeririri ikamawetakaga. Iro kantacha tzimatsi itsipa kamayetaintsiri romposawaitaitakeri, te ripakaanakero rawentaashirenka ripakagaitantyaaririme. Oyaawenta ikanta rañaaperotai paata, eero oshiyaaawo añaawetaga iroñaaka. <sup>36</sup> Eenitatsi rithainkawaitaitziri iroowa ripasaitantyaariri, itsipa roosoyeetakari iroowa romonkyagaitantariri. <sup>37</sup> Eenitatsi rishemyagaitziri, itsipa ritankaitakeri, itsipa rosataayeetakari. Tzimatsi itsipa anashinashiwaitachari apatziro ikithaamatsitari mashitsimashi, itsipa koityaaperowaitzinkari, itsipa osheki rithotyaakoitakeri, itsipa ikemaatsitakagaitakari. † <sup>38</sup> Itsipa ikenawaiyetake otzishiki, ochempiki, omoonakiki, ari inampiyewetakawo. Te onkantaatsikaitya oshiyakayeri jirikapaini isaawikisatzi. Iriitake iriiperotatsiri.

<sup>39</sup> Iro rawentaashirenka jirikapaini inimotakagairiri Pawa kameethaini, okantawetaka tekera iñaayerairoota ikashaakagaitakeriri. <sup>40</sup> Tema inewiyatakawo Pawa anairori jiroka: Ikowakaakairo aakapaini antsipayetaiyaari jirikapaini, inkameethashiretakaayeri maawoini.

## 12

### *Kempoyaane owairi Jesús*

<sup>1</sup> Irootake añaashintsitantaari eejatzi aakapaini, oshiyakayero anaakotantatyeeme. Oshiyakayero eejatzi impiyotatyeeyaame jirikapaini, raminayetaime matayetakerori rawentaashiretaka, oshiyakoyetairi aakapaini. Amatantyaawori ashiye shintsini, ookanairo aithaare amatsinkakagairi arika ashiye. Iroowa roshiyakagaitziri aithaare arika ookairo akaariperoshirewaitzi. Ari añaairo ankamaitaiyaawo ashiyapiintai. <sup>2</sup> Ikanta shiyachari ikamaitawo raminiro tsika rareetya, ari ankantaiyaari aakapaini, kempoyaane owanairi Jesús etakawori rawentaashiretakagai. Iriitake monkaatakayaawone awentaashiretanewo. Iriitake oshiyakotaiya, tema inewiyatakawo irirori inintaayeri. Irootake ikisashitantakawori ikentakoweetakarira, okameethatzimotakeri ikaaniwentaitakeri ikamawetapaintaga. Ari risaikai iroñaaka rakoperoki Pawa ipinkathariwentantai.

<sup>3</sup> Arika ankenkithashiretakoteri Jesús ikisashitakawo ikisaneentawaitakeri kaariperoshireri, iroowa thaamentashiretakagaine aakapaini ankisashityaawo, eero okantzimoneentawaitai. <sup>4</sup> Piñaashintsitapiintawo eerokapaini kaariperori pipakagairome, iro kantacha tekera ritsitokaitzimiita. <sup>5</sup> Aamaa pipeyakotairo ishintsineentantzimirori Pawa osankenarentsi, roshiyakaakemi eerokame itomipaini, ikantzimi:

¡Notomí! Eero pimanintziro arika rowasanketaimi Piwinkatharite.

Eero okantzimoneentawaitzimi arika ishintsineentemi.

<sup>6</sup> Tema retakotanewo rowiri Pinkathari iñaantapiintari, Maawoini roshiyakagairi itomi, rowasanketziri.

\* **11:32** Ikaatzi ashitawori iwairo jaka: Gedeón, Barac, Sansón, Jefté, iri jewayetakeriri Judá-ite pairani, owakera inampitantakawori Canaán-ki. Iro kipatsi ikashaakaakeriri Pawa inampityaawo janta. Jirikapaini jewari itsipatakari rowayerite ontzimatyete romanatya rimatantyaawori inampityaawo janta tsika ikashaakaakeri Pawa. † **11:37** Ikantakoitziri jaka “mashitsimashi”, iro imashi oweja eejatzi cabra.

<sup>7</sup> Onkaate awishimoyetemine poshiyakairo Awinkathariteme ñaantakaashiretemirone. Tema roshiyakagaimi Pawa eerokame itomi. ¿Tema rowasanketapiintziri itomi ikaatzi ipaapateetari? <sup>8</sup> Ontzimatyeye rowasankeyetai maawoini. Terika piñiuro eeroka, oshiyakawo tekera itomiperotzimiita Pawa, otomira mayempiro pinatzi. <sup>9</sup> Ari okantari eejatzi, eenitatsi apaapate koñaawoini owasanketairi, apinkathatztitari irirori. ¿Eeroma amaperotziro ampinkathatairi Apaapate kaari koñaanetatsine, añaashiretantaiyaari? <sup>10</sup> Tema ikaatzi apaapatetari koñaatatsiri, eepichokiinira rowasankeyetai ikowiri irirori. Irooma rowasanketairika Pawa inkameethashiretakaantairi, arira onkantakya eejatzi intasorentsishiretakaayetai tsika ikantakaga irirori. <sup>11</sup> Te inimoyetai rowasankeminhaitai, osheki onkantzimoneentawaitai. Iro kantacha paata, ikaatzi kaari maninterone rowasanketaitziri, arika inkameethashireyetai, arira iñagairo risaikai kameethaini.

### *Apaatakerori ineshironka Pawa*

<sup>12</sup> Irootake piñaashintsitanyaaawori poshiyaari ñaantapiintakawori rishiya, iñaashintsita rishewata rishipetashempawetakaga, ari oshiyawo eejatzi rishipetayerowetakaga, iñaashintsita. <sup>13</sup> Poshiyayetaiyaari eerokapaini shiyapiintachari tsika okameethawokitzi kaari ñeerone rikithowe rishipetayitzitakera. Ontzimatyeye intekatsiyitzite. <sup>14</sup> Aakameetha pinkantawakagaiya, piñaashintsitya pintasorentsishirete. Eerorika pi-mayetairo jiroka, eero piñagairi Apinkathatanewo. <sup>15</sup> Paamayaari apaatakerori ineshironkayetaira Pawa. Paamayaari oitzipinaashiretantaneri, roitzipinairikari kemisantayetaatsiri. <sup>16</sup> Paamayaari mayempitatsiri. Paamayaari thainkatasorentsitaneri oshiyariri pairani Esaú. Tema antawoite ayimatakeri ritashe, ikowakiperotake roya, ari riyomparitakanari rowanawo irirentzi, ipakeri ikashaakagaitziriri irirori retakawowa itzimake ketziroini. <sup>17</sup> Tema piyotzi eerokapaini rantakero Esaú awisaintsiri, osheki ikowawetaawo iñagairome ritasonkawentaiteri, antawoite riraakotakawo. Iro kantacha te iñiimaitaawo jimpe inkenakagairo rowashiñaantaiyaawori ikenakaashitakari.

<sup>18</sup> Te poshiyari eerokapaini aakerori pairani Inintakaantaitanewo. Riyaataiyakeni otzishiki koñaatatsiri. Osheki itaantzi, tsireniki okantaka, ooreenkakitake, antawoite otampyaatake. <sup>19</sup> Ikemakero rityootaitzi. Ikemake eejatzi antawoite ikenkithawaitaitzi, ari ithaawaiyanakeni, osheki ramanaiyawetakani eero ikemantari ñaawaitaintsiri. <sup>20</sup> Tema osheki ithaawantaitakawo okaatzi inintakaantaitakeri, ikantaitzi: Eero pikenayetzi otzishiki. Te okameethatzi pinkenakairi eepichokiini pipirayetari janta. Arika inkenaitake eepichokiini janta, ontzimatyeye ritsitokaiteri, ontzimatyeye rowathagaiteri.

<sup>21</sup> Imaperotatya okoweenkatzi, ikantake Moisés:

Antawoite nothaawake, okawaitanakena.

<sup>22</sup> Te poshiyari eerokapaini ikaatzi ñaakerori, tema eerokapaini oshiyakariri jataintsi otzishiki jitachari Sion, saikatsiri nampitsiki Jerusalén. Iro oshiyakaawentachari piyaayetai inkiteki risaikira Pawa Kañaaneri. Ari pintsipataiyaari eerokapaini ipiyotapaaga maninkariite. <sup>23</sup> Pintsipataiyaari ikaatzi piyotachari janta rawentaashiretaarira Reeware Itomi Pawa, tema iriiyetake osankenatakotainchari risaikayetai inkiteki. Pintsipaperotaiyaari Pawa, yotairone jimpe inkantairi maawoini. Pintsipataiyaawo ishirepaini kemisantzinkaripaini rithotyaakagaitakeri ikameethashiretakagaitairi iroñaaka. <sup>24</sup> Pintsipataiyaari eerokapaini Jesús, kantakowentairi otzimaira owakerari aapatziyawakagaantsi, kapathainkaintsiri ikamawentayetakaira. Jiroka riraa Jesús oshiyawaitakawo onkenkithawaitatyeeeme, anaanakero okenkithatakotakeri pairani riraa Abel. \*

\* **12:24** Pairani ritsitokantakariri Cain irirentzi Abel, ikantake Pawa: “Oshiyawaitakawo onkaimaatyeeme riraa Abel ikowi inkisawentaiteri.” Ari opoñaari ikantaitzi oshiyawaitakawo iñaawaitaatyeeme iraantsi. Irooma okenkithawaitzi riraa Cristo, te okowi inkisawentaitero, okowatziira ompeyakotakaantero kaariperori.



<sup>25</sup> Paamaya, papaatzirikari Pawa arika riñaanashiretemi. Tema pairani ikaatzi kemawetakariri Pawa ikenkithawaitzi kipatsiki, rowasanketakeri imanintakerowa okaatzi ikantziriri. Aakaga rimaperote rowasankeyetai, arika apiyashiretake ake-mayewetakari riñaanashireyetakaira Inkitesatzi. <sup>26</sup> Pairani arika inkenkithawaite Pawa, rontziñiuro kipatsi. Irooma iroñaaka, tzimatsi ikantairi, ikantzi:

Ari napiitairo nontziñaakagairo, te apa kipatsi, tema ari onkantzitaiya inkite eejatzi.

<sup>27</sup> Tzimatsi oita oshiyakaawentachari ikantziri: “Ari napiitairo.” Iroowa oshiyakaawentachari arika rotekairo riwetsikaitakeri, rithonkairo riwetsikane kaari enitatsine, apatziro isaikayetai enitatsiri. <sup>28</sup> Irooma aakapaini, impinkathari-wentayetai tsika enitapai. Irootake awetharyaantyaariri Pawa, pinkathaga owairi, antawaitainiri. <sup>29</sup> Tema Pawa, iriitake oshiyawori paampari taantaneri.

## 13

### *Rantanairi kemisantatsiri*

<sup>1</sup> Ontzimatyete petakotapiintanaiyaari “Iyekiite”. <sup>2</sup> Eero pipakairo poimaante pinampiki. Tema tzimatsi pairani antakerori, te riyotzi iriira maninkari roimaake inampiki. <sup>3</sup> Eero pipakairo pineshironkateri romonkyagaitziri pikaayetzira pikemisantzi. Poshiyakayero ari pinkaateme romonkyagaitemi. Ari pinkanteriri ikaatzi rowatsinaawaitaitziri, pineshironkateri, piyotzi eero ka jimpe okantawaita inkemaatsitakagaitairika. <sup>4</sup> Pinkinatawakaiya paawakaaga, eero pimanakaawaitashitanta. Tema rowasanketziri Pawa mayempitatsiri. <sup>5</sup> Eero piñaamatashitari koriki. Pinkimoshirewentero okaatzi tzimimotzimiri. Tema iri Pawa payetemirone koityiimotakemiri, jiroka ikantake:

Eero nookanawentzimi.

Eero nowapintaimi.

<sup>6</sup> Iroowa awentaashiretantyaariri aakapaini, ankantai:

Iri Nowinkatharite neshironkataanane.

Tekaatsi nonthaawantya.

¿Tzimatsima inkantaina atziri?

<sup>7</sup> Pinkenkithashiretakoteri jewatakayimiri pikemisantayetai, kenkithatakotapiintakemirori riñaane Pawa. Pinkenkithashiretakoteri jimpe ikantayeta risaiki, oita rimonkaayetakeri irirori. Poshiyakotaiyaari tsika ikanta rawentaashireyetakaga.

<sup>8</sup> Irojatzira ikanta iroñaaka Jesucristo tsika ikantapainta, rashi rowaatyeero irirori paata. <sup>9</sup> Eero pishinetziri ramatawitemi yotaantzirori kaari kameethatatsi, kaari ikemapiintaitzi. Tema Pawa iri kameethashiretakaayetairi, ineshironkayetaira. Te owameethashiretantzi ampinkawaitero rowaitari. Eenitatsi antawetakawori jiroka, temaita owameethashireteri. <sup>10</sup> Oshiyawaitakawo ontzimaima owakerari taapokimentotsi. Eenitatsi rowamagaitakeri janta, iriira kamawentakairi aakapaini. Te inkantaatsikaitaiya Imperatasorentsitaarewo rowaiyaari irirori tasorentsithaanteki. \* <sup>11</sup> Tema rayiro pairani Imperatasorentsiperori riraa piratsi inthomoiki tasorentsithaanteki impeyakotantaityaanariri iyaariperonka, raayetziro iwatha piratsi othapiki nampitsi

\* **13:10** Pairani iriira Imperatasorentsitaarewo rishinetaitakeri rowapiintyaari tzimagaantatsiri piratsi, tzimagaantatsiri okithoki pankirentsi ramiri atziripaini rashitakaari Pawa. Irooma taapokimentotsi, ari ritaapiintaitziniri Pawa okaatzi rashitakaitariri, ari ikowakotapiintziri impeyakoiteniri iyaariperonka. Iro kantzimaaitacha iken-takoitakerira pairani Cristo, ikamake ipeyakotantairori ayaariperonka. Iro poyaatapaakawori okaatzi ritaapi-intaitziri rashitakagaitariri Pawa taapokimentotsiki. Tema jiroka inchakota jimpe ikamake Cristo ikentakoitakerira, iro oshiyanaawori iroome owakerari taapokimentotsi. Te inkantanaiya Imperatasorentsitaarewo royaari kamaintsiri janta. Iroowa opofaantari eejatzi, ikaatzi tzimawentzirori rimonkaayetairome inintakaantaitanewo, ikaatzi pinkawaitzirori owanawontsi, rithotyakowetawo impeyakoitainiri iyaariperonka, eero iñagairo inintagaiyaawo ikamawentantakera Cristo.

ari ritaayetzirori. <sup>12</sup> Ari oshiyakawo eejatzi, rowamagaitantakariri Jesús othapiki nampitsi, ari ikemaatsitakowentakai ikapathainkatake rowameethashiretantairi. <sup>13</sup> Ontzimatye oshiyakairo aakapaini ashitowaatyeeeme nampitsiki aataime risaikira Jesús, manintaarewo rowayeetai, ikantaitakerira pairani irirori. <sup>14</sup> Tema jaka asaikayetzira iroñaaka, eero ashi owaatyeeero. Irootake anewiyatantakawori tsika anampitaiyaawo paata. <sup>15</sup> Irootake nokantantzimirori: Ontzimatye anthaamentyaari, aakotairi iwairo irirori. Iroowa poyaataawori okithoki pankirentsi rashitakagaitariri pairani. <sup>16</sup> Ari oshiyawo eejatzi, eero pipakairo kameethatsiri, pimpawakayaawo tzimotzimiri. Irootake oshiyaawori inimotziriri pairani Pawa ritagaitziniriri. <sup>17</sup> Eero pipiyathatari jewayetzimiri pikemisananaira, iriitake kempoyaashiretzimiri. Iri kamantairine paata Pawa oita awishimoyetakeriri ikempoyaashireyetakemira. Kameetharika ikenkithatake, kimoshire inkantaiya iriroripaini, ari pinkantaiyaari eerokapaini. Irooma owashire ikenkithatake, ari pinkantaiyaari eerokapaini paata, eero opantzimotaimi.

<sup>18</sup> Pamanakotapiintaina iñaantaitenari kameethashireri nokanta. Iroowa nantakeri.

<sup>19</sup> Pamanakotapiintaina eejatzi niyaatashitantemiri intsipaite eerokapaini.

*Weyaantawori wethataantsi, tasonkawentaantsi eejatzi*

<sup>20</sup> Namanamanaatari Pawa, tema iriitake saikakaayetaimine kameetha, iriitake owañagairiri pairani Awinkatharite Jesucristo ikamawetakaga. Iri Pawa oshiyakaakeriri iriiperori kempoyiiriri oweja. Osheki ikapathainkatake rowakeratakaantaawori aapatziyawakagaantsi kantaitaachari iroñaaka. <sup>21</sup> Namanakotzimi riwetsikashiretantemiri pantayetanairo kameethari ikowakaimiri. Pamañari eejatzi eeroka pimatantyaawori kameethatzimotziriri, tema ayotzi iriitake Jesucristo matakairone. Ari rashi rowaatyeero impinkathaitairi irirori. Ari onkantaitaatyeeyaani.

<sup>22</sup> Iyekiite, eero pisamawo pinkemisantero okaatzi nosankenatakemiri, tema te oshekiperotzi. <sup>23</sup> Nokowi piyote eejatzi romishitowaitairi iyeki Timoteo. Arika reetaiya jaka, iriitake nontsipatanakyaari niyaatashitemi noñeemi. <sup>24</sup> Piwethatenari ikaatzi jewatzimiri janta, eejatzi itsipa oiteshiretaarewo. Ari ikantari Italia-satzipaini riwethayetzimi. <sup>25</sup> ¡Onkamintha ineshironkaitaimi maawoini eerokapaini janta! Ari onkantaitaatyeeyaani.

## ROSANKENARE SANTIAGO

### *Wethataantsi*

<sup>1</sup> Naaka Santiago osankenatzirori jiroka, rimperatanewo rowana Pawa eejatzi Awinkatharite Jesucristo. Niwethatari ikaatzi rashiyetaari Pawa pookayetaatsiri otsipaki nampitsi.\*

### *Pawaki opoñaawo yorenkantsi*

<sup>2</sup> Iyeekiite, kimoshire pinkantya arika piñaayetero ñaantsipookipaini. <sup>3</sup> Ontzimatyeye piyote iñaantaitatziimi imaperotatyaarika pikemisantzi. Pinkisashityaawo. <sup>4</sup> Piyaatakaairo pinkisashityaawo jirokapaini, aritake piñagairo pantakishiretai irojatz pithotyaaantaiyaawori.

<sup>5</sup> Tekaatsirika piyorenka pinkisashiwaitantyaari, pinkowakoteri Pawa, iriitake yotakaaimirone tsika pinkantya. Tema Pawa te ikisathatziri ikaatzi kowakoyetziriri. Aritake riyotakaaperotakeri, te riyotziro irirori rithañaawainetya. <sup>6</sup> Arika pinkowakoteri Pawa, eero pikantashirewaitzi: “¿Arima inkemakena Pawa okaatzi nokowakotziriri?” Tema ikaatzi kisoshirewaitatsiri roshiyakawo okantaganki inkaare kaari mairyaatatsiri arika itasonkaatero tampyaa. <sup>7</sup> Paamaya poshiyakotarikari kisoshireri, tema te iñaayetzziro irirori ikowakowetariri Awinkatharite. <sup>8</sup> Tema tzimatsi ikenkithashiryaaawetari ranterime, okanta oñaatamanai tzimatsi otsipa ikowiri ranteri, te apaani onkantya ikenkithashiryaaari.

<sup>9</sup> Ontzimatyeye inkimoshiretai ashironkainkaripaini kemisantanaatsiri, tema ari impinkatharitakaayetaari paata Pawa. <sup>10</sup> Ari inkantyaari eejatzi ashaagantzinkaripaini, ontzimatyeye inkimoshirete ithonkaiya okaatzi tzimimowetariri. Roshiyakotyaawo okantaganki inchatyaki opariteyatzi. <sup>11</sup> Arika roore antawoite ooryaatsiri okamatyatzi inchatyaki, eero iñagaitairo owaneenkateyatya. Ari inkantzitaiyaari eejatzi ashaagantzinkaripaini eero iñaakoitairi rowaneenkataiyyaawo rashaagawo.

### *Thaamentashire ankantya iñaantashiretairika*

<sup>12</sup> Arika añaawetyaawo ñaantsipookipaini, eekerorika aatakaanakityeero ankisashiwaitya, thame ankimoshirete, tema tzimatsi ikashaakaakairi Pawa, ikantakeranki: “Maawoini etakotanari naaka, nashi nowaatyeero nañaakaayetaari paata, noshiyaka-gairime namanthaitaateyerime.” <sup>13</sup> Arika ipokimotai ankowashiretero kaariperori, kaarira Pawa nintakaanterone. Tema Pawa, te iñaamatawo irirori. ¿Kantachama inintakagairo aaka? Eero. <sup>14</sup> Tema apatzziro aaka añaamatapiintakawo kaariperori, irootake akenkithashiryaaantawori. <sup>15</sup> Tema arika ipokimotai ankowashiretero antero, iroorika ankamaitanakyaaari ankenkithashiryaaakotero, aritake añaakero antero kaariperori. Irootake ankemaatsitantaiyaarime paata arika ankamai.

<sup>16</sup> Iyeekiite netakotané, paamaya otzimikari piyenakaashitane. <sup>17</sup> Tema okaatzi rantz-imoyetaari Pawa kameetha okanta, irootake rantapiintairi. Tema te ipashinitanetzi irirori, te roshiyari riwetsikanewo shipakiryaaayetsiri, añiiri rishitowamanai añiiri eejatzi arika inkyaanai ishaawiiteeni. <sup>18</sup> Tema ikowake irirori riyotakaayetaari kyaaryoperotatsiri riñaane, irootake etantyaawori aaka ankemisanteri, ari inkantaiyaari itsipa riwetsikanewo inkaate kemisantairine paata.

### *Tsika inkantanaiya kemisantairiri Pawa*

<sup>19</sup> Irootake nokantantari iyeekiite: Owayempita pinkantayetya, paminaperowaantetya, eero ayimawaitashitzimi pimashirenka. <sup>20</sup> Arika ayimawaitai amashirenka,

\* 1:1 Ikantaitziri jaka “rashiyetaari Pawa”, iriyyetake oshiyayetariri 12 itsipasatzi icharineyetaari Israel-ni.

eerowa amatziro ikowakaayetairi Pawa. <sup>21</sup> Okowaperotaty ookayetairo okaatzi owaariperoshiryagairi, tsinampashire ankantya ankemisantanairo ñaantsi, irootake materone owawisaakoshiretai.

<sup>22</sup> Iro kantzimaitacha ontzimatye antairo okaatzi akemayetakeri, eerorika amatziro ankemisantero, apaniroini amatawiwaitaka. <sup>23</sup> Tzimatsirika kemawetawori, temaita ikemisantziro okaatzi ikemawetakari, roshiyakari aminaatachari ñaarontsiki. <sup>24</sup> Apatziro iñaapootapainta, iro osamaniityaanake ipeyakotanairo ipoo tsika okanta iñaawetakawowa. <sup>25</sup> Tzimatsi itsipa aminaatachari, kaari peyakotzirori ipoo tsika okanta iñaakero. Ari ankantaiyaari aaka, akenkithashirya owanairo ñaantsi, eero apeyakotziro. Tema irootake matzirori okaakowentantzi. Kimoshire ankantawentaiyaawo onkaate antayetairi.

<sup>26</sup> Eenitatsi ñaawetakawori rimatakero ikemisantana. Iro kantzimaitacha te inethawaanteta thaiyawairentzi rinatzi, raminaashiwaitaka ikemisantzi, apaniroini ramatawiwaitaka. <sup>27</sup> Jiroka irooperori kameethatzimotzirori Ashitairi Pawa arika ankemisantana: Etakotaiyaari miritzipaini, ari ankantairo kamayetatsiri oime eejatzi. Ontzimatye ankiteshireyetai, eero oshiyakotari ikantayetaga saikashiwaitachari jaka kipatsiki.

## 2

### *Ikenkithatakoitziro yoyaashiwaitaantsi*

<sup>1</sup> Iyekiite, tema pikemisantairi Awinkatharite Jesucristo ipinkathaperoitziri, eero piyoyaantashiwaita. <sup>2</sup> Thame oshiyakaawentawakero: Arika piñeeri papatotapiintaga owaneenkatachari ikithaata, poreryaa ikanta romayetari rakoki, arika piñeeri inkyaa-paake itsipa owamatapookitachari iithaare, <sup>3</sup> iriitake piyoyaawakeri owaneenkatainchari posatekawakeri niyanki papatotaiyanira, iriima owamatapookiri, pinkantakeri: “Pinkatziyawake eeroka tekaatsi pisaikantya, terika pikowi pinkatziye, pisaike isaawiki.” <sup>4</sup> Arika pikantakeri, piyoyaantashiwaitakaga, tema apaani paapatziyawaka, iriima itsipa pimanintakeri. <sup>5</sup> Pinkemena nonkante iyekiite. Riyoyagairi Pawa ashironkainkaripaini, ikemisantakaaperotairi. Tema ikantzitaka Pawa ketziroini, ikantake: “Ari nompinkathariwentairi maawoini etakotaanari naaka.” <sup>6</sup> Iro kantzimaitacha eerokapaini, pimanintawaitakeri ashironkainkari. Pipeyakotakero ikisaneentapiintzimira ashaagantayetachari ikowi rowasanketakaantawaitemi. <sup>7</sup> Iriitake kyaaryootapiintatsi rithainkashirirowo iwairo pikemisantana.

<sup>8</sup> Imaperotatyaarika pikemisantanairo Otzinkami Inintakaantaitanewo, pantakerowa kameethari. Jiroka ikantaitziri “Otzinkami”: Petakotyaari pisheninka, poshiyakayeri petakotawo piwatha eeroka.

<sup>9</sup> Irooma piyoyaantashiwaitashitakyaarika, pikenakaashitakawo, aritake rowasankewentaitaimiro Inintakaantaitanewo. <sup>10</sup> Tzimatsirika kantatsine: “Nokemisantziro naaka maawoini Inintakaantaitanewo,” iro kantzimaitacha tzimatsirika apaani kaari ikemisantzi, tzimakera iyenakaashitanewo. <sup>11</sup> Tema ikantaitzi pairani:

Eero pimayempitzi.

Eero pitsitokantzi.

Te imayempiweeta, iro kantzimaitacha eenirorika ritsitokantaitzi, tzimakera iyenakaashitanewo. <sup>12</sup> Tema irootake kowaperotachari antairo Otzinkami Inintakaantaitanewo, ontzimatye antairo añaawaiyetziri eejatzi okaatzi antayetziri. Iroowa eero rowasanketantaitai paata, tema jiroka Otzinkami Inintakaantaitanewo ari isaikakaashiwaitai. <sup>13</sup> Tema eerorika etakoyetanta, ari rowasanketaitakai. Iroowa kowaperotacha etakotantya eero rowasanketantaitai.

*Te opantawo añaawaitashiwaitya*

<sup>14</sup> Iyekiite, eerorika amatanairo kameethatatsiri, aminaashiwaitaka akantzi: “Nawentaari Pawa.” Jiroka awentaashiwaitaantsi, te iro owawisaakoshiretantatsine.

<sup>15</sup> Thame oshiyakaawentawakero: Eenitatsi iyeki okoityiimotari iithaare, tasheyakineentake, <sup>16</sup> tema ari pinkanteri: “Pawisanake janta iyekí, aamaa ari impaitakemi pinkithaalyaari, powapaakya kameetha.” Tema te pipawakeri koityiimotariri, ¿Petakotakarima? Tera petakotari. <sup>17</sup> Ari okantzita eejatzi awentaawetari Pawa. Terika antayetziro kameethari, aminaashiwaitaka.

<sup>18</sup> Eejatzi oshiyawo intzimerika kantatsine: “Nawentaari Pawa.” Itsipa, ikantzi: “Nantziro kameethatatsiri.” Eerorika pantanairo eeroka kameethatatsiri, ¿kantachama poñaagantero pawentaanaari? Naakarika, ari noñaagakemiro nawentaanaari, nantanairo kameethatatsiri. <sup>19</sup> Pikantawetapiinta eeroka: “Niyotziri Pawa apaani ikanta.” Imaperowetalya. Iro kantzimaitacha rimatzirowo peyaripaini riyotziro jiroka, ithaawantari Pawa. <sup>20</sup> Kaari rikompitawaitaita, ontzimatyey ayoyetai aaka: terika antairo kameethatatsiri, aminaashiwaitaka awentaawetari Pawa. <sup>21</sup> Thame ankenkithashiretakoteri pairani Abraham-ni. Rishinetakeri itomi Isaac ritayenirime Pawa. Irootake ikantantakariri Pawa: Abraham, osheki nonintemi.

<sup>22</sup> Ari añiuro, te apatziro ikantake: “Nawentaari Pawa.” Tema rantakeniri okaatzi ikantziriri. Irootake opoñaantari roñaagantziro imaperotalya rawentaari Pawa. <sup>23</sup> Ari imonkaataka rosankenaitakeri pairani, okantzi: Rawentaakari Abraham Pawa, irootake roshiyakantantakariri rotampatzikashiretanewo.

Irootake opoñaantari ikantaitziri pairani Abraham-ni: Raapatziyanewo Pawa.

<sup>24</sup> Piñaakero. Te apatziro otampatzikashiryantzi ankante: “Nawentaari Pawa.” Ontzimatyey ankemisantairi eejatzi. <sup>25</sup> Ari okantakariri eejatzi pairani tsinane jitachari Rahab, mayempiwetachari. Okemisantairi iroori Pawa, irootake imanantakariri opankoki owayeri, irojatziri otyaantantaari ikenanairo otsipaki awotsi eero ritsitokaantaitari. Irootake rowamethashiretantaawori Pawa okemisantairira. <sup>26</sup> Eerorika otzimanai ashire, aminaashiwaita, peyakotakai. Ari oshiyawo eejatzi, eerorika antziro kameethatatsiri, aminaashiwaita awentaawetarira Pawa.

### 3

#### *Aminaperopaantetaantsi*

<sup>1</sup> Iyekiite, eero akowashiwaita ayotaantayete, ontzimatyey antairo okaatzi akenkithatakoyetziri. Paata, ari inkantayetai Pawa: “¿Pimatakeroma eeroka okaatzi piyotantziri?” <sup>2</sup> Otzimimotai maawoini ayenakaashitane. Tzimatsirika kisowaantetatsiri kaari kantzimoneentakayaarine isheninka, iriitake kameethashiretaatsiri, rimatairo ikempoyaaka kaari rantantaawo kaariperori. <sup>3</sup> Roosoponthoitziri kawayo, irootake itzimpatakoitantariri, irootake ikenantari tsikarika inintakagaitziri. Okaatziini inaweta itzimpatakoitantaaitariri, imatzimaitari okemakairi tsikarikapaini, tema antari rinaweta kawayo. <sup>4</sup> Pinkenkithashiryakotero antawo pitotsi. Arika ontampyaatakote niyankyaaneeki inkaare, otatsinkiro tampyaa tsikarika onintakaawo. Tzimimaitacha oomaro ontsiritziri, imatziro okenakairo tsikarika ikowiro komatzirori, okantawetaka te antawotzi komarontsi. <sup>5</sup> Ari oshiyawo eejatzi nenetsi, te antawoweta, irootake añaaawaitantapiintari. Ari oshiyitawo eejatzi paampari, oryaani inaweta owakera imorekanake, iro kantzimaitacha aritake imatakero ompaampatakaairo antawo owaantsi.

<sup>6</sup> Iroowa antziri eejatzi paantentsi oshiyawo paampari, arika añaaawaite eepichokiini, antawo owaariperoshirewaitakai, kantacha eejatzi añeero ashi owaitaaty-eero owaariperoshiretante. Tema sarinkawenisatzi yotakagairori añaaawaitantawori



owaariperoshiretantatsiri. <sup>7</sup> Pinkeme nonkante. Kantacha impiraityaari tsimeripaini, tsimeryaani, maankepaini, ñaaweripaini, maawoini. Ameyetachaga jirikapaini arika impiraityaari. <sup>8</sup> Tekaatsitzimaita atziri materone inkisowaantete, roshiyakairo jaka ipiraitari piratsi. Oshiyakari ipaante kepiyatatsiri kepiyatatsiri, owamaantanero inatzi. <sup>9</sup> Iroowa anene akantantapiintariri Pawa: “Ashitanarí, kameetha pinatzi.” Irojatzí anene athainkimatantariri atziri oshiyayetanaariri Pawa. <sup>10</sup> Apaani inaweta anene, irootake añaaawaitantawori kameethari, eejatzi kaariperori. Iyekiite, te onkameethate ankonowapookiyetero añaaaneyetari. <sup>11</sup> Pinkeme noshiyakaawentemiro. Tsikarika ishitowaatzi ñaa pochaari okanta, eero akemiro onkepishaate. <sup>12</sup> Iyekiite, ¿Kantachama añeero inchato ontzime okithoki pochatsiri, añeero eejatzi okithoki kepishitatsiri okaatzi añaaapintziri pankirentsiki? ¿Kantachama añaaapiintziri pankirentsi onkithokiantyaawo shiwithamaishi? Ari okantzitari ñaa, arika onkipachaate, eero añiuro onkityaate.\*

### *Inkiteki opoñaawo yorenkantsi*

<sup>13</sup> Oztimanairika ayorenka, akenkithashiryanaarika, etakotantya, tsinampashireri ankantya onkantakaakai ayorenka. <sup>14</sup> Iroowa añeorerika ankisashiryanaawaitante, te onkameethate ashamewaite. Anthaiya ankante: “Yotzinkari ninatzi.” <sup>15</sup> Arika antero jiroka, kaarira Pawa yotakagairone. Irootake ikenkithashiretakaantziri Kamaari. <sup>16</sup> Arika ankisashiryanaawaitaite, eerowa amatziro ariperotawakaiya, kaariperoshireri akantapiintaka. <sup>17</sup> Iro kantzimaitacha, iriirika Pawa kowakagairone ontzime ayorenka, aritake ankameethashiretanai, eero akisashirewaitanaawo, etakotantaneri anatyte, eero apiyathatanaawo eejatzi, neshironkatantaneri ankantante, owameethatero antayetzi, kyaaryopero ankantanaiya, eero akamatawitantanai eejatzi. <sup>18</sup> Arika aakameethatawakaanaiya, aritake añagairo paata rowameethashireperotaitai. Oshiyaawo arika ampankiwaite, añagairo paata owiitairo okithoki.

## 4

### *Aapatziyawori isaawikisato*

<sup>1</sup> ¿Iitaka opoñaantari omanarentsita? ¿Iitaka ikisawakaantari atziripaini? ¿Kaarima kantakaantzirori iñaawenatawowa okaatzi ikoityaayetzi? <sup>2</sup> Iñaamakitakawo tsikarika oita, tetzimaita otzimotziri. Ikisakoneentakawo rashitari itsipa, tema te otzimotziri irirori. Ritsitokantawetaka, romanatantawetaka, te iñiimaitawo ontzimimoteri ikowayewetari, tema te inkowakotatyeeeri Pawa. <sup>3</sup> Rimawetakawo ikowakotziri Pawa okaatzi ikowayetzi, te ipimaitari. Ikowakowentashita rantantyaawori inimotziriri irirori. <sup>4</sup> Roshiyashitakawo kaari kinatari oime, oñaakera itsipa, irootake okisaneentantariri oime. Ari ikantakari maawoini kowayetzirori raapatziyaawo isaawikisato, ikisaneentatziirira Pawa. <sup>5</sup> ¿Aminaashitama rosankenaitakeri pairani, kantatsiri: “Rotyaantakeri Pawa Tasorenkantsi neshironkatatine, iriitake kempoyagaine eero antantayetaawo kaariperori?” <sup>6</sup> Retakotai Pawa, iro okantantari osankenarentsi: Osheki rowasanketairi Pawa ñaaperowaitachari, iriima tsinampashireri osheki retakotaiyaari irirori.

<sup>7</sup> Iroowa nokantantari naaka: Patsipewentaiyaawo ikowakaimiri Pawa. Pipiyatyaari Kamaari, ari piñaakero ripakagaimi irirori. <sup>8</sup> Kenkithashire powanairi Pawa,

\* **3:12** Kantakotachari jaka “okithoki pochatsiri”, irootake iitaitziri “higo”. Kantakotachari “okithoki kepishitatsiri”, irootake iitaitziri “aceituna”. Kantakotachari “pankirentsi”, irootake iitaitziri “higo”. Kantakotachari “shiwithamaishi”, irootake iitaitziri “uva”.

kisokero rowanakemi irirori. Kaariperoshireri pinaweta, pipakagairo. Pithopithowairentzi pinaweta, pintampatzikashiretai. <sup>9</sup> Pinkenkithashiretakotairo pantayewetakari, pikimoshirewentashitakawo kaariperori. Ontzimatyepowashiretakotaiyaawo pikimoshirewentashitakari pairani. <sup>10</sup> Tsinampashire pinkantawentanaiyaari Awinkatharite, tema iriitake pinkatharitakagaimine paata.

### *Kantakotawakagaantsi*

<sup>11</sup> Iyekiite, te okameethatzi ankantakotawakaiya. Arika pinkantakoteri itsipa, pithainkatzirowa Inintakaantaitanewo. <sup>12</sup> Apaniroini ikanta osankenatakaantakerori pairani Inintakaantaitziri, iriitake matzirori rowawisaakoshiretantzi, irijatzi matzirori rowasanketantzi sarinkaweniki. Tekaatsi aitya aaka ankantakotantyaariri itsipa atziri.

### *Te ishamewentaitziro antairi paata*

<sup>13</sup> Eenitatsi kantashiwaitachari: “Nokowi niyaate oñaatamanai nampitsiki, apaani osarentsi nisaikawaite janta, nompimantayete oitarika, naye osheki nokowayetziri.” <sup>14</sup> Te riyotzimaitawo jirika oitarika awishimoterine inkaamani. Oshiyatyaawowa añamento menkoreenkaki. Te ishenkaaneta, eepichokiini onkantapaintya, ari ompeyanaiya, eero añanaairo. <sup>15</sup> Jiroka inkantaitemi: “Iriitake Pawa penawone nañamento, ari nimatakeri ikowakaanari irirori.” <sup>16</sup> Iro kanzimaitacha, rawentaashiwaitakawo okaatzi ishamewentawaitziri irirori. Aminaashiwaitaantsi inatzi, te ompantyaawo. <sup>17</sup> Arika ayowetyaawo owameethashiretantatsiri, eerorika ayotaantzi tsikarikapaini, tzimakera ayenakaashitane, kaariperoshiretakai.

## 5

### *Ikenkithatakoitziri ashaagantzinkari owashironkaantatsiri*

<sup>1</sup> Pinkeme ashaagantzinkaripaini. Piraakoshiretaiya eeroka, irootaintsi piñagairo pashironkaawaitaiya. <sup>2</sup> Ari ipathaayetai maawoini pashaagawo. Omperimawoyetai piithaare. <sup>3</sup> Rithonkya ripowayetai piyorikite, poreryaayetatsiri, maawoini. Ari riyotaitemiri papatotashitakari, iriitake taakagaimine paata. ¿Irootakema papatotantakariri? <sup>4</sup> Riyotakemi Pawa te petakotanta, irootake rowasanketantaimiri. Te pipinayetziri patzirite, papatotashitakawo pashaagawo. Ikishimatakemira patzirite, ikemake Pinkatharipero. <sup>5</sup> Apaniroini pinintaawaitaka, te pikenkithashiretakotziri itsipa, apatziro pikimoshirewentakero pashaagawo. Poshiyakari piratsi rowathantaitziri, arika inkyeetake kameetha, inkantake ashitariri: “Jame oyaari nopira, wathatake kameethaini.” Ari inkantaiyaari Pawa irirori, inkantai: “Osheki rashaagawo jirika, piñaakowentero nowasanketeri.” <sup>6</sup> Powashironkaake osheki kameethashireri, kamayetake, te piñaawetyaawo ripiyakowentya.

### *Kisashire pinkantya, pamanaiya*

<sup>7</sup> Iyekiite, kisashire pinkantya poyagairi ripokai Awinkatharite. Poshiyaiyaari pankiwairantzi, ikisashitawo ikanta royaawentziro inkani omparyaakote iwankire iñaantyaawori onkithokite. <sup>8</sup> Ari pinkantyaari eeroka, kisashire pinkantya poyaawentya, kisokero poweri, tema eero osamani onkantya ripokantaiyaari Awinkatharite. <sup>9</sup> Irootake iyekiite, kaari ishinetantsitanta pinkantakoteri itsipa atziri. Tema pokimatai kantayetapaimine eeroka, inkantemi: “Pantakero kaariperori.” <sup>10</sup> Pinkenkithashiryakoteri Kamantantaneri pairani. Pawaga otyaantakeriri inkenkithatakotairi. Oshekimaita ikemaatsiwaitakawo irirori, kisashiwairantzi ikantaka royaawentziri Awinkatharite. Arira pinkantaiyaari eejatzi eeroka. <sup>11</sup> Oshekira inkimoshiretai atsipetawori ikemaatsiwaita. Roshiyakotaiyaari Job-ni, kisashiwairantzi ikantaka royaawentziri Awinkatharite, ikemaatsiwentakari. ¿Tema ineshironkatakari Pawa? Ayotzi rashi rowatziro ineshironkatantzi Pawa.

<sup>12</sup> Iro kantzimaitacha iyekiite, ontzimerika pinkenkithatakoyeteri, eero paakowait-ashitari inkitesatzi eejatzi kipatsisato. Imaperorika pantero okaatzi pikantziri, pinkante: “¡Jee!” Irooma eerorika pantziro, pinkante: “¡Eero!” Kyaa rowasanketaitzimi.

<sup>13</sup> Piñeerorika onkantzimoshirewaitemi, pamañaari Pawa. Irooma pikimoshirewaitzirika, pomampaakotyaari Pawa. <sup>14</sup> Pimantsiyawaitzirika, pinkaimakaanteri itzinkamipaini kemisantzinkari, ripoke ramanakotemi, ari ritziritantakemiro oyeenka pankirentsi raakotanakeri iwairo Awinkatharite. <sup>15</sup> Irooperorika ramanakotantya kemisantzinkari, aritake retsiyatakotakagairi Pawa mantsiyawetachari. Iroorika kantaakaawori ikaariperoshirewaitzi imantsiyatantakari, aritake impeyakotainiri eejatzi.

<sup>16</sup> Pikantzimoneentakaaririka pisheninka, pinkantairi: “Pimpeyakotainawo.” Pamañaari Pawa eejatzi, pinkanteri: “Ashitanari, petsiyatakotakagairi mantsiyatatsiri.” Tema arika ramanakotantya kameethashireri, rantaitziniri okaatzi ikowiri. <sup>17</sup> Tema atziri rinatzi eejatzi pairani Elías, ari roshiyayetai aaka awathaki. Iro kantzimaitacha ikemisantakeri kameethaini Pawa. Ikowakotakeri Pawa eero oparyaanta inkani. Mataka, tema awisaneentanakero mawa osarentsi te oparyaagai inkani. <sup>18</sup> Ikanta rapiitairo ikowakotairi, irojatzi oparyaantanaawo inkani. Shookayetanai pankirentsi.

<sup>19</sup> Iyekiite, arika pinkemisantakagairi pakaawetawori ikemisantziri Pawa, <sup>20</sup> powawisaakotairira ikaariperoshirewetakaga. Jawetaaga sarinkaweniki arikame inkamaime. Tema maperotata ikaariperoshirewetaka, iro kantzimaitacha kemisantai eejatzi, ari impeyakotainiri Pawa maawoini okaatzi rantawetakari, eero ikenkithatairo.

## RETAKARI ROSANKENARE PEDRO

### *Wethataantsi*

<sup>1</sup> Naaka Pedro osankenatzimirori jiroka. Eerokapaini nosankenatzini pikaatzi te isheninkataitzimi tsika pisaikayetzi, tema intainaryaayetakemi pinampiyetawowa: Ponto-ki, Galacia-ki, Capadocia-ki, Asia-ki eejatzi Bitinia-ki. \* <sup>2</sup> Riyotzitaka Pawa pairani ari riyoyaimi rowameethashiretaimi. Ari pinkemisantairi Jesucristo kapathainkataintsiri ikamawentakemi. ¡Onkamintha ineshironkayetaimi, risaikakagaimi kameetha!

### *Añaashiretakaantzi oyaakoneentziri*

<sup>3</sup> Anthaamentaiyaari Pawa, iri Ipaapatetari Awinkatharite Jesucristo, tema ineshironkaperotai oshiyawaitaawo owakerame antzimayetaime. Añaashiretakaayetai oyaakoneentziri, tema añagai Jesucristo ikamawetakaga pairani. <sup>4</sup> Iro ankowaperotairi ikashaakagairi, ari ashi owatyeero añeero, eero ithonkaa. Irojatzi ikashaakagaitakemiri eerokapaini inkiteki. <sup>5</sup> Iroowa ishintsinka Pawa ikempoyaawentantaimiri eerokapaini. Iri kantakaawori pinkemisantantaariri rowawisaakoshiretantaimiri paata. <sup>6</sup> Iro pikimoshiretantakari, piñaayetzirowa pikemaatsiwetapainta, iñaantashiretaitzimi. <sup>7</sup> Roshiyakagaitakemi ooro, ritagaitziri iñagaitantyaariri kameetharika rini. Ikantawetaka jirika ooro te ashi rowatyeero iñagaiteri, ari rithonkaiya. Iro kantacha, arika ripiyapaake Jesucristo, ari iñagaitemi imaperorika pikemisantakeri. Arira inthaamentaiyaari Cristo, pinkatha rowaitairi, osheki inkenkithatakoitairo rowaneenkawo. <sup>8</sup> Pinintaperotanewo powairi Cristo okantawetaka te piñiiri. Pikemisantairi, kimoshire pikantawentakari, okantaweta te piñaawetari iroñaaka. <sup>9</sup> Pimatakeri pikemisantairi, iroowa piñaantaiyaawori rowawisaakoshireyetaimi.

<sup>10</sup> Ithawetakotakemi pairani Kamantantaneriite ineshironkaitaimi, ari piñagairo rowawisaakoshiretaimi. Ramatsinkawentakawo, osheki rosampikowentakero, <sup>11</sup> ikowakitake riyoteri owawisaakotantaneri tsikapaite inkoñaate. Tema Itasorenka Cristo thawetakaayetakeriri, osheki inkemaatsitakaaweetyaari Cristo, irojatzi iñaantakyaawori rowaneenkawo. <sup>12</sup> Tzimatsira yotakaakeriri Kamantantaneriite, tera iri ñeerone, tema eerokapaini ñaakerori. Pikemayetairo iroñaaka Kameethari Ñaantsi. Rotyaantaitakeri Tasorenkantsi ipoñaakawo inkiteki inkenkithatakaantakemirori. Irojatzi ikowakeri maninkariite ikowawetaikari inkemathatairo.

### *Tasorentsishire ankantawentaiyaari Pawa*

<sup>13</sup> Aamaawenta onkantya pikenkithashiryaane, poshiyakotyaari omathakitziroori iithaare. Kameetha pinkenkithashiryaanaiya. Oyaawenta pinkantya ineshironkapaime Jesucristo arika ripiyai. <sup>14</sup> Poshiyakotyaari shirethatachari eentsi. Eero pantashiwaitawo piñaamatashiyetari, okantakaimi te piyowaitzi. <sup>15</sup> Iri poshiyakotaiya Tasorentsi kaimashiretakemiri. Iri kiteshiretakagaimine maawoini onkaatera pantairi. <sup>16</sup> Tema osankenataka kantatsiri:

Pinkiteshiretai, tema naaka Kiteshireri.

<sup>17</sup> Tema pikantapiintziri “Papá” jirika kaari amaakitantsine aminakoyetairone paata okaatzi rantayetakeri atziripaini, ontzimatyepinkemisantairi eenirowa pisaiki jaka kipatsiki. <sup>18</sup> Tema piyotzi kaari koriki, kaari ooro ripinawentantaitakemiri, pawisakotantaari pisaikawaiwetakaga jakaperoiteeni poshiyakotari picharineni. Tema te ipantaperotari ooro eejatzi koriki, ari rithonkaiya paata. <sup>19</sup> Tema iro riraa Cristo

\* **1:1** Ikantakoitziri “pikaatzi te isheninkataitzimi tsika pisaikayetzi”, eenitatsi kantayetatsiri iriira ikantakoitziri kemisantzinkaripaini saikimotziriri isaawikisatzipaini kaari rashiyetari Pawa.

ripinakowentantaitakemiri, roshiyakotakari piratsi oweja kaari tzimatsine iyaariperonka, tekaatsi inkantawaitya iwathaki. <sup>20</sup> Tekera riwetsikanakeroota Pawa kipatsi riyotzitaka oita ranteri Cristo. Iro kantacha owakera piñeero iroñaaka, ripokake, rowawisaakoshiretami. <sup>21</sup> Okaatzi rantakeri Cristo, iroowa opoñaantari pawentaashiryagaari Pawa. Tema iri Pawa owañagairi, iñagaitantaawori rowaneenkawo. Oyaakoneenta powairi iroñaaka Pawa pawentagaarira.

<sup>22</sup> Tema shiretha pikantawentakawo irooperori, kiteshire pikantayetaa, petakotapi-intaari maawoini piyetziri “iyekiite”. <sup>23</sup> Tema oshiyawaitaawo papiitaatyeeerome pintzimayetaime. Iri kantacha ikaatzi pipaapatetaari, kaari atziri kaamaneri, kañaaneri rini irirori. Okanta apiitantaari itzimakaayetaimi, iroowa riñaane, kañaanetatsiri eejatzi.

<sup>24</sup> Tema:

Awatha oshiyawaitakawo inchashi.

Tzimawetacha owaneenkawo, oshiyawaitakawo inchashi otzimi oteyaki.

Iro kantacha isampishitzi inchashi

Opariteyatzi eejatzi.

<sup>25</sup> Iroowa riñaane Awinkatharite ashi owaatyeeero.

Iroowa jiroka ñaantsi ikamantaitakemiri eeroka.

## 2

<sup>1</sup> Iroowa pipakaantyaawori pikaariperotzi, eero pithaiya, eero pikamataworetzi, eero piñaamawaineta, eero powapeyimotanta. <sup>2</sup> Poshiyakotaiyaari eenchaaniki eeni ithotzi iteni. Ari pinkantaiyaari eerokapaini, pinkowairo tasorentsitsiri antakishiretaka-gaimine, ompoñaantaiyaari pawisakoshiretai paata, <sup>3</sup> tema piñaakero ineshironkayetaimi Awinkatharite.

### *Mapitatsiri kañaaneri*

<sup>4</sup> Pinkemisanteri eerokapaini oshiyakawori mapi, kañaaneri rini irirori. Oshekira atziri manintakerori mapi, iri kantacha Pawa roshiyakagairi ikowaperoitziri mapi, osheki ipinata. <sup>5</sup> Ari pikantzitaari eerokapaini poshiyakotaawo mapi, ragaitziri riwet-sikaitantyaawo pankotsi, okantawetaka te poshiyakoperotawo mapi, tema añaatsimi eeroka. Poshiyakotaiyaari Imperatasorentsitaarewo saikantaawori jiroka pankotsi, poshiyakagairome pitaashiretatyeerome inimotairine Pawa, okantakaantziro okaatzi rantayetakeri Jesucristo. <sup>6</sup> Tema iro okantziri Osankenarentsiperoro:

Nowairo mapi ikowaperoitane janta ochempiki Sion. Iroowa otziyantairone omerekitonkiki pankotsi. Osheki owinawo jiroka.

Inkaate awentaashiretaiyaarine oshiyakawori mapi, eero raminaashiwaitaawo paata.

<sup>7</sup> Eerokapaini pikaatzi pikemisantai, pinintagaawo mapi pinakiperotachari. Iriima kaari kemisantatsine, te iñiirori iriroripaini, iriira okenkithatakotakeri Osankenarentsiperoro:

Imanintawetakawo mapi wetsikirori pankotsi,

Iro kantacha rowaitairo omerekiki pankotsi roshiyakagaitairo iroome tzinkamitsi.

<sup>8</sup> Ikantaitake eejatzi:

Owaryaantzi mapi, arika rontziwaityaawo.

Tema oshiyawaitakawo imparyaantatyeeyaawome mapi ikaatzi piyathataawori ñaantsi.

Iriira riyoshiitairi Pawa rowasanketairi.

### *Isheninkaitaari Pawa*

<sup>9</sup> Iroowa eerokapaini, jiroka pikantayetaari:

Riyoyagairi Pawa pisheninkapaini,

Rimperatasorentsitaimi Pinkathari,

Rinashitaimi, te poshiyari itsipasatzi, roiteshiretami,

Rashiyetaimi Pawa.



Ari pikantayetaari imatantaari pinkenkithatakotairo kameethaini tsika okanta ikaimashireyetaimi pisaikawetaga otsirenikiperotzira, oshiyawaitaawo iroñaaka pisaikatyeeme tsika roitesheenkatziro irirori. <sup>10</sup> Pairani eerokapaini te pisheninkatawakaaweta, irooma iroñaaka pimatairo isheninkataimi Pawa. Pairani eerokapaini te pitsipawetari ineshironkatanewo Pawa, irooma iroñaaka piñagairo ineshironkaitaimi.

### *Rimperatane rowanai Pawa*

<sup>11</sup> Netakotaneeté, poshiyakagairo eerokapaini eerome pisheninkataari isaawikisatzi. Iro noshintsithatantzimiri pipakagairo piñaamatashiyetawo isaawikisato. Tema iro oshiyakawori iroome koshekashireyeteimine. <sup>12</sup> Onkaate pantayetaari, kameetha inimoyetaari itsipapaini. Aamaa tzimatsi kishimawaitzimiri, iro kantacha arika iñaapiintanaimi pantanairo kameethari, ari riwetsikashiretanaiya, inthaamentanaiyaari Pawa.

<sup>13</sup> Ikowi Awinkatharite eero pipiyathayetari ikaatzi jewatzimiri pinampiki. Ari pinkantzityaari itzinkami jewatatsiri pinampiiteki. <sup>14</sup> Eero pipiyathatari eejatzi rotyaantanewo owasankeyeterine kaariperori, iri rasagaari itsipapaini antayetzirori kameethari. <sup>15</sup> Iroowa ikowakaimiri Pawa. Arika pantanairo tampatzikatatsiri, ari romairyaakeri kaari yowaitatsiri inkowe inkantakowaitemime. <sup>16</sup> Saikashiwaitaimi eerokapaini. Eerowa pantanairo kaariperori, ontzimatyete poshiyakotaiyaari rimperatanewo Pawa. <sup>17</sup> Pimpinkathateri maawoini. Petakotyaari iyekiite. Pinkatha poweri Pawa. Pimpinkathatairi jewatzimiri pinampiki.

<sup>18</sup> Rimperaitari, shiretha pinkantya rimperaitemirika. Te apatziro pimpinkathateri aakameethatzimiri, ari pinkantzityaari owatsimaawaitzimiri. <sup>19</sup> Tzimatsirika antakerone ikowiri Pawa, inkisashitakyaawo imanintawaitaitakerira, iriira rasagaawentyaari itsipapaini iñaakerira rimatakero kameethari. <sup>20</sup> Tzimatsirika kisashitakyaawone rowasankewentaitziri kaariperori, tekaatsi asagaawentyaarine. Irooma eerokapaini, arika pinkisashitakyaawo rowasankewentaitemiro tampatzikari, iroowa inimoterine Pawa. <sup>21</sup> Iroowa ikaimashiretantaitakemiri, tema Cristo kemaatsitakowentakemiri eeroka. Iroowa roñaagantapaintzimirori onkaate pantairi eeroka.

<sup>22</sup> Tekaatsi kaariperori rantapainte irirori, Te ithaiyawaantetapainta.

<sup>23</sup> Ikaweyawaitaitakeri pairani irirori, te ripiyatantya. Ikanta rowasankewaitaitakeri, te rasariimatantya, iri rawentaaperotaka yoperotzirori tampatzikari. <sup>24</sup> Ikanta iken-takoitakeri, okantakaantziro ayaariperonka. Iro añaantaiyaawori apakagairo kaariperori, kameethashire ankantaiya, oshiyakagairome ankamaatyeme, añaayetaime eejatzi. Tema:

Rowatsinaawaitaitakeri pairani, ikemaatsitakagaitakari, Iroowa pawisakoshiretantaari eerokapaini iroñaaka.

<sup>25</sup> Pairani eerokapaini poshiyakari tzipinari oweja. Iro kantacha oshiyaawo pipiyaatyeme risaikira kempoyiiriri oweja, iriira kempoyaashiretairi.

## 3

### *Rantayetaari aawakagaachari*

<sup>1</sup> Jiroka pinkantayetyaari eerokapaini iinantaitari, shiretha pinkantzimotyaari pime. Tzimatsirika apawopaini kaari kemisantzirori riñaane Pawa. Amaashitya ari pinkemisantakagairi arika iñaakemi jimpe pikantanaawo eeroka, <sup>2</sup> kiteshire pinanai, pinkatha pikantantzi. <sup>3</sup> Eero iñaasaimpyaashitzimi owaneenka pikanta, pimpitayetziro piishi, piporekayete, owaneenka pinkithaayetya. <sup>4</sup> Iro kameethatatsiri pantanairo kaari koñaanetatsine, pinkameethashiretai. Tema arika antsinampashirewaite

eero athaawakowaita, ashi owatziiro iroori te ithonkaneta, iro ikowaperotziri Pawa. <sup>5</sup> Ari okantayetakari pairani kiteshirero awentaashiretakariri Pawa, pinkatha owayet-ziri oime. <sup>6</sup> Okantaganki Sara shiretha okantzimotari Abraham, okantziri oime: “Nowinkathatané”. Eerokaga osawoyetanaiyaame arika pantanairo tampatzikatatsiri. Iro ompoñaantyaari eero otzimanta oita pinthaawantyaari inkisantaitemiri.

<sup>7</sup> Ari pinkantyaari eerokapaini iimentaitari, pimatairo pariperotairo piinapaini. Pineshironkatairo, tsinane ini iroori. Poshiyakayero inethagaitziro sataanetatsiri iramentotsi. Pinkatha powero tema ineshironkataitziro iroori añashireyetaira roshiyakagaitakemira eeroka, te opashinitzi okaatzi ikashaakagaitakemiri. Iro pantanairi eero omanonkanta pamananewo.

*Pankenawentawori rantayetairo kameethatatsiri*

<sup>8</sup> Ari okantari: aapatziya pinkantawakagaiya, neshironka pinkantante, petakotawakagaiya tema oshiyawaitaawo pirentzitawakagaatyeyyaame. Neshironka powanairi pitsipayetari. Tsinampashire pinkantya. <sup>9</sup> Eero pikemaatsitakaari kemaatsitakaimiri eeroka, eero pikaweyiri ikaatzi kaweyimiri eeroka. Ontzimatyey paakameethatairi oshiyawaityaawo pitasonkawentatyeeerime. Tema iro ikaimashiretantakemiri Pawa ritasonkawentayetaimi eeroka. <sup>10</sup> Tema:

Ikaatzi ñaawenatawori inintaawaitya kameetha rañe,  
Ripakagairo ikaweyawaitantzi, ikamatawiriwaantetzi.

<sup>11</sup> Ontzimatyey ripakagairo kaariperori. Iro kameethatatsiri rantairo kameethari.  
Iro inkowapiintai raapatziyawakaayetaiya.

<sup>12</sup> Tema riyotziri Awinkatharite ikaatzi kameethashireri.  
Owayempita rowiri ikaatzi amanamanaatariri.

Iriima kaariperoshireripaini, katsima raminiri Awinkatharite.

<sup>13</sup> Imaperorika paamanaiya pantanairo kameethatatsiri, ¿eenitatsima kemaatsitakaimine? <sup>14</sup> Eenitatsirika owasanketakemine pantzirowa kameethatatsiri, ari ritasonkawentakemi Pawa. Tema ikantaitake:

Eero pithaawakiperotashita, eero okantzimoshirewaitashitzimi eejatzi.

<sup>15</sup> Iro kameethatatsi poshiretaiyaari Cristo, iri pimpinkathaperotairi. Wetsika pinkantaiya pinkamantantero tsika okantakota poyaakoneentziri, arika rosampitaitemi. Iro kantacha neshironka pinkamantante, pinkatha pinkantante eejatzi. <sup>16</sup> Eekero piyaatatyey pinkenkithashireero kameethatatsiri, pantayetairo kameethatatsiri itsipashiretaimira Cristo. Aamaashitaiya ari inkaaniwentaiya ikaatzi thaiyakowetzimiri.

<sup>17</sup> Iroorika ikowiri Pawa, iro kameethatatsiri pinkemaatsiwentyaawo pantanairo irooperori. Iro maperotzirori rowasankewentaitemiro kaariperori. <sup>18</sup> Ari ikantzitaka Cristo, ikamawentapaintziri tampatzikashireri eejatzi tzipinashireri. Iroowa rantankawori jiroka intsipashiretakaanairiri Pawa. Osheki ikemaatsiwathatakaaweetakari, iro kantacha rowañashiretaitairi. <sup>19</sup> Iri jatashiretaintsiri ikenkithatakagairi ishire ikaatzi etawetakawori pairani romonkyashirewetaitakari. <sup>20</sup> Osheki ripiyathawaitaka iriroripaini riwetsikantakawori pairani Noé antawoite pitotsi, oyaawentacha Pawa te ithaankewaitzi. Iri kantacha apanipaini atziri awisakotaatsiri ripiinkeme, ikamatsitzi 8. <sup>21</sup> Iri poshiyakotaari eerokapaini pawisakoshireyetai pomitsitsiyaayetaa. Jiroka omitsitsiyaataantsi te oshiyaatsikaitawo ripiinkaite ñaaki inkiwaitero ikipatsiwathaitzira. Tema amanaantsi ini, tsika ikowakoitziri Pawa inkenkithashiretakaantero kameethatatsiri. Iroowa rañaantaari Jesucristo. <sup>22</sup> Risaikapai inkiteki Cristo rakoperoki Pawa ipinkathariwentairi maninkariite, ipinkathariwentairi inkiteweri pinkatharitat-siri, reewatairi tzimayetatsiri ishintsinka.

## 4

*Antawaitainiri kameetha Pawa tema eenitatsi rimatakaayetairi*

<sup>1</sup> Ari okanta, ikemaatsitakowentai Cristo. Iroowa paamaakishireperotantaiyaari eeroka, eero romapokantaitzimi. Ikaatzi ñiirori ikemaatsitakaitari, te ikowairo rantairo kaariperori. <sup>2</sup> Ari pinkantaiyaari eerokapaini eeniro pisaikayetzi isaawiki, iro pantapiintairi ikowiri Pawa. Eero pantashiyetawo piñaamatayetari, iro rantapiintakeri itsipa atziri. <sup>3</sup> Iro pantapiintawetakari pairani, poshiyakari itsipa atziripaini ñaawenawaitachari. Tema rametapiintakawo imayempyaakitzi, ipankenawaita, ishinkiwaita, iñaamatawo roimoshirenkawaita rantantyaawori kaariperori, osomiyawairentzi rini, ramanapiintakawo jimpe oiyeta roshiyakayiro iriime pawa. <sup>4</sup> Osheki ikompitzi-motakari ikaatzi pitsipawetari pairani, te inimoteri pipakaanakero pitsipatari rantayetziro kaariperori. Iro opoñaantari ikishimawaitanakemi. <sup>5</sup> Iri kantacha jirikapaini rowasanketairi paata Pawa. Tema Pawa, yotzirori maawoini rantayetziro añaayetatsiri iroñaaka, rantayetakeri eejatzi kamayetaintsiri. <sup>6</sup> Iroowa ikenkithatantaitakawori Kameethari Ñaantsi, rimataitakeniri kamayetaintsiri. Ari rowasanketaitakeri ikamayetakera, iroowa opoñaantari rowañaashireyetairi Pawa.

<sup>7</sup> Irootaintsi ithonkaiya jiroka kipatsi. Iro pinkenkithashiryaaantaiyaari pantairo kameethatatsiri, kamaita pinkantya pamanamanaataiya. <sup>8</sup> Iro kowaperotachari, petakotawakaanaiya. Tema:

Ikaatzi etakoyetaiyaari aaka, amaakitainiri rowaariperotaira.

<sup>9</sup> Poimaantapiinte pipankoki, eero pikiñaanewentakotziro. <sup>10</sup> Ritasonkawentaitakemi pantantyaawori rimatakagaimiri Pawa. Okaatzi rimatakaayetaimiri eeroka, pamitakotairi itsipa, pantairo kameethatatsiri, ineshironkataimi eeroka Pawa. <sup>11</sup> Noshiyakaawentemiro jimpe okanta ritasonkawentantzi Pawa: Ikaatzi rowaitakeri inkenkithate, ontzimatyey riyote Pawaga riñaawaiwentzi. Ikaatzi rowaitakeri ineshironkatante, rantawaitantyaawo ishintsinka Pawa. Iroowa impinkathaitantaityaariri Pawa, inkantakayaawo Jesucristo oshekitzimotairi rowaneenkawo, ari rashi rowaatyeero impinkathariwentantai. Ari onkantaitaatyeeyaani.

### *Akemisantaira osheki ankemaatsityaari*

<sup>12</sup> Netakotané, kyaa omapokimikari arika piñaakero ñaantsipooki. Tera awishimotashitemi jiroka, iñaantaitatziimi. <sup>13</sup> Iroowa ikemaatsitapaintari eejatzi Cristo. Arika piñeero eeroka inkemaatsitakagaitemi ikantaitakerira irirori, pinkimoshirete. Tema ari pinkimoshireperotai ripiyairika irirori ramairo rowaneenkawo. <sup>14</sup> Arika inkishimawentaitemiri pawentaanaari Cristo, tasonkawentaarewo pini eeroka. Iroowa ooñaawontzirori risaikantatziimi Itasorenka Pawa. <sup>15</sup> Te onkameethate pitsitokante, pinkoshitante, pinkaariperote, pinkoshekantya, ari piñaakero rowasankewentaitemiro. <sup>16</sup> Iroorika rowasankewentaitemiri rashitaimira Cristo, eero pikaaniwentawaita. Tema iro kameethatatsi pinkimoshirewentairi Pawa iyeetaimi “Cristo-weri”. <sup>17</sup> Tema matataika iroñaaka riyakowentante Pawa. Aakapaini akaatzira rashiyetai, retakai rowasanketakai. Iriira maperotaachane inkemaatsitaiya ikaatzi thainkakerori Kameethari Ñaantsi.

<sup>18</sup> Tema osheki pomeentsizimotariri kameethashireripaini rawisakoshiretantaiyaari, ¿Oitaka awishimotairine kaariperoshireri thainkatasorentsitsitsiri?

<sup>19</sup> Tema ikaatzi kemaatsiwaitachari iroñaaka, iriitake Pawa shinetakeriri inkemaatsiwaitya. Ontzimatyey rawentaashiretaiyaari wetsikakeriri, rantayetairo okaatzi tampatzikatatsiri.

## 5

### *Ikaminaitziriri kemisantzinkaripaini*

<sup>1</sup> ¡Jewari! Jiroka nonkamantemiri pikaatzira itzinkamitetzimi kemisantzinkaripaini. Eejatzi nokantzita naaka, itzinkamitetzitana kemisantzinkaripaini, aritake

akaataiyini. Naaka ñaakeri Cristo tsika ikanta ikemaatsitakagaitakari, ari nimatairo naaka ñagaitairi paata owaneenkaperori onkantaiya. <sup>2</sup> Jiroka nonkaminairi: Kempoyaa powairi kemisantzinkaripaini poshiyakayeri ikempoyagaitziri ipiraitari. Ero pantashiwaitawo arika rotsiwakakagaitemiro pantero, iriirika Pawa kowakaimirone, pimatero. Ero pantziro pinkowashityaari paantyaawo koriki, iroowa pantantyaawori pinkowashiryaaanakerorika eeroka. <sup>3</sup> Ero pikowashiwaita pimperatantya, ontzimatye poñaayeri pikempoyaanewo pantanairi eeroka onkene rimatanairo iriroripaini. <sup>4</sup> Tema paata arika inkoñaatapai Itzinkamikiperotari kempoyiiriri ipiraitari, ari ramanthaitantaimiro owaneenkatachari shipakiryaaari kantaitaachari. <sup>5</sup> Eeroka ewankaripaini pimpinkathateri itzinkamipaini. Ontzimatye pimpinkathatawakaanaiya maawoini.

Tema:

Te ikowiri Pawa asagaawentawarentzi,

Iriima tsinampashiretatsiri, osheki ineshironkatairi.

<sup>6</sup> Tsinampa pinkantawentyaawo rimatakaayetaimiri Pawa. Irojatzzi paata arika imonkaataiya ikowakeri irirori, iri kantakayaawone impinkathatantaitemiri.

<sup>7</sup> Arika piñaayetero onkantzimoshirewaitemi, pawentaiyaari Pawa. Tema iri neshironkatemine. <sup>8</sup> Pinkenkithashiretakotairo kameethari, aamaawentashireri pinkantya. Tema Kamaari kisaneentairi, roshiyakari manitzi kenakenawaitatsiri, rasoontzi rithotyaaakotzi iita ratsikeri. <sup>9</sup> Ontzimatye pipiyatyaari, pinkyaaryoowentanairo pawentaashiretaarira Pawa. Tema piyotzi ari poshiyakari maawoini iyekiite pikemaatsitaiyani jaka kipatsiki. <sup>10</sup> Iro kantacha arika onkaatapaake pikemaatsiwaitaka eepichokiini, ari inkameethashiretakaaperotaimi Pawa, raawyaashiretakagaimi, kisashiwaitaneri inkantakagaimi. Tema neshironkatantaneri rini, iri kaimashiretaimine piñaantaiyaawori kantaitaachane rowaneenkawo Cristo.

<sup>11</sup> Iri inthaamentaityaari Pawa. Rashi rowaatyeero impinkathariwentantai. Ari onkantaitaatyeeyaani.

### *Weyaantawori wethataantsi*

<sup>12</sup> Iri Silvano nosankenatakaakeri jiroka. Iri noshiyakaake iriiperori iyeki rini. Iro nosankenatakaantakemirori eepichokiini nokaminairi, nokamantzimiro tsika ikanta Pawa ineshironkaperotantzi. Ontzimatye pinkyaaryoowentairi. <sup>13</sup> Riwehataimi kemisantzinkaripaini apatotapiintachari jaka Babilonia-ki, ikaatzzi oshiyayetaimiri eerokapaini riyoyaitaimi. Riwehatazimi eejatzi Marcos, noshiyakaakeri iriime notomi.

\* <sup>14</sup> Etakotane pinkantya piwehatawakaanaiya. ¡Onkamintha pisaikayetai kameetha pikaatzira rashiyetaimi Jesucristo! Ari onkantaitaatyeeyaani.

\* **5:13** Ikantakotziri Pedro jaka "Babilonia", iroowa ikenkithatakotzi Roma. Tema ramawenataitayaawo Roma ikenkithatakoitawori Babilonia. Ari onkantya eero riyotaitantari itzimirika osankenatzirori, iro eero rowasanketantaitari.

## APITETANAINTSIRI ROSANKENARE PEDRO

### *Wethataantsi*

<sup>1</sup> Naaka Simón Pedro osankenatzirori jiroka. Naaka rimperatane Jesucristo, rotyaantaperotane ninatzi. Eerokapaini nosankenatzini pikaatzira pikemisantanai poshiyakotainawo naaka, tema akemisantairi pantaperotawori, iroowa kantakawori iyameethashirenka Pawa, ari ikantari eejatzi Jesucristo owawisaakoshiretairi.

<sup>2</sup> ¡Onkamintha ineshironkaperotaimi, risaikakaaperotaimi kameetha! Eekero piyotanaatyeeeri Pawa eejatzi Awinkatharite Jesús.

### *Tsika onkantya pintasorentsishiretantaiyaari*

<sup>3</sup> Tema antawoite itasorenka Pawa, iriitake kantakawori oshekitzimotantairi maawoini koityimoshiretairi ampinkathatasorentsitantaiyaariri. Imaperowa ayoperotairi. Tema owaneenkaki ikantaka irirori, osheki ikameethaperotake, iro imatantaari ikaimashireyetai. <sup>4</sup> Iroowa ikashaakaanairori pinawontsiperotachari, kameethakiperotatsiri, ompoñaantyaari pintasorentsishiretai eerokapaini. Iro pipakaantakawori pikaariperoshiretakera, poshiyakari isaawikisatzi antapiintzirori ikowashiyetari. <sup>5</sup> Ontzimatyepinkemisantairi eeroka, eero pamataawaitashitawo. Arika pinkemisantapiintanai, ari piñaayetairo pinkameethashiretai. Iroorika pantapiintanake, aritake piñaayetakero piyotanete. <sup>6</sup> Arika pantapiintanakero jiroka, aritake piñaakotaiya. Arika pantapiintanakero jiroka, aritake pinkamaitapiintanaiyaawo. Arika pantapiintanakero jiroka, aritake pimpinkathatasorentsitai. <sup>7</sup> Arika pantapiintanakero jiroka, aritake pineshironkatantapiintayetai. Arika pantapiintanakero jiroka, aritake petakotantapiintaiya. <sup>8</sup> Iroorika pantapiintanake eeroka, ari iñagaitaimi imaperotatya piyotairi Awinkatharite Jesucristo, eerowa itzimawaitzi kantakotemine: “Te ipantari jirika.” <sup>9</sup> Irooma intzimerika kaari matanairone kenkithatakotainchari, roshiyakotakari kaari kowichaatsi. Ipeyakotakitziro rantakeri Cristo ikiteshiretakaanantaari, tema kaariperoshireri rinaweta pairani. <sup>10</sup> Ari okantari iyekite, ontzimatyepinkenkithashiryaapiintaiya, eero piñaantawo pinkisoshirewentawaitero riyoyaayeetaimi, kaimashiretaarewo pini. Tema iroorika pimatapiintanake ikowakaitakemiri tsika pinkantanaiya, eerowa piñagairo pintzipinashiretai. <sup>11</sup> Ari onkantya piñaantaiyaawori osheki okameethaperotake inkyaakagaitaimi ipinkatharitentantapaira Awinkatharite Jesucristo owawisaakotairi.

<sup>12</sup> Irootake, eero nipakaantawo nonkenkithashiryaakaapiintemiro okaatzi akenkithatakotakeri, okantawetaka piyowetakawo, pikantayetzi: “Imaperotatya jiroka.” <sup>13</sup> Iro tampatzikari nonkenkithashiryaakaapiintaimiro eeniroka nañiika naaka, <sup>14</sup> tema okaapichokitapaake noñaantyaawori nonkame. Iroowa riyoshiretakaakenari Awinkatharite Jesucristo. <sup>15</sup> Nokowake pinkamaityaawo pinkenkithashiryaakotapiintairo jirokapaini arika nookanawentaimi nonkamakerika.

### *Ñaakerori ketziroini rowaneenkawo Cristo*

<sup>16</sup> Tema pairani, owakera nokenkithatakotapaakemiri Awinkatharite Jesucristo, nokantapaakemi: “Oshekitzimotziri ishintsinka, aritake rapiitairo ripiyai.” Tera niyotashitawo naaka, te namatawitantapaakemiro. Tema naaka ketziroini okikitakariri Cristo, osheki ipinkatharentsitake irirori. <sup>17</sup> Iriitake ketziroini Ashitairi Pawa kantakawori impinkathayeetairi, roñaagantakero rowaneenkawo, ikantake pairani ikenkithawaitake:

Notomi rinatzi jirika netakokitakari, osheki nokimoshirewentakeri, pinkemisantairi.

<sup>18</sup> Naakatake kemayetakerori ketziroini ikenkithawaitake inkiteki notsipatantakariri Jesús janta tasorentsii-toniki. <sup>19</sup> Ontzimatyepinkemathatairo rosankenatakeri



Kamantantaneriite. Irootake yotakaaperotaine, oshiyawaityaari tamorekamentotsi roiteesheenkatziro otsirenikitziira. Iroowa pantanairi eeroka irojatzi ripiyantaiyaari Jesucristo inthaamentashiretakaapaimi, roshiyapaakyaari impokiro sariwoto. <sup>20</sup> Ontzimatyē ankemathatero jiroka: Okaatzi osankenatainchari Osankenarentsiperoki, tekaatsira apaani inkamantantashiwaitakyaari Kamantantaneriite. <sup>21</sup> Te iri yotashiwaityaawone atziripaini, tema Tasorenkantsi yotashiretakaantakero okaatzi ikowakeri Pawa.

## 2

### *Kamantantzinkariniro eejatzi yotaantzinkariniro (Jud. 3-13)*

<sup>1</sup> Pairani eenitatsi kamantantzinkariniro. Irojatzi itzimi iroñaaka pisaikayetzira eerokapaini. Ari piñaake inkantemi, “Naaka yotaantaneri.” Tema rimananeekiini ikowi jirikapaini rowariperotantemiro riyotaayetemiri. Rapaatakeri Awinkatharite, pinakowentawetaariri rowawisaakoshiretairime. Iroowa eero rishenkaanta jirikapaini iñagairo rithonkaiya. <sup>2</sup> Iro kantacha tekera rithonkaata, tzimatsira osheki oshiyakotyaaarime okaatzi roñaagantakeri, imayempiwaitzi. Iriira kishimawaitakaanterine anashitantanaariri “Awotsipero”. <sup>3</sup> Osheki iñaamakiperotyaaari koriki, inkowapiintake pipinateniri okaatzi riyotaashiwaitzimiri. Iri kantacha Pawa eero rishenkayiri rowasankewentainiri rantayetakeri, ari rithonkairi.

<sup>4</sup> Tema pairani ikaariperopaitetantakari apawopaini maninkari, rimatakero Pawa rowasankewetakeri, rookakeri sarinkaweniki, tsirenikiperotakotake royaawenta rowasankewerotantaityaariri. <sup>5</sup> Arira ikantakeri Pawa kaariperoshireri atziripaini etayetanakawori pairani inampitawo kipatsiki, thonkaka ripiinkake oonkapaitetantakari. Iri kantacha Pawa rowawisaakotakeri Noé, kenkithatakotakerori pairani tsika inkantya kameethashireri. Tema irijatzi Pawa owawisaakotakeriri pairani isheninkapaini, ikaataiyini 7. <sup>6</sup> Ari ikantakeri eejatzi nampiyetawori Sodoma-ki eejatzi Gomorra-ki, rithonkakeri ritaakeri. Ari iñagaitziro oita awishimoterine thainkatasorentsitanerini. <sup>7</sup> Iri kantacha, Pawa rowawisaakotairi Lot, tema kameethashireri rinake. Jirika Lot antawoite oomerenchaakeri kaariperori okaatzi rantayetziri piyathariite. <sup>8</sup> Tema jirika kameethashireri Lot tsipatakariri kiteesheriki kaariperoshireri, iñiiri, ikemiri rantayetziro kaariperori. Antawoitera okantzimoshiretakari. <sup>9</sup> Ari okanta, rowawisaakotzirira Awinkatharite pinkathatasorentsitanerini eero iñaamashirewaitanta iñaapiintakerowa ñaantashiretaantsi. Tema retzitakawo rowasankewetziri kaariperoshireri, irojatzi paata rowasanketantaityaariri maawoini. <sup>10</sup> Rimaperotairi Pawa rowasanketairi antayetzirori koweenkatatsiri iñaamatashitari, ripiyathatakawo ikantaweetariri. Te iñaakotanetya, shameyantzi rini. Te ithaawantaatsikaitari ikishimatziro maninkariite oshekitzimotziro ishintsinka.

<sup>11</sup> Iriima maninkariite, oshekitzimoperotziro ishintsinka, te ikishimatziro jirikapaini, riyataashitapiintziro Pawa inthawetakoteri. <sup>12</sup> Jirikapaini kaariperoshireri roshiyawaitakari piratsi, te riyotziro inkenkithashiryaanetya. Itzimashiwaita irirori ari iñagairo rithonkaiya. Arira inkantaityaari rithonkaiya kishimawaitziriri maninkariite kaari riyotakotaatsikaitzi jimpe ikantayeta iriroripaini. <sup>13</sup> Iro inkemaatsitaityaari okantakaantziro ikemaatsitakaantawaitaka irirori, iroowa oshiyakawori ripinataatyeerome iyaariperonka. Tema jirikapaini, te ikaanitanetzi rantayetziro koweenkayetatsiri kiteesheripaiteki. Oshiyawaitakawo iriime osherentakemine rakiyootakemi jirikapaini ikowi ramatawitemi. <sup>14</sup> Irootake ikinatanakari imayempyaakiwaitzi, iwathatakawo kaariperori. Ikaimashiriiri shipetashireri inkaariperotakairi. Rithotyaaakotapiintake koriki. Iroowa rowasanketantaityaariri. <sup>15</sup> Ikenawaitashitaka,

rapaatakero kameethatatsiri. Rantakero okaatzi rantakeri pairani Balaam, itomi Beor, rithotyaaakotake ripinaiteri rantantyaawori kaariperori. <sup>16</sup> Iri kantacha jirika Balaam, rantakero kantainchari, iriitake kawayo kisathatakeriri. Okantawetaka te riyotzi inkenkithawaitanete kawayo, jirika kawayo roshiyanakari atziri ikenkithawaitanake, iroowa ripakaakaantaariri ikenkithashiryaawetaga Balaam inkoshekawaityaame.

<sup>17</sup> Jirikapaini kaariperoshireri rashi rowaatyeero rowasankeyeetairi janta otsirenikiperetzira. Tema roshiyakawo okantakaganki omotyaa ñaa opiryaatzi, roshiyakawo eejatzi okantaganki menkori atagainkatziro tampyaa, eero añiuro ompare inkani. <sup>18</sup> Iriira roshiyakaawentaitzi kaariperoshiretatsiri, tema rowapeyashita jimpe ikanta iñaaweetarira, roshiyakawo omotyaa ñaa opiryaatzi. Tema shameyantzi ikanta ikenkithawaiyetzi, ari rimatakeri ramatawiteri owakera kemisantatsiri, shiyapithawetawori kaariperori, inkantayeteri: “Kameethariniwé apiitero antairo añaamatashiyetari, kameethatatsi eejatzi amayempite.”

<sup>19</sup> Ramatawitantashita jirikapaini riyotaantzi, ikantayetzi: “Ishinetaantsitzi pantayetero piñaamatashiyetari.” Tema jirikapaini yotaantzinkarinero, tera risaikashiwainetaiya irirori, roshiyakotakari noshikaarewo, iroowa kaariperori roshiyakayerime iwinkatharite, imperawaitakari.

<sup>20</sup> Pairani jirikapaini kaariperori owakera ikemisantawetanakari Owawisaakotantaneri Awinkatharite, ripakaawetanakawo rantayetziro koweenkatatsiri. Okanta osamanitanake ripiyashitaawo rantayetairo koweenkatatsiri, irojatzi rimaperotantakari, te roshiyaawo ikantawetaga pairani. <sup>21</sup> Iro kameethawetacha eero iñirome “awotsipero” tampatzikashiretakaanatsiri. Tema maperokitaka okoweenkatzi okaatzi rantayetanairi, ikemisantawetanaawo inintakaanawetari tasorentsitatsiri, okantanaawo ripakaanairo osamaniityaake. <sup>22</sup> Roshiyawaitakawo ikantapiintaitzi:

Rikamaankakerika otsitzi, rapiitziro rowawo.

Ikantaitzi eejatzi:

Arikame inkiwaiteri chancho roipatsitakaga, eejatzi rapiitanaiya roipatsitanaiya.

### 3

#### *Ripiyantaiyaari Awinkatharite*

<sup>1</sup> Netakotané, iro apitetatsiri jiroka osankenarentsi notyaantzimiri, nonthaamentashiretakaanemiri, <sup>2</sup> pinkenkithashiryaantyaawori ikantayetakeri Kamantantanerite tasorentsishireri, ikantakeri eejatzi Owawisaakotantaneri Awinkatharite, otyaantakenari nonkamantaimiro eerokapaini. <sup>3</sup> Ontzimatyé ankemathatero jiroka: Tekera ripiyaita Cristo, intzime osheki thainkawaitantaneri. Iriitake antashiwaityaawone okaatzi ikowashiyetari. <sup>4</sup> Osheki rithainkawaite inkante: “¿Tsikama onkaateka iñagaitero ikantaitziri ari ripiyai Cristo? Eero ripiyaa. Kaarima añiuro ompashinite kipatsi, irojatzi okanta owakera riwetsikantaitakawori. Ari kamimaitaa etanakawori Otyaantaperori, te añiuro ompashinite.” <sup>5</sup> Ikenakaashiwaitakawowa ikaatzi kantatsiri. Te riyotzi iri Pawa wetsikakerori inkite, riñaane riwetsikantaka. Riwetsikakero eejatzi kipatsi, irojatzi otzimantanakari ñaa, tema ashi owatziro kipatsi okowiro ñaa. <sup>6</sup> Irojatzi ñaa raperaatantanakari Pawa pairani, oonkantakari kipatsi. <sup>7</sup> Iro kantacha, inapaintatziira te ipashinitakairo Pawa inkite eejatzi kipatsi. Iro inintakaanakeri pairani eero opashiniwaitzi riwetsikane irojatzi paata arika rowasankeyetairo maawoini, rithonkairi kaariperori thainkatasorentsitantaneri arika ritagairo maawoini. <sup>8</sup> Netakotané, ontzimatyé piyotairo jiroka: Apaani kiteesheri, roshiyakairo Awinkatharite oshekime osarentsi. Arikame oshekite osarentsi, roshiyakairo apaanime kiteesheri. <sup>9</sup> Tera rosamaninkero Awinkatharite rimonkaatairo okaatzi ikashaakaakairi, tema tzimayetatsi kenakaashiwaitakawori ikenkithashireta rosamaninkatziro. Tema neet-sikeroini ikantawentawo Awinkatharite, ikowi ripiyashiretawaita maawoini, tekaatsi

peyashiwaitaachaneme apaani. <sup>10</sup> Irooma paata ripiyairika, ari roshiyapaiyaari romapokantzi koshintzi. Ari inkemayeetairo antawoite kamenitaatsine, aripaite ithonkaiyaari inkite. Ari onkantaiyaari eejatzi kipatsi, ithonkaiya. Maawoini okaatzi ragaitakeri riwetsikaitantakawori kipatsiki, ithonkaiya itagaiya. Ari onkantaiyaari maawoini riwetsikane atziripaini, itagaiya maawoini.

<sup>11</sup> Tema ari inkantaitairo rithonkaitairo maawoini, ¿tsika pinkantyaaka pisaikai eerokapaini eero otzimanta piyenakaashitanewo? ¿Tema ontzimatye pinkiteshiretai? ¿Tema ontzimatye pimpinkathatasorentsitantai? <sup>12</sup> Aamaawenta pinkantayetaiya, pimpankenawentaiya, tema irootaintsi ripiyai Awinkatharite, aripaite ritagairo Pawa inkite, raperotairo ragaitakeri riwetsikantaitakawori kipatsi. <sup>13</sup> Irooma aakapaini, anewiyatakawo owakerari inkite, eejatzi owakerari kipatsi, tsika inampiyetaiyaawo kameethashiretatsiri. Tema iro ikashaakagairi Pawa.

<sup>14</sup> Ari okantari netakotaneete. Tema pinewiyatakawo eerokapaini maawoini jiroka, kamaishire pinkantya, onkene iñaapaimi Pawa kiteshire pinkantya, eero riyakowentawaitzimi pantakero kaariperori. <sup>15</sup> Pinkenkithashiretero, neetsikeroini ikanta Awinkatharite, rosamaninkatziiro ripiyantaiyaari rawisakoshiretantaiyaari atziripaini. Tera inashita jiroka, ari oshiyawo rosankenatakemiri etakotanewo iyeki Pablo. Tema Pawa yotakaakeriri Pablo maawoini jiroka, <sup>16</sup> ari okantakari eejatzi otsipa rosankenayetakeri. Kompitari naaweta inkemathaitero okaatzi rosankenatakeri Pablo. Iroowa itzimantari atziripaini kaari yotakoperoterone, tema te ikitsirinkiro, ikenakaashiwaitakawo riyotaantawetawo rosankenare Pablo. Ari ikantzitawori eejatzi maawoini Osankenarentsiperi. Aritake raperoitairi jirika kenakaashiwaitakawori. <sup>17</sup> Irooma eerokapaini netakotane, aritake nokamantzitakemiro, aamaawenta pinkantya ikenakaashiwaitzimikari jirikapaini piyathariite. Paamaawentya ripakaakaimirokari pikinatanaari. <sup>18</sup> Iroowa kameethaperotatsi piyaatakaairo eerokapaini pantakishirete, piyaatakaairo piyotakoperotairi Awinkatharite, Owawisaakotantaneri Jesucristo, tsika ikantakero irirori ineshironkatantaimiri. Ari rashi rowatyero irirori impinkathayeetairi. Ari onkantaitaatyeeyaani.

## RETAKARI ROSANKENARE JUAN

### *Ñaantsi Añaakaantaneri*

<sup>1</sup> Jirika kantakotachari jaka nosankenatemiri: Iriira iitaitziri “Ñaantsi Añaakaantaneri”. Itzimitaka pairani owakera etantanakawori riwetsikantayeetzi. Naakapaini kemak-eri, noñagaiyakerini eejatzi, niterotantayetakariki nako. <sup>2</sup> Tema jirika jitachari “Ñaantsi Añaakaantaneri”. Roñaagantaka irirori, risaikapaintzi kipatsiki, naakapaini ñaakeriri. Irootake nokenkithatakotantakemiriri kantaitaachane añaakaantaneri, tema rañiitaka pairani irirori itsipatakari Ashitariri. Iriitake oñaagaanari naakapaini. <sup>3</sup> Irootake nonkenkithatakotantemiriri nokikitakari, nokemajaantakeri eejatzi, onkene aapatziyawakaayetaiya aakapaini. Iriitajaantake Ashitairi aapatziyaari, ari akantanairiri eejatzi Itomi. <sup>4</sup> Iro opoñaantari nosankenayetaimiro eerokapaini, ari onkantya pinintaaperowaitantaiyaari.

### *Iitaitziri Pawa Kiteesheenkari*

<sup>5</sup> Jiroka ñaantsi riyotakaanari Cristo, irootake nowawisaimiri eerokapaini: Iitaitziri Pawa “Kiteesheenkari”, te oshiyawo tsirenikiri. <sup>6</sup> Arika ankante “Naapatziyari Pawa”, irojatzirika antziro kaariperori, athaiyaka. Oshiyakawo anashityaame tsireniriki, apiyathatakawo irooperori. <sup>7</sup> Irooma arika asaikanai kameetha tekaatsi antzimotan-teri, ayotaantanairowa irooperori, ari amatakeri aakameethatawakaanaiya. Tema oshiyakawo asaikatyeeme okiteesheenkatzira, oshiyakotaari Pawa risaiki irirori kiteesheenkari. Ari onkantya impeyakotakaantairori antayewetakawo kaariperori, iroowa ikapathainkatantakariki Cristo ikamawentantakariki pairani. <sup>8</sup> Arika ankante “Te nantziro kaariperori,” apaniro amatawiwaitaka, te ayotakotziro irooperori. <sup>9</sup> Arika ankamantairi Pawa antayetakeri kaariperori, aritake rimatakeri irirori impeyakotakagairo. Tema kamaitane rinawentakai irirori, tampatzikashireri rinatzi, iri kiteeshireperotakagaine. <sup>10</sup> Arika ankantawaite “Te nokaariperotzi,” oshiyakawo ankantatyeme “Thairi rinatzi Pawa.” Te ayotakotziro riñaane.

## 2

### *Iri Cristo jokaakowentairi*

<sup>1</sup> Notomipaini, opoñaantari nosankenatzimiro jiroka ari onkantya eero pantantawo kaariperori. Arika antakeri kaariperori, tzimatsira jokaakowentaine Ashitairiki. Iriira Jesucristo, kameethashireri. <sup>2</sup> Iriitake otsimaryaakeriri Pawa rowasankewentairome ayaariperonka. Te apatziro rookaakowentai aakapaini, tema maawoini atziri ikaatzira saikantawori kipatsi. <sup>3</sup> Jiroka ayotantyaari imaperorika ayotairi Cristo: Amatanairo inintakaantairi. <sup>4</sup> Tzimatsirika kantawetachane, “Niyotziri naaka,” iri kantacha jirika ripiyathatawo inintakaantanewo, thaiyakaga jirika. Te riyotakotziro irooperori. <sup>5</sup> Tzimatsirika matanairone inintakaantanewo, iriira nintaperotanairiri Pawa. Irootake ayotantari imapero atsipashiretanaari. <sup>6</sup> Tzimatsirika kantatsine, “Notsipashiretairi naaka,” ontzimatyete risaikanai kameetha roshiyakotyaari ikantapaintaga Cristo.

### *Owakerari inintakaantaitanewo*

<sup>7</sup> Iyekiite, kaarira owakerari inintakaantaitanewo nosankenatzimiri. Iroowa piyotzitakariki pairani. Irojatzira ñaantsi pikemayetakeri pairani eerokapaini. <sup>8</sup> Iroowa oshiyakawori owakerari inintakaantaitanewo, okantakaawo rantapaintziri Cristo. Okantakaawo pantayetanaari eejatzi eerokapaini. Oshiyakawo awisainkatanakeme tsireñeenkari, iri kiteesheenkatapaintsi iriiperori kiteesheenkari. <sup>9</sup> Tzimayetatsirika

kantatsine, “Rashitaana kiteesheenkari,” eekeromaita ikisaneentawakaatya ikaatzi ikemisantaiyini, tekeraga rimatziroota, oshiyawaitakawo irojatzi risaikakeme otsirenikitzi. <sup>10</sup> Iriima etakotanaariri ikaatzi ikemisantaiyini, iriira oshiyanaariri anashitanaachari okiteesheenkatzi, te rontziwawaita, tekaatsi inkantzimoneentawakayaari. <sup>11</sup> Ikaatzi kisaneentawakaachari ikaatzira ikemisantaiyini roshiyakari anashitantawori otsirenikitzi. Te riyotzi tsika ikeni, te ikowichaatzi otsirenikitzi.

<sup>12</sup> Notomipaini, eeroka nosankenatzini jiroka tema pikemisantairi Cristo, paakotapi-intairo iwairo, iroowa ipeyakotakaantaimirori pikaariperoshirewetaka. <sup>13</sup> Ashitaaniri, eeroka nosankenatzini jiroka tema piyotairi Cristo añiitainchari pairani owakera etantanakawori riwetsikantaitzi. Mainaripaini, eeroka nosankenatzini jiroka tema potsinampagairi Kamaari. Notomipaini, eeroka nosankenatzini jiroka tema piyotairi Ashitaimiri. <sup>14</sup> Ashitaaniri, eerokapaini nosankenatzini tema piyotairi añiitainchari pairani owakera etantanakawori riwetsikantaitzi. Mainaripaini, eeroka nosankenatzini jiroka tema shintsishireri pikantayetaa, piyotairo riñaane Pawa, potsinampagairi Kamaari.

<sup>15</sup> Eero petashiwaitawo isaawikisato. Eenitatsirika etashiwaitakyaawone isaawikisato, te inintaperotzi Pawa. <sup>16</sup> Tema maawoini isaawikisato tera opoñaawo Pawaki, tema isaawiki opoñaawo. Jiroka okanta isaawikisato: añaatashiwaitawo koweenkatatsiri, añaatashiwaitawo añayetziri, ankowawaite ashamete. <sup>17</sup> Maawoini jiroka isaawikisato iñaamayetari atziripaini, ari ithonkaiya. Iriima antanairone ikowiri Pawa, iriitake kantaitaachane rañagai.

### *Kisaneentziriri Cristo*

<sup>18</sup> Notomipaini, irootaintsi ithonkimataiya kipatsi. Pikemaiyakeni eeroka ari inkoñaatapaake kisaneentziriri Cristo arika ithonkimataiya. Tzimakera jaka kisaneentakeriri Cristo. Iroowa ayotantari irootzimatainti ithonkaiya kipatsi. <sup>19</sup> Jirikapaini kisaneentakeriri Cristo, iriitake atsipawetapiintari akemisantzi, iro kantacha rookanawentanakai. Rimaperotatyeyeaame intsipataime, eerowa rookanawentaime. Iroowa rookanawentanakaira, ari ayotzi te imaperotya intsipashireyetai aakapaini. <sup>20</sup> Iroowa eerokapaini, rotyaantaitakemiri Tasorenkantsi risaikashiretantemiri, oshiyawaitakawo risaipatziitotantaitemiri. Arira piyoyetairo eerokapaini jiroka. <sup>21</sup> Iroowa nosankenatantaimirori jiroka, tema piyotairo eeroka irooperori. Tema piyotzitawo pinashitaawo iroorika thaiyaantsi. <sup>22</sup> ¿Litakama thaiyachari? Iriitake ikaatzi kantatsiri “Jesús kaari Cristo.” Iriira kisaneentakeriri Cristo. Irijatzi manintakeriri Pawa, rimatakeri eejatzi Itomi. <sup>23</sup> Eenitatsirika manintawaitakerine Itomi Pawa, imanintakeri eejatzi Ashitariri. Iriima ikaatzi kemisantairiri Itomi, imaperotatya rashitaari Ashitariri. <sup>24</sup> Iroowa eerokapaini, kisokero powero petanakari pikemakeri pairani. Arika pimatakero, arira piñaakero pintsipashiretaiyaari Itomi, eejatzi Ashitariri. <sup>25</sup> Jiroka ikashaakaakairi irirori: Ari ankantaitaatyeyeaani añashireyetai.

<sup>26</sup> Iroowa nosankenatzimiri tsika ikantakota ikaatzi kowayetatsiri ramatawiyetemi. <sup>27</sup> Iro kantacha eerokapaini, kisokero pikantawentanakawo risaipatziitoitakemira. Irootake eero okoityaanta intzime itsipa yotagaimine. Jirika Tasorenkantsi roshiyakagaitakemiri iriime risaipatziitotantaitemiri, iri yotaayetaimironi kameethari. Riyotaimiro irooperori, kaari thaiyaantsi riyotaimi. Ontzimatyeyeyetai pantayetairo tsika okanta riyotaimiri irirori, pintsipashireyetai.

<sup>28</sup> Ari okanta notomipaini, ontzimatyeyeyetai antsipashireyetai Cristo, onkantya eero akaaniwaitanta arika ripiyake, awentaashireri ankantya atonkyotawaiyaari. <sup>29</sup> Tema piyoyetairo kameethashireri rini Cristo, ari piyotairi eejatzi ashiminthatanaawori



rantanairo kameethatatsiri, oshiyawaitakawo rapiitatyeerome intzimayetaime ikan-takaanaari Cristo.

### 3

#### *Itomipaini Pawa*

<sup>1</sup> Pinkenkithashireero jiroka: Antawo retakotai Pawa, itomiyetai. Imaperotatyaaga. Te ikemathatziro isaawikisatzi tsika iita Cristo-tatsiri, ari ikantairi eejatzi aakapaini te ikemathatai. <sup>2</sup> Ari okanta netakotaneete. Itomi Pawa anayetzi. Te ayotaatsikaite tsika ankantayetaiya paata. Apatziro ayotzi ari oshiyaiyaari ikanta Cristo arika ripiyai, tema ari onkantakya añeeri jimpe ikantajaanta irirori. <sup>3</sup> Maawoini atziri kowairone iñeero ripiyantaiyaari, rantapiintairo onkaate kiteshoretakagairine. Tema Cristo kiteshireri ikanta irirori.

<sup>4</sup> Iriima kaari pakayerone rantayetziro kaariperori, ripiyathatatyaaawowa inin-takaantziri Pawa. Tema jiroka kaariperori, piyathataantsi inatzi. <sup>5</sup> Piyotaiyini eeroka oita ripokantakari Cristo kipatsikika, tema iro ripokantakari rithonkairo kaariperori. Te rantapaintziro irirori kaariperori. <sup>6</sup> Ikaatzi oisokerotanaariri Cristo, te onkameethate rantanairo kaariperori. Tema ikaatzi oisokerotawori kaariperori, te riyotaatsikaitairi Cristo. <sup>7</sup> Notomipaini, eero pamatawitaarewotzi. Tema inkaate antapiintairone kameethatatsiri, iriitake kameethashireri, roshiyakotanaari Cristo ikameethashiretzi irirori. <sup>8</sup> Iri kantacha, ikaatzi antapiintakerori kaariperori, roisokerotatyaari Kamaari. Tema iri Kamaari etakaantakawori rantakero kaariperori. Iroowa ripokantajaantakari Itomi Pawa kipatsikika, rithonkairo kaariperori roñaagantakeri pairani Kamaari. <sup>9</sup> Iriima ikaatzi rowameethashiretairi Pawa oshiyawaitanaawo owakerame intzimayetaime, tera rantapiintanairo kaariperori. Tema Pawa tomintanaari, oshiyawaitanaawo rapiitaatyeerome intzimayetaime ikantakaanaari Pawa. <sup>10</sup> Irootake kaari ikompiatanta ayotairi itzimi rashiyetari Pawa, itzimi rashiyetari Kamaari. Maawoini kaari antapiintairone kameethatatsiri, tera itsipataari Pawa. Ari ikantari eejatzi kaari etakotawakaachane ikemisantzi, te itsipataari Pawa.

<sup>11</sup> Jirokaga ñaantsi pikemawakeri pairani owakera pikemisantantanakari, ikan-taitzi: Ontzimatyete etakotawakagaiya. <sup>12</sup> Eerowa oshiyakotari ikanta Caín, kaariperoshireri rinake ritsitokakeri irirentzi. ¿Litaka ritsitokantakariri? Tema iro ritsitokantakariri okantakairi ikaariperoshiretzi Caín, iriima irirentzi kameethashireri rinake irirori. <sup>13</sup> Iyekiite, eero ikompitzimotzimi arika inkisaneentawaitemi isaawikisatzi. <sup>14</sup> Ayotaiyini aaka, oshiyawaitakawo kamashire akantayewetaka pairani. Iroowa iroñaaka, oshiyawaitaawo añashireyetai. Iro ayotantawori, etakoyetawakaapi-intaaga akemisantayetai. Iriima kaari etakotantachane, roshiyakotakari kamashireri. <sup>15</sup> Ikaatzira kisaneentantatsiri, roshiyakotakari tsitokantaneri. Ayotakotaiyirini tsitokantaneri eero iñagairo rañaashireyetai. <sup>16</sup> Jirika oñaagantaperotzirori tsika ikantaita retakotantaita: Ikamawentakai Cristo aakapaini. Irojatzira amatanairi aakapaini, omintha ankantya ankamawentantayete. <sup>17</sup> Ikaatzi oshekitzimotziri rashaagawo, iñeeririka apaani iyeki koityaawaitatsiri, arika ishampitsiwaitakeri jirika iyeki, tera inintziri Pawa. <sup>18</sup> Notomipaini, te okameethatzi ankantawaitashitapiintya, “Netakotantzi.” Ontzimatyete antanairo oñaawontzirori etakotanta.

<sup>19</sup> Iroowa ayotantaari imapero rashiyetai Pawa. Tema ayotaira rashiyetai Pawa, irootake awentaashiretantaariri amanamanaataari, <sup>20</sup> onkantawetakya ontzimayeteme oita katsitzimoshiretane. Tema Pawa riyotziro maawoini, riyotzitawo akenkithashiretanewo okaatzi katsitzimoshiretakairi akaariperotakera. <sup>21</sup> Netakotaneete, arika apakairo okaatzi katsitzimoshiretakagairi, ari añagairo awentaashiretaiyaari Pawa amanamanaataari. <sup>22</sup> Iro ayotantyaawori aritake rimatakairo onkaate ankowakoyeteriri. Tema rimonkaayetairo inintakaantanewo,

antapiintainiri ikowiri irirori. <sup>23</sup> Jiroka inintakaantanewo: Ontzimatyeye awentaiyaari, aakotapiintairi iwairo Itomi Jesucristo. Ontzimatyeye etakotawakaayetaiya. Iroowa inintakaantanewo amatairi. <sup>24</sup> Inkaate matairone inintakaantanewo, iriitake tsipashiretaariri. Iriira Tasorenkantsi rotyaantakairi yotakaayetairi imapero atsipashiretaari.

## 4

### *Itasorenka Pawa eejatzi iisaneentashiretanewo Cristo*

<sup>1</sup> Netakotaneete, tzimatsi osheki kantawetachari: “Naaka kamantantaneri.” Iri kantacha Kamaari ñaawaitakaakeriri. Irootake eero pikemisantantari onkaate inkantayetemiri, ontzimatyeye piñaantyaari iriitajaantakerika Pawa ñaawaitakaakeriri jirika kamantantaneri. <sup>2</sup> Jiroka ayotantyaari iriirika Itasorenka Pawa ñaawaitakaakeriri, arika inkante: “Ratziritzimotai Jesucristo.” <sup>3</sup> Iriima ikaatzi thainkakerone ñaantsi ikantaitakeri, kaarira rashi Pawa, iriira ñaawaitakaakeriri iisaneentashiretanewo Cristo. Pikemakotaiyakerini eerokapaini, ari intzimake kipatsikika ñaawaiteronone jiroka. Tema tzimake. <sup>4</sup> Iroowa eerokapaini, notomipaini, rashitaimi Pawa, eerokaga awisayetairiri. Tema antawoite ishintsinka Cristo, pitsipashiretaari eerokapaini. Rawisairi tsipashiretakariri isaawikisatzi. <sup>5</sup> Jirikapaini oshiyakotariri kamantantaneri, isaawikisatzi rinatzi. Iroowa ikemisantawakaantari ikaatzira risaawikisatzitzi. <sup>6</sup> Iroowa naakapaini, rashiyetaana Pawa. Iroowa pikemisantantanari pikaatzira rashiperotaimi Pawa. Temaita ikemisantayetai kaari yotairine Pawa. Ari okanta, te ikompitata ayotairi ikaatzi riñaawaitakairi Tasorenkantsi, opoñaantari rimatantaawori riyotaantairo irooperori. Ayotziri eejatzi rashitari Kamaari ikaatzi yotaantashiwaitawori kenashiwaitaantsi.

### *Pawa iitaitziri “Etakonkantsi”*

<sup>7</sup> Netakotaneete, ontzimatyeye petakotawakaayetaiya. Ikaatzi antanairori jiroka, oshiyawaitanaawowa rapiitaatyeerome intzimayetaime ikantakaanari Pawa. Iriitakera yoyetairiri. <sup>8</sup> Ikaatzi kaari etakotantachari, tera riyotziri Pawa. Tema Pawa iitaitziri irirori “Etakonkantsi”. <sup>9</sup> Jiroka ikanta Pawa roñaagairo imapero retakotai: Rotyaantakairi rapintzite Itomi jaka kipatsikika, okanta rimatakaantakairori aakapaini añaashireyetai. <sup>10</sup> Jiroka okantakota irooperori etakonkantsi: Tera aakapaini poñaakaantyaawone ketziroini anintairi Pawa, iriira Pawa poñaakaantakawori retakoyetai. Tema antawoite retakoyetakai, rotyaantakairi Itomi. Iriitake otsimaryaakeriri Pawa rowasankewentairome ayaariperonka. <sup>11</sup> Netakotaneete, retakotaira antawoite Pawa, ari ankantaiyaari aakapaini etakotawakaayetaiya. <sup>12</sup> Tekaatsira atziri ñeerine Pawa. Iroowa aakapaini, arika etakotawakaayetaiya, kantacha antsipashiretaiyaari. Iriira Pawa matakairone aatakaantyaawori etakotawakaapiintaiya.

<sup>13</sup> Tema Pawa rotyaantakairi Tasorenkantsi risaikashiretantai, iro ayotantaari imapero atsipashiretaari. <sup>14</sup> Tema naakapaini ñaajaantakeriri Itomi Pawa, rotyaantakeri kipatsikika. Iriira nokenkithatakoyetaimiri. <sup>15</sup> Ikaatzi kantatsiri, “Jesús Itomi rinatzi Pawa,” iriira maperotzirori itsipashiretaari Pawa. <sup>16</sup> Ayotai aakapaini jimpe ikanta retakotai Pawa, akemisantayetairi. Tema Pawa iitaitziri “Etakonkantsi”. Inkaate etakotantapiintaachane, itsipashiretapiintaarira Pawa. <sup>17</sup> Iroowa aatakaantyaawori etakotantapiintaiya, awentaashire ankanteri Pawa, irojatzi paata atonkyotantawaiyaariri arika riyakowentantai. Tema aripaite oshiyakotaiyaari Cristo. Arira akantzitakawo oshiyakotari iroñaaka eenirowa asaikayetzi jaka kipatsikika. <sup>18</sup> Eero athaawantawaitari itzimi etakoperotairi. Etakowa rowai irirori, eero athaawantari rowasanketai. Arika anthaawantawaityaari, tekeraga ayoperotziroota imapero retakotai. <sup>19</sup> Iroowa anintantaariri aakapaini Pawa, apiyatatyaari retakotakai ketziroini aakapaini. <sup>20</sup> Inkaate kantatsine: “Nonintane rinatzi Pawa,” iro kantacha ikisashiretziri

iyeki, thaiyakaga jirika. Tema kaari etakotyaarine isheninka ikaatzi ifiiri, ¿Tsikama inkene ininteri Pawa, kaari ifiirigaitziri? <sup>21</sup> Iroowa otzimantari inintakaantziri, ikantake: Ikaatzi nintairiri Pawa, ontzimatyete retakotaiyaari isheninkapaini.

## 5

### *Awentaashirenka otsinampaantyaawori isaawikisato*

<sup>1</sup> Maawoini awentaashireri kantatsiri, “Jirika Jesús, Cristo rinatzi,” itomi Pawa rinayetzi, oshiyawaitanaawo rapiitairome intzimayetaime. Ikaatzi nintairiri Ashitairi, retakotaari eejatzi itomiyetaari irirori. <sup>2</sup> Arika anintairi Pawa, ari amatainiri inintakaantanewo eejatzi, iro ayotantaiyaari imaperotatyete etakoyetaari itomiyetari irirori. <sup>3</sup> Arika anintaperotanairi Pawa, oshiyawaitakawo antainirime inintakaantanewo. Eero opomeentsita rimatakairo inintakaantanewo. <sup>4</sup> Ikaatzi roshiyakaanairi Pawa rapiitakerome intzimayetai, ari rotsinampaayetai isaawikisato. Tema rawentaashirenka rotsinampaantantyaari. <sup>5</sup> ¿Tsika iitaka materone rotsinampairo isaawikisato? Iriira materone awentaashireri kantatsiri: “Itomi Pawa rinatzi jirika Jesús.”

### *Ikenkithatakaantziri Tasorenkantsi*

<sup>6</sup> Tema ripokake Cristo jaka kipatsikika. Iro kantacha, te apatziro ripokake romitsitsiyaatantyaawo ñaa, ontzimatyete onkapathainkate riraa, rowamagaitakeri. Iri Tasorenkantsi kenkithatakaantakerori tsika okantakota jiroka. Okaatzi ikenkithatakaantziri irirori, irooperori inatzi. <sup>7</sup> Tema mawa rapiitaitakero ikantaitzi, “Itomi Pawa rinatzi jirika Cristo.” \* <sup>8</sup> Iriitajaantake Tasorenkantsi kenkithatakaantatsiri. Iriitajaantake Pawa kenkithawaitaintsi romitsitsiyaapaitetakaganki Jesús. Iriitajaantake Pawa kenkithawaitaintsiri ikenkithawaitakotzirowanki Jesús tsika inkantya rowamagaiteri. † <sup>9</sup> Tema akemisantziri atziripaini ikantayetziri, iriira amaperoteri Pawa ankemisanteri okaatzi ikantairi. Jiroka ikantake ikenkithatakotziri Jesucristo, ikantzi: “Iriira Notomi jirika.” <sup>10</sup> Ikaatzi kemisantairiri Itomi Pawa, iriira kemathatairori imapero Jesús itomintari Pawa. Iriima kaari kemisantatsine, iitakamatawiritakeri Pawa, tema rithainkakero riñaane ikantake “Notomi rinatzi Jesús.” <sup>11</sup> Jiroka ikantaitakeri: Iri Pawa kantakayaawone añaashiretantaiyaari, tema atsipashiretaari Itomi. <sup>12</sup> Inkaate tsipashiretaiyaarine Itomi, ari rañaashiretai. Iriima kaari tsipashiretaiyaarine Itomi Pawa, eero rañaashiretai.

### *Ayotai ari ashi owatyeero añaashireyetai*

<sup>13</sup> Paakotapiintairi eerokapaini iwairo Itomi Pawa pikemisantairi. Iroowa nosanekenatantzimirori jiroka onkantya piyoperotantyaari ari ashi powatyeero pañaayetai paata. <sup>14</sup> Awentaashireri ankantairi Pawa, tema ayotzi ikemayetai arika amanaanaatakotyaawo ikowakairi irirori. <sup>15</sup> Ayotzi ikemai Pawa arika amañaari, ayotzita eejatzi ari rimatakairo okaatzi akowakotziriri. <sup>16</sup> Piñeerika apaani iyeki ikaariperotake,

\* **5:7** Rowaagakotantaitawori pairani jiroka osankenarentsi riñaaneke Roma-satzipaini (Latín), ari rosanthaaneentakerori eepichokiini kaari osankenatajaantachane ketziroini. Jiroka okantzi rosanthaayetakari: “Mawa ikaatzi kenkithawaitatsiri inkiteki: Ashitairi, Ñaantsi, Tasorenkantsi. Jirika mawatatsiri, apanira rinatzi.” Iroowa jiroka ñaantsipaini rosankenaitakeri riñaaneke Wirakocha iitaitzi “Reina Valera”. † **5:8** Okaatzi kenkithatakotachari jaka, jirokaga kantakotajaantachari: “Tasorenkantsi, Ñaa, Iraantsi. Ikaatakera mawa, te ipashinitzi oshiyakaawentachari.” Ikwatzi jaka Juan riyotakoperoiteri Jesús imapero Itomintari Pawa. Mawa rapiitakero ikenkithatakotziro okaatzi ikantaitakeri, “Itomi Pawa rinatzi jirika Jesús.” Etanakawori, iriitajaantake Tasorenkantsi yotakaakeriri rotyaantaneete Cristo riyotaantayete. Apitetatsiri, iroowa “Ñaa” oshiyakaawentachari romitsitsiyaatakaganki Jesús. Iroowa ikenkithatakotajaantakeri Pawa, otzimi osankenatainchari Mt. 3.16-17. Mawatatsiri, iroowa “Iraantsi” oshiyakaawentachari inkapathainkatakera Jesús rowamagaitantakariri. Iroowa ikenkithatakotajaantakeri Pawa risaikantakariranki Jesús otzishiki ikenkithawaitakairi Moisés itsipatakariranki Elías, tsika onkantya rowamagaiteri. Jakaga osankenatakota: Lc. 9.31-35; Jn. 12.27-33.

pamanakotyaari, aritake rañaashiretakagairi Pawa. Iri nokenkithatakotzi jaka kaariperotatsiri kaari maperotachane. Tema eenitatsi kaariperori owamaashiretantatsiri. Te iro nonkenkithatakote. Tema te onkameethate amanakoteri antakerori maperotachari okaariperotzi. <sup>17</sup> Nokenkithatakotakero “kaariperori kaari maperotachane,” tera nonkantatye kameethatatsi jiroka. Maawoini kaariperori, te okameethatzi antayetero. Iro kantacha eenitatsi kaariperori kaari owamaashiretantatsine.

<sup>18</sup> Ayotzi te rantapiintairo kaariperori ikaatzi itomintaari Pawa. Iriira Cristo kempoy-aawentairiri, eero ikemaatsitakaantaari Kamaari.

<sup>19</sup> Ayotzi aaka rashiyetaa Pawa. Iriima isaawikisatzi, iri rashitaari Kamaari, ipinkathariwentziri.

<sup>20</sup> Ayotzi ripokake Itomi Pawa, iri kemathatakaayetakairori irooperori. Iroowa amatantaawori ayotairi iitaitziri “Iriiperori”. Atsipashiretaari Iriiperori, tema atsipashiretatyaaari itomi. Iriira Pawa iitaitzi “Iriiperori”, iitaitziri eejatzi “Kañaaneri”.

<sup>21</sup> Notomipaini, paamagaiyaari oshiyakaawontsi. Ari onkantaitaatyeeyaani.

## APITETANAINTSIRI ROSANKENARE JUAN

### *Wethataantsi*

<sup>1</sup> Itzinkami ninatzi naaka osankenatzimirori jiroka. Eeroka nosankenatzini iitaitziri “Riyoyaitane tsinane eejatzi otomipaini”. Netakotanewo pini, tema ari akaatzi akemisantziro irooperori. Te apatziro naaka netakotzimi, retakotzizimi eejatzi mawoini yoyetairiri Iriiperori. \* <sup>2</sup> Kisokero owayetairi iriiperori, ari ankantaitaaty-eeyaani. <sup>3</sup> Onkamintha ineshironkayetaimi Ashitairi Pawa, raakameethayetaimi, kameetha pisaikayetai. Ari inkantaimiri eejatzi Itomi Jesucristo, piyotairira iriiperori, petakotawakaayetaiya.

### *Kisokero powero riyotagaimiri Cristo*

<sup>4</sup> Osheki nokimoshiretanake noñaakemira eerokapaini pantapiintanairowa iriiperori, pantairowa inintakaantakeri Ashitairi. <sup>5</sup> Ero nosankenatzimi iroñaaka owakerari inintakaantaitanewo, iroowa nonkenkithashiryaakagaimiri okaatzi nokamantayetakemiri owakeraini pikemisantantanakari. Jiroka okanta: Ontzimatyete takotawakagaiya. <sup>6</sup> Arika antapiintanairo inintakaantane Ashitairi, ari amatanairo etakotawakaapi-intaiya. Iroowa nokantakaantakemiri pantapiintairo okaatzi pantayetanakeri owakeraini pikemisantantanakari. <sup>7</sup> Tema tzimatsi iroñaaka osheki amatawaitanteri. Ikan-tayetzi jirikapaini: “Tera ratziritapaintzi Jesucristo.” Tema thairi rini kenkithawait-zirori jiroka, iisaneentanewowa rini Cristo. <sup>8</sup> Paamaawentya, pipakagairokari okaatzi niyotaayetakemiri. Te nokowi paminaashiwaitaiya, eerowa piñagairo pinintaawaitaiya paata. <sup>9</sup> Tzimatsirika maperotakerone inkaariperoshirewaite, kaari oisokerotyaawone riyotaantapaintziri Cristo, tera itsipashiretari Pawa. Iriima ikaatzi oisokerotanaawori riyotaantapaintziri Cristo, iriitakera matakero itsipashiretaari Ashitairi, ari ikantz-itaariri eejatzi Itomi. <sup>10</sup> Tzimatsirika aretemine, ari inkowe riyotaimiro otsipasato kenkitharentsi, eerowa pishinetziri risaikapankotemi. Ero piwethatzitari eejatzi. <sup>11</sup> Tema arika piwethatakyaari, oshiyawaitakawowa pakakotatyeeerime iyaariperonka okaatzi rantziri irirori.

### *Nokowake noñagaiyemini*

<sup>12</sup> Tzimatsi osheki nosankenatemiri, iro kantacha te apatziro nonkowe nosankenatemi, tema nokowatzi niyaatashitemi noñeemi, onkene nonkenkithawaitakaimi, onkene ankimoshiretaiyeni.

<sup>13</sup> Riwehataiyimini iitaitziri “otomipaini pitsiro riyoyaitane”. Ari onkantaitaaty-eeyaani. †

---

\* **1:1** Tzimatsi kenkithashiretakotawori iitaitziri “Riyoyaitane tsinane eejatzi otomipaini”, iriira oshiyakaawentacha ikaatzi kemisantzinkaripaini apatotapiintachari nampitsiki. Okantawetaka te ayotziro tsika otzimi nampitsi ipiyotantari jirikapaini kemisantzinkari. † **1:13** Eenitatsi kenkithashiryaakotawori iitaitziri “otomipaini pitsiro riyoyaitane”, iriyyetake roshiyakaawentaitzi kemisantzinkaripaini ikaatzi piyoyetachari tsika inampitawo Juan osankenatzirori jiroka.



## MAWATANAINTSIRI ROSANKENARE JUAN

### *Wethataantsi*

<sup>1</sup> Itzinkami ninatzi naaka osankenatzimirori jiroka. Eerokaga nosankenatzini Gayo, netakotanewo pini, tema ari akaatzi akemisantziro irooperori. <sup>2</sup> Netakotané, namanakotzimi piñaantyaawori oshekitzimotemi koityiimotzimiri koñaawoiniki. Namanakotzimi eejatzi piñaantyaawori pishintsite kameethaini. Tema niyotzi kameetha pikanta poshoretanaawo. <sup>3</sup> Ari nokimoshireperotanake noñaakerira rareetaka iyekiite ikamantapaakena irojatziki pikantaiyani eeroka poisokerotawo irooperori. <sup>4</sup> Irojatziiita oimoshirenkapiintakenari nokemakotapiintakerira ikaatzi nokemisantakaayetairi oisokero rowanakero irooperori. Tekaatsi otsipa anairone oimoshirenkakenari.

### *Ikimoshirewentairi Gayo roimaantapiintake ipankoki*

<sup>5</sup> Netakotané, pimatakero eeroka kameethatatsiri pamitakoyetakeri iyekiite ikaatzi awisayetatsiri janta pisaikinta. <sup>6</sup> Ikenkithatakoyetakemi iriroripaini jaka ipiyotaiyanira iyekiite tsika okanta petakoyetakari. Tema rantawaitakaane rinayetatziki Pawa jirikapaini, ari okameethatziki pimpayeteri koityiimotariri arika piñeeri. <sup>7</sup> Tema riyaatatziki jirikapaini ikenkithatakotairi Cristo, tema kaari kaariperoshireripaini payeterine ikowayetziki. <sup>8</sup> Iroowa ampayetantyaariri aakapaini okaatzi koityiimotariri. Iroowa antsipantyaariri owaagakotero irooperori.

### *Rithainkantzi Diótrufes*

<sup>9</sup> Nosankenawetakanari pairani piyotachari pinampiki. Iri kantacha Diótrufes rithainkakero nosankenare. Roshiyakaantashiwaitaka irirori iriiperome rinatye. <sup>10</sup> Iroowa nokamantantapaakeri maawoini janta okaatzi rantakeri jirika. Ikan-takowaitashitakena. Te apatziki jiroka, tema osheki imanintashirewaitakeri iitaitziki “iyekiite”, te rishinetantzi raakameethatawakagaitya. Romishitowayetakeri eejatzi rapatotapiintaga kemisantzinkaripaini.

### *Kameetha ikenkithatakoitakeri Demetrio*

<sup>11</sup> Netakotané, te okameethatziki pantero eeroka oshiyakawori jiroka kaariperori. Iroowa pantapiintairi kameethatatsiri. Ikaatzi antairone kameethari, iriira rashitaari Pawa. Ikaatzi antzirori kaariperori, te riyotziki Pawa. <sup>12</sup> Iriima jirika Demetrio, maawoini ikenkithatakoitziki kameethaini, ikantaitzi “Riñaawaitapiintziro irooperori irirori.” Ari nokantzitakawo eejatzi naaka, nokantzi “Kameethari rini.” Piyotaiyini eerokapaini okaatzi nokantziki irooperori ini.

### *Weyaantawori wethataantsi*

<sup>13</sup> Tzimawetacha osheki nosankenatemiri, iro kantacha te apatziki nonkowe nosankenatemiro, <sup>14-15</sup> tema nokowatziki niyaate noñeemi, onkene ankenkithawaitaiyeni. Onkamintha pisaikayetai kameethaini. Riweethatziki akaataiyinika jaka. Piweethatenari eejatzi ikaatzi saikatsiri janta.

## ROSANKENARE JUDAS

### *Wethataantsi*

<sup>1</sup> Naaka Judas osankenatzimirori jiroka. Rimperatanewo Jesucristo ninatzi. Naaka irirentzi Jacobo. Eerokapaini nosankenatzini roiteshiretaiiri Ashitairi Pawa, pikaatzi ikaimashiryagaimi. Eerokatake ikempoyaawentairi Jesucristo. <sup>2</sup> ¡Onkamintha ineshironkayetaimi, risaikaayetaimi kameetha, retakoperotaimi!

### *Yotaantashiwaitachari* (2 P. 2.1-17)

<sup>3</sup> Netakotané, nokowawetaka nosankenatemiro tsika okanta awisakoshiretantaari aakapaini. Iro kantacha okowaperotatya nosankenatemiro tsika okantakota pinkamaitantyaawori pinkemisante, poshiyakotyaari etayetanakawori kemisantzinkaripaini roiteshiretaiiri. <sup>4</sup> Tema tzimatsi atziri rimananeekiini rosatekantapaaka. Thainkatasorentsitziriri Pawa, ikenkithatakaantashiwaitaka, ikantayetzi: “Ineshironkatanewo rowayetai Pawa, kantacha antayetero akowayetziri, amayempiwaite.” Jirika kenkithawaitashitakawori ñaantsi, imanintakerira Pawa, apanitatsiri rimperatanta. Ari ikantzitakariri eejatzi Awinkatharite Jesucristo imanintakeri. Iro ikenkithashiretantakariri pairani Pawa rowasanketairi jirika.

<sup>5</sup> Nokowi nonkenkithashiryaakaimiro onkaate piyoperotairi. Ikantawetaka Pawa osheki ritasonkawentawetakari rashiyetari irirori, romishitowayetairi pairani Egiptoki, raperaatzimaitakariri ikaatzi thainkatasorentsitakeriri. <sup>6</sup> Ari ikantakeriri eejatzi maninkaripaini romishitowaitakeri inkiteki, kaari jatakairone kameethaini impinkathariwentante. Oshiyawaitakawowa roosotakotatyeeerime Pawa tsika ot-sirenikitzi, ari royaawentari rowasanketaitairi. <sup>7</sup> Ari ikantzitakariri eejatzi pairani Sodoma-satzi, Gomorra-satzi eejatzi ikaatzi itsipakeroyetari. Kaariperoshireri rinayetake, ipankenawaitawakaaka ishramparinkakiini, imayempiwaitzi. Iro rowasanketantaitakariri paampariki. Arira iñagaitziro oita awishimotairine oshiyaariri jirikapaini rowasanketantaitakariri paampari kaari tsiwakanetatsine.

<sup>8</sup> Ari inkantaiteri jirikapaini kenkithatakaantashiwaitachari, kenkithashirewaitakaantachari, ñaamatashiwaitakawori koweenkayetatsiri, thainkawaitantaneri. Tera ithaawakaari ikishimatzi maninkaripaini oshekitzimotzi ishintsinka.

<sup>9</sup> Iro kaari rimataatsikaite maninkari Miguel, anaantatsiri ipinkathariwentantzi, te riñaawaitashiwaita irirori riñaanaminthateri Kamaari ikenkithatakotzi Moisés ikamantapaintari. Apatziro ikantake Miguel: “Iri Pinkathari kishemine.” <sup>10</sup> Iriima jirikapaini atziri kamantantashiwaitachari, rithainkashirewaitakero kaari riyomat-sitzi. Tema okaatzi riyotashiwetari iriroripaini oshiyakawo riyorenka piratsi. Iriira thonkawaitachane apaniroini. <sup>11</sup> ¡Rimaperoitairi rowasankeetairi! Tema rantakero oshiyawori rantakeri pairani Caín. Ikenashiwaitaka roshiyakari Balaam, apatziro ikowashitaka raantyaawo koriki. Roshiyakarira kamayetaintsiri romanatantakariri Coré. <sup>12</sup> Oshiyawaitakawo iriime osherentakemine rakiyooyetakemira. Tema itsipatashiyetakemi rithainkatasorentsiwaitante, apatziro ikowi rantayetero inimotziiriri irirori. Roshiyakawo menkori itasonkainkatziro tampyaa. Roshiyakawo pankirentsi kaari kithokitatsine, kamaperotake, inthokaitakero. <sup>13</sup> Roshiyakawo okanta otamakaare inkaare oshimoryaatzi, arira ikantakariri jirikapaini roñaagantashitakawo iyaariperonka. Roshiyakari thatyiinkari kemakaantaneri, ari inkantaiyaari iriroripaini rithonkaiya otsirenikitzi.

<sup>14</sup> Iriira ikenkithatakotakeri pairani Enoc icharinetanakariri Adán, ikantakeranki:

Pamine, pokake Pinkathari itsipataari osheki itasorentsise. \*

<sup>15</sup> Ripokake rowasanketairi maawoini.

Ripokake riyakowentairi rantayetakeri thainkatasorentsitaneri.

Ripokake riyakowentairi ikishimatantake eejatzi.

<sup>16</sup> Jirikapaini kenkithatakaantashiwaitachari, kishimatantaneri rini. Thaiyakowaitantaneri ikantaka. Rantayetziro iñaamatashiyetari irirori. Shamewaitzinkari rini. Inintathatantakemiro riyotaantziri ikowi raantashiwaityaawo koriki.

### *Ikaminagaitziri kemisantzinkari*

<sup>17</sup> Irooma eerokapaini netakotané, poshiretyaawo riyotaayetakemiri ketziroini Rotyaantaperotane Awinkatharite Jesucristo. <sup>18</sup> Tema ikantayetake irirori: “Weyaan-tapaakyaawone paata iñagaite thainkantaneripaini, iriira antashiwaityaawone iñaamatashiyetari.” <sup>19</sup> Iriira kantakaanterone inkisawakaantaityaari, apatziro ikenkithashiretawo isaawikisato. Te risaikashiretantari Tasorenkantsi. <sup>20</sup> Irooma eerokapaini netakotané, piwetsikashiretawakaayetaiya pinkemisantapiintanairo tasorentsitatsiri pikemawakeri pairani. Pamanapiintaiyaari Pawa, tsika okanta riyotakagairi Tasorenkantsi. <sup>21</sup> Oisokero rowanakemi Pawa retakotemi, oyaako powero ineshironka Awinkatharite Jesucristo ashi rowaatyeero rañaakaayetai.

<sup>22</sup> Neshironka poweri ikaatzi kisoshiretatsiri. <sup>23</sup> Itsipa, poshiyakagairo eepichokiini okanta powawisaakotantaariri ritagaiyaame. Itsipa, ontzimatyepineshironkayetairi. Irooma iyaariperonka, kisaneenta powero. Ari pinkantero ikithaatari ikaariperoshiretantari, poshiyakairo pinkisaneentatyeerome. Thaawanta powero jiroka pantzirokari eeroka.

### *Thaamentaantsi*

<sup>24</sup> Anthaamentawentyaari jirika matziroiri ikempoyaawentai kaari ontziwashirewaintanta. Anthaamentawentyaari jirika kimoshiretakagaine antsipataiyaari, eero otzimai ayenakaashitanewo. <sup>25</sup> Anthaamentawentyaari Pawa apaanitatsiri, riyotanetzi, owawisaakotantaneri. Iriira jirika Pawa tzimatsiri rowaneenkawo, pinkathari iitaitziri, imapero otzimi ishintsinka, pinkatharipero rini, iri etakawo itzimi tekera otzimana-keeta maawoini, irojatziri ikanta risaiki iroñaaka, rashi rowaitaatyeero. Ari onkantaaitaateyaani.

---

\* **1:14** Jirika Enoc, iriira 7-tanaintsiri icharinetanakari Adán. Jiroka okaatzi riñaawaitakeri Enoc, te opoñaawo Osankenaperorentsiki, otsipakira osankenarentsi opoñaawo, iitaitziro “Rosankenare Enoc”.

## ROÑAAGAITAKERIRI JUAN

### *Roñaagantakeri Jesucristo*

<sup>1</sup> Jiroka roñaagantakeri Pawa tsika ikantakota Jesucristo, iriira Pawa kantakaawori riyotantyaawori rimperatanepaini tsika onkantakotya okaakitzimataintsiri iñagaitero. Iroowa rotyaantantakariri Pawa imaninkarite inkamanteri Juan. Tema jirika Juan iri rimperatapiintakari Pawa. <sup>2</sup> Iri Juan kenkithatakerori okaatzi iñaakeri. Jiroka okaatzi ikenkithatakeri riñaane Pawa, iro inintakaantakeri Jesucristo inkamantantero. <sup>3</sup> Kimoshire inkantaiya ñaanatairone jiroka kamantaantsi, ari inkantaiyaari eejatzi inkaate kemisantairone. Kimoshire inkantaiya inkaate monkaatairone osankenatainchari. Tema okaakitzimatake iñaantaityaawori.

### *Riwethaitari kemisantzinkaripaini kaatatsiri 7 rapatoyetaka*

<sup>4</sup> Naaka Juan osankenatzirori jiroka. Eerokaga nosankenatzini kemisantzinkaripaini kaatatsiri 7 pipiyotaga janta otsipaki nampitsi saikatsiri Asia-ki. Tema añaatsi Pawa, iri etakawo pairani itzimake, irootaintsi ripiyai, neshironka inkantayetaimi, kameetha risaikakaayetaimi janta. Ari roshiyakagaimiri iitaitziri “7 tasorentsi”. <sup>5</sup> Ari roshiyakagaimiri eejatzi Jesucristo, tema imaperotatya okaatzi ikenkithatakoitziri. Iri etaawori ipiriinta ikamawetakaga, ipinkathariwentairi maawoini pinkathariwetchari jaka kipatsiki. Iriira etakoyetairi aakapaini. Iri oshiyakagairi inkiwaatyaimi, ipeyakotairowa ayaariperonka ikapathainkatake pairani ikamawentayetakaira.

<sup>6</sup> Iri pinkatharitakaayetairi. Iri Imperatasorentsitakaayetairi antawaitantaanariri Pawa Ashitariri. Iri otzimimotziri rowaneenkawo, iri pinkathariperotatsiri. Rashi rowaatyeero. Ari onkantaitatyeyaani. <sup>7</sup> Jirika Cristo inkenapai menkoriki, maawoini iñagaitawairi. Iñiitawaiyaari owathaamerekitakeriri. Riraakoitaiyaari maawoini jaka kipatsiki, rimatzityaawo itsipasatzi kaari sheninkatawakaachane. Ari onkantaitatyeyaani.

<sup>8</sup> Ikantzi Awinkatharite Pawa: Naaka oshiyawori etawori osankenarentsi, noshiyawo eejatzi weyaantapaakawori. Añaachana Naaka, Naaka etakawo pairani notzimake, Naakaga piyaatsine paata. Naakatakera tzimaperotatsiri noshintsinka.

### *Roñaagantaka Itomi Atziri*

<sup>9</sup> Naaka Juan, pirentzi powana pikemisantaira, ari akaataiyakeni akisashitakawo akemaatsiwaitaka, ari atsipatawaka ipinkathariwentaira Jesús. Eeniro nisaiki pairani othampishiki jitachari Patmos nokenkithatziro riñaane Pawa, nokamantantziro ikantakenari Jesús. <sup>10</sup> Okanta apaani kiteesheri ikenkithatakotapiintaitzirira Awinkatharite, eenitatsi roñaagakenari Tasorenkantsi. Nokemakeri notaapiiki iita kantanari, roshiyakawo tyootaantsi riñaawaitzi, <sup>11</sup> ikantakena: “Posankenatero onkaate noñaayemiri. Iro potyaanteniriri kemisantzinkaripaini kaatatsiri 7 rapatoyetaka otsipaki nampitsi saikayetatsiri Asia-ki. Tema jiroka 7 nampitsi, jitachari: Efeso, Esmirna, Pérgamo, Tiatira, Sardis, Filadelfia, Laodicea.”

<sup>12</sup> Ari nipithokanaka notaapiiki naminiri iita ñaanatanari. Noñaatziiri ootamentotsipaini riwetsikaitziri ooro. Ikaatzi 7. <sup>13</sup> Iro kantacha janta niyankineki ari rosatekaka oshiyakariri Itomi Atziri. Ipamankakeri iitzi iithaare. Rontarekakari ishipeeneeki riwetsikakontaitziri ooro. <sup>14</sup> Kitamaamampoki okantaka iishi, oshiyawaitakawo iroome iwitzi oweja, kitamaaki okantaka ariwaitake jiriniki. Roki oshiyakawo paampari. <sup>15</sup> Shipakiryaa okantayetaka iitzi, ariwaitake riporeryaatzi koriki ritagaitziri. Oshiyawaitakawo riñaane osootzi ñaa. <sup>16</sup> Rotaiyake impokiropaini rakoperoki, ikaatzi

7. Romishitowimaitawo ipaanteki oshiyawaitawori osataamentotsi, apitekeromeni okanta othoyempitake. Roshiyakari ipooki ooryaa rishipakiryaaaperotzi tampatzika-paiteki.

<sup>17</sup> Okanta noñaakerira, tyaanakena nokamawetanaka. Iro kantacha riterotan-takenawo rakopero, ikantana: “Eero pithaawi, Naakatake etawori, Naakatake weyaantawori. <sup>18</sup> Naakatake kañaaneri, nokamawetaka ari nonkantaitaayeeyaani nañagai. Naaka ashitaawo shintsinkantsi rowaitaana notyaantantai sarinkaweniki. <sup>19</sup> Posankenatero okaatzi piñaakeri, iroowa petanakya okaatzi piñaakeri iroñaaka, eejatzi onkaate piñeeri paata. <sup>20</sup> Ikaatzi ootamentotsi piñaakeri kaatatsiri 7, iri oshiyakaawentziriri kemisantzinkaripaini kaatatsiri 7 rapatoyetakaga otsipaki nampitsi. Ikaatzi piñaakeri impokiro notaiyakeri nakoperoki, kaatatsiri 7, iri oshiyakaawentziriri maninkaripaini tsipayetaariri kemisantzinkaripaini kaatatsiri 7 rapatoyetakaga.” \*

## 2

*Kamantaantsi rotyaantaitakeniriri 7 rapatoyetakaga kemisantzinkaripaini: Kamantaantsi rotyaantaitakeri Efeso-ki*

<sup>1</sup> “Jiroka posankenateniriri imaninkarite kemisantzinkaripaini apatotainchari Efeso-ki. Iri ñaanatziriri otaiyakeriri 7 impokiro rakoperoki, osatekainchari niyanki ipaampatakera 7 ootamentotsi. Ikantziri:

<sup>2</sup> ‘Niyotziro pantayetziri, tsika pikanta pantawaitake, okaatzi pikisashitakari. Pisamakari kaariperoshireriite. Piñaantayetaari jitashiwaitachari “Otyaantaperori” yotaantashiwaitachari. Piyotai thairi rinayetatzi. <sup>3</sup> Kinatantaneri pinake, kisashiwaine pikantaka, osheki pikemaatsiwaitaka rowasankewentaitzimiro paakotaanawo nowairo. Temaita pisamawaita. <sup>4</sup> Iro kantacha, tzimatsi yotapainchari, kaaripero okantaka. Jiroka okanta: Pipakaanakero eerokapaini petakotantzi, te pantairo pikantawetanakawowa pairani. <sup>5</sup> Pinkenkithashiretairo pikantaga ketziroini owakera pikemisananake. Pipakagairo pikantaga iroñaaka, pipiyakotairo pantairo pikantaga ketziroini pikemisantzi. Tema eerorika pipakagairo, ari niyaatashitakemi, naapithataimiri ootamentotsi saikimotakemiri janta. <sup>6</sup> Iroowa kameethatatsi pantakeri eerokapaini pikisaneentakero rantayetakeri kemisananairori riyotaantziri pairani Nicolás. Nimatzitakari naaka. \* <sup>7</sup> Kowirori inkemathatero, inkemisanteri Tasorenkantsi riñaanatziri kemisantzinkaripaini. Inkaate oitsinampaantatsine, ari nishinetagairi chochoki owañaantatsiri pankitainchari itasorentsipathateki Pawa.’ ”

*Kamantaantsi rotyaantaitakeri Esmirna-ki*

<sup>8</sup> “Jiroka posankenateniriri imaninkarite kemisantzinkaripaini apatotainchari Esmirna-ki. Iri ñaanatziriri etawori, eejatzi weyaantawori. Iri riñaanatziri kamawetainchari, añaagaatsiri eejatzi. Ikantziri:

<sup>9</sup> ‘Niyotziro pantayetziri, niyotziro pikemaatsiwaitakaga, niyotziro pashironkaawaitakaga, eerokawetaka ashaagantashireri. Niyotzi eejatzi ithaiyakotakemi Judá-ite janta. Iitashiwaitaka Judá-ite, tema Satanás ashitakariri. <sup>10</sup> Eero pithaawantashiwaitawo pinkemaatsityaari. Irootaintsi piñeeri romonkyagaiteri Kamaari. Ari pisaikeri onkaate 10 kiteesheri pinkemaatsiwaitya, iñaantashiretemi Kamaari. Pinkyaaryooshirete eerokapaini piyaatakaairo onkantawetakya ritsitokaitemi, aritake paata nañaakagaimi, oshiyawaitaiyaawo namanthaitaateemime. <sup>11</sup> Kowirori inkemathatero,

\* **1:20** Eenitatsi kantatsiri jirikapaini “maninkariite” kenkithatakotachari jaka, iri atziripaini ikaatzi itzinkamiyetaari kemisantzinkaripaini. Tzimatsi itsipa kantatsiri, iriyetake iriiperori maninkariite. \* **2:6** Te riyotaitzi tsika itzimi “kemisananairori riyotaantziri pairani Nicolás.” Aamaaka iri inashitainchari ipiyota, iri yotaashiwaitakariri kemisantzinkaripaini. Aamaaka iri oshiyakariri Balaam okaatzi rantakeri pairani irirori.



inkemisanteri Tasorenkantsi riñaanatziri kemisantzinkaripaini. Inkaate oitsinampaantatsine, eero iñagairo inkemaatsiwaitaiya rapiitairo inkamai.’ ”

*Kamantaantsi rotyaantaitakeri Pérgamo-ki*

<sup>12</sup> “Jiroka posankenateniriri imaninkarite kemisantzinkaripaini apatotainchari Pérgamo-ki. Iri ñaanatziriri otzimimotziri rosataamento apitekeromenitatsiri othoyempinka. Ikantziri:

<sup>13</sup> ‘Niyotziro pantayetziri, niyotzi ari pitsipatari ipinkathariwentziri Satanás. Niyotzimi eejatzi kisokero powakena paakopiintakena nowairo, te pipakairo pawentaashiretana. Te pipakaanakero eerokapaini okantawetaka Antipas rowamaawetakari noyemisantakaaperotanewo, kenkithatakotakenari tsika inampitawo Satanás. <sup>14</sup> Iro kantacha, eenitatsi yotapainchari, kaaripero okantaka: Tzimayetatsi pikaataiyinira oshiyakariri Balaam riyotaantzi. Tema pairani Balaam, riyotaapiintakeri Balac inkaimashiretantyaariri charinetanakariri Israel-ni rowakayaari ritagaitziniriri roshiyakaashiwaitari iwawane. Imayempitakaakeri eejatzi. <sup>15</sup> Tzimatsi eejatzi kemisantakerori riyotaantziri pairani Nicolás. <sup>16</sup> ¡Pipakagairo! Eerorika pipakairo, ari niyaatashitakemi nomanatemi, iro nomanatantyaari osataamentotsi poñaachari nopaanteki. <sup>17</sup> Kowirori inkemathatero, inkemisanteri Tasorenkantsi riñaanatziri kemisantzinkaripaini. Inkaate oitsinampaantatsine, ari nompakeri royaawo maninkawotatsiri maná. Ari nompakeri eejatzi kitamaari mapi osankenatakaga owakerari wairontsi kaari riyotaitzi, apatziro riyotairo inkaate aakerone jiroka mapi.’ ”

*Kamantaantsi rotyaantaitakeri Tiatira-ki*

<sup>18</sup> “Jiroka posankenateniriri imaninkarite kemisantzinkaripaini apatotainchari Tiatira-ki: Iri ñaanatziriri Itomi Pawa, oshiyakawori roki paampari, poreryagaintsiri iitziki. Ikantziri:

<sup>19</sup> ‘Niyotziro pantayetziri, petakoyetantaka, pikemisantake, pantawaitake, kamaitane pikantaka. Eekero pikamaitatyaawo pawisakaanakero pikantawetaga pairani. <sup>20</sup> Iro kantacha, tzimatsi yotapainchari, kaaripero okantaka. Jiroka okanta: Paapatziyakawo tsinane jitachari Jezabel. Okantzi iroori kamantantanewo ini, okaatzi iyotaantakeri, oitzipinashiretakeri nimperotanewo. Owakaayetakari ritagaitziniriri roshiyakaashitaitari iwawane. Omayempitakaakari eejatzi. <sup>21</sup> Osamani noyaakowetakawo ipakairo antakeri, te okowi ipakairo omayempiwaitzi. <sup>22</sup> Eerorika ipakaashitawo, ari nomantsiyaakero omayempitapiintakera, ari onkemaatsiwaitaiya. Ari nonkanteriri inkaate mayempiterone. <sup>23</sup> Ari nowamaayetairi ikaatzi iyotaayetakeri. Iro riyotantaiyaari maawoini kemisantzinkaripaini, riyote naaka yoshiretziriri maawoini, niyotzi oita ikenkithashiretari, niyotzi oita ikemashiretziri. Iro noipiyantemirori okaatzi pantayetakeri eerokapaini. <sup>24</sup> Irooma eerokapaini, yotapainchari janta Tiatira-ki kaari kemisanterone iyotaantashiwetakari, eero nokisathatzimi. Tema te pipankenawaitawo okaatzi iyotaantashiwetakari iitaitziri “rimanakaaperotanewo Satanás”. <sup>25</sup> Ontzimatyepinkyaaryoote eerokapaini irojatzi nipiyantaiyaari. <sup>26</sup> Inkaate oitsinampaantatsine rimonkaatero niñaane irojatzi weyaantapaakyaawone, ari nimatakaakeri impinkathariwentairi atziripaini. <sup>27</sup> Ari ikantakena Ashitanari naaka, rimatakaakenawo ipinkatharitakana, ari inkantaiyaari iriroripaini impinkatharitakagairi.

Reewatantaiyaari iyotsirokotzitonkite.

Irijatzi thonkairine iisanentanewo, roshiyakagairi itzimpookaitziro chomo.

<sup>28</sup> Ari nowake naaka oshiyaarine impokiro sariwoto. <sup>29</sup> Kowirori inkemathatero, inkemisanteri Tasorenkantsi riñaanatziri kemisantzinkaripaini.’ ”

### 3

#### *Kamantaantsi rotyaantaitakeri Sardis-ki*

<sup>1</sup> “Jiroka posankenateniriri imaninkarite kemisantzinkaripaini apatotainchari Sardis-ki. Iri ñaanatziriri iitaitziri ‘7 tasorentsi,’ otaiyiriri 7 impokiro. Ikantziri: ‘Niyotzimiro pantayetakeri, ikantaitzimi “añaashireri”, te ari pinkantya, kamashireri pini.

<sup>2</sup> Pinkakishiretai. Pinkyaaryooshirete eero pikamashiretanta. Tema Pawa iñiuro pantziri te pimonkaatziro ikowakayimiri. <sup>3</sup> Pinkenkithashiretero ikamantaitakemiri pairani, pimonkaatero. Pipakairo pantapiintakeri. Eerorika pikakitai, ari nomapokapaimi nipiayirika, noshiyapaiyaari romapokantzi koshintzi. <sup>4</sup> Iro kantacha eenitatsi Sardis-ki matakero eepichokiini ikiteshiretzi. Iri oshiyakariri kaari oipatsiterone iithaare, iroowa ikameethatantaari jirikapaini intsipatina nokithaatawowa kitamaari. <sup>5</sup> Tzimatsirika kitsirinkerone, ari nonkithaatairi kitamaari. Eero noshetairo iwairo itsipataari rosankenatakotaka kañaaneyetaatsine. Ari nonkamantairi Ashitanari, eejatzi maninkariite, nonkantairi: “Ikemisantaana jirika.” <sup>6</sup> Kowirori inkemathatero, inkemisanteri Tasorenkantsi ikantziriri kemisantzinkaripaini.’ ”

#### *Kamantaantsi rotyaantaitakeri Filadelfia-ki*

<sup>7</sup> “Jiroka posankenateniriri imaninkarite kemisantzinkaripaini apatotainchari Filadelfia-ki. Iri ñaanatziriri Tasorentsitatsiri, Iriiperori. Iri riñaanatziri rowaitakeri rashitaryaayetairiri atziripaini, iri rashitapithaite kaari rishinetaite inkyaayete. Ari roshiyaiyaari David-ni. Tekaatsi shintsithaterine ashitareerone, ashitzirori eejatzi. Ikantziri:

<sup>8</sup> ‘Niyotziro pantayetzi. Pamine. Nishinetakemi pinkyagai, tekaatsi otzikemine. Iro nimatakemiri tema te pishintsishiretaiyini. Iro kantacha pimonkaatakenawo niñaane, te ikemaitzimi pinkante: “Te rashitana Pawa.” <sup>9</sup> Iriima jirikapaini kantashiwaitachari: “Naaka Judá-ite.” Kaari Judá-itepero iri rashiyetakari Satanás. Iroowa notziwerowakaantaiyaariri paata impinkathayetaimi. Ari riyotairi imaperotatyaaga netakotakemi. <sup>10</sup> Tema pikyaaryoowentakero eerokapaini pimonkaayetziro niñaane, ari nonkempoyaawentakemi eero iñaantashiretantaitzimi. Tema okaapichokitapaakeeni iñaantaitantyaariri nampiyetawori kipatsiki. <sup>11</sup> Irootaintsi nipokai. Kisokero powero pikemisantakeri, eero paminaashiwaitanta pinintagaiyaawo impaitaimiri, ramanthaiyetaimi. <sup>12</sup> Tzimatsirika aawyaakerone jiroka, ari noshiyakagairi tzinkamitsi otziyantzirori itasorentsipankote Pawa. Rashi rowairo risaikai. Ari nonkentakotainiri iwathaki iwairo Pawa, ari riyoitai Pawa ashitaari. Ari nonkentakotainiri iwathaki owairo nampitsi Jerusalén, ari riyoitai saikai inampiki Pawa, areetaachane isaawiki ompoñagaiyaawo inkiteki. Ari nonkentakotainiri eejatzi iwathaki owakerari nowairo. <sup>13</sup> Kowirori inkemathatero, inkemisanteri Tasorenkantsi ikantziriri kemisantzinkaripaini.’ ”

#### *Kamantaantsi rotyaantaitakeri Laodicea-ki*

<sup>14</sup> “Jiroka posankenateniriri imaninkarite kemisantzinkaripaini apatotainchari Laodicea-ki. Iri ñaanatziriri iitaitziri ‘Ari onkantaitaatyeyaaani,’ rawentaashiretairi kenkithatzirori irooperori. Iriira riñaanatziri riwetsikaakeri pairani jiroka kipatsi. Ikantziri:

<sup>15</sup> ‘Niyotziro pantayetzi. Poshiyakawo kaari saawaatatsine, kaari katsinkaatsine. Nokowiri naaka, saawaari. Eerorika osaawatzi, nokowi katsinkaari. <sup>16</sup> Irooma poshiyaaworika jampaironkatatsiri ñaa, ari noowawintakemi. <sup>17</sup> Pikantapiintaiyini eerokapaini: “Ashaagantakena, tekaatsi nonkoitye.” Iro kantacha te ari pinkantya, owashire pikanta, manintaarewo, ashironkaarewo, mawityaakiri, aatonkoryaamerekiri. <sup>18</sup> Poshiyakagairo pamanantaatyeeerime noorote

rosaawakitaitziri riporekaperotantyaari. Ari pimatairo pashaagantya. Poshiyakagairo pamanantaatyeerome kitamaari noithaare, eero paatonkoryaamerekiwaitanta iro pinkaaniwaitantyaari. Poshiyakagairo pamanantaatyeerome naawintawo petsiyatakotantaiyaari pimawityaakiwetakaga. <sup>19</sup> Iro nametari naaka nokisaneentziri netakotanewo, nowasanketziri. Ontzimatye pinkyaaryootai eerokapaini, pipiyashiretai. <sup>20</sup> Pamine, oshiyawaitakawo nonkatziyatyeeme jakakeroki nonkaime nonkyaantyaari. Tzimatsirika inthomoiki kemakenari, rishinetanarika nonkye, arira antsipatawakagaiyaari akiyootawakagaiya. <sup>21</sup> Tzimatsirika aawyaakerone jiroka, ari intsipataina nompinkathariwentante. Tema nimatakerone naaka naawyaakero, notsipataari risaikamentoki Nopaapate nopinkathariwentantai. <sup>22</sup> Kowirori inkemathatero, inkemisanteri Tasorenkantsi ikantziriri kemisantzinkaripaini.’ ”

## 4

### *Thaamentaantsi inkiteki*

<sup>1</sup> Okanta okaatapaake jiroka, noñaatzi ashitaryanaaka inkite. Irijatzi apiitapairo riñaanatapaana noñaakeri inkaaganki paimpatapaintsiri roshiyari tyoorentsi. Ikan-tana: “Pipoke jenoki, ari noñaagakemiro onkaate awisatsine paata.” <sup>2</sup> Okanta niyaashiretanake jenoki, noñaakero saikamentotsi, oshiyawaitakawo risaikantapi-intari pinkathariperotatsiri, owaneenka okantaka. Eenitatsi apaani saikantakawori. <sup>3</sup> Jirika saikaintsiri shipakiryaa ikantaka, roshiyakawo potsitakiri mapi kareñaanikitatsiri. Itapotakeri oye risaikamentoki, roshiyawaitakawo oye natsiryaakiri mapi kareñaanikitatsiri. \* <sup>4</sup> Eenitatsi otsipa saikamentotsi okaatzi 24, iro osatekakeriri niyankineki saikaintsiri. Ari risaikayetakeri itzinkamipaini, kitamaa okantayetaka iithaare, ooro rinayetake ramanthaire. <sup>5</sup> Nokemakero ookathawontsi, opoñaanakawo iñaanake saikamentotsiki. Eenitatsi 7 ootamentotsi ootainchari, iri imontetakari saikamentotsi. Iri oshiyakaawentziriri Itasorentsita Pawa, kaatatsiri eejatzi 7.

<sup>6</sup> Eenitatsi inkaare imontetakari saikamentotsi, kityaaniki okantaka. Eenitatsi 4 inkiteweri katziyainchari, iri piyowentakawori jiroka saikamentotsi. Iri kantacha jirika inkiteweripaini otzimi osheki roki, iro raminantayetari tsikarikapaini, raminantayetawo eejatzi itaapiiki. † <sup>7</sup> Etawori inkiteweri roshiyakari manitzi. Itsipa roshiyakari waakaaniki. Itsipa atziriwoo rinake. Iriima itsipa roshiyakari rewowaita shirontzi. <sup>8</sup> Romapokashitanaka otzimayetanake ishiwanki jirika inkiteweri, 6 ishiwanki tzi-mayetanaintsiri. Otzimi osheki roki iwathaki, otzimitanaka roki inthomoiki iwathaki. Iri kamaitanakawori romampaapiinta, kiteesheriki eejatzi tsireniri, ikantzi: Tasorentsi, Tasorentsi, Tasorentsi rini Pinkathari Pawa, Shintsiperori. Iriira añaatsiri iroñaaka, iri etawori pairani itzimake, irootaintsi ripiyai.

<sup>9</sup> Ari ikantapiintatya jirikapaini inkiteweri ithaamentari saikaintsiri, kantaitachari rañi. Ikanta roñaagantakero jirikapaini ipinkathatapiintakeri, riwetharyaapiintakari, <sup>10</sup> rimatanakero eejatzi 24 itzinkamipaini rotziwerowashitanakari saikaintsirira, kantaitachari rañi. Ithaamentanakari, ramanthairiimotanakari. Ari iñagaitziro imapero rawisantzi saikaintsiri ipinkatharitziri, okantaweta ipinkathariwentantzi irirori itzinkamipaini. Ikantaiyanakeni:

<sup>11</sup> Nowinkatharité, Pawá,  
Iroowa kameethaperotatsiri ontzimimotoemi powaneenkawo, pinkathaga  
inkantaitemi, ontzimimotoemi pishintsinka.  
Eerokatake wetsikayetakero maawoini, tema eeroka kowashitainchari ontzimayete  
piwetsikanewo.

\* **4:3** Mapi “potsitakiri kareñaanikitatsiri” iitaitziro “jaspe”, iitaitziro eejatzi “cornalina”. Irooma mapi “natsiryaakiri kareñaanikitatsiri” iitaitziro “esmeralda”. † **4:6** Kantakotachari jaka “kityaaniki” oshiyakawo okanta poteryaa, vidrio eejatzi cristal.

## 5

*Osankenarentsi eejatzi Oweja*

<sup>1</sup> Noñaatziiri saikaintsiri saikamentotsiki, rotaiyake rakoperoki osankenarentsi. Kameetha ampinaita, 7 okaatzi rontsirekaitakero eero rampinairyaaantaitawo.

<sup>2</sup> Noñaatzi maninkari tzimatsiri ishintsinka, richerayi ikenkithawaitzi, rosampitantzi: “¿litaka rowaitakeri rontsirekaryagairo osankenarentsi, rampinairyagairo?” <sup>3</sup> Tekaatsi materone rampinaireero riñaanatero. Tekaatsi inkiteki, kipatsiki, eejatzi sarinkaweniki, tekaatsi ampinairyagairone. <sup>4</sup> Antawoite niraanaka, tema tekaatsi materone rampinairyagairo riñaanatero. <sup>5</sup> Ikantana itzinkami: “Aritake piraaka. Pamine. Eenitatsi matakeroi otzimimotziri itasorenka, iri materone rontsirekaryagairo, rampinairyagairo eejatzi. Iri charinetariri Judá, iitaitziri ‘Manitzi.’ Iri charinetariri David-ni. Iriira rowaitakeri rimatero.”

<sup>6</sup> Noñaatzi oweja. Ikatziyaka niyankineki isaikakera saikamentotsi, rosatekakeri inkiteweriite, rosatekakeri itzinkamipaini. Jirika oweja oshiyawaitakawo rowamaitakityeerime pairani. Tzimatsi okaatzi 7 ichee. Tzimatsi eejatzi 7 roki. Iri oshiyakaawentacha 7 Tasorentsi, iñagaitairi maawoini kipatsiki. <sup>7</sup> Ikanta jirika oweja, riyaaatashitakeri okaakiini saikaintsiri. Rotaiyapaakero osankenarentsi. <sup>8</sup> Ikanta inkiteweriite eejatzi itzinkamipaini, rotziwerowashitanakari oweja, ipinkathatanakeri. Tzimayetatsi romampaamento. Tzimatsi kasankari ritagaitziri rowaitakero janta ooronakiki. Jiroka kasankari iro oshiyakaawentacha ramananewo ikiteshoretakagaitanewo. <sup>9</sup> Ari romampaanakawo owakerari omampagaantsi, romampaakotari oweja, ikantaiyini:

Eeroka rowaitake potaiyero osankenarentsi, eeroka ontsirekaryagairone, Tema eeroka kapathainkataintsi rowamaaweetakemi, ari pipinakowentairiri atziripaini rashitantaariri Pawa.

Ari rashiyetaari Pawa itsipatsatzi sheninkatawakaachari tsikarikapaini, kemathatawakaawori riñaane tsikarikapaini, saikayetatsiri tsikarika janta, ipinkathariwentaitziri tsikarikapaini.

<sup>10</sup> Eeroka kantakaawori roshiyantaariri pinkatharipaini, roshiyaari Imperatasorentsi-taarewo, rantawaitainiri Pawa.

Iriira pinkathariwentairine isaawikisatzi.

<sup>11</sup> Noñaatzi osheki maninkari piyowentapaakawori saikamentotsi, tsika risaikake inkiteweri eejatzi itzinkamipaini. Ari ipiyotapaaka oshekiperotatsiri maninkariite.

<sup>12</sup> Ikantaiyini:

Jirika oweja rowamaaweetakari, iri kameethaperotatsiri otzimimotziri itasorenka, otzimimotairi rashaagawo, riyorenka, ishintsinka, ipinkathaitairi, rowaneenkata, inthaamentaityaari.

<sup>13</sup> Nokematzi romampagaiyanakani maawoini saikantawori inkite, kipatsi, inkaare, sarinkaweni. Ikantaiyini:

Jirika saikaintsiri saikamentotsiki, itsipatakari oweja, thaamentaarewo rini, pinkathataarewo rini, otzimimotziri rowaneenkawo, ipinkathariwentantzi, rashi rowaatyeero.

<sup>14</sup> Iri inkiteweriite apiipiintzirori ikantzi, “Ari onkantaitaateyeeyaani.” Iriima itzinkamipaini otziwerowa ikantaiyakani ipinkathataiyirini jirika kantaitaachane.

## 6

*Rontsirekaryagaitakero*

<sup>1</sup> Ikanta noñaakeri oweja rontsirekaryaanakero etanakawori rontsirekaitakero. Ari richeraanake ikenkithatanake inkiteweri, oshiyanakawo ookathawontsi, ikantzi: “¡Pipoke! ¡Pamine!” <sup>2</sup> Noñaatziiri rishiyapaaka kitamaari kawayo, rotaiyakero iyaane kyaakaakariri kawayo. Ramanthaitaitawakeri, jatanake romanatya, rithonkaatante.

<sup>3</sup> Rontsirekaryaanakero oweja otsipa. Ari richeraanake itsipa inkiteweri, ikantzi: “¡Pipoke! ¡Pamine!” <sup>4</sup> Ari rishiyapaaka itsipa kityonkari kawayo, ipaitawakeri kyaakaakariri antawoite owathaamentotsi. Iri rowaitake ripakaakagairi atziripaini risaikawetaga kameetha kipatsiki. Iroowa rowamaawakaantari atziripaini.

<sup>5</sup> Rontsirekaryaanakero oweja otsipa. Ari richeraanake itsipa inkiteweri, ikantzi: “¡Pipoke! ¡Pamine!” Noñaatziiri rishiyapaaka itsipa cheenkari kawayo, rotaiyake itenamento kyaakaakariri. <sup>6</sup> Nokematzi cheraanaintsiri ikatziyaiyakanira inkiteweri, ikantzi: “Pimpimantayete eepiyokiini piwankire, pinkowantakaaperotyaawo, tema te otzimaperotzi. Ari paake osheki koriki kiteesheriki, ari iñagaitero antawoite tashetsi. Eerowa paperaatziro pankirentsi riraitziri, ragaitziri eejatzi oyeenka pankirentsi.” \*

<sup>7</sup> Rontsirekaryaanakero oweja otsipa. Ari richeraanake itsipa inkiteweri, ikantzi: “¡Pipoke! ¡Pamine!” <sup>8</sup> Noñaatziiri rishiyapaaka itsipa kiteriri kawayo, iitaitziri “Kaamanetaantsi” kyaakaakariri. Ari itsipatakari iitaitziri “sarinkaweni”. Jirika iitaitziri “Kaamanetaantsi” rowaitakeri rowamaayete apawopaini isaawikisatziite. Tzimatsi rowamaakeri rowathaantaitakari osataamentotsi, eenitatsi aayetakeri ritashe, itsipa aayetakeri mantsiyarentsi, itsipa ratsikayetakeri katsimari owantaneri. †

<sup>9</sup> Rontsirekaryaanakero oweja otsipa. Noñaatziiri oponkitziki taapokimentotsi ishirepaini rowamaawentaitakeri ikenkithatakotziro riñaane Pawa. <sup>10</sup> Richeraanake shintsiini, ikantaiyini: “Nowinkathariperorité, Tasorentsi, Iriiperorí. ¿Tsika onkaateka osamanite pinkisawentantainari, powasanketairi isaawikisatzipaini?” <sup>11</sup> Ipaitakeri kitamaari kithaarentsi inkithaatya, ikantaitziri: “Piyaatakaairo pimakore rareetawaiyaata pirentziite pitsipatari pantawaitake. Ontzimatyé rowamagaiteri iriroripaini roshiyakotaimiro eerokapaini.”

<sup>12</sup> Noñaatziiri rontsirekaryaanakero oweja otsipa, yotapaaka apaani rithonkantyaawori. Ari omapokanakari antawoite omoyeka. Tsiwakimatanake ooryaa, tsireniki okantanaka. Kityonka ikantanaka kashiri roshiyanakawo iraantsi. <sup>13</sup> Rithopiryaayetanake impokiro, roshiyawaitanakawo ithopiryaakitzi iraka chochoki otekakitziro antawoite tampyaa. ‡ <sup>14</sup> Te okoñaatai inkite, oshiyawaitanakawo ampinaita antawoite tsipana. Te iñagaitairo otzishipaini taankayetanaaintsiri, eejatzi othampishipaini. <sup>15</sup> Manaiyanakani atziripaini impeetatapiki. Rimanaiyanakani maawoini, pinkatharipaini, iriiperoripaini, reeware owayeripaini, ashaagantzinkaripaini, shintsiripaini, noshikaarewopaini, saikashiwaitzinkaripaini eejatzi. <sup>16</sup> Jirikapaini manayetanaainchari ikaimakaimatanakero otzishi, mapipaini, ikantzi: “Panaweenata. Pimanena eero noñaantari saikaintsiri saikamentotsiki. Pimanena eero noñaantari oweja kisaneentakenari.” <sup>17</sup> Monkaatapaakaga iyatsimanka. ¿Eenitatsima kisashityaawone?

## 7

### *144,000 ikentakotamakoitakeri*

<sup>1</sup> Okanta okaatapaake jiroka, noñaake ikatziyaka 4 maninkari owatzipapaaga kipatsi. Iri otzikakerori antawoite tampyaa. Iroowa kaari iñaantaitawo ontamakaatakaairo inkaare, kaari iñaantaitawo eejatzi owaagapanayetero tsipana. <sup>2</sup> Noñaakeri eejatzi itsipa maninkari ritonkaapaake rishitowapiintzira ooryaa. Richerayimotapaakeri 4 maninkari. Tema jirika 4 maninkari, otzimimotziri ishintsinka, rowaitakeri rowaariperotero kipatsi eejatzi inkaare. <sup>3</sup> Ikantapaakeri: “Paataga powaariperotziro

\* **6:6** Jiroka jaka ikantajaantaitziri: “Pimpimante apaani pawiipanete harina pinkowantzimaityaawo apaani denario. Pimpimante mawa pawiipanete cebada pinkowantzimaityaawo apaani denario.” † **6:8** Kantakotachari jaka “apawopaini”, inkaaterika 4 atziri, apaani kamaintsine. Ari inkantya otsipaki nampitsi intzimerika 4 atziri, apaani kamaintsine. Ari inkantayetyaari maawoini kipatsiki. ‡ **6:13** Kantakotachari “chochoki”, iro iitaitziri higuera.



kipatsi, inkaare, inchatopaini, nompothotawakeriita nokentakotamakotakaantakeri rimperayetaari Pawa.”<sup>4</sup> Nokematzi apaani kenkithatakotanakeriri ikaatzi ikentakotamakoitakeri. Ikaataiyini 144,000. Iriira kaataintsiri 12 isheninkapaini icharine-tari Israel-ni.<sup>5</sup> Ikentakotamakoitake 12,000 isheninkapaini Judá, 12,000 isheninkapaini Rubén, 12,000 isheninkapaini Gad,<sup>6</sup> eejatzi 12,000 isheninkapaini Aser, 12,000 isheninkapaini Neftalí, 12,000 isheninkapaini Manasés,<sup>7</sup> eejatzi 12,000 isheninkapaini Simeón, 12,000 isheninkapaini Leví, 12,000 isheninkapaini Isacar,<sup>8</sup> eejatzi 12,000 isheninkapaini Zabulón, 12,000 isheninkapaini José, 12,000 isheninkapaini Benjamín.

### *Kitamaataintsiri ikithaayetaka*

<sup>9</sup> Okanta okaatapaake jiroka, noñaatzi ipiyotaka atziripaini. Osheki ikaatzi, tekaatsi materone riyoteri tsikarika ikaataiyini. Iri poñaayetaichari tsikarikapaini ipinkathariwentaitziri, sheninkatawakaachari tsikarikapaini, nampitziyewetawori tsikarikapaini, kemathatawakaawori riñaane tsikarikapaini. Jirika atziripaini, iri katziyainchari risaikamentoki oweja, kitamaa ikantayetaka ikithaayetaka. Rotaiyayetake opatzitenki kompirosi.<sup>10</sup> Thaamenta ikantaiyani, ikaimaiyini ikantzi: Iriira Pawa owawisaakotantsiri, iriitake saikaintsiri saikamentotsiki, itsipatakari oweja.

<sup>11</sup> Ari rotziwerowaiyanakani tapothaikiwentakawori saikamentotsi. Jirika ikaataiyakeni: maninkariite, itzinkamipaini, eejatzi inkiteweriite. Ithaamentanakari Pawa,<sup>12</sup> ikantaiyini: “¡Ari onkantaitaateyeyaani! Thaamentaarewo rini irirori, otzimimotziri rowaneenkawo, yotaneri rini, wetharyagaarewo rini, pinkathataarewo rini, eenitatsi itasorenka eejatzi ishintsinka. Ashi owaateyero anthaamentaiyaari Pawa. Ari onkantaitaateyeyaani.”

<sup>13</sup> Riñaanatanakena apaani itzinkami, ikantzi rosampitana: “¿Tsika iitaka jirikapaini kitamaathaitaintsiri ikithaataka? ¿Tsika ikenapaakeka?”<sup>14</sup> Nokantanakeri naaka: “Iitaanitya, piyotziro eeroka nowinkatharite.” Ikantanakena irirori: “Iriitake ñaayetakerori ‘Antawoite Kemaatsiwaitaantsi.’ Oshiyawaitakawo inkiwantateyeyaawome iithaare riraa oweja, iroowa kitamaamawotakaaperotairori.<sup>15</sup> Iro rimatantaawori jirikapaini ikatziyimotaari Pawa risaikamentoki. Rashi rowaateyero kiteesheriki, eejatzi tsireniriki rantawaitainiri itasorentsipankoteki. Jirika saikaintsiri risaikamentoki, roshiyakawo iriime osatetairine raampeyeri jirikapaini.<sup>16</sup> Eero ritasheyaneentawaitai, eero imereneentawaitai, eero ikemaatsiwaitaari ooryaa,<sup>17</sup> tema jirika oweja montetakawori saikamentotsi, iriitake kempoyagairine, roshiyakagairi ikempoyagaitziri piratsi, iri aayetairine rirakagairi ñaa owañaantatsiri. Tema roimoshirenkairi Pawa oshiyawo rosheyookitaateyerime riraawaitakaga.”

## 8

### *Kaatapaintsiri 7 rontsirekaryagaitakero*

<sup>1</sup> Ikanta oweja rontsirekaryakero kaatapaintsiri 7 rontsirekaitakero. Osamani imairetaipaintzi inkiteki, tekaatsi apaani kenkithawaitatsine.\*<sup>2</sup> Noñaakeri iroñaaka 7-paini maninkari itsipatapiintari Pawa. Ipaitakeri tyoomentotsi.<sup>3</sup> Ari ripokapaake itsipa maninkari, ikatziyimotapaakawo taapokimentotsi, rotaiyanakitakeri ooronaki. Jirika maninkari, ipaitawakeri osheki kasankari ritaantyaawo rotaiyanakitakeri. Owaitakawo ramananewo atziripaini ikiteshoretakagaitanewo, oshiyawaitakawo ompiyotateyeyaame onampinaki taapokimentotsiki.<sup>4</sup> Okanta itaanaka kasankari rotaiyanakitakeri maninkari, katziyainkatanaka oyacharite owaitanakawo ramananewo ikiteshoretakagaitanewo, osheki inimotakeri Pawa.<sup>5</sup> Ikanta

\* 8:1 Kantakotachari jaka “osamani”, kemetaka okaatzi ½ hora.

jirika maninkari otaiyanakitakerori ritaamento, raake omenki taapokimentotsi, rote-tantakawo rotaiyanakitakeri. Rookakeri kipatsiki. Ari omapokanakari kameni-tanaintsiri, antawoite ookathatanaka, antawoite omoyekanaka eejatzi.

### *Tyoomentotsipaini*

<sup>6</sup> Wetsikaiyanakani <sup>7</sup> maninkari rityootaiyeni.

<sup>7</sup> Ari retanakawo apaani maninkari rityootanake, omapokashitapaaka oparyaa-paake kipatsiki jiriniki, eejatzi paampari, oshiyawaitanakawo iraantsi. Itaapaakero kipatsi. Iro ithonkyaame kashetani kipatsi itaiya inchatopaini, eejatzi inchashipaini.

<sup>8</sup> Tyootanake itsipa maninkari, omapokashitanaka itonkanake antawoite otzishi, shitowanake paampari, jokapaaka inkaareki, oshiyanakawo iraantsi. Iro ithonkyaame kashetani kipatsi isaikayetzira ñaa, <sup>9</sup> iro rithonkyaame inkamayeteme saikantayetaka-wori inkaare, eejatzi saikantawori antawo pitotsi. <sup>10</sup> Tyootanake itsipa maninkari, omapokashitanaka rithopiryaanake impokiro, paampa ikantanaka irojatzsi tsika isaikayetzsi ñaa, iro ithonkyaame kashetani kipatsi isaikinta ñaa. <sup>11</sup> Jirika impokiro jokapainchari kipatsiki iitaitziri “Kepishiri”. Tema kepishaa ikantakaapaakawo maa-woini ñaa oparyaaakera ipomeki. Iro ithonkyaame kashetani kipatsi inkameme atziri opiyakeri rirakerowa ñaa.

<sup>12</sup> Tyootanake itsipa maninkari, omapokashitanaka itsirenitanake ooryaa, iro rithonkyaame kashetani te rooryaaperotanai. Ari ikantakari kashiri eejatzi impokiro, te roorentaperotaawo tsireniriki.

<sup>13</sup> Nokematzi kamenitapaintsiri raapaake inkiteki, noñaatziiri shirontzi rini, rateka-paake: “¡Oojé, oojé, oojé, inkantamatsitaiteri nampitaiyaawone kipatsiki, iri at-sipetaiyaawone yotapainchari rityootawai mawa maninkari!”

## 9

<sup>1</sup> Tyootanake itsipa maninkari. Noñaatzi rithatyaanake oshiyakariri impokiro irojatzsi kipatsiki. Iri rowaitake rashitareero omoo inthomoinaperotatsiri.

<sup>2</sup> Ikanta rashitaryaakero, ari ishitowainkatanake kachaari, oshiyawaitakawo antawoite ootaantsi. Ipamankanakeri ooryaa, eejatzi tampyainka. <sup>3</sup> Shitowanake osheki kachaariki oshiyariri tsinawo, roshiyapaakari ikentantzi kitoniro. <sup>4</sup> Te rishinetaitziri rapeyayetero pankirentsi, inchashipaini, inchatopaini. Apatziro ikentayetapaakeri atziripaini kaari ikentakotamakoyetzi Pawa. <sup>5</sup> Jirikapaini oshiyariri tsinawo, te rishinetaitziniri rowamairi atziripaini ikentayetakeri. Apatziro ikemaatsitakaawaitakari ikaatzi <sup>5</sup> kashiri. Antawoite ikatsitzimotakeri, ariwaitake iyatsinka kitoniro. <sup>6</sup> Osheki inkemaatsiwaitya atziripaini, inkowawetya naaweta inkamapithateri, eero ikamimaita.

<sup>7</sup> Jirikapaini oshiyakariri tsinawo, roshiyanyakyaari kawayopaini iñaantakaari rowayerite, ramanthaiyetakari oorumoko. Atziriwoowaitake ikantayetaka.

<sup>8</sup> Santhapetainka okanta iishi, roshiyawaitakawo oishi tsinane. Antawopaini raiki, ariwaitake raiki manitzi. <sup>9</sup> Rowakero ishianeeeki oshiyawori kotsirotaki. Antawoite ikamenitanake ragaiyanakeni, roshiyakari ikamenitzi iyawayote atziripaini arika romanatawakaiya. <sup>10</sup> Oshiyawaitakawo ontzimeme ithoyeni kitoniro ipatzithomeki. <sup>5</sup> kashiri osamanitzi awisantyaari iyepiyanka. <sup>11</sup> Jirika jewatziriri oshiyariri tsinawo, maninkari rinawetaka, iri pinkathariwentantatsiri inthomoinaperotzira omoo. Iitaitziri jirika “Thonkaataneriri”. Ipaanteki Heber-thato, iita “Abadón”. Ipaanteki Grecia-thato, iita “Apolión”.

† 8:7 Kantakotachari jaka “Iro ithonkyaame kashetani kipatsi,” arika akotareerome mawakota kipatsi, aake apakotawoni, athonkakero tzimantawori, maawoini inchatopaini, shimapaini, ithonka oshityaatanake ñaa janta.

<sup>12</sup> Ari iweyaawo etanakawori ratekaitzi “¡Oojé!” Iro kantacha yotapaaka imonkaatya apite inkantaite “¡Oojé!”.

<sup>13</sup> Tyootanake itsipa maninkari, yotapaaka rityootawai apaani maninkari irojatzirimonkaatantyaari 7 maninkari. Nokematzi cheraanaintsiri osorinanampiki taapokimentotsi montetakariri Pawa. <sup>14</sup> Riñaanatapaakeri maninkari tyootanaintsiri, ikantziri: “Poosoryaakoteri 4 maninkari oshiyakawori oosotatyeeerime antawoite ñaa ‘Eufrates.’ ” <sup>15</sup> Rishiryaaakoitakeri maninkari ayimatakeri ritsitokante. Iri thonkerineme ritsitokeri atziri nampiyetawori kashetani kipatsi. Iroowa roosoryaakoitantakariri rithonkante.

\* <sup>16</sup> Tzimatsi osheki owayeri kyaakaakariri iyawayote. Riyotagaitakena, ikaataiyini 200,000,000 owayeri. <sup>17</sup> Noñaatziiri ikoñaaperotanake owayeripaini noñaawyaatakari, rowayetakero kotsirotaki ishipaneeki. Eenitatsi porekathaitaintsiri roshiyakawo paampari, itsipa kityonkaironkathaitaintsiri, itsipa kiterithaitaintsiri. Jirika kawayopaini, ariwaitake iito manitzi. Ishitowanake ipaanteki paampari, kachaari, kiterimoito okantanaka, osheki oshitzinka. <sup>18</sup> Okaatzira shitowanaintsiri ipaanteki, iro thonkerineme owamairi atziri nampiyetawori kashetaniki kipatsi. <sup>19</sup> Tema ipaanteki kawayopaini otzimi ishintsinka. Kantacha ratsikantantyaawo itzinko, roshiyawaitakari maanke.

<sup>20</sup> Iro kantzimaitacha, te ripakairo ikaariperotzi atziripaini kaari rowamagaitzi. Eekero riyatakaatziro ipinkathayetanakeri Kamaari, ipinkathatziri oshiyakaawontsi riwetsikaitziri ooro, koriki, kotsiro, mapi, inchakota, roshiyakaakeri pawa, te ikemanetzi, te ranashineta. † <sup>21</sup> Te ripakaanakero eejatzi ritsitokantayetzi, ikisaminthatantzi, imayempitzi, ikoshiyetzi.

## 10

### *Maninkari otaiyakerori oryaani osankenarentsi*

<sup>1</sup> Noñaake rishaawiinkapaake itsipa maninkari, ikenantapaakawo menkori, oshiyawaitanakawo iro menkori inkithaatakyaame. Iri oye ramanthaitakyaame. Shipakiryaa ikantaka ipooki, kemewaitake ooryaa. Shipakiryaaake iporipaini.

<sup>2</sup> Rotaiyake oryaani osankenarentsi ampinairyagainchari. Rayiitzimatapaakera, raatzikantapaakawo iitziperori inkaareki, irooma rampate, iro raatzikantapaaka kipatsiki. <sup>3</sup> Ikaimapaake, ariwaitake rasoontzi manitzi. Omapokashitanaka ookathatanaka, okaatzi 7 apiitanaka. <sup>4</sup> Okanta okaatapaake 7 ookathata, ari nokowawetaka nosankenaterome nokemakeri ikantaitakeri ookathawontsiki. Nokematzi riñaanatanakena inkitesatzi, ikantana: “Eero posankenatziro pikemakeri ookathawontsiki.”

<sup>5</sup> Irojatziri riñaawaitantanakari maninkari aatzikapaakerori inkaare, eejatzi kipatsi. Itzinaawakotanaka rakoperoki, <sup>6</sup> riyotaitantyaariri te ithaiya riñaawaitziri raakotairi iwairo Pawa Kañaaneri, wetsikakerori inkite, kipatsi, inkaare, maawoini ikaatzi tzimantawori. Ikantanake: “Te osamanitanai, <sup>7</sup> irootaintsi rityoote weyaantapaakawori maninkari, ari imonkaatya ikantakeriri Pawa Kamantantaneripaini inkamantantairo kaari riyotakowetaita pairani.”

<sup>8</sup> Nokematzi rapiitanakena riñaanatanana inkitesatzi, ikantana: “Piyaatashiteri maninkari katziyainchari inkaareki eejatzi kipatsiki, payero eeroka ampinairyagainchari rotaiyakeri.” <sup>9</sup> Ari nokantakero. Niyaatashitanakeri maninkari, nokantapaakeri: “Pimpenawo osankenarentsi.” Ikantanakena irirori: “Jiroka, poyaaawo. Osheki owochanka, ariwaitake pitsi arika powakyaawo, arika piniyakero, osheki oyepishikemi pimotoziki.” <sup>10</sup> Nimatakero, nowakawo. Ari okantaka, pochaanikitake ariwaitake pitsi, iro kantacha osheki oyepishikakena nomotziki. <sup>11</sup> Iro ikantantakenari maninkari:

\* **9:15** Jiroka kantakotachari “iri thonkerineme ritsitokeri atziri nampiyetawori kashetani kipatsi,” oshiyatyaaowowa arikame akotareerome mawakota kipatsi, irojatziri aantakyaawome apakotawoni, athonkakero okaatzi tzimantawori. † **9:20** Kantakotachari jaka “kotsiro”, irijatzi iitaitziri bronze.

“Pinkamanteri awishimoterine ikaatzi nampiyetawori tsikarika janta, ikaatzi ipinkathariwentaitziri tsikarikapaini, kemathatawakaawori riñaane tsikarikapaini. Pinkamantairi eejatzi pinkatharipaini.”

## 11

### *Apite kenkithatakotantaneri*

<sup>1</sup> Ipaitakena apaani kotzitsi, nimonkaamento inatye. Ikantaitakena: “Piyaate pimonkaatero tasorentsipanko, eejatzi taapokimentotsi. Piyoteri eejatzi tsika ikaatzi piyotainchari ipinkathatantzi. <sup>2</sup> Eero pimonkaatziro jekokeroini tasorentsipanko. Iro rishinetaitakeniriri itsipasatzi atziripaini, ari ipiyotaiyaani koshekantaneri tasorentsi-nampitsiki. Ari risaikeri inkaate 42 kashiri osamanite. \* <sup>3</sup> Ari notyaante apite kenkithatakotenane, iri kenkithatapaakerone awisayetatsine, onkaate 1260 kiteesh-eri inkenkithatakotena. Roshiyakotakyaari ikanta ikithaayeta owashiretakotariri kaminkari.”

<sup>4</sup> Jirika apite kenkithatakotantaneri, iri roshiyakaawentaitakeri pairani apite in-chato, irijatzi roshiyakaawentaitakeri apite rootamento Pawa pinkathariwentziriri kipatsisatzi. † <sup>5</sup> Tzimatsirika koshekyaarine jirika apite kenkithatakotantaneri, ari ishitowanake ipaanteki paampari, rithonkeri kisaneentziriri. Ari inkantya maawoini kowawetachane inkoshekyaaari, ari inkamake. <sup>6</sup> Jirika kenkithatakotantaneri otzimimotziri ishintsinka. Ari inkantakaakyaawo eero oparyaagai inkani irojatzi imonkaatantakyaari ikenkithatakaantziri. Ari imatakya impeyero iraantsi ñaapaini. Ari imatakya ontzime pomeentsitzimotyaarine isaawikisatzi. Ari rapiipiintakero okaatzi ikowiri irirori. <sup>7</sup> Arika onkaatapaake ikenkithatake, ari rishitowanake mashireyantzi owantaneri omooki inthomoiperotatsiri, inkoshekapakyaari apite kenkithatakotantaneri, irojatzi rowamaantakyaariri. <sup>8</sup> Rookanakeri rowamaanewo awotsiki saikatsiri antawoki nampitsi, tsika ikentakoitakeri pairani Iwinkatharite. Iroowa oshiyakaawentachari “Sodoma” eejatzi “Egipto”. <sup>9</sup> Eero rishinetziri inkitaiteri rowamaanewo, awisaneentawakeeta mawa kiteesheri osamanite raminaminthaiteri. Rithonkya iñeeri nampiyetawori tsikarikapaini, rowawiroke sheninkatawakaachari tsikarikapaini, kemathatawakaawori riñaane tsikarikapaini, ipinkathariwentaitziri tsikarikapaini. <sup>10</sup> Antawoite roimoshirenkya isaawikisatziite, impashitawakaayetya oitarika. Kimoshire inkantayetya rowamaitakerira apitekeroini kenkithatakotanta-neri owashironkaawaitakeriri isaawikisatziite. <sup>11</sup> Okanta awisaneentanake otsipa mawa kiteesheri, ritasonkairi Pawa jirikapaini, añaayetai. Piriintanaawo. Oshékira ithaawaitanake iñagaitakerira ipiriintaawo. <sup>12</sup> Ikemaitake cheraanaintsiri inkiteki, ikan-taitake: “Pateete jenoki.” Romapokashitanaawo reethonkitantaawo menkori. Ari iñaawairi maawoini kisaneentawetakariri. <sup>13</sup> Ari omoyekanakari antawoite kipatsi, iro ithonkerome nampitsi, ikamayetake 7000 atziri. Iriima kaari kamatsine, ikan-tayetanake: “Imapero otzimi ishintsinka Pawa saikatsiri inkiteki.” ‡

<sup>14</sup> Ari awisawetaka apite ikantaitake “¡oojé!” Iro kantacha, irootaintsi iñagaitero mawatatsine.

### *Weyaantawori tyootaantsi*

<sup>15</sup> Tyootanake weyaantawori maninkari, ari richeraacheraitanake inkiteki, ikan-taitzi: “Iroñaaka impinkathariwentantai Awinkatharite kipatsikinta. Ari impinkathari-wentantai Cristo, rotyaantakeri Pawa, rashi rowaatyeero impinkathariwentantai.” <sup>16</sup> Ari rotziwerowaiyanakani 24 itzinkampaini, ithaamentanakari Pawa, <sup>17</sup> ikantaiyini:

\* **11:2** Kantakotachari jaka “42 kashiri”, iroowa ikantaitziri “1260 kiteesheri”. Iro kantakotachari awisaneentanakerika mawa osarentsi osamanite. † **11:4** Kantakotachari jaka “apite in-chato”, iroowa olivo. ‡ **11:13** Ikantaitziri “omoyekanaka antawoite kipatsi”, tsikarika isaiki pankotsi 10, pookanake apaani. Ari okantakari maawoini nampitsi.

“Pawá, Pinkatharí, Shintsiperorí, eerokatake añatsi, pitzimitakaga pairani, irootaintsi pipiyai. Osheki niwetharyaakemi, tema poñaagantakero pishintsinka, pipinkathariwentantzi. <sup>18</sup> Pairani osheki ikisaneentakemi atziripaini, iro kantacha, monkaatapaaka poñaagantaiyaariri piyatsimanka, powasanketairi kamayetaintsiri, pithonkayetairi owamaantayetaintsiri. Ari pipinayetairi Kamantantaneriite pimperatanewo eeroka, ari pinkantakeriri piiteshiretakaanewo aakoyetaimiri piwairo ipinkathayetaimi, maawoini pipinayetairi petanakyaari antariite irojatzí iryaaniite, maawoini.”

<sup>19</sup> Irojatzí ashitaryaantanakari itasorentsipankote Pawa janta inkiteki, koñaawaitanake tasorentsínaki rotetakoitzirowa aapatziyawakagaantsi. Antawo ookathatanaka, omoyekanaka kipatsi, paryagaintakapaake antawoite jiriniki.

## 12

### *Tsinane eejatzí ironoya*

<sup>1</sup> Ari okoñaatanake inkiteki aamparentsi. Noñaatzi tsinane, okithaatakawo oithaare oshiyariri ooryaa, iriira kashiri okatziyantaka. Amanthaitakotakari 12 impokiro. \*

<sup>2</sup> Omotzitatzi jiroka tsinane. Osheki okaimakaimawaitake okemaatsitaka ontzimaanitantaari. <sup>3</sup> Irojatzí okoñaatantanaka inkiteki otsipa aamparentsi. Noñaatzí ironoya, kityonka ikantaka. Eenitatsi 7 iito, 10 ichee. Ramanthaiyetakero iito. <sup>4</sup> Osheki impokiro rataantakari itzinko, iro rithonkeme kashetani inkite ikaatzí tzimatsiri impokiropaini. Ari ripokashitapaakero tsinane, ikowi rowityaawo eenchaanikite arika intzimapaake.

† <sup>5</sup> Okanta otzimaanitake tsinane, shiramparyaaniki rini. Iri jewatantaiyaarine atziripaini iyotsirokotzitonkite. Omapokashitanaka ragaitanakeri risaikakera Pawa risaikamentoki. <sup>6</sup> Okanta tsinane shiyanaka iroori ochempiki. Ari riwetsikaantakero Pawa tsika onampitaiyaawo, onkaate 1260 kiteesheri intziyaitero.

<sup>7</sup> Ari otzimake omanarentsi inkiteki. Iriira Miguel omanatachari itsipatakari imaninkaritepaini. Iri romanatzi ironoya itsipatarakira imaninkarite irirori. <sup>8</sup> Iri kantacha jirika ironoya, te otzimaperotzi ishintsinka, rotziriyagaitakeri inkiteki. <sup>9</sup> Ari itsipatagaitakeri imaninkarite rotziriyagaitakeri. Jirika ironoya rotziriyagaitakeri, iriira jitachari “Kamaari”, iita eejatzí “Satanás”. Iri kowatsiri ramatawiteri maawoini atziripaini ikaatzí nampitawori kipatsiki. <sup>10</sup> Nokematzi cheraanaintsiri inkiteki, ikantzi: “Retanakawo ipinkathariwentantzi Pawa, retanakawo roñaagantziro ishintsinka, rowawisaakotantái. Retanakawo eejatzí Cristo rashitanta. Tema rotziryaakeri thawetakotapiintziriri Pawaki iitaitziri ‘iyekiite.’ <sup>11</sup> Jirikapaini iitaitziri ‘iyeki’ roitsinampagairi Kamaari, tema ikamawentairi oweja, kapathainka ikantaka ikamake. Iro roitsinampaantariri eejatzí ikenkithatairowa ñaantsi, rominthataawo irirori inkamawentairi Cristo. <sup>12</sup> Iro pinthaamentantyaariri eerokapaini inkitesatzi. Ikantamatsitaitzimi eerokaite kipatsisatzi, eejatzí inkaaresatzi, tema katsima ikantanaka Kamaari rotziriyagaitakeri, riyotzi yotakotapaakaga eepichokiini.”

<sup>13</sup> Ikanta iñaakero ironoya rotziriyagaitakeri kipatsiki, retanakawo ikemaatsitakaawaitanakawo tsinane owaiyakeriri shiramparyaaniki. <sup>14</sup> Iro kantacha, tzimanake apite oshiwanki, ariwaitake ishiwanki shirontzi. Iro aantanakari okenanake ochempiki. Ari imanapithatariri antari maanke. Ari awisaneentake mawa osarentsi isaikawaitake janta. ‡ <sup>15</sup> Ikanta antari maanke richyaatanake ñaa ipaanteki, ariwaitanake antawaani ñaa. Ikowaweta rowiinkerome arika oonkakotanakya. <sup>16</sup> Iro kantzimaitacha, tankanake kipatsi, irawakero ñaa, iro awisakotantakari tsinane.

\* **12:1** Kantakotachari jaka “tsinane”, iriira oshiyakaawentacha Judá-ite. Kantakotachari “otomyaaniki”, iriira oshiyakaawentacha Jesucristo. † **12:4** Jiroka kantakotachari jaka “kashetani inkite”, arika akotareerome mawakota inkite, aaye apakotawoni, athonkakero okaatzí tzimantawori. ‡ **12:14** Kantakotachari jaka “awisaneentake mawa osarentsi”, iroowa ikantaitziri: “apaani osarentsi, osarentsipaini eejatzí oniyankitzimatakerika osarentsi.”



17-18 Ari ikatsimaperotanake ironoya. Jatake romanatyaari itsipa otomipaini jiroka tsinane. Iriira roshiyakagaitzi kemisantakerori inintakaantakeri pairani Pawa, kamaitanakawori ikenkithatakoyetairi Jesucristo.

## 13

### *Apite katsimari owantaneri*

<sup>1</sup> Ari nokatziyapaaka inkaarecheraaki. Noñaatzi rishitowanake ñaaki katsimari owantaneri. Eenitatsi okaatzi 10 ichee, 7 iito. Ramanthaiyetakero icheepaini. Eenitatsi rosankenayetakeri iitoki, rithainkatasorentsiwaitaitzi. <sup>2</sup> Jirika owantaneri roshiyawaitari karinari manitzi. Roshiyakawo iitzipaini maini. Ariwaitake ipaante manitzi. Ikanta ironoya, ipakeri ishintsinka jirika owantaneri, iriiperori ikantanaka ipinkathariwentantanake. <sup>3</sup> Okanta apaani iito oshiyawaitakawo rowamagaitakityeerome, iro kantacha eejatzi añagai. Riyokitziwentanakeri isaawikisatzipaini, <sup>4</sup> osheki ipinkathayetanakeri, ithaamentanakari, ikantaiyini: “¿Litaka monkaatyaarine jirika owantaneri? ¿Litaka oitsinampairine?” Ari ikantaitakeriri eejatzi ironoya, ithaamentainakari, tema iri pakeriri ishintsinka jirika owantaneri.

<sup>5</sup> Irojatzzi richeraantanakari jirika owantaneri, rithainkatasorentsiwaitanake. Iri rowaitake impinkatharite, onkaate osamanite 42 kashiri impinkathariwentante. <sup>6</sup> Osheki rithainkatasorentsiwaitake raakominthawaitashitakariri iwairo Pawa, raakominthawaitashitakawo iwairo tasorentsithaante, raakominthawaitashitakariri iwairo inkitesatzi. <sup>7</sup> Jirika thainkatasorentsitantaneri, iri omanaterine ikiteshiretakaitanewo, inkowe roitsinampairi. Iri rowaitake impinkathariwentairi ikaatzi sheninkatawakaachari tsikarikapaini, nampiyetawori tsikarika, kemathatawakaawori riñaane tsikarikapaini, ikaatzi ipinkathariwentaitziri tsikarikapaini. <sup>8</sup> Osheki ipinkathatanakeri kipatsisatzipaini kaari osankenatakotachane rosankenatakoyetaga riyoyaitakeri pairani riwetsikantaitakawori kipatsi, inkaate rañaakagaitairi, ikaatzi ikamawentayetairi oweja. <sup>9</sup> Kowirori inkemathatero jiroka, inkemisante. <sup>10</sup> Inkaatera romonkyagaiteri, ¡Rimatero! Inkaate owamaantantyaawone osataamentotsi, ari inkantaitairi paata irirori rowamaantaityaari osataamentotsi. Iroowa roisokerotantyaawori inkemisantayetai ikiteshiretakagaitairi.

<sup>11</sup> Irojatzzi noñaantakariri itsipa katsimari owantaneri rishitowanake kipatsiki. Tzimatsi apite ichee, ariwaitake otapoterempita ichee oweja. Richeraapaake, roshiyapaakariri ironoya. <sup>12</sup> Jirika owantaneri otzimimotziri ishintsinka. Iroowa ripasawyaakeriri etakawori owantaneri rowamayitaweetakari iito, añagai eejatzi. Rot-siwakakaakariri atziripaini impinkathateri etakawori owantaneri. <sup>13</sup> Roñaagantapaake kaari iñagaitapiintzi. Rithonka iñaaayetakeri maawoini atziri rowayitziro paampari. <sup>14</sup> Osheki kipatsisatzipaini ramatawitantakariri ishintsinka ripasawyaakeriri etakawori owantaneri rowamayitaweetakari iito. Irojatzzi rotsiwakakaantakariri atziripaini riwetsike roshiyakaawo etakawori owantaneri. <sup>15</sup> Ikanta jirika owantaneri oshiyakariri ichee oweja, ritasonkakeri oshiyakaawontsi, añaanake. Ñaawaitanake. Rithonka rowamaayetakeri kaari pinkathaterine. <sup>16</sup> Ikentakotamakotakaantakeri atziripaini, amaaka rakoperoki. Maawoini atziripaini ikentakotakaantakeri, antariite, iryaaniite, koityaawaineriite, ashaagantaneriite, noshikaarewopaini eejatzi kaari noshikaarewopaini, maawoini. <sup>17</sup> Tzimatsirika kaari ikentakoitzi, eero rishineetziri ramanantawaite, impimantawaite. Iro inkowantaperotyaari inkentakotyaawo iwairo owantaneri maawoini atziri. Tzimayetatsi itsipa ikentakoitziniri oshiyawetawori iwairo owantaneri. <sup>18</sup> Tzimatsirika yowairentzi, ari inkemathatakeri oshiyakawori

iwairo owantaneri. Tema jiroka oshiyakawori iwairo owantaneri, iroowa rosanke-naitziri “666”. \*

## 14

### *Romampaane kaatatsiri 144,000*

<sup>1</sup> Ari napiitakero naminanai, noñaatziiri ikatziya oweja otzishiki iitaitziri Sion. Ari itsipayetakari kaatatsiri 144,000 kentakotamakoyetakawori iwairo oweja, eejatzi rashi Ashitariri. <sup>2</sup> Nokematzi kamenitanaintsiri inkiteki ariwaitake pareenkaari, ariwaitake shintsiri ookathawontsi, ariwaitake ipiyompiwaitaitzi. <sup>3</sup> Iriira omampagaiy-acharini kaataintsiri 144,000 ripinakowentairi oweja. Tapothaitaka romampaawentari saikaintsiri saikamentotsiki, ari ikatziyanaka 4 inkiteweri, eejatzi itzinkamipaini. Iriira yoshiitacha romampagaiyani, tekaatsi itsipa materone romampayaawo. <sup>4</sup> Jirikapaini kaataintsiri 144,000, kiteshireri rinayetatzii, te rantayetziro kaariperoyetatsiri imayempiyetero tsinane. Iriira oyaatapiintakeriri oweja tsikarika ikenayetzi. Iriira retakari rashitaari Pawa, irijatzi rashiyetakari oweja. <sup>5</sup> Te ithaiyawaanteneta, te otzimai iyaariperoshirenka inthawetakoiteriri risaikira Pawa.

### *Ikamantantakeri maninkari kaatatsiri mawa*

<sup>6</sup> Ari noñaake raapaake inkiteki itsipa maninkari, ikenkithatakaapaakeri kipatsisatzi ikaatzi ipinkathariwentaitziri tsikarikapaini, rowawiiroki sheninkatawakaachari tsikarikapaini, kemathatawakaawori riñaane tsikarikapaini, nampiyetawori tsikarika. Ikenkithatakaapaakeniri kantaitachane Kameethari Ñaantsi. <sup>7</sup> Richeraapaake, ikantzi: “Pimpinkathateri Pawa. Pinthaamentaiyaarini. Tema irootaintsi raminakoitairi maawoini rantaitakeri. Iroowa pinthaamentantyaariri wetsikakerori inkite, kipatsi, inkaare, eejatzi ñaapaini.”

<sup>8</sup> Irojatzii ripokantapaakari itsipa maninkari, richeraapaake, ikantzi: “Rapathakeroryagaitakero antawoite nampitsi Babilonia. Rithonkaitakeri atziripaini saikantawori ashiminthatawori imayempiwaitzi. Ikaimashireyeteri itsipasatzi atziripaini rimatakoteri rantayetzi irirori. Oshiyawaitakawo roshinkitatyeerime imayempitakaantakariri.”

<sup>9</sup> Irojatzii ripokantapaaka itsipa maninkari, richeraapaake ikantzi: “Ikaatzira pinkathatakeriri owantaneri, pinkathayetakero roshiyakaawo, kentakotamakoyetakawori iwairo eejatzi rakoki, <sup>10</sup> iriira ikisaneentziri Pawa. Oshiyawaitaiyaawo roitaatyeerime piyantatsiri. Antawoite inkemaatsitakaayetaiyaari ritagairi, ratsipetaiyaawo kachaari, kiterimoito onkantanakya, osheki oshitzinka. Ari iñaayetairi maawoini maninkariite tasorentsitaaintsiri, ari iñeeri eejatzi oweja. <sup>11</sup> Rashi rowaatyeero inkemaatsitaiyaawo kachaari, kiteesheriki eejatzi tsireniriki, eero itsiwakaneentai eepichokiini. Ari inkantaiyaari maawoini pinkathatakeriri owantaneri, pinkathatakerori roshiyakaawo, kentakotakawori eejatzi iwairo.”

<sup>12</sup> Iroowa inkamaitantyaawori inkisashiwaitya ikiteshiretakagaitairi ikemisan-tairira Jesús, rimonkaatapiintairo inintakaantziri Pawa.

<sup>13</sup> Nokemakeri ikantana apaani inkitesatzi: “Posankenatero jiroka: Arika inkamayete rashitaari Awinkatharite, kimoshire inkantaiya.” Ikantanakeri eejatzi Tasorenkantsi: “Imatyaata, te okowanaa iñaashintsishirewaitaiya, kameetha rimakoryaawaitzi, inintaawaitapaawo rantawentakeri.”

### *Inkowiitateri kipatsiki*

\* **13:18** Kantakotachari jaka, maawoini letra rosankenatantari Heber-thato eejatzi Grecia-thato, kantacha roshiyakagaitero número. Oshiyawori jiroka: a=1, b=2, c=3, ari okantayeta maawoini. Ari onkantakya riyotaitero wairontsipaini arika riyoitero letra-paini. Iroowa kantakotachari eejatzi jaka.

<sup>14</sup> Ari okoñaatapaake kitamaari menkori, noñaatziiri risaikake oshiyakariri Itomi Atziri. Ramanthaitakari ooro, rotaiyake thoyempyaanikiri kotsiro. <sup>15</sup> Irojatzirishitowan-tanakari tasorentsipankoki itsipa maninkari, richerayimotanakeri saikaintsiri menkoriki, ikantziri: “Sampainkatake pankirentsi, pinkowiitantyaawo piyotsirote.” <sup>16</sup> Ikanta saikaintsiri menkoriki, ritotantakawo iyotsirote, ikowiitantake kipatsiki.

<sup>17</sup> Ikanta itsipa maninkari saikantawori tasorentsipanko janta inkiteki, shitowanake irirori, irojatzirishitowanake itsipa maninkari ipoñaakawo taapokimentotsiki. Riyaatashitakeri rowaitakeri kempoyirori paampari. Richerayimotapaakeri itsipa otaiyakerori kotsiro, ikantziri: “Pichekayetero kithokitaintsiri kipatsiki, irakayetake.” \* <sup>19</sup> Rimatakeri maninkari richekakero kithokitaintsiri kipatsiki, ipiyotakero inchatonaaki, inkatzikaaitero. Okaatzi oshiyakawori piyantatsiri riraitziri, iriira ikashaakayiriri Pawa maawoini iisaneentanewo. <sup>20</sup> Okaatzi oshiyakaawentziri inchatonaa iroowa okaathapitzira nampitsi rowamaantaitzira. Oshiyakaawentziri ikatzikaaitakeri, iroowa riraa kamayetaintsiri. Tema osheki iraantsi shitowaatatsine ipamankanakero nampitsi. Iweyaakari ipaanteki kawayo osaanaatzi iraantsi. Jatake intaina oonkya okaatzi 300 kilómetro. †

## 15

### *Maninkariite amerone paata 7 owasanketaantsi*

<sup>1</sup> Noñaake otsipa aamparentsi inkiteki. Kameetha okantaka, osheki niyokitziwentakero. Eenitatsi ikaatzi 7 maninkari. Iri inashiyetakawori rowasanketantayetake. Tema okaatzi rantayetakeri maninkari, ari imonkaatari iñagaitziro iyatsimanka Pawa.

<sup>2</sup> Noñaake eejatziri inkaare, oshiyawaitakawo ñaawontsi. Iro kantacha morekathaitake jiroka inkaare. Ari ikatziyayetakari oitsinampaakeriri katsimari owantaneri, rotaiyayetakero iwiyompimento ipawairiri Pawa. Iriira kaari pinkathaterone roshiyakaawo owantaneri, kaari kentakotyaawone iwairo. <sup>3</sup> Romampagaiyanakawoni romampaari pairani Moisés-ni. Iitaitziro “Romampaane oweja”, ikantziri:

Nowinkatharite Pawá, Shintsiperori,

Kameetha pantakeri, niyokitziwentakero.

Pantapiintakero eeroka tampatzikari, piñaanetawo irooperori.

Eeroka pinkathariwentairi atziripaini.

<sup>4</sup> ¿Tekaatsima pinkathataimine, thaamentaimine, raakotaimi piwairo?

Apatziro pitasorentsitzi eeroka.

Eeroka ripokashiyetai atziripaini, impinkathayetaimi.

Tema poñaagantakero osheki okameethatake pantayetakeri.

<sup>5</sup> Noñaatzi inkiteki tasorentsipanko, ashitaryaanaka otasorentsiperotzira. <sup>6</sup> Ari rishitowanake tasorentsipankoki 7 maninkari owasanketantatsine. Kitamaa okantayetaka iithaare, shipakiryaa ikantaka rowaneenkataka. Roma-shipaneetakari ooro. <sup>7</sup> Ikanta apaani inkiteweri kaatatsiri 4, ipawakeri maninkaripaini apaani paso. Oshiyawaitakawo jaka pasoki, ari iyeekiteme iyatsimanka Pawa, kantaitachari ikañaanetzi. <sup>8</sup> Kachaareenkatanake tasorentsipanko, okantakaakawo rowaneenkawo Pawa eejatziri itasorenka. Tekaaitsi kanterone inkye tasorentsipankoki irojatziri onkaatantapaakyaari rowasanketante maninkaripaini.

## 16

### *Pasokipaini iyeekitaka katsimankantsi*

\* **14:18** Kantakotachari jaka “kithokiyetaintsiri”, okithoki uva inatzi. † **14:20** Okaatake iyaatake intaina oonkya 300 kilómetro, iro oshiyawori arika anashitya onkaate 7 kiteesheri, aamaaka onkaate 8 kiteesheri. Iroowa ikantaitziri 1600 estadio.

<sup>1</sup> Nokematzi inkiteki, iita ñaanatanakeriri 7 maninkari, ikantziri: “Piyate pisakotero kipatsiki yeekitaintsiri 7 pasoki oshiyakawori iyatsimanka Pawa.”

<sup>2</sup> Ari retanakawo apaani maninkari risakotakero kipatsiki yeekitaintsiri iwasoneki. Ari omapokanakari antawoite ripathaawaitanake kentakotakawori iwairo katsimari owantaneri, pinkathawaitashitawori roshiyakaawo.

<sup>3</sup> Ikanta itsipa maninkari risakotakero inkaarekipaini yeekitaintsiri iwasoneki. Oshiyanakawo iraantsi inkaare, ithonka ikamake saikantawori.

<sup>4</sup> Ikanta itsipa maninkari risakotakero, oyaapiki ñaatenikipaini yeekitaintsiri iwasoneki. Oshiyawaitanakawo iraantsi ñaapaini. <sup>5</sup> Nokematzi richeraanake maninkari sakotakerori ñaaki, ikantanake: “Tasorentsi, eeroka añaatsiri, pañiitakaga pairani, tampatzikashireri pini, eeroka aminakotairone kameethaini jiroka. <sup>6</sup> Tema ikaatzi owamaayetakeriri ikiteshoretakagaitairi, kapathainkatakaakeriri Kamantantaneripaini rowamaayetakeri, iriira irerone jiroka iraantsi. Tema ripiyaitatyaari irirori.” <sup>7</sup> Nokematziiri richeraanake itsipa janta taapokimentotsiki, ikantanake: “¡Ariwé! Nowinkatharite Pawá, okaatzi pikowakeri pantero tampatzika okantayetaka. Kyaaryoopero inatzi.”

<sup>8</sup> Ikanta itsipa maninkari, risakotakero ooryaaki yeekitaintsiri iwasoneki. Romapokashitanaka ooryaa rotsiyakeri atziripaini. <sup>9</sup> Antawoite rotsiyakeri atziripaini ooryaa, ari opoñaanakari rithainkatasorentsiwaitanake, ikishimawaitanakeri Pawa, ashitawori ishintsinka, owasanketantatsiri. Te okantzimotari ripiyashiretai, impinkathatairi Pawa.

<sup>10</sup> Ikanta itsipa maninkari, risakotakero ipinkathariwentantzira owantaneri yeekitaintsiri iwasoneki. Antawoite otsirenikitana. Antawo rashironkaayetaka atziripaini janta, ratsikawaitakero inene ikemaatsiwaitaka. <sup>11</sup> Ari rithainkatasorentsiwaitanake, ikishimawaitanakeri Inkitesatzi Pawa, tema osheki ikemaatsiwaitaka, osheki ripathaawaitake. Iro kantacha te ripakayimaitawo iyaariperonka.

<sup>12</sup> Ikanta itsipa maninkari, risakotakero antawaaki ñaa Eufrates-ki yeekitaintsiri iwasoneki. Omapokashitanaka opiryaatanake. Montyaapaaka pinkathariyetatsiri rishitowapiintzira ooryaa, romanatya. <sup>13</sup> Irojatziri rishitowantanakari peyari ipaanteki ironoya. Rishitowanake eejatziri peyari ipaanteki owantaneri, ari okantakari ipaanteki thairi kamantantaneri, rishitowanake peyari. Ikaatzi peyari shitowayetaaintsiri, roshiyanakari mashero, <sup>14</sup> kantacha rantayetero kaari iñagaitapiintzi. Rithonka rareeyetakari pinkathariyetatsiri kipatsiki. Iñaanakaayetakariri romanatakayaari, ripiypaakerika Pawa shintsiperori. <sup>15</sup> (Pamine, noshiyapaiyaari koshintzi arika nipiyairo. Kimoshire inkantya aamagainane, oshiyakariri owirori okaakiini iithaare onkene inkithaatanakyaawo, eero raatonkoryaamerekitanaka, rowaañagaitairi.) <sup>16</sup> Ikanta jirikapaini peyari, rapatotakeri pinkatharipaini janta oita “Armagedón”. Riñaane ini Judá-ite jiroka Armagedón. \*

<sup>17</sup> Ikanta weyaantapaakawori maninkari, risakotakero tampyainkaki yeekitaintsiri iwasoneki. Ikemaitatzi cheraanaintsiri tasorentsiipankoki, isaikira saikamentotsi, ikantaitzi: “¡Ari okaatapaake!” <sup>18</sup> Iñagaitakero iporekanake ookathawontsi, ikemaitakero antawoite omoyekanaka kipatsi. Te iñagaitapiintziro oshiyawori jiroka omoyeka, irojatziri pairani owakera itzimantakari atziripaini kipatsiki. <sup>19</sup> Okanta antawo nampitsi, mawakota itankanake. Ari ithonkakari ipookanake nampitsipaini saikatsiri kipatsiki. Ari inkenkithashiryaakotaitanakero iñeeri Babilonia-satzi, rirakagaitairi “imashirenka Pawa”, oshiyakawo piyantatsiri. <sup>20</sup> Ari ithonkaka maawoini othampishi, te iñagaitairo.

\* **16:16** Kantakotachari jaka “Armagedón”, irootake janta romanatapiintakaga pairani Judá-ite.

Ari okantzitaka eejatzi otzishipaini. <sup>21</sup> Paryaapaake tenakitatsiri jiriniki, itsitokayeta-paakeri atziripaini. Eekero riyataakaanakitziro rithainkatasorentsiwaitanake, ikishimawaitantanake ikemaatsiwaitakaga osheki. †

## 17

### *Rowasanketaitero oshiyakawori antawo mayempiro*

<sup>1</sup> Ari ripokashitapaakena apaani maninkari kaataintsiri 7 rotaiyakero iwasone, ikan-tapaakena: “Pipoke, piñeero rowasanketaiteri atziripaini, roshiyayetakawo mayem-piro saikaantakawori otzinkamyaa antawaa.” <sup>2</sup> Jiroka mayempiro, oshiyawaitakawo imayempitayeerome pinkathariwentantatsiri nampitsikipainiki. Oshiyakawo eejatzi oshinkitayeerime maawoini kipatsisatzipaini. <sup>3</sup> Raashiretanakena ochempiki. Noñaake tsinane okyaakaakari kityonkari owantaneri, okaatzi 7 iito, 10 ichée. Eenitatsi wairontsipaini osankenatainchari iwathaki, rithainkatasorentsiwaitaitzi. <sup>4</sup> Okityonkamawotatzi okithaatakari tsinane, anashirikimawotzi eejatzi. Kameetha rowaneenkaitantakawo ooro, eejatzi poreryaatzinkawo mapipaini. Otaiyanakitakeri riwetsikaitziri ooro. Oshiyawaitakawo ari iyeekitakeme oyaariperonka, eejatzi omayempinka. <sup>5</sup> Eenitatsi osankenatainchari otamakoki, te ikemathawetaiawo pairani, okantzi: ANTAWO BABILONIA, ANTAWOITE MAYEMPIRO, KISANEENTAP-EROTAAREWO KIPATSIKI. \* <sup>6</sup> Naminaperotanakero jiroka tsinane oshinkitayaaawo riraa ikiteshiretakagaitanewo ikaatzi rowamagaitakeri. Riraa eejatzi ikaatzi rowamagaitakeri ikenkithatakotanakeri Jesús. Okanta noñaakero jiroka, osheki niyokitziiwentanakeri.

<sup>7</sup> Ikantana maninkari: “¿Litaka piyokitziiwentantawori jiroka? Ari nonkaman-takemi oita oshiyakaawentachari, te riyotakowetaiawo pairani jiroka tsinane, eejatzi jirika owantaneri okyaakaakari, shenitatsiri iito, eejatzi ichée. <sup>8</sup> Itzimitaka pairani roshiyakaawentakeri owantaneri, te iñagaitziri iroñaaka, iro kantacha irootaintsi rishitowe impoñaakyaawo omoonakiki inthomoikiperotatsiri. Rowamagaiteri. Jirikapaini kipatsisatzi, kaari rosankenatakoitzi pairani riwetsikantaitakawori kipatsi, osheki riyokitziiwentereri owantaneri. Tema eero ikemathatziro oita kantakotachari: ‘Itzim-itaka pairani, te iñagaitziri iroñaaka, irootaintsi ripiyai.’ <sup>9</sup> Inkemathatantaityaawori jiroka, okowaperotya intzime yowairentzi. Kaataintsiri 7 jitotsi okyaakaakari tsinane, iro oshiyakaawentakeri 7 otzishi. † <sup>10</sup> Tzimake pairani ikaatzi 7 pinkathariwentakerori janta. Rashiryagaitaka ikaatzi 5 pinkathari. Tzimatsi apaani pinkatharitatsiri iroñaaka. Iriima itsipa pinkatharitatsine, tekera itzimiita. Jirika weyaantyaawone eepichokiinira impinkatharitapainte, eero osamaniperotzi. <sup>11</sup> Jirika katsimari owantaneri tzimitachari pairani, kaari iñagaitzi iroñaaka, itsipa rini, iri kaatapaintsine 8. Ari roshiyawetapaakyaari itsipa kaataintsiri 7 pinkatharipaini. Ari rashiriimaitaitakyaari. <sup>12</sup> Irooma kaataintsiri 10 cheetsi, iro oshiyakaawentziriri pinkatharipaini, kaatatsiri 10. Te ipinkathariwentantayetzi. Tema arika impinkathariwentantanake owantaneri, iri intsipayetyaari impinkathariwentante. Eero osamaniperotzimaita, apa rishirinkapainte eepichokiini ooryaa. <sup>13</sup> Jirikapaini pinkathari rakakotawakayaawo ranteri. Pinkatha roweri owantaneri, eero ripiyathawaitari. <sup>14</sup> Osheki romanateri Oweja. Iri kantacha jirika Oweja, iriira ashiryantachane. Iri imperatariri imperayetantachari. Iri pinkathariwentziri pinkathariwentantatsiri. Iri intsipataiyaari irirori, inkaimashireyetairi, riyoyaitakeri, oisokerotakariri.”

† 16:21 Kantakotachari jaka “tenakitatsiri”, iro ikantaitziri eejatzi “talento”, irojatzi aitairi iroñaaka “40 kilo”.

\* 17:5 Eenitatsi kantatsiri jiroka “Babilonia”, iro nampitsi Roma. Tema iro riñaaneyetari rimananeekiini pairani kemisantzinkaripaini, ikenkithatakotziro jiroka Roma, ikantzi: “Babilonia”. Paminero janta 1 P. 5.13. † 17:9 Eenitatsi jitzirori nampitsi Roma, ikantziro: “Roma, inampiite 7 pinkatharipaini”. Ikantaitzi eejatzi: “Roma, onampi 7 otzishi”.



<sup>15</sup> Ikantanakena eejatzi maninkari: “Jiroka otzinkamyaa antawaani, iroowa isaikaatantakari tsinane. Iriitake oshiyakaawentacha atziripaini nampiyetawori tsikarika, piyoyetainchari tsikarikapaini, ikaatzi ipinkathariwentaitziri tsikarikapaini, kemathatawakaawori riñaane tsikarikapaini. <sup>16</sup> Jirikapaini atziri saikantawori 10 nampitsi, iri oshiyakaawentakeri 10 cheetsi, ari inkisaneentanakeri saikantawori nampitsi oshiyakaawentakeri tsinane. Ari rimatakero irirori owantaneri osheki inkisaneentanakero. Oshiyawaityaawome raatonkoryaatyeerome tsinane, rowawathakyaawome, ritaawaiterome. Tema ari rithonkero nampitsi oshiyakaawentakeri tsinane. <sup>17</sup> Iri Pawa kantakaawori rakawakaantari rantayetero jiroka. Irijatzi kantakaawori ikemisantantariri owantaneri. Iroowa rantaiteri, irojatzi imonkaatantakyaari ikantakeri Pawa. <sup>18</sup> Ari okanta, tema jiroka tsinane iro oshiyakaawentacha antawo nampitsi. Ikaatzi saikantawori nampitsi, ipinkathariwentawetakari nampitawori otsipaki nampitsikipaini.”

## 18

### *Rapathakeroryagaitziro Babilonia*

<sup>1</sup> Okanta okaatapaake jiroka, noñaatzi rishaawiinkapaake itsipa maninkari. Oztimimotziri osheki ishintsinka, osheki rowaneenkawo. Roorentapaakero kipatsi. <sup>2</sup> Richeraapaake, ikantzi: “Rapathakeroryagaitakero antawo nampitsi Babilonia. Apatziro inampitaawo itsipasatzi peyari, te rishinetaitziri rishitowe. Ari ikantaitakeri eejatzi itsipasatzi shiwankiri ipinkaitziri owapiintariri kaminkari. <sup>3</sup> Tema atziripaini ikaatzi saikantawetakawori nampitsi oshiyakaawentakeri tsinane, ashaagantaperowetachari, yomparitawakaapiintachari poñaayetachari otsipaki nampitsi. Ikaimashireyetakeri atziripaini roshiyakotaiyaari ikantawetaga iriroripaini, ikowaperotziro ashaagawontsi, iñaamaminthawaitashitaka. Iroowa iñaantakawori te ikinataari Pawa, roshiyawaitakawo tsinane mayempiro. Iroowa oshiyantakawori ishinkitatieyaawome ashaagawontsi, iro rantantayetakawori oshiyawori mayempitaantsi.” <sup>4</sup> Nokemakeri rapiitanakero richeraanake inkitesatzi, ikantzi: “Asheninká, eero pitsipitari saikantawori nampitsi oshiyakaawentakeri tsinane, pitsipataarikari arika rowasanketaitari. <sup>5</sup> Tema Pawa, ikenkithatziro iyaariperonka ikaatzi tsipatakariri, oshiyawaitakawo eethonkitaatyeeeme iyaariperonka inkiteki, ari opiyotakari. <sup>6</sup> Pinkisawentairi, papiipiinteri powasanketeri. Tema okaatzi oshiyakaawentachari irakaakeriri tsinane shinkitantatsiri, poiapiyeni iroori, tontaari pinkantakero oyepiyanka. <sup>7</sup> Aminaashiwaitaka iroori okantapiintzi: ‘Naaka pinkathawo, eero iñagaitana nashironkaawaitya noshiyakotyaawo kinankawo.’ Tema osheki oshametakaakero owaneenkawo, omayempiwaitake. Iroowa oñaantaiyaawori onkemaatsiwaitaiya. <sup>8</sup> Iro omapokantaiyaari rowasanketaitero, ari omantsiyatake, onkemaatsiwaitaiya, itasheneentawaitai, ritagaitairo. Iri matairone Awinkatharite Pawa rowasanketairo. Tema oztimimotziri irirori ishintsinka.

<sup>9</sup> Arika iñagaitakero oyacharite itagaiya nampitsi oshiyakaawentakeri tsinane, osheki rowashiretakotyaawo, riraakowaityaawo pinkatharipaini, iri tsipayetakariri saikantakawori rantayetakero oshiyakawori mayempitaantsi. <sup>10</sup> Intaina ikatziyaka iriroripaini inthaawantyaawo rowasanketaiteri, inkantaiyeni: ‘¡Ikantamatsitaitziri nampitawori Babilonia-ki!’ Irooperowaiwetaka nampitsi. ¿Okantzitama rowasanketzitaitemi? Tekera rishirinkaperoteeta ooryaa.

<sup>11</sup> Ari inkantairiri riyompariwetapiintari, osheki rowashiretakotyaari, riraakowaityaari, tema tekaatsi riyomparitaiya. <sup>12</sup> Tema iri amanantapiintakeniriri roorote,

iyorikite, poreryaari imapine, otsipasato kithaarentsi, kitamaamawori, anashirimawotatsiri, kityonkamawoperotatsiri, karenimawotatsiri. Tzimawetacha oshiyawori santari. Tzimawetacha riwetsikanewo ipothoyetakeri kameethaini, cheetsi, inchakota pinayetachari, kotsiro, mapi. <sup>13</sup> Tzimawetacha meta, Tzimawetacha otsipasato kasankari, tzimawetacha riraitziri, tzimawetacha owaaki inchato oshiyariri oyeenka pankirentsi, tzimawetacha opane rowaitari, tzimawetacha iwaakate, oweja, iyawayote, noshikayetzirori rishiyakomento, tzimawetacha rimperatanepaini eejatzi inoshikanepaini. <sup>14</sup> Inkantaiyeni: ‘Arira ithonkapaakari chochoki piñaamatapiintari. Te otzimayetai ashaagawontsi pikowapiintakeri, ari okaatapaake owaneenkata.’

<sup>15</sup> Intaina raminakoyetairo riyompariwaitapiintaga, thaawa inkantya irirori eero itsipatagaitziri rowasanketaikeri. Antawoite riraakotyaari rowashiretakotanakyaari. <sup>16</sup> Inkantaiyeni: ‘¡Ikantamatsitaitziri nampitawori janta! Irooperowaiwetaka nampitsi. Tzimawetacha osheki irooperori kitamaamawori imanthaki, anashirimawotatsiri, eejatzi kityonkaperomawotatsiri. Tzimawetacha osheki roorote, imapine poreryaayetatsiri. <sup>17</sup> Apatziro rishirinkaneentanaka eepichokiini ooryaa, ari raperotaitakero antawo ashaagawo.’ Ari ikantakari saikayetaintsiri ramaatakomentoki, intaina ikatziyayetaka raminakotziri raperotaitakeri. Ari ipiyotaiyakani antakoyetziro ramaatakomento, itsipayetakari otetantawori. <sup>18</sup> Ikanta iñaakero oyachaarite nampitsi itagaa, osheki riraakotakawo, ikantayetzi: ‘Tekaaitsi otsipa nampitsi oshiyaiyaawone jiroka irooperotzi.’ <sup>19</sup> Antawoite rowashiretaka, ikantaiyini: ‘Ikantamatsitaitziri nampitawori janta. Ashaagantawetakai aakaite aapiintzira ashaagawontsi amaatakomentoki. Tema apa rishirinkapainta eepichokiini ooryaa, ari raperaataitakerori.’ <sup>20</sup> Irooma eerokapaini inkitesatzi, ikiteshiretakagaitanewo, Otyaantaperoripaini, Kamantantaneripaini, pinkimoshirete, ikamantzitakai Pawa ketziroini rowasanketantakariri saikantawori antawo nampitsi, ikisawentaimi eerokapaini.”

<sup>21</sup> Ikanta apaani maninkari tzimatsiri ishintsinka, raake antawo mapi, rookakero inkaareki, ikantzi: “Nokantakerowa nookakero antawo mapi, ari nonkantakero eejatzi antawo nampitsi Babilonia. Ari ompeyaari, eero iñagaitairo. <sup>22</sup> Eero ikemaitaimi pomampagaiya, onkameñeenkatai piwiyompimento, pisonkare, eejatzi pityoore. Eero iñagaitaimi pikaatzira piwetsikayetziro oitarika. Eero ikemaitairo ompaimpate pitoonkamento. <sup>23</sup> Eero iñagaitairi riporekai pootamento. Eero iñagaitaimi paawakagaiya. Ari okaatapaake maawoini jiroka, tema osheki poitzipinashireyetaikeri itsipasatzi atziripaini, oshiyawaitakawo pinkisaminthatatyeerime. Tema antawoite ishintsiwetaka ikaatzi yomparitapiintawetzimiri. <sup>24</sup> Iri kemaatsiwaitakaakariri itsipasatzipaini, ikapathainkatakaawaitakeri Kamantantaneripaini. Ari ikantzitakari eejatzi maawoini ikiteshiretakagaitairi.”

## 19

### *Ithaamentaita inkiteki*

<sup>1</sup> Okanta okaatapaake jiroka, nokematzi kamenitanaintsiri inkiteki ikaimaiyini, ikantzi:

¡Oojé! Iriira Pawa owawisaakotairi. Oztimimotziri rowaneenkawo, eejatzi ishintsinka.

<sup>2</sup> Okaatzi ikowiri ranteri, tampatzika okantayetaka.

Iriiperori rini.

Tema rowasanketakero mayempiro owaariperotakeriri kipatsisatzipaini.

Ripiyawentairi ikaatzi rowamagaitakeri rimperatanewo.

<sup>3</sup> Irojatzzi rapiipiintaiyirini, ikantzi:

¡Oojé! Okatziyainkataka oyachaarite.

<sup>4</sup> Ikanta 24 itzinkampaini, itsipatakari 4 inkiteweri, rotziwerowaiyanakani, tema ipinkathatanakitziiri Pawa risaikake irirori risaikamentoki, ikantaiyini:

¡Ari onkantaitaateyeeyaani! ¡Oojé!

<sup>5</sup> Tzimatsi ñaawaitanaintsiri saikamentotsiki, ikantzi:  
Rimperatanewo Pawa, pinthaamentaiya.

Pimpinkathatairi maawoini, petanakyaari tsinampashireriite pimatzityaari eejatzi iriiperoriite.

<sup>6</sup> Nokematzi kamenitapaintsiri, oshiyawaitakawo ipiyotaiyanira atziripaini, ariwaitake pareenkari, ariwaitake ookathawontsi. Ikantaitzi:

¡Oojé! Pinkathariwentantai Pawa, iri Awinkatharitetaari Shintsiperori.

<sup>7</sup> Thame ankimoshirewenter, thame ampinkathateri, tema irootaintsi roimoshirenkai-teri raawakaiya Oweja. Ari wetsikaka iinantaari.

<sup>8</sup> Kitamaari okantaka oithaare, te onkipatsiwaite, poreryaa okantaka. Oshiyakaawentachari “iinantaari”, iriyyetake kemisantzinkaripaini ikiteshoretakagaitairi. Oshiyakaawentachari “te onkipatsiwaite oithaare”, iroowa kameethari rantayetakeri jirikapaini.

### *Rakiyootaiteri Oweja*

<sup>9</sup> Ripokashitapaakena inkitesatzi, ikantzi: “Posankenatero jiroka: Osheki inki-moshiretai inkaate inkaimaiteri rakiyootairi Oweja raawakaiya.” Ikantanakena eejatzi: “Jiroka, riñaaneperowa Pawa ini.” <sup>10</sup> Ari notziwerowanaka nopinkathatanakeri maninkari, ikantana: “¡Eero pipinkathatana naaka! Ari akaataiyini rimperatai Oweja, ari noshiyimi eeroka, ari noshiyakari eejatzi ikaatzi oisokeroyetakawori ikenkithatakotapaintziri Jesús. Iriira pimpinkathate Pawa. Tema okaatzi ikenkithatakotapaintziri Jesús, iro yoshiretakaakeriri Kamantantaneripaini.”

### *Kyaakaakariri kitamaari kawayo*

<sup>11</sup> Noñaatzi ashitaryaanaka inkite. Eenitatsi kitamaari kawayo janta. Iitaitziri kyaakaakariri, “Oisokerotantaneri”, iitaitziri eejatzi “Iriiperori”. Arika rowasanke-tante, tampatzika okanta. Ari okanta eejatzi arika romanatante. <sup>12</sup> Oshiyawaitakawo paampari roki. Ramanthaichonchoitakawo ramanthaire. Rosankenatakawo wairontsi kaari riyotakoitzi apatziro riyotziro irirori. <sup>13</sup> Ikithaatakawo ithakakeri iraantsi. Iri iitaitziri “RIÑAANE PAWA”. <sup>14</sup> Eenitatsi rowayerite inkiteki. Kitamaachonchoi okanta iithaare, te onkipatsiwaite. Iri oyaatakeriri kyaakaakariri kitamaari iy-awayote. <sup>15</sup> Ari ishitowanake ipaanteki oshiyawori othoyempyaanikitzi osataamentotsi, iro ritsitokantayetaiyariri iisaneentanewo. Iri imperatantaiyaawone iyotsirot-kikotzite. Iri wetsikakeniriri oshiyawori riraiziri “Imashirenka Pawa Shintsiperori”. <sup>16</sup> Rosankenatakawo wairontsi iithaareki, eejatzi iporiki. Jiroka wairontsi: PINKATHARIWENTZIRIRI PINKATHARIITE. IMPERATARIRI IMPERATANTANERIITE.

<sup>17</sup> Noñaatzi itsipa maninkari ikatziyantakari ooryaa, ikaimapaakeri maawoini tsimeryaani aayetatsiri, ikantziri: “Pipoke pimpiyoty, poyaawo impayetemiri Pawa. <sup>18</sup> Tema powatyeeyaari atziriwatha: iwatha pinkatharipaini, iwatha reeware owayeripaini, iwatha iriiperoriite, iwatha kyaakaapiintariri iyawayote. Ari powanakyaawo eejatzi iwatha iyawayotepaini. Te apatziro powaiyaari jirikapaini powayetaiyawo eejatzi iwatha maawoini: noshikaarewo eejatzi kaari noshikaarewo, tsinampashireriite eejatzi iriiperoriite, maawoini.” <sup>19</sup> Noñaatziiri katsimari owantaneri, noñaatziiri eejatzi kipatsisatzi pinkatharipaini itsipayetakari rowayerite. Ari ipiyotaiyakani ikowi romanateri kyaakaakariri kitamaari iyawayote itsipayetakari eejatzi rowayerite. <sup>20</sup> Tzimatsi iita otaiyawakeriri katsimari owantaneri. Ari ikantzitariri thairi kamantantaneri itsipatapiintakari ritasonkawentantzi. Ari okanta ramatawitantakariri ikaatzi kentakoyetakawori iwairo owantaneri, ikaatzi pinkathayetakerori roshiyakaawo. Jirika owantaneri eejatzi thairi kamantantaneri, rookaitakeri opaampaparenthaatakera inkaare, tsika okiteriteyatziitake shitziwawo

oyachaarinka. <sup>21</sup> Rowamagaitakeri maawoini kemisantanageriri, rowathagaitantakeri shitowapaintsiri ipaanteki kyaakaakariri kitamaari kawayo. Kemaperowaitaka tsimeryaanipaini.

## 20

### *Osheki osarentsi, onkaate 1000*

<sup>1</sup> Noñaatzi rayiitapaake itsipa maninkari. Rotaiyakero rashitaryaantaitawori omoon-aki inthomoiperotatsiri. Rotaiyake eejatzi antawoite kotsirotha. <sup>2</sup> Jirika maninkari, rotaiyapaakeri ironoya, iitzitaitari maanke tzimaintsiri pairani. Iriira Kamaari, Satanás. Roosotakeri onkaate 1000 osarentsi, <sup>3</sup> rotziryaakeri omoonakiki inthomoiperotatsiri. Rashitakotakeri, rontsirekakotakeri eero ramatawitantaari atziripaini, irojatzi imonkaatantakyaari onkaate 1000 osarentsi. Arika onkaatapaake jiroka, ari roosoryaakotapaintereri eepichokiini.

<sup>4</sup> Noñaatzi osheki saikamentotsi jimpe risaikayetai inkaate pinkathariwentantaatsine. Ari noñaakero ishirepaini ikaatzi rowamaawentaitakeri ikemisantairo riñaane Pawa, ikenkithatakotapaintziri Jesús. Te ipinkathatziri jirikapaini katsimari owantaneri, te ipinkathatziro roshiyakaawo eejatzi. Te ikentakotamakotawo iwairo owantaneri eejatzi rakoki. Iriira piriintaacha, ipinkathariwentantai itsipataari Cristo okaatzi 1000 osarentsi. <sup>5</sup> Iriima itsipa kamayetaintsiri, eero rañaayetai irirori, irojatzi imonkaatantapaakari 1000 osarentsi. Iroowa iitaitakeri “Etawori Añagaantsi”. <sup>6</sup> Kimoshire inkantaiya inkaate piriintaachane iitaitakeri “Etawori Añagaantsi”. Tema tasorentsishireri rinayetake. Eero rapiitziro inkamayetai. Kañaane inkantaiya, iri oshiyaiyaarine Imperatasorentsitaarewo rantawaitainiri Pawa, rantawaitainiri eejatzi Cristo. Ari intsipataiyaari impinkathariwentantai onkaate 1000 osarentsi.

<sup>7</sup> Arika imonkaatapaakya 1000 osarentsi, ari romishitowaitapaintereri Satanás rashitakoitakerira. <sup>8</sup> Arika rishitowapainte, retapaiyaawo ramatawitapairi maawoini atziri tsikarika inampiyetawo. Jiroka nampitsipaini iitaitziro “Gog”, otsipa “Magog”. Impiyotairi maawoini romanatakayaari. Intzimaperote osheki atziri, ariwaitake oshenitzi impaneki. <sup>9</sup> Riyaataiyakeni tsika owintenipathatzi, rotzikapaakeri oiteshiretaarewo tsika ipiyotaiyakani irirori. Rotzikapaakero eejatzi iitaitziri “Etakotaawo Nampitsi”. Omapokashitanaka oparyaapaake paampari, raperaatairi maawoini. <sup>10</sup> Rookaitakeri Kamaari opaampaporentthaatakera inkaare, kiterimoitaaintsiri oyachaarinka. Ari rookitaitakeri katsimari owantaneri, itsipatagaitakeri thairi kamantantaneri. Rashi rowaatyeero inkemaatsiwaitaiya.

### *Riyakowentantaitzi kitamaariki saikamentotsi*

<sup>11</sup> Noñaatzi antawoite kitamaari saikamentotsi. Eenitatsi saikantakawori, iriira matakero rithonkairo inkite eejatzi kipatsi. <sup>12</sup> Ari ikatziyaiyakani kamayetaintsiri janta kitamaariki saikamentotsi, retakari itsipayetaari iriiperoriite eejatzi tsinampashireriite, maawoini. Ari rampinairyaanakero osankenarentsi, rampinairyaanakero eejatzi otsipa tsika rosankenatakoyeta añaayetaatsine. Raminakoyetairi atziri oiyetarika rantayetakeri okaatzi rosankenatakoitakeriri. <sup>13</sup> Eejatzi ikaatzi piinkayetaintsiri ñaaki, ari ipiyoyetakari irirori. Ikaatzi kamayetaintsiri, ari risaikitaiyakani eejatzi janta, oshiyawaitaawo atziritaatyeme “Kaamanetaantsi”, ipakagairime imperawaiwetakari. Ari ikaatzi raminakoitairi okaatzi rantayetakeri. <sup>14</sup> Rookaitakero eejatzi “Kaamanetaantsi” opaampaporentthaatakera inkaare itagaiya. Jiroka opaampaporentthaatakera inkaare, iroowa iitaitziri “Apitetanaintsiri Kaamanetaantsi”. <sup>15</sup> Rookaitakeri eejatzi opaampaporentthaatakera inkaare maawoini kaari osankenatakotachane rañaayetai.

## 21

### *Owakerari inkite, owakerari kipatsi*

<sup>1</sup> Noñaatzi owakerari inkite, owakerari kipatsi. Tema thonkaka etawori inkite, eejatzi etawori kipatsi. Te iñagaitairo inkaare. <sup>2</sup> Noñaatziiro ishaawiinkapaake inkiteki apaani nampitsi tasorentsitsiri, iitaitziri “Owakerari Jerusalén”. Iri Pawa owayi-itakaantakerori. Owaneenkakitaka, ariwaitake apaani tsinane owaneenkashitari oimentyaari. <sup>3</sup> Ari richeragaitanake janta saikamentotsiki, ikantaitzi: “¡Pamine! Isaikimotairi kipatsisatzipaini tasorentsithaante inampitawowa Pawa. Ari itsipataari Pawa inampitaawo, isheninkataari. <sup>4</sup> Iri Pawa osheyookiperotairine, roimoshirenkayetairi. Eero ikaamaneyetai, tekaatsi onkatsitzimowaitai, tekaatsi iragaachane, tekaatsi ke-maatsiwaitaachane. Tema ari okaatapaake maawoini jiroka.”

<sup>5</sup> Ikenkithawaitanake saikaintsiri saikamentotsiki, ikantzi: “Nowakeratakagairo maawoini.” Ikantanake eejatzi: “Posankenatero jiroka, irooperori ñaantsi ini, ashi owaatyero.” <sup>6</sup> Ikantana eejatzi: “¡Ari iweyaapaaka! Naakatake oshiyawori etawori osankenarentsi. Naakatake oshiyawori eejatzi weyaantawori. Naakatake etakaan-tanakawori. Naakatake thonkairone. Tzimatsirika merewaitatsine, ari nirakagairi ñaa owañaantatsiri. Nompashitaiyaari, te ipinata. <sup>7</sup> Iroowa nokashaakaakeriri oitsi-nampaantaneriite. Naaka Pawa ipinkathaitziri. Iriira noshiyakagairi notomipaini. <sup>8</sup> Iro kantzimaitacha eero notomintaari thaawinkari, kisoshireri, kisaneentanteri, tsitokanteri, mayempiri, matsintzi, pinkathatziriri oshiyakaawontsi, thairi. Iri taayetaachane opaampaporenthaatakera inkaare, kiterimoitaaintsiri oyachaarinka. Iroowa apitetanaintsine inkamayeetai.”

### *Owakerari Jerusalén*

<sup>9</sup> Okanta okaatapaake jiroka, ripokashitapaakena maninkari owasanketantanteri otaiyakerori iwasone. Ikantapaakena: “Pipoke, noñaayemiro oshiyakaawentziri tsinane iinantyaari Oweja.” <sup>10</sup> Raashiretanakena ochempiki. Roñaagakenawo nampitsi tasorentsitsiri iitaitziri Jerusalén, rowayiitairi Pawa opoñagaawo inkiteki. <sup>11</sup> Janta nampitsiki, ari iñagaitairo rowaneenkawo Pawa, shipakiryaaawaitake, ariwaitake okantaga mapiki porekatsiri, pinaperotachari. \* <sup>12</sup> Antawoite okantaka otantonampi. Eenitatsi 12 omoo ikyagaitapiintzira. Eenitatsi 12 maninkari kempoyiirori omoo ikyagaitapiintzira. Ari rosankenaitakero iwairo itomiite Israel-ni. <sup>13</sup> Okaatzi mawa omoo montetakariri rishitowapiintzira ooryaa. Eejatzi ikyaapiintzira ooryaa okaatzi mawa. Katonkokinta okaatzi mawa. Kirinkakinta okaatzi mawa. <sup>14</sup> Tzimatsi okaatzi 12 antawoite mapi otziyantakerori otantonampi. Ari osankenatakari 12 iwairopaini Otyaantaperori.

<sup>15</sup> Jirika ñaanatakenari, rotaiyake rimonkaamento riwetsikaitziri ooro, iro rimonkaatantyaawori otantonampitaga, eejatzi omoo ikyaapiintaitzira. <sup>16</sup> Arira imonkaanampitawakaa jiroka nampitsi, te anaanampitawakaa. Ikanta jirika, retanakawo rimonkaanampitakero, okaatzi 2200 kilómetro osanthanka, eejatzi okaatzi ojenokitzi. † <sup>17</sup> Rimonkaatakero eejatzi tsika okaatzi otontatzi otantonampi, okaatzi 144 akosampi. Iro rimonkaatantakariri jirika maninkari oshiyawori rakosampi atziri rimonkaatantapiintakariri irirori. <sup>18</sup> Jiroka otantonampi, oshiyawaitakawo mapi poreka okantaka. Riyoshiita ooro riwetsikantaitakawori nampitsi, poreka okantaka. ‡ <sup>19</sup> Itzinkamitantaitakawori otantonampiki, iro ragaitake porekari mapi, pinaperotachari. Jiroka owairopaini mapi riwetsikaitantakawori: jaspe, zafiro, ágata, esmeralda, <sup>20</sup> ónice, cornalina, crisólito, berilo, topacio, crisopraso, jacinto, amatista.

\* **21:11** Kantakotachari jaka “porekatsiri”, iro iitaitziri eejatzi “jaspe”. † **21:16** Kantakotachari jaka “2200 kilómetro” iro ikantaitziri eejatzi “12000 estadio”. ‡ **21:18** Kantakotachari jaka “poreka”, oshiyakawo okanta poteryaa, eejatzi vidrio.



<sup>21</sup> Okaatake 12 omoo ikyaapiintaitzi, iro ragaitake antawoperori kitamaari mapi, iro rimokaitakeri riwetsikantakawori. Maawoini awotsite nampitsi, riyoshiitaka ooro riwetsikaitantakawori, poreka okantaka. §

<sup>22</sup> Te otzimapai janta tasorentsipanko. Tema iro inampi Awinkatharite Pawa Shintsiperori itsipataari Oweja. Iri poyaataawori tasorentsipanko janta. <sup>23</sup> Te inkowaiya ooryaa, eejatzi kashiri. Tema rowaneenkawo Pawa kiteeshetakairori. Iri Oweja oshiyaariri ootamentotsi. <sup>24</sup> Iri oiteeshetakotairiri atziripaini rashitaari janta. Pinkatharipaini tzimawetachari rowaneenkawo kipatsiki, kameethaini risaikayetai janta ipinkathatairira Pawa. <sup>25</sup> Eero otsirenitapai ashi owaatyero onkiteeshetai. Te ashitaa nampitsi janta. <sup>26</sup> Ikaatzi tzimawetachari rowaneenkawo kipatsiki ipinkathaweetari, kameethaini risaikayetai impinkathatairi Pawa. <sup>27</sup> Eero itzimapai janta kaariperotapaatsine, eero iñagaitairi antayetairone ipinkaitziri, eero itzimapai eejatzi thaiyachane. Apatziro inampiyetaiyaawo ikaatzi rosankenatakotakeri Oweja rañaaayetai janta.

## 22

<sup>1</sup> Noñaakero ñaa kañaanetakaantatsiri. Kityaaniki okantaka. Iro shitowapaintsiri risaikamentoki Pawa itsipatakari Oweja, \* <sup>2</sup> iro shiyaagachari niyankineki awotsi. Imontethapyataakawo ishokantakawo chochoki kañaanetakaantatsiri. Okantaitatya okithokitzi kashiriki eejatzi osarentsiki. Etsiyatakotakaantapai oshi. <sup>3</sup> Eero otzimapai owasanketaantsi janta. Ari isaikairi risaikamento Pawa, eejatzi rashi Oweja. Rashi rowaatyero rantawaitapainiri rimperatanewo. <sup>4</sup> Iñaawootairi Pawa. Inkentakotamakotaiyaawo atziripaini iwairo Pawa. <sup>5</sup> Eero otsirenitai janta. Eero itzimapai ooryaa. Iri kiteeshetaatsine Awinkatharite Pawa. Rashi rowatyero impinkathariwentairi atziripaini janta.

### *Irootaintsi ripiyai Cristo*

<sup>6</sup> Ikantanakena maninkari: “Iroopero ini jiroka ñaantsi, kantacha ankemisantero.” Ikemetaakerira pairani Awinkatharite Pawa riyotakaakeri Kamantantaneripaini, ari ikantanakena eejatzi naaka, rotyaantakenari imaninkarite roñaagayetakenawo jiroka, iro riyotantaiyaari rimperatanewo irootaintsi iñagaitero oitarika paata.

<sup>7</sup> Jiroka ikantzi Jesús: “¡Pamine! Irootaintsi nipiyai. Kimoshire inkantaiya kemisan-takerori ikamantantaitakeri jaka osankenarentsiki.”

<sup>8</sup> Naakaga Juan osankenatzirori jiroka. Naaka ñaakerori maawoini, naaka kemakero eejatzi. Ari notziwerowawetanaka nompinkathateri maninkari oñaagakenawori maawoini jiroka. <sup>9</sup> Ikantanakena irirori: “¡Eero pipinkathatana naaka! Ari akaataiyini rimperatai Pawa, ari noshiyimi eeroka, ari noshiyari Kamantantaneripaini piitayetziri ‘iyeki,’ noshiyari eejatzi kemisantairone osankenatainchari jaka. Iri pimpinkathatai Pawa.”

<sup>10</sup> Ikantanakena eejatzi: “Okaatzi posankenatakeri awisaatsine paata, eero pontsirekakotziro, tema irootaintsi iñagaitero. <sup>11</sup> ¡Rowatsiperotya inkaariperoshirete ikaatzi kaariperoshiretatsiri iroñaaka! ¡Rowatsiperotya inkoweenkashirete ikaatzi koweenkashiretaintsiri iroñaaka! ¡Inintaaperotaiya kameetha ikaatzi kameethatatsiri iroñaaka! ¡Inkiteshireperotai ikaatzi kiteshiretaintsiri iroñaaka!

<sup>12</sup> ¡Irootaintsi nipiyairo! Nipinayetairi atziripaini okaatzi rantawentakari apawopaini. <sup>13</sup> Naaka oshiyawori etawori osankenarentsi, Naaka oshiyawori weyaantawori eejatzi. Naakatake etawori, Naakatake weyaantyaawone. Naakatake etakaanakawori, Naakatake thonkairone.”

§ 21:21 Kantakotachari jaka “kitamaari mapi”, irojatzi iitaitziri “perla”. \* 22:1 Kantakotachari jaka “kityaaniki” oshiyakawo okanta poteryaa, vidrio eejatzi cristal.

<sup>14</sup> Kimoshire inkantaiya inkaate kiwayetairone iithaare, onkene rishinetagaiteri chochoki añakaantatsiri, onkene inkyaayetai omooki ikyaapiintaitzira nampitsiki. <sup>15</sup> Eero ikyaayetai janta oshiyakariri otsitzi, kisaminthatantaneri, koweenkatatsiri, tsitokantaneri, pinkathatakeriri oshiyakaawontsi, ametapiintakawori ithaiya.

<sup>16</sup> “Naakatake Jesús, otyaantakeriri maninkari inkamantemiro jirokapaini, powawisayeniri apatowentapiintariri Pawa tsikarikapaini. Naaka charinetariri David-ni. Naakatake iitaitziri ‘Impokiro Sariwoto.’ ”

<sup>17</sup> Ikantzi Tasorenkantsi: “Pipokeeta.” Ari okantzitari eejatzi oshiyakawori tsinane iinantaityaari. Inkaate kemayetairone jiroka, inkantayetai: “Pipokeeta.” Ripokeeta mereyetatsiri. ¡Itzimirika kowanaintsiri rirero ñaa añakaantatsiri, rirawaite, te ipinata!

<sup>18</sup> Tzimatsi nonkamanteriri kemairone jiroka osankenatakoyetakaga awisaatsine paata: Tzimatsirika owanaawaitakerone osankenatainchari jaka, ari rowanagainiri Pawa inkemaatsitaiyaawo okaatzi kenkithatakotainchari jaka osankenarentsiki.

<sup>19</sup> Tzimatsirika thañapithatantakyaawone okaatzi osankenatainchari jaka, ari rithañapithataiyaari paata Pawa irirori eero rishinetagairi chochoki añakaantatsiri. Eero ikyagai nampitsiki ikenkithatakotaitakeri jaka.

<sup>20</sup> Jirika kenkithatakaantakerori maawoini jiroka, ikantzi: “Irootaintsi nipiyairo.” Ari nakanake naaka: “Ari onkantaitaatyeyaani, intsipaite pipiyai.” <sup>21</sup> Onkamintha ineshironkayetaimi Awinkatharite Jesucristo janta. Ari onkantaitaatyeyaani.